



Noquen hihbaan joi

Capanahua New Testament

Contents

MATEO	1
MARCOS	59
LUCAS	92
JUAN	152
HAHNIBO	192
ROMANOBO	243
1 CORINTO	272
2 CORINTO	294
GALATABO	309
EFESIOBO	317
FILIPOS	327
COLOSAS	333
1 TESALONICABO	339
2 TESALONICABO	344
1 TIMOTEO	347
2 TIMOTEO	354
TITO	359
FILEMON	362
HEBREOBO	364
SANTIAGO	382
1 PEDRO	388
2 PEDRO	395
1 JUAN	399
2 JUAN	405
3 JUAN	406
JUDAS	407
JAYAXIHQUIBO	409



Noquen hihbaan joi

New Testament in Capanahua (PE:kaq:Capanahua)

Language: Capanahua

Provided by: Wycliffe Bible Translators, Inc.

This print-on-demand edition of Scripture is produced and provided at cost by the Digital Bible Society in partnership with the Bible League of Canada, Open Doors International, and other missions and translation agencies. To order additional copies of this or other Bibles, please visit www.dbs.org (USA), www.bibleleague.ca (Canada), and www.opendoors.org (Europe).

Copyright and Permission to Copy

Copyright © 2008 Wycliffe Bible Translators, Inc.

Copyright © 2008 Wycliffe Bible Translators, Inc. Scripture text used by permission.

PDF, ePub, and MOBI Bible covers and design are copyrighted 2017 by the Digital Bible Society (www.dbs.org).

PDF generated on 2017-08-24 from source files dated 2017-08-24.

67b70fe7-b2f7-5c93-9e34-f9adcdf453ad

ISBN: 978-1-5313-0315-0

MATEO

Mateonen huishani joi siri

Jesucriston xohtabo

(Lc 3.23-38)

1 Jahuen xohtabo toponpaquexon ta Jesucristo David jaa xohtahi non honanai. Jaton hepa coin ta Abraham janishqui.

² Abrahanen baque ta Isaaque janeya janishqui. Isaaquen baque cahen Jacobo. Jacobon baque cahen Judá. Ju-dapan huetsabo rihbi jai. ³ Judapan baque cahen Fares betan Zara. Tamara qui jan baquejani rabe ta jaabo qui. Faresen baque sca cahen Esrom. Es-romana cahen Aram. ⁴ Aramana cahen Aminadab. Aminadabena cahen Naason. Naasomana cahen Salmon. ⁵ Salmonena cahen Booz, Rahaba qui jan baquejani. Boozena cahen Obed, Rut qui jan baquejani. Obedina cahen Isaí. ⁶ Isainena cahen David, quiquin hapo. Davidinina cahen Salomon, Uríasnen haibo qui jan baquejani.

⁷ Salomonena cahen Roboam. Roboamena cahen Abías. Abíasnena cahen Asa. ⁸ Asana cahen Josafat. Josafatena cahen Joram. Joramana cahen Uzías. ⁹ Uzíasnena cahen Jotam. Jotamana cahen Acaz. Acazena cahen Ezequías. ¹⁰ Ezequíasena cahen Manases. Manasesena cahen Amon. Amomana cahen Josías. ¹¹ Josíasena cahen Jeconías, Jeconías huetsabo rihbi. Babilonia mai janin hapon hiohah ta jano sca jihuensisqui.

¹² Babilonia mai janinxon sca ta Jeconíasnen Salatiel baquejanishqui.

Salatielnin baque cahen Zorobabel.

¹³ Zorobabelnina cahen Abiud.

Abiudena cahen Eliaquim. Eliaquimina cahen Azor. ¹⁴ Azorona cahen Sadoque.

Sadoquena cahen Aquim. Aquimana cahen Eliud. ¹⁵ Eliudena cahen Eleazar. Eleazarnena cahen Matan. Matamana cahen Jacobo. ¹⁶ Jacobonena cahen José. José ta Marían bene janishqui. María cahen Jesusen mama. Jesus cahen Cristo.

¹⁷ Jaa rahsi toponpaquehah ta catorce joni jaiqui, Abraham janinxon David caman toponpaquehah. David janinxon sca Babilonia mai janin caníbo caman toponah ta catorce rihbi qui. Babilonia mai janin caníbo janinhax Cristo caman cahen catorce rihbi.

Jesucristo baquexo cainai

(Lc 2.1-7)

¹⁸ Jesucristo ta nescari cainnishqui. Marían papabaan ta jaton baque hihbojamanishqui, José hinanyah-noxon. Josen bihriyamahiya ta Dios Yoshiman María baque hinannishqui.

¹⁹ Josen hahcama bi jahuen haibo jan bihyaxihqui ma tohoyahi jisxon bihtima shinanscaquin. Bihcatsihyamascaxon bi ponte joni hihxon, jahuen haibojati rabinmacatsihyamaxon, tsoabi yohixonma jenebahinti shinanscaquin. ²⁰ Jascajati shinan shinanxon sca namaquen Papan yonoti jisquin. Sanarenenax jaa yonoti yohuani:

—Josen. Davidi baquen. Miin haibo María bihresscahue. Bihti qui raqueyamahue. Jahuen xahquin janin nanesci ta Dios baque qui, Dios Yoshiman baquejahah. ²¹ Bebo baque ta bihyaxihquiqui. Jaa bebo baquen ta jahuen jihuetahbo mahnebohanxon jihuemayaxihquiqui, jato xahbanen sca jaton tiromajanicabo paquenon. Jaa copi tah min jaa Jesus janeja yaxihqui —hahquin.

²² Papan jato yohiha jahuen joi yohinicaaan yohini quescabijaquin janon ta Papan jascajanishqui.

²³ Jaabaan huishani ta nea qui:

Jisnahue. Bebaan honanahma bi ta xontaco tohoxon baque bihyaxihquiqui. Cainscaya ta Emmanuel jaa janeyaxihihcanihqui.

Emmanuel ta Papa Dios ta noque betanbi hihquiqui hihcatsihquiqui.

²⁴Namacax mohi sca jaax, caxon jahuen haibo bihquin, noquen Hihbaan yonotinin yohihah quescabijaquin bihresscaquin. ²⁵Haibo bihres sca jaax bi hahbe hoxayamatahbi, jahuen baque jan bihnnon caman. Cainscaya, jahuen jane sca Jesus.

Huishi honanmisbo

2 Herodes quiquin hapo jai tian ta Judea mai janinxon Jesusen maman jaa bihnishqui, Belen jema janinxon. Jaatian hocho quehax, bari cainai quirihax, jonibo nocoti. Huishi honanmisbo Jerusalen janin nocoti became. ²Quiquin hapon xoboho mapexon yocacanquin:

—Mato judiobaan quiquin hapo baquexo cainhoh tah non jisi jahui. ¿Jahuerahnon hin? Bari cainai quirixon tah non jahuen huishi jisoqui. Jaa copi tah non hahqui raboxonen tisquihahpaquehi jahui —hihcandi.

³Jascaraiboya quiquin hapo Herodes rahte rahteti. Jerusalen janin jihuetaibo rihbi rahte rahtecani. ⁴Jahuen quiquin sacerdoteoya judiobaan quirica honanbo quenamaxon sca Herodesnin jato yocauquin:

—¿Jahuerahnonxon Cristo baquexo bihti quin? Yohinahue —hahquin.

⁵—Judea mai janin, Belen jema janinxon raham. Jascajaquin ta Papan joi yohinicaton huishanishqui.

⁶Belen. Mia tah min Judapan mai meha jema qui. Caibo Judea jemabo mia mentan hashoan hani que bi ta mia rihbi jaabo mentan hashoan hani qui. Mia janinhax ta quiquin hapo jayaxihquiqui. Jaan ta heen israel jonibo jihuemayaxihquiqui.

Papan joi yohinicaton ta jascajaquin huishanishqui —hihcandi.

⁷Nocotaibo quenabohanxon sca honaxonbi Herodesnin yocauquin, sirijaquin honancatsihquin:

—¿Jahuentian man jahuen huishi jisoquin? —hahquin. ⁸Honanxon sca, jato yohiquin:

—Belen janin bonahue. Nocotax, sirijaquin honannoxon yocacahnoxahnahue, jahuerahnon hin jaa baquexo. Meraxon hea yohihi sca beribiyaxahnahue, hean rihbi hen jaa bebonxon raboxonen tisquihahpaquehi canon —jato jaquin.

⁹Jascajaquin yohihah, boresscaci. Piconx nai bejisahntanaibaan bi bari cainai quiri janinxon jisobo huishi xabarihibihi. Xabacanahi cahi, jato bebon cahax, baquexo machi sca nihreneni. ¹⁰Jaa huishi merarihbihax hihti jenimacani. Coin coinscaci.

¹¹Nocotax xoboho mapexon jahuen mama Maríaya baquexo meracanquin. Raboxonen nihxon hahqui tisquihahpaquexon, jaton bohnantibo quehpexon jaa bexonaibo hinancanquin. Oro, hahan hininjatibo rihbi, hinijanoxon hahan rasquitihbo rihbi hinancanquin. ¹²Jaatian sca namaquen joi nincacanquin, Herodes janin catima sca Papan jato yohihah. Jaa copi ta jaton main caribinoxon huetsa bahin sca bocannishqui.

Egipto main cahibo

¹³Jaton main boresscaiboya sca, noquen Hihbaan yonoti hahqui sanareneni jahui namaquen Josen jisribiquin.

—Catanhue. Jahuen mamayabi baquexo botanhue, Egipto main histon cahax jano jihuehue, hen mia janohax cati yohinon caman. Baquexo rehtenoxon ta Herodesnin benanoxihquiqui —hahquin yonotinin. ¹⁴Huenixon sca baquexoya jahuen

mama yamebi hioquin. Egipto main nocoti cahi cahi. ¹⁵Nocotax janobi jihuetai, Herodes hihnon caman. Jascari ta Papan joi yohinicateon huishani joi jai quesa jaresscanishqui: Egipto mai janinhah tah hen heen baque quenamaniqui hihqui jaa huisha.

Baquebo rehtetannahue hahxon Herodesnin jahuen sontarobo yonohi

¹⁶Egipto mai janin José cariyamahiya ta hocho quehax jahuibo Herodes janin cayamascanishqui. Hea yohihi joyaxahnahue Herodesnin jato jaipi bi huetsa babin cahi jaa tecayacahini cahi. Jaton main boresscaibohi honanax sca, Herodes sina sinati. Jato yocacahtipixon, jaatihi basi sca huishi jismenonibo jai honanxon, jahuen sontarobo sca yonoquin.

—Belen jema janin jai baquebo rehtetannahue, rabe bari jaibo, hashoan naman hihquibo rihbi rehtetannahue, Belen senen jai jemabo quiha baquebo rihbi rehtetannahue jatihibi —jato jaquin, Herodesnin. ¹⁷Jaa copi ta Papan joi yohinica Jeremíasnen huishani joi quesa sca janishqui. Jaa joi ta nescari qui:

¹⁸Ramá janin ta sai saihihquibo qui. Huinihibo, huaohihquibo hichahi. Raquel ta jahuen baquebo qui huinihiqui. Jenquetsahaxon sirijaquin shinamatimascai, jahuen baquebo yamahiya, rehtenahbo quen hihqui jaa huisha.

¹⁹Baquebo jascajaquin retemanish ta Herodes sca mahuanishqui. Jaa mahuataiya ta Egipto mainxon namaquen Papan yonoti Josen jisnishqui.

²⁰—Caresscatanhue. Israeli main canoxon miin haiboya jahuen baquexo hiorihbitanhue. Baquexo rehtecatsihquibo ta mahuascaiqui —yonotinin jaquin.

²¹Mohiyahxon sca jahuen baquexoya jahuen haibo boresscaquin. Israeli main cahi cahi. ²²Nocoxon sca chanibibo nincaquin. Jahuen papa Herodes xohtahi ta Arquelao sca Judea mai quiquin hapo qui, hihqui chanihah Judea mai qui cati raquescrai. Namaquen sca, Jano cayamahue yohihi nincacax Galilea main sca cahi cahi. ²³Nocotax Nazaret janeya jema janin sca jihuetai. Jano Jesus jihuescrai copi ta Papan huishani joi quescabibi janishqui. Jaa ta Nazareno hihyaxihquiqui hihqui jaa huishani joi.

Nashimanica Juan yohuanai

(*Mr 1.1-8; Lc 3.1-9, 15-17; Jn 1.19-28*)

3 Jascanihbo cahchiqui sca ta tsoa jano yamahiton nashimanica Juan nihpahonishqui, Judea main. Yohuananahi cahi nihnichi.

²—Maton shinan tiromabo jenebahinquin shinan siribo scabihnahue. Papan mato jihuematí nete ta nea pishca sca jaonahiqui. ³Papan joi yohinica Isaíasnen huishaxon yohini quesa ta Juan janishqui.

Jano tsoa jihuetaitonma tah hen yohuancanahi. Noquen Hihbo hahan jonon bahixonnahue, pontequin bahixonnahue, hih tah hen jai hihqui jaa huisha.

⁴ Juaman ta camelo rani chopajaxon sahuepahonishqui. Histon nihnoxon rihbi yohina bichi quexen jahuen tari pishnexehti. Champobo res ta pipahonishqui, champoya bonajene. ⁵Jaa nincaqui sca ta Jerusalen janin jihuetaibo bocannishqui. Judea main jihuetaibo jatihibi, Jordan huean patax jihuetaibo rihbi jaa nincaqui bocani. ⁶Juan yohuanai nincaxon, jaton yorabi yohihi jaton hohchabo yohipaquescacanquin, Juaman jato jeneho hihquimatannon.

⁷ Jano jan jato nashimahi janin fariseobo betan saduceobo rihbi hicha hahqui nocohihnat. Nocohihnatibo jisxon, Juaman jato yohiquin:

—¡Rono baquebon! ¿Tsoan mato neno jabaquihrani joti yohihaxquin, Papan mato casticanmis hihquish man jonon? ⁸ Maton shinan tiromabo potaxon shinan siribo sca bihnahue. Sirijaquin shinanax res sca jihuenahe hih ca hen jahihsen. ⁹ Noque caya tah non Abrahanen baquebo qui hiyamaribinahue. ¡Man yohinani jascamis! Abraham baquebo jacatsihquin ta nea man jisi macanbo Papan joni jati hahtipahiqui, Abraham baquebo sca janon. ¹⁰ Jihui reranoxon hahcajaquin ta jahuen yami bihxon Papan tarescαιqui. Bimiyosma jihuibo reraxon mapojaquin hahcajaquin ta tiroma shinanyahpabo Papan casticanscαιqui. Shinannahue. ¹¹ Maton shinan man pontehiya tah hen jenen res mato nashimahi. Huetsa joni rihbi ta joresscαιqui. Hea mentan hashoan coshi. Jaa hihti siri copi tah hen jahuen sapato boxonti senenyamahi. Jaan ta jahuen yoshin siri mato hinantihiqui. Chihi rihbi ta mato maracantihiqui. ¹² Bimi berobo tsinquixon, chishpo potaquin hahcajaquin ta Papan xecoscαιqui. Jahuen bimi siribo rahsi tsinquixon sca jahuen janoojati janin bexojaquin hahcajaquin ta Papan jahuen baquebo tsinquihiqui. Chishpo cahen nocayosma chihin mapojayaxihquiqui —jato jaquin Juaman.

Juaman Jesus jeneho hihquimatanai

(Mr 1.9-11; Lc 3.21-22)

¹³ Jaatian ta Galilea mai janinhax Jesus noconishqui. Juaman jaa nashimaquin hihquimatannon hihquish, Jordan huean qui jahuí, janoojati Juaman

nashimahi janin. ¹⁴ Hea nashimahue hahca bi Juan queenyamahi.

—Mian caya hea nashimahue. ¿Mian hea nashimatihi bi min Hea nashimahue hah min hea jai nan? —hahqui Juan.

¹⁵ —Jaabi hea nashimahue. Min hea nashimati ta Papa queenih qui. Papan yohihi jati hibi hean nincanica hihnon hea nashimascahue —Jesusen jascahah, Juaman jeenhahquin. Jeenhahxon, nashimaquin. ¹⁶ Hueaman nashimaha Jesus mapescái. Jaatian ta nai cohin potabohanahcamahi quehpemehtaiya bochiquihax nobex botopaquetai quescari Dios Yoshin hahqui botopaqueti jahui Jesusen jisnishqui. ¹⁷ Naihoh quehax yohuanai rihbi nincacanquin.

—Nea ta hahan hen queenai heen baque qui. Hahan tah hen hihti jenimahi —hahqui.

Satanasnen Jesus tanahi

(Mr 1.12-13; Lc 4.1-13)

4 Jaa pecaho ta jano tsoabi yamahi janin Dios Yoshiman Jesus hionishqui. Jordan huean janinhax cahchiho jan canon, hioquin, janoxon sca tiroma yoshiman jahuen shinan tananon.

² Jano cuarenta neten piyamabahinaxon piyamashinahax hihti picatsihscái. ³ Hihti picatsihscáya ta tiroma yoshin sca joxon yohinishqui, hohchamacatsihquin:

—Papa Diósen baque hihxon, toa macan toncobo yohihue, piticahinscanon —hahquin.

⁴ —Papan huisha janin ta nea joi jaiqui: Piti res jaax jihueta tah man jai. Papan yohihi joi jati hibi nincaqui jihuenahe hih ta Papa janishqui —Jesusen jaquin.

⁵ Jaatian ta Jerusalen janin sca tiroma yoshiman hionishqui, Papa yocati xobo janin. Xobo mamacanya manimaxon sca yohiquin:

⁶—Papa Diosen baque hihquish, naman paquehue. Jahuen huisha janin ta Papan yohihiqui:

Jahuen yonotibaan ta mia coiranti-hiqui. Jaton mequemanbi ta mia binihnicantihiqui, macan qui min joxcorohyamanon —hahquin yoshiman.

⁷—Huetsa Papan quirica janin ta nea jaiqui: Hea cahra hahxoncointihquin hihxon miin Hihbo Dios tanayamahue —hahquin Jesusen. ⁸ Jaatian, tiroma yoshiman boribiquin, queya mahchi janin sca. Manimaxon sca hocho jismaquin jatihibi jemabo jan jisnon. Jaton jahuaborayabi jato jismaquin. Jismaxon yohiquin:

⁹—Min hehqui raboxonen tisquihah-paquehiya tah hen jaa jatihibi mia hinnantihi —hahquin.

¹⁰—Catanhue, Satanas. Papan huisha janin ta nea joi jaiqui: Miin Hihbo Dios huesti qui tah min raboxonen tisquihah-paquehiya. Jaa huesti tah min nincatihu —Jesusen jaquin.

¹¹ Jascajaquin yohihah ta tiroma yoshin caresscanishqui. Jaa xahbanen cahen Papan yonotibo nocohihnati. Nocohihnaxon, piti hinancanquin.

Galilea mainxon Jesusen jato yohimenohi

(Mr 1.14-15; Lc 4.14-15)

¹² Cahchihoh quehax joxon, quiquin hapon sontarobaan Juan bichipi joi nincacax, Galilea main sca Jesus cahi jahui. ¹³ Nazaret jema janinhax Caper-naum jema janinbo sca baneti cahi, hian quexa. Jano Zabulonbo betan Nef-talíbo jihuetaibo janin jihuetaibahi. ¹⁴ Jaa copi ta Papan joi yohinica Isaías-nen yohini quescanishqui:

¹⁵ Zabulon mai janinhahbon, Neftalí mai janinhahbon, jaton hian janin jaibo rihbi Jordan huean hoque quexa

jihuetaibon, Galilea main jihuetai judiomabon,

¹⁶ Bahquish chian jihuetaabaan bi ta hani xaba jiscannishqui. Mahuati qui ra-quetaibaanbi ta xaba paquenishqui, mahuapan jato bihpanan hihqui jaa huisha.

¹⁷ Jano ta Jesusen yohimenonishqui:

—Maton shinan pontemabo potaxon shinan siribo bahnahue. Papan mato jihuematí nete ta nea pishca sca jaon-ahiqui —hahquin.

Yapabihnicahbo Jesus betan cahi

(Mr 1.16-20; Lc 5.1-11)

¹⁸ Jaatian sca Galilea hian quetan-bahini caquin bi tarrafa pota potahi joni rabe meraquin. Huetsa, Simon. Huetsa, jahuen jochica Andres. Yapabihnicahbo rabe.

¹⁹—Hehbetanbi bonahue, jonibo sca hen mato tsinquimanon —jato jaquin.

²⁰ Yohihah ta jaton tarrafa jenebahini caquin chibanbahincannishqui, hahbe-tanbi sca nichi.

²¹ Caribixon sca huetsa rabe rihbi meraquin. Jacobo betan jahuen jochica Juan, Zebedeon baque rabe. Jaton papa betan nontinxon jaton tarrafa hona honahiton jato merabonaquin. Jaabo rabe sca jascajaribiquin yohiquin. ²² Jan yohihah, jacobini caquin jaton papaya jaton nonti jenebahinxon Jesus chibanrihbicanquin.

Jonibo Jesusen haxemahi

(Lc 6.17-19)

²³ Galilea mai janinbo yohihi cahi ta bocannishqui. Jema qui nocotax judiobaan tsinquit xoboho hihcoxon Papan joi jato honanmaquin. Papan jato jihuematí nete nea pishca sca jaonahi yohixon, hisinaibo jatihibi rohajaxon, yosmabo rohajaxon coshi jato hinanquin, Jesusen. ²⁴ Jato honanmaxon rohajahiya ta hocho

bi res Siria maibo janin jatihibi jaya yohuanchanicannishqui, jano jihuetaibo. Jaa copi ta jaa janin jaton hisinyahpabo hiocannishqui, hihti hisin tenehibo, mesco hisinyahpabo, mahua hisinyahpabo, tiroma yoshiman hihbojahibo, mapo masataibo, yora honanyamajaquetaibo rihbi. Jaa rahsiya behiboya jato rohajaquin. ²⁵ Hihti caibo sca jaa chibani becani, Galilea mai mehabo, Decápolis jemabo janinhahbo, Jerusalen janinhahbo, Judea mai mehabo, Jordan huean hoque quexa quehabo rihbi.

Mahchinxon Jesusen jato haxemahi

5 Nocohhnatax hahqui tsinquipaque-
taibojisish ta mahchi janin Jesus manihhnananishqui. Jano tsahotaiya sca ta jahuen haxenicabo jaa patax nin-
caqui behinihnacannishqui. ²Jato hax-
maquin ta nescajaquin jato yohinishqui:

Hahan jenimati jaibo

(Lc 6.20-23)

³ Caibo ta jahuaborajoma quescapah qui, jaton jahuabora shinanyamahi. Jas-
capahbo ta hahan jenimati jaiqui, jato jihuemaxon Papan jato jahuen jihue hinanyaxihquibo.

⁴ Caibo ta benatihqui. Jascapahbo ta hahan jenimati jaiqui, Papan jato shi-
nanmaquin sirijatihi copi.

⁵ Caibo ta mehcayahpa qui, hahxon-
nica. Jascapa ta hahan jenimati jaiqui.
Papan ta nai naman meha mai jatihibi
jato hihbomayaxihquiqui.

⁶ Papa queenai quescajati ta caibo hi-
hti queenihqui. Papan jato jascajaquin-
tihi quen ta jascapahbo hahan jenimati
jaiqui.

⁷ Caibo ta yanapanmisbo qui,
huetsahon shinanxon hahxonnicahbo.
Jascapahbo ta hahan jenimati jaiqui,
jatohon shinanxon Papan rihbi jato
hahxonyaxihquibo.

⁸ Caibo ta siri shinanyahpabo qui, ho-
hchati shinanjomab. Jascapahbo ta ha-
han jenimati jaiqui. Noquen Papa Dios ta jisyaxihcanihqui.

⁹ Sinataibo sirijaquin yohuanquih-
nnxon ta caibaan jato sina tantimahiqui.
Jascapahbo sina tantimanicahbo ta
hahan jenimati jaiqui, Mato tah man
heen baquebo qui, Papa jaiya.

¹⁰ Papa queenai quescajaquin man
hahcai copi mato tiromajahah tah man
tiroma teneti jai. Jascajaquin tenehibo
ta hahan jenimati jaiqui, jato jihue-
manoxon ta jahuen jihue Papan jato
hinanyaxihquiqui.

¹¹ Man hea nincacoinaiya
quesabaan mato hichacax, mato qui
tiromahi yohuan yohuanxon, mato
tiromajaxonon chibanbonahiya tah
man hahan jenimati shinan man jatihi.

¹² Jenimanahue. Man tenexonai copi
Papan mato jahuen hinantibo naihoh
bexojaxonai quen hihti coin coini
jihuenahue. Jascajaquin rihbi ta Papan
joi yohinicabo tiromajacanpahonishqui.
Jaa copi mato qui tiromabo tenenahue.

Non xaba quesca jai; tashi quesca rihbi

(Mr 9.50; Lc 14.34-35)

¹³ Jatihibi jonibaan tashi quesca tah
man qui. Tashi jahuijoma sca tah non
jenquetsahaxon bi hahquirihbi jahuija-
timahi. Jascapa tashin tah non jahuabi
tashin hahtimahi. Potati sca tah qui,
huinoquin jonibaan jama jamanon.

¹⁴ Mato tah man mai mehabaan xaba
qui, jatihixonbi jisti. Mahchi maracah-
tai jema ta hochoxon jisti qui, jenquetsa-
hax jonetimahi. ¹⁵ Johue quetejaxon ri-
hbi ta tsoanbi quentipan mahpoyamahi-
hqui. Jahuen tsahotinin tah non johue
tsahonai, xoboho jaibo rahsichin jahuen
xaba jisnon. ¹⁶ Jascajaquin xabajahibo
jihuenahue, man sirijaquin shinanxon
joni huetsa hahxonai jisxon jatihibichin

mato honannon. Man jascapahbohi jisish ta maton naihoh queha Papa qui siripi yohuanyaxihcanihqui.

Moises joi honanahbo jato haxemahi

¹⁷ Papan huishamani joibo hean mato potamahi jahui shinanyamanahue. Moises jan huishamani, texe jahuen joi yohinicabo jan huishamani, jaa joibo mato potamahi tah hen joyamaniqui. Papan joi potamanoxonma bi tah hen jan yohini quescabijanoxon jahui. ¹⁸ Hen mato yohicinon nincanahue. Naiyahpa mai queyonon caman ta Papan huisha quiha ni huesti bero pishca, ni huesti reshpi pishca rihbi manotimahiqui. Jan yohini jatihibi janon caman ta jahuen huisha jascabi jatihibiqui, queyocahinyamahi. ¹⁹ Jaa copi ta huesti res Papan noque yohihi joibo potaxon caibo rihbi potamahax mia hashoan naman sca hihiyaxihqui. Jascajahax tah man Papan jihuetauhox bi texe jahuen jihuetauhbo mentan hashoan jahuama sca jayaxihqui. Papan yohihi quescajaxon jaxon caibo rihbi jahuen joi haxemahax tah min hihti siri sca min jatihi, Papan jisí. ²⁰ Fariseoboya jaton haxemanicahbo mentan hashoan nincacoinnica hihiyamahax tah man jahuentianbi Papan jihuematici janin nocotimahi. Jaa hen mato yohihi copi Papan joi queyotimahibо shinanbehnoyamanahue.

Sinayamati Jesusen yohihi

(Lc 12.57-59)

²¹ Noquen xenibo ta Papan yohinshqui: Min tah min joni huetsa rehtetimahi, hahquin. Jaa copi ta rehtehi joni Papan casticanyaxihquique. Jaa joi tah man honanscái. ²² Man honanyamaní joi sca tah hen heanbi mato nincamahi: Miin huetsa qui min sinataiya ta jaa copi mia casticanti jatiqui. Jointi xahbanen

hah min miin huetsa hichaquin jaiya ta tsinquixon mia casticanti jaticaniqui. Shinanjoman hah min hichaquin jaiya tah min jaa copi chihi janin sca cati jaresscái.

²³ Jaa copi jahuabora pishca Papa hinancatsihxon shinanhue. Hinani joxon bi jano hinanti janinxon sca miin huetsan mihqui sirijaquin shinanyamahi shinanrenenxon, janobi miin hinanti jenebahinhue. ²⁴ Miin hinanti janobi jenebahini caxon miin huetsa pari sirijaquin yohuanquhnax hahbe bexohue, bexohi sirixon sca miin hinanti pishca hinannoxon.

²⁵ Mia demandanaiboya babin caquin bi histon bi res hahbe bexohue, mia tintinti janin bomis. Tinintinin mia policia bihmaxon sipo xoboho mia tsahonah tah min hohmis hohmistih. ²⁶ Yohicoin tah hen mia jai, jan mia yohihi tihibi copianoxon caman tah min jano hihtihi.

Tsiniyamahahbo Jesusen yohihi

²⁷ Tsiniyamanahue Papan mato jai tah man honanrihbih. ²⁸ Hean tah hen nea sca mato yohihi: Haibojisih hahbetan hihcatsihqui tah min miin jointi janin tsini sca jai.

²⁹ Jaa copi miin mecyaho beron mia hohchamahiya jaa miin bero tsecaxon potahue. Jayajoma hihqui siri que ma bi ta mia chihi janin moanma potahah hihti tiroma qui. ³⁰ Miin mecyaho mequeman yometsohax hohchamis hihxon, mextexon potahue. Jayajoma hihqui siri que ma bi ta mia chihi janin moanma potahah hihti tiroma qui.

Haibo potatima Jesusen yohihi

(Mt 19.9; Mr 10.11-12; Lc 16.18)

³¹ Huetsa yohini joi jai: Miin haibo potaxon jahuen quirica hinanhue, min queenyamascai honanahbo. ³² Jascanihbaan bi tah hen hean mato yohihi: Jan tsinihi ma bi miin haibo potaxon tah

min mianbi jaa tsinimahi. Huetsa jonin potahi haibo hihquihinax tah min miabi tsiniscai, hohchaya.

Quesatima Jesusen yohihi

³³ Huetsa noquen xenibaan yohini joi rihbi tah man honanscái: Noquen Hihbaan janen quenaxon yohiquin tah min parantimascái. Jahuén janen quenaxon yohihi tihibi tah min hahcointíhi. ³⁴ Jasca janibaan bi tah hen hean mato yohihi: Noquen Hihbaan janen quenaxon yohitima tah man jai. Jahuabi quenaxonma yohiti tah man jai. Naihoh quehabo quenayamanahue. Jaa ta janoxon Papan yonohi qui. ³⁵ Mai mehabo quenahaxma rihbi yohuannahue. Jaabo ta jahuen hahqui tapiti qui. Jerusalen jema rihbi quenahaxma yohuannahue. Jaa ta quiquin hapon jema qui, Papan raanyaxihquiton jema. ³⁶ Miin mapo rihbi quenahaxma yohuannahue. Ni huesti boobi tah min joxocahinmatimahi. Huisocahinmati rihbi tah min hahtipahyamahi, ni huestibi. ³⁷ Yohicatsihquin tah min yohirestihi. Jeenhihyamahax, Hihyamahi rahan hihreshue hihcoini yohuani. Jahuabora quenati shinanbo ta tiroma yoshiman hinanah shinanbo qui.

Copiyamanahue hihqui Jesus

(Lc 6.29-30)

³⁸ Huetsa yohini tah man honanrihbíhi: Bero copiquin tah min bero poshabahintíhi. Xeta copiquin tah min xeta potamatihi. ³⁹ Jascari janibaan bi tah hen hean mato yohihi. Mia tiromajahahbo bi tenereshue. Mecayahó mia bepasah bi ramího sca jismahue. ⁴⁰ Mia demandanxon miin camiseta mia bichincatsihquiboya, hinanhue. Hinanxon miin coton rihbi hinanhue. ⁴¹ Mia yonoxon, Huesti hora

hea papixonhue hahca, rabe hora jaa papixonhue. ⁴² Mia yocacah hinanhue. Hea hinantahhue hahca, Nea tah qui hahhue.

Maton rahuibohon shinannahue hihqui Jesus

(Lc 6.27-28, 32-36)

⁴³ Huetsa yohini joi tah man honanrihbíhi: Miin hahbe jihuetaibohon queenxon bi tah min miin rahuibo jistahihmatíhi. ⁴⁴ Jascari janibaan bi tah hen hean mato yohihi: Maton rahuibohon shinannahue. Mato tiromajahahbo bi jato yocaxonnahue. ⁴⁵ Jascajaquin jaax tah man maton naihoh queha Papan baquebo man jatihi. Jahuén barin ta jatihibi xabajaxonihqui, siriboya tiromabó. Jaan raanah ta hoi rihbi joxonihqui, siribo betan tiroma jonibaan jene bihnón. ⁴⁶ ¿Matohon queenaibohon res man shinanaiya jahua Papan mato hinantihiquin? Coriqui cobrannicabaan bi ta jascajaquin jatohon queenaibohon res shinanihqui. ⁴⁷ ¿Maton huetsabo res man Johue hahcaiyá, man jaa copi hiti siribo quin? Nahuabo ta jascapah qui. ⁴⁸ Hen mato yohihi nincacax shinancoinyahpanahue, maton naihoh queha Papa shinancoinyahpa hihqui quescarí.

Sirijaquin hahxoncoinhue hihqui Jesus

6 Caibo yanapanquin hahcoinnahue. Jonibaan jisnon hihxon res man hahmis. Man hahxoncoinyamahiya ta maton naihoh queha Papan mato jahuabi hahxontimahiqui. ² Pishinaibo yanapannoxon jato pishca hinancatsihquin, tsoabi yohixonma hinancoinhue, yanapancoinquin. Shinancoinihamahibaan hahcai quescajayamahue. Jaabaan hinanai ta tsinquití xoboho jahuibo yohixon bahin cahibo rihbi yohicaniqui, siri joni hihqui shinannahbo hihxon. Nincanahue

hen mato yohinon: Jato qui siripi yohuanai pishca res ta jatihiqui. Papan ta jato jahuabi hinantimahiqui.³ Jaa copi tsoabi yohixonma hahxoncoinhue, miin huetsa bocabi tah min yohitimahi.⁴ Tsoan honanahma bi joni huetsa min yanapancoinaiya ta Papan mia jisiqui. Jaan ta mia hashoan siribo sca hinanyaxihquiqui.

Papa yocati Jesusen haxemahi

(Lc 11.2-4)

⁵ Papa yocanoxon tsinquitax, shinancoinlhcamahibo quescayamanahue. Huetsabaan jato jisnon hihquish ta tsinquitxi xobohoxon yocati queencaniqui. Jano jonibo huinotai janin nihxon rihbi ta yocati costancaniqui, caibaan jato jisnon hihquish. Nincanahue hen mato yohinon: Papan ta jascapahbo jahuabi hinantimahiqui.⁶ Papa Dios yocacatsihquish, tsoa janu yamahi janin chiqueho hihquixon, xehpoti xehpoxon, Papa yocahue. Jaan ta mia jisiqui. Mia ta hahxontihiqui.

⁷ Tsinquixon Papa yocauquin, yanca res joi tsamanyamarihbinahue. Nincacoonyamahibaan hahcai quescajayamaquin. Joi tsamanxon Dios nincamatni shinan ta jacaniqui, jascajati que ma bi.⁸ Jaa copi jaabaan yohihi quescajayamanahue. Man yocarihyamahi bi ta maton Papan jahua man pishinain hihxon honanscaiqui.⁹ Jaa copi nescajaquin yocanahue:

Noquen naihoh queha Papan, mia Papa Dios jai honanahbo jahue.

¹⁰ Miin jihuetahbbo non janon, noque hihbojahue. Min nai hoque hahcai quescajaquin neno rihbi hahhue, mia queenai quescabijaquin.

¹¹ Nea neten piti noque hinanhue.

¹² Noquen hohcha rihbi sohuahue. Noque qui tiromahibaan bi tah non jaa shinanxonma jato sirijaquin

yohuanquihna. Jascajaquin rihbi noquen hohcha sohuaxon jaa shinanyamascahue, Papan.

¹³ Satanasnen noquen coshi tanatihi janin noque hioyamahue, Papan. Satanas noque bihmayamahue.

¹⁴ Joni huetsa mato qui tiromahi bi jaa tiromahi man shinanxonma siri-jaquin yohuanquihnaia ta maton naihoh queha Papan rihbi man tiromahi shinanyamahiqui.¹⁵ Mato qui tiromahibo man shinanparihiya ta maton hohcha rihbi maton Papan shinanparihiqui. Jaa copi hen mato yohihah quescajaquin yocanahue.

Piti tenehibo

¹⁶ Piti tenecatsihquin shinanihcamaiboo quescajayamanahue. Benati hihcamahax ta behcashcahinax huetsapahcaniqui, caibaan jato jisnon hihquish. Nincanahue hen mato yohinon: Papan ta jato jahuabi hahxontimahiqui.¹⁷ Piti tenecatsihquin jaabaan hahcai quescahaxma bohuexehtax bepanohtax nihnahu. ¹⁸ Man piti tenescai jismaxonma maton Papa huestichin mato jisnon hihxon hahnahu. Jatihibi jisnicahxon ta maton Papan mato hahxonyaxihquiqui.

Naihoh Papan bexojaxonai

(Lc 12.33-34)

¹⁹ Mai meha jahuaborabo hichajanoxon tsinqui tsinquiyamanahue. Mai mehabo ta mahsaman pihiqui, yamibo rihbi ta pohihiqui, texe rihbi ta yometsohbo hihquixon bohancaniqui.

²⁰ Naihoh caya bexojanahue, janu hicha jayanoxon. Jano ta mahsamanbi pitimahiqui, jahuabi rihbi pohiyamahi, jahuabi rihbi tsoanbi hihquixon bichinyamaquin.²¹ Jano man bexojahi janin tah man maton shinan camatih. Jaa copi tah hen mato yohihi.

Noquen jointi xabajahi joi

(Lc 11.34-36)

²² Noquen shinan ta noquen bero quesca qui. Noquen bero siripan jisquin hahcajaquin tah non noquen shinan siripan shinanax nichi. Yohuashihyamahi. ²³ Miin bero tiromayaxon jiscatsihxon min jaamaquaquin jisi quescajaquin rihbi tah min tiroma shinaman shinanax yohuashihscai. Jascapa shinanyahpahax tah min bahquish chian baneparihi, hiti yametai janin.

Noquen Hihbo huesti hahxonti

(Lc 16.13)

²⁴ Patoroyapascaxon tah min jaa sirijaquin teexonhanan huetsa patoro rihbi jaatianbi sirijaquin teexontimahi. Huetsa queenxon bi tah min huetsa sca jistahihmatihi. Jascayamaxon tah min huetsa sca hahxonquin sirijaxon bi huetsa rihbi nincayamascatihi. Jascajaquin rihbi tah man jahuaborabo tsamannoxon jano maton shinan cama-hahn, maton Papa Dios teexontimahi.

Papan jahuen baquebo coiranai

(Lc 12.22-31)

²⁵ Jaa copi tah hen mato yohihi: Maton piti copi masa shinanyamanahue. Jahua hen piyaxihquin jahua hen xehayaxihquin hihxon masa shinanya-manahue. Jahua hen sahueyaxihquin hihyamaribibi. ¿Pihi res non jihuetain? ¿Chopa sahuenoxon res non yora jain? ²⁶ Hihsabo jai shinannahue. Jaabaan ta banayamahihqui. Tsinquiyamaquin. Piyanoxon jahuenbi rihbi bexojoyamaquin. Maton naihoh queha Papan ta jato coiraniqui. Mato rihbi ta hahxontihqui. Mato tah man pehiyahpabo mentan hashoan copi qui. ²⁷ Heen shinaman bi hashoan queyanihpan hihquish bi tah min jahuabi queyanihtimahi.

²⁸ Jascajaquin rihbi ta chopas copi masa shinannah yanca res qui. Joa siribo jenquetsax hanihiquin hihxon shinannahue. Jahuabi ta teeyamacaniqui. Toroxahcaxma bi ta siri chopayahpa quesca hihti siribo qui. ²⁹ Hen mato yohinon nincanahue: Quiquin hapo Salomon hicha chopas siribo japahonish bi ta jahuen raotiyahpahax huesti joa betan senenyamanishqui. ³⁰ Nihi naman joabo hicha joconax cainipi bi tah non huajaxon jato coharesai, copima copi. ¿Copi que ma bi Papan jato sirijati shinannihxon mato sca jan hashoan sirijaxonti shinantimahiquin? Jaan mato hahxontihi honancoinnahue. ³¹ Jaa copi masa shinanyamanahue. Hahrai, jahua non piyaxihquin, Jahua non sahueyaxihquin hihxon masa shinanyamanahue. ³² Nincayosmbaan ta jascajaquin masa shinanihqui. Mato tah man jascajatimahi. Man pishinai ta maton naihoh queha Papan jatihibi honanscapiro. ³³ Papan jihuetauhboti pari shinannahue. Jahuen jihuetauhboxon jaa queenaijatibo pari shinannahue. Jaatian ta man pishinaibo jaan mato hinantihqui, jatihibi. ³⁴ Jaa copi, Bahquish jahua jayaxihquiquin hihxon masa shinanyamanahue. Bahquish jayaxihquibo nocohihntataiya pari tah man jaa tenetihhi. Man bahquish teneyaxihqui tah man rahma shinanti pishinyamahi.

Joni huetsa non join namanjatimahi

(Lc 6.37-38, 41-42)

7 Min hahcai quescajayamaquin caibaan huetsapahaquin hahcai jisish, Jaa ta tiroma joni qui hihyamahue, min shinanai quescajaquin rihbi Papan mia jascajaribixonnon. ² Man huetsa joni jisxon shinanai shinaman ta Papan rihbi mato

jascajaquin rihbi yohitihiqui. Man caibo hahxonai quescajaquin rihbi ta Papan mato hahxontihiqui. ³¿Miin bero qui jihui jai bi miin huetsan bero qui jai poto pishca min jistihin? Miin bero qui jai jihui pari shinanhue. ⁴¿Miin bero qui jihuinhuan jaiya miin huetsa min yohitihin, Miin bero qui jai poto pishca hen tsecanon tenehue hah min jatihin? Min tah min jascatimahi. ⁵Jisyamaxon bi jahuen poto tsecacatsihquin tah min hahcoinicamahi. Miin bero qui jai jihuinhuan pari potahue. Jaatian tah min jisti hahtipahscaxon jahuen bero quiha jaa poto pishca tsecatihi.

⁶Papa qui hinantibo hochiti qui hinanyamanahue. Maton hihti copibo rihbi cochi hinanyamanahue. Man hinanah, jaa jama jamaxon mato sca picanmis.

Non yocacah Papan noque hinantihi

(Lc 11.9-13; 6.31)

⁷Papa Dios yocanahue jan mato hinannon. Manotaibo bena benaquin quescajaquin yocanahue jan mato meramanon. Jahuen xehpoti ton tonhahquin hahcajanahue yocaquein jan mato hinannon. ⁸Yocanica rahsichin ta bihtihiqui. Benanicateen ta meratihiqui. Ton tonhahnica ta Papan hinantihi.

⁹¿Miin baquen mia piti yocacah bi macan sca min jaa hinantihin? Jascapa bebo ta yamahihqui. ¹⁰¿Min mishquitani yapa mia yocacah min rono hinantihin? ¹¹Man tah man jascapahbo hinantimahi. Jaa copi shinancoinnahue. Tiromabxon bi maton baquebo siri jahuaborabo hinanti man honanaiya, ¿maton naihoh queha Papan mato hashoan siribo rihbi hinantimahiquin man yocacah?

¹²Jaa copi nea shinanbihnahue: Hea hahxonnahue jacatsihxon jato pari jascajaquin hahxonhue. Moisesnin huishani

ta jascarihibi qui. Texe Papan joi yohinicaabaan huishani, jascarihibi.

Papan bahi hexti pishca

(Lc 13.24)

¹³Papan bahi qui hihquiti ta hexti pishca qui. Jano hihquinahue. Queyonicabo janin cahi bahi ta hihquiti haniyahpa qui. Jaa bahi ta hihtihosi bahi qui, jahan cahibo rihbi hicha. ¹⁴Papan jihuetahbjo janin cahi bahi ta hexti pishca cainih qui, jahuen bahi rihbi hanitahma pishca. Jahan cahibo ta hicha yamahiqui.

Bimi jisxon non jihui yora honanai

(Lc 6.43-44)

¹⁵Papan joi yohiquin bi quesajahibo qui coiramenahue. Maton huetsabohihcamahax ta bemacanya mato quescapahbo qui. Mato paranxon ta mato tiromajascatihiqui. ¹⁶Jaa copi jenquetih jihuethquin hihxon jaton shinan honanquin sirijanahue. Pani moxa quiha ta tsoanbi xeson bimi bihtimahiqui. Bocon jihui quiha rihbi ta tsoanbi binon bimi bihyamahiqui. ¹⁷Jascarihibi ta jatihibi siri jihui bimi siriyahpa qui. Xanascai jihui ta tiromaboo bimiyahpa rihbi qui. ¹⁸Siri jihuun ta jahuen bimi tiromajati hahtipahyamahiqui. Xanascai jihui rihbi ta siri bimiyahpatimahiqui. ¹⁹Bimi sirijoma jihui jatihibi ta Papan reraxon cohayaxihiqui. ²⁰Jascajaquin jaton bimi tanaxon jihui yora honanquin hahcajaquin mato qui nocotaibo honannahue, jaton shinan honanquin.

Papa janin nocoyamahibo

(Lc 13.25-27)

²¹Hea Hihbon Hihbon hahcaibo ta caibo Papan jihue janin nocoyamayax-ihquiqui. Heen naihoh queha Papa queenai quescajahibo res ta jano nocotihi. ²²Jato casticanti nete noco-

taiya ta hichaxon hea quenayaxihqui qui: Hihbon, Hihbon. Miin janen tah non jonibo miin joi yohinihqui. Tiroma yoshinbaan joni hihbojahiya tah non miin janen sca jaa tiroma yoshinbo camanihqui. Miin janen tah non hicha hahan rahtetibojaniqui, Hihbon.²³ Jaatian tah hen jato yohiyaxihqui: Mato tah hen jahuentianbi honanyamanihqui. Neno-hax botannahue, tiromahibaan.

Xobojahi rabe

(Lc 6.47-49; Mr 1.22)

²⁴ Caibo jascapahbo copi tah hen nea mato yohihi: Hean yohihi joi nincaxon hen yohihi quescabijaquin hahcai joni ta shinanyahpa qui. Shinanyahpaton hahni quescajanica. Shinanyahpaton ta xobo jihuibo nichinnxon mixan mai caman poquinxon xobojanishqui. ²⁵ Hoi sca ta quexto paquenishqui. Jenenhuan sca jahui. Nihue rihbi coshin bi res jahui. Jene betan nihuen tsahca tsah-caxon bi ta jaa xobo potayamanishqui, mixan mai caman jahuen xobo jihui nichinipi quen. ²⁶ Hean yohihi nincaxon bi hen yohihi quescayama jaibo ta jascapahmabo qui. Jaabo cahen honanma joni quescapahbo. Honanmanen cahen neminma poquinxon mashin xobojanish. ²⁷ Jaatian ta hoi quexto paquenishqui. Jenenhuan jahui. Nihuenhuan rihbi jahui. Joxon jahuen xobo hueranxon poxabahinquin. Champacahinax ta xobo metisihskanishqui.

²⁸ Jesusen jato jascajaquin haxemaha ta tsinquijsaquetaibo rahte rahtenishqui. ²⁹ Jaton haxemanicahbaan haxemaha quescajayamaquin bi ta yohiti shinan Papan hinanah jaanbi honanxon jato yohinishqui. Jaa copi rahtecani.

Sipiyah Jesusen rohajani

(Mr 1.40-45; Lc 5.12-16)

8 Jato haxemahax, mahchi janinhax botopaqetax jahuiya sca ta hicha

jonibo hahqui tsinquijsaquexon chibabenacannishqui. ² Jahuiton sca ta huesti sipiyahpa joni behchihi cahax jaa bebonbi betihihpaquexon, yohinishqui:

—Hihbon. Mian tah min hea rohajati hahtipahi. Jeenihhxon res tah min hea rohajatihi, Hihbon —hahquin. ³ Sipiyahpa mehexon, Jesusen sca yohiquin:

—Jeen. Roha sca jahue —hahquin. Jan yohihitianbi ta sipiyahpa rohacahinnishqui.

⁴ —Hen mia yohinon nincahue. Tsoabi yohihaxma caxon sacerdote jismatanhue. Moisesnin yohini quescabijaquin hinanti pishcaya cahue, rohascaxon hinanti. Jascajaxon tah min jato nincamatih —hahscaquin Jesusen.

Capitanen joni Jesusen rohajahi

(Lc 7.1-10)

⁵ Capernaum jema janin sca nococani. Jema janin nocotaiya bi ta sontaro capitan joxon hihti yocanishqui.

⁶ —Hihbon, heen joni ta yoran honanyamajaquetax heen xoboho racatinhqui. Hihti hisin ta jaiqui —hahquin.

⁷ —Hen tah hen rohajahi cahi —hahscaquin Jesusen.

⁸ —Hea tah hen jahuama qui, Hihbon, heen xobo janin mia mapeti tah hen rabinai. Min rahma nichi janinxonbi yohihue. Min yohihah ta heen joni rohanoxihqui qui. ⁹ Hen tah hen honanai. Heen hapon hea yohihah tah hen hahcai. Heen sontarobo rihbi tah hen jai. Cahue hean jaah ta heen sontaro cahiqui. Huetsa hen Johue hahca ta jahuiqui. Heen joni rihbi tah hen Nescajahuhe hahcai. Yohihah ta hen yohihi quescajaquin hahqui qui —hahscaquin capitanen. ¹⁰ Capitan yohuanai nincacax ta Jesus rahtenishqui. Chibanaibo sca yohiquin:

—Mato yohinon nincanahue. Nescapa shinancoinnica tah hen mato Israeli

baquebo merayamahi.¹¹ Mato tah hen yohihi, nincanahue. Hocho quehax ta maton nahuabo beyaxihcanihqui, caibo bari cainai quirihax, caibo bari hihquihi quirihax. Bexon ta Papan jihuetauhboxon jahuen jihue janinxon Abraham betan piyaxihcanihqui. Isaaque betan Jacobo rihbi ta fiestajaquin manayaxihcanihqui.¹² Papan jihuetauhbo man hihtihi bi ta bahquish chian mato potayaxihqui qui, jahuen jihuemati quihah. Jano tah man coshin huaohihanhan xeta yeres yere-sahyaxihqui.¹³ Jato jascajaxon, capitán sca yohiquin:

—Cahue. Min hihcoinjaquin shinanai quescabijaquin tah hen hahxonai —hahquin. Jaatianbi ta jahuen joni rohacahin scanishqui.

Pedron haita Jesusen rohajahi

(*Mr 1.29-31; Lc 4.38-39*)

¹⁴ Jaa pecaho ta Pedron xobon sca mapexon Pedron haita yona yonatai Jesusen meranishqui, hisini racatai.¹⁵ Jahuen mequen qui Jesusen mehehah ta yona tantiscanishqui. Rohacahinax huenixon jahuen haitan jato pitijaxonquin.

Hicha hisinaibo Jesusen rohajahi

(*Mr 1.32-34; Lc 4.40-41*)

¹⁶ Huetsa neten bepichaiya sca ta yoshiman hihbojahibo hihuecannishqui, hihti caibo. Hisinai rahsi. Yohixon res ta jaton tiroma yoshinbo potanishqui. Hisinaibo rihbi rohajaquin, jatihibi.¹⁷ Jascajaquin ta Papan joi yohinica Isaiasnen yohini quesa sca janishqui: Noquen hisinbo ta jaanbi bichinxonnishqui. Non han han hisinaibo jaan potaxonquin hihqui Isaías joi.

Jesus chibancatsihqui

(*Lc 9.57-62*)

¹⁸ Jonibo hahqui tsamajaquetai jisxon:

—Hoque quexa canon bonahue —Jesusen hahquin jahuen haxenicabo.¹⁹ Cahi cahiya sca, jaton huisha honan huesti joxon Jesus pataxxon, yohiquin:

—Jatihibi janin min cahi tah hen mia manahi catihi, Maestron —hahquin.

²⁰ —Mari ta mai quiniyahpa qui. Hihsabo rihbi ta nahayahpa qui. Hea ca-hen jascayamahi. Hea noque baque ca-hen janoxoxati yamahan —hahscaquin Jesusen.²¹ Huetsa rihbi sca jahuen hax-enica jahui. Joxon:

—Hihbon, mihibetan capanan tah hen heen papa muhuatei ya mihinax pari hen cayaxihqui mihibetan —hahquin.

²² —Hea manahi jotatahhue. Hahbe muhauyaxihquiaan muhuatei bo mihin-non jenehue —hahquin Jesusen.

Nihueyahpa behchon Jesusen tantimahi

(*Mr 4.35-41; Lc 8.22-25*)

²³ Jaatian sca, nontin nanetaiya, jahuen haxenicabo rihbi hahbetan naneti.²⁴ Cahiboya sca nihuehnhan jahui. Behchon hanibo nihuen potajaquetana nonti mahpohah nonti hihquicatsihscái. Hihcax bi Jesus racapaquetax hoxascati.²⁵ Mohinxon sca yohicanquin:

—Non tah non hihquihi, Hihbon. Noque jahueja ra jaxonhue —hahcanquin.²⁶ Mohinahbo sca:

—¿Jahua jenquetsih man raquetain? Hihcoinai shinanxon bi tah man hicha nincayamahi —jato jaquin. Huenixon sca nihue yohixon hian rihbi yohiquin tantiscababo. Yohihah, tanticahinscái. Siriscái.²⁷ Hian tantihi jisish, rahte rahtecani.

—¿Jahuentiho coshiyahpa cohren jaa quin? Hianbocabi ta yohihi qui. Nihue rihbi ta jaan yohihi qui —hihcáni.

Gadara janinhah yoshinyahpa

(Mr 5.1-20; Lc 8.26-39)

²⁸ Hoque quexa sca nococani, Gadara mai janin. Mapetaiya sca jaa behchihi rabe joni jahui, yoshiman hihbojahi joni rabe. Tsahon tocan mehax rabei jahui, sinabo rabe, hihti coshi. Sinataibo copi ta jano huinotai bahin tsoabi cati hahtipahyamapahonishqui. ²⁹ Sai saihhxon coshin quenacanquin:

—¿Jahuejahi min noque jai jahuin, Diosen baquen? ¿Noque potati nete nocorihyamahi bi min noque potahi joresscain? —hahcanquin. ³⁰ Jaa hoque tocan ta hicha cochi repinica pihi nihnishqui. ³¹ Jaa cochibo qui sca hihquinoxon, yoshinbaan hihti yocascaquin:

—Noque potaxon, hoa cochibo qui noque raanhue —hahcanquin.

³² —Botannahue, tahca —hahscaquin. Jaa jonibo jenebahini sca cochi qui sca bocani. Yoshin jato qui nocotah, cahi, bishquihihcanahi cahi, tirisihpaquetax jene qui paquetax hahsacani, jatihibi.

³³ Jaton cochi coirannicahbo sca jabacahini caxon jema janin yohibonaquin. Jatihibi yohicanquin, yoshinyahpa hihpahoni rabe rohascai yohirihbicanquin. ³⁴ Yohihabopicoscacani, jano jihuetaibo jatihibi. Jesus behchihi caxon, meraxon:

—Noquen maibo jenebahini catatah-tanhue —hahcanquin.

Yora honanyamajaquetai

Jesusen rohajahi

(Mr 2.1-12; Lc 5.17-26)

9 Nanetax sca, pohqueuihranax Jesus jano jihuepahoni jema qui sca nococani. ² Jano ta yora honanyamajaquetax racatai joni sca Jesus qui hihuecannishqui. Jahuen racatininbi huaquehihnixon hihuecanquin. Jaa jan jato ro-

hajaxontihi shinancoinai jisxon, racatai joni Jesusen yohiquin:

—Raqueyamahue, baquen. Miin hohcha tah hen sohuaxonai.

³ Jan jascahiya, jano jai jonibo shinamehti, jaton huisha honanbo. Jaton jointinin yohuancani. Nea joni ta Dios yohuanihcamahi yohuanihqui, hihcani.

⁴ Jahua jaton jointinin shinanihquin honanxon, Jesusen jato yocaquin:

—¿Jahua copi man maton jointinin tiromajaquin shinanain? ⁵ ¿Jahuemeha hashoan teema yohiti quin? ¿Miin hohcha tah hen sohuaxonai hahquin? ¿Huenihihnatax nihaquetanhue hahquin? ⁶ Jaabi, noquebaque hihxon hean mainxonbi hohcha sohuaxonti hahtipahi honannocon, jisnahue —hahxon sca, yoran honanyamajaquetai yohirihbiquin:

—Huenihihnatx miin cacajati bihbabini miin xobon catanhue —hahquin. ⁷ Jascalah, huenicahini jahuen xobon cahi. ⁸ Jaa jisibo ta rahte rahtenishqui. Rahte rahtetax bi noquen Papa qui siriresi yohuancani.

—Noquen Papan coshin hahxonai tah non jisi. ¿Yotiho coshi Papan jaa hinanihquin? —hihcani.

Jesusen Mateo quenahi

(Mr 2.13-17; Lc 5.27-32)

⁹ Janohax caxon, tininti cobranxonai joni Jesusen meraquin. Jano tsahoxon cobranti misa janin tsahotaiton mer- aquin Mateo janeya joni. Meraxon:

—Hebbe cahi johue —hahquin. Jascahah, huenicahini jaa manahi cahi.

¹⁰ Jaatian, Mateon xoboho pihi cahax, pihiboya hicha jonibo jato manahi becani, cobranxonnicabo betan hohchayahpabo. Pihi benahue hahca becani. Jahuen haxenicabo betan Jesusen pihiya jato manahi becani. ¹¹ Jascapa mesco jonibo jisxon sca, fariseobaan jahuen haxenicabo yocaquin:

—¿Jahua copi cobrannicaboya ho-hchayahpabo betan maton haxemanicahthen pihiquin?

¹² Yocacaibo nincaxon, Jesusen jato yohiquin:

—Hisinyamahibo ta rahonnica pishinyamahiqui. Hisinyahpabo caya ta rahonnica pishiniqui. ¹³ Nea huisha joi jahua hihcatsihquiquin honantannahue: Man joni huetsahon shinanti tah hen queenai. Maton hohcha copi man hea jahuara hinanti tah hen queenyamahi. Jaa huisha honantannahue. Pontebo quenahima bi tah hen pontemabó quenahí Joníqui —jato jaquin.

Non piti tenetihin hihquibo

(Mr 2.18-22; Lc 5.33-39)

¹⁴ Jaa pecaho sca Juaman haxenicabo Jesus qui nocoti. Nocoxon yocacanquin:

—¿Jenquetsahpahi noquen non hicha piti tenehi bi miin haxenicabaan piti teneyamahiquin? ¿Jenquetsahpahi fariseobaan rihbi hicha piti tenehi bi miin haxenicabaan piti teneyamahiquin? —hahcanquin.

¹⁵ Jascalahbo Jesusen jato yohiquin:

—Jaton huetsa huanomahi caxon ta tsoanbi huanomahanan benáyamahiqui. Huetsatian ta jaton huanomati yamascatihiqui, Papan jato bichinah. Jaatian pari ta piti teneyaxihcanihqui.

¹⁶ Chopá payo honacatsihquin tah non hotsihahma chopá behna bihxon jayaxon coton payo honayamahi. Jayaxon honahah bi ta hotsiscaxon chopá behnapan payo huaxarihiscatihiqui, hashoan hani sca jahuen huaxa janon. ¹⁷ Noquen xehati behna rihbi tah non bichi borasa payo qui bochojayamahi. Non bochojaha bi ta xehati pahescayá borasa pohtoshihiqui, noquen xehati yohyocohscanon, noquen borasa rihbi tiromascanon. Behna borasa qui tah

non behna xehati bochojahi, rabebi manoyamanon.

Chixanan hisinai haibo Jesusen rohajahi; hihresscái xontaco Jesusen teehihmahi

(Mr 5.21-43; Lc 8.40-56)

¹⁸ Jesusen jato jascajaquin yohihiya bi huesti hapo nocoti joxon, raboxonen tisquihahpaquexon yohiquin:

—Heen baque haibo ta rahma hea muhuaxonaxqui. Jaabi cahue. Miin mequeman mehexonhue. Mian mehehah ta teehihribitihiqui —hahquin.

¹⁹ Jan jascahah, huenicahuanax hahbetanbi Jesus cahi. Jahuen haxenicaabaan rihbi chibanhinquin. ²⁰ Bobibaan bi huesti haibo rihbi cahi, Jesus pataxcatsihqui. Doce bari sca jimi pota potahi haibo. Hahchonbi caxon jahuen coton quexa mehequin. ²¹ Jahuen coton res mehehax tah hen rohatihi hihxon, mehequin. ²² Jaatian rabejaquexon jaa haibo jisxon, Jesusen yohiquin:

—Raqueyamahue, baquen. Shinancinax copi tah min roha sca jai —hahquin. Jaatianbi ta haibo rohanishqui.

²³ Jaatian hapon xoboho Jesus mapeti. Rehue hahcaibo betan corotaibo tsamatai meraxon:

²⁴ —Botannahue. Xontaco ta muhuayamahaxqui. Hoxa res ta jaiqui —jato jaquin. Jato jascahah bi hosan hosancanquin. ²⁵ Tsamataibo picohax, chiqueho hihquixon, xontaco mehuetanah, huenicahuani. ²⁶ Jan jascajaquin jaa teehihmahah ta jaa mai jatihibi janin yohuanchanicanacannishqui, jano jihuetaibo.

Rabe benche Jesusen rohajahi

²⁷ Janohax Jesus cahiya sca benche rabechin chibánxon quenabonaquin.

—Noquehon shinanhue, Davidi baquen. ²⁸ Jahuen xoboho Jesus

nocotah pecaho sca benche rabe rihbi nocoti.

—¿Hen mato hahxonti man shinancoinain? —jato jaquin.

—Shinancoinquin rahan, Hihbon —hahcanquin. ²⁹ Jaton bero mehexon sca:

—Man shinanai quescabi janoxihnahue —jato jaquin. ³⁰ Jato yohihah, jisresscakanquin.

—Tsoabi yohiyamanahue, mato tah hen yohihi —Jesusen jato jaquin, hitti yohiquin. ³¹ Yohiyamahue hahca bi ta janobo jatihibi janin caxon jan jato hahxonah yohibonacannishqui.

Joyo Jesusen rohajahi

³² Jaa benche rabe jahuen xobo janinhax picotaiya bi ta joyo joni hihuecannishqui, yoshiman hihbojahi joni. ³³ Jahuen yoshin potamaha ta yohuan-scanishqui. Jaa copi ta tsamajaquetaibo rahtenishqui.

—Jascajaquin hahcai joni ta noquen xenibaan jahuentianbi jisyamanishqui —hihcani. ³⁴ Jascaraibaan bi fariseobo jascayamahi:

—Tiroma yoshiman yanapana ta yoshinbo camahihqui —hihcani.

Jatohon Jesusen shinanai

³⁵ Jano jai jemabo jatihibichin ta Jesus nihnishqui, hani tahma jemabo janin rihbi. Jaton tsinquitxi xoboho jato betan tsinquixon jato honanmaquin.

Papan jihuematí nete ta nea pishca sca jaonahiqui jato nincamaxon jaton hisinbo jatihibi rohajaquin. Jatihibi yosmahibo sirijaquin rohajaquin.

³⁶ Tsamataibo jisxon ta jahuen jointinin jatohon shinannishqui. Jaan jisi ta tiromajaquin rishquiha quescapahbo jacannishqui. Jaton coirannica yamahiya carnerobo jabisai quescapahbo. ³⁷ Jato jisxon ta jahuen haxenicabo yohinishqui:

—Papabihxonquin tsinquitita hicha qui. Tsinquinica bo resta hichayamahiqui. ³⁸ Jaa copitsinquimanica yocanahue hashoan hicha jan raannon, jahuen tee hahxonibehábo.

Jahuen haxematibo Jesusen caisai

(*Mr 3.13-19; Lc 6.12-16*)

10 Jaa pecaho sca jahuen doce haxenicabo quenamaxon, hahan yoshin tiroma potati coshi jato hinanquin. Hisinaibo rohajati coshi rihbi hinanxon, yosmahibo coshijati rihbi hinanquin.

² Jahuen haxenicabo ta doce janishqui. Jato bebohi ta Simon janeya janishqui, Pedro ca, jahuen Jane huetsa. Huetsa cahen Andres, Simoman jochica. Huetsa cahen Jacobo, Zebedeon baque. Huetsa cahen Juan, Jacobon huetsa.

³ Huetsa cahen Felipe. Huetsa cahen Bartolomé. Huetsa cahen Tomás. Huetsa cahen Mateo, coriqui cobrannica hihpahoni. Huetsa cahen Jacobo, Alfeon baque. Huetsa cahen Tadeo. ⁴ Huetsa cahen Simon, Cananica hahcaibo. Huetsa cahen Judas Iscariote. Jesus paranxon bihmani.

Yohitannahue jan jato jai

(*Mr 6.7-13; Lc 9.1-6*)

⁵ Jaa rahsi jahuen doce haxenicota Jesusen raannishqui.

—Nahuabo qui cahi bahin boyamanahue. Samaritano jemabo janin rihbi boyamanahue. ⁶ Janoboma bi Israelí baquebo qui botannahue. Jaabo ta noquen behnotai yohinahbo qui, carnero hahcaibo. ⁷ Jato qui caxon yohinahue, Papan jihuematí nete ta nea pishca sca jaonahiqui hahquin. ⁸ Hisinaibo jaiya, jato rohajanahue. Mahuataibo teehihmanahue. Sipiyahpabo rohajaxon sirijanahue. Yoshin tiromabobi potanahue. Mato tah hen jaa coshi

hinanresai. Jahuabi copi yohixonma jayaxon jato hahxonresnahue.

⁹Jaya cati coriqui bihyamanahue. Coriquijoma tah man catih, hanibo boxonma coriqui romishin boyamaribinahue. ¹⁰Jaya cati borasa rihbi tah man botimahi. Coton huetsa boyamaquin. Zapato huetsa rihbi boyamaquin. Mepiti rihbi boyamaquin. Maton tee copi ta nincacaibaan mato pimatihiqui. Jaa copi tah man jaa rahsi botimahi.

¹¹Jema qui nocoxon jaa hihyamahiya xobo qui nocoxon tsoa jano shinanyahpa joni jaiquin hihxon jato yohinahue. Jano mato Benahue jaibo janin jihuetahxon jato nincamanahue. Caribinoxon caman jaa xobohobi hoxanahue. ¹²Xobo qui mapenoxon jano jaibo yohinahue: Papan mato hahxonnon hahquin. ¹³Mato Mapenahue jaiboya ta Papan jato hahxontihiqui, man yohihah quescajaquin. Mato Mapenahue jayamahiboya ta Papan jato hahxontimahiqui. ¹⁴Jano mato nincacatsihyamahibo janinhax caxon, jeman nihxon maton zapato qui hueotai mai poto jato qui tahabahintannahue, jaton mai poto bocabi boyamanoxon. ¹⁵Hen mato yohicoinnon nincanahue: Nete queytaiya ta Sodon jema janin jihuapehonibo casticanxon, Gomorra jema janin jihuapehonibo casticanquin bi hashoan hihtijaquin jaabo mato nincacatsihyamahibo Papan casticanyaxihquiqui.

Noque tiromajayaxihquo

¹⁶Jistahi man. Hinobo tocan carnerobo canon quescia tah hen mato raanai. Jaa copi honanbo hihnahue, ronobo honan hihqui quescari. Hihcaxbi joni piyosma nobex hihqui quescari tiromabojatimabo janahue. ¹⁷Jonibo qui coiramenahue. Mato bihxon ta jaton tinintibo qui mato hinantihiqui. Jaton tsinquit xobohoxonbi ta mato

rishqui rishquiyaxihquiqui. ¹⁸Jaton hapobo qui ta mato bothiqui, jaton quiquin hapobo qui rihbi ta mato bothiqui, man heen jihuetahabo copi. Jano tah man heen joi jato nincamaxon, nahuabo rihbi man nincamatih, Hen tah hen honanyamanahqui, Hihbon hihyamahabo. ¹⁹Mato bihmahah, masa shinani ¿jahua hen yohitihin, jenques hen jatihin yohuani? jayamanoxahnahue. Papan ta mato yohuanti shinanmatihiqui man jato yohinon. ²⁰Man jaatian yohuanyaxihqui ta matonahma qui. Dios Yoshin ta maton janaya yohuanyaxihquiqui.

²¹Heen joi nincacai copi ta huetsa jahuen huetsanbi hapobo bihmatihiqui retehahabo. Huetsa rihbi ta jahuen papandi jascajaribitihiqui. Caibo rihbi ta jaton baquebaanbi jato retetihiqui, jato qui sinaxon. ²²Man heen janen cahi quen ta jatihibichin mato jistahihmatihiqui. Mato jascajahibaan bi ta hen mato jihuemanoxon bihtihi. Hen jonon caman man tenehiya ta hea janin sca Papan mato jihuemayaxihquiqui. ²³Jaabi, mato tiromahiboya huetsanco botannahue. Yohicoin tah hen mato jai: Israeli jemabo jatihibi janin man cariyamahi bi tah hen joribiyaxihqui, hea noquebaque. Jaa copi tah hen mato yohihi: huesti jema janin mato tiromajahiya huetsa janin sca botannahue.

²⁴Haxenica ta jahuen haxemanica mentan hashoan siri hihyamahiqui. Teexonnica rihbi ta jahuen patoro mentan hashoan hapo hihyamaribihiqui. ²⁵Maton haxemanica tiromajahoniboya mato rihbi sca jascajahibaan bi jenimanahue. Maton hihbo tiromajahoniboya mato rihbi jascajahabaan, heen hihbo jascáhahnibo quescia cahra hea jacanihquin hihquish jenimanahue. Tiroma yoshiman hah ta hea jacanihqui xobo hihbo que bi. Hea jascajahiboya ta

mato heen teexonnicahbo hashoan rihbi sca jacantihiqui.

Noquen Hihbo huesti qui raqueti

(Lc 12.2-9)

²⁶ Jaa copi jato qui raqueyamanahue. Jonexon hahcaibo jatihibi ta Papan janibijayaxihqui qui. Jonetax yohuanai joi jatihibi ta jaabo yohuanai Papan janibijaquin nincamayaxihqui qui. ²⁷ Hen mato yamebo yohihi joibo neten rihbi jato yohiyaxahnahue. Hen bax-exi jai joibo rihbi coshin nincamayaxahnahue. ²⁸ Rehtenoxon caman mato yora tiromajabahinti hahtipahibo qui raqueyamanahue. Maton yoshin ta jahuejati hahtipahyamacaniqui. Mato rehtexon bi maton yoshin rihbi chihi janin potati hahtipahi ta huesti qui. Hahqui caya raquenahue.

²⁹ ¿Huesti soro copi non rabe hihsa romishin maroyamahin? Copi que ma bi ta huesti res muhuataiya Papan jaa shinanbehnotimahiqui. ³⁰ Maton boo rihbi ta jahuentihi jaiquin hihxon Papan honanihqui. ³¹ Jaa copi jahua qui raqueyamanahue. Mato tah man hicha hihsa mentan hashoan hihti copi qui.

Cristonahbo

(Lc 12.8-9)

³² Jonibaan nincanon hihquish Hea tah hen Cristonah qui hihqui jonibo jatihibi ta henabo qui. Heen naihoh queha Papa bebonxon tah hen Jaa ta hena qui hahtihi. ³³ Jonibaan nincanon hihquish Hea tah hen Cristonahma qui hihquibo rihbi ta henamabo qui. Heen naihoh queha Papa bebon tah hen jaabo yohihi, jaabo ta henamabo qui hen hihtihi.

Jesus qui raeyamahibo

(Lc 12.52-53; 14.26-27)

³⁴ Joni huetsa betan siripi jihuetaibo rahsi janon hihquish hea jahui shi-nanyamanahue. Siripi jihuetaibo rahsi

janonma bi sinacahinax rehtenanaibo janon tah hen joníqui. ³⁵ Jahuen papa qui huetsa sinanon tah hen joníqui. Hacobobo rihbi ta jaton mamabo qui sinanica qui. Jahuen hihni rihbi ta jahuen yaya qui sinatihiqui. ³⁶ Huetsanah ta jahuen jenahaxbi jahuen rahuibo jatihibi.

³⁷ Jahuen papa sinamis hihquish, jaa hihiyamahiya jahuen mama sinamis hihquish hehon queenyamahi joni ta henama qui. Jahuen bebo baque sinamis hihquish, jaa hihiyamahiya jahuen baque haibo sinamis hihquish hehon queenyamahi joni ta henama qui. ³⁸ Hea retehibaan bi tah hen heen Hihbaan joi jenetimahi hihxon hea chibanyamahax tah man henabo man hihtimahi. ³⁹ Noque rehtecanmis hihxon hea hihbomayamahibo ta jascabiscatihi qui muhuatai. Heen joni jan hihqui copi retehibo ta hehbe jihuenica jascabi sca jatihibi.

Papan noque hinanyaxihqui

(Mr 9.41)

⁴⁰ Mato Benahue hahcaibaan ta hea jascajaribicaniqui. Hea johue hahcaibaan ta hea raanni heen papa jascajaribicaniqui. ⁴¹ Papan joi yohinica jan copijahi quescajaribiquin ta jahuen joi yohinica Johue hahcaibo Papan copijayaxihqui qui. Pontejaquin shinanai joni jan copijahi quescajaribiquin ta jaa ponte joni Johue hahcaibo Papan copijayaxihqui qui. ⁴² Heen haxenicaxon copi man nescapa baque pishca jiricatsihquiton jene paxa xehamanixon tah man Papan copijahah bihyaxihqui. Jaa man bihyaxihqui ta jenquetsahpabi manotimahiqui.

Nashimanica Juaman raanaibo

(Lc 7.18-35)

11 Jascajaquin jahuen doce haxeni-cabo haxemaquin queyohax res

sca, janohax sca huetsa jeman haxemahi Jesus cahi.

² Jesusen jahuen coshiyaxon hahcaya ta sipo xobohoxon joi nincaxon, jahuen haxenicabo Juaman raannishqui yocaqui bohábo. ³ Nocoxon:

—¿Hoa jahui joni hen yohini mia quin? ¿Jahui jatihquin huetsa, non mananon? —hahcanquin, Juan chaninoxon.

⁴ —Man jisxon nincacai Juan yohitannahue. ⁵ Benchebaan ta jisressciqui. Chantobo ta nihressciqui. Sipiyahpabo ta rohasciqui. Pabebaan ta nincascaiqui. Muahuatahbo ta hahquirihbi tee-hihsciqui. Jahuaborajomabaan ta joi siri nincaquihqui. ⁶ Heen joi nincacoinai joni rihbi ta hahan jenimati jaressciqui, jascajaquin yohitannahue —Jesusen jato jaquin.

⁷ Boresscaiboya, Juan jahua joni hin honanahbo hihxon jano tsinquitaibo Jesusen yocaquin:

—¿Jahua jisi man jano tsoa jaitonma caniquin? ¿Nihuen xayanai tahuia jisi man catannihquin? ⁸ ¿Jahua cahra man jisi caniquin? ¿Hihti siri chopasahuehi joni nan? Hihti siri chopasahuehibo ta quiquin hapon xoboho pari man merathi. ⁹ ¿Jahua copi man caniquin? ¿Papan joi yohinica jisi nan? Jaa raham. Mato yohinon nincanahue. Papan joi yohinahax bi ta yohinica mentan hashoan coshi joibo jaa jaiqui. ¹⁰ Jaa yohihi ta nea huisha jaiqui:

Jise. Mia bebon canon tah hen heen raanti joni raanai. Mia bahi bexojaxoni ta catihiqui, min jahan canon hihqui jaa joi. ¹¹ Nincanahue hen mato yohicinnon. Nashimanica Juaman yohihi joi mentan hashoan siri joi yohinica ta jahuentianbi jayamanishqui. Papan jihueta res ta hashoan siri yohiti jaiqui. Caibo Papan jihuetahbote xe mentan hashoan namanhax bi ta hashoan siribo yohiti jaiqui.

¹² Nashimanica Juan jomenoni bi ta rahma caman jahuen hahbe jihuetahbopan coshin tsinquihiqui. Mohi mohinihbaan ta jaa joi histon bichiqui, jahuen jihuetahbocatsihxon. ¹³ Juan yohihi jonon caman ta Cristo jotihi Papan joi yohinicabaan huishaxon yohipahonishqui. Moisesnin huishani janin ta jascarihbiqui, jaa joi rihbi. Jaa copi ta Juaman jato yohihah histon sca bihcanihqui. ¹⁴ Nincati shinanyahpaxon nea nincanahue. Elías janeya ta joyaxihiqui hahquin ta Papan joi yohinicabaan huishanishqui. Juan ta jaa Elías qui. ¹⁵ Pabinquiyahpaxon nincanahue, hen mato yohihi.

¹⁶ Rahma jihuetaibo jahua quescapahbo hin hen mato nescajaquin yohinon nincanahue. Baquebo jaabo rahsi shirohi notsihi sinacananai quescapahbo ta jaabo qui. ¹⁷ Man bairahnnon hihxon non rehue hahcai bi tah man bairahyamahi. Non huiniah bi tah man huaohihyamahi hih ta jacanihqui notsihi. Rahma jaibo ta jascarihbiqui. ¹⁸ Joxon ta piti siribo Juaman piyamanishqui. Xehati rihbi ta xehayamapahonishqui. Jaa copi ta Yoshiman ta jaa hihbojahiqui hihcanihqui. ¹⁹ Hea noquebaque joxon tah hen pixon xeharihbibi. Jaa copi yohuanrihbican. Jise, jaa joni ta pihanhan qui hih ta jacanihqui. Xehanhuan tah qui. Coriqui cobrannicabo ta jahuen hahberabetibo qui. Hohchayahpabo ta jahuen hahberabetibo qui hihribicani, hea yohihi. Tsoa ponte shinanyahpa quin hihxon tah man joni huetsa jisxon, jan hahcai jisxon man honantihi —jato jaquin Jesusen.

Nincayosmabo

(Lc 10.13-15)

²⁰ Jaatian sca jano jahuen coshiyaxon jan jato hicha hahxonrahsihu jemabo

sca jaan yohicoinquín, jaton shinan ponteyamahiya jato yohicoinquín.

²¹—Hahrai hih tah man jatihi, corazinobon. Hahrai hih tah man jatihi betsaidabon. Mato tocanaxon heen coshiyaxon hen hahrasih quescajariquin, Tiro jemanxon hahxon, Sidon jemanxon hen hahcaya cahen neateman jaton hohcha copi benaxon hahan benati chopasahuehax chihi mapo mapocohtax tsahoxon jaton shinan pontehan. ²²Jaton shinan pontehaxma mahuanihbo casticanxon bi ta mato sca hashoan rihbi Papan casticanyaxihqui qui. ²³Capernaum janinhahbon, ¿naiho jihueta quescarax maton jema janin jihueta shinan man Jain? Matoyabi ta maton jema panteon hihyaxihqui qui. Heen coshin mato hahxonni jai quescajaquin Sodom jema janin rihbi jascajaxonah cahen rahma caman jaton jema jaquehahniqui. ²⁴Jaabo tiromabo copi jaton jema Papan yamabajahinni bi ta jahuen casticanti neten jato casticanquin mato sca hashoan rihbi casticanyaxihqui qui.

Tantiti benahue hihqui Jesus

(Lc 10.21-22)

²⁵Jaa pecaho sca Papa yocaxon Jesusen yohiquin.

—Hahxon tah min hea jai, Papan. Mia tah min naiyahpa mai hihbo qui. Shinamahnhuanyahpabo betan honanbaan honancasquimanon tah min jato pantexon miin baquebo sca honanmahi. ²⁶Mian jisi, jascajaha siri quen tah min jato jascajaxonai, Papan.

²⁷Papan ta hea jatihibi hinanihqui. Jahuem baque tsoa quin ta tsoanbi honanyamahiqui. Heen Papa huestichin ta honanihqui. Tsoa heen Papa quin tah hen jahuen baque hihxon hea huestichin honanai. Caibaan ta honanyamahiqui. Hea nincacaibaan res ta honanihqui, hean jato honanmahah. ²⁸Benahue, tee-

taibon. Benahue, hihue papihibon, jatihibi. Mato tah hen tantimatih. ²⁹Hen mato hihbonon benahue. Hen mato nincamanon benahue, man honannon. Honaxon bi hen mato yohinon. Mah hohmis hohmisai honanai tah hen qui. Benahue, hen mato shinan siricahinmanon. ³⁰Hen mato yonohi quescayah ta teema qui. Hen mato yohihah tah man histon hahtihi. Heen jihueta bohi benahue —jato jaquin.

Tantiti neten trigo rebox tesabonahibo

(Mr 2.23-28; Lc 6.1-5)

12 Jaton tantiti neten sca ta Jesus betan bahin caquin trigo huai nabebacahini caquin, picatsihxon jahuen haxenicabaan huestibo bero pasquebonaxon bishquihahxon pinishqui. ²Jascjahiboo jisxon, fariseobaan sca yohiquin.

—Jise. Tantiti neten jascajatimahi bi ta miin haxenicabaan bero bichiqui.

³Jascayah sca:

—¿Jahuen jonibo betan caxon, picatsihxon, jahua Davidinin janishqui? ¿Papan joi jisxon man honanyamahin?

⁴Picatsihquish ta Papan xoboho hihcoxon yocakah, Papa pejanxonti paan hinanah bihxon pinishqui. Jaa ta jaan pitima piti qui. Jahuen hahbe cahibaan pitima rihbi. Yohuanxonnicahbaan piti res ta jaa qui. ⁵Tantiti netenbi ta Papan xoboho Papa bebon yohuanxonnicahbo teetihqui. Jaa netenbi jaabo jaton tee jaah ta siri qui, Papan jisi. ¿Moisesnin huishani joi jisxon bi man jaa rihbi honanyamahin? ⁶Nincanahue hen mato yohinon. Papan xoboho teeti joi jai copi res ta tantiti netenbi jahoxon teexoncaniqui. Rahma ta jahuen xobo mentan hashoan coshi joiyahpa neno qui. ⁷¿Nea huisha jahua hihcatsihquiquin man honanyamarihbihin? Man joni huetsahon shinanti tah hen queenai. Maton hohcha

copi man hea jahuara hinanti cah hen queenyamahi. ¿Jaa joi hen jahua hihti qui? Honanxon cah man ponte jonibo qui tiromahi yohuanyamahan. ⁸Noquebaquehax tah hen tantiti nete hihbo qui, hah tah hen mato jai, man honannon — jato jaquin.

Meyosma joni

(*Mr 3.1-6; Lc 6.6-11*)

⁹Janohax caparihax sca, jaa fariseobaan tsinquit xoboho nococani. ¹⁰Mapetaibaan bi joni meyosma jano tsahoti. Jesus caheti shinanxon, yocacanquin, jano jaibaan:

—¿Tantiti neten non joni rohajatihin?
—hahcanquin. ¹¹Jascajaquin yocacahbo jaan sca jato yohiquin:

—¿Maton carnero hina tantiti netenbi mai quiniho paquetaiya man bihxon tsecayamahin? ¹²Joni ta carnero mentan hashoan jihuematici qui, hah ca hen mato jai. Jaa copi tah non tantiti neten joni huetsa yanapantihi.

¹³Jato jascajaxon meyosma sca yohiquin:

—Miin mequen hehqui pontehue.

Yohihah, hahqui jahuen mequen pontehax rohascrai. Huetsa jahuen mequen hihqui quesjadi, siribehcoinscrai. ¹⁴Jaatian picotax, fariseobo yohinani. Jenquetsaha non jatihin jaa rehtenoxon, hihcani.

Jesus yohihi Isaiasnen huishani joi

¹⁵Rehteti shinanaibohi honanax, janohax Jesus caresscrai. Cahiton sca hihti caibaan chibanhinscaquin. Jato tocan jai hisinaibo ta jatihibi rohajapaquenishqui. ¹⁶Rohajaxon ta jato hihti yohinishqui, jan jato rahonah tsoabi yohiyamahahbo. ¹⁷Isaiasnen huishani quesca sca janon ta jato yohinishqui. Jaa joi ta nesca qui:

¹⁸Jisnahue. Jaa ta hen caisai heen joni qui. Hahan hen hihti queenai

heen joni tah qui. Hahan hen jenimahi. Heen yoshin tah hen hinanai. Jayaxon ta jatihibi nahuabo yohiyaxihqui qui, jato hihboscanoxon.

¹⁹Tsohbetanbi ta sinacananantimahiqui. Sai saihihima ta qui. Bahin cahibaan nincacah ta jahuabi quenayamahiqui.

²⁰Tahua moshitai quescapahbo meraxon bi ta jaan tehcayamahiqui. Lamparin huaxmen nocahax cohaini quescapahbo ta jaan nocajayamahiqui. Quiquin hapoxon jan tiromabo casticannon caman ta jasca jatihibi qui.

²¹Hahqui ta jatihibi nahuabaan jaton shinan camatihi qui, jaan jato jihuemayaxihqui copi hihqui Isaiasnen huisha.

Yoshiman yanapanai tah qui hihqui bo

(*Mr 3.19-30; Lc 11.14-23; 12.10*)

²²Jaatian ta yoshiman hihbojahi joni hihuecannishqui. Yoshiman hihbojahah benche sca banetax, joyoscrai. Jesusen rohajaha jisresscaquin, yohuanrihbiscrai. ²³Rahte rahtetax sca tsamajaquetaibo yohinani.

—¿Jaa tsi ra Davidi xohta hihyamahiquin? —hihscacani.

²⁴Nincaxon sca fariseobaan jato yohiquin:

—Neatohon ta tiroma yoshiman coshiyahpaxon yoshinbo potahiqui. Beelzebú ta jahuen hihbo qui, tiroma yoshin —hahcanquin.

²⁵Jasca jaibaan bi jaabaan shinanai honanxon Jesusen jato yohiquin: Hapon jihuetaibo jaabo rahsibi rehtenanaiya ta jaton hapon yonoti queyotihi qui. Jema ta jascarihihi. Xobo jascarihihi. Jaabo rahsibi rehtenanax jahuabi baneyamascai. ²⁶Satanas hahbe Satanasnen potahah ta Satanasbo

rehtenanscaiqui. ¿Jenquetsahax sca jahuen yonoti banetihiquin? ²⁷ ¿Beelzebú coshiyahpaxon tiroma yoshinbo hean potahiya jahua coshiyahpaxon cahra maton baquebaan jato potahiquin? ¿Jenquetsahpa shinanya man quin? Maton baquebaanbi ta mato yohitihiqui. ²⁸ Dios Yoshinyaxon hean jato potahi honanscanahue: Papan jihuematí nete ta mato qui noco sca jaiqui, shinanscanahue.

²⁹ Coshi jonin jahuen xobo coiranaiya jenquetsahax hihcoxon huetsan jahuen jahuarabó bichintihiquin? Xobo hibó nexaxon pari ta jahuen jahuarabó bichintihiqui. Shinanscanahue.

³⁰ Hehbetan teeyamahax tah man heen rahuibo qui. Hea tsinquixonyamaquin tah man jabisahi.

³¹ Jaa copi tah hen mato yohihi: Papan ta jatihibi tiromabo sohuati hahtipahiqui. Jaton shinaman tiromajaquin hahcaibo, Papa qui tiromahi yohuanabó, jato jatihibi sohuatihiqui, yocacah. Jahuen Yoshin siri qui tiromahi yohuanabó res ta jato sohuaxontimahiqui. ³² Hea noquebaque qui tiromahi yohuanabó ta Papan sohuatihiqui. Dios Yoshin qui tiromahibo ta jascayamahiqui. Jascapahbo ta jahuentianbi sohuatimahiqui. Rahma sohuayamaribiquin. Nete queyotai bi sohuayamaribiquin.

Jahuen bimi jisxon honanti

(Lc 6.43-45)

³³ Jihui honanquin hahcajaquin honannahue. Siri jihui tah qui hih tah man jai, siri bimiyahpahi honanax. Tiroma jihui tah qui hih tah man jaribibi, tiromabo bimiyahpahi honanax. Jahuen bimi honanxon tah man jahuen yora yohihi. ³⁴ Jascajaquin rihbi hea honannahue, rono janayahpabon. ¿Jenquetsahax man tiromabohax siripi yohuan-

tihin? Maton shinan tiroma hichahi quen tah man tiroma yohuanyahpabohi. ³⁵ Siri jonibo ta siri shinan hicha qui, jaa copi siripi yohuani. Tiroma jonibo rihbi tiroma shinan hichahax jaya yohuanribihi. ³⁶ Hihresi yohuanaiboya ta jatihibi jaton joi tiroma copi Papan jato casticanyaxihiqui, jahuen casticanti neten. ³⁷ Tiroma yohuan japahonibo ta casticanyaxihiqui. Yohuan siriyahpabo ta jaton yohuan copi casticantimahiqui — jato jaquin.

Hahan honanti jismahue hahcaibo

(Mr 8.12; Lc 11.29-32)

³⁸ Jaatian jaton huisha honanbo betan fariseobaan yocascaquin.

—Maestron. Papan shinan coshiyaxon min hahcai tah non jiscatsihqui, mia Papan raanai joni hihqui honannoxxon.

³⁹ Yocacahbo sca jato yohiquin:

—Tiromaboxon tah man jascajaquin shinanai. Tsiniti shinanyahpaboxon tah man jascajaquin hea yocacai. Papan coshiyaxon hen hahcai man jiscatsihqui bi ta Papan mato jismatimahiqui. Hahan hea honanti mato hinanquin bi ta jahuen joi yohinica Jonas jan huinomani quescapah res huestijaquin res Papan mato jismatihiqui. ⁴⁰ Yaphahuhnen xehahah, quimisha nete jahuen poco janin Jonas hihbahinahax quimisha yame rihbi hihshinahax picconi quescarihbibi tah hen noquebaque mai chicho quimisha neten quimisha yame rihbi hea jatihi. Jasca hen jaiya ta hahan hea honanti qui. ⁴¹ Papan casticanti neten ta Nínive jema janin jihuepahonibaan mato metoxon yohiyaxihiqui. Jonasen noque yohihah tah non noquen shinan pontenihqui. Jonas mentan hashoan nincati jonin mato yohihah bi tah man nincayamanihqui. Mato tah man noque mentan hashoan nincayosmabo qui hih ta jayaxihcanihqui, man nincayosmabo quen. ⁴² Etiopia mai

janin japahoni quiquin hapo haibaan ri-hbi ta casticanti neten mato jisxon jasca-jaquin rihbi mato yohiyaxihqui qui. Ho-cho bi res hihquish bi tah hen Salomon yohuanai nincaqui caniqui, Salomonen honanax yohuanai nincacatsihquish. Sa-lomon mentan hashoan honanai jonin mato yohihah bi tah man nincayosmabo qui hih ta jayaxihqui qui.

Catani joribibi tiroma yoshin

(Lc 11.24-26)

⁴³ Jan coiranai joni jenehax ta tiroma yoshinbo nihnichiqui, jano hotati yamahi janin nihnichax bi jahuenbi tantitimahiya shinanscaquin.

⁴⁴ Janohax hen jahui janin caribitanpan, heen xobon, hihcahinax ta caresscαι qui jahuen xoboho. Nocoxon ta hihbojoma siri merahiqui. Matsó siri meraquin, bexojaxonah siri. ⁴⁵ Jaatian sca caxon, hashoan tiromabō yoshinbo rihbi benaxon, siete merahax jaya joribiscāi, jano jihuenoxon. Jaatian ta hashoan tiromacanahi sca jaa joni jatihi qui, hicha yoshiman sca hihbojahah. Huestichin hihbojamenoha bi hashoan tiromascai —jato jaquin.

Jesusen mama betan jahuen huetsabo nocotai

(Mr 3.31-35; Lc 8.19-21)

⁴⁶ Tsamajaquetaibo haxemahi yohuanparihiya, jahuen mamaya jahuen huetsabo nocoti jahuem jeman nichish hahbetan yohuancatsihqui.

⁴⁷ —Miin mama betan miin huetsabo ta jeman nichiqui. Mia ta yohuanqui-hncatsihcanihqui —hahquin huetsan.

⁴⁸ Jascahah:

—¿Tsoa hin, heen mama? ¿Tsoa hin, heen huetsabo? —jato jaquin. ⁴⁹ Jato jascajaxon jahuen haxenicabo metoxon: —Jisnahue. Neabo ta heen mama qui. Neabo ta heen huetsabo qui. ⁵⁰ Heen nai-hoh queha Papa queenai quescabijaquin

hahcai joni ta heen huetsa qui. Jascapah ta heen choca qui. Jascapah ta heen mama qui —Jesusen jaquin.

Mihsahahnica joi

(Mr 4.1-9; Lc 8.4-8)

13 Jaatian ta hian patax tsahoti Je-sus canishqui, xobohoh quehax picotax. ² Hian quetsahohtaiya sca hihti caibo hahqui tsinquiaqueti becani. Jaa copi ta nontin sca nanenishqui, nontin tsahoxon quexa nichibo haxemanoxon. ³ Haxemaquin ta jaa patax queha joibo jato hicha yohinishqui. Nescajaquin jato yohiquin: Huesti huai-janicah ta jahuen trigo banahi canishqui. ⁴ Huai chian sca trigo berobo mihsahahbonahi cahi. Mihsahahbonah cahen caibo berobo bahin paque-canahi. Jascapa ta pehiyahpabaan top-iquin queyonishqui. ⁵ Caibo berobo ri-hbi cahen chahoma main paquenish. Bemacanya mashi jai. Mai chicho hi-hyamahax copi cahen jascapa histon jo-conish. ⁶ Bari xanascaiyā sca cahen jo-conaibo histon xanahi, mai chicho ja-ton tapon cayamahiya. ⁷ Caibo moxa chian paqueti. Jaabo joconai bi cahen moxan rishqui qui, hashoan hani sca hi-hxon. ⁸ Caibo berobo ri-hbi cahen mai siri janin paqueti. Jaabo cahen joconax, hanihax bimiscāi. Caibo cahen huesti bero potahah cien beroyahpascai. Caibo cahen sesenta beroyahpascai. Caibo ca-hen treinta beroyahpascai. ⁹ Hahan nincati pabinquiyahpaboxon nincanahue —hahquin.

Jaa patax queha joi Jesusen yohihi

(Mr 4.10-12; Lc 8.9-10)

¹⁰ Jaa pecaho sca jahuen haxeni-cabo jaabo rahsibi Jesus qui caxon yocacanquin:

—¿Jahua copi min jaa patax queha joibo res yohiquin jato haxemahin? —hahquin.

¹¹ Yocacahbo sca: —Papan jihuemati jenquetsahpa quin man honannon hihxon tah hen jaa patax queha joi yohihi. Hoa caibaan nincaxon bi honanyamanon hihxon tah hen jascajahi. ¹² Jaton jointi janin Papan shinan pishca jaibo tah hen hashoan hinantihi, hicha bi res jan janon. Jaton jointi janin jai shinan yamahibo tah hen jaa jaibo pishca rihbi jato bichintihi. ¹³ Jaa copi tah hen jaa patax queha joi jato yohihi. Jaatian ta jisquin bi jistimacantihiqui. Nincaquin bi ta nincarestihiqui, honanyamaquin. ¹⁴ Isaiasnen huishani joi jai quesca sca ta jaresscainqui.

Pabinquinin nincaxon bi tah man honan-timathihi. Beron jisquin bi tah man jistimathihi.

¹⁵ Nincayosmaboxon copi tah man jasca-jatihi. Pabinquiyaxon bi hochoxon nincacai quescajaquin. Jistihhi bi tah man bero rahcohi, jismis hihxon. Nincamis hihxon rihbi, jointinin nincaxon, shinan pontehax rohahax jihuemis hihxon tah man jascajahi.

hih ta jaiqui Isaiasnen huishani joi.

¹⁶ Jahuerohajaquin tah man jascajax-onma beron jisxon jiscoinai. Jahuero-hajaquin tah man pabinquiyahpaboxon nincacoinai. ¹⁷ Manjisibo ta hicha Papan joi yohinicabo jisti queenpahonishqui. Pontejaquin shinanaibaan hihti jiscatsihxon bi man jisi jisyamaquin. Man nincacai joibo hihti nincacatsihquiaan bi ta Papan jato nincamayamanishqui. Jaa copi sca Jahuerohajaquin ta Papan noque jismahiqui, Jahuerohajaquin ta noque nincamahiqui, hihnahue.

Mihsahahnica jahuahi jaiquin hihxon jan yohihi

(Mr 4.13-20; Lc 8.11-15)

¹⁸ Bananica joi jahua hihcatsihquiaquin mato hen yohinon nincanahue. ¹⁹ Papan jihuemati joi yohihah bi honanyamahi joni ta bahinbi bero paquetai quesca

qui. Jahuen jointi janin banaquin hah-cajaquin non nincamaha bi cahen joxon, non yohiha joi tiroma yoshiman bich-inbahinquin. ²⁰ Chahoma main bero paquetai ta nincamenoxon jenimaxon bichi quescapah qui. ²¹ Jahuen tapon chicho cayamahi quescapah sca basiyamahi. Jaa joi jan bihcoinai copi caibaan hosan hosanquin. Hosanah sca histon jenescaquin. Masa tenetihhi bi jenebahini caresi. ²² Moxa chian paquetaibo ta joi bihcoinxon bi huetsa shinanoya jaxon caijayamahibo quescascae qui. Nincacoinxon bi ta mai mehabaan shin-nanai quescajaquin shinanxon, jaton jahuaborabo rihbi shinanxon jaa joi caimayamahiqui, bimijoma quescapah sca jan janon. ²³ Mai siripan banaha bero ta nincanica joni quescapah qui. Johi nincaxon, jahuen shinaman nincacoinxon, shinan caijaquin. Bero caichi jai quescar-ihbihii jahuen shinan, caibo quiha cien bero sca, caibo quiha sesenta, caibo quiha treinta.

Trigo tocan huasi joconcanahi

²⁴ Huetsa jaa patax quehah joi ri-hbi ta nescajaquin jato yohinishqui. Pa-pan jihuemati ta bananica jai quescapah qui. Jahuen huai chian caxon ca-hen banaquin jahuen berobo mihsah-hbonaquin. ²⁵ Mihsahahnica jahua bero to-can jahuen huasi bero mihsahahnbonah carescat. ²⁶ Trigo bero joconax hani sca jaax beroyahpa sca jaiya bi cahen huasi jascarihbii, beroyahpascat. ²⁷ Trigo to-can huasi jai jisxon ta jahuen jonibaan sca yocatihiqui:

—¿Siri bero rahsi min banayama-hohquin, Patoron? ¿Siri rahsi potahi shinanah bi jenquetsahpi huasi sca jaiquin? ²⁸ Jaatian ta jaton patoronen jato yohitihiqui:

—Jaa ta noquen rahuin noque jascajanhoxqui —hahquin.

—¿Hoa huasibo non mexahi catinahin —hih sca jacani.

²⁹—Mexayamaquin rahan. Huasi mexaquin bi jayabi trigo rihbi man mexamis. ³⁰Jatihibi haninon jenenahue. Trigo tsinquitii tian pari caxon tah non tsinquixonicahbo yohitihi. Huasi pari mexanahue. Huasi mexaxon nexaxon cohati sca tsamanhinhinahue. Trigo bero rahsi sca tsinquixon jano bexojati xobo janin bexojaxonnahue —hah sca jato jatihi.

Jaton moxo bero

(*Mr 4.30-32; Lc 13.18-19*)

³¹Huetsa jaa patax queha joi rihbi ta jato yohinishqui. Papan jihuemati ta moxo bero pishca jai quescarihbihiqui. Jascapa bero pishca cahen huai chian hihbaan banahah joconi. ³²Caibo bero mentan hashoan hexti pishcahax bi ta jaconax hani sca jaax texe banabo mentan hashoan hani sca jaiqui. Jihuiscaya ta hihsabo joxon jahuen mebibo janin sca nahajatihiqui.

Hahan paan soohihmati

(*Lc 13.20-21*)

³³Huetsa jaa patax queha joi rihbi ta nescajaquin yohinishqui. Paan hahnica haibaan ta jahuen paan soohihmanoxon hahan soohihmati bhnicah qui. Jascapa bihxon cahen huesti paniro tihopa tonco janin niaquin. Jano niahah ta tonco jatihibi soohihtihiqui. Papan jihuemati ta jascarihbihiqui, non honanaima bi hanihi —jato jaquin.

Jaa patax queha joi rahsi

(*Mr 4.33-34*)

³⁴Jascapahbo jaa patax queha joibo ta Jesusen jato haxemanishqui, tsinquitax tsamajaquetaibo yohiquin. Jaa

patax joibo rahsichin ta jato haxemanishqui. Jayajoma jahuabi jato yohiymaquin. ³⁵Jaa copi ta Papan joi yohinicaten huishani jai quescajanishqui.

Jaa patax queha joibo yohiquin tah hen jato haxemahi. Jahuentianbi nincanihmabo joi tah hen jato nincamahi
hih ta jaiqui huishani joi.

Huasi jahua hihcatsihquiquin hihxon jan yohihi

³⁶Tsamataibo potabahini sca Jesus cahi, xoboho hihcohi. Jano rihbi ta jahuen haxenicabo hihconishqui, yocacatsihqui.

—¿Huasi bero joi jahua hihcatsihquiquin? Noque yohihue —hahcanquin.

³⁷—Nesca tah qui, jisnahue —jato jaquin.— Siri berobo banahi joni ta noquebaque qui. ³⁸Jahuen huai ta nai naman yohihi qui. Jahuen bero siribo ta Papan jihuetahbou qui. Huasibo cahen tiroma yoshiman jonibo. ³⁹Jahuen rahui cahen Satanás. Jahuen tsinquitii tian cahen nea nete queyotai hihcatsihqui. Jahuen tsinquixonicahbo cahen Papan yonotibo. ⁴⁰Jascarihbih, huasi mexaxon cohati jaibo quescarihbih ta nea nete queyotaiya jayaxihquiqui. ⁴¹Noquebaque hihxon tah hen heen yonotibo raanyaxihqui. Caxon ta hohchamanicahboa tiromajahibo tsinquiyaxihcanihqui. Jascapahbo ta Papan jihuematima janin boyaxihcanihqui. ⁴²Jato boxon ta johuehihnatai chihi janin jato potayaxihcanihqui. Jano ta sai saihihyaxihcanihqui. Jaton xeta yeres yeresahquin, hisin tenequin. ⁴³Jaatian ta bari coshi xaba jai quescarihbih, Papan jihuetahbou siribo coshi shinanyahpa hiyaxihcanihqui, Papan jihuematii janin. Pabinquiyahpaxon nincanahue.

Jonenihbo coriqui

⁴⁴Papan jihuemati ta nahue chian tsama coriqui jonenoxon mihinnihbo quescapah qui. Jaa mihinnihbo meraxon cahen huetsa jonin mahporibbihax hiti jenimahi caxon jan jai jatihibi maromatihi. Maromaxon ta coriqui bihxon jahan sca jaa nahue marotihiqui, jaa mihinnihbo jahuenah sca hihnon.

Copi moro

⁴⁵Papan jihuemati ta marocatsihquin moro copibo benahi maronica nihnichi quescapah rihbi qui. ⁴⁶Huesti moro hiti siri, hiti queenti siri meraxon cahen caxon jan jai jatihibi maromaxon sca jaa moro siri maroscaquin.

Mesco yapá rahcoxon caisaibo

⁴⁷Papan jihuemati ta tarrafa quescapah qui. Tarrafa cahen hian janin potaxon mesco yapá rahcocanquin. ⁴⁸Bochoscaya ninixon mapemaxon yapá tsecapaquescacanquin. Tsecapaquesxon caispaquecanquin. Tsahoxon sca tasa qui siribo nanehinhiqui, tiromabo potapaquequin. ⁴⁹Nete queyotaiya ta jascaja rihbi Papan jayaxihiqui. Joxon ta Papan yonotibaan tiromabo bihyaxihcanihqui, siribo tocan nihyamascanon. ⁵⁰Johuehinhatai chihi janin ta jato potayaxihcanihqui. Jano ta sai saihiyaxihcanihqui. Xeta ta yeresahyaxihcanihqui, hisin tenequin.

Behnaboya xenibo jismahibo

⁵¹—¿Hen mato yohihi jatihibi man nincaxon nincacoinain? —jato jaah: —Nincaquin rahan —hihcani.

⁵²—Jaa copi tah man Papan jihuetauhox jahuen jihuetauhox haxescaxon caibo rihbi sca man haxematihi. Jaatian tah man hicha jahuaborayahpa hani patoro quescapah cahen jahuen bexojati chiqueho caxon behn-

aboya xenibo siribo cainmatihiqui —jato jaquin.

Nazaret janin Jesus nocorihbihi

(Mr 6.1-6; Lc 4.16-30)

⁵³Jascajaquin jaa patax queha joibo jato yohiquin queyohax, janohax Jesus cahi. ⁵⁴Jahuen main cahi. Cahi nocotax jaton tsinquitox boho mapexon janoxon jahuen caibo Papan joi yohiquin. Jaan jato haxemaha, rahte rahtecani.

—¿Jahuerahnón haxenihxon hen neatohon yotho honannishquin? ¿Jenquetsahaxon coshi bihxon jonibo rohajahiquin? ⁵⁵¿Xobojahnicaten baque ma hin? ¿María janeya jahuen mama ma quin? ¿Jacobo, José, Simon, Judas jahuen huetsaboma quin? ⁵⁶¿Jahuen chocabo jatihibi noque betanbi jihueyamacanquin? ¿Jahuen sca hen jahuen shinan bihnishquin? —hihcani.

⁵⁷Jaa copi nincacoinyamacanquin. Nincacoinyamahibo copi sca Jesusen jato yohiquin:

—Papan joi yohinicahon huetsancohabo queenaibaan bi ta jahuen mai janinhahbo jahan queenyamacaniqui. Jahuen jenabo, jahuen xobo janinhahbo, jaabo jahan queenyamaribhibi —jato jaquin.

⁵⁸Nincayosmabo copi ta jahuen coshiyaxon jaton jema janin jato hicha hahxonyamanishqui.

Nashimanica Juan muhauatai

(Mr 6.14-29; Lc 9.7-9)

14 Janobo jahuen coshiyaxon Je-susen jato hahxonai ta caibaan sca quiquin hapo Herodes yohinishqui.

²—Nashimanica Juan tah qui. Yamanicahax bi ta hahquirihbi teehihscaiqui. Jaa copi ta coshiyahpa qui —hih sca Herodes jai, Jesus yohihi. Jahuen jonibo betan yohuani ta Herodes jascanishqui.

³Neateman Juan rehtehox copi jascari

yohuani. Jasca jayanoxon pari ta Juan bihxon sipo xoboho Herodesnin tsahonnishqui, Herodesnin huetsan haibo Herodias copi.⁴ Jaa ta miin haiboma qui. Min tah min hahbetan tiromahi, Juaman yohihah copi sipo xoboho tsahonquin.

⁵ Juan rehtecatsihxon bi jonibo sinamis hihxon rehteyamaquin. Jaa ta Papan joi yohinica qui hihquiboya sinacanmis hihxon rehteyamaquin.

⁶ Jahuen bari senenjahiya ta xehahibo Herodesnin xehaquihnnishqui. Jahuen haibaan baque haibo chirinai jisxon, Herodesnin costan costanquin.⁷ Costanxon, Dios quenaxon sca jaa xontaco yohiquin:

—Min queenaibo hea yocareshue. Mia tah hen hinantihi —hahquin. ⁸ Juaman mapo yocahue jahuen maman jaá sca, jahuen mama queenai quescajaquin xontaconen yocaquin:

—Juaman mapo quencha qui nanexon hea bexonahbo yohihue —hahquin.

⁹ Xontaconen yocacah sca quiquin hapo benacahinscái. Min yocacai tah hen mia hinantihi hahxon bi masa shinanscaquin. Masa shinanxon bi Dios quenaxon yohixon copi jeenhahquin, hichaxon nincacaibo jai copi rihbi jeenhahquin.

—Textetannahue —hahquin jato. ¹⁰ Caxon sca sipo xobohoxon bi Juan textecanquin. ¹¹ Quencha qui sca jahuen mapo nanexon, bexon, xontaco hinanquin. Jaan sca jahuen mama hinanquin.

¹² Juaman haxenicabo ta jahuen yora bichi bocannishqui. Bihxon mihinquín. Mihintani joxon, Jesus yohicanquin.

Cinco mil jonibo Jesusen pimahi

(Mr 6.30-44; Lc 9.10-17; Jn 6.1-14)

¹³ Yohihahbo nontin nanetax janobi-hax Jesus cahi. Jano tsamataibo yamahi janin jahuen haxenicabo betan yohuani

cahi. Jano tsoa yamahiton nocoti cahi. Jano ta Jesus cahiqui chanihibo nincacax sca, jano jai jemabo janinhax tsama jonibo cahi. Hian quetanbahini sca Jesus chibani bocani.¹⁴ Taxnatax mapexon jonibo tsamascai Jesusen mer aquin. Jatohon hihti shinanxon, jaton hisinbo rohajaquin.¹⁵ Bepiscayia joxon jahuen haxenicabaan yohiquin:

—Neno ta tsoabi jihueyamahiqui, Hibon. Bari rihbi ta hihquicatsihscainqui. Nea jonibo raanscahue, honobo jai jemabo janin caxon jaton piti pishca maroscatanahbo —hahcanquin.

¹⁶ —Jahua copi catima ta jacanihqui. Piti jato hinannahue, matonbi —jato jaquin Jesusen.

¹⁷ —Neno tah non pichca paan pishca res jai, rabe yapa xohi rihbi. Jahua hashoan tah non piti yamahi —hahcanqui.

¹⁸ —Jaa hea bexonahue —hahquin jato.

¹⁹ —Janobi tsahopaquehue —jonibo jaxon, jaa pichca paanya rabe yapa bihxon, nai bejisihnxon, Papa yohiquin. Piti tehcaxon sca jahuen haxenicabo hinanpaquequin, jaabaan sca jonibo hinanhahninon.

²⁰ Pihi yanicahinscacani. Texejahabo tsinquixon doce tasa bocho bihcanquin.

²¹ Jaa pihibo ta hicha janishqui. Haiboboya baquebo toponyamahah bi bebo rahsi toponah ta cinco mil janishqui.

Hian benichi Jesus jahui

(Mr 6.45-52; Jn 6.16-21)

²² Jaa pecaho ta jahuen haxenicabo yohinishqui:

—Hean hen nea jonibo camanon nontin nanetax pohquejaquescanahue —hahquin jato yohiquin.²³ Tsamataibo camahax sca, jano jai mahchi manihihnatí cahi, jaa huesti caxon Papa yocanoxon hihquish. Yamescayia sca jaa huesti janó baneti.²⁴ Jahuen

nonti pohquejaqueti cahi hochoscai. Behchoman tsahcahah huinahahbo bi casasquimahi. Nihuen jato behchihah huinacasquimacanquin. ²⁵Xaba jahui hochoma sca hian benichi jato qui Jesus cahi. ²⁶Hian benichi jahui jisish, jahuen haxenicabo hihti raqueti. Yoshin tah qui hihquish, raquetax sai sahihcani.

²⁷Jaatian:

—Raqueyamanahue. Hea tah hen qui. Rahteyamanahue —hahquin jato.

²⁸—Mia hihxon hea yohihue, Hihbon, hen jene benicanaxon mia behchihi canon —hahquin Pedronen.

²⁹—Johue —jaáh sca picotax jene benichi Jesus qui cahi. ³⁰Caquin bi behchon jisish, raquerihbiscai. Jene meran hihquicatsi sca jaax sai sahihqush:

—Hihbon, hea bikhue —hih sca jai.

³¹Mehuetanxon huenihihnxon sca:

—Hicha tahma res tah min shinancoinai. ¿Jahua jenquetsahin min shinancoinyamahn? —hahscquin Jesusen.

³²Nontin nanexon sca nihue tantinon yohiquin. ³³Jaa jisxon, hahbe cahibaan hahqui raboxonen tisquihahpaquexon:

—Mia coin tah min Papa Diosen baque qui —hahcanquin.

Genesaret janinhahbo jan rohajahi

(Mr 6.53-56)

³⁴Hoque quexa nocotax sca Genesaret jema qui nococani. ³⁵Janohahbaan sca jaa nocotaibo jisxon, Jesus honanxon janobo jai jemabo janin quenamacanquin, hisinyahpabo benon hihxon. Jaa copi jascapahbo becanquin. ³⁶Jesus qui caxon, hihti yocacanquin.

—Miin coton quexa pishca res hea mehemahue, hen rohanon —hahcanquin. Mehehax res sca hisinyamascai. Siricahin sca jacani.

Hahan jointi rishtajatibo

(Mr 7.1-23)

15 Jerusalen janinhax sca caibo no-coti became. Fariseobo betan jaton huisha honanbo. Nocoxon sca:

²—Miin haxenicabaan ta mechoquihxonma pihiqui. ¿Jahua copi jascajacanquin, noquen xenibaan yohini quescajayamaquin? —hahcanquin yocaquin.

³—Maton caya tah man Papa Diosen yohini quescajayamanoxon huetsajaquin jonibo haxemahi. ¿Jahua copi man jascajahn? ⁴Papan ta yohnishqui: Miin papahon queenhue; miin mamahon rihbi queenhue hahquin. Huetsa rihbi jan yohini: Jahuen papa qui tiromahi yohuanai joni queyocahinno tah man rehtetih. Jahuen mama qui tiromahi yohuanai joni jascajariquin. ⁵Papan mato jascajaquin yohinib bi tah man huetsajaquin jonibo yohihi. Jaton mamaboya jaton papabo yanapanyamahabo hihxon tah man jato yohihi, Maton papabo man yanapanpanan Papa Dios hinantijanahue hah tah man jato jai. ⁶Jascajaquin tah man maton haxemati joiyaxon Papan joi nincayamamahi, jonibaan nincapanan.

⁷¡Nincacoinihcamahibon! Mato yohihi ta sirijaquin Isaásnen yohnishqui:

⁸Jaton janan nea jonibo hehqui siripi yohuanib bi ta jaton jointinin jahuabi nincayamahiqui.

⁹Nescajaquin Papa Dios hahxonnahue hihxon bi ta jonibaan shinanax yohuanai joi res haxemacaniqui. Jaa copi ta yanca bi res hea yocacaniqui —jato jaquin.

¹⁰Tsamataibo sca Benahue hahxon:

—Nincaxon nincaquin sirijanahue.

¹¹Piquin non noquen poco janin nanehiton ta noquen jointi rishtajayamahiqui. Noque jointi rishtajahhi ta

noquen jana janinhax picotaibo qui —jato jaquin.¹² Jahuen haxenicabo sca jaa pataxi becani. Pataxxon sca:

—¿Min yohihi nincacax fariseobo sinascai min honanyamahin? —hihcani.

¹³—Jahuen huai janin jaan banayamani meraxon ta heen Papan mexabahinxon potatihiqui.¹⁴ Sinares-non jato jenenahue. Benchexon bi ta bahi jismahi bebobonacaniqui. Benchen hahbe benche hiohax ta rabebi xanqueman paquetihiqui.

¹⁵—Min noque yohiha jaa patax queha joi, jahua hihcatsihquiquin? Noque yohihue —hahquin Pedronen.

¹⁶—¿Maton rihbi man honanyama-parihin?¹⁷ ¿Noquen jana janin hihqui-hax noquen poco janin huinotax pohi sca jatihibi piti picotihqui man honanyamahin?¹⁸ Noquen jana janinhax cainaibo ta noquen jointi janinhax caini-hqui. Jascapahbaan ta noquen jointi rishtajahiqui.¹⁹ Noquen jointi janinhax cainai ta shinan tiromabo qui. Joni rehteti, tsiniti, haiboya shiroti, yometsohti, joni huetsa qui quesahi yohuanti, Papa qui tiromahi yohuanti.²⁰ Jas-capahbo shinan ta hahan jointi rishtatih qui. Mechoquihxonma piquin bi tah non jascajaquin noquen jointi rishtajatimahi —jato jaquin.

Jesus nincacoinai jaton nahua haibo

(Mr 7.24-30)

²¹ Janohax picotax sca Tiro jema janinbo sca Jesus betan bocani, Sidon jema janinbo cahi, Jesus betan.²² Jesus nocotai merahax Cananeo haibo sca jahui, jano jihuetai haibo. Quenáhonahi joxon hihti yocaquin.

—Hehon shinanhue, Hihbon, Davidinin baquen. Yoshiman hihbojaha ta heen baque haibo hihti hisinikhqui —hahquin.

²³ Hihti yocacah bi jahua hihyamahi. Jahuen haxenicabaan sca Jesus pataxxon yohiquin:

—Yohihue, jan catannon. Sai saihinan ta noque chibanbenahiqui —hahcanquin.

²⁴—Noquen nahuabo qui ma bi mantai Israeli baquebo qui res hen jonon ta Papan hea raannishqui —Jesusen jaquin.

²⁵ Jaa bebon sca joxon betihihpaquexon haibaan yohiquin:

—Jenquetsaha ra hea jaxonhue, Hihbon.

²⁶—Baquebo bichinxon hochiti jaton piti hinanah ta tiroma qui —Jesusen jaquin.

²⁷—Tiroma rahan, Hihbon. Jaabi ta jaton hihbaan misa janinhax paquetai teque romishin hochitinin piti qui —hahquin haibaan.

²⁸—Min tah min shinancoinai, hihbon. Min yocacai quescabijaquin tah hen mia hahxonai —Jesusen jaquin. Jaatianbi ta jaa haibaan baque siricahin-nishqui, rohascái.

Mesco hisinyahpabo Jesusen rohajahi

²⁹ Janohax cahax sca, Galilea hian quetanbahini cahax, mahchi manichish jano Jesus tsahoti.³⁰ Hihti caibo jonibo jahui, jaa chibanbenah. Jaton hisinyahpabo hihuecanquin, chantobo, benchebo, meyosmabo, joyobo, mesco hisinyahpabo hicha bi res becanquin. Jesus bebonbi jato taracanrenencanquin, jato jatihibi rohajascanon.³¹ Jato rohajahiya ta tsinquiqaquetaibo rahte rahtenishqui. Joyobo yohuanscái, meyosmabo siricahinscái, chantobo nihresscái, benchebaan jisresscái, rahtetax:

—Noquen Papa Diosen ta hihtijaquin noque hahxonihqui —hihcani.

Cuatro mil bebobo Jesusen pimahi

(Mr 8.1-10)

³² Jahuen haxenicabo quenabohanxon sca Jesusen jato yohiquin.

—Nea tsinquiqaquetaibon tah hen shinanai. Quimisha neten sca ta nenobi banecaniqui, pihan ta hihcanihqui. Pi-haxma cati tah hen jato yohicatsi-hyamahi. Bahin cahi bi pihamahuan hihquish nocoyamacanmis. Jatohon tah hen shinanai —jato jaquin.

³³ —¿Jahuerahn non tsoabi janos ji-hueyamahi janin hicha piti marotihin? Jaabo ta hicha qui —hah sca jacanquin jahuen haxenicabaan.

³⁴ —¿Jahuentihi paan man jain? —jato jaquin.

—Siete res ta qui. Yapa pishca rihbi —hahcanquin.

³⁵ Tsamajaquetaibo mihtsahohti yohiscaquin, Jesusen. ³⁶ Yohixon jaton siete paanya yapa pishca bihxon Papa yohixon tehcapaquexon jahuen haxenicabo hinanquin, jaabaan sca jonibo hinanpaquerihbinon. ³⁷ Pihax yanicahinaibaan bi texejaribicanquin. Texejahabo tequebo tsinquixon siete tasa bocho bihcanquin. ³⁸ Haiboboya baquebo toponyamahah bi bebo rahsi toponah ta cuatro mil joni janishqui. ³⁹ Jonibo camahah cahiya sca ta nontin nanetax Magdala jema janin taxnati bocannishqui.

Miin coshi noque jismahue jaibo

(Mr 8.11-13; Lc 12.54-56)

16 Fariseobo betan saduceobo sca becani. Jesus qui joxon:

—Papan coshiyaxon hahhue —hahcanquin, jan hahcai jisxon hahqui chaniscanoxon sca jascajacanquin.

² —Bepichaiya tah man nai jisish, Nai ta joshinjaquetihqui. Bahquish ta nete siri janoxihqui qui hih man jai. ³ Xaba pa-quetaiya sca tah man nai jisish, Rahma

ta hoi nete qui, nai ta joshinihqui hih man jai. Nai jisxon tah man nete yohiti honanai. Nete joibo yohiti honanxon bi tah man Papan hahxonai jisxon jahueja Papan noque janoxihqui qui hihxon man joni huetsa yohiti honanyamahi. ⁴ Tiromabxon tah man hea yocacai, hahan honantijaquin Papan coshiyaxon hen mato jismati hea yocaquin. Tsiniti shinanyahpa quescapahbo hihquish tah man hean mato jismati man queenai. Jahuabi hahan honanti ta Papan mato jismatimahqui. Jonas huinoni quescapa huesti ta Papan mato jismatihqui —Jesusen jato jaquin. Jato jascajaquin yohihax caresscrai.

Fariseobaan joi cachapa

(Mr 8.14-21)

⁵ Hoque quexa sca Jesus betan jahuen haxenicabo cahi, pohque-jaqueti. Caquin bi jaya cati piti shinanbehnobahincanquin.

⁶ —Coiramenahue. Fariseobo betan saduceobaan jai hahan paan soohih-mati qui coiramenahue. Jistahin man —Jesusen jato jaquin.

⁷ —Non pitijoma jahui copi rah ta noque jascajahiqui —hih sca jacani jaabo rahsibi yohinani.

⁸ Jahua yohuan jaabo jai jahuen join-tinin honanxon sca:

—¿Jahua copi man pitijoma non jahui copi rah ta qui hih man jain yohinani, ¿man hihcoinjaquin shinanyamahin?

⁹ Pichca paanyaxon non cinco mil joni pimahipi man shinanbehnoscain? ¿Texejahabo tequebo jahuentihi tasa tsinquihipixon man shinanyamascain? ¿Man honanyamahin? ¹⁰ ¿Siete paanyaxon non cuatro mil jonio pimahipi man shinanbehnorihbiscain?

Texejahabo man jahuentihi paniro tsinquihipi man shinanbehnoscain? ¹¹ Fariseobo betan saduceobaan jai hahan paan soohihmati qui

coiramenahue, hen mato jaáh ta maton piti copima qui. ¿Jenquetsahpahin man honanyamahin? —Jesusen jato jaquin.

¹² Jaatian pari ta honancannishqui. Hahan paan soohihmati jan hihqui bi fariseobo betan saduceobaan haxemahia joi qui coirameti jan yohiha honancquin. Hahan paanjati jan yohiyamahi honanscacanquin.

**Papan caisah tah min
qui hihqui Pedro**

(*Mr 8.27-30; Lc 9.18-21*)

¹³ Cesarea de Filipo jema janin sca nococani.

—¿Hea noquebaque hen jahua joni quin, jahua jacaniquin? —Jesusen jato yocaquin.

¹⁴ —Caibaan shinanah ta mia nashimanica Juan qui. Caibaan rihbi shinanah cahen Elías yamanica. Caibaana cahen Jeremías yamanica. Jaa hihyamahax cahen, huetsa rihbi Papan joi yohinica japahoni —hihcani.

¹⁵ —¿Maton cahran? ¿Maton shinanah hea jahua quin? —jato jaquin.

¹⁶ —Mia tah min noquen Papan caisni joni qui, mia joti neateman jan yohini —hih sca Simon Pedro jai.

¹⁷ —Mia tah min hahan jenimati jai, Simoman, Jonasen baquet. Jonibaan res mia shinanmahama bi heen naihoh queha Papan mia shinanmaha tah min honanai. ¹⁸ Mia tah hen Pedro janehi. Mixan main xobojaquin hahcajaquin tah hen heen jihuetaahbo rahsi huesti yorajatihi. Min yohiha join jato jihuetaahbojaxon tah hen jato huesti yorajatihi. Tiroma yoshiman ta jato teneti hahtipahitimahiqui. ¹⁹ Hahan quehpenti hinanquin hahcajaquin tah hen mia yohihi, min heen jihuemati janin jonibo hihquimanon. Mainxon min jonibo yohiyaxihqui ta Papan yohihah quesca sca jatihiqui, jascabi sca janon. Mainxon min nexabo pecaquein hahca-

jaquin yohihi rihbi ta Papan yohihi quesca sca jatihiqui —Jesusen Pedro jascajaquin.

²⁰ Jaatian sca Jesusen yohiquin sirijaquin: Hea Cristo hihqui tsoabi yohiyamanahue.

**Hen tah hen muhuayaxihqui
nihqui Jesus**

(*Mr 8.31-9.1; Lc 9.22-27*)

²¹ Jaatian pari jato yohimenoxon ta hashoan sirijaquin sca jato yohibenahishqui, jaa muhuayaxihqui honanahbo. Jerusalen janin jaa cati jai, jano jan hicha tiromabu teneti jai, judio hapobaan tiromajahah bi jan teneti jai, sacerdote hapobaan tiromajahah jan teneti jai, jaton huisha honanbaan tiromajahah bi jan teneti jai, tenehax bi jan muhuatihi, muhuatipish bi jahuen quimisha neten sca jan teehihribiyaxahnon jato yohiquin. ²² Nincaxon, hahmebi yohicatsihquin Jesus ninibohanxon sca Pedronen yohiquin:

—Jascari yohuanyamahue, Hihbon. Papan ta mia jascajatimahiqui. Min yohihi quescaja ta mia jatimahiqui.

²³ Pedro bejisxon sca:

—Hea jenebahini catanhue, Satanás. Papa queenai quescajajama hen janon hihxon tah min hea pantecatsihqui. Papan shinanai quescajaquinma bi tah min jonibaan shinanai quescajati honanai.

²⁴ Jascajaquin Pedro yohixon, texe rihbi sca jahuen haxenicabo yohirihbiquin:

—Hechon jocatsihxon tah man matobi man queenaima sca man hahtihi. Hea retehibaan bi tah hen heen Hihbaan joi jenetimahi hihxon tah man hen mato yohihi quescahijatihi. ²⁵ Muahuati qui raquetaibo ta muhuatihi. Jascapahbo jihuetaimahi bi ta hea copi muhuataibo queyoyamanox mantatihi. ²⁶ ¿Nea mai jatihobi hihbohax

bi muhauatax jahuaya sca man banetihin? ¿Jabiyahpa queyóscaxon jahua man jatihin? ¿Jabiyahpa queyoyamanoxon man jahua Papa hinanti hahtipahin? ²⁷ Heen Papan coshi xabaya tah hen joribiyax-ihqui. Jahuen yonotiboyabi tah hen jotihi. Joxon tah hen jatihibi jonibo tsiniquxon jaabo hiphahonibo quescabi-jaquin jato hahxontihi, caibo copijaquin, caibo casticanquin. ²⁸ Hen mato yohi-non nincanahue. Caibo neno nichibaan tah man mahuaxonma hea quiquin ha-poscaax jahui man jisyaxihqui —jato jaquin.

Jesus huetsapahcahini

(*Mr 9.2-13; Lc 9.28-36*)

17 Jato jascahipi seis dias sca Pedro, Jacobo, Jacobon huetsa Juan, jaabo rahsi quenaxon mahchi janin Jesusen jato hioquin. Jano tsoa yamahi janin mahchi queya jato maniquihnnquin. ² Jano sca ta jaton jisnon bi Jesus huetsapahcahinnishqui. Jahuen bemanan xabati, bari xabati quescasca jai. Jahuen chopas rihbi pehnecahini, xaba quescacahini. ³ Jaabaan jisi bi yamanihbo Moises betan Elías jan rihbi nihresscái. Jesus betan yohuan yohuani rabebi jan nichi. Jato jisxon Pedronen sca Jesus yocauquin:

⁴ —Hihbon. Non neno jahue ta siri qui. Mia queenaiya tah non quimisha tapastihi, mina huetsa, Moisesnina huesta, Eliasena huetsa rihbi —hahquin Pedronen.

⁵ Pedro yohuanparihiya xabatai nai cohiman jato mahporenenquin. Jaa nai cohin chicho quehax yohuanai sca nincacanquin:

—Nea ta hen queenai heen baque qui. Hahan tah hen hihti jenimahi. Jaa nincanahue.

⁶ Jaa yohuanai joi nincacax, jahuen haxenicabo hihti rahtetax betihihpa-quecani. ⁷ Joxon sca jato mehexon:

—Raquetaxma huenihhnahnahue —Jesusen jato jaquin.

⁸ Huenixon jisi bi tsoabi yamascai, Jesus huesti res.

⁹ Mahchi janinhax botopaqueti caquin sca:

—Man rahma jisí tsoabi yohiyamaxahnahue. Mahuatipish hen hahquirihbi teehihnon caman tsoabi yohiyamaxahnahue.

¹⁰ —Mia noque jihuemanica hihqui bi ta noquen huisha honanbo huetsa yohuan jaiqui. Elías pari ta joribitihiqui, chini sca noque jihuemanicah hih ta jaca-niqui. ¿Jahua copi jascacanquin? —Jesus yocacanquin.

¹¹ —Hihcoini. Elías ta joribixon jatihibi bexoja sca jaiqui. ¹² Man honanon hihxon tah hen mato yohiscái: Elías ta moa joribiscan-ishihi. Jahuiton bi ta jaa hihqui honanyamacannishqui hapobaan. Jaa honanxonma ta queenaibo quescajaquin jahancanhozqui. Jascaja rihbi ta hea jayaxihcanihqui —jato jaquin.

¹³ Jaatian ta Elías jan hihqui bi nashimanica Juan jan yohihi honanscacannishqui.

Jomiyahpa Jesusen rohajahi

(*Mr 9.14-29; Lc 9.37-43*)

¹⁴ Botopaquetax cahax tsama man-ahihtaibo qui nococani. Jesus behchihax jaa bebonbi huesti jonin raboxonen tisquihahpaquexon:

¹⁵ —Hihbon, jenquetsaha ra heen baque hea jaxonhue. Tehquehahqui ta hihti jomihiqui. Hicha coti ta chihi janin paquetihqui. Jeneho rihbi ta paqueresiqui. ¹⁶ Miin haxenicabo qui hen hihuehah bi ta rohajati hahtipahyamacanaxqui —hahquin.

¹⁷ —¡Shinancoinjomabon! Shinanquin sirijayamahibo tah man qui. ¿Jahuentihi basi hen mato betan hihquiya pari man pontetihin? ¿Jahuentihi basi cahra

hen mato teneti jain? Jaa hihuenahue — Jesusen jato jaquin.

¹⁸—Jaa jenebahinhue —Jesusen coshin jaáh sca ta jaa baque jenebahini tiroma yoshin canishqui. Jaatianbi rohacahinscái, siriscái, jaa baque.

¹⁹Jesus qui sca jaabo rahsibi jahuen haxenicabo tsinquiaquexon yocacanquin:

—¿Jahua jenquetsahiya non camati hahtipahyamahaquin? —hihcáni.

²⁰—Man hicha shinancoinyamahi copi, rahan. Hen mato yohihah nincanahue: Moxo bero hexti pishca hihqui quescapi maton shinan hicha tahma pishca res jaxon cah man nea mahchi yohirestihi. Join res potati tah man hahtipahquehahnai. Catanhue man jaah cahen cahan. ²¹Jaatian man hahtipahyamahibo yamahan —jato jaquin.

Mahua tah hen jayaxihqui hihibihi Jesus

(Mr 9.30-32; Lc 9.43-45)

²²Galilea hian qui nocorihbixon sca: —Hea bijnon ta hapobo bimayaxihcanihqui, hea rehtehahbo hihxon. ²³Rehtehipibaan bi tah hen quimisha neten hihquish hahquirihbi teehiyaxihqui — Jesusen jato jaquin. Yohihah benásca-cani. Hihti benati.

Papan xobo bexojati copi yocacahtaibo

²⁴Janohax Capernaum jema janin sca bocani. Nocotaiya Papan xobo bexojati cobrannicabaan Pedro yocauquin:

—¿Papan xobo bexojati coriqui maton haxemanicahten copijayamahiquin?

²⁵—Copijaquin rahan —hihcáhini sca Pedro cahi. Jano Jesus jai xoboho mapetai bi Jesusen pari jaa yocauquin:

—¿Min jenquetsahpa shinanain, Simo-man? Hea yohihue: ¿mai meha quiquin

hapobaan tsoabo cobraniquin? ¿Jatonah bi jaton baquebo nan? ¿Huetsabo nan?

²⁶—Huetsabo rahan, Hihbon.

—Hihcoini. Jaton baquebo ta cobrantimabo qui. ²⁷Jaabi, sinayamahahbo hiaman mishquitanhue. Mishquxon min bihmenohi yapabihxon, jaxbaxon, jahuen jana janin jai coriqui bihhue. Jaa bihxon tah min noque rabebi copijaxontihi —Jesusen jaquin.

Tsoa non hashoan yohuan hihbo quin hihquibo

(Mr 9.33-37; Lc 9.46-48)

18 Jaatian jahuen haxenicabo sca joxon, Jesus yocacanquin: —¿Papan jihuemati janin tsoa non hashoan yohuan hihbo quin, hihbon?

²Baque pishca quenabohanxon sca jato tocanbi nichinquin. ³Naponbi nichinxon sca:

—Hen mato yohinon, nincanahue. Baque pishca quescanahue. Shinan ponteyamahax tah man Papan jihuemati janin nocotimabirestihi. ⁴Jahuen hapoti coshi yamahi ta nea baque pishcaten honanihqui. Jascajaquin shinanaibo ta Papan jihuemati janin hashoan yohuan hihbo qui. ⁵Nescapa baque pishca huesti res heen janen sirijaquin bihxon yanapanquin tah man hea rihibi jascajahi.

Hohchapan man paquemis hihqui.

(Mr 9.42-48; Lc 17.1-2)

⁶Nescapa hea nincacoinai baque pishca hohchamahi joni ta hihti hohcha jaiqui. Hihtihosi macan renti qui tenexxon hian naponbi potahahjenimatihhma bi ta nescapa pishca jan hohchamani copi Papan casticanah hihti tiromati qui. ⁷Mai mehabo ta hahraai hihyaxihqui, huetsabo hohchamanish. Hohchati qui caibo tecayacahinti hahtipahyamahibaan bi

ta jato hohchamanibo hashoan hahraai hihyaxihqui qui, Papan casticanti jato qui paquetah.

⁸ ¿Miin mequeman min hohchatain? Mextehue. ¿Miin tahan min hohcatain? Taxtehixxon potahue. Mento hihyamahax chantohax queyoyamanox manatah cahen tiromama. Rabe mequenyahpahax rabe taheyahpa chihi qui potahah cahen hihti tiromahan. ⁹ ¿Miin beron mia hohchamahiquin? Tsecaxon potahue. Rabe beroyahpahax bi johue-hihnatii chihi perehiqui janin cahá ta tiroma bi res qui. Benchehax bi queyoyamanox manatah cahen hashoan siri.

Manotai carnero

(Lc 15.3-7)

¹⁰ Coiramenahue. Nescapa baque pishca jahuajoma hihqui man shinanmis. Naihoxon ta jato coiranquin jascabijaquin heen naihoh queha Papa yocaxoncaniqui jahuen yonotibaan. ¹¹ Manotaibo jihuemahi tah hen joníqui.

¹² Huesti joni cien carnerobo jai quesa tah qui. Huesti jahuen carnero cahen manotan. Noventinueve pasto janinbi potabahini ta manotai huesti benahi sca catihiqui. ¹³ Caxon merahax ta jahan hihti jenimatihiqui. Texe behnotaxma pasto chian nichi copi jenimahax bi ta manotai rahma merahax hashoan jenimascaqui. Jascoin tah qui. ¹⁴ Ni huestibi nescapa baque pishca manotima ta maton naihoh queha Papa queenihqui.

Jascabi sca janon jenehue, non jathihi

(Lc 17.3)

¹⁵ Miin huetsa mihqui hohchataiya jaa benahi caxon, jaa huesti yohuanquihnxon jan hohchatai yohihue. Mian yohihah jaan nincacaiya tah min miin huetsa merarihbi sca jai, jan manoquehana. ¹⁶ Min yohihah bi

nincacatsihyamahiya huetsa rihbi miin huetsa benatahhue. Huesti hihyamahiya rabe meraxon, hioxon, jaton nincanonbi miin huetsa yohirihbihue. Huishani joi jai quescaquin hahhue, Yohicoin sta jaaxqui jaábo hihxon rabe hioxon man yohuanai nincamaquin. ¹⁷ Jaabaan rihbi yohihah bi nincacatsihyamaparihiya, miin huetsabo jatihibi sca yohihue. Jatihxonbi sca yohihah bi nincayosmaparihiya, nahua tah qui hihxon jenebahinscahue, miin caibohax bi nahuascai quescanon.

¹⁸ Hen mato yohinon nincanahue. Jascabi sca janon man mainxon jascajaquin yohihi jatihibi ta naihoxon jascaribibi yohihah sca jatihiqui. Man mainxon yohixon bexojahi jatihibi ta naihoxon rihbi bexojaha sca jatihiqui.

¹⁹ Huetsa rihbi hen mato yohinon: Huesti shinanyaxon man joni huetsa betan tsiniquixon yocacah ta man yocacai jatihibi heen naihoh queha Papan mato hahxontihiqui. ²⁰ Jano man rabe hihyamahax quimisha joni heen janen tsinquitai janin tah hen hea rihbi hihtihi. Jaa copi Papan mato hahxontihiqui honannahue —jato jaquin.

²¹ Jesus patax nihquirani joxon Pedro-nen yocauquin:

—¿Jahuentihi coti noquen huetsa noque qui tiromahah bi non hahan shinanxon, jascabi sca janon jenehue non jatihin, Hihbon, noque qui jan tiromahi non shinanyamascanon? ¿Hasta siete coti non jascajatihi?

²² —Siete coti res ma bi setenta coti siete janaxon toponah, jano caman, rahan.

²³ Papan jihue cahen quiquin hapon hahcai quescapah. Jaa quiquin hapon cahqui jaton cuenta copi jahuen jonio betan bexohah. ²⁴ Jaton cuenta toponihnihiya bi jaton hani coriqui huesti mil ribinai joni jahui. ²⁵ Jahuatohonbi jahuen ribin copijatimahiya sca:

Hina sca jaábo nea joni maromanahue, jahuen haiboya jahuen baquebo rihbi maromaxon jahuen jahuaraborabo jatihibi maromanahue, jan ribinai copi hen coriqui bijnon hah ca hapon jai. ²⁶ Jaatian ta raboxonen nihxon jahuen jonin hihti yocatihiqui:

Hea tenehue, hihbon. Mia tah hen jatihibi copijayaxihqui.

²⁷ Hahan shinanxon sca ta Jascabi sca janon jenehue jahuen hapon jatihiqui, ribinjoma sca janon janon. ²⁸ Ribinjoma caxon sca cahen jahuen hahbe teenica cien coriqui res jaa ribinai meratihi. Meraxon texecobahinxon, Min hea ribinai hea copijatahi tsoh hahtihi. ²⁹ Raboxonen nihxon sca ta jahuen hahbe teenicaton hihti yocatihiqui: Hea tenehue. Mia tah hen copijayaxihqui. ³⁰ Jan hihti yocacah bi cahen jeenhahyamaxon bi policia bihmaxon jatihibi jan copijanon caman sipo xoboho tsahontihi. ³¹ Jan jascajahijisish texe jahuen hahbe teenicabo hihti benati. Benatax ta jaton hapo yohihi caxon jatihibi yohi-cantihiqui. ³² Jahuen joni quenamaxon sca ta jahuen hapon yohitihiqui: Tironman, min hea hihti yocacah tah hen mia Jascabi sca janon jenehue hahcaqui. ³³ Hen mia jascajaxonah cahen mian rihibi sca miin hahbe teetai joni mian hahxontihi, hahquin. ³⁴ Sinaxon sca ta jahuen sipo xobo coirannicabo jaa joni hinantihiqui, jahuen ribin jatihibi copijanon caman.

³⁵ Maton huetsa mato qui tiromahah bi man maton jointiboyaxonbi man jaa hohmismayamahiya ta heen nai-hoh queha Papan maton hohcha shinan-behnayamaribitihqui —Jesusen jato jaquin.

Noquen hihquihinti non potatimahi

(*Mr 10.1-12; Lc 16.18*)

19 Jato jascajaquin yohihax sca Galilea mai janinhax cahax

Judea main sca cahi cahi. Nocotax Jordan huean janinbo cahi, hoque quexa. ² Hihti caibo rihbi jaa chibani bocani. Hahqui nocotaiboya, janoxonbi jaton hisinbo jaan rohajaquin.

³ Fariseobo rihbi sca jahui, Jahuen yohuan copi rehtenoxon hihxon, Jesus yocacanquin:

—¿Queenxon copi res noquen haibo potacatsihquin non potatimahin? —hahcanquin.

⁴ —¿Jonijamenoquin haibo betan bebo Papan jato jonijani man jahuen quirica janin jisyamaniquin? ⁵ Jaa copi ta jahuen mama jahuen papa jenebahini sca jahuen haibo betan jihuetai jahuen bene catihiqui. ⁶ Rabehax bi huesti yora sca jaabo rabe sca janon jahuen haibo bebaan hihquihinti Papan yohihi man honanyamahin? ⁷ Jaa copi ta rabehax bi huesti yora sca qui. Papan ta jato huesti yorajahiqui. Jaan huesti yorajaha tsoanbi jenemayamanahue hih ca jaihsen —Jesusen jato jaquin.

⁷ —¿Jascahiya jahua copi sca noquen haibo potanoxon non jahuen jaya cati quirica huishaxon potati Moisesnin yohinishqui? —hahcanquin.

⁸ —Mato nincayosmabo copi ta Moisesnin mato jascajaquin yohinishqui. Noquen haibo non potanon Papan noque jonijani que ma bi ta maton haibo man potacatsihqui copi mato jascajanishqui. ⁹ Hean sca tah hen mato yohihi: Maton haibo tsinihima bi jaa potaxon huetsa sca bichish tah man jaa copi hohchayah-paboscai —jato jaquin.

¹⁰ —Noquen haibo non potatimahiya ta haibojoma jihuetai hashoan siri qui —hahcani jahuen haxenicabo sca.

¹¹ —Jaa man yohuanai ta jatihibi joni-baan shinantimahiqui, caibaan res. Jascari jahue Papan jaah ta caibaan res jascajaquin shinantihqui. ¹² Queejomabotameesco jaiqui. Caibo cahen jascapahbo Caini. Caibo cahen huetsabaan jato jas-

capahhue hahca queejoma sca baneti. Caibo rihbi cahen Papan jihuemat i joi yohinoxon queejoma banetan. Nincati hahtipahxon nincanahue —jato jaquin.

Baque romishin Jesusen yocaxonai

(*Mr 10.13-16; Lc 18.15-17*)

¹³ Jaatian baquebo sca Jesus qui becanquin. Jan jato mehexon Papa yocaxonnon hihxon hihuecanquin. Hihuehibaana bi jahuen haxenicabaan jato Jaya beyamanahue hahquin.

¹⁴ —Jaya behábo jato panteyamanahue. Joresnon, jotima yohiyamanahue. Jascapahbo ta heen Papan jihue janin canicahbo qui —Jesusen jato jaquin. ¹⁵ Jato jascajaquin yohixon baquebo sca mehexon janoxonbi Papa jato yocaxonquin.

Coriquiyahpaton Jesus yohuanquihnaí

(*Mr 10.17-31; Lc 18.18-30*)

¹⁶ Huetsa joni sca jahui, beronan tahni.

—Maestron, ¿queyoyamanox mananoxon jahua siri shinanti hen pishinain? —hahquin yocaquin.

¹⁷ —¿Jenquetsahpahiya min hea siri-jati joibo yocacain? Huesti res ta siri qui. Queyoyamanox manacatsihquin Papan mia yohini quescajahue —hahquin Jesusen.

¹⁸ —Jahua jan yohini nan? —hahscaquin.

—Rehteyamahue. Tsiniyamahue. Yometsohyamahue. Quesayamahue.

¹⁹ Miin papaya miin mamahon queenhue. Mihmebi min queemehti hihqui quescarihbibi joni huetsahon queenhue —hahquin Jesusen.

²⁰ Jatihibi tah hen jaresscái. ¿Jahua hashoan hen pishintihin? —hahquin beronanen.

²¹ —Jahuabi pishinyamacatsihxon miin jahuaborabo maromatanhue. Maromaxon jahuaborajomabo jaa coriqui hinanhue. Jaatian tah min naihoh hicha jahuabora jatihi. Jato hinanax, hehbetan cahi sca jotanhue —Jesusen jaa jaquin. ²² Jascahah, benacahini beronan caresscái, jahuen jahuaborabo hicha jaax copi. ²³ Jaa benatax cahiya, jahuen haxenicabo sca Jesusen yohiquin:

—Man honannon hihxon tah hen mato yohihi. Coriquiyahpabo Papan jihuemat i janin hihquiti ta tee bi res qui. ²⁴ Hen mato yohirihbinon: Xohmox bero qui hahua huinomati tee que bi ta Papan jihuemat i janin coriquiyahpabo cati hashoan tee bi res qui.

²⁵ Jesus jascari yohuanai nincacax ta jahuen haxenicabo rahte rahtenishqui.

—¿Coriquiyahpabo cati tee hihquiya tsoa non Papan jihuemat i janin catihin? —hihcáni.

²⁶ Jato jatihibi bejisxon sca:

—Jonibo hahmebi jano nocoti hahtipahyamahi bi ta Papan jatihibijati hahtipahiqui —Jesusen jato jaquin.

²⁷ —Noquen caya tah non noquen jahuaborabo jatihibi jenebehnanxon mia chibanaí, Hihbon. ¿Jahua sca non bihyaxihquin? —hahscaquin Pedronen.

²⁸ —Nincanahue, hen mato yohinon. Hea chibanaibo hihquish tah man nete behna tian sca hapobo sca man ji-huetihi. Quiquin hihbo hihxon hen jatihibi hihbojahi tian tah man Papan israeli baquebo jatihibi jisxontihi, hapo rahsixon. ²⁹ Hea hahxonnoxon jaton jihuebo jenebahinaibo, jaton huetsabo jenebahinaibo, jaton chocabo jenebahinaibo, jaton papa jaton mama jenebahinaibo, jaton banabo jenebahinaibo, jascapahbo tah hen hashoan hicha hinantihi. Huesti jan jenebahinni tah hen cien sca jaa hinantihi. Queyoyamanox manataibo rihibi ta jaabo jatihibi. ³⁰ Hen jascajaquin

hahxontihi bi nincanahue, hen mato yohinon: Hicha bebohibo ta chinibo sca hihyaxihquiqui. Hicha chini chininish ta bebocahinyaxihcanihqui.

Teexonicahbo

20 Papan jihuematí ta huai hihbaan hahcai quescapah qui. Jaa copi tah hen mato yohihi. Jaa huai hihbo cah hen yamequiri cahan, jahuen bimi tsiniquxonnicahbo benahi.² Teexonicahbo meraxon, huesti neten teexona patorobaan copijahi tihibi copijatjaxon, jahuen huai janin jato raanquin.³ Bari nai pohahihnataiya sca caxon, huetsa teenicabo rihbi meraquin, jaton nihti janin cahuan cahuanresaibo.⁴ Jaabo rihbi quenaxon:

—Heen huai chian botannahue mato rihbi. Ponte shinanxon tah hen mato copijatihi —jato jaquin.⁵ Jahuen huai chian sca bocani. Barin manan tsahc-ahiya sca caribixon huetsabo meraxon jascajaribiquin. Bari racacahuaniya sca jascajaribiquin, caibo rihbi sca meraxon.⁶ Bari hihquiscai cahiya sca caxon, nihre-saibo merarihbxion jato yocaquin:

—¿Jahua copi man jeman res nihbabinhahn?

⁷ —Tsoanbi ta noque teemayamahiqui —hahcanquin.

—Heen huai chian teeti botannahue, mato rihbi —jato jaquin.⁸ Bari hiquihiya sca jahuen teemanica yohiquin:

—Noquen jonibo quenahue. Chini hihquihahbo pari copijahue, jascajaquin teemenohibo chini sca copijanoxon.

⁹ Bari hihquicatsiscaya cahabo jahuiya sca jato copijapaquequin, joni tihibi huesti neten teexonbahinaha patorobaan copijahi tihi copijaquin.¹⁰ Chini sca teemenohibo jahui. Noque rah ta hashoan hicha copijanoxihquiqui hihcani. Jascaraibaan bi jaabo rihbi

jatihi rihbi copijaquin.¹¹ Jaton coriqui bichish sca, huai hihbo qui sinati yohuancanacani.

¹² —Hoa chini hihquihahbo ta huesti hora res teecanaxqui. Non tee teexon bari tenebahinahi bi ta jatfhi res noque copijahiqui —hihcani.¹³ Huai hihbaan sca yohiquin:

—Mia tah hen tiromajayamahi, chahin. ¿Jaatihi canannoxon huesti neten teebahinati min yohiyamahahquin?¹⁴ Miin coriquiya catanhue. Hen mia hinanai tihi rihbi tah hen chini hihquihahbo hinanai, queenxon copi.¹⁵ Heabi hen queenai quescajaquin heen coriqui hen hinanti hahtipahyamahin? ¿Hen huetsa joni hicha hinanai copi min sinatain?¹⁶ hahscaquin hihbaan. Jascajaquin rihbi ta chinitaibaan beboyaxihquiqui, bebohibo rihbi ta chiniyaxihquiqui —Jesusen jaquin.

Hen tah hen muhayaxihqui nihqui Jesus

(*Mr 10.32-34; Lc 18.31-34*)

¹⁷ Jaa pecaho sca Jerusalen jema janin Jesus cahi cahi. Bahin caquin, jahuen doce haxemanicahbo quenabohanxon, jato yohiquin:

¹⁸ —Jerusalen janin tah non cahi. Jano ta sacerdote hapobaan hea bihyaxihquiqui, caibaan hea jato bimahah. Jaton huisha honanbo betan yohuanxon ta hea rehteti yohiyaxihcanihqui.¹⁹ Hea retehahbo hihxon ta nahuabo hea hinanyaxihcanihqui. Hea hosan hosanxon, rishqui rishquxon jihuín hueonxon hea rehtenon ta jascajayaxihcanihqui. Rehtehahbo bi tah hen quimisha neten hihquish hahquirihbi teehiyaxihqui. Man honannon hihxon tah hen mato yohihi —jato jaquin.

Jacoboya Juaman maman yocacai*(Mr 10.35-45)*

²⁰ Jaatian Zebedeon baquebaan mama sca jahui. Jahuen baque rabeya joxon jan queenai yocanoxon Jesus bebon raboxonen nichi.

²¹ —¿Jahua min queenain? —Jesusen jaquin.

—Mia noquen quiquin hapo hihqui tian, nea heen baque rabe mia namanbi hapo rabe hihnon yohixonhue. Huetsan mia mecayahoxon yononon, huetsan mia memihohxon yononon yohixonhue —hahquin haibaan.

²² —Min yocacai tah min honanyamahi. ¿Hean xehayaxihqui mocani jaabaan xehati hahtipahquin? —Jesusen jaquin.

—Hahtipahquin rahan —hahquin.

²³ —Hean xehahi mocani tah man xehatihi. Man jaa tenehi bi ta hea pataxxon hehbe hapoti hen mato yohiti hahtipahyamahi. Heen Papan ta hea jascajati yohiyamahiqui. Jaan honanaibo qui ta Papan jaa hinanyaxihquiqui, jato jascajati yohinixon —hahquin. ²⁴ Texe jahuen haxemanicahbaan sca nincaxon Zebedeon baque rabe sinajacanquin. ²⁵ Jato sinajahibaan bi Jesusen jato yohiquin:

—Hen mato yohinon benahue —hahxon— nahua hapobaan jaton caibo yono yonohi tah man honanai. Jato ta hihbojacaniqui jaton hapobaan. ²⁶ Maton tah man jascajatimahi. Hapocatsihxon texe hahxoncoinnahue yanapanquin. ²⁷ Bebonicacatsihquish, jaton yonotinahue. ²⁸ Jonibaan hea hahxonnon hihquish tah hen joyamaniqui. Jato hahxonnoxon hihquish tah hen joníqui, noquebaque hihqui bi. Hicha jonibo jihuemon hihxon tah hen hehrí jato retemahi. Hen jato hahxonti shinanai quescajaquin shinannahue —jato jaquin.

Rabe benche Jesusen rohajahi*(Mr 10.46-52; Lc 18.35-43)*

²⁹ Jericó jema janin nocotax sca, janohax Jerusalen quiri jahuiton sca hihti caibo jato chibabenahi becani. ³⁰ Jaa bahi quexabi ta rabe benche janishqui, huinotaibo nincaresi tsahotai. Huinotai ta Jesus qui, hihquibo nincacax sca quenácahincani.

—Hihbon, noquehon shinanhue, Davidinin baquen —hihcani. ³¹ Jascari que-nataibaan bi Netenahue hahcanquin, huinotaibaan. Netenahue hahcabio bi hashoan sca quenacani:

—Noquehon shinanhue, Davidinin baquen.

³² Nihrenenxon sca Jesusen jato quenaquin.

—¿Hen mato jenquetsahaxonti man queenain? —hihqui.

³³ —Non jisnon noquen bero rohajahue, Hihbon —hahcanquin. ³⁴ Jaatian jatohon hihti shinanxon, bero qui jato mehexon jato rohajaquin. Jaton bero siricahinax, hahbetanbi sca becani, rabebi.

Jerusalen janin Jesus nocotai*(Mr 11.1-11; Lc 19.28-40; Jn 12.12-19)*

21 Jerusalen hochoma sca becani. Betfagé jema pishca qui nocotax, Olivo manan qui nococani. Janoxon sca jahuen haxenica rabe raannoxon yohiquin.

² —Hoa hoque jai jema janin caxon tah man caballo meraxihqui. Nixa tah man meraxihqui, jahuen baqueyabi. Rabebi pecaxon jahuen baqueyabi hea bexontannahue. ³ Jahueja man Jain hahcá, Noquen Hihbo ta nea pishinihqui hihnahue. Jaatian ta mato bexonmati-hiqui —jato jaquin.

⁴ Neateman Papan joi huishanicabaan yohini quescabijaquin janon ta jato jascajanishqui.

⁵ Jerusalen janin jihuetaibo nescajaquin yohinahue: Jisnahue. Maton quiquin hapo ta nocoti jahuiqui. Quiquin hapobo jahui quescarihma bi joni quesa jahuiqui, caballo cahtsahotax. Caballo baque res cahtsahotax ta jahuiqui, noquen jahuarabobo noque papixonnica caballo baquen ta jahuiqui hihqui jaa huisha.

⁶ Jan yohihah quesa sca caxon, nexa sca caballo meracanquin jahuen haxenicabaan. ⁷ Pecaxon, jahuen baqueyabi becanquin. Caballo baque jaton chopa cahpohenxon, jano Jesus cahtsahonbecanquin. ⁸ Hihti caibaan jaton cotonbo pecaxon jano Jesus jonoxihqui bahinbi mijancanquin, hahan jonon. Caibaan rihbi jepe pehi xatexon jas-cajaribiquin, mijanquin. ⁹ Caibo bebohi becani, caibo rihbi hahchon becani. Quenáhonahi becani:

—David xohtahi ta jahuiqui. Hahxonhue. Papa Diosen janen ta jahuiqui. Papan shinanya ta jahuiqui. Jaa hahxonhue, Papan —hihcani.

¹⁰ Jascalahah, Jerusalen janin hihcohi. Jaa jema janinhahbo jatihibi rahte rahtetax:

—¿Tsoa hin? —hihcani.

¹¹ —Nea ta Papan joiya jahui joni qui, Jesus. Galilea mai mehax nocoti jahui, Nazaret jema janinhax nocoti jahui —hihcani, tsamajaquetaibo.

Papan xobo janin tiromabo jan camahi

(Mr 11.15-19; Lc 19.45-48; Jn 2.13-22)

¹² Papan xoboho sca Jesus mapeti. Mapexon, janoxon marohiton jonibo meraxon, maromahiton rihbi meraxon, jascapahbo jatihibi camaquin. Jato picamaxon, jaton coriqui mahnenanti mesabo behonxon, nobex maromanicahbaan tsahotibo hueranbohanxon, jato yohiquin:

¹³ —Papan huishani joi janin ta nea jaiqui: Heen xobo ta janoxon hea yohiti xobo qui. Jascapa xobo hihqui bi tah man jano yometso tsamatia jaa xobo jai —jato jaquin. ¹⁴ Jaatian sca bencheboya chantobo jaa xoboho mapeti, Jesus jano jai copi. Jato jisxon, jaan jato roha-jaquin. ¹⁵ Jahuen coshi shinaman jan jato hahxonai jisxon sacerdote hapobo betan jaton huisha honanbo sinati. Papan xoboho baquebo quenatai, Davidi xohta hahxonhue hihquibo nincacax, sina sinacani. ¹⁶ Sinaxon, Jesus vocacanquin:

—¿Jaabo yohuanai min nincayamahin? —hahcanquin.

—Nincaquin rahan. ¿Baquebo tah min mihqui siripi yohuanmahi, baquexobo rihbi, hihqui Papan huishani joi, man jahuentianbi jaa jisyamaniquin? —jato jaquin. ¹⁷ Jato jenebahini sca picoti cahax huetsa jema janin cahi, Betania jema. Jano sca hoxashinahi.

Jesusen jihui xanamahi

(Mr 11.12-14, 20-26)

¹⁸ Xaba paquetaiya sca jahuex Jerusalen janin nocotax picatsihscai. ¹⁹ Bahi quexabi bimi jihui huesti meraxon, bimi bichi caha bi yamahi. Pehi rahsi jai.

—Jahuentianbi bimiyamaxihhue —hahquin, jihui. Jan yohihah, xanacahin-scái. ²⁰ Jan yohiha jihui choshihi jisish, rahte rahtetax jahuen haxenicabo yohuani:

—¿Jenquetsahpi jaa jihui xanacahini-hquin? —hihcani.

²¹ Yohuanai nincaxon, jato yohiquin:

—Man honannon hihxon tah hen mato yohihi. Papan mato hahxoncointihi honanxon, hahxonyama rah ta hea jatihibi shinanyamaxon tah man jascapa yohiti hahtipahtihi. Jascapah res ma bi tah man hoa manan quescapahbo rihbi yohitihi, Huenihihntax hoa hia-

man paquehue. Shinancoinxon man yohihah ta man yohihi quescatihiqui.²² Papan mato hahxontihi honancoinxon man yocacai jatihibi ta jaan mato hahxonyaxihqui qui.

Tsoan yohihah min jascajahin hihquibo

(*Mr 11.27-33; Lc 20.1-8*)

²³ Jaatian sca nocotax Papan xoboho mapexon janو nocohihnatαι jonibo haxemaquin. Jato haxemahiya bi sacerdote hapobo becani, jaton hahbe hapobo betan. Joxon:

—¿Tsoan mia jascjahue hahca min neno jascjahipiquin? —hahcanquin.

²⁴ —Mato rihbi tah hen huestijaquin yocatihi. Man hea yohihiya tah hen tsoan hea jascjahue hahcai hen mato yohirihbitihi.²⁵ ¿Tsoan yohihah Juaman nashimapahonishquin? ¿Papan yohihah nan? ¿Jonibaan res yohihah nan? —jato jaáh bi jahuahiyama sca jacani. Jaabo rahsibi res yohinani.

—Papan yohihah rahan hih non jaiya ta noque yocaxihqui qui, Jahua copi sca man Juaman yohihah bi nincayamanihquin.²⁶ Jonibaan res rahan hih tah non jatimaribibi. Tsamataibaan noque jenquetsah ra jamis. Juan Papan joi yohinica hihpahoni ta shinancaniqui — hihcani, jaabo rahsibi yohinani.

²⁷ Yohinanxon sca:

—Non tah non honanyamahi —hahcanquin Jesus.

—Hean rihbi tah hen tsoan hea jascjahue hahcai mato yohiyamarihbibi — jato jaquin.

Rabe bebo baqueya

²⁸ Man jaa shinannon tah hen mato yohihi. Rabe bebo baqueya joni ta japonishqui. Jahuen beboquiha baque ta yohinishqui:

—Rahma noquen huai chian teetanhue, baquen —hahquin.²⁹ Jascjahah bi:

—Hen tah hen queenyamahi —hahqui. Jascarax bi chini sca pontejaquin shinanax, teeti cahi, huai chian.³⁰ Jahuen chini sca jahuen papan jascajaquin rihbi yonoquin.

—Teeti rahan, Papan —hahcax bi jahuen chini baque cayamaribibi.³¹ Hea yohinalhue: ¿Jahuemehaton jahuen papan yohiha quescabijanishquin?

—Jahuen baque beboquihaton rahan —hahcanquin.

—Hihcoini. Jascarihbibi ta coriqui cobranmisboa tsini haibobo mato bebohi bocanihqui Papan jihuematí janin cacatihqui.³² Papan bahin canoxon ponte jihueta Juaman mato yohihah bi tah man nincayamanihqui. Coriqui cobranmisbaan caya ta nincanishqui. Tsini haibobaan rihbi. Jaabaan nincacoinscái jisxon maton rihbi chini sca pontejaquin shinanxon nincacointihi bi tah man nincacoinyamahi.

Tiromabo teexonnicahbo

(*Mr 12.1-12; Lc 20.9-19*)

³³ Huetsa jahan haxeti joi nincanahue. Huesti jonin ta hani huaijanishqui. Jahuen huai banaxon, jahuen senenjatibo honantijanoxon chiquebohanxon, hahan bishtaxmatijaxon, janoxon coiranti xobojaxon, jahuen huai coirantibo yohihax joribyanoxon cahi caresscái.³⁴ Jahuen huai tsinquití tian sca, jahuen jonibo raanquin, jahuen coirannicahban jahuen bimi hinannon hihxon.³⁵ Raanah sca nococani. Nocotaiton bi jahuen coirannicahbaan jato yahtanquin. Huetsa rishquixon, huetsa rehtexon, huetsa rihbi macaman tsacaquin rehtecanquin.³⁶ Jaa pecaho sca huetsa jahuen jonibo sca huai hihbaan raanrihbiquin, hashoan hicha sca. Raanah nocotaiton jato jascajaribicanquin.³⁷ Chini sca jahuen baquebi raanquin. Heen baque ta nincayaxihcainihqui hihxon jaa

raanquin.³⁸ Jahuen baque nocoti jahui merahax, yohinancani:

—Nea ta huai hihbo hihyaxihqui qui, jahuen papa mahuataiya. Jaa rihbi rehtenon benahue noquenah sca jahuen huai hihnon —hihcani.³⁹ Nocotaiton sca yahtanxon, huai mapoho boxon rehtecanquin.⁴⁰ ¿Joxon sca jaa huai hihbaan jahua jato jati quin? —Jesusen jato jaquin.

⁴¹ —Jato ta tiromajaquin rehtetihiqui. Jahuen huai rihbi ta huetsa coirannicahbo hinantahtihiqui, bimi jai tian jahuenah hinanyaxihqui bo —hahcanquin.

⁴² —¿Papan huishani joi janin man nea jahuentianbi jisyamaniquin?

Tiroma tah qui hihxon xobojahibaan potani xobo jihui ta hahqui xobojati qui. Papa Diosen ta jaa caisi-hqui. Jan hahcai shinanax tah non rahtetai

hihqui jaa joi.

⁴³ Jaa copi tah hen mato yohihi: Papan ta mato jahuen jihue bichinyax-ihqui qui. Mato bichinxon ta maton nahuabo sca hinanyaxihqui qui, jahuen joi jai quescabijahibo.⁴⁴ Jaa jihui qui pa-quetaibo ta tobithiqui. Jato qui jaa jihui paquetah ta moshi moshitaibo jayax-ihqui qui —jato jaquin.⁴⁵ Hahan haxeti joi jan yohihi nincaxon, jato qui jan jayaxon yohihi jaton hapobaan honanquin.⁴⁶ Jaa bihcatsihquish bi jonibo qui raquexon bihyamacanquin. Papan joi yohinica tah qui hihqui bo sinacahin-camnis hihquish raquecandi.

Huanomahi

22 Yahtancatsihquibaan bi Jesusen jato yohipariquin hahan haxeti joi jato nincamaquin.

² Papan jihuemahi ta huesti qui qui hapon hahní quescapi qui. Jahuen baque huanomayanoxon ta jato hichaxon pitijati yohinishqui.³ Piti

hicha jaiya sca, jan yohihipibo yohitannon, jahuen jonibo raanscaquin. Huanomaquin pihi benahue hahca bi queenyamacani.⁴ Huetsabo sca jaton hapon raanrihbiquin.

—Hen yohihipibo yohitannahue. Piti ta hihresscaili. Heen torobo rehtexon, xoa toro baquebo rehtexon, pitijaha ta jatihibi hihresscaili. Pihihue jato jatan-nahue —jato jaquin.⁵ Caxon yohihah bi nincacatsihyamacani. Huetsa janin res bojaquetancani. Huetsa jahuen huai chian cahi. Huetsa jahuen tee janin cahi.⁶ Caibaan rihbi jahuen jonibo bihxon, jato sinajaxon rehtecanquin.⁷ Jaa copi ta sinaxon sca jaton qui qui hapon jahuen sontarobo sca raanxon hoa retemisbo rehtexon jato xobobo mapojaribinishqui.⁸ Jato jascajaxon sca jahuen jonibo yohirihbiquin:

—Noquen piti hihresscaili bi ta non jato yohihipibo tiromabo qui.⁹ Hoque cahi bahin sca botannahue. Man janu merahi jatihibi jato yohibonanahue, pihi behabo.¹⁰ Yonohah sca bocani. Bahin caquin jonibo meraxon chanixon jahuen huanomati janin jato becanquin. Siri-boyta tiromabo mesco jato becanquin, jahuen huanomati piti janin hihti caibo sca joni janon.¹¹ Pihibo jisi caxon sca jayaxon huanomati chopasahuehaxma huesti joni pihi tsahotaiton hapon mer-aquin.¹² Meraxon:

—¿Jenquetsahpahi min jayaxon huanomati chopasahuehaxma neno hihcohin, hiconin? —hapon jaáh bi jahuhahiyamahi.¹³ Piti metexonaibo sca quenaxon:

—Nea menexxon tanexnahue. Nexaxon nenoma qui bahquish chian potanahue. Jano bahquish chian potahahbo ta saisaihihqui qui, hisinxon xeta tais tais hahquin.¹⁴ Hicha quenamaha bi ta huestibores hihquinica qui —Jesusen jato jaquin.

Non hapo copijatihin hihquibo

(*Mr 12.13-17; Lc 20.20-26*)

¹⁵ Yohihah, yohinani fariseobo caresscái. Jahuen joi copi rehtenoxon jenquetahaxon non tiroma yohuanmatihin hihcami. ¹⁶ Jatonahbi jaton haxenocabo sca raancanquin, herodianobo betan caxon Jesus yocacahbo. Cahi nocoxon sca, yocacanquin:

—Mian tah min sirijaquin yohihi, maestron. Non tah non honanai. Mian tah min noque Papan bahi sirijaquin honanmahi. Tsoa qui bi raquexonma tah min jaabijaquin noque yohihi. Noquen bemanan res tah min jisyamahi; noquen shinan rihbi tah min honanai. ¹⁷ Jaa copi tah non mia yocacai. ¿Quiquin hapo Cesaronen noque cobranah non copijati jain? ¿Non copijatimahin? Noque yohihi —hahcanquin.

¹⁸ Tiromabohi honanxon, jato yocaquin: —¿Jahuejanoxon man shinancoinihcamaxon hea tanahin? ¹⁹ Hahan copijati coriqui hea jismanahue —hahquin.

Yohihah, jaa coriqui bexon hinanquín. ²⁰ Bihxon, sanahihnxon jato yocaquin:

—¿Neno tsoan mapo jaiquin? ¿Tsoan huishani neno jaiquin?

²¹ —Cesaronena rahan —hahcami.

—Jahuena hihquiya, jahuena hinannahue. Noquen Papa rihbi jahuena hinannahue —jato jaquin. ²² Nincacax, rahtecani. Joihaxma sca bocani.

Non teehihribitihin hihquibo

(*Mr 12.18-27; Lc 20.27-40*)

²³ Jaatian saduceobo rihbi yocaqui becani. Jaabaan shinannah, muhuatax non tsoabi hahquirihbi teehihtimahi. Jaabaan sca yocaquin:

²⁴ —Maestron, Moisesnin ta noque yohinishqui, noquen bocha baquejahaxma hihxonaiya non

jahuen yononma bihxon hahqui sca noquen bocha non baquejaxonti. ²⁵ Neno noquen chahin baquebo ta siete janishqui, bebo rahsi. Jahuen beboquha baque haibo bichish bi baquejahaxma hihqui. Jahuen chinipan sca jahuen yononma hihquihinquin. ²⁶ Jaa jascarihbibi; baquejahaxma mahuati. Huetsa sca jascarihbibi. Huetsa sca jascarihbibi, jaton chini caman sca. Jaa jascarihbibi. ²⁷ Jaton yononma sca mahuaribiscay. ²⁸ ¿Papan jihue janin sca teehihribihax jihuetaiboya, tsoan haibo jaa yononma jatihiquin? Jatihibichin jaa hihquihinsh bi —hahcanquin Jesus.

²⁹ Jasca jaiboya, jato yohiquin:

—Papan huishamani joi honanya-maxon tah man honanai shinanxon bi honancoinyamahi. Papan coshi rihbi honanyamaxon tah man shinancoinyamahi. ³⁰ Papan jihue janin sca teehihribihibaan ta haibo bihyamayaxihqui. Haibobo rihbi ta benoyamayaxihqui. Papan naihoh jai yonotibo hihqui quescapi ta jayaxihcanihqui. ³¹ Mahuanihbo ta hahquirihbi teehihtimahi qui hih man jai bi tah hen mato yohihi ¿nea Papan huishamani joi man jisyamaniquin?

³² Hea tah hen Abrahanen Papa Dios qui.

Isaaquen Papa Dios tah hen qui. Jacobon Papa Dios tah hen qui.

hahqui jaa joi. Jaa copi honannahue. Papa Dios ta mahuanihbaan Papa Dios hihpahoni ma qui. Jihuetaibaan Papa Dios ta jaa qui —jato jaquin. ³³ Jesusen jato yohihi ta tsamajaquetaibaan rihbi nincanishqui. Nincacax bi ¿jasca hin? hihquiish rahte rahtecani.

Jaa pari nincati joi

(*Mr 12.28-34*)

³⁴ Saduceobo rihbi jan yohixon netemahi chanihahbo sca fariseobo jaabo rahsi sca tsinquieri.

³⁵ Yohinanax, jato quiha huesti jahui, Moisesnin huishani joi honan. Jesus tanacatsihquin nescajaquin yocaquin:

³⁶ —Maestron, ¿jahue meha non Moisesnin huishani joibo jaa pari hashoan nincati jain? —hahquin.

³⁷ —Miin Hihbo Diosohon tah min miin jointiboyabi queentihu, miin yoshinboyabi, miin shinanboyabi tah min jahan queentihu. Jaa pari nincati joi ta jaa qui. ³⁸⁻³⁹ Jaa pecaho ta huetsa jascapah rihbi qui: Mihbe jihuetaibohn tah min queenrihbitihu, mihri min queemehti hi-hqui quescarihbibi. ⁴⁰ Jaa joi rabe janinhax ta texe Moisesnin huishani joi jahuiqui. Texe Papan joi yohinicabaan huishani joi rihbi janohax jahui.

Cristo tsoan baque quin Jesusen jato jai

(Mr 12.35-37; Lc 20.41-44)

⁴¹ Caibo rihbi sca fariseobo nocohih-nataiya Jesusen jato yocaquin.

⁴² —Hean sca tah hen mato yocacai: ¿Tsoan baque Cristo quin? ¿Jahua man shinanain? —hahquin.

—Davidina rahan —hihcani.

⁴³ —Davidina hihquiya, ¿jenquetsah-pahiya quenaquin Hihbon Davidi janishquin, Dios yoshiman huishamahah?

⁴⁴ Jaa jan huishani ta nesca qui: Heen Hihbo Diosen ta heen hihbo yohin-ishqui. Hihbonoxon hea mecayaho tsahoti johue, miin rahuibo miin hinabo sca hen hihmanon caman hihbohue.

⁴⁵ Jahuen hihbo hihqui Davidi yohuani jaiya, ¿jenquetsahpax jahuen baque hiti quin? —jato jaquin. ⁴⁶ Yocacah bi jahua yohiti honanyamacanquin. Jato jascajaquin yocarihbimis hihxon rabinxon jahuabi yocayamascacanquin, jahuentianbi.

Jesusen fariseobo cahehi

(Mr 12.38-40; Lc 11.37-54; 20.45-47)

23 Jaa xoboho hihti caibo jaiya sca, jahuen haxenicabo rihbi jano jaiya, jatihibixonbi nincanon Jesusen yohiquin.

² Fariseobaan ta Moisesnin huishani joiyaxon mato haxemahiqui. Jaton huisha haxemanicahbaan ta jascajaribihiqui. ³ Jaa copi jato nincanahue. Jaabaan mato yohihi jatihibi jointinin nincaxon hahnahue. Jaabaan yohihi quescajaxon bi jaabaan hahcai quescajayamahue. Janan sirijaquin yohixon bi ta jascajaya-macaniqui. ⁴ Patorobaan jaton jonibo hihuenhuan papimahi hahcajaquin ta yohiquin tee joibo tsamancaniqui, man rehbo rehbocanascanon. Mato jascapa hihuebo yohixon bi ta ni huesti metotinibni jahuabi mato yanapanyamacaniqui.

⁵ Caibaan jisnon hihxon res ta hahcanihqui, siri hihqui shinanahbo hihxon. Jisíbo hihxon res ta jaton benexehtibo pextinjacaniqui, hahqui huishaxon Papan joi shinantihibi. Jaton rajoti jisibo hihxon res ta jaton coton quexabo quenejaxon hanijacaniqui. ⁶ Huanomati hihyamahiya huetsa copi hichaxon pitijahibo jai nincacax ta cahax xobo hihbo pataxbi tsahocatsihcanihqui, huetsanco tsahocatsihyamahi. Papan joi nincaqui cahax bi, jascarihbican, hapon tsahotinin res tsahocatsihqui. ⁷ Huinotaiton caibaan jato saludanxon Hapon hahcá ta costancaniqui.

⁸ Tsoabi mato Hapon hahmayamanahue. Maton hapo ta huesti res qui, mato haxemahi. Mato tah man noque huetsa rahsi qui. ⁹ Tsoabi rihbi tah man main jaibo Papan haftimahi. Maton naihoh queha Papa huesti res ta maton Papa qui. ¹⁰ Tsoabi rihbi mato Maestron hahmayamanahue.

Cristo huesti ta maton maestro qui.
¹¹ Maton huetsabo man hashoan hahxonaiya tah hen hashoan shinanya joni mato jisyaxihqui. ¹² Jaa copi ta rahma caibo mahuinti shinanai joni hean hihpaquemayaxihqui, naman sca jaa janon. Naman mehabo quescaxon joni hahxonaibo tah hen hinahihnamayaxihqui, shinan siriya jaa hihnon.

¹³ Hahrai hahrai hih tah man jayaxihqui, fariseobon. Judio joi xeni honanmanicabon, hahrai hih tah man jayaxihqui, Papan casticanah. Shinancoinihcamaxon paranaibo tah man qui. Jonibo Papan jihue janin capanan tah man jato bahi xehponai. Papan jihue janin hihcatacsihquiaan bi tah man jato pantehi, mato rihbi hihcatacsihyamaxon.

¹⁴ Yomanah tai yononmabo jaton jahuaborabo bichinxon bi tah man Papa yocaquin joi tsamanscái.

¹⁵ Hahrai hih tah man jayaxihqui fariseobon. Mato judio joi xeni haxemanicabon. Man tah man jascarihbiyaxihqui, Papan casticanah. Shinancoinihcamaxon paranaibo tah man qui. Huesti joni haxemanoxon tah man mai nabebacahinax hian pohquejaquxon haxemahi. Man haxemaha sca ta man tiromajaquin hahcai quescajaquin bi rabejaquin hashoan tiromaja sca jaiqui, maton tiroma shinanyaxon mato muuinquin.

¹⁶ Hahrai hih tah man jayaxihqui. Benchexon bi tah man caibo hioti shinanai. Nesca tah man yohuani jai: Papan xobo hihcoinnicahton xobo hihqui quescaribibi tah hen hihcoini yohuani hihquish bi non quesaahah ta tiroma ma qui, hih tah man jai, paranquin. Papan xobo janin jai oro hihcoinnicahton oro hihqui quescaribibi tah hen hihcoini yohuani hihquish tah non quesaatima sca jai hih tah man jai. Jascari yohuanquin tah man joni huetsa

paranai. ¹⁷ Shinanjomabon. Benchebon. ¿Jahuemeha hashoan coshi quin? ¿Oro nan? ¿Oro hihbo nan? ¹⁸ Jano Papa racanxonti ta hihcoinnica racanxonti qui hihquish bi quesaascaax tah non tiroma yamahi hih tah man jai, parani. Jaa racanti janin racatai tah non hihcoinnica hinanai hihquish tah non quesaatimascai hih tah man jai. ¹⁹ Shinanjomabon, ¿jahue meha hashoan coshi quin: non hinanai jahuaborabo nan? ¿Racanxonti hihbo nan? ²⁰ Jaa copi ta jaa racanxontiya yohuanai joni jahuen racanxontiya res yohuanyamahiqui. Jano racatai jahuen hinantiyabi ta yohuanihqui. ²¹ Papan xoboya yohuanai joni ta jaya res ma bi jaa chicho jaiboya yohuanihqui. ²² Naiya yohuanai joni rihbi ta jaho jaiboya yohuanihqui: janoxon ta Papan noque jisiqui. Jaa copi ta jascari yohuanai joni noquen Papa Diosyabi yohuanihqui.

²³ Hahrai hih tah man jayaxihqui, fariseobon. Hahrai hih tah man jayaxihqui, judio joi xeni honanmanicahbon. Hihcoinihcamaxon tah man paranai. Maton haxé pehi tah man texe pishca jahuena noquen Papa hinanxon, cahua meso rihbi pishca hinanxon, comino pehi rihbi pishca hinanxon jai. Jascajahax bi tah man Papan hani joibo, non jaa pari nincati jai joibo, man nincati pishinai. Non pontejaquin shinanti jai joibo, non joni huetsahon shinanti jai joibo, non Papan joi nincacointi jai joibo. Jaa joibo caya tah man shinancointihi, hoa hamitahmabo jenexonma. ²⁴ Benchexon bi tah man joni hioti shinanai. Naca pishca xehamis hihxon maton xehati tohaxon bi tah man moanman hahua xeharesai.

²⁵ Hahrai hih tah man jayaxihqui, fariseobon. Mato jascarihbihi, judio joi xeni haxemanicahbon. Shinancoinihcamaxon tah man jonibo paranresai. Pinoxon tah man tason rahchoxon quenchábo rahchocai.

Chicho rihbi nahpantahin: jano ta yometsohiya bihesti shinanbo bochohiqui. ²⁶Shinanjoma fariseon. Chicho pari miin tasonbo nachohue, chixama rahpanah siri sca hihnon.

²⁷Hahrai hih tah man jayaxihqui, judio hapobon. Hahrai hih tah man jayaxihqui, fariseobon. Shinancoinhcamaxon tah man jonibo paranresai. Tsahon quescapahbo tah man qui. Tsahon ta bemacanya sirijaquin bexojahah bi chicho sca mahuatipi pisi bochohi qui, rahnintibo bochohi. ²⁸Mato tah man jascapahbo rihbi qui, rahmacanya ponte joni quescapahax bi jointi janin tiroma shinanbo bochohi, paranti shinanbo bochohi.

²⁹Hahrai hih tah man jayaxihqui, judio hapobon, fariseobon, shinanihcamaxon parannicabon. Papan joi yohinicabo tah man jaton tsahon xobojaxonai. Sirijaquin Papan joi yohipahonihbo copi tah man jaton tsahon sirijaquin bexojahi. ³⁰Jascjahax tah man yohuanai. Noquen papabo jihuetai tian jihuexon cah non jaabaan rehteni quescajayamaquehahnai, Papan joi yohinicabo rehteyamaquin. ³¹Jascari yohuanxon tah man Papan joi yohinicabo rehtepahonihbaan baquebo man hihqui man honanmahi. ³²Maton papabaan retequin texejani senenjascanahue, hah ca hen mato jaihsen.

³³Ronobon. Toaihca baquebon. Man tah man jenquetsahaxon bi maton casticanti mato xahbanjamati mahi. Tiromabo casticanti tian ta Papan mato tiromajayaxihquiqui. ³⁴Man jato tiromajanon tah hen heen raantibo mato qui raanai, heen joi yohinicabo hen mato qui raanai, honanbo hen mato qui raanai, heen joi huishahibo hen mato qui raanai. Caibo tah man rehtetihi. Caibo tah man jihuinhueonxon rehtetihi. Caibo tah man maton tsinquit xobohoxon bi rishqui

rishquitih. Caibo rihbi tah man huesti jema janinxon huetsa caman chibantih tiromajacatsihquin. ³⁵Jaa copi tah hen mato hihti casticanyaxihqui. Abel janeya siri joni rehementenihxon texe siri jonibo rehtepahonihxon, Berequiasnen baque Zacarias sca man rehtenihqui. Jaa tah man racanxonti janinhax Papan xobo janin cahiton man rehtenihqui. ³⁶Hen mato yohinon nincanahue: Jaa jatihibi copi ta Papan mato casticanyaxihquiqui —jato jaquin.

Jerusalen jonibohon Jesusen masa shinanai

(Lc 13.34-35)

³⁷Jerusalen janin jihuetaibo sca yohihi:

—Jerusalen janinhahbon, Papan joi yohinicabo tah man rehtehi. Jan mato qui raanaibo tah man macaman tsacaxon rehtehi. Hatapanen jahuen baquebo paxajaquin hahcajaquin hicha coti sca hen mato tsinquiham bi tah man queenyamahi. ³⁸Jisnahue. Maton jihue ta boncoscainqui. Jonijoma sca ta jaiqui. ³⁹Man tah man hea jisyamascatih. Hea hahquirihbi jahui merahax tah man Papan shinanya ta joxonihqui. Papan janen ta jorescainqui hih tah man jayaxihqui. Hen joyaxahnon caman tah man hea jisyamascatih —jato jaquin.

Papan xobo tiromajayaxihquibo *(Mr 13.1-2; Lc 21.5-6)*

24 Papan xobo janinhax picotax sca bahin cahi cahi. Hahbetan caquin, jemanxon Papan xobobo jisxon, jahuen haxenicabaan metoxon hani xobo siribo jismacatsihquin yohicanquin. ²Jishue, Hihbon jaábo bi:

—Hen mato yohinon nincanahue. Nea man jisi rahsi ta potojaquequin queyobahinyaxihcanihqui. Nea macan tsamanxon xobojanibo bi ta

ni huesti macan huetsa cahchian tsahoyamascayaxihqui qui.

**Nete queyoti hochomahiya
non jisyaxihquibo**

(*Mr 13.3-23; Lc 21.7-24; 17.22-24*)

³ Jato jascajabahini cahax, Olivoya manan manichish Jesus tsahoti. Jaabo rahsibi sca jahuen haxenicabo hahqui tsinuijaquexon yocacanquin:

—Noque yohipishcahue. ¿Min yohiha jahuentian jayaxihqui qui? ¿Jahua huinotai jisxon non mia joribiti nea pishca sca jai non honantihin? ¿Nete queyoti neno pishcasca jai honannoxon jahua non jistihin?

⁴ Yocacabho sca: —Coiramenahue. Mato parancamnis. ⁵ Hea hihquicamax ta hicha jonibo joyaxihqui qui. Hea tah hen Cristo qui hihxon ta hicha joni paranyaxihcanihqui. ⁶ Rehtenanaibo tah man nincayaxihqui. Huetsa janin rehtenanaibo jai chanihi tah man nincarihbyaxihqui. Nincaxon bi masa shinanyamanahue. Nete queyoriyamanon bi ta jascapahbo jatihi qui. ⁷ Jaa rehtenanaibo janon ta huetsa nahuabo jaton nahuabo betan rehtenani boyaxihcanihqui. Jaton sotaroboya cahax ta quiquin hapobo hahbe quiquin hapobo betan rehtenanyaxihcanihqui. Huetsa janinbo ta pihan hihquish mahuayaxihcanihqui. Huetsa janinbo rihbi ta mai mihuanyaxihqui qui. ⁸ Jaa rahsi ta pehocohyaxihqui qui, nete queyoscayaxahnnon.

⁹ Jaatian ta mato bihxon mato tiromajayaxihcanihqui. Mato ta rehteyaxihcanihqui. Man hea hihbomahi copi ta jatihibi nahuabaan mato jistahihmayaxihcanihqui. ¹⁰ Jaa copi ta nincapahonixon bi hihti caibaan hea jenebahinyaxihqui qui. Hea jenexon ta paranxon jaton hahbe nincacoinnicabo rihbi polisia

bihmayaxihcanihqui. Jascapah ta jistahihmahanani jayaxihcanihqui.

¹¹ Papan joi yohihicamax hach ta hicha quesabo jaresscatihqui. Tsama jonibo ta paranyaxihcanihqui. ¹² Tiromabo hashoan hicha sca jaiya ta joni huetsahon shinanyamahibo hashoan hichayaxihqui qui. Shinanyahpabo cahen huestibo res. ¹³ Jabi ta maton nete queyonon caman man tenehiya Papan mato jihuecoinmayaxihqui qui. ¹⁴ Papan mato jihuemayaxihqui joi siri ta jatihibi janin chanihi boyaxihcanihqui, jatihibi nahuabo nincamaquin. Jaatiansca ta nete queyoscayaxihqui qui.

¹⁵ Jaa copi Danielnin huishani joi jisxon, honannahue. Papan joi yohinicaxon ta huishanishqui, Papan jati janin ta non rahninai joni nihyaxihqui qui, hihqui jaa huisha. Jascapa janu nichi jisxon sca honannahue. ¹⁶ Jaa jisish, jabatax mahchibo janin joneyaxahnahue, Judea mai mehabon. ¹⁷ Miin xobo pemacanya tsahotax, botocahintanhue histon. Miin xoboho jai jahuaborabo bichishma hishtocahintanhue.

¹⁸ Miin huai chian cotonjoma teetax carestanhue, miin coton benahi joribiyamatanhue, carestanhue.

¹⁹ Jaa netebaan ta tohoyabo huaohihcanahi cayaxihqui qui. Xoma hahmahibo jascarihbibi. ²⁰ Jenetian jabayamanoxon Papa yocayaxahnahue, tantiti neten rihbi jabayamanoxon yocayaxahnahue. ²¹ Jaatian ta hihti tiromajayaxihcanihqui. Nete jamenoni rahma caman tsoan jisnima tiromabo ta jayaxihqui qui. Jahuentianbi jascapahbo hahquirihbi yamascanon ta jaatian jayaxihqui qui. Jaa copi jascajaquin Papa yocayaxahnahue. ²² Jascapa tiroma netebo hashoan hichahiya cahen tsoabi jihueyamahan. Jaa copi ta jahuen caisahbohon shinanxon

jascapa tiromabo basi jatima Papan yohiyaxihqui qui.

²³ Jaatian, Neno ta Cristo qui hihquiboya jato nincayamaxahnahue. Hono tah qui hihquiboya nincayamaxahnahue. ²⁴ Hea tah hen Cristo qui hihqui quesahibo ta joyaxihqui qui. Papan joi yohinica tah hen qui hihquiboya quesahi. Jaton coshiyaxon hahan honantijaquin hahcajaquin ta jonibo rahteyaxihcanihqui, jato parannoxon. Hahtipahxon cahen nincacoinnacabon rihbi bahinmahhuan nichinbohanan. ²⁵ Jascapahbo jayaxihqui tah hen mato yohiscai. Jato honanyaxahnahue. ²⁶ Jisnahue, Cahchiho ta Cristo nichiqui hihquiaan bi jato honanax jisi boyamanoxahnahue. Xobo chicho tah qui, hihquiaan bi jato nincayamanoxahnahue. ²⁷ Bari cainai quirihax bari hihquihi janin caman cana bacahi xabatani jai quescapi tah hen sanarenenyaxihqui. Jaa honanxon jato nincayamanoxahnahue. ²⁸ Jano mahuatipi racatai janin ta hishmin tsinquitihqui, hih ca hen jaihsen.

Noquen Hihbo joyaxihqui

(Mr 13.24-37; Lc 21.25-33;
17.26-30, 34-36)

²⁹ Jascapa nete tiromabo queyoscaya ta bari xehpo sca jaax xabayamascati-hqui. Hoxne rihbi ta xabayamascati-hqui. Naihoh quehax ta huishibo rihbi paqueyaxihqui qui. Naiho jai coshibo ta Papan tahayaxihqui qui. ³⁰ Jaatian tah man nai bejisxon hahan honanti jisyaxihqui, hea joribiscanon. Jaatian ta jatihibi janin jaibo huaohihyaxihcanihqui. Naihoh quehax botopaqueti jahui sca ta hea noquebaque jisyaxihcanihqui, nai cohiman jahui ta hea jisyaxihcanihqui, hihti xabaya hihti coshiya jahui ta jisyaxihcanihqui. ³¹ Corneta rehue coshin res corotai bi tah hen heen yonotibo raanyaxihqui, jatihibi

janin jai heen caisahbo tsinquinon. Nai chibechijaquetancahanai janin cahi, ramaho jascarihbi, jatihibi janin jato tsinquixonquin.

³² Xono jihui ta hahan haxeti qui, honannahue. Bochocohax pehahiscaia ta bimi bero tsinquitit netebo nocoti jahui non honanai. ³³ Jascajaquin rihbi hen mato yohihahbo jaresscái jisxon, maton xoboho hihcohi jahuicamahi hen hochoma pishca jahui honannahue. ³⁴ Man honannon hihxon tah hen mato yohihi: Hen mato yohihah quescabibi jaresscái pari ta nete queyoyaxihqui qui. ³⁵ Jaatian ta naiya maibo queyocahinyaxihqui qui. Naiya maibo queyocahinai bi ta heen joi jahuentianbi queyotimahqui.

³⁶ ¿Jahuentian nete queyoyaxihqui qui? ¿Jahuen bari hihquiya queyoyaxihqui qui? Tsoanbi tah non honanyamahi. Naihohxon Papan yonotibaan honanyamarihbinon tah hen hean rihbi honanyamahi. Papa huestichin ta honanihqui. ³⁷ Jahuentian queyoyaxihqui qui honanxonma bi nea honannahue: Noen jihuetai tian japhahonibo quescarihbih ta hea sanareneni jonon caman jayaxihcanihqui jonibo. ³⁸ Jenen jato mahponon caman ta pipi pipichi xeha xehahi jihuecampahonishqui. Jahuen nontin Noen nanenon caman ta bebaan hahuinjanon haibobo rihbi benonon huanomacanpahonishqui. ³⁹ Jahuentian jene paquexihqui qui honanxonma ta jascajacanpahonishqui, paquererenxon sca jenen jato bonon. Jascarihbih ta hea joti jayaxihqui qui, tsoan honanaima bi histon. ⁴⁰ Jaatian ta jaton huai chian rabe joni teetai jayaxihqui qui, huetsa hioxon tah hen huetsa jenebahintihi. ⁴¹ Jaton rentin rabexon rene renehiton bi tah hen huetsa bihxon huetsa jenebahintihi.

⁴² Coiramenahue tahca. Jahua netenbi maton hihbo mato bichi jahuiquin man tah man honanyamahi. ⁴³ Jahua neten hen jotihiquin man tah man honanyamahi. Mato qui ta nococahintihiqui. Jaa tah man honanscrai. Jahua hora jahuen xoboho yometso hihquicahintihi honanxon cahen xobo hihbaan coiranana. Coiranxon cahen jahuen xoboho hihquimayamahan. ⁴⁴ Jaa copi coiramenahue. Rahmabi ta joyamahiqui hih man jai bi tah hen joresscatihi.

Siri betan tiroma teexonai

(Lc 12.41-48)

⁴⁵ Jahuen patoronen yohihi quescabijaquin hahxonai joni ta siri joni qui, shinanyahpa. Jascapa cahen jahuen patoronen yohitihu, texe jahuen jonibo jan jisxonnon. Jaton piti tian jan jato pimanon. ⁴⁶ Jascajaxonaiton jahuen patoro joxon merahah ta hahan jenimati jaiqui, jahuen patoronen siri joni jisi copi. ⁴⁷ Jascapa joni ta jahuen patoronen yohitihu, jatihibi jahuen xoboyabi jahuen jonibo jan jisxonnon. ⁴⁸ Jascapa hihyamahax bi tiroma joni hihquish cahen Heen patoro ta basixihquiqui hihxon, ⁴⁹ jahuen hahbejonibo rishquitihu. Jato rishquixon sca ta piquin sirijaxon xehahax pahenscatihiqui. ⁵⁰ Joriyama ta jatihiqui hih jahuen joni jaitianbi ta pahenscaiton jahuen patoronen merahi jotihiqui. ⁵¹ Joxon ta jaa joni caxquepaqxon jahuen tequebo potatihiqui. Jano nincacoinihcamahibo jaiton potaquin. Jano ta saisaihiqui, xeta tais tais hahcaibo rahsi jayaxihquiqui.

Diez xontacobo

25 Jahuen jihuetahbo Papan jihuemahi jahui ta diez xontaconen hahni quescatihiqui. Jaton johue bihbahini caxon cahen huanomanoxon jaton tsaben benejati

jahui behchihi bocani. Jan huanoxihqui bepi jascacani. ² Pichca xontaco shinanjoma janon cahen jatihí rihbi shinanyahpa jaribinish. ³ Honamma xontacobaan cahen jaton johuebo bihbahini caxon bi jaton nachiti boyamanish. ⁴ Shinanyabaan jaton johue boxon bi jaton nachiti rihbi boquin. ⁵ Jaton tsaben benejati basihiya sca, manatax hoxacatsihquish racapaquecani. ⁶ Yame pochinicon sca quenatai nincacanquin. Jo ta jaiqui. Behchitannahue, hahquin. ⁷ Huenicahuaxon sca jaton johue cohuasquin. Cohuasxon nachicanquin.

⁸ —Maton nachiti noque hinannahue. Noquena ta nocahiqui —tanamabaan jaton huetsabo jaquin.

⁹ —Noquena xabanon matonah rihbi xabati rah ta noquen nachiti senentimahiqui. Jano marohibo janin maton nachiti marotanhue, hih ca hen jai ihsen —shinanyahpabaan jato jaquin. ¹⁰ Marohi bohiboya sca jaton patoro nocoti. Jaa manatax, huanomahi hahbetan hihcocani johueyahpabo. Mapescaiboya sca coirannicahban xehpoti xehpoquin. ¹¹ Chini sca nachiti marotani jahui xontacobo nocorihbihi. Nocoxon, jemanxon quenacanquin:

—Patoron, noque quehpenxonhue, patoron.

¹² Chichoxon sca ta jaan jato yohitihu:

—Mato tah hen honanyamabiresai —hahquin. ¹³ Jaa copi coiramenahue. Heen joti nete, heen joti hora tah man honanyamahi.

Hinantahbahinaibo

¹⁴ Papan jihuemahi ta huesti joni hocco canoxon jai quesa qui. Jaan cahen jahuen jonibo quenaxon jahuen jahuaborabo hinantahban.

¹⁵ Huetsa cahen pichca borasa coriqui hinanan. Huetsa cahen rabe res. Huetsa

cahen huesti res. Jaabo jaya teeti hahtipahi tihi jato hinanpaquequin, jaton shinan tihi coriqui senenjaquin. Jato hinanbahini caresscái.¹⁶ Pichca borasa bichish, jan hinanmenoha jahuen coriquiya caxon, jahuaborabo maromaribinoxon maroquin. Basi jascajaxon huetsa pichca borasa rihbi coriqui bochojaribiquin.¹⁷ Rabe borasa hinanah jascajaribiquin. Jatíhi rihbi bochojaquin maroxon maromaxon coriqui bihxon, caíjaxon rabe bochojaquin.¹⁸ Huesti borasa hinanah cahen jascayamahi. Jaan cahen jahuen borasa bichish, caxon, mai poquinxon, janó jahuen patoronen coriqui jonequin.

¹⁹ Basihax sca jaton patoro joribisc-
cai. Nocoxon, jato betan bexonoxon jato
quenamapaquequin. ²⁰ Quenamaha jan
pichca borasa bocho hinantahni pari
jahui. Jan cananxonai pichca borasa bo-
cho bexon jahuen patoro jismaxon:

—Pichca tah min hea hinantahbahin-nihqui, Hihbon. Jatíhi rihbi tah hen jayaxon mia cananxonai.

²¹—Siri tah qui. Mia tah min siri joni qui. Sirija tah min jai. Mia tah hen hicha tahma hinantahbahinniqui. Rahma tah hen hicha sca mia hinanai. Hea jenimahi hihqui quesvari hehbetanbi jenimahue.
²²Rabe borasa jan hinantahbahinni sca jahui.

—Rabe tah min hea hinantahbahin-niqui, hapon. Jatíhi rihbi tah hen mia cananxonai.

²³—Siri tah qui. Mia tah min heen joni siri qui. Siri ja tah min jai. Hicha tahma tah hen mia hinantahniqui. Hicha sca tah hen mia hinanai. Hea hen jen-imahi hihqui quescari hehbetanbi jen-imahue. ²⁴ Huetsa sca jahui, huesti borasa bihnish.

—Hapon, mia yonomis hihqui tah hen honannihqui. Mianbi banahahmabo tah min tsinquihi. Mianbi jahuen chishpo potaxonma tah min bichi.²⁵ Jaa copi tah

hen raquexon miin coriqui mihinnihqui.
Nea tah qui, jise. Bihhue. ²⁶ Jaatian ta
jahuen patoronen jaa yohitihqui:

—Joni tiroman, chiquishin, ¿heanbi bananihxonma hean tsinquihi min honannihquin nan? ¿Jano heanbi jahuen chishpo potayamahi janin hen bichi cahim min honanihquin nan? ²⁷ ¿Hea jascapah honanxon heen coriqui jaya teenica hinantahtahin min janquin jan jaya teenon? Jaatian tah hen joxon heen coriquinin cananai hashoan hicha bi-hqueahnai. ²⁸ Heen coriqui jaa bichin-nahue, hah ca mato jaihsen. Jaa bichinxon hoa chonga borasayahpa hinan-nahue. ²⁹ Hicha jaibo tah hen hashoan hicha rihbi hinanxihqui, jan tsama scajanon. Jahuabi yamahibaana tah hen jaabo jai pishca jato bichintihi. ³⁰ Ho-jri bahquish chian sca nea chiquish potanahue. Jano ta saisaihixon xetais tais hahcaibo rahsi jatihiqui.

Jonibo casticanti nete

³¹ Heen joti neten ta heen coshi xabaya hea noquebaque joyaxihqui. Heen yonotibo rihbi tah hen hahbeyax-ihqui. Joxon ta heen quiquin hapo tsahotinin tsahoxon jatihibi quenamayax-ihqui. ³² Jaatian ta jatihibi jonibo hea bebonbi tsinquiryaxihcanihqui. Carneroboya chibo jai bi carnerobo rahsi janu huesti janon jaton hihbaan jato caisai hahcajaquin ta ramihoh huesti tsama janon ramihoh rihbi texe hean nichinbohanyaxihqui. ³³ Heen carnerobo ta heen macyaho nihyaxihquiqui. Chibobo cahen memiho. ³⁴ Mecayahoh nichibo sca tah hen quiquin hapo hihxon yohiyaxihqui:

Benahue. Heen Papa ta matohon hihti queenihqui, man jenimanon. Man janoo jihuenon jan mato bexojaxonai janin benahue, matonah sca jahuen jihue janon. Naiyahpa mai jariyamahiyabi ta mato jaa bexojaxonnishqui.³⁵ Mato tah man-

hea pimanihbo qui. Picatsihquiton tah man hea pimanihqui. Jiricatsihquiton tah man hea xehamaniqui. Maton nahua hihqui bi tah man sirijaquin hea maton xoboho mapemaniqui.³⁶ Chopanma hihquiton tah man hea sahuemaniqui. Hen hisinaiya tah man hea jisi caniqui. Sipo xobo tsahotaiton tah man hea yanapanniqui, hah tah hen jato jayaxi-hqui.³⁷ Jaatian ta jahuen siri jonibaan yocayaxihquiqui:

¿Jahuentian mia picatsihqui jisxon non mia pimanihquin, Hihbon? ¿Jahuentian mia xehacatsihquiton non mia xehamaniquin?³⁸ ¿Jahuentian non mia noquen nahua quescapa mapemaniquin? ¿Jahuentian non mia chopanma jaiton sahuemanquin?³⁹ ¿Jahuentian mia hisini jai, jaa hihiyamahax sipo xoboho tsahotai non mia jisi caniquin?⁴⁰ Jaton quiquin hapo hihxon tah hen jato yohiyaxihqui:

Man honannon tah hen mato yohihi. Nea heen huetsabo romishin jascajaxon-quin tah man hea rihbi hahxonnihqui.

⁴¹ Memiho quehabo sca tah hen nesca-jayaxihqui: Botannahue, tiromabon. Satanas jahuen tiroma yoshinbo betan jano cati chihi janin botannahue.⁴² Hen picatsihqui bi tah man hea pimaya-manihqui. Hen jiricatsihqui bi tah man hea xehamayamaniqui.⁴³ Maton nahua quescia jahuiton bi tah man hea mape-mayamaniqui. Chopa bocabi tah man hea sahuemayamaniqui, hisinax, sipo xoboho tsahonah racatai bi tah man hea jisi cajaquetanyamanihqui.⁴⁴ Jato jasca-jaha ta yocaticanihqui.

¿Jahuentian non mia picatsihqui jis-niquin, Hihbon? Picatsihqui, jiricatsi-hqui, xobojoma, chopanma, hisinai, sipo xoboho tsahotai jahuentian non mia jas-capia jisxon bi non mia hahxonamanihquin?⁴⁵ Jasca jaiboya tah hen jato yohitihi:

Man honannon tah hen mato yohihi. Nescapa pishcabo maton jisí, jahuama quescapahbo, jato hahxonyamaquin tah man hea rihbi hahxonamanihqui.

⁴⁶ Jato jascajaxon tah hen jato potas-catih, jascabijaquin casticanahbo sca janon. Heen siri jonibo tah hen queyoya-manox manati janin hiotihi.

Jesus rehteti shinanaibo

(Mr 14.1-2; Lc 22.1-2; Jn 11.45-53)

26 Jato jascajaquin haxemaquin queyoxon sca:

²—Hoqueha bahquish ta pascua fiesta hihyaxihquiqui. Man tah man honanscái. Jaa neten ta hea jihuin hueonxon rehtehabho hihxon hea bihmayaxih-canighqui —jahuen haxenicabo Jesusen jaquin.³ Jaatianbi ta Caifas janeya hapon xoboho sacerdote hapobo betan jaton hahbe hapobo tsinquinishqui. Caifas jaton yohuan hihbo copi jano tsin-quicani, yohuannoxon.⁴ Quexelon Jesus paranxon bihxon rehteti yohinanax, jeenihquinannancani.⁵ Fiesta naponbi tah bihtima qui. Jonibo sinayohuanax noque potacatsihcanmis hihcanni.

Jesus boshnashimahi haibo

(Mr 14.3-9; Jn 12.1-8)

⁶ Betania jema janin sca Jesus cahi, sipiya hihpahoni jonin xoboho nocoti, jahuen Jane cahen Simon, xobo hihbo.

⁷ Jato betan pihi tsahoti Jesus jaiya sca huesti haibo jahui. Hahan hininjatiya joxon, jahuen pomo quiha xenin Jesus boshnashimaquin. Hihti copi jahuen hininjati.⁸ Jesus machicai jisish, sinatax yohuancani:

—¿Jahua copi jaa jatihibi yohyoqui-hquin?⁹ Maromaxon ta hicha coriqui bi-hquehahniqui, jahuaborajomabo yana-pannoxon —hihcanni.¹⁰ Jaabo yohuani jai honanxon sca:

—¿Jahua copi man jaa haibo jatsan-jahin?¹¹ Hea ta sirijaquin hahxonaxqui.

¹¹ Jahuaborajomabo ta jascabi jatihiqui, man jato yanapannon. Hea tah man huetsatian jisyamascatih. ¹² Hea tsa-honahbo ta hea hininjahaxqui. ¹³ Nin-canahue hen mato yohinon: Jano heen joi siri nincacaibo janin jatihibi ta neato-hon hea hahxonai yohuanchaniyaxih-canihqui. Jaa copi ta jaa shinanbehnoya-mayaxihcanihqui —jato jaquin.

Judas betan bexohibo

(*Mr 14.10-11; Lc 22.3-6*)

¹⁴ Jaatian ta jahuen haxenica huesti picoti canishqui, Judas Iscariote. Sacerdote hapobo janin cahi. ¹⁵ Jato qui nocoxon: —¿Hen mato bihmanon jahua man hea hinantihin? —jato jaquin. Coriqui toponxon sca janacanquin, treinta libra jan bihnon. ¹⁶ Bichish, cahi. Caxon, jahuentian cahra bihmahah sirithiquin hihxon shinanquin.

Posen pihibo

(*Mr 14.12-25; Lc 22.7-23; Jn 13.21-30; 1 Co 11.23-26*)

¹⁷ Jaton fiesta nocotai neten sca, jahuen haxenicabo joxon Jesus yocaquin:

—¿Jahuerahnnonxon pinoxon non mia fiesta neten pitijaxontihin, Hihbon —hahcanquin.

¹⁸ —Hoa non honanai joni yohitan-nahue jema janin. Heen nete ta nea pish-cascaiqui. Miin xobohoxon tah hen heen haxenicabo betan fiesta pinoxihqui hih ta maestro jaiqui. Jascajatannahue.

¹⁹ Jesusen raanah sca, bocani. Jan yohiha quescajaxon janoxon fiesta neten pitijacanquin.

²⁰ Bepi sca jaiya jahuen haxenicabo betan janoxon piquin. ²¹ Piresscaiboya jato yohiquin:

—Man honannon hihxon tah hen mato yohihi: Nenohah ta huesti jaiqui, hea jato bihmaxihqui.

²² Hihti benatax sca tsoan jascajatihquin hihquish huesti huestibo yocacancani:

—¿Hea nan, Hihbon? —hihcandi.

²³ —Hehbetanbi nea quenti qui piti bichi joni ta hea bihmanica qui. ²⁴ Papan huishamani joi jai quesca ta no-quebaque janoxihqui. Hea jascajati jai bi ta hea bihmahi joni Hahrai hi-hyaxihqui. Jahuen papan jaa baque-jayamahah cahen siripan —jato jaquin.

²⁵ Jaa bihmanoxihqui hihxon Judasen sca yocaquin:

—¿Hea hin, Maestron?

—Mia rahan —Jesusen jaquin.

²⁶ Pihiboya sca posen bihxon, Papa yocaxon, tehcaxon, jato hinanxon:

—Bihnahue pinoxon. Nea ta heen yora qui —jato jaquin.

²⁷ Tason rihbi bihxon, Papa yocaxon, jato hinanrihbiquin:

—Nea xehanahue, jatihixonbi. ²⁸ Heen jimi tah qui. Jonibaan hohcha copijaquin tah hen heen jimi potaxihqui. Mahuaquin tah hen mato hahxonbahinai. Jaa shinanhahnhan xehati ta nea qui.

²⁹ Mato betan huetsapahaquin xehayah-nnoxon caman tah hen nea xehati hahyamascatih. Heen Papan jihue janin mato jihuemahi tian pari tah hen mato betan huetsapahaquin xehayaxihqui —jato jaquin.

Jesus qui Pedro paranahxihqui

(*Mr 14.26-31; Lc 22.31-34; Jn 13.36-38*)

³⁰ Pihax, behuahax, olivo janeya manan qui sca bocani. ³¹ Janoxon sca jato yohiquin:

—Nea yamebi tah man jatihibichin hea jenebahinnoxihi, Papan huishani joi jai quesca tah man jatihi. Carnero coirannica tah hen rehtexihqui, heen carnerobo potojahtannon hihqui jaa joi. ³² Jaabi tah hen hahquirihbi teehihquish Galilea main sca catih, mato rihbi man jano hea merahi canon —jato jaquin.

³³—Caibaan mia jathixonbi jenebahinai bi tah hen hean mia jeneticahi, hihbon —Pedronen jaquin.

³⁴—Quimisha coti hatapa queorihyamahi bi tah min nea yamebi heen joni hihtima min yohixihqui —Jesusen jaquin.

³⁵—Hea retehibaan bi tah hen miin joni hihti ma hen yohitimabirestihi —hahscaquein Pedronen. Jathixonbi sca jascajaribiquin.

Getsemani nahue chianxon Jesusen yocacai

(*Mr 14.32-42; Lc 22.39-46*)

³⁶ Getsemani janeya nahue chian sca becani, Jesus betan.

—Neno tsahopaqueuhue, Papa yocaqui hen hori canon —jato jaquin.

³⁷ Jato jascajaxon Pedroya Zebedeon baque rabe hori boquin. Jano sca Jesus hihti benati, hihti masa shinanquin.

³⁸—Mahuabena tah hen jai, hihti masa shinanquin. Nenoxonbi hea manahi banenahue, hea coirannoxxon.

³⁹ Jato jascabajahini cahax, hori pishca beho racaxon Papa yohiquin:

—Papan. Hea janoxihquibo jatimajahue, jatimajati hahtipahxon. Jaabi hea queenai quescayamahi bi mia queenai quesa janon hihmahue.

⁴⁰ Yocacax joxon sca hoxahiton jahuen haxenicabo meraquin.

—¿Huesti hora pishca hea mananoxon man hoxa teneti hahtipahyamahin?

⁴¹ Hoxa tenexon Papa yocanahue, tiroma yoshiman mato tiromamacatsihquin tanayamanon. Maton shinaman man teneti shinanai bi tah man hahan teneti coshi yamahi.

⁴² Jascacahini sca Papa yocaqui caribiki.

—Papan, hea janoxihquibo jatimajati yamahiya mia queenai quesa janon jahue —hahquin.

⁴³ Joxon sca, hoxahiton jato merarihbiquin. Jaton bero quextojaquetax hoxa hoxacani. ⁴⁴ Jato mohinaxma caribixon jahuen quimisha sca jascajaquin yocaribiquin. ⁴⁵ Joxon sca:

—¿Man hoxaparihin? ¿Tanti tanti pari man jain? Jisnahue. Hohchayah-pabaan bihnon bihmahi ta beresscancnihqui. ⁴⁶ Hueninahue. Caresscatanon benahue. Hea bihmahi jahui ta nea nocoscaiqui —Jesusen jato jaquin.

Jesus bichibo

(*Mr 14.43-50; Lc 22.47-53; Jn 18.2-11*)

⁴⁷ Jato yohiyabi jahuen haxenica huesti jahui, Judas. Hahbetan rihbi hicha becani, caibo machitoya, caibo chantiya. Sacerdote hapobaan raanah becani, judio hapobaan raanah becani. ⁴⁸ Jato betan joriyamaxon ca Judasen jato yohihab:

—Hen meraxon betsohahquin hicotanai joni tah qui. Hen betsohahquin hicotanai bihtannahue.

⁴⁹ Nocotax sca ponte res Jesus qui jahue, Min jascabi jayamahin hahxon, betsohahxon hicotanquin. Hicotanahbi:

⁵⁰—¿Jahuejahi min jahuin, amigon? —Jesusen jaa jaquin. Jaatian nihquirani joxon bihxon Jesus menexcanquin.

⁵¹ Jasca jaibaan bi huesti jahuen haxenication machito tsecaxon sacerdote hapon joni marequin bi cahnexon jahuen pabinqui paxtebahinquin.

⁵²—Miin machito bexojahue. Machitonen rehtenanaibo ta jahambi muhuatihiqui. ⁵³ ¿Heen Papa hean yocacah jan jahuen yonotibo sesenta mil raantihiqui min honanyamahin? ⁵⁴ Hea nescajayaxihquibo ta Papan huishani joi jaiqui. ¿Hen yocacaiya jenquetsahpax jan yohini quesa jatihiquin? —Jesusen jaa jaquin. ⁵⁵ Yahtannicabo sca yohiquin:

—¿Jahua copi man rehtemis joni yahtanquin hahcajahnin, machitoyaxon

chantiyaxon hea chibabenahin? Netetihibi Papan xoboho tsahoxon haxemahi bi tah man hea bihyamahipiqui.⁵⁶ Papan huishani joi jai quesca janon tah man nescajahi —hahquin jato.

Jaatianbi jahuen haxenicabo jatihibi jabacani. Jesus yahtanahbo jenebahini bocani.

Hapobo janin Jesus bohivo

(*Mr 14.53-65; Lc 22.54-55, 63-71; Jn 18.12-14, 19-24*)

⁵⁷ Menexxonsca sacerdote hapo Caifas janin Jesus bocanquin. Jaa xoboho jaton huisha hapobo jaton hanibo tsiniquiquihranscái.⁵⁸ Jano Jesus hiohiboya hocho sca jato chibandin Pedronen. Sacerdote hapon xoboho jaabo mapenon, jeman res Pedro nihnichi. Jaton sontaro tocan jano tsahoti, jahueja janoxihcanihquin hihquish manati.

⁵⁹ Chicho cahen sacerdote hapoboya texe judio hapobo yohuananci. Jaa copi rehteti janon hahqui yohuanai quesabo quenamacanquin.⁶⁰ Hicha quesabo janon mapetai bi jahua copi rehteti meraya-macanquin. Chini sca huetsa quesa rabe nocoti.

⁶¹ —Toa joni tah non yohuanai nin-caquipiqui. Papan xobo tah hen poto-jaquetanxon quimisha neten hahquiri-hbi jaa xahnen xobojati hahtipahi hih ta jaipishqui —hihcáni.

⁶² Jaton quiquin sacerdote sca huenicahinxon Jesus yocaquin:

—¿Min jahuabi yohiyamahin? ¿Jaabo mihqui yohuanai bi min jahuabi yohiti yamahin?

⁶³ Yocacah bi jahua hiyahamahi. Jahuabi yohiyamahiya, hapon yohirihbiquin:

—Quiquin Dioscoinyaxon tah hen mia hihti yohihi quesaxonma min yohicoin-non. ¿Mia min Diosen baque Cristo quin? Noque yohihue.

⁶⁴ —Min yohihi quesca rahán. Hashoan rihbi tah hen mato yohihi: Papan mecajaho jahuen quiquin hapo tsahotai tah man hea noquebaque jisyaxihqui. Nai cohiman jahui tah man hea jisyaxihqui —Jesusen jaquin sacerdote hapo.

⁶⁵ Nincaxon, jahuen coton huaxabahinxon, jato yohiquin:

—Dios qui ta tiromahi yohuanahqui. ¿Jahua hashoan non nincati pishinain? Jan tiromahi yohuanai tah man nincascái.⁶⁶ ¿Jahua shinan man Jain?

—Jan yohuanai copi non rehteti jai rahán —hahcanquin.

⁶⁷ Jahuen bemanan qui toshban-hahxon, copasxon beshrishquicanquin.

⁶⁸ Rishquixon yocacanquin:

—Yohihue, Criston. ¿Tsoan mia rishquihiquin?

Jaa tah hen honanyamahi hihqui Pedro

(*Mr 14.66-72; Lc 22.56-62; Jn 18.15-18, 25-27*)

⁶⁹ Jasca jaabo jai bi jemanhihti janin Pedro tsahoti. Jano tsahotaiton huesti haibaan joxon yohiquin:

—Mia rihbi tah min hoa Galilea mai meha Jesus betan nihrasahi.

⁷⁰ Jano jaibaan sca jatihxionbi nin-canon jahuen joni hihtima yohiscaquin:

—Min yohuanai tah hen honanyamabiressai —Pedronen jaquin.

⁷¹ Nichibo tocan mehax huetsa haibo rihbi joxon, Pedro jisquin sirijaxon, jato yohiquin:

—Nea coin ta Jesus Nazareno betan nihcachihiqui.

⁷² Hahquiri-hbi jahuen joni hihtima Pedronen yohiquin. Dios quenaxon:

—Jaa joni tah hen honanyamabiressai —hahquin.

⁷³ Basiyamahax janon nichibosca joxon:

—Hihcoini. Mia rihbi tah min jahuen haxenica qui. Min yohuanai tah non ho-

nanai. Janoha joni quescapah tah non mia nincacai —Pedro jacanquin.

⁷⁴Dios quenaxon, hihcoinyamahax hea muhuapahinon hihxon jascajaribiquin:

—Jaa joni tah hen honanyamabiresai —Pedronen jaquin. Jaatianbi sca hatapa queoti. ⁷⁵Jesusen yohiha joi shinanren-nenscaquin. Hatapa queorihyama jai bi tah min quimisha coti heen joni hihtima min yohixihqui. Jesus jascari yohuanah shinanax, picocahini cahax coshin huaohihscai.

Pilato janin Jesus bohibo

(Mr 15.1; Lc 23.1-2; Jn 18.28-32)

27 Xaba paquescaiya sca sacerdote hapobo betan judio hapobo tsinquirihbixon sesion hahxon sca Jesus rehteti yohicanquin jatihibichin. ²Menexrihbixon jaton gobernador janin sca Jesus hiocanquin Pilato janeya gobernador janin.

Judas retehihtai

³Jaan bimahah Jesus rehtenoxihqui-bohi jisxon, masa shinanaxon sca Judasen jahuen treinta coriqui hinanribi caxon, sacerdote hapoboya judio hapobo hinanribiquin.

⁴—Hochchajoma joni mato bimahi tah hen hohchatai —jato jaquin.

—¿Min jascahah bi jahueja non no-quen jatihin? Mianbi jise —hahcanquin.

⁵Papan xoboho jaa coriqui potaquin potojaquetanbahini Judas caresscai. Cahax risbipan tenexentax rontamehscai.

⁶Jahuen coriqui topihax sca sacerdote hapobo yohuani:

—Hahan muhuamati coriqui tah qui. Papa hinanti bohnanti qui tah non nante-timahi —hihcaci.

⁷Jaa copi ta jahanbi mai maroti yohi-nannishqui. Caxon sca huesti quentijanicatон mai maroncanquin, jano nauaboh mihihinti janon. ⁸Jaa copi ta jaa mai jimin

mai hahcanihqui, rahma caman. ⁹Jasca ta janishqui Papan joi yohinica Jeremiasnen yohini quescabi:

Joni ta jaatihi copitihqui hih Israelibo hapobo jaiya ta treinta coriqui bihcanihqui.

¹⁰Jahabi ta quentijanicatон mai maro-caniqui, heen hihbaan hea yohini quescabijaquin

hihqui Jeremiasnen huishani joi.

¹¹Jaatian gobernador bebon Jesus nichi. Jano hihuehahbo Gobernador yocacahti Jesus:

—¿Mia min judiobaan quiquin hapo quin? —hahquin.

—Min yohihi quescari rahau —hahquin Jesusen.

¹²Judio hapobo rihbi hahqui chani-hah bi Jesus jahuabi yohuanyamascai.

¹³Pilatonen sca yocarihbiquin:

—¿Mihqui hicha chanihibo min nin-cayamahin? —hahquin.

¹⁴Jabi ni huesti jaton joi qui Jesus yohuanyamahi. Jaa copi ta gobernador rahtenishqui.

Jesus rehteti yohihibo

(Mr 15.6-20; Lc 23.13-25; Jn 18.38-19.16)

¹⁵Jaa fiesta hahqui nocotai tihibi ta gobernadornen sipo xoboho tsahonniibo huesti jato picoxonpahonishqui, fiesta-jahibaan caisxon jaa jane yohihiya jaa jato picoxonquin. ¹⁶Jan jano tsahonni ta tiroma shinanya joni janishqui jati-hixonbi honanaibo. Jahuen jane cahen, Barabas. ¹⁷Fiestajahibo tsinquiaque-taiton sca Pilatonen jato yocauquin.

—¿Tsoa hen mato picoxonti man queenain? ¿Barabas nan? ¿Jesus, Cristo hahcaibo nan? —jato jaquin.

¹⁸Notsixon copi judiobaan Jesus hinanah ta Pilatonen honannishqui. Honanxon copi ta jonibo jascajaquin yocanishqui.

¹⁹ Janoxon joni ponteti sca Pilato tsa-hoscai. Jano tsahotai bi ta joni raanxon jahuen haibaan yohinishqui:

—Siri joni tah qui. Jahuabi jahua hahyamahue. Rahma jaya namaxon tah hen hihti masa shinanai.

²⁰ Jascajaquin jahuen haibaan Pilato yohinon bi ta judio hapobaan tsamaja-quetaibo nescajanishqui: Barrabas mato picoxonnon Jesus rehteti yocanahue, hahcanquin. ²¹ Quenataibo nincaxon sca gobernadoren jato yocaquin:

—¿Rabe jai bi jahuemeha hen mato pi-coxonti man queenain?

—Barrabas rahan —hihcani.

²² —¿Cristo hahcaibo Jesus cahran? Jaa hen jahuejati man queenain? —Pilatonen jato jaquin.

—Jihui qui hueonhue —hahcanquin jatihixonbi.

²³ —¿Jahua copi nan? ¿Jahua tioma janishquin? —jato jaquin.

Jato jascayah bi hashoan sca quenacani:

—Jihui hueonnue.

²⁴ Jan janu jahuabi hahyamahi bi hashoan sca corocanahibo jai jisxon, jeneya benahue jaax jaton jisnon bi mechoquiti.

—Jahuen jimi ta hehqui hueoyamahiqui. Mato quibi ta paquetihqui, jisnahue —jato jaquin.

²⁵ Tsinquiaquetaibo jatihibi sca nescari coshin yohuani:

—Noque qui jahuen jimi paquenon, noquen baquebo qui rihbi jahuen jimi paquenon —hihcani.

²⁶ Jaatian Barrabas jato picoxonxon, Jesus rishquihahbo jahuen sontarobo yohixon jato hinanquin jihui hueonahbo.

²⁷ Jahuen sontarobaan sca Jesus bi-hxon, gobernador xobo chicho hioxon, jaton hahbe sontarobo quenacanquin.

²⁸ Jahuen chopra potamaxon joshin co-

ton sca sahuemacanquin. ²⁹ Moxa maitijaxon, maimaxon, tahuwa xecomaxon, jaa bebon raboxonen nihxon hosan hosancanquin.

—Jee, judiobaan quiquin hapon —hahcanquin. ³⁰ Jascajaxon, hahqui toshbanhahxon, jahuen tahuwa bichinxon hahanbi mashrishquiquin. ³¹ Hosan hosanxon jaa joshin coton pecaxon jahuen coton sahuemaribixon, jihuin hueonnoxon sca Jesus bocanquin.

Jihuin hueonaibo

(*Mr 15.21-32; Lc 23.26-43; Jn 19.17-27*)

³² Jemama qui picoti caxon sca Simon janeya joni meracanquin, Cirene mai meha joni. Jaa jahuen coros hiamacanquin.

³³ Manan qui nococani, Golgota janeya manan. Golgota ta mapo xao manan hihcatsihquiqui. ³⁴ Xehati mocani xehanon hinanahbo bi tanahax queenyamahi.

³⁵ Jihui qui tasaxon rontanxon sca jahuen chopra metisahnoxon tsoan bi-hthiquin hihxon borasa qui macan bero nanexon chicohah, huetsa macan pari cainaiya huetsanbihnon, huetsa macan pari cainaiya huetsanbihquin.

³⁶ Coirani sca sontarobo tsahopaqueti.

³⁷ Jaa bochihori ta quirica hueoncan-nishqui, jaa copi rehteha joibo jano janon. Nea ta Jesus qui, Judiobaan quiquin hapo, hihqui jaa quirica.

³⁸ Yometso rabe rihbi sca tasaxon rontancanquin jaa senenbi. Ramiho huetsa, ramiho huetsa. ³⁹ Jano huinotaibaan ta hosan hosancannishqui, jaton mapo bose bosehihcanaxon.

⁴⁰ —Papan xobo fotojaquetanxon quimisha neten jaa xahnensahquirihbi xobojanica hihquish, janohax siri sca johue Papan baque hihquish, jaa jihui janinhax botoquihranhue —hahcanquin.

⁴¹ Sacerdote hapobo betan texe judio hapobaan ta jascajaquin rihbi hosancannishqui.

⁴² —Huetsabo jihuematica hahtipahxon bi ta hahri jihuematica hahtipahyamahiqui. Israelibaan quiquin hapo hihquish, jan coros janinhax botopaqueonon. Jaatian tah non nincacointihi. ⁴³ Papa Diosen baque hihqui ta shinannishqui. Queenxon, Papan jaa botonxon rohajascanon. Heatah hen Diosen baque qui jan jaipi hihca hen ja hisen —hihcani.

⁴⁴ Jascajaquin rihbi ta hahbe hueonahbaan hichaquin hosannishqui.

Jesus mahuati

(*Mr 15.33-41; Lc 23.44-49; Jn 19.28-30*)

⁴⁵ Barin manan tsahcahiya sca ta yamecahinnishqui, jatihibi mai janin. Nai pohapaque bari janon caman bahquishihpi. ⁴⁶ Bari nai pohapaquetaiya sca ta coshin bi res Jesus yohuannishqui:

—Elí Elí lama sabactani. Papan, Papan, ¿jahuia copi min hea jenebahinain? hihcatsihqui.

⁴⁷ Nincacax:

—Elías ta quenahiqui —hihcani jano nichibo.

⁴⁸ Huesti bishquihihcanahi caxon, taco quescapabihxon, xehati cachaqui maosahxon tahuia qui queonxon sananhihnixon xehamaquin. ⁴⁹ Caibaan sca:

—Jenehue. Jaa botoni Elías jotihiquin non tah non jiscatsihqui —hahcanquin.

⁵⁰ Hahquirihbi coshin bi res quenatax sca Jesus mahuati.

⁵¹ Jaatianbi ta Papan xoboho hahan chiqueti chopasontamehtai huaxacahinnishqui, bochiquihax naman caman, rabe teque sca janon. Mai rihbi ta mi-huannishqui. Macamahnhanbo rihbi ta caxquecahinnishqui. ⁵² Cristo hihquipish bi teehihribihi pecaho ta tsahonbo

rihbi quehpemehnishqui, neateman hi-hni Papan baquebo yorayabi teehihribi-hax huenihhnatax bocani. ⁵³ Jaabo ta jaa jema janin nichi bocannishqui, hihti caibaan jisnonbi.

⁵⁴ Jesus muhuataiya jascapa huinotai jisish ta jano coiranai sontaro capitán hihti raquenishqui, jahuen sontarobo rihbi hihti raqueti.

—Jaa ta Papan baque coin hihnishqui —hihcani.

⁵⁵ Hochoxon rihbi ta hichaxon hai-bobaan coiranxon jisnishqui. Jaabaan ta Galilea mai janinhax Jesus betan jahui haibobo janishqui, pitijaxonaibo.

⁵⁶ Huetsa ta María Magdalena janeya janishqui. Huetsa cahen María Jacobon mama, Josepan mama. Huetsa cahen Zebedeo baquebaan mama.

Jesus tsahonaibo

(*Mr 15.42-47; Lc 23.50-56; Jn 19.38-42*)

⁵⁷ Bepi sca Arimatea jema janinhax coriquiyahpa patoro jahui, José janeya. Jesusen haxemaha nincacoimni joni.

⁵⁸ Pilato janin caxon sca ¿Jesusen yora hean bihtimahin hahca, Pilatonen Bih-hue hahquin. ⁵⁹ Jahuin yora botonxon sca sabana pahtsacah siripan rahcoquin.

⁶⁰ Rahcoxon boxon, tsahomehyanoxon jano jan macan manan xanqueman po-quinipi janin mihinquin. Heen tsahonti janinbi tsahonpan hihxon jano Jesus mi-hinquin. Tsahon xehponoxon sca hihti-hosi macan taranbohanxon xehpoquin.

Macaman xehpobahini sca caresscái. ⁶¹ Jaa tsahon patax sca María Magdalena betan huetsa María manati tsahoti.

Tsahon coiranai sontarobo

⁶² Jaton tantiti nete janon jaa nete queyotaiya sca sacerdote hapobo betan fariseobo Pilato janin bocani.

⁶³ Nocoxon:

—Hapon, hoa paranmis bihyamaparixon tah non yohuanai nincaquip-

iqui. Jaa tah non rahma shinanai. Quimisha neten hihquipish tah hen tee-hihribiyaxihqui hih ta jaipishqui.⁶⁴ Jaa copi yohihue, jahuen quimisha neten caman jahuen tsahon coiranahbo. Jone-tax jahuen yora yometsohtax teehihri-bhi ta jaipishqui — hih jahuen haxenicabo jamis, jonibo parani. Jascajaquin paranah ta jan jato paranmenopahoni mentan hashoan tiroma jatihiqui — Pilato jacanquin.

⁶⁵—Hoa cahisen, sontarobo. Jato boxon, man honanai quescajaquin jato coiranmatannahue —jato jaquin.⁶⁶ Caxon sca, hahan xehpoti macan boyacanquin. Boyaxon honantijaxon coiranahbo sontarobo quenimacanquin.

Jesus teehihqui

(*Mr 16.1-8; Lc 24.1-12; Jn 20.1-10*)

28 Jascahipibo pecaho jaton tan-titi nete huino sca jaipi quen xaba paqueti hochoma sca María Magdalena betan huetsa María cahi, tsahon jisi.² Cahiboyabi naihoh quehax Papan yonoti huesti botopaqueti jahuiya coshin bi res mai mihuani. Botopaquexon han-xehpoti macamahnhan taranbo-hanax jaa cahtsahoscai.³ Jahuen yora cana bacahi quesvari xabati. Jahuen chopas cahen joxo bi res joxo.⁴ Jaa jisish ca hihti raquetax tastahihcan-hax sontarobo racareneni muhataibo quescapahax.⁵ Haibobo nocotaysi:

—Raqueyamanahue. Rehtepibo Jesus benahi man jahui tah hen honani.⁶ Nenoma ta qui. Jan yohipi quesvari ta teehihribihaxqui. Jano racanipibo jahuen tsahon jisi benahue.⁷ Histon caxon sca jahuen haxenicabo yohitan-nahue. Hihquipish bi ta hahquiribi teehi-hquisti. Mato bebohi ta Galilea main cahiqui. Jano tah man jaa jisi catihi. Mato tah hen yohiscai, jato jascajaquin yohitannahue —Papan yonotinin jato jaquin.

⁸ Histon sca bocani. Tsahon janinhax hishtocanahi cahi, raqueya jenima-hax jahuen haxenicabo yohihi bocani.⁹ Cahitonbi jato behchihi Jesus jahui.

—¿Man jascabi jayamahin? —jato jaquin. Jato jascalah bi pontecahini caxon jaa bebon betihihpaquexon taxecocanquin.

¹⁰—Raqueyamanahue. Galilea main bohábo heen huetsabo yohitannahue. Jano ta hea jisyaxihcanihqui.

Yohihi sontarobo bocani

¹¹ Jato yohihi haibobo bohiboyabi sca tsahon janinhax sontarobo rihbi bocani. Jeman caxon rahma huinotah jatihibi sacerdote hapobo yohicanquin.¹² Ju-diobaan hapobo betan tsinquixon sca jahueja sca non jatihin hihquish yohinanxon sontarobo hicha coriqui hinan-canquin.¹³ Coriqui hinanxon:

—Non yame hoxahiya ta jahuen haxenicabo joxon jahuen yora bichincanaxqui hihnahue.¹⁴ Man jascari yohuani jai chanihah noquen gobernador sinataiya tah non jaa rihbi raejatihi, mato jahuejayamanon —sontarobo jacanquin sacerdoteaan.

¹⁵ Jaa coriqui bichish sca jascari yohuani bocani, sacerdoteaan yohihah quesvari. Jascari yohuannihbo copi ta rahma caman jatihibi Judea mai janin jascari yohuanchanicaniqui.

Jahuen raantibo Jesusen raanai

(*Mr 16.14-18; Lc 24.36-49; Jn 20.19-23*)

¹⁶ Galilea main sca ta jahuen haxenicabo bocanishqui, once joni. Jano nocoyaxahnahue Jesusen jato yohipi manan janin nococani.¹⁷ Jano Jesus meraxon, hahqui raboxonen tisquihah-paquehcanquin. Jesus tah qui hih caibo janon bi jaa hin Hen tah hen honan-coinyamahi hih caibo jaribishi.¹⁸ Jato qui joxon sca:

—Papan ta hea jatihibi hihbomas-caiqui, naiho jai jatihibi, main jaibo jatihibi rihbi.¹⁹ Jaa copi jatihibi mai janin caxon janoo jaibo haxemattannahue. Heen Papan janen, jahuen baquen janen rihbi, jahuen yoshin siripan janen

rihbi jato nashimatannahue, heen ji-huetahbo.²⁰ Jascajanahue hahquin hen mato yohipahoni joibo jatihibi jato haxemanahue, jascajahabo. Nete queyonon caman hen mato betan jascabihi jayaxi-hqui honannahue.

MARCOS

Marcosnen huishani joi siri

Juan cahchiho yohuani cahi

(Mt 3.1-12; Lc 3.1-9, 15-17; Jn 1.19-28)

1 Papan baque Jesucristo joi siri ta nescari pehocohnishqui. ²Papan joi yohinica Isaiasnen pari ta nescajaquin huishanishqui:

Jise. Mia bahixonnon hihxon tah hen heen joi yohinica pari raanai.

³Jaa ta cahchiho janoo tsoa jihueyamahiton nichish coshin yohuanyaxihquiqui: Bahixonnahue jahan hihbo jonon. Jahuen bahi najisti chaibo hahxonnahue hih ta jaa jayaxihquiqui

hihqui Isaiasnen huishani joi.

⁴Isaiasnen yohini quescajaquin nashimahi ta Juan cahchiho janoo tsoa jihueyamahiton canishqui. Cahax coshin yohuani:

—Papan maton hohcha sohuanon maton shinan pontenahue hen mato nashimanon —hahquin. ⁵Jascajahiya ta Judea mai mehabo, Jerusalen jema janinhahbo rihbi Juan qui bocannishqui jatihibi. Jaton hohcha Papa Dios yohihiya cahen Juaman jato nashimaquin Jordan huean janinxon. ⁶Juaman ta camello rani chopaa sahuepahonishqui. Bichi cinturonen chinexehti. Champo pipahoni. Bona jaene rihbi xehapahoni.

⁷—Hehchon ta hea mentan hashoan shinanya noque joyaxihquiqui. Jaa hihi siri copi tah hen chiquerehue tsahopaquexon jahuen sapato risbi pecaxonti betan hea senenyamahi. ⁸Hean hen mato jenen nashimahi bi ta jahuen jonibo man jai honanahbo hihxon Papan mato jahuen Yoshin hinanyaxihquiqui, nashimaquin hahcajaquin hicha hinanquin —Juaman jato jaquin.

Juaman Jesus nashimahi

(Mt 3.13-17; Lc 3.21-22)

⁹Jascascaiya Galilea mai meha Nazaret jema janinhax Jesus jahui. Jahuiya ta Juaman jaa nashimanishqui Jordan huean janinxon. ¹⁰Nashimaha cahen jene janinhax mapexon nai huiso quehpemehtai Jesusen jisquin. Dios Yoshin nobex quescapah hahqui botopaqetai jisquin.

¹¹Jaatian:

—Mia tah min hen hihti queenai heen baque qui. Mihon ta hen jenimahi —hihqui naihoh quehax yohuanai joi.

Yoshiman Jesus tanahi

(Mt 4.1-11; Lc 4.1-13)

¹²Jaa pecaho ta Dios Yoshiman Jesus cahchiho camanishqui. ¹³Cuarenta neten cahchiho Jesus nichii yohinahbo tocan. Jano nichiton ta Satanasnen hohchamacatsihquin tananishqui. Papan yonotibaan sca ta Jesus pimanishqui.

Galilea janin Jesus teemenohi

(Mt 4.12-17; Lc 4.14-15)

¹⁴Jaatian sca Juan sipojahipibo pecaho sca Jesus caribibi Galilea main. Papan joi siri yohibonahi cahi.

¹⁵—Papan mato hahxonti nete ta nocosciiqui. Papan jihuemahi joti ta nea pishea sca jaonahiqui. Maton shinan pontenahue. Papan joi siri bihcoinnahue —jato jaquin.

Yapa bihnicahbo Jesusen caisai

(Mt 4.18-22; Lc 5.1-11)

¹⁶Galilea hian quexa sca quetanbonahi cahi. Caquin bi Simon jahuen huetsa Andres betan jisbonaquin. Tarraga potahiton jato jisbonaquin, yapa bihnica rabe.

¹⁷—Hehbe bonahue, joni hionica sca hen mato hihmanon —jato jaquin.

¹⁸ Jascaha jaton tarrafa potabahini sca hahbe bocani.

¹⁹ Jaatian caribiquin bi Zebedeon baque Jacobo jisbonaquin. Jahuen huetsa Juan betan nontinxon jaton tarrafa honahiton jisbonaquin. ²⁰ Jisxon jato quenaquin. Quenaha jahuen jonibo betan jaton papa nontinbi banenon Jesus betan sca bocani.

Tiroma yoshinyahpa

(Lc 4.31-37)

²¹ Capernaum jema janin sca nococani. Tantiti neten sca haho tsinquitxi xoboho hihcoxon Jesusen jato haxemaquin. ²² Haxemaha rahtecani. Huishani honanbaan haxemahi quescajaquinma bi hapon hahcai quescajaquin jato haxemaha ta rahtecannishqui. ²³ Jaa xoboho rihbi cahen tiroma yoshinyahpa joni huesti jai. Jaan cahen joi coshin yocaquin:

²⁴ —¿Min noque jahuejatin, Nazaret janinha Jesusen? ¿Min noque queyohi jahuin? Min tsoa quin hen ta hen honanai. Diosen raanai tah min qui —hahquin yoshiman.

²⁵ Jesusen sca jaa yohiquin:

—Netetax jahuen yora janinhax pico-hue —hahquin. ²⁶ Jan jascaha jaa joni tastahihmahax sai saihiquish tiroma yoshin picoti. ²⁷ Jatihibi sca rahtetax yocacahanani:

—Teeee, jahua joni hin? Honanmati joi behna tah qui. Hapon hahcai quescajaquin ta haxemahiqui. Yoshin tiromabo ta yohihiqui. Jaan catanhue hahca ta bo-canihqui —hihcanci.

²⁸ Janohax cahen histon bi res Jesus qui yohuanscacani Galilea mai jatihibi janinhahbo.

Simoman haita Jesusen rohajahi

(Mt 8.14-15; Lc 4.38-39)

²⁹ Jaatian sca haho tsinquitxi xobohoh quehax cainax Andres betan Simo-

man xoboho hihcocani Jesus, Jacobo, Juan. ³⁰ Simoman haita cahen yonatax racati. Jesus yohiscacanquin, Jaa ta hisiniqui, hahquin. ³¹ Yohihahbo met-sontanxon hueniquin. Huenihah rohacahinxon jato pimascaquin.

Hisinaibo Jesusen hicha rohajahi

(Mt 8.16-17; Lc 4.40-41)

³² Jaa bepi bari hihquiscaya sca ta hisinyahpabo, tiroma yoshinyahpabo ri-hibi jato jatihibi Jesus qui hiocannishqui.

³³ Jaa jema janinhahbo jatihibi Jesus janin xehqui patax tsamajaqueti. ³⁴ Jano cahen mesco hisinyahpabo Jesusen rohajquin hihti caibo. Hicha tiroma yoshinbo rihbi netemaxon picoquin. Jaa honanaibo copi jato netemaquin.

Galilea main caxon Jesusen haxemahi

(Lc 4.42-44)

³⁵ Mohiyahtax hihari sca xaba pa-queri jaima huenitax Jesus cahi jan tsoabi yamahiton. Janoxon sca jahuen Papa yocaquin. ³⁶ Jaatian sca Simon, jaabo, Jesus benahi cahi. ³⁷ Meraxon yohicanquin:

—Jatihixonbi ta mia benacaniqui —hahcanquin.

³⁸ —Huetsa jemabo janin sca canon bonahue, janohahbo Papan joi yohinon. Jaa copi tah hen jahuequi —jato jaquin.

³⁹ Jato jascahax Galilea janin sca Jesus nihnihi jatihibinco. Haho tsinquitxi xobohoxon Papan joi yohibonahi cahi. Tiroma yoshinbo rihbi picoquin.

Sipiyah rohajahi

(Mt 8.1-4; Lc 5.12-16)

⁴⁰ Jaatian cahen huesti sipiyahpa joni Jesus qui joxon hihti yocaquin. Raboxonen tisquihapauquexon yocaquin:

—Queenxon ta mian hea rohajatihi —hahquin.

⁴¹ Jahan hihti shinanxon mehanc-ahinxon mehexon Jesusen sca yohiquin:

—Queen tah hen jai. Rohaschue —hahquin.

⁴² Jan jascahah hisinyamascai, rohas-cai.

⁴³ Jaatianbi jaa catannon sca Je-susen hihti yohiquin:

⁴⁴ —Tsoabi yohihaxma sacerdote qui catanhue, min rohascrai jismahi. Min ro-hahi copi Moisesnir yohini hinanti hinantahue min rohascrai honanahbo —hahquin.

⁴⁵ Jesusen jascahah bi cahi. Jan rohas-crai yohibonahi cahi. Yohibonahiya ca-hen jema janin jahuibo hichahiya jeman-catii Jesusen hahtipahyamascaquin, jaa yocacatsihquibo hichahiya. Hueneman res cahi. Jatihibi janinhax sca Jesus qui bocani.

Yora honanyamajaquetai rohajahi

(Mt 9.1-8; Lc 5.17-26)

2 Huetsa neten sca cahen Capernaum janin hahquiriribi Jesus nocoti cahi. Jahuen xobon jaa nocoscrai cahen nin-cacanquin janohahbaan. ²Hicha joni tsamajaquetaiya cahen xobo senenya-mascai, xehqui pataxbi jahuensi nihc-ahuantimahi. Jaan ca Papan joi jato yohiquin. ³Jahuensi yora honanyamaja-quetai joni sca hihuehi becami, chosco joni. ⁴Joni tsamajaquetaiboya Jesus pataxti hahtipahyamaxon Jesus mahchi xobo pemacanya tsecaquin. Quinijaxon jahuensi cacajatiyabi jaa joni botonpaque-canquin. Yora honanyamajaquetai joni hahan racatai bi botonpaquecanquin. ⁵Rohajatihi shinancoinaibo jisxon yora honanyamajaquetai joni sca Jesusen yohiquin:

—Miin hohcha ta sohuá scah qui, baquen —hahquin.

⁶ Jano rihbi cahen jaton jointinin shi-nani tsahocani huishani joi honanbo.

⁷ —¿Jahua jenquetsahin nea jonin jascajaquin yohihiquin? Tiromahi ta

yohuanihqui. Papa huestichin ta ho-hcha sohuati hahtipahiqui —hihcanni ja-ton jointinin.

⁸ Jaton jointinin jascajaquin shinanai-boya jahuen shinaman honanscaxon Je-susen jato yohiquin:

—¿Jahua jenquetsahin man jascajaquin shinanain maton jointinin? ⁹ ¿Jahue meha joi nea yora honanyamajaquetai joni yohiti hashoan teema quin? ¿Miin hohcha ta sohuá scah qui hihqui nan? ¿Huenihue, miin cacajati bichish caresscatanhue hihqui nan? ¿Jahue meha hashoan yohiti teema quin nan? ¹⁰Nai nequebihoxon hohcha sohuati hihbo hea jai man honannon hihxon tah hen nea sca yohihi —jato jaxon yora honanyamajaquetai joni sca yohiquin:

¹¹ —Mia ta hen yohihi. Huenihue. Miin cacajati bichish miin xobon caresscatanhue —hahquin. ¹²Yohihah huenixon jahuen cacajati bichish res sca jaton jisnonbi caini. Jatihixonbi jisish rahtetax siripi Papa qui yohuancani:

—Jahuentianbi tah non jascajahi jisyamaniqui —hihcanni.

Leví Jesusen quenahi

(Mt 9.9-13; Lc 5.27-32)

¹³ Hian quexa sca cahen Jesus caribibi. Jatihibi jonibo hahqui tsamajaqueti, jaan jato haxemanon. ¹⁴Jano huino-quin bi Leví sca meraquin Alfeonen baque. Janoxon coriqui cobranti janin hapobaana cobranxoni tsahotai mer-aquin. Meraxon:

—Hehbe cahue —hahquin. Jan jasca-hah huenicahuanax hahbetan cahi.

¹⁵ Pihi benahue hahca Levin xoboho sca jahuen haxenicaboyabi Jesus cahi. Jesus betan hicha joni bocani. Noco-tax pihi tsahoti hicha cobranxonaiboya hicha hohchayahpbabo rihbi janos tsahoti. ¹⁶Hohchayahpbabo cobranxonaiboya betan Jesusen pihi jisxon huishani joi

honan fariseobaan jahuen haxenicabo yocacanquin:

—¿Jahuejanoxon cobranxonai boyahohchayahpabo betan pihiquin? —hahcanquin.

¹⁷ Jascajaquin yocacaibo nincaxon Jeesusen jato yohiquin:

—Hisinjomabo pishinaima bi ta hisinyahpabo rahonica pishinihqui. Hohchajoma jonibo quenahima bi tah hen hohchayahpabo quenahie joniqui —jato jaquin.

Non piti tenetimahin hihquibo

(Mt 9.14-17; Lc 5.33-39)

¹⁸ Jaatian sca cahen Juaman haxematibaan piti tenenish. Fariseobaan rihbi piti tenequin. Jesus qui caxon fariseobaan Jesus yocaquin:

—¿Jahua jenquetsahin Juaman haxenicabaan piti tenenon fariseobaan haxenicabaan rihbi tenehi bi minabaan piti teneyamahihqui? —hahcanquin.

¹⁹ Jesusen jato yohiquin:

—¿Jato betan huanohi joni hihparihiya huanoquin quenamahibaan piti tenethiquin? Jato betan huanohi joni hihparihiya ta piti tenetimahihqui.

²⁰ Huetsatian ta jatoma qui huanohi joni hionyaxihcanihqui. Jaatian pari ta piti teneyaxihcanihqui quenamahibaan.

²¹ Tsoanbi ta hotsinica chopan chopayohonayamahihqui. Jascajaquin honahah ta hona teresihqui hashoan huaxascai. ²² Tsoan rihbi ta hompa rahma nehsehihqui bichi borasa xeni qui mahneyamahihqui. Jascahah ta hompa pohtoshihmatihiqui, xehati yohyocohnon borasa rihbi masascanon. Hompa rahma nehsehihqui ta borasa behna qui mahneti qui —hahquin Jesusen.

Tantiti neten bimi bihbonahi

(Mt 12.1-8; Lc 6.1-5)

²³ Huesti tantiti neten sca cahen trigo huai nabebacahini cahi. Hahbetan caquin jahuen haxenicabaan trigo bimi tesabonaquin. ²⁴ Fariseobaan sca Jesus yohiquin:

—Jise. ¿Jahua jenquetsahin jaabaan jascajahiquin, tantiti neten jascajatima joi jai bi? —hahcanquin.

²⁵ Jascalahbo jato yohiquin:

—¿Jahua pitimahiya hahbe cahibo rihbi pihan hihquiya jaa rihbi pihan hihxon Davidinin hahni man jisyamaniquin huishani joi janin? ²⁶ Abiatar sacerdotebaan hapo hihqui tian ta Papuan xoboho David hihconishqui. Jaa paan sacerdotebaan res piti que bi jaan piquin. Jahuen jonibo rihbi piquihquin —jato jaquin.

²⁷ Jato jascajaxon yohirihbiquin:

—Tantiti nete copi joni jaima bi ta joni copi tantiti nete jaiqui. ²⁸ Jaa copi ta hea noque baque tantiti nete hihbo qui —jato jaquin.

Meyosma

(Mt 12.9-14; Lc 6.6-11)

3 Jaton haho tsinquit xoboho cahen Jesus hihcorihbih. Meyosmahi noque jano rihbi jai. ² Jesus jisquin sirijascacanquin.

—Rohaja ra ta jatihiqui tantiti neten hihqui bi —hixon jiscanquin jaya yohuanti janoxon cahecatsihquin.

³ Jesusen sca meyosmahi yohiquin:

—Noque tocanbi johue —hahquin.

⁴ Jascajaxon tsahotaibo yocaquin:

—¿Tantiti neten sirijati joi jaiquin? ¿Masajati joi jaiquin? ¿Teehiahmati joi jaiquin? ¿Rehteti joi jaiquin? —jan jascalahah bi jahua hihyamacani. ⁵ Benaya bi sinaxon sca Jesusen jato bejispaquequin. Jointi chahomayabo copi benati. Meyosmahi sca yohiquin:

—Miin mequen sanahihnihue —hahquin. Sanahihnihax rohascái.
⁶ Jaa rohajahijisish cainax herodianobo betan sca fariseobo hahqui yohuancani:

—¿Jenquetsahaxon non Jesus mahuamatihin? —hihcáni yohuani.

Hian quexa tsamajaquetaibo

⁷ Hian janin sca jahuen haxenicabo betan Jesus caresscái. Hahchon bocani hicha jonibo tsama bi res. Galilea mai mehax, Judea mai mehax. ⁸ Jerusalen janinhax, Idumea janinhax, Jordan hoque quexa quehax, Tiro janinbohax, Sidon janinbohax. Tsama bi res hahqui cahax tsamajaqueti. Jatihibi jan hahcaibo nincacax tsamajaqueti hashoan nincacatsihqui. ⁹ Main tsamajaquetaibo hahqui tsehquesihquiboya jahuen haxenicabo sca yohiquin:

—Nonti jistannahue non hahan canon —hahquin. ¹⁰ Jan hicha rohajahipi copi hisinyahpabaan jatihixonbi Jesus meh-ecatsihquish hahqui tsamajaqueta tax tse-hquesihqui. ¹¹ Yoshin tiromabaan rihbi Jesus jisish hahqui betihipaquetax joi coshin yohuani:

—Mia tah min Diosen baque qui —hihcáni. ¹² Jonibaan yoshin jascari yohuanai nincayamanon hihxon, jato hiti yohiquin:

—Yohuanyamanahue —hahquin.

Jahuen doce raantibo Jesusen caisai

(Mt 10.1-4; Lc 6.12-16)

¹³ Mananahbo sca cahi. Caxon jan cai-saibo quenaquin. Quenahah hahqui bo-cani. ¹⁴ Doce joni cahen caisquin, hah-be-tan nihnon. Papan joi yohinicabo ra-an-noxon jato caisquin. ¹⁵ Tiroma yoshin potati hihbobo hihnon jato caisquin.

¹⁶ Huetsa cahen Simon. Jaa cahen Pedro janequin. ¹⁷ Huetsa cahen Jacobo, Zebe-deon baque. Huetsa cahen Juan Jacobo-nen huetsa. Jabo rabe Jesusen Boan-

erges janequin. Boanerges cahen teren-hihca baquebo hihcatsihqui. ¹⁸ Huetsa cahen Andres, huetsa cahen Felipe, huetsa cahen Bartolomé, huetsa cahen Mateo, huetsa cahen Tomas, huetsa cahen Alfeon baque Jacobo, huetsa cahen Tadeo, huetsa cahen Simon Celador, ¹⁹ huetsa cahen Judas Iscariote, Jesus bihmanica. Jaa rahsi caisquin, doce joni.

Mia tah min Satanás coshiyah qui hihquibo

(Mt 12.22-32; Lc 11.14-23; 12.10)

²⁰ Xobon sca Jesus cahi. Hahquirihbi tsamajaquetaiboya piti hahtipahyamas-caquin. ²¹ Jascascai nincacax jaa bichi sca jahuen jenabo cahi.

—Tehquehiah sca ta jaiqui —hihxon jaa bichi bocani. ²² Jerusalen janinhax jahuex huishani joi honanbo rihbi yohuani:

—Tiroma yoshin hapon yanapana ta tiroma yoshin picohihqui. Beelcebunen ta jaa hihbojascaiqui —hihcáni.

²³ Jascahiton:

—Benahue —jato jaquin. Jahuiboya sca jaa patax queha joibo sca jato yohiquin:

—¿Jenquetsahaxon Satanásnen Satanás picotihiquin? ²⁴ Huesti mai mehax jaabo rahsibi rehtenananax ta queyoscatihiqui. ²⁵ Huesti xobo mehabo jaabo rahsibi rehtenananax ta jaabo queyoscatihiqui. ²⁶ Satanás hahbe Satanás betan retehahax cahen jaabo queyoscaan, hahri queyocani. ²⁷ Coshi joni xoboho ta tsoabi yometsohti hihcoti hahtipahyamahiqui, hihbo nexayamahax. Hihbo nexaxon pari ta jahuen jahuaborabo bichintihiqui, jatihibi queyobahinnoxon. ²⁸ Yohicoin ta hen mato jai: jatihibi hohcha ta jahue hohcha. ²⁹ Jascapahbo sohuaxon bi ta Dios Yoshin qui tiromahi yohuanaibo Papan

jahuentianbi sohuatimahiqui. Jascapa hohcha ta jascabihi sca banetihiqui —jato jaquin.

³⁰ Jaa ta tiroma yoshinyahpa qui jaabo jai copi cahen jato jascajaquin.

Jesusen mama betan jahuen huetsabo

(Mt 12.46-50; Lc 8.19-21)

³¹ Jahuen mama betan jahuen huetsabo sca nocoti. Jemanhihti janin nihxon Jesus quenamacanquin. ³² Tsamajaqueta tax tsahotaibaan sca yohixonquin:

—Miin mamaya miin huetsabo ta jeman qui. Mia ta quenamacanqui —hahcanquin.

³³ Jaan sca joi bichinquin:

—¿Tsoa heen mama quin? ¿Tsoa heen huetsabo quin? —hahquin. ³⁴ Tsahohah-tancahuanaibo bejispaquexon sca:

—Neabo ta heen mama heen huetsabo qui. ³⁵ Papa queenai quescajanicahbo ta heen huetsa, heen choca, heen mama qui —jato jaquin.

Mihsahahnica

(Mt 13.1-9; Lc 8.4-8)

4 Jaatian sca cahen hian quexaxon Jesusen jato haxemaribiquin. Hicha joni hahqui tsamajaquetaiya nontin nanetax tsahoti tsamajaquetaibo hian quexa banenon. ² Janoxon sca hicha jaa patax queha joi jato haxemaquin.

³ —Nincanahue. Mihsahahnicahton cahen jahuen bimi bero mihsahahbonahi cahan. ⁴ Jan mihsahahca can caibo bero bahinbi paqueti. Jano paquetaibo topibonahi sca hihsabo cahi queyobonahi. ⁵ Mai chahoma janin caibo rihbi paqueti. Hihquiyamahax histon joconi. ⁶ Joconai bi barin hahca hashoan xanahax jahuen tapon chicho cayamahax pehuahax res sca xanahi. ⁷ Moxa tocan rihbi caibo bero paqueti. Moxa pari hanixon rishquihah bimi yamahi. ⁸ Mai siri janin rihbi caibo

paqueti. Hanihax bimihi siripi. Jaa bero hanihax bimihi caibo quiha treinta bero, caibo quiha sesenta bero, caibo quiha cien bero sca jai. ⁹ Hahan nincati pabinquiyahpaxon nincanahue —jato jaquin.

Jaa patax joi jan haxemahi

(Mt 13.10-17; Lc 8.9-10)

¹⁰ Tsamajaquetai jonibo boresscaya Jesus qui banejaqueta tax jahuen doce jaabo yocacahcami. Jan yohiha jaa patax queha joibo honancoincatsihqui yocacahcami. ¹¹ Yocaca jato yohiquin:

—Papan jihuemahi jone joi mato honanmaxon tah hen jaa patax queha joi rahsi jaabo nincamahi nincayosmabo quen. ¹² Jis jisxon bi jisyamahabo, ninca nincaxon bi nincayamahahbo, jaton shinan pontehax jaton hohcha yamamis hixhon nincayamahibo copi tah hen jaa patax queha joi rahsi jato nincamahi —jato jaquin.

Mihsahahnica joi Jesusen honanmahi

(Mt 13.18-23; Lc 8.11-15)

¹³ Jato jascajaxon Jesusen yocaquin:

—¿Hen rahma yohiha jaa patax queha joi man honanyamahin? ¿Jenquetsahaxon sca man jatihibi jaa patax queha joi honantihin?

¹⁴ Bero mihsahahquin hahcajaquin ta mihsahahnicahton joi yohibonahihqui.

¹⁵ Bahinxon nincacaibo ta nescapah qui. Yohibonahi joi nincacaibaan bi ta Satanas joresscaxon jaa joi jato bichiniqui. ¹⁶ Jascajaquin rihbi ta mai chahoma janinxon joi nincamaha jenimarenenscakaniqui. Nincacoinax, jenimacani.

¹⁷ Jenimahax bi jaton tapon chicho cayamahax quescaxon basimaxon jenescacanquin. Jaa joi jaiton caibaan jato hosan hosana jenescacanquin. Nincacaibo copi caibaan tiromajacatsihquin chibana jenescacanquin. ¹⁸ Caibo rihbi ta

yohibonahi joi moxa tocanaxon nincacaibo qui. ¹⁹ Jahuen teebo jan shinanai ta moxa quesca qui. Coriquiyahpati shinanax paramehti, jahubaborabo jan hashoan queenyorahi rihbi ta moxa quesca qui. Jaan rishquihah bimiyamascai. ²⁰ Mai siri janin joi nincamaha ta nincacoinnicabo qui. Bimihi siripi. Huesti bero joconax caichi, caibo quiha treinta, caibo quiha sesenta, caibo quiha cien bero —jato jaquin.

Johue

(Lc 8.16-18)

²¹ Jaatian sca jato yocaquin:
—¿Jahuejahi non johueyapha chiqueho jotihin? ¿Quenti behonbohana naman tsahonih nan? ¿Jano hoxati tapo naman tsahonih nan? ¿Jano johue tsahonti janin tsahoni non jaaya joyamahin? ²² Yohiyamayaxihqui jone joi ta yama qui. Joneha jismayamayaxi-hquibo yamarahbihi. ²³ Hahan nincati pabinquiyahpaxon nincanahue. ²⁴ Man nincacai nincaquin sirijanahue. Man hinannoxon toponaithi ta jatifi rihbi mato hinantihiqui. Hashoan rihbi sca ta mato hinantihiqui. ²⁵ Jaibo bi ta hashoan jaan hinantihiqui. Yamahibo bi ta jaabo jai pishca jato bichintihiqui —jato jaquin.

Bero joconai

²⁶ Jascajaxon jato yohirihbiquin:
—Papan jihuemahi ta nescapah qui. Huesti jonin cahen bimi bero main mihsahahbonahan. ²⁷ Hoxashinahax mohiyahtax, jasca jan hicha neten jaiya, jan mihsahahbonahip bero joconscaax hanihi. Jenquetsahax hanihiquin jaan honanyamaquin. ²⁸ Main joconai ta hahmebi bimihihqui. Pehi pari caini, bimihax res sca bero caniscai. ²⁹ Canihiton ta tsinquiscanoxon xatebonacaniqui —jato jaquin.

Moxo bero

(Mt 13.31-32; Lc 13.18-19)

³⁰ Jascajaxon jato yohirihbiquin:

—¿Papan jihuemahi ta nescapah qui hihxon non jahua yohuan jatihin? ¿Jahua jaa patax queha joi non jatihin, Papan jihuemahi joi nincamanoxon? ³¹ Papan jihuemahi ta moxo bero quescapah qui. Main banahah bi ta jatihibi jihui bero mentan moxo bero hashoan hexti romishin qui. ³² Jascapah cahen banahipi joconi. Hanihi. Jatihibi banabo mentan hashoan hanihi. Hihihos i mebihi, hotahi joxon hihsabaan sca jan nahajanon —jato jaquin.

Jaa patax queha joi haxemahi

(Mt 13.34-35)

³³ Jascajaquin hicha jaa patax queha joi yohixon Papan joi jato nincamaquin jaabaan nincati hahtipahi tihi. ³⁴ Jaa patax queha joi rahsi jato yohiquin. Huetsa jonibo jato betan hihiyamascaia cahen jahuen haxenicabo rahsi jatihibi yohiquin sirijascaquin.

Nihueyabi behchon Jesusen tantijahi

(Mt 8.23-27; Lc 8.22-25)

³⁵ Jaa neten bari hihquiscaia cahen jahuen haxenicabo yohiquin:

—Hoque quexa pohquejaqueti bonahue —hahquin. ³⁶ Tsamajaquetaibo jenebahinax res sca hahan jan tsahotai nontin Jesusyabi pohquejaquecani. Huetsa nontibo rihbi hahchon pohquejaqueti. ³⁷ Nihuehnhan sca jahui. Behchoman nonti tsahcaquin. Nonti qui nachicohti jene bochonon. ³⁸ Jascarai bi Jesus nonti chishqui quiri hoxahi. Nonti tsahotinin racatax tepitinin tepihax hoxahi. Mohinxon sca yocacanquin:

—Maestron, ¿non mahuataiya mia jahua hichtimahin? —hahcanquin.³⁹ Mohnah nihueyahpa hian yohiquin:

—Tantiscahue. Behchonyamascahue —jan jascahah nihue tantihi, behchon yamascai.

⁴⁰ —¿Jahua jenquetsi man raquetain? ¿Man shinancoinyamahin? —jato jaquin. ⁴¹ Jan jascahah rahtetax yohinanancani:

—¿Jahua hihxon yohihah nihuen bocabi nincaquihquin? ¿Hiaman bocabi nincaquihquin? —hahcana.

Gadara joni yoshinyahpa

(Mt 8.28-34; Lc 8.26-39)

5 Hian hoque quexa Gadara mai qui sca nococani. ² Nonti janinhax mapetaiton yoshin tiromayahpa joni Jesus behchihi jahui. Tsahonni-hbo janin cahuan cahuani jihuetax joxon behchiquin. ³ Tsahonni-hbo janin jaa cahuan cahuani nihrasahi. Tsoanzi nexati hahtipahyamahi joni, cadenanen bocabi nexatimahi. ⁴ Hicha coti cadenanen tanexxon menexahbaan bi jaan cadenabo tehcaquin, hahan tanexahbo tehcapaquequin. Jaa xecoti tsoabi coshi yamahi. ⁵ Jascabi tsahon tocan nichish mahchi rihbi manichish sai saihshinahax sai saihihbahinahax hahmebi macaman tsehuérahshi. ⁶ Jaan cahen hochoxon Jesus jisish hishto-quihrani jahuex hahqui betihihpaqueti.

⁷ Picohue Jesusen jaá bi betihihpaquexon coshin bi res yohiquin:

—¿Hea min jahuejatihin, Jesusen, queya queha Diosen baquen? Diosen noque jisnon tah hen mia hihti yocacai: hea tiromajayamahue —hahquin.

⁸ —Jahuen yora mehax picohue, yoshin tiroman —Jesusen jaá jascajaquin. ⁹ Jesusen sca yocaquin:

—¿Mia min jahua jane quin? —hahquin.

—Heen jane ta Legion qui, noque non hichahi copi —hahquin. ¹⁰ Jasca-jaxon yoshiman hihti yocaquin, huetsa main jato camayamanon. ¹¹ Jano rihbi ta hicha repinica cochi janishqui mananan pibonahibo.

¹² —Cochi qui sca noque camahue, jato qui non hihquinon —hahquin yoshiman hihti yocaquin. ¹³ Jascajaha Jesus jeenhihqui. Yoshih tiromabó picotax res sca cochi qui sca hihquihi. Hihquihiboya jaa repinica dos mil rocohiahcanaxa quempa janinhax cayahax jenenencanya hihquihax hahsatax mahuati.

¹⁴ Cochi coirannicahbo sca jabaxon yohibonaquin jema janinxon, hueme-manxon rihbi. Jaabaan yohihah cahen jahuahi jacanaxquin hihquish honani sca bocani janu jihuetaibo. ¹⁵ Jesus qui nocoxon yoshinyahpa hihrasahi joni jiscanquin. Yoshiman hichaxon hihbojani bi janu siripi tsahotai jiscanquin. Choppayahpahax res sca tsahotai jahuen shinan siriscai jiscanquin. Jisish raquecani. ¹⁶ Jan cochi qui yoshin mahnebohanxon yoshinyahpa joni rohajahi jisibaan ja to yohihah hihti raquecani. ¹⁷ Ninca-cax raquexon sca Jesus hihti yocasca-canquin. Noquen mai mehax catanhue hahcanquin.

¹⁸ Nontin Jesus nanetaiton cahen yoshinyahpa hihrasahiton hihti yocascaquin, hahbetan cacatsihquin. ¹⁹ Jan jascahah bi Jesus jeenhihymahi.

—Miin caibo yohihi miin xoboho catanhue. Mihon shinanxon miin hihbaan mia hahxonai jatihibi yohitanhue —hahquin.

²⁰ Jan jascahah yohihi caxon yohibonaquin. Decápolis jemabo janinhahbo yohiquin. Jatihibi Jesusen jaa hahxonai yohibonaquin. Jan yohibonaha jatihibi rahtecani.

Jairon baque; chixanan hisinai haibo

(Mt 9.18-26; Lc 8.40-56)

²¹ Jaatian sca Jesus hoque quexa non-tin pohquerihbihiya hicha joni hahqui tsamajaqueti. Hian quexa sca cahen jaa nichi. ²²Hapo sca nocoti. Jairo janeya, haho tsinquit xobo hapo. Jesus jisish jahuen tahe qui betihipaquexon hihti yocaquin:

²³—Heen baque haibo pishca ta mahuacatsihquiqui, hapon. Miin mequeman mehexoni cahue. Rohahax jihuemon —hahquin. ²⁴Hahbetan sca Jesus cahi. Cahiya hichaxon Jesus chibancanquin. Tsehquesihcanahi bocani. ²⁵Jato betan rihbi huesti haibo cahi, doce bari sca jimihi hisinish. ²⁶Hicha rahonnicabaan rahonah bi rohayamahi, hohmis hohmisi, jahuen coriqui queyoquin. Rahonahbaan bi jascabi hisini, nanocohcanaribihi. ²⁷Jesusen hahcai nincacax tsamajaquetaibo tocan nichish hahchon cahi. Hahchon caquin sca jahuen chop a mehequin. ²⁸Jahuen yora meheyamaxon bi jahuen chop a pishca mehehexah tah hen rohascatihi, hihxon mehequin. ²⁹Mehehexah jimi tantiscay. Jahuen hisin rohascay jahuen jointinin honanquin. ³⁰Jesusen sca jahuen yora janinhax coshi cahi jahuen jointinin honanxon tsamajaquetaibo tocan rabejaquecahuanxon jano nichib yocaquin:

—¿Tsoan heen chop a mehehexah? —jato jaquin.

³¹Jahuen haxenicabaan sca yohiquin:

—¿Nea tsamajaquetaibo mihi qui tsehquesihqui jisi bi min Tsoan hea mehehexah? hihqui yocacahtain? —hahcanquin. ³²Jascajahibaan bi Jesusen jisjaquehtanquin, honannoxxon. ³³Jan hahxonah honanax raquetax

tastahihcanahi jahuex Jesus qui betihipaquexon hihcoinjaquin sca haibaan jatihibi yohiquin. ³⁴Jaa cahen Jesusen yohiquin:

—Baque, min shinancoinai copi tah min rohascay. Shinanquin sirijahax caresscatanhue, miin hisin rohascaax caresscatanhue —hahquin. ³⁵Jan yohuanai betanbi hapon xobo janinhax jahuibo nocoti. Nocoxon tsinquit xobo hapo yohicanquin:

—Moa ta miin baque mahuascaaxqui. ¿Jahuejanoxon sca min maestro jatsanjahin? —hahcanquin. ³⁶Jascajahibo nincaxon Jesusen jaa hapo yohiquin:

—Raquexonma shinancoinhue —hahquin. ³⁷Caquin sca tsoabi hahbetan camayamaquin. Pedro, Jacobo, Jacobonen huetsa Juan, jaabo rahsi Jesusen boquin. ³⁸Cahi, hapon xoboho nococani, haho tsinquit xobo coiranicahton xoboho. Nocoxon corotaibo jisbonaquin, huaohihqui boyah hihti huinihibo. ³⁹Hihcoxon Jesusen jato yocaquin:

—¿Jahua jenquetsahin man huaohihqui coro corotain? Mahuatihma bi ta xontaco hoxahihqui —jato jaquin. ⁴⁰Jascajahiton hosancanquin. Hosan hosana Jesusen jato jatihibi jeman cainmaquin. Jahuen papa, jahuen mama, hahbe jahuibo, jaabo rahsi cainmayamaquin. Jano xontaco racataiton sca jato betan Jesus hihcohi. ⁴¹Xontaco metsonxon:

—Talita, cumi —hahquin. Haibo pishcan, mia tah hen yohihi huenihue, hihcatsihqui. ⁴²Jan jascayah huenitax nichi. Doce bari jai xontaco. Jisish rahte rahtecani. ⁴³Jan xontaco hahxonanai tsoabi yohiyamahahbo cahen Jesusen jato hihti yohiquin. Jascajaxon:

—Xontaco piti hinannahue —jato jaquin.

Nazaret janin Jesus nocotai

(Mt 13.53-58; Lc 4.16-30)

6 Janohax res sca cahen jahuen mai janin sca Jesus caribahi. Jahuen hax-enicabo rihbi hahbetan bocani. ²Tanti neten sca haho tsinquit xobohoxon jato haxemaquin. Nincacax hicha jonibo rahte rahteti.

—¿Jahuerahnohax nescapa yohuan haxenishquin? ¿Jenquetsahpa shinan bihnishquin? ¿Jahua coshin jahuen mequeman hahquiquin? ³ ¿Hoa carpinteroma hin? ¿Marian baquema hin? ¿Jacobo, José, Judas, Simon jahuen jochicaboma hin? ¿Jahuen chocabo neno noque tocan jihueyamahiquin? —hihcani hahqui sinati.

⁴—Huetsancohabo Papan joi yohin-ahon queenaibaan bi ta jahuen mai janinhahbo res jahan queenyamahihqui. Jahuen jenabo, jahuen xobo janinhahbo rihbi jahan queenyamacani —Jesusen jato jaquin.

⁵ Jaa jema janinxon ta jahuen coshin jato hahxonti hahtipahyamanishqui, huestibo res hisinaibo mehexon rohajaquin. ⁶ Hihcoinai jaabaan shinanyamahi copi Jesus rahteti. Jemabo janin sca haxemabonahi cahi.

Yohitannahue jaah bohibo

(Mt 10.5-15; Lc 9.1-6)

⁷ Jahuen doce quenaxon yoshin tiromabo picoti jato hihbomaxon rabe rabebo jato raanquin. ⁸ Raannoxon jato hihti yohiquin, mequen botanahbo, huesti hahqui paxati mepitiya res bohabo. Piti boyamanon, borasa, jaya cati coriqui rihbi boyamanon. ⁹ Sapato sahuequin bi rabe coton sahueyamanon.

¹⁰—Xoboho hihcohax janobi banenahue, jaa jema janinhax canoxon caman. ¹¹ Mato Johue hahyamaxon mato nincacatsihyamahiboya janohax

caquin maton sapato qui hueotai mai poto jato qui tahabahini botannahue yohitimabohi honanahbo —jato jaquin.

¹² Jaan jascajaha boresscacani, shinan pontenahue jato jabonahi bocani.

¹³ Hicha yoshin rihbi picocanquin. Hicha hisinyahpabo rihbi xeniyaxon bemanxon rohajacanquin.

Nashimanica rehtehibo

(Mt 14.1-12; Lc 9.7-9)

¹⁴ Jascajahiboya cahen Jesusen joi jatihixonbi nincacanquin. Herodes janeya quiquin hapon rihbi nincaquin. Jesus yohihi cahen caibo nescari yohuannish:

—Nashimanica Juan ta mahuatipish bi teeihribihiqui. Jaa copi ta jasca-jaquin coshin hahquiqui —hihcani.

¹⁵—Elías yamanica tah qui —hihqui caibo rihbi.

—Papan joi yohinica tah qui. Neateman Papan joi yohipahoni quescapah tah qui —hihqui caibo sca. ¹⁶ Jesusen hahcai nincacax Herodes sca jascarihbibi:

—Juan ta jihuerihbihiqui. Hean re-hetequin textebahinhoh bi ta teeihribi-hiqui —hihqui.

¹⁷ Jascari yohuanyahnoxon ta Herodias copi Juan bihmaxon Herodesnen Juan sipojanishqui. Herodias Felipenin haibo que bi ta Herodesnen bichin-nishqui. Jahuen huetsan haibo bich-inquin. ¹⁸ Bichinaiton cahen Juaman Herodes yohiquin:

—Min huetsan haibo bichintima joi ta jaiqui, noquen nincati joi —hahquin.

¹⁹ Jan jascajaha Herodesnen haibo Herodias Juan qui rainyamahi jihuexon rehtecatsihquin bi hahtipahyamaquin, jahuen benen pantehah. ²⁰ Juan ponte jihuetai hohchajomahi honanax Juan qui raquequin Herodesnen coiranquin, caibaan rehtemis hihxon. Juan nincaxon jahua shinanti honanyamaquin bi nin-

caquin, coin coinxon. ²¹Jahuen bari nocotai neten sca cahen Herodesnen fiestajaquin. Pih jahuebo jahuen tin-intibo quenamaquin, jahuen sontaro hapobo quenamaxon Galilea mai meha patorobo rihbi quenamaquin. Fiestajahiboya jahuen haibaan Juan copicatsi-hquin shinanquin: Rahma caya tah hen Juan rehteti hahtipahscai hihqui. ²²Fi-estajahibo qui hihcohax Herodiasnen baque xontaco jato bairahxonaiya han-Herodes hihti jenimahi, jan que-namahabo rihbi. Jenimaxon Herodesnen yohiquin:

—Min queenaibo hea yocareshue, hen mia hinannon. ²³Jascajaxon Papa Dios quenaxon sca xontaco yohirihbiquin:

—Min hea yocacaibo tah hen mia hinantihi, heen yonotibo jatíhi hena hihnon jatíhi rihbi mina hihnon caman —hahquin. ²⁴Yohiha jahuen mama yocaqui sca caresscái.

—¿Jahua yocapan? —hahquin.

—Nashimanica Juaman mapo rahán —hahquin jahuen maman.

²⁵Hapo qui histon caribixon sca yohiquin:

—Nashimanica Juaman mapo tah hen queenai rahmabi. Quencha qui nanexon min hea hinanti tah hen queenai —hahquin.

²⁶Yocacah sca hapon masa shinanquin. Hihtijaquin masa shinanxon bi Dios quenaxon yohixon copi jahuen joi huetsajati hahtipahyamaquin. Jan que-namahibaan nincacah copi rihbi jeen-hahscaquin. ²⁷Jeenhihxon, rehtexon-nica sontarobo sca raanquin, jahuen mapo bihtanahbo. Raanah caxon carcel janinxonbi Juan textecanquin. ²⁸Quen-chá qui jahuen mapo nanehax jaya joxon xontaco hinancanquin. Xontaconen sca jahuen mama hinanrihbiquin. ²⁹Jascjahibó nincacax ta Juaman haxenicabo jahuen yora bichi canishqui. Jahuen yora bihxon tsahoncanquin.

Cinco mil Jesusen pimahi

(Mt 14.13-21; Lc 9.10-17; Jn 6.1-14)

³⁰Jesusen jato raanah catanipish Jesus qui jahuen raantibo joribibi. Joxon jaabaan hahtanipi yohixon jaabaan haxematanipi yohirihbiquin jatihibibi. ³¹Yohihiboya Jesusen jato yohiquin:

—Mato rahsibi tantihí bonahue jano tsoabi yamahiton —jato jaquin. Cahi jahuibo hichahiya ta pinoxon bocabi tantiti hahtipahyamacannishqui.

³²Jano tsoabi yamahiton sca nontin bocani jaabo rahsibi. ³³Jaabo cahi cahen hichaxon jiscanquin. Jato honancanquin. Jatihibi jema janinhax quetanpaquebahini cahax jaabo pari nocoti, jano nontin cahi janin.

³⁴Nocoxon hicha tsamascaibo Jesusen jisbonaquin. Coiranyamaha carnerobo behnocanahi quescapahbo jato jisquin. Jatohon shinanxon hicha jato haxemarihbiquin. ³⁵Bepiscayi sca hahqui joxon jahuen haxenicabaan yohiquin:

—Neno ta jahua yamahihqui. Bepi ri-hbi sca ta jaiqui. ³⁶Jano huaiyahpabo jaiton jato raanscahue, hochoma jemabo janinxon rihbi jaton piti marohi cahabo —hahcanquin. ³⁷Jascalahabó:

—Piti hinannahue, matonbi —jato jaquin.

—¿Non doscientos denario copi paan marohi catihin, jato pimanoxon? —hahcanquin.

³⁸—¿Jahuentihi paan man jain? Jistannahue —jato jaquin. Jistani jahuex sca:

—Pichca rahán. Rabe yapa rihbi —hihcáni.

³⁹Jato jatihibi sca Jesusen yohiquin, cincuenta cincuentaboya cien joni rahsi jano huasi mipaxbihtaiton tsahonon. ⁴⁰Jascari tsinquitax tsahocani cincuenta cincuentaboya,

cien cienbo. ⁴¹Jaton pichca paan bihxon jaton rabe yapa rihbi bihxon nai bejisihnxon Papa yocaxon paan tehcapaquexon jahuen haxenicabo hinanscaquin, tsamajaquetaibo hinanpaquehahbo. Yapa rabe rihbi jatihibi hinanpaquemaquin. ⁴²Hinanah jatihixonbi pihi yanicahini. ⁴³Paan tequeboya yapa tequebo tsinquirihbixon sca doce tasa bohasjacanquin. ⁴⁴Paan pihibo cahen cinco mil bebobo. Hichaxon bi jatihi tasa bocho texejacanquin.

Jesus jene benichi cahi

(Mt 14.22-27; Jn 6.16-21)

⁴⁵Jaatian sca chini canoxon jahuen haxenicabo yohiquin, nontin nanetax Betsaida jema janin pohquejaquenon. Jaabo cahiya cahen tsamajaquetaibo Jesusen yohiquin xobon caresscatannon. ⁴⁶Jato yohihax manan manixon Papa yocaqui cahi. ⁴⁷Yamescaya cahen nonti caresscái bi Jesus huesti main baneti. ⁴⁸Nihuen tsahkahah huinacasquimahibo bi jaan jato jisquin. Xaba paqueri jaima sca jato qui cahi, jene benicanahi. Jato huinobahincatsihqui bi jaabaan meraquin. ⁴⁹Jene benicahinquihranai jisish, Yoshin tah qui, hihquish sai saihihcani. ⁵⁰Jatihixonbi jisish hihti raquecani.

—Jointi coshijanahue. Hea tah hen qui. Raqueyamanahue —jato jaquin. ⁵¹Jato qui nontin nanetaiya cahen nihue tantiscái. Nihue tanticahinaiya híhti rahtescacani. ⁵²Paan tehcapaquexon jahuen coshi jan jato jismahipi bi honanyamacanquin, jaton shinan chahomahiya.

Genesaret janinhahbo Jesusen rohajahi

(Mt 14.34-36)

⁵³Pohquejaquetax Genesaret main taxnati. Taxnaxon nonti nexacanquin.

⁵⁴Nonti mehax bototaiton janohahbaan Jesus honancanquin. ⁵⁵Honanax jatihibinco hishtocahini caxon hisinyahpabo jaton cacajatinin racatai hihuecanquin. Jano Jesus jai nincaxon jano becanquin. ⁵⁶Jatihibinco jan cahi, hanitahma jemabo janin, hani jemabo janin, huenenaiton rihbi, hisinyahpabo bexon jano maronicabo tsinquitai hueneman jato racancanquin. Racanahbo Jesus yocacanquin jahuen chopá quechon bocabi mehenoxon. Jaa mehehibo jatihibi ta rohanishqui.

Jahan noquen jointi rishtatibo

(Mt 15.1-20)

7 Jaatian sca huishani honanbo betan fariseobo Jesus qui tsiniquicani, Jerusalen janinhax jahui honanbo. Tsinqixon jahuen haxenicabaan pihi jiscanquin. ²Mechoquihxonma jaton mequen rishtayaxon texe jahuen haxenicabaan pihibo jiscanquin. ³Mechoquihyamaxon ta fariseobaan piyamahiqui, jatihibi jidiobaan rihbi jascajarihbiquin. Jaton xenibaan hahpahoni quescajaquin ta jacanihqui. ⁴Jano piti maroti janinhax joxon ta nashiyamaxon piyamacaniqui. Hicha jascapahbo japahoni ta jacaniqui. Pinoxon ta posillobo, poobo, yami quentibó qui jene jasijacaniqui. ⁵Fariseobo betan huishani joi honanbaan sca Jesus yocaquin:

—¿Jahua jenquetsahin miin haxenicabaan noquen xenibaan hahpahoni quescajaya mahiquin? Mechoquihxonma ta picanihqui. Jaton mequen qui hueotai hohchayabi ta picanihqui —hahcanquin.

⁶Jascalahabó jato yohiquin:

—Ponte bi res ta mato qui yohuanquin Isaiasnen huishanishqui:

Nea jonibo jaton janan siripi hehqui yohuanai bi ta jaton shinan hocho bi res qui, hehon queenyamacani.

⁷ Papan joi haxemahicamaxon bi ta joni-baan joi honanmacaniihqui. Yanca bi res ta hehqui betihipaquecaniihqui hah ta Isaiasnen janishqui. ⁸ Jonibaan hahpahoni quescajaquin hahnoxon tah man Papan yohini joi jenehi.

⁹ Jato jascajaxon jato yohirihbiquin:

—Sirija ra tah man jai, maton xenibaan hahpahoni quescascanoxon Papan joi jenequin. ¹⁰ Moisesnin ta yohin-ishqui: Miin papahon queenhue, miin mamahon queenhue. Huetsa jan yohini ta nea qui: Tiromahi jahuen papa qui yohuanai joni tah man rehteti jai, jahuen mama qui tiromahi yohuanai rehte-quin cahneyamaquin. ¹¹ Jaan jascajani que bi tah man matonbi yohihi: Maton papa, maton mama yohinahue Jaa hen mia hinanpanan ta Corban qui, hahquin. Corban ta Papa qui hinanah hi-hcatsihquiqui. ¹² Jascari yohuanmaxon tah man jaton mama hahxontima hax-emahi, jaton papa hahxontima hax-emahi. ¹³ Jascajaxon tah man Papan joi pantehi, maton xenibaan hahpahoni quescajaquin tah man maton rihbi maton baquebo haxemahi. Jascapajahi tah man jai hicha —jato jaquin.

¹⁴ Jonibo quenarihbixon sca jato yohiquin:

—Hea nincanahue, jatihixonbi honannahue. ¹⁵ Jahuabi ta noque chicho quehama noque qui nanexon noque rishtajatimahqui. Noquen jointinin non shinanaiton ta noque rishtajahqui. ¹⁶ Hahan nincati pabinquiyahpaxon nincahue —jato jaquin. ¹⁷ Jato potabahinax xobohoh hihcohiton jan jato yohiha jahuen haxenicabaan yocaquin, min yohiha

jahua hihcatsihquiquin, hahquin.

¹⁸ Yocaca jato yohiquin:

—¿Mato rihbi man honanti pishinain? Noque chicho quehamabo ta noque qui nanexon noque rishtajati hahti-pahyamahqui. ¿Man honanyamahin? —jato jaquin, jatihibi pitibo hahan jointi rishtajatima sca janon. ¹⁹ Jaatian sca:

—Noquen jointi qui hihquihima bi ta poco janin res nanetihqui. Poco janin nanetax jaroma caini —jato jaquin.

²⁰ Jato yohirihbiquin:

—Noquen jointinin non shinanaiton ta noque rishtajahqui. ²¹ Noquen jointinin tah non shinanai: tiroma shinanbo, benejomabo betan hihti, queejomabo betan hihti, yometsohti, joni rehteti, benoyahpabo betan hihti, queeyahpbo betan hihti ²² caibaan jahuequibo bich-inti, tiromajati, paranti, tsiniti, notsi notsiti, joni qui tiromahi yohuanti, yohitimabohi, honanmabohi. ²³ Jascapa tiromabohi rahsi tah non noquen jointinin shinanxon hahcai rishtascanoxon —jato jaquin.

Jesus nincacoinni nahua haibo

(Mt 15.21-28)

²⁴ Jato jascahax janohax Tiro jema janinbo sca caresscái. Nocotax bi jan jano hihqui honanyamahahbo xoboho hihcocani. Hihcohax bi jenquetsahax jonetimahi. ²⁵ Jesus nocotai joi nincacax huesti haibo jahui, jahuen haibo baque pishca yoshiman hihbojahi. Jahuex Jesusen tahe qui betihihpaqueti. ²⁶ Jaa haibo ta judiobaan nahua hihpahon-ishqui, sirofeniciaabaan jena. Jahuen baque janinhah yosir picoxonti jaan hihti yocaquin.

²⁷ —Baquebo pari pimanon. Baquebaan paan pihí bichinxon tah non hohchitin pinon potantimahi —hahquin Jesusen.

²⁸ —Jascari rahan, Hihbon. Jaabi ta baquebaan paquehi paan tomes misa na-

manxon hochitinin pihiqui —hahquin haibaan.

²⁹—Jascarax tah min caresscatihi. Yoshin ta miin baque janinhax pisocscaiqui —haibo jaquin. ³⁰Jan jascah xoboho caxon jahuen baque bachiho racatai meraquin, siri scah.

Jesusen joyobo rohajahi

³¹Jaatian sca Tiro janinbohax cahi Sidon jema nabebacahini, Galilea hian janin carihibihi, Decapolis maibo nabebacahini cahi. ³²Cahiton bi pabe joni Jesus qui hiocanquin. Pabehax bi joyorihbi. Jesusen mehenon sca yocaxoncanquin. ³³Tsamajaquetaiboma qui pabe nihcahuancahuanchuihnxon jahuen pabinqui janin jahuen metoti niaquin. Toshbanhahxon jahuen jana mehequin. ³⁴Nai bejisihnixon jointi xecahihnxion:

—Efata —hahquin. Quehpemehhue hihcatsihqui. ³⁵Jascahiya jahuen pabinqui quehpemehscai, jahuen jana janpemehtax yohuani siriscai. ³⁶Jaa rohascaya cahen Jesusen jato hihti yohiqui tsoabi yohiyamanon. Jan hihti yohihab bi hashoan hicha sca yohicanquin. ³⁷Hihti rahtetax yohuancani.

—Jatihibijaquin ta sirijahiqui. Pabehibo nincamaquin. Joyobo yohuanmaquin —hihcandi.

Cuatro mil Jesusen pimahi

(Mt 15.32-39)

8 Jascasca jaiya hicha joni tsamaja quetaiya jahua pitimahiya jahuen haxenicabo quenaxon jato yohiqui:

²—Nea tsamajaquetaibahon tah hen shinanai. Quimisha neten sca hehbetal hihxon bi ta jahubi piyamacanighqui. ³Pihaxma jaton xobon cahabo raanah ta bahin mehax jaton yora yosmajaquexihcanihqui, caibo rihbi hocho quehabo —jato jaquin. ⁴Jascatha jahuen haxenicabaan:

—¿Jenquetsahaxon non nea jonibo pimatihin, neno tsoabi jihueyamahiton? —hahcanquin.

⁵—¿Jahuentihi paan man jain? —jato yocaquin.

—Siete rahan —hihcandi. ⁶Tsamajaquetaibo sca jaan yohiquin, main tsahonon. Jaton siete paan bihxon Papa yocaxon tehcapaquexon jahuen haxenocabo hinanquin, jonibo sca hinannon hihxon. Bihxon sca jato hinanpaquecanquin. ⁷Yapa romishin huestibo rihbi cahen jaabo jai. Jaa bihxon Papa yocaxon jato hinanmarihbiquin. ⁸Hinanah pihyanicahincani. Texehi tequebo tsinquirihbxion siete tasa bohasjacanquin. ⁹Cuatro mil jonibo jano hihqui bi jato pimaxon cahabo jato camascaquin. ¹⁰Jaatian sca jahuen haxenicaboyabi nontin nanetax Dalmanuta main sca cahi.

Hahan honanti yocacahtaibo

(Mt 16.1-4; Lc 12.54-56)

¹¹Fariseobo sca ta Jesus qui jonsishqui. Joxon Jesus yohuanquihnnquin, joi bichinnanancatsihquin. Papan hinanah hahan honanti jan jato jismanon hihxon yocacanquin. ¹²Jascabahoya jointi hihti xecahihnxion jato yohiqui:

—¿Jahua jenquetsahin nea rahma jihuetai jonibaan hahan honanti jiscatsihquiquin? Yohicoin tah hen mato jai: jahuabi hahan honantibi ta mato jismatimahihqui —jato jaquin. ¹³Jato banescaax nontin nanerihbihax ramihoh quexa sca cahi cahi.

Fariseobo qui coirameti yohihi

(Mt 16.5-12)

¹⁴Caquin bi piti boti shinanbehnonganquin. Huesti paan res nonti janin jai.

¹⁵Coirametahbo jato yohiquin:

—Jisnahue. Fariseobaan hahan paan soohihmati qui raquenahue. Herodesnen hahan paan soohihmati qui raquenahue

—jato jaquin. ¹⁶Jaa jan yohihi jaabo rahsibi sca yocacahcani:

—Non paan yamahiya cahra noque yohihiquin —hihcanci. ¹⁷Jascajaquin shinanaibo honanxon Jesusen sca jato yocaquin:

—¿Jahua jenquetsahin man paan yamahi yocacahnananain? ¿Man jiscoinyamaparihin? ¿Man honancoinyamaparihin? ¿Maton shinan chahoma sca quin? ¹⁸¿Beroyahpaxon bi man jisyamahin? ¿Pabinquiyahpaxon bi man nincayamahin? ¿Cinco mil jonibo pimanoxon pichca paan hen tehcapaquehiya texehi teque tsinquirihbixon jahuentihi tasa man bohasjahoquin? ¿Man shinanyamahin? —jato jaquin.

¹⁹—Doce rahan —hihcanci.

²⁰—¿Siete paan cahran, hahan hen cuatro mil pimahiya texehi teque tsin quirixon jahuentihi tasa man bohasjahipiquin? —jato jaquin.

—Siete rahan —hihcanci.

²¹—¿Man honancoinyamaparihin? —jato jaquin.

Betsaida benche Jesusen rohajahi

²²Betsaida jema janin sca nococani. Nocotaiboya benche joni Jesus qui caibaan hiocanquin. Hioxon hihti yocacanquin, mehexonhue hahquin. ²³Yocacah benche metsonxon hiobonahi jemama qui cahi. Benchen bero qui toshbanhahxon mequeman mehexon sca yocaquin:

—¿Min jisyamabiresain? —hahquin.

²⁴Jari jisxon:

—Jihui nihcahuanaí quescapahbo ta hen joni jisi —hahquin. ²⁵Jaatian sca jahuen bero meherihbihah coshicahinxon jisribiquin. Siriscaxon jatihibi sca jisquin sirijaquin. ²⁶Jahuen xobon sca jan catannon:

—Jema janin hihquihamma catanhue

—Jesusen jaquin.

Mia tah min Cristo qui Pedro jai

(Mt 16.13-20; Lc 9.18-21)

²⁷Jaatian sca jahuen haxenicaboyabi Jesus cahi, Cesarea de Filipo mai meha jemabo janin sca. Caquin jato yocaquin:

—¿Hea tsoa hihqui shinancaniquin? —jato jaquin.

²⁸—Nashimanica Juan yamanica tah qui hih ta caibo jaiqui. Elías yamanica tah qui hih ta caibo rihbi jaiqui. Papan joi yohipahoni yamanica tah qui hih ta huetsabo rihbi jaiqui —hihcanci jahuen haxenicabo. ²⁹Jaan sca jato yocarihbiquin:

—¿Maton cahran? ¿Hea tsoa hihqui shinan man Jain? —jato jaquin.

—Mia tah min Cristo qui —hahquin Pedronen.

³⁰—Tsoabi jascajaquin yohiyamanahue —jato jaquin Jesusen.

Jan mahuayaxihqui Jesusen yohihi

(Mt 16.21-28; Lc 9.22-27)

³¹Jaatian sca jato sirijaquin yohiquin:

—Hea noque baque ta tiromajayaxihcanihqui. Hehon ta queenyamayaxihcanihqui hanibo, sacerdote hapobo, huishani honanbo. Hea ta rehteyaxihcanihqui. Rehtehipibo bi tah hen quimisha netenax hahquirihbi hueniyaxihqui —jato jaquin. ³²Jahuabi joi jonexonma jato jascajaquin. Jesus quenabohanxon sca Pedronen yohiquin:

—Jascari yohuanyamahue —hahquin.

³³Rabejaquexon jahuen haxenicabo jisxon Pedro yohiquin:

—Jascayamahue. Hea janinhax catanhue, Satanás. Papan shinanai quescajaquinma bi jonin shinanai quescajaquin tah min shinanai —hahquin.

³⁴Jahuen haxenicaboya tsamajaquetai jonibo nincaqui jonon sca jato que naquin. Jato quenaxon:

—Hehchon jocatsihxon tah man mabobi man queenaima sca man hahtih.

Hea retehibaan bi tah hen heen Hibbo jenetimahi hihnahue, nete tihibi jascanahue. Jaatian tah man heen jihuetahbo jatihi.³⁵ Non mahuamis hihquibota mahuatihiqui. Hehqui hinamehxon heen joi siri nincacoinaibo ta retehah bi jihuethiqui.³⁶ ¿Mai jatihibi hihbojahax bi mahuatax jahuaya sca man banetihin?³⁷ ¿Hahquirihbi teehihnoxon non copijaquin jahua hinantihin?³⁸ Rahma jaibo ta tsini tsinihibo qui, hohchapan baquebo. Hehqui hihtimahpai joni qui tah hen hea rihbi hihtimahyaxihqui. Heen joi qui hihtimahpai joni qui rihbi tah hen hea noquebaque hihtimahyaxihqui Papan yonotibo betan Papan shinnanya jahuemex jato qui hihtimahpi —jato jaquin.

9 Jascajaxon:

—Mato ta hen yohicoinai: jahuen coshin Papan jihuemahi joresscái jisyanoxon caman ta texe neno nichibo mahuayamayaxihquiqui.

Jesus xabayahpacahini

(Mt 17.1-13; Lc 9.28-36)

² Jato jascahax seis neten sca hihxon Pedro, Jacobo, Juan jaabo rahsi Jesusen boquin. Hani mahchi jato maniquihquin jaabo rahsibi. Jatoyabi maniscaax jaton jisnonbi huetsapahcahini.³ Jahuen chopa xabareneni joxoshamani. Jascapa joxojahti ta tsoanbi main jihuetai pahtsanicaton hahtipahyamahiqui.⁴ Elías yamanica betan Moises yamanica sca jato qui cainax Jesus betan yohuan yohuani.⁵ Yohuanaibaan bi Pedronen sca Jesus yohiqui:

—Maestron, noque neno hihqui ta siri qui. Quimisha tapasnonhue. Mina huesti, Moisesnina huesti rihbi, Elias-nena huesti rihbi —hahquin.⁶ Jahua yohiti honanyamahax jascari yohuani. Hihti rahtecani.⁷ Jato bochiqui cahen nai cohin maracahti. Nai cohin chicho quehax sca yohuani jai:

—Nea ta hen hihti queenai heen baque qui. Jaa nincanahue —hihqui.⁸ Nincaxon jisbohanrenenxon bi tsoabi jisyamacanquin. Jesus huesti jano jai meracanquin.⁹ Jaa pecaho sca mahchi mehax botopaquexon Jesusen jato hihti yohiquin:

—Man rahma jisí tsoabi yohiyamanahue. Hea noquebaque hihquipish bi hahquirihbi hueninon caman yohiyamanahue —jato jaquin.¹⁰ Jan jascahah tsoabi yohiyamacanquin. Hihquipish bi hahquirihbi huenitihu jan hihqui bi jahua hihcatsihquiquin hihquish jaabo rahsibi yocacahanancani.¹¹ Jesus sca yocacanquin:

—¿Jahua copi Elías pari ta jotihi qui huishani honanbaan jaiquin? —hahcanquin.¹² Jaan sca:

—Hihcoini. Elías pari joti jai. Jatihibi rohajahi jahui. Hean sca hen mato yocanon: ¿Jahua yohihi nea huishani joi jaiquin? Noquebaque ta hihti tiromajayaxihcanihqui, hosan hosan rihbi ta jayaxihcanihqui.¹³ Mato ta hen yohihi. Elías ta moa joresscanishqui. Jahuiton bi ta jaabo queenai quescajaquin jaabaan janishqui jayaxihquibo Papan huishani quescajaquin —jato jaquin.

Yoshinyahpa beronan rohajahi

(Mt 17.14-21; Lc 9.37-43)

¹⁴ Jahuen haxenicabo qui nocoxon sca jato qui hicha tsamajaquetaibo meracanquin. Huishani honambo jato betan joi bichinanaiton jiscanquin.¹⁵ Jesus jahuijisish rahtetax jatihibi tsamajaquetai jonibo sca hahqui bishquihihahinxon hicotancanquin.¹⁶ Jaatian sca jaan jato yocaquin:

—¿Jahua yohuan man jato betan jain?¹⁷ Yocacah sca tsamajaquetaibo meha huestichin yohiquin:

—Heen baque ta hen mihqui hihuehahqui, Maestron, joyo yoshiman hih-

bojani quen. ¹⁸ Jan janoxon shinanaiton bi ta hueran paquehiqui. Bacox jancharahicahini. Jahuen xeta yeres yeres hahquin. Jahuen yora jestancahini. Picoxonhue hah hen miin haxenicabo jaah bi ta hahtipahyamacanaxqui —hahquin.

¹⁹ —Nincayosmabon, jascapahbo tah man qui. ¿Jahuentiho basi hen mato betan jatihin? ¿Jahuentiho basi hen mato tenetihin? Neno hehqui hihuenahue —jato jaquin. ²⁰ Hahqui hihuescancquin. Jesus meraxon cahen tiroma yoshiman beronan tastahihmaquin. Tas-tahihquish maihi taramehcanahi, bacox jancharahiquish. ²¹ Jahuen papa Jesusen yocaquin:

—¿Jahuentiho basi nescari jihuescainqui? —hahquin.

—Baque pishcabihaxbi raham. ²² Hicha coti ta chihi janin hueranrahsihqui, jenenencanya rihbi hueranquin rehtecatsihquin. Hahtipahxon noque yanapanhue noquehon shinanxon —hahquin jahuen papan.

²³ —¿Hahtipahxon nan? Shinancoinai jonin jisi ta jatihibi jati hahtipahti qui —hahquin Jesusen. ²⁴ Yoshinyahpaton papa sca coshin yohuani:

—Hen ta hen shinancoinai. Hen hashoan sca nincacinnon hea yanapanhue —hahquin.

²⁵ Hicha bishquihihcahinquiranax jahuem tsamajaquetaibo jisxon tiroma yoshin Jesusen yohiquin:

—Joyo yoshiman, pabe yoshiman. Mia ta hen yohihi. Jahuen yora mehax picohue, jahuentianbi hahqui joyamas-canoxon —hahquin Jesusen. ²⁶ Sai sai-hihquish coshin tastahihmahax picoti. Beronan muhuti quescapi racati. Jatihibi sca yohuanquehancani:

—Mahua sca ta jaiqui —hihcanni. ²⁷ Jesusen sca metsonxon huenihihnihah hueniscai. ²⁸ Xoboho Jesus mapescaiya

sca jahuen haxenicabaan jaabo rahsichin yocaquin:

—¿Jenquetsahpahin non picoti hahtipahyamahaquin? —hahcanquin.

²⁹ —Jascapa tah man Papa yocaxon res picotih. Huetsajaxon tah man jenquetsahaxon bi picotimahi.

Jan muhuayaxihqui jan yohirihbihi

(Mt 17.22-23; Lc 9.43-45)

³⁰ Janohax Galilea mai nabebacahini bocani. Jaabo janu cahi tsamajaquetaibaan honanti Jesus queenyamahi.

³¹ Jahuen haxenicabo res haxemabonanoxon jaabo rahsi nihquihinquin. Jato nihquihinquin yohiquin:

—Jaton jonibaan hea bijnon ta hea hinanyaxihcanihqui. Bihxon sca tah hea rehteyaxihcanihqui. Rehtehahbo sca tah hen quimisha neten hihquish hahquirihbi hueniyaxihqui —jato jaquin. ³² Jan jascalah bi honancoinyamacanaxquin. Yocacahcatsihqui bi raquecani.

Tsoa non coshi quin hihquibo

(Mt 18.1-5; Lc 9.46-48)

³³ Capernaum jeman sca nococani. Xobohoxon sca Jesusen jato yocaquin:

—¿Jahua yohuan man jaonahin? —hahquin. ³⁴ Yocacah bi jahua hihyamacani. Tsoa non hashoan coshi quin yocacahnananhonahax bi rahma jahua hihyamascai. ³⁵ Tsahoxon jahuen doce joni quenaxon sca jato yohiquin:

—Bebocatsihqui joni ta chiniti jaiqui, jatihixon bi yononica —hahquin.

³⁶ Huesti baque pishca bihxon naponbi nichinxon hicobehnanxon jato yohiquin:

³⁷ —Nescapa baque pishca heen jaben johue hahcái jónin ta hea rihbi johue hahquiqui. Hea johue hahcái jónin ta hea que ma bi hea raanni johue hahquiqui —jato jaquin.

**Noque panteyamahibaan ta
noque yanapaniqui**
(Mt 10.42; Lc 9.49-50)

³⁸ Juaman sca yohiquin:

—Huesti joni tah non merahipiqui, Hihbon. Miin jane yohixon tiroma yoshinbo picohi. Noque betan ta nihyamahiqui. Noque chibanyamahiya ta non jascajayamahue hahquipiqui —hihscai Juan. ³⁹ Jesusen yohiquin:

—Jascajaquin yohiyamanahue. Heen jane yohixon coshin hahcai joni ta hahcax res sca hehqui tiromahi yohuantimahihqui. ⁴⁰ Noque panteyamahibaan ta noque yanapaniqui.

⁴¹ Yohicoin tah hen mato jai: mia Criston joni copi hahxoncatsihquin mia jene pishca xehamahi joni ta copijacoinyaxihquiqui.

**Huetsa joni hohchamamis
hihxon jan haxemahi**
(Mt 18.6-9; Lc 17.1-2)

⁴² Nescapa hea nincacoinai baque pishca hohchamahibo ta Papan hihti tiromajayaxihquiqui. Jascapahbo macanya tenexxon jenenencanya potahah sirijaquin shinantimahi bi ta Papan casticana hihti tiromajaquin shinanyaxihquiqui. ⁴³ Miin mequeman tiromajanicaħax mexteħihhue.

Mento jihuenish bi queyoyamanox manatah tiroma que ma bi ta rabe mequenyabi nocayosma chihi janin potahah hihti tiroma bi res qui. ⁴⁴ Jano ta jaton xena jahuentianbi mahuayamahiqui. Jaa chihi rihbi ta jahuentianbi nocayamahiqui. ⁴⁵ Miin tamen tiromajanicaħax taxteħihhue. Tanto jihuenish bi queyoyamanox manatah tiroma que ma bi ta rabe taheya chihi janin potahah mia hihti tiromascatih. ⁴⁶ Jano ta jaton xena jahuentianbi mahuayamahiqui. Chihi rihbi jahuentianbi nocayamahi. ⁴⁷ Miin

beron tiromajanicaħox miin bero tsecahue. Huesti beroya jihuenish queyoyamanox manatah tiroma que ma bi ta rabe beroya chihi janin potahah mia hihti tiromascatih. ⁴⁸ Jano ta jaton xena jahuentianbi mahuayamahiqui, chihi rihbi jahuentianbi nocayamahi. ⁴⁹ Tashi nepocah quesca ta jatihibi jonibo chihin jatiqui. ⁵⁰ Tashi ta siri qui. ¿Tashi jahuíyamascaiton jahuínon hihxon jenquetsahaxon man hahquirihbi jahuíjatihin? Tashiyahpa jihuenahue. Joni huetsa betan siripi jihuenahue.

Noquen hihquihinti potatima

(Mt 19.1-12; Lc 16.18)

10 Janohax caresscái Judea mai janin, Jordan hoque quexa rihbi. Jano rihbi hahqui tsamajaquecani. Jan hahrasihu quescajaquin sca jato haxemarihbiquin.

² Hahqui joxon sca tanacatsihquin fariseobaan yocaquin:

—¿Bebaan jahuen haibo potati joi yama quin? —hahcanquin.

³ —¿Jahua Moisesnin huishanishquin, man jascajanon? —jato jaquin.

⁴ —Jascajati queenaibo ta Moisesnin yohinishqui: Bebaan ta jahan jahuen haibo potati quirica huishaxon jahuen haibo potatihiqui —hihcáni.

⁵ Jesusen sca:

—Man jointi chahomahi copi ta jascajaquin huishanishqui. ⁶ Nete jamenoħi tian ta bebo betan haibo Papan jato jonjanishqui. ⁷ Jaa copi ta jahuen papaya jahuen mama jenebabinax jahuen haibo betan sca bebo jihueti canicah qui. ⁸ Jaabo rabehax bi huesti yora sca jihueti. Rabe hihyamascaī, huesti yora sca jai. ⁹ Jaa copi jaabo rabe Papan huesti jaha tsoanbi potamayamaxaħtah man —jato jaquin. ¹⁰ Xoboho sca jahuen haxenħicabo jaa joi hahquirihbi yocacaħti.

¹¹ Jaan sca jato yohiquin:

—Jahuen haibo potaxon huetsa haibo bichi joni ta jahuen haibo qui hohchati jihuetaqui, tsinihi. ¹² Jahuen bene potaxon huetsa bebo bichi haibo ri-hbi ta jahuen bene qui hohchati jihuetaqui, tsinihi —jato jaquin.

Baquebo Jesusen yocaxonai

(Mt 19.13-15; Lc 18.15-17)

¹³ Jaatian sca Jesus qui baquebo hi-huecanquin jato mehexonnon. Hihuehiton jahuen haxenicabaan yohiquin:

—Jascapahya joyamanahue
—hahcanquin.

¹⁴ Jascajahibojisish sinaxon jato yohiquin:

—Panteyamanahue, hehqui baquebo behabo. Jascapah ta Papan jihuemati qui. ¹⁵ Nincanahue hen mato yohinon: baque pishcaten Papa Dios hihbojamahi quescayamahax tah man Papan jihue janin jahuentianbi catimahi. ¹⁶ Jato jascajaxon baquebo hicotanxon mehexon Papa yocaxonquin.

Jesusen coriquiyahpa yohuanquihnhai

(Mt 19.16-30; Lc 18.18-30)

¹⁷ Carihibi bi huesti joni bishquihi-hcahinxon hahqui raboxonen tisquihah-paquexon yocaquin:

—¿Jenquetsahax hen queyoyamanox manatihin, maestro siripan? —hahquin.

¹⁸ Jesusen sca yohiquin:

—¿Jahua copi min hea siripan hahcain? Tsoabi ta srima qui. Papa huesti ta siri qui. ¹⁹ Papan joi tah min honanai. Rehteyamahue. Tsiniyamahue. Yometsohyamahue. Caibo qui quesahi yohuanyamahue. Paranxon bichinyamahue. Miin mama, miin mama nincacoinhue —hahquin.

²⁰ —Berongan pishcahax bi ta hen jascari jihuescái —hihqui yocanica. ²¹ Siri-jaquin bejisxon sca jahan queenxon Jesusen yohiquin:

—Huesti tah min pishinparihi. Jatihibi miin jahuequibo maromaxon jahuabijomabo coriqui hinantanhue naihoh quehax bi sca min hicha bi res jayax-ahnon. Jascajatanax joribihue hehbe canoxon —hahquin. ²² Jan jascajaha jahuen jahuequibo hichahi copi met-samarenenax masa shinanbahini caresscái. ²³ Jato jispaquexon sca jahuen hax-enicabo Jesusen yohiquin:

—Jahuequi hichayahpa joni jano Papan jihuemahi janin hihquiti ta tee bi res qui —jato jaquin Jesusen. ²⁴ Jan jascajaha jahuen haxenicabo rahtecani. Rahtetaiton Jesusen jato yohirihbiquin:

—Jano Papan jihuemahi janin hihquiti ta tee bi res qui, heen baquebaan. ²⁵ Hahua xohmox bero chirehuinti tee que bi ta jahuequi hichayahpa joni jano Papan jihuemahi janin hihquiti hashoan tee qui —jato jaquin. ²⁶ Jan jascajaha hiti rahtetax yohuancani:

—¿Jascahiya tsoa non queyoyamanox manatihin? —hihcáni. ²⁷ Jato jisxon Jesusen yohiquin:

—Jonibaan hahtipahyamahi bi ta Papan hahtipahiqui. Papan ta jatihibijati hahtipahiqui —jato jaquin.

²⁸ —Jise. Jatihibi jenebahinax tah non mihibtan sca cahi —hihscai Pedro.

²⁹ —Hen mato yohinon nincanahue. Jahuen xobo, jahuen huetsabo, jahuen chocabo, jahuen mama, jahuen papa, jahuen baquebo, jahuen huaibo, jaa rahsi hea copi, heen joi siri copi rihbi jenebahinai jonin ta jan potabahinai quescahpabo rihbi bihyaxihqui qui. ³⁰ Bih ta jatihiqui xobobo, huetsabo, chocabo, mamabo, baquebo, huaibo. Huesti jenebahinnixon ta cien sca bihribiyaxihqui qui. Rahma tahni ta jascapahbo bihyaxihqui qui, caibaan sca jato tiromajacatsihqui jatsanjanon. Papan jihuemahitian rihbi ta queyoyamanox manatihiqui. ³¹ Hicha bebocanahibo ta chinijaqueyaxihqui qui.

Chinitaibo ta beboyaxihqui —jato jaquin.

**Jan mahuayaxihqui
Jesusen yohirihbihi**

(Mt 20.17-19; Lc 18.31-34)

³² Jaatian sca bahin cahax, Jerusalen janin bocani. Jesus bebohi. Jano cahiya ta jan honanmahibo rahtecannishqui. Chibanaibo rihbi raquecani. Hahquirihbi jahuen doce joni quenabohanxon jaa huinoyaxihquibo jato yohiquin.

³³ —Jisnahue. Jerusalen janin tah non cahi. Jano ta sacerdote hapobo, huis-hani honanbo rihbi hea hinanyaxihcanhqui. Hinanahbo ta Rehteti ta jaiqui hihxon nahuabo jaabaan sca hinanyaxihquiqui. ³⁴ Hea hosanxon ta hehqui tosh-banhahxon rishquixon rehteyaxihcanhqui. Rehtehipi bi tah hen quimisha neten hihquish hahquirihbi hueniyaxihqui —jato jaquin.

Jacobo betan Juan yocacahtai
(Mt 20.20-28)

³⁵ Jaatian sca Zebedeon baque rabe Jacobo betan Juan Jesus betanbi pecantaba cahi, yohuancanahi:

—Non mia yocacai noque hahxonhue, Maestron —hahcanquin.

³⁶ Jaan sca:

—¿Jahueja mato jaxonti man queenain? —jato jaquin.

³⁷ —Min jihuemahi tian noque tsahomaxahnhue, huetsa mia mecayaho, huetsa mia memiho —hahcanquin.

³⁸ Jesusen jato yohiquin:

—Man yocacai tah man honanyamahi. ¿Hean xehahi mocani man maton rihbi xehati hahtipahin? ¿Hahan hea nashimahiton mato rihbi nashimaha man teneti hahtipahin? —jato jaquin.

³⁹ —Tenequin raham —hihcanni.

—Hean xehahi mocani tah man maton rihbi xehatihi. Hahan hea nashimahiton ta mato rihbi nashimayaxihcanhqui.

⁴⁰ Hea mecayaho tsahomati hihboma tah hen qui, hea memiho rihbi. Jano tsahonica rahsi ta janot tsahotihqui —jato jaquin. ⁴¹ Jacobo betan Juan jascaraiya nincaxon jahuen diez jonibo jato qui rainyamacani. ⁴² Jato quenaxon Jesusen yohiquin:

—Nahua hapobaan ta jaton jonibo jihuematihbi yono yonohihqui man tah man honanai. Jaton patorobaan rihbi jato coshin yonohi ta man honanrihbihi.

⁴³ Mato tah man jascahpabo jatimahi. Maton hapocatsihqui ta maton yonoti jatihiqui. ⁴⁴ Maton cacannicacatsihqui ta jatihibichin teexonnica jatihiqui. ⁴⁵ Jascaribibihi tah hen hahxoni joníqui, yonohima. Hicha jihuetahbó tah hen mahuati joníqui, jaton ribin copijaxoni quescari.

Bartimeo benche Jesusen rohajahi

(Mt 20.29-34; Lc 18.35-43)

⁴⁶ Jericó jema janin sca nococani. Jahuen haxenicaboyabi cahax hicha joniboya rihbi janohax cahiya, bahimahhuan hihquicahuanax Timeon baque Bartimeo tsahoti. Bartimeo cahen benche joni, coriqui yocanica joni. ⁴⁷ Jesus janot huinotai yohihahbo coshin quenaquin:

—Hehon shinanhue, Jesus, Davidinin baquen —hahquin.

⁴⁸ Jascaraiton:

—Jascayamahue. Netehue —hahcanquin hichaxon. Jascahahbo hashoan coshin sca yohuani:

—Hehon shinanhue, Davidinin baquen —hahquin. ⁴⁹ Nihrenenxon Jesusen yohiquin:

—Jaa quenanahue —jato jaquin. Benche joni sca quenacanquin:

—Jenimahax huenihue. Mia ta quenamahiqui —hahcanquin.

⁵⁰ Jahuen rahcoti potabahinax histon huenicahuanax Jesus qui cahi.

⁵¹ Nocotaiton Jesusen yocaquin:

—¿Mia jahuejaxonti min queenain? —hahquin.

—Heen bero hea rohajahue, Hihbon —hahquin benche jonin.

⁵²—Carescatanhue. Hihcoinjaquin shinanax tah min rohascái —hahscáquin Jesusen. Rohascaxon Jesus chibánbonascaquin.

Jerusalen janin Jesus nocoti

(Mt 21.1-11; Lc 19.28-40; Jn 12.12-19)

11 Jerusalen hochoma sca Betfagé jema patax Betania jema patax rihibi Olivos mahchi janin nocoxon Jesusen jahuen haxenica rabe raanquin.

²—Man janó nichi hoque jema janin catannahue. Nocoxon tah man cabacho baque nexa meraxihqui, hahan tsoabi cahtsahoyamaparihi. Pecahax jaya jonoxahnahue. ³Jahuejanoxon man jascajahin jaiboya, Noquen Hihbo ta nea pishinihqui. Rahmabi ta mihqui raanrihbinoxihqui, hahnahue —jato jaquin.

⁴Caxon cabacho baque xehqui patax nexa meracanquin. Janibi bahin nichi meracanquin. Meraxon pecacanquin. ⁵Pecahiton janó nichibaan jato yocaquin:

—¿Jahua man jain? ¿Jahuejanoxon man cabacho baque pecahin? —hahcanquin. ⁶Hihbaan yohiha quescajaquin sca jato yohicanquin. Yohiha jeenhihscacani, jaabo jaya catanon. ⁷Cabacho baque sca Jesus qui hihuecanquin. Cabacho jaton chopabo cajanxon sca Jesus cahtsahoncanquin. ⁸Caibaan rihbi jaton chopabo bahinbi cacajaquin. Caibaan rihbi nahue chian pehi bihtanxon bahinbi cacajaquin.

⁹Bebohibo betan chini cahibo coshin yohuanbonacani:

—Hahxonhue, Papan. Nete Hihbaan raanah ta jahuiqui. Miin shinan siri jaa hinanhue, Papan. ¹⁰Noquen xohta Davidin jahuen jihuetahbó jihuemapá-

honi quescajaribiquin ta janoxihqui, jahuen shinan Papan hinanah. Jaa hahxonhue, Naihoh quehan.

¹¹Jerusalen jema janin hihquihax sca Papan xoboho Jesus hihcohi. Jatihibi jispaquehax moa bepiscaiya Betania jema janin caribih jahuen doce jonyabi.

Bimijoma jihui qui Jesus yohuani

(Mt 21.18-19)

¹²Hoxashinahax mohiyahtax sca Betania janinhax cahax pihan hihqui.

¹³Hochoxon bimi jihui pehiyahpa jisxon bimijoma hin hihquish jisi cahi. Jihui qui nocoxon jahuabi merayamaquin pehi rahsi, jahuen bimiti tian nocorihyamahiya.

¹⁴—Jahuentianbi sca miin bimi tsoanbi piyamanoxihnon —hahscáquin. Jihui yohiquin jan jascajahí jahuen haxenicabaan nincáquin.

Jesusen yometsohbo camahi

(Mt 21.12-17; Lc 19.45-48; Jn 2.13-22)

¹⁵Jerusalen janin nocorihbihax Papan xoboho hihcohi. Hihcoxon janoxon marohibo cainmaquin. Maromahibo picomaquin. Coriqui mahnenanaibaan misabo behonjanaquin. Nobex maromahibaan tsahotibo rihbi behonjanaquin. ¹⁶Jaa xobon tsoabi jaton jahuabora papihibo huinomayamaquin. ¹⁷Honanmaquin sca jato yohiquin:

—Jatihibi mai mehabaan janoxon yocati xobo ta heen xobo jayaxihqui. ¿Jascapa huisha yama quin? Jai bi tah man janó yometsohtaibó jonetí xobo man heen xobo jai —jato jaquin.

¹⁸Jan jascajahí sacerdote hapobo betan huishani honanbaan nincáquin. Jatihibi tsamajaquetai jonibó jahuen honanmati joi qui rahtetaiya hahqui raquexon jenquetsahaxon non jaa rehtetihin hihxon shinancanquin. ¹⁹Bepiscaiya jema janinhax bocani.

Jihui xanahi*(Mt 21.20-22)*

²⁰ Yamequirihbi huinonbahinxon tapon caman bimi jihui xanascai meracanquin. ²¹ Jan yohuanipi shinanrihbixon sca Pedronen yohiquin:

—Jise, Hihbon. Hoa bimi jihui min hahqui yohuanipi ta pehua sca jaiqui — hahquin.

²² Jesusen jato yohiquin:

—Papahon shinancoinnahue. ²³ Hen mato yohinon nincanahue: jahuen join-tinin shinancoinyamaxonma bi shinancoinai jonin nea mahchi nescajaquin yohihiya, Huenitax, hian janin huerame-hhue, jan yohihi quescabijaquin ta Papan hahxontihiqui. Jan yohihi Papan jascascajatihi shinancoinaiya ta Papan hahxontihiqui. ²⁴ Jaa copi tah hen mato yohihi. Papa yocaxon man yocacaibobi man bihtihi shinancoinnahue. Jasca-jaquin yocaxon ta man bihtihi. ²⁵ Nihxon Papa yocaxon mato qui hohchataibo shinanyamascanahue. Maton Papan ri-hbi naihoxhon man hohchataibo shi-nanyamascanon. ²⁶ Jascapa man shi-nanyamascatihbi man shinanparihiya ta maton Papan ri-hbi naihoxhon man hohchataibo shinanbehnotimahihqui — jato jaquin.

Jesus hapohax yohuani*(Mt 21.23-27; Lc 20.1-8)*

²⁷ Jerusalen janin sca boribicani. Papan xoboho Jesus nichiya hahqui bo-cani sacerdote hapobo, huishani honanbo, judiobaan hanibo. ²⁸ Hahqui caxon yocacanquin:

—¿Jahuaxon min jascajahin? ¿Tsoan jascajahue hahca min jascajahin? — hahcanquin.

²⁹ —Mato rihbi ta hen yocacai. Man hea yohihiya tah hen jahuaxon hen nescajahи hean rihbi mato yohitihi. ³⁰ ¿Tsoan raana Juaman nashimapahon-

ishquin? ¿Papan nan? ¿Jonibaan nan? Hea yohinahue —jato jaquin.

³¹ Jaabo rahsi sca yocacahnanananci: —Papan rahan, hih non jaiya ta jaan sca noque yocatihiqui, Papan raana Juaman nashimahiya jahua jenquet-sahin sca man jaa nincacoinyamani-hquin? ³² ¿Jonibaan rahan, hih cahra non jatihin? —hihcandi tsamajaquetai jonibo qui raquetax. Papan joi yohinica Juan jai jatihixonbi shinanai copi jato qui raquecani. ³³ Yocacahnananxon Jesus yohicanquin:

—Non tah non honanyamahi —hihcandi.

—Hean rihbi ta hen mato yohiyamahi, jahuaxon hen nescajahи —jato jaquin Jesusen.

Tiromajaquin teexonnicaahbo*(Mt 21.33-46; Lc 20.9-19)***12** Jaa patax queha joi sca Jesusen jato yohiquin:

—Huesti jonin cahen huai banahan. Banaxon chiquequin. Chiquexon macan quenchajaquin, bimibo jentsin-noxon. Janoxon huai coirannoxon sca tapojascaquin.

Banaquin queyoxon sca caibo jahuen huai hinantahquin. Huai hihbo sca huetsa main cahi. ² Bimi tian jan hinantaho hihbobo qui jahuen joni raan-quin, bimi texe hinanahbo. ³ Nocotaiton rishquixon jahuabi bimijoma raansca-canquin. ⁴ Mequen bi res nocotaiya huetsa jahuen joni sca raanrihbiquin. Nocotaiton mapo qui tsehuejaxon tiro-majacanquin. ⁵ Huetsa jahuen joni rihbi hapon raanrihbiquin. Jaa rehtecan-quin. Huetsa rihbi jascajacanquin, caibo rishquixon caibo retequin.

⁶ Huesti sca jai, hahan jan shinanai jahuen baque huesti sca. Chini sca jaa jato qui raanquin, heen baque ta nin-catihcaniqui, hihxon. ⁷ Nocotaiya hinantaho hihbobo yohinani: Nea ta jahuen

papan huai hihboyaxihqui qui. Jaa rehtehi canon bonahue jahuen huai noquenah sca janon, hihcani.⁸ Jaa bihxon rehtexon huai behro potacanquin.

⁹ ¿Jahueja jascapahbo huai hihbaan jatihiquin? Joxon ta hinantaho hihbobo rehteyaxihqui qui, huetsabo sca huai hinantahnoxon.

¹⁰ ¿Nescajaquin huishani joi man jisyamaniquin?

Tiroma ta jaiqui hihxon xobojahibaan potabohannihbo jihui ta hahqui xobojati jihui qui.

¹¹ Papan ta jascajahiqui. Jan jascajahi jisish tah non rahtetai

—jato jaquin.

¹² Jahuen huai joi jan yohihi jatoya jan joahi honanxon jaa xecotancatsihquibo bi tsamajaquetaibo qui raquetax jaa janinhax boresscacani.

Hapo copijati jaiquin hihquibo

(Mt 22.15-22; Lc 20.20-26)

¹³ Yohuanquihnahbo jaamahi yohuanaiton bijnnon fariseoboya herodianobo sca raancanquin. ¹⁴ Raanahbo hahqui caxon yohicanquin:

—Mian ta min ponte yohihi, Maestro. Non tah non honanai. Rabinxonma tah min honanmahi. Tsohqui raquexonma tah min jatihibi jonibo min yohihi. Jahuabi joi huetsajaxonma tah min ponte res noque yohihi. Papan joi ta min honanmacoinai. Cesaronen noque cobranah noquen copijati joi jaiquin? ¿Yamahirquin? ¿Non copijatihin? ¿Non copijatimahin? —hahcanquin.

¹⁵ Jaabo hihcoinicamahi yohuanai honanxon jato yohiquin:

—¿Jahuejanxon man hea tanahin? Huesti coriquiya benahue hen jisnon —jato jaquin. ¹⁶ Huesti bohiboya jato yocaquin:

—¿Tsoana hin, nea mapo? ¿Nea huisha cahran? —jato jaquin.

—Cesarona rahan —hihcani.

¹⁷ —Cesaronabo Cesaro hinanrihbihnahue. Papanahbo Papa hinannahue —jato jaquin Jesusen.

Jan jascaraiya hahqui raquecani.

Non teehihtihin hihquibo

(Mt 22.23-33; Lc 20.27-40)

¹⁸ Saduceobo sca Jesus qui bocani. Tsoabi ta hahquirihbi huenitimahiqui hihquibo. Nocotax yocacahcany:

¹⁹ —Moisesnin ta noque huishaxonnishqui, Maestron. Jahuen huetsa baquejahaxma mahuataiya ta jahuen yononma jahuen chinipan bihtihiqui, jahuen bochan baque janon hahqui baquejanoxon hahquin huishaquin.

²⁰ Siete huetsabo ta janishqui. Beboquihahnen ta haibo bijnishqui.

Bichish bi mahuati, baquejahaxma.

²¹ Jahuen chinipan sca ta jahuen yononma bijnishqui. Bichish bi mahuati, baquejahaxma. Jahuen jochica jascarihbibi.

²² Siete rahsi jascari mahuati, baquejahaxma. Chini sca haibo rihbi mahuati.

²³ ¿Papan noque hahquirihbi huenihi tian jahuemehatona jaa haibo hihyaxihqui qui, siete jatihixonbi haibojani? —hahcanquin.

²⁴ Jesusen jato yohiquin:

—Papan huishamani joi honanyamahax tah man jascari, jahuen coshi rihbi honanyamahax tah man ponte yohuanyamahi. ²⁵ Mahuataibo hahquirihbi huenihi tian ta Papan yonotibo naihoh queha jai quescapahbo bebobo jayaxihqui qui huanohahmabo. Haibobo rihbi ta beneyahpatimahiqui. ²⁶ ¿Mahuanibho hahquirihbi huenitimahiqui? ¿Papan Moises yohini man jisyamaniquin, Moisesnin huishani janin hoa jihui namantiba pishca joibo jaiton? Papan ta Moises yohinishqui: Abrahanen Papa Dios tah hen qui, Isaaqueen Papa Dios, Jacobon Papa Dios hahquin.

²⁷ Mahuataibaanama bi jihuetaibaan Papa Dios ta jaa qui. Jaamajaquin tah man shinanai —hahquin jato.

Non hihti nincati

(Mt 22.34-40)

²⁸ Jaatian sca huishani honan huesti jato pataxi jahui. Jaabo yohinanai nincaquin. Jesusen jato yohiquin sirijahi jisxon Jesus yocaquin:

—¿Papan yohini joi non jahuemeha hihti nincatihin? —hahquin.

²⁹ Jesusen sca yohiquin:

—Hihti nincati joi ta nea qui. Nincanahue, Israelibaan. Noquen hihbo Papa Dios ta jaa huesti hihbo qui.

³⁰ Miin Hihbohon shinanhue miin jointiboyaxonbi, miin yoshinboyaxonbi, miin shinanboyaxonbi, miin coshiboyaxonbi.

³¹ Jaa pecaho ta nea qui. Mihbe jihuetabohon shinanhue, mihmebi min shinamehti hihqui quescarihbijaquin. Nea rabe joi mentan ta hashoan hani joi yama qui —hahquin.

³² Jascajaha huishani honan joni sca yohuani:

—Ponte ta min jai, Maestron. Papa Dios huesti tah qui. Huetsa yamahi, jaa huesti. Hihcoin tah min jai. ³³ Noquen jointiboyaxonbi noquen shinanboyaxonbi noquen coshiboyaxonbi noquen Papahon shinantixon, non noquebi shinamehti hihqui quescarihbijaquin noquen hahbe jihuetaibohon shinanti ta Papa qui hinanti jatihibi mentan hashoan siri qui. Jatihibi hinábo rehtexon Papa qui hinanti mentan hashoan siri —hihqui.

³⁴ Jan honanax yohuanai jisxon Jesusen sca jaa yohiquin:

—Papan jihuematí hochoma ta mia qui —hahquin.

Jaa pecaho yocati qui raquecani jatihibi.

Cristo yocacahtai: ¿tsoan baque hea quin?

(Mt 22.41-46; Lc 20.41-44)

³⁵ Papan xobohoxon honanmahahnan Jesusen jato yocaquin:

—¿Jenquetsaphin huishani honanbaan nescajahquin: Cristo ta David xohota qui hahquin? ³⁶ Dios Yoshiman shinanmaha ta Davidinibni yohinishqui: Papan ta heen hihbo yohinishqui: Hea mecyaho tsahohue, miin rahuibo hen mia namanaxonnon caman.

³⁷ Jaa yohihi, Heen hihbo, ta Davidinibni janishqui, jaanbi. ¿Jenquetsahax sca jahuen xohta hihtihquin? —jato jaquin.

Coin coinxon hicha tsamajaquetaibaan nincacanquin.

Jaton haxemanicahbo Jesusen cahehi

(Mt 23.1-36; Lc 11.37-54; 20.45-47)

³⁸ Honanmaquin jato yohirihbiquin:

—Huishani honanbo qui raquenahue. Chopá nenque sahuehax ta nihmiti costancaniqui. Janoxon maroti janin caibaan jato hapon hahti rihbi ta costancaniqui. ³⁹ Jaho tsinquití xoboho ta hashoan siri bo tsahotibo rihbi queencaniqui. Fiesta tian ta jano hashoan cacannicabo tsahotai janin tsahocatsihcanihqui. ⁴⁰ Haibo yononmanen xobo ta jahuen jahuequiboyabi bichincaniqui. Caibaan jato jisnon hihxon res ta chaijaquin Papa yocacaniqui. Jascapahbo ta hashoan casticanyaxihqui —jato jaquin.

Yononmanen jan jai pishca hinanai

(Lc 21.1-4)

⁴¹ Jano Papa Dios hinanti coriqui naneti hoque tsahoxon jaton coriqui nanehibo Jesusen jisquin. Coriquiyahpa jonibaan ta hichaxon hicha coriqui nanecannishqui. ⁴² Jahuabijoma haibo yononma huesti joxon cahen nanequin,

rabe coriqui pishca huesti soro copitai.
⁴³ Jahuen haxenicabo quenaxon sca Jeseusen jato yohiquin:

—Nincanahue, mato yohinon. Jatihibi coriqui nanehibo mentan ta nea yononmanen hashoan nanehiqui.
⁴⁴ Hicha jaxon ta jaabaan namecaniqui. Jahuabi jaxonma bi ta neatohon jan jai pishca queyobahinihqui nanequin —jato jaquin.

Papan xobo huaxeyaxihquibo

(Mt 24.1-2; Lc 21.5-6)

13 Papan xobohoh quehax cainaiton sca jahuen haxenica huestichin yohiquin:

—Maestron, yotihoparahbo macanbo, yotihoparahbo xobo jise —hahquin. ² Jeseusen sca jaa yohiquin:

—¿Nea hihtihosi xobobo min jisin? Ni huesti macanbi ta huetsa cahchian caht-sahoyamascatihiqui. Jatihibi ta pota-paueyaxihcanihqui —Jesusen jaquin.

Nete queyoti jaonahi honanti

(Mt 24.3-28; Lc 21.7-24; 17.22-24)

³ Picotax sca Papan xobo hoque to-can Olivos manan janin tsahotaiton Jesus yocacanquin Pedro, Jacobo, Juan, Andres, jaabo rahsichin.

⁴ —Noque yohihue. ¿Jahuentian jascajaxyahcanihquin? ¿Jahua hahan honanti jayaxihquiquin, min noque yohiha quescabi janon? —hahcanquin.

⁵ Jesusen jato yohiquin:

—Jisnahue. Mato parancammis. ⁶ Jaa ta hen qui hihquish ta heen janen joyaxihcanihqui hicha. Hicha jonibo ta paranyaxihcanihqui. ⁷ Rehtenanaibo nincacax, hocho rehtenanaibo joi rihibi nincacax raqueyamanahue. Nete queyorihiyamanon ta jascatihiqui. ⁸ Nahuabo ta hahbe nahuabo betan rehtenanti-hiqui. Quiquin hapon jonibo ta huetsa quiquin hapon jonibo betan rehtenanti-hiqui. Huetsancobo ta mai mihuanyax-

ihquiqui. Piti ta yamayaxihquiqui pi-han hihquibo. Jascaraiboya ta hohmis hohmisti pehocohtiqui.

⁹ Matobi coiramenahue. Casticannicahbaan tananon ta mato hinanyaxihcanihqui. Haho tsinquit xobohoxon ta mato rishquiyaxihcanihqui. Tinintibo bebon tah man nihyaxihqui, quiquin hapobo bebon rihbi. Man tah man jato yohicoinyaxihqui. ¹⁰ Heen joi siri ta jatihibi jonibo pari yohiti jaiqui. ¹¹ Mato yahtanxon hinanaiya, jahua non jatihin hihxonma masa shinanyamanahue. Mato jaatianbi hinanai yohuan yohiyaxahnahue. Matonbi shinanaxma bi Dios Yoshiman yohuanmaha ta man yohuanyaxihqui. ¹² Huetsa jonin ta jahuen huetsabi hinanyaxihquiqui, retehahbo. Huetsa papan ta jahuen baquebi jascajarihbixayihquiqui. Jaton papa, jaton mama rihbi rahuijaxon ta baquebaan jato retemayaxihquiqui. ¹³ Jatihixonbi ta mato jistahihmayaxihcanihqui man heen jane jai copi. Jascalahbo bi ta mahuanoxon caman tenehi joni hean teehihmayaxihqui.

¹⁴ Jan jan nihtima janin rahninti masajanica nichiton merahax mahchi quiri jabayaxahnahue, Judea mai mehahbon. Honanhue, nea quirica jisnican. ¹⁵ Xobo pemacanya janinhax jahuequi bihbahini xoboho hihcopaqueyamayaxahnhue. ¹⁶ Huai chian teetax rahcoti bichi joribiyamascayaxahnhue. ¹⁷ Tohoyabo betan xoma hahmahibo ta hohmis hohmis yaxihquiqui. ¹⁸ Matsi tianbi jascayamaxahcabo Papa yocanahue.

¹⁹ Papan jato jonijamenoni yamanish ta rahma caman tsoan jisyamanibo tiromabo netebo jayaxihquiqui. Jaax ta jahuentianbi jascapa hahquirihbi jaribitimahiqui. ²⁰ Jaa netebo noquen hihbaan basimayamahiya

cahen tsoabi baneyamahan. Jan caisnibohon shinanxon ta jaa netebo basimayamayaxihqui qui. ²¹ Jise, nea ta Cristo qui hihquiboya nincayamanahue. Jise, hoa tah qui, hihquiboya hihcoinai shinanyamanahue. ²² Cristohaxma bi Cristohicamahi Papan joi yohihicamahibo rihbi ta jatihi qui. Hahan honantiboya hahan rahtetibo ta mato jismatihi qui, hahtipahxon Papan caisaibo parannoxon. ²³ Jisnahue. Jascapahbo jatihibi jariyamanon ta hen mato yohiscai.

Noquebaque joyaxihqui

(Mt 24.29-35, 42-44; Lc 21.25-36)

²⁴ Jaa hihti tiromabo pecaho ta bariyahpanbi bari xabayamascatihqui. Hoxne nete rihbi ta yamascatihqui. ²⁵ Naihoh quehax ta huishibo paqueyaxihqui qui. Hani huishmabo ta bahinma sca cayaxihqui qui. ²⁶ Jaatian ta nai cohin tocan hihti coshi shinanya hihti xabatai hea noquebaque jahui hea jisyaxihcanihqui. ²⁷ Jaatian tah hen heen yonotibo raanyaxihqui. Raanah ta reboqui caxon, chiponqui caxon bari cainai quiri caxon bari hihquihi quiri caxon janai nai chibechijaquehtancahuanaiton caxon jahuen caisaibo tsinuiyaxihqui qui.

²⁸ Pesto jihui jisquin hahcajaquin honannahue. Pesto pereocotax bochochihiya tah man jene tian rahma jahui man honanai. ²⁹ Jascajaribiquin hen mato yohihi quesa sca jai jisxon hea noquebaque neno pishca sca jaonahi honannahue. ³⁰ Man honanon hihxon tah hen mato yohihi: rahma chini ji-huetaibo queyoriyama jai bi ta hen mato yohihi quesa sca jayaxihqui qui. ³¹ Naiya mai queyocahinai bi ta heen joi jascabiyaxihqui qui.

³² ¿Jahuentian jascapahbo jayaxihqui qui? ¿Jahua neten, jahua hora? Tsoanbi ta honanyamahique.

Papan naihoh quehabaan yonotibaan bocabi honanyamaquin. Papan baquen rihbi honanyamarihbiquin. Papa huestichin honanquin.

³³ Jisnahue. Jahuentian jaa nete jotihiquin honanaxma coiramenahue. ³⁴ Huesti joni hocho catani jahuicama tah hen jatihi. Jahuen xobo janinhax cacatsihxon cahen jahuen jonibo tee hihbomapaquequin. Huetsa jahuen tee, huetsa rihbi jahuen tee, jatihibi jaton tee jato hihbomapaquequin. Xehpoti coirannicah rihbi yohiquin coiranhue, hahquin. ³⁵ ¿Jahuentian xobo hihbo joyaxihqui qui? ¿Yamescaya, yame pochinicon, hatapa queotaiya, xaba paquetaiya? Man tan man honanyamahi. Jaa copi coramenahue. ³⁶ Man shinanyamahi tianbi joxon hoxahiton mato meramis. ³⁷ Jatihibi jonibo hen yohihi quescajaquin tah hen mato jai: coiramenahue.

Jesus bihti yohinanaibo

(Mt 26.1-5; Lc 22.1-2; Jn 11.45-53)

14 Pascua fiestaya chahoma paan fiesta rihbi nocoti rabe nete pishinaiya cahen sacerdote hapobo betan huishani honanbo yohinani:

—¿Jenquetsahaxon non Jesus paranxon bihtihin rehtenoxon? ² Fiesta jai tian bihtima ta jaiqui, hoa fiestajahi jonibo rehtenanmis —hihcani yohuani.

Haibaan Jesus hininjahi

(Mt 26.6-13; Jn 12.1-8)

³ Jaabo jascarai bi Betania jema janin Jesus pihi tsahoti Simoman xoboho. Simon ta sipi paheyahpa japhahonishqui. Pihi tsahotaiya huesti haibo jahui, hanhan hininti nardo xeniyahpa pomoya, hihti copi bi res hanhan hininti. Jahuen pomo retequebahinxon Jesusen mapo qui nardo xeni machiquin. ⁴ Machicaiya caibo rainyamahi:

—¿Jahuejanoxon nea hahan hininti xeni jascajaquin yohyoquihqui? ⁵ Jaa nardo xeni maromaxon ta trescientos denarios, hashoan rihbi, bihquehaniqui jahuabijomabo sca coriqui pishca hinannoxon —hihcandi, haibo qui rainyamahi.

⁶ Jesusen jato yohiquin:

—Jenenahue. ¿Jahua jenquetsahin man jaa jatsanjain? Jan hea jascajaxonah ta siri bi res qui. ⁷ Mato tocan ta jahuabijomabo jascabihi jatihiqui. Man queenai tianbi tah man jato yanapanti hahtipahi. Huetsa tian ta mato tocan hea hihyamascatihu. ⁸ Jan hahtipahi quescaja ta haibaan jaxonaxqui. Hea tsahonyahnxon ta heen yora hea hininjahiqui. ⁹ Yohicoin ta hen mato jai: jatihibi mai janinxon heen joi siri yohixon ta jaan hea jascajaxonni yohiyaxihcanihqui, jaa haibo shinanxon.

Judasen Jesus paranxon bihmahi

(Mt 26.14-16; Lc 22.3-6)

¹⁰ Jaatian sca Judas Iscariote cahi. Jaa cahen Jesusen haxemati huesti, sacerdote hapobo qui cahax jato Jesus hinanyahnxon jato betan bexohi. ¹¹ Jan jascacatsihqui nincacax coincoinxon yohicanquin:

—Mia tah non coriqui hinantihi —hahcanquin. Jenquetsahaxon hen hinantihin hihxon Judasen shinanscaquin.

Cristo shinanhahnhan piti

(Mt 26.17-29; Lc 22.7-23; Jn 13.21-30; 1 Co 11.23-26)

¹² Chahoma paan fiesta pehocohti neten sca pascua carnero baque rehtehiboya Jesusen haxenicaabaan yocauquin:

—¿Jahuerahnon non catihin, pascua fiesta mia pitijaxonnoxon? —hahcanquin.

¹³ Yocacah cahen rabe jahuen haxenicabo raanquin yohixon:

—Jema janin botannahue. Janoxon ta jeneyahpa poo maibehnani jahui jonin mato behchixihqui. Hahbe botannahue. ¹⁴ Jan hihcohi janin xobo hihbo yocanahue: Noquen maestron ta mia yohihqui, Jahuerahnon hin, janoxon piti chique, janoxon heen haxenicabo betan hen pascua fiesta pinon. ¹⁵ Bochiquiha hani chique ta mato jismaxihqui, misayahpa, tsahotiyahpa, moa hihrescai. Janoxon noque pitijaxonannahue —jato jaquin.

¹⁶ Raana jema janin nocoti bocani. Jan yohihi quescabijaquin meracanquin. Pascua fiesta sca pitijaxoncanquin.

¹⁷ Bepiscaya jahuen doceyabi Jesus nocoti. ¹⁸ Pihi tsahoxon jato yohiquin:

—Man honannon hihxon tah hen mato yohihi: mato quiha huestichin ta hea bihmatihqui, hehbetan pihi huestichin.

¹⁹ Masa shinanxon jatihxionbi yocapaquecanquin:

—¿Hea hen quin? —hahcanquin.

²⁰ —Heen doce quiha huesti tah qui. Hen poseman netinai tason qui ta jaan rihbi hehbetanbi jahuen poseman netinihqui. ²¹ Hea yohihi huishani joi jai quescari tah hen mahuanoxihqui. Hahraai hih ta jatihiqui, hea bihmahi joni. Jahuentianbi jonijayamaha ta jaa hashoan siribiresquehanhqui —jato jaquin.

²² Pihanhan sca posen bihxon Papa yocaxon tehcapaquexon jato hinanpaquequin.

—Bihnahue. Nea ta heen yora qui —hahquin. ²³ Tason rihbi sca bihxon Papa yocaxon jato hinanquin. Hinana jatihxionbi hahqui xehaquin.

²⁴ —Nea ta heen jimi qui. Hicha jonibaan hohcha copijaquin tah hen heen jimi potaxihqui. Mahuaquin tah hen mato hahxonbahinai. ²⁵ Yohicoin tah hen mato jai: nea xehati tah hen hahquirihbi xehayamascatihu. Janoxon

Papan jihuemahi janinxon pari ta hen behna sca xehayaxihqui —jato jaquin.

Pedro paranahxihqui

(Mt 26.30-35; Lc 22.31-34; Jn 13.36-38)

²⁶ Papa qui behuahax sca Olivos manan janin boribicani. ²⁷ Janoxon sca jato yohiquin:

—Jatihixonbi tah man hea potabahin noxihiqui, huishani joi jai quescajaquin: Carnero coirannicah ta hen rehtetih carnerobo potojahtani jabisihcani. ²⁸ Hi-hquipi bi hahquirihbi huenihah tah hen hea pari Galilea main cayaxihqui, man chini canon —jato jaquin.

²⁹ Pedronen sca yohiquin:

—Jaabaan jatihixonbi mia potahi que bi tah hen hean mia potatimahi —hahquin.

³⁰ —Yohicoin ta hen mia jai: hatapa rabe coti queori jaima tah min heen joni hihtima min quimisha coti yohinoxihqui nea yamebi —Jesusen jaquin. ³¹ Jasca-jaha coshin sca yohuani:

—Hea miayabi rehthibaan bi tah hen miin joni hihtima hen yohitimahi —hihqui.

Jatihibi sca jascarih.

Getsemaní huai chianxon Jesusen yocacai

(Mt 26.36-46; Lc 22.39-46)

³² Getsemaní janeya huai janin sca bocani. Nocoxon sca jahuen haxenicabo yohiquin:

—Nenobi tsahopaqueñahue, hen Papa yocatannon.

³³ Jascajaxon Pedro, Jacobo, Juan, jaabo rahsi boquin. Hihti masa shinanscaquin Jesusen. Rahte rahteti.

³⁴ —Heen jointiboyabi tah hen bena benatai, hahan muhuati bena tah hen jai. Nenobi banexon coirannahue —jato jaquin.

³⁵ Hoque pishca cahax beho racaxon Papa yocaquin, janoxihqui jatimajati yocaquin.

³⁶ —Papan, hea janoxihqui jayamanoxahnon jahue, jatimajati hahtipahxon. Mian tah min jatihibi hahti hahtipahi. Jaabi hea queenai quescayamahi bi mia queenai quescahue —hahquin.

³⁷ Joribixon jaabo hoxahiton meraquin. Hoxahiton meraxon Pedro yohiquin:

—¿Min hoxayamahin, Simoman? ¿Huesti hora pishca min coiranti hahtipahyamahin? ³⁸ Coiranhanan Papa yocanahue mato hohchati queenmayamahabo. Maton shinaman man coshiti shinanai bi tah man shinan coshi yamahi —jato jaquin.

³⁹ Hahquirihbi caxon Papa yocaribiquin. Jan yocacah quescajaquin yocaribiquin. ⁴⁰ Joribixon sca jato hoxahiton merarihbiquin, jaton bero quextojaqueti. Yocacah bi jahua yohiti honanya-macanquin. ⁴¹ Jahuen quimisha coti sca catani joribixon jato yohiquin:

—¿Man tanti tantihi hoxaparihin? Senen ta jaiqui. Hora ta nocoscaini. Hea noquebaque ta hohchayahpabo jonibo hinannoixihqui, bichíbo hi-hxon. ⁴² Huenitax canon bonahue. Jis-nahue, hea bihmanica ta jahuiqui.

Jesus menexxon bohibo

(Mt 26.47-56; Lc 22.47-53; Jn 18.2-11)

⁴³ Jan jascajahi betanbi Judas nocoti, jahuen doce quiha huesti. Hicha joni machitoyahpabo huinoyahpabo rihbi hahbetan becani. Sacerdote hapobaan raanah becani. Huishani honanbo betan judiobaan hanibaan rihbi raanah becani. ⁴⁴ Jato betan bexohax bihmanica jato bebohi jahui. Hahan Jesus honanahbo jato yohibenai:

—Hen hicottannoixihqui joni tah qui. Jaa bihxon coiranxon

hiotanno xahnahue —jato yohibenani jahui.⁴⁵ Nocotax res sca Jesus qui joxon:

—Hihbon —hahxon hicotanquin.

⁴⁶ Hicotanaiya Jesus bihcanquin.

⁴⁷ Jesus bichiboya jaa patax nichi huestichin jahuen machito tsecaxon sacerdote hapon yonoti reraquin bi jahuen pabinqui res paxtebahinquin.⁴⁸ Jesusen sca jato yocaquin:

—¿Yometso bihquin hahcajaquin man hea bichin, machitoyahpa joxon, huinoyahpa rihbi joxon?⁴⁹ Netetihibi Papan xobohoxon honanmahanan hen mato betan hihrasih bi tah man hea bihyamahipiqui. Jaabi huishani joi jai quescabi janon tah man nescajahi —jato jaquin.

⁵⁰ Jato jascajanon jatihixonbi jaa potabahini jahuen haxenicabo jabati.

Jabatai beronan

⁵¹ Huesti beronanen cahen jahuen rachtoti res sahuexon Jesus chibankuin.⁵² Jaa rihbi sca bichibaan bi jahuen rachtoti potabahinax chopanma sca hishtocanahi jabati cahi.

Tsinquixon Jesus cahehibo

(Mt 26.57-68; Lc 22.54-55, 63-71; Jn 18.12-14, 19-24)

⁵³ Sacerdote hapo janin sca Jesus hiocanquin. Sacerdote hapobo, judiobaan hanibo, huishani honanbo jatihibi jano tsinquicani.⁵⁴ Hiohibo bi hochoxon Pedronen jato chibanaquin sacerdote hapon xobo jemanhihti janin hihconoxon caman. Jemanhihtin sca sacerdote hapon yonotibo betan pehchihi tsahoti.

⁵⁵ Xobohoxon cahen sacerdote hapobo betan tsinquitaibaan jatihixonbi Jesus qui yohuancointi joi benacanquin, cahexon retemanoxon. Benaxon bi mer-

ayamacanquin.⁵⁶ Hahqui yohuancoini-hcamahi quesahi yohuanaibo hichahi. Jaa joiya huesti yohuancoinyamacani.⁵⁷ Caibo nihinahtax hahqui yohuancoini quescari quesahi yohuani.

⁵⁸ —Nea mequeman xobojanihbo Papan xobo tah hen potapaqueyaxihqui. Quimisha neten potahipixon tah hen huetsa rihbi sca xobojayaxihqui, mequeman hahcahma sca, hih ta jaipishqui noquen nincanonbi —hihcaci.

⁵⁹ Jascaraibaan bi jaa joiya huesti yohuancoinyamacani.

⁶⁰ Naponbi nihxon sca sacerdote hapon Jesus yocaquin:

—¿Min jahua yohiti yamahin? ¿Jahua yohuan neabo mihqui jaiquin? —hahquin.

⁶¹ Jascalah bi jahua hihyamahi. Neteti. Sacerdote hapon yocarihbiquin:

—¿Mia min Cristo quin? ¿Mia min noquen Papan siripan baque quin? —hahquin.

⁶² —Jaa tah hen qui. Coshiyahpaton mecayaho hea noquebaque tsahotai tah man jisyaxihqui. Nai cohin tocan jahui rihbi ta man hea jisyaxihqui —jato jaquin Jesusen.

⁶³ Jan jascajahiya sacerdote hapon sca jahuenahbi jahuen chopas huaxabahinxon yocaquin:

—¿Jahua copi non hashoan rihbi hahqui yohuanti benaparitihin?⁶⁴ Jan tiromahi Papa qui yohuanai ta man nincasai. ¿Jahuejati man shinanain? —hahquin.

—Rehteti ta jaiqui —hihcaci jatihibi.

⁶⁵ Caibo hahqui toshbanhiahcagini. Jahuen bemanan beracohxon rishquixon yocacanquin:

—¿Tsoan mia rishquihiquin? Noque yohihue —hahcanquin.

Sacerdote yonotibaan sca bihxon rishqui rishquirihbiquin.

Pedro paranahti

(Mt 26.69-75; Lc 22.56-62; Jn 18.15-18, 25-29)

⁶⁶Naman jemanhihti janin Pedro nichiya sacerdote hapon yonoti haibo jano cahi. ⁶⁷Pedro pehchihi jisxon bejisquin sirijaxon yohiquin:

—Mia rihbi tah min Nazaret janinha Jesus manahi nihrasahi —hahquin.

⁶⁸Jascajaha jeenhihyamahi:

—Jahua rah tah min jai. Min yohuanai ta hen honanyamahi —hihqui. Jemanhihti xehpoti janin sca Pedro nichiyahatapa queoscai. ⁶⁹Jan cahi jisxon yonoti haibaan jano nichibo sca yohiquin:

—Jaa ta jato betan nihnicah qui —hahquin. ⁷⁰Haibaan jascajahi bi Pedro jeenhihyamahi. Jascama ta qui hihresi. Jaa pecaho pishca jano nichibaan sca Pedro yohirihbiquin:

—Hihcoini tah min jato betan nihnicah qui. Mia ta min Galilea mai meha qui —hahquin.

⁷¹—Hen yohuancoinyamahiya Papan hea rehtenon. Papan hea jiscoina tah hen yohuancoinai. Man yohihi joni tah hen honanyamabiresai —jato jaquin. ⁷²Jahuen rabe coti sca hatapa queoti. Queotaiya cahen Jesusen yohiha joi Pedronen shinanscaquin: Hatapa rabe coti queori jaima tah min heen joni hihtima min quimisha coti yohinoxihqui. Jaa joi shinanax hihti benatax huaohihscai.

Pilatonen Jesus yocacai

(Mt 27.1-2, 11-14; Lc 23.1-5; Jn 18.28-38)

15 Xaba paquescaya sacerdote hapobo, judiobaan hanibo, huishani honanbo, jaabo rahsibi tsinquitax yohinani. Jesus menexxon hioxon Pilato hinancanquin. ²Pilatonen sca yocaquin:

—¿Mia min judiobaan quiquin hapo quin? —hahquin.

—Min yohihi quesca raham —hahquin.

³Hahqui tiromahi yohuanquin sca cahen sacerdote hapobaan joi tsamanscaquin. ⁴Pilatonen sca jaa yocarihbiquin:

—¿Min jahua yohiti yamahin? ¿Mihqui hicha yohuanquin joi tsamanaibo min nincayamahin? —hahquin. ⁵Yocacah bi Jesus jahua hihyamascaiyai Pilato rahteti.

Jesus rehtetijahibo

(Mt 27.15-31; Lc 23.13-25; Jn 18.38-19.16)

⁶Pascua fiesta tian ta jan sipojani huesti Pilatonen jato picoxonpahonishqui, jaabaan yocacai huesti picoxonquin. ⁷Jaton quiquin hapo potacatsihqui, rehtenanxon huetsa jonibo rehte hiton jan sipojanibo jai. Huesti cahen Barrabas janeya. ⁸Tsamajaquetai jonibo mapexon sca, jan jato hahxonpahoni quescajaquin Pilatonen jato hahxonnon yocacanquin. ⁹Yocacatsihqui bi jaan pari yocaquin:

—¿Judiobaan quiquin hapo hen mato picoxonti man queenyamahin? —hahquin. ¹⁰Sacerdote hapobo notsi notsixon hinanai honanscaxon jascajaquin. ¹¹Jascalah bi cahen sacerdote hapobaan tsamajaquetaibo yohuanquihnuin sinamaquin, Jesus yocatima shinanahbo. Sinaxon sca Jesusma bi Barrabas jan jato picoxonnon yocacanquin. ¹²Jascjahiton Pilatonen jato yocarihbiquin:

—¿Barrabas picoxonti man queenaiya maton quiquin hapo hahcaibo joni cahran? ¿Jaa hean jahuejatin? —jato jaquin.

¹³—Jihuin hueonhue —hahcanquin coshin bi res.

¹⁴—¿Jahua copi nan? ¿Jahua tiroma jaiquin? —jato jaquin Pilatonen. Jan jascalah bi hashoan coshin sca yohuancani:

—Jihuin hueonhue —hahcanquin. ¹⁵Jenimahabo sca Pilatonen Barrabas jato picoxonquin. Jesus rishquimaxon, jihuin hueonnon hihxon, bahnahue jato jaquin.

¹⁶Bahnahue hahca hapon xobo chicho sca sontarobaan Jesus hioquin, pretorio janeya xoboho. Jano hioxon sca hahbe sontarobo jatihibi quenacanquin. ¹⁷Yancon chopasahuemaxon moxa maitijaxon maimacanquin.

¹⁸—Jihuehue, judiobaan quiquin hapon —hahcanquin hapojahicamaxon.

¹⁹Jascajaxon jihui taxon marishquicanquin. Hahqui toshbanhihcany. Hapojahicamaxon hahqui raboxonen tisquihpaquecanquin. ²⁰Hosanquin queyosaxon yancon chopasahuemaxon jahuen chopasahuemaxon. Sahuemaxon jihuin hueonnoxon sca hiocanquin.

Jihuin hueonaibo

(Mt 27.32-44; Lc 23.26-43; Jn 19.17-27)

²¹Simon janeya joni cahchihoh quehax jahuejano huinotaiton jahuen coros hiamacanquin. Jaa ta Alejandro betan Rufo jaton papa hihpahonishqui, Cirene mai janinhah.

²²Jano Gólgota Jane jaiton hiocanquin. Gólgota cahen mapo xaoya manan hihcatsihqui. ²³Mirra rahoya vino mescoxon xehamacatsihquiaan bi queenyamahi. ²⁴Jihuin hueonscacinquin. Jahuen chopabo metisahcanquin. Tsoana banetihiquin hihxon macan bero borasa qui nanexon chicoha huetsa pari cainaiya huetsanbihnon, huetsa macan pari cainaiya huetsan sca bijnon.

²⁵Bari hihinahtaiya hueoncanquin.

²⁶Jahua copi retehiquin honanahbo hihxon quirica sca hueoncanquin. Ju-

diobaan quiquin hapo, hihqui jaa quirica. ²⁷Rabe yometsoh rihbi hueoncanquin, huetsa jahuen mecyaho, huetsa jahuen memiho. ²⁸Jaatianbi ta huishani joi quesa sca janishqui: Hohchataibo betan hihqui shinanxon retehah ta qui, hihqui jaa joi.

²⁹Jano huinotaibaan sca jaton mapo bose bosehihcainxhon hosanquin.

—Heeeeen. Papan xobo potapaquehipixon tah hen quimisha neten hihxon jaa xahnen hen huenirihbiyahqui hih ta min jaipiqui. ³⁰Coros janinhax bototax mihmebi sca teehihhue —hihcany.

³¹Sacerdote hapobo, huishani honanbo betan jascarihbibi yohuani. Hosancanquin.

—Caibo teehihmaxon bi ta hahmebi teehihti hahtipahyamahiqui. ³²Criston, Israelibaan quiquin hapon, coros janinhax rahmabi botopaquequihranhue, botoquihranai mia jisxon non mia ninca-coinnon —hihcany. Hahbe hueonahbaan rihbi hosanquin.

Jesus mahuascai

(Mt 27.45-56; Lc 23.44-49; Jn 19.28-30)

³³Barin manan tsacahiya sca jatihibi mai bahquishihcahinscrai, bari racapaquenon caman. ³⁴Bari racapaquetaiya sca Jesus coshin yohuani:

—Eloi, Eloi, ¿lama sabactani? —hahquin. Papan Dios, Papan Dios, ¿jahua jenquetsahin min hea jenesca? hihcatsihqui. ³⁵Jan jascahi nincaxon:

—Jisnahue, Elías ta quenahiqui —hahcanquin jano nichibaan. ³⁶Hishtocahinxon huesti jonin xehati cachani qui taco quescapah maosahxon jihui taxo qui queonxon sananhihnxon xehamaquin. Xehamaxon:

—Mananahue. Jaa botonnoxon Elías jahui non jisnon.

³⁷Jaatian sca saisaihihquish Jesus mahuascai. ³⁸Jaatianbi ta Papan xobo janin rontamehtai chopasahuemaxon.

ahinnishqui, bochiqui janinhax naman caman.³⁹ Jesus bebon nihxon jan jascari mahuatai jisish capitan sca yohuani:

—Hihcoini, nea ta Diosen baque qui —hahquin.

⁴⁰ Haibobaan rihbi ta hochoxon jisnishi qui. Huetsa cahen María Magdalena, huetsa cahen María, hoa chinitai Jacoboya José jaton mama, huetsa cahen Salomé. Jano nihxon ta jiscannishqui.

⁴¹ Galilea janin Jesus nichiya cahen jaabaan jaa chibapanhonian. Jaa pi marihipahonish. Jesus betan Jerusalen janin jahuipi haibobo rihbi ta jano nihxon jiscannishqui, hichaxon.

Jesus tsahonaibo

(Mt 27.57-61; Lc 23.50-56; Jn 19.38-42)

⁴² Yantanscaya cahen bahquish tantiti neten piyanoxon pitijacanquin, jaton pitijati neten. ⁴³ Jaa copi jahuen raque potahax Pilato janin caxon Jesusen yora Josepan yocaquin. Jaa José ta Arimatea janinhah hihpahonishqui hahbe hapobo tsinquinica, shinanyahpa joni. Papan jihuemahi jiscatsihqui jaan rihbi manaquin. ⁴⁴ Jesus mahuascai nincacax Pilato rahteti. Capitan quenaxon sca yocaquin:

—¿Mahua sca jaiquin? —hahquin.

⁴⁵ —Mahua sca ta jaaxqui —capitan jaiya jeenihscay, Josepan jahuen yora bihnon. ⁴⁶ Sábana maroxon Jesus boton-paquexon sabananen rahcoxon macan xanquen poquinipibo tsahon chicho racanquin. Macan taranxon sca tsahon quini behpoquin. ⁴⁷ Jan jano tsahonai ta María Magdalena betan Josepan mama Marian jisnishqui.

Jesus teehihribihi

(Mt 28.1-10; Lc 24.1-12; Jn 20.1-10)

16 Tantiti nete huinoscaya hinin-jahi canoxon hahan hininti maro-canquin, María Magdalena, Jacobon mama María, Salomé, jaabo rabsibichin.

² Hahan semana pehocohtai neten sca xaba honanax yamequiribi tsahon janin bocani. ³ Yohuanbonacani:

—¿Hahan tsahon behpohipi macan tsoan noque taranbohanxontihquin? —hihcanahi.

⁴ Jaa macan cahen hihtihosi. Jari jisxon moa taranbohanah meracanquin.

⁵ Tsahon chicho hihcoxon joxo tariyahpa beronan mecayaho tsahotai meracanquin. Merahax rahte rahtecani. ⁶ Jaan jato yohiquin:

—Rahteyamanahue. Man tah man Jesus benahi Nazaret janinha Jesus hueonipibo. Jaa ta huenitaxqui. Nenoma sca tah qui. Neno racanipi jisi benahue. ⁷ Yohihi sca botannahue: Mato rihbi canon ta Galilea main Jesus caresscαιqui. Janoxon tah man jaa jistih, jan mato yohihi qui quesabijaquin. Jahuen haxenicabo, Pedro rihbi yohitannahue —jato jaquin.

⁸ Yohihah rahte rahtetax tastahihquish tsahon janinhax picotax bishquihcanahi bocani. Raquetax tsoabi yohibonahaxma bocani.

María qui sanareneni

(Jn 20.11-18)

⁹ Hihquipish bi hahan semana pehocohtai neten hihari huenitax roqui María Magdalena qui pari Jesus cainnish. Jaa haibo janinhah roqui siete tiroma yoshin jaan piconish. ¹⁰ Caxon qui jaa Marian Jesus betan nihcahchihibo huinihi huao-hihquiton meraxon yohiquin:

¹¹ —Hahquirihbi ta teehihquiqui. Hen ta hen jistanai —hah qui jan jai bi qui hihcoinai shinanyamacanquin.

Jahuen haxenica rabe qui caini

(Lc 24.13-35)

¹² Jaa pecaho roqui huetsapahax sca huetsa rabe qui caini, jemama qui cahiton. Jahuen haxenica rabe. ¹³ Jaabo

rabechin qui caxon texe yohihahbaan bi hihcoinai shinanyamarihbicanquin.

Jesusen raantibo raanai

(Mt 28.16-20; Lc 24.36-49; Jn 20.19-23)

¹⁴ Jaa pecaho sca roqui jahuen once qui cainrihbibi pihi tsahotaiton. Hihquipish bi hahquirihbi teehihscai jisxon yohihahbaan bi hihcoinai shinanyamahiboya roqui jato hihti yohiquin, hihcoinai shinanyamahiboca, jaton jointi chahomahi copi rihbi.

¹⁵ —Jatihibi main caxon jatihibi jonibo heen joi siri yohihi botannahue.

¹⁶ Nincacoinaiton man nashimahiboa tah hen teehihmatihi. Nincacoinyamahiboa tah hen casticanyaxihqui. ¹⁷ Heen janen tah man caibaan tiroma yoshinbo

picoxihqui. Joi behnapan ta caibo yohuanyaxihquiqui. ¹⁸ Ronobo bichish bi ta hisinyamayaxihcanihqui. Hahan mahuati paheyahpabo xehahax bi ta hisinyamayaxihcanihqui. Hisinaibo ta mequeman meheyaxihcanihqui rohahahbo.

Jesus hinahihnascái

(Lc 24.50-53)

¹⁹ Jato yohi sca jan jaiya qui noquen hihbo Jesus naihohxon Papan bihininhin, jahuen mécayaho sca tsahonon.

²⁰ Jaabo sca ta jatihibinco caxon Papan joi haxemacannishqui. Noquen Hihbaan ta jato yanapanquin hahan honantijaxonnishqui, jaabo hihcoinai yohuanai honanahbo.

LUCAS

Lucasen huishani joi siri

Teofilon honannon jan yohihi

1 Mihqui tah hen nea joi raanai, señor Teofilon. Neno jenques japhonishquin hihxon hichaxon huishati shinannihbaan bi tah hen hean sca huishaxon mia yohicatsihqui. ²Cristo jomenoni jisnicahboxon ta jahuen joi yohinicabaan noque jaa joi honanmascanishqui, jaabaan jisnixon. ³Min honannon hihxon tah hen hean rihbi huishapaqueti shinanai. Neateman pehocohnish rahma caman jenques jaiquin jatihibi honanquin sirijaxon tah hen huishaxon mia yohihi. ⁴Jenquetsahpa yohuan jacoinnishquin min mian rihbi honancoinnon tah hen nea huishahi.

Nashimanica baquexo picoyaxihqui

⁵Judea main Herodes quiquin hapo japarihiya ta Zacarías janeya joni janishqui. Noquen Papa noque yocaxonicah, jahuen joi haxemanicah. Abías baquebo betan teenica. Jahuen haibo ta Elisabet janeya janishqui, yocaxonica Aaroman chiní baque. ⁶Jaa haibo betan bebo cahen rabebi pontejaquin shinanaibo, Papan yohini joibo nincacoinaibo. Papan yononi quescabijaquin hahcaibo. Jascajati ta jaiqui hihxon Papan yohihi quescabijaxon rabebechinchahua joibi pishinmayamaquin. ⁷Jascapahbohax bi baquejomabo. Jahuen haibo baqueyosma, yoxaboscai, jaa rihbi yosiboscai.

⁸⁻⁹Hen mia yohihi quescari jaton coiranti nete nocotaiya cahen Abías baquebo Papan xobo coirani jaax bocani. Jaton tee hahqui jano Zacarías cahi. Papan xoboho hahan hininjati quetejatanhue hahca jano mapescai.

¹⁰Chichoxon Zacarías huestichin quetejahiya bi ta jemanhihti janin texe jonibo tsamajaquenishqui. Quetejati hora nocotai quen jemanhihtinin tsinquipaquexon Papa yocacanquin. ¹¹Janoxon quetejati janin nihxon sca, Papan yonoti hahqui sanareneni jahui Zacaríasnen jisquin. Jahuen hininjati pataxbi nihrenenai jisquin. ¹²Jisish rahte rahteti. Hiti raqueti.

¹³—Raqueyamahue, Zacarian. Min yocacai ta Papan nincaquihqui. Min hahqui baquejaha ta miin haibaan tohoscaxon baque bihyaxihqui. Jaa pishca tah min Juan janeyaxihqui. ¹⁴Jaa baque copi tah min jenimayaxihqui, hihti coincoimi. Jan cainaiya ta hicha jonibo rihbi jenimayaxihcanihqui. ¹⁵Papan jisí ta haniscaax shinanya joni sca jayaxihqui. Pahe xehayosma. Mae, hompa, jascapa pahebo xehayamaquin. Cainrihyamahiton bi ta Dios Yoshiman jaa hihbojayaxihqui. ¹⁶Jaa copi ta haniscaxon jaan yohi-hah miin caibaan hichaxon jaton shinan ponteyaxihqui, jaton Papa Dios qui hinamehxon. ¹⁷Jahuen hihbo bebohi ta miin baque nihyaxihqui. Elías yamanicaton coshi shinanya ta nihyaxihqui. Jahuen yoshin sca Papan Elías hinanni quescajaquin rihbi ta jaa rihbi hinanah jaaya nihyaxihqui, jonibo shinan hinanbonahi nichi. Jaton baquebohon shinanahbo jato shinan hinanquin. Hihti sirijaquin shinan sca jaábo nincayosmabo yohibonaquin. Jaton Hihbo nincacatsihquibo jaábo hihxon ta jato yohibonayaxihqui —hahquin Papan yonotinin.

¹⁸Jascari Papan yonoti yohuani jaiya:
—¿Min hihcoinai hen honannon, jahua min hea jismatihin? Jise. Hea tah hen yosiboscai. Heen haibo rihbi yoxaboscai —hahquin Zacaríasnen.

¹⁹Jaatian sca:

—Hea tah hen Gabriel qui, noquen Papa Dios bebon nihnicah. Yohitanhue hea Papan jaah tah hen mia yohihi jahui. Jaa copi tah hen mia joi siri yohihi.²⁰ Hen mia yohihah nincahue. Joyo sca tah min jatihi. Hen mia yohihi nocoyax-ahnon caman tah min yohuantimacahin-scathihi, hen yohihah bi hihcoinai shi-nanyamahax. Hen mia yohihi quescabi ta jayaxihqui, jahuen nete nocotaiya —hihqui Papan yonoti.

²¹ Zacarías piconon caman jaa man-ati jemanhihtinin jonibo nichí. Papan xoboho jan basihiya rahtecani. ²² Jaatian sca picoscai. Picotax bi joyoscai, Jascabi yohuantimacahinxon behantan-resquin. Jan behantan behantanaiya ta chichoxon Papan jismaha jan jahuara jis-benanaí honanscacannishqui.

²³ Jaa pecaho sca jahuen xobon cati nete nocoscayaia jahuen xobon caress-cai. ²⁴ Jahuen xobon jan nocotipi pecaho hahbetan hihquish jahuen haibo Elisabet tohoscai. Tohoxon bi pichca hoxne jahuen toho paxajaquin jisyama-habo. Tsoabi yohiyamaquin. ²⁵ Papan ta hea hahxonihqui. Jonibo tocan hen hih-timayahamas canon ta jaa queenai tianbi hea hahxonihqui, hihqui.

Jesus cainyaxihqui

²⁶ Jan Elisabet yohiho seis hoxne sca ta Nazaret janeya jema janin sca Papan yonoti canishqui, Papan raanah. Gabriel janeya, Papan yonoti. ²⁷ Jano ca-hax huesti haibo qui nocoti cahi. María janeya haibo. Bebaan honanahma. Jaa bihyaxihqui joni ta José janishqui, Davi-dinin chini baque. ²⁸ Nocoxon sca Papan yonotinin yohiquin:

—¿Min jascabi jayamahin, haibon? Mia ta noquen Hihbaan shinanihqui. Mi-hbetanbi ta hihquiqui —hahquin.

²⁹ Jan jascalah, haibo rahte rahteti. Jan jascarai jahua hihcatsihqui, hi-

hqui, jahuen jointi chicho res.³⁰ Rahte-taiton sca:

—Raqueyamahue, Marian, noquen Papa ta mihon jenimahiqui.³¹ Jise. Min tah min tohoscayaxihqui. Bebo baque bihxon sca tah min jaa Jesus janeyaxihqui. ³² Jaa ta shinanya joni hihyaxihqui. Papa naihoh quehaton baque tah qui hih ta jayaxihcanihqui. Jahuen xohta yamanica Davidinin jihuetahbó ta Papa Diosen jaa hinanyaxihqui,³³ queyotaxma jan jascabi sca judioban quiquin hapo hihnon —hahquin Papan yonotinin.

³⁴ Jascalah Marian yocaquin:

—¿Jenquetsahaxon hen heen bene yamahi bi hen baque bihtihin? —hahquin.

³⁵ Jaatian sca:

—Dios Yoshiman ta mia hihbojahiqui. Papan coshi shinaman ta mia coiraniqui. Jaa copi ta min bihyaxihqui baque yohihi, Jaa ta Papan baque qui, Diosen baque, hihyaxihcanihqui.³⁶ Jise. Miin tsabe Elisabet rihbi ta yoxabohax bi to-hoyascai qui. Baquejoma hihpahonish bi ta jahuen seis hoxne tohoya sca jaiqui. ³⁷ Papan ta jatihibijati hahtipahiqui —María jaquin Papan yonotinin.

³⁸ Jascalah:

—Hea tah hen qui, hih ca hen jai sen, heen Hihbaan jihuetahbó. Min hea yohihah quescajaquin jan hea janon —hahquin Marian. Jaatian Papan yonoti caresscái.

Elisabet jisi María cahi

³⁹ Papan yonoti jascaripi pecaho Judea main sca histon cacatsihquish María caresscái. Mahchibo jano jaiton cahi, jan honanai jema janin nocoti cahi. ⁴⁰ Nocotax sca Zacarían xoboho mapeti. Min jascabi jayamahin, tsaben hahquin Elisabet hicantanquin. ⁴¹ Min jascabi jayamahin tsaben hahcái betan bi jahuen xahquin janin jahuen baquexo tehquexihtani Elisabetnín honanquin.

Dios yoshiman hihbojaha sca Elisabet coshin yohuani:

⁴²—Hihti hahxon ta noquen Papan mia jaiqui. Miin xahquin janin jai baquexo ta jaan mia hahxoniqui. ⁴³ ¿Hea jahua que ma bi min heen hihbaan mama hihquish min hehqui jahuin?

⁴⁴ Hihcoin tah hen jai. Jise, min hea yohihi hen nincacai betan bi ta coin-coinax heen xahquinhoh quehax heen baquexo tehquexihtanaxqui. ⁴⁵ Noquen Papan mia hinantijaxon yohihipi nincacoinax tah min hihti jenimascatihi — hahquin Elisabetn.

⁴⁶ María sca noquen Papa qui siripi yohuani:

Mia tah min hihti siri qui, Papan, hih tah hen jai, heen jointiboyabi.

⁴⁷ Noquen Papa ta hea jihuemanicah qui. Jahan tah hen hihti jenimahi hih tah hen jai noquen Papa yohihi.

⁴⁸ Jahuen hina pishca res hen hihqui bi ta hehon shinanihqui. Hehon shinanxon jan hahxonai copi ta jayaxi-hquibo yohuancoinsca jayaxihsan-qui. Papan ta jaa hahxonishqui hih ta jayaxihsan-qui hea yohihi.

⁴⁹ Jahuen coshi shinaman ta hea hihti hahxonihqui. Jaa ta Papa Dios coin qui.

⁵⁰ Jan yohihi quescabijaquin non hah- caiboya ta noquehon jascabijaquin Papan shinanihqui.

⁵¹ Jahuen mequen siripan hahxonquin ta jahuen coshi noque jismahiqui. Nin- cayosmabo ta jaan rabinmahiqui.

⁵² Hani quiquin hapobo namanjaxon ta jaton yohuanbo jato jenebahin- mahiqui. Jahuaborabojomabo ri- hbi ta mehehiqui, hihti meyayahpa quescapahbo sca jaábo.

⁵³ Pihan hihquibo rohahihriscanon jato piti siribo pimaxon bi ta hicha jahuequiyahpabo picatsihcanahabo jato camahiqui.

⁵⁴ Israeli baquebo hahxontijanixon ta jan yohini quescabijaquin noque yana- paniqui, noque jahuen jonibo quen.

⁵⁵ Abraham yohinixon ta noquen xo- htabo rihbi sca hahxontijanixon jan yohini quescabijaquin hahxon- scaiqui, jascabi sca janon hihqui María.

⁵⁶ Elisabet janin cahen quimisha hoxnebo sca María jihuetai. Janohax res sca jahuen xobon caribiscrai.

Nashimanica caini

⁵⁷ Jan cahipi cahchiqui sca jahuen tsaben jahuen baquebihresscaquin, bebo baque pishca. Bichish, hihti jenimahi. ⁵⁸ Hahbe jihuetaibo betan jahuen jenabo rihbi jenimacani. Hahan shinanxon ta noquen Hihbaan hihti hahxonihqui, hihcami. ⁵⁹ Huesti semana huinoscaax jaya jahuen mama, jahuen papa cahi, jahuen jane huishamahi. Janoxon honantijati janin caxon, hahan judiobaan honantijahabho hihxon jaton baquexo jismaquin. Janohahbaan sca:

—¿Jahuen papan janeya janon non Zacarías huishatihin? —hahcanquin.

⁶⁰ —Hahyamaquin rahan. Jahuen jane ta Juan qui —hihqui jahuen mama.

⁶¹ —Jaa janeya ta miin jenabo yamahihqui, tsoabi —hahscacanquin.

⁶² Jaatian sca jahuen papa cohantan- quin yocacanquin:

—¿Mian min jahua janecatsihquin?

⁶³ Jahuen papan sca huishaquin hah- cajaquin tabla pishca yocaxon bihxon, hahqui huishaquin. Jahuen jane ta Juan qui hahquin huishaquin. Rahte rahtescacani, jan huishahi jane jisish. ⁶⁴ Jaatianbi jahuen jana choyocabinax Zacarías yohuanscrai.

—Hahxon tah min hea jai, Papan —hihscai. ⁶⁵ Jan yohuanscrai nincacax, jato hahbe jihuetaibo rahte rahtescrai. Jenquetsahax jahuen baquexo jaress- caiquin hihquish janohahbo yohuan

chanicanahiboya sca Judea mahchi jan-inbo jihuetaibo jaya res yohuan yohuan-can. ⁶⁶Chanihibo nincaxon shinancan-quin: Hahan Papan shinanai baque tah qui, Jenquetsahpa joni jaa jayaxi-hquiquin, hihxon shinan shinancanquin.

Zacarías yohuanni

⁶⁷Dios Yoshiman hihbojaha jahuen papa yohuanai joi rihbi nincascacan-quin. Jaa Zacarías yohuanni ta nesca qui:

⁶⁸Hahxon tah min noque jai, Papan. Non tiromabohi copi noque casticanquin mahuamatih bi tah min noquehon shinanxon hahqui paxacahuanti joni noque hinanscrai.

⁶⁹⁻⁷⁰Neateman miin joi yohinicaton janan min yohuanni quescabihi tah min rahma jai. Davidinin chini baque tah min noque hinanai, quiquin hapoxon noque jihuemahi jan jayaxahnnon tah min noque hinanai.

⁷¹Noquen rahuibaan noque hihbojapanan ta jaan noque xahbanjamayaxihqui. Noque jistahihmahibo jatihibi ta jaan pantetihqui, noque jahuejayamascaábo.

⁷²Noquen xohtabohon shinanxon min jato hahxontijani quescabijaquin tah min noque hahxonscrai, Papan. Min jato yohini quescabijaquin tah min noque hahxonscrai.

⁷³⁻⁷⁴Jaton rahuibo qui hen jato xahban-jamahah ta raquexonma sca miin chini baquebaan hea teexonyaxi-hqui qui hah tah min noquen xolta Abraham janiqui, Papan, noque yohiquin.

⁷⁵Jaa yohicoinnixon tah min noque hahxoncoinscrai, Papan. Sirijaquin shinanhahnan sca non janon. Tiroma shinanjomabo non jihuetai hahtipahscanon. Mahuanoxon

caman non jascabi sca mia shinanhahnan jihuemon tah min noque hahxonai, Papan

Papa Dios jaxon, jahuen baquexo rihbi sca Zacaríasnen yohiquin:

⁷⁶Naihoh queha Papan joi yohinica ta mia hihtihi, baquexon. Noquen Hihbo beboxoni tah min nihyaxihi qui, jonibo yohiquin shinan hinanbonaquin. Noquen Hihbo nin-cati shinan jato hinanbonaquin.

⁷⁷Jatohon shinanxon noquen Papan jaton hohcha sohuaxona jahuen baquebo sca jihuemon tah min jato honanmabonayaxihi qui.

⁷⁸Noque jisí noque qui botopaqexon ta Xaba Hihbaan noque xabajayaxihi qui.

⁷⁹Bahquish chian jihuetaibo ta xabajaxy-onyaxihi qui. Mahuati qui raqueti jihuetaibo ta xabajaxontihi qui, han-han jihuetai bahin sca nichíbo hihqui Zacarías.

⁸⁰Jascapa cainnish cahen jahuen baque hanicahuani. Jahuen shinan caícanahi. Jahuen Hihbaan joi yohiti nete janon caman cahchiho res nichi jihuetai.

Jesus cainai

(Mt 1.18-25)

2 Jaatian ta Cesaro Agostonen jahuen ²jonibo yohinishqui, jatihibi jonibaan Jane huishapaquehahbo. ³Jascajati jan yohimenoni tah qui, Siria main Cirino jaton tininti hihpahoni tian. ³Cesaronen jascajaquin yonohah ta jaton jemabo janin jatihibi jonibo bocannishqui, jaton Jane huishahahbo. ⁴Galilea mai janinhax José rihbi cahi, Nazaret jema janinhaxbi. Judea main cahax, jahuen xolta Davidinin jema janin nocoti cahi. Jaa jema ta Belen janeya qui. Davidinin chini baquehax copi ta jano canishqui. ⁵Tohoyascai jahuen haibo hihyaxihi qui ta María hahbetanbi canishqui. Jaan

jaa bihyaxihqui copi jahuen jane rihbi jahuen benenahyabi huishahbo.⁶ Jano nocoxon Marian jahuen baque jan bihnoxihqui honanscaquin.⁷ Jano jai xobo bocho rahsi jaiya jahuenrahnon hoxatimahiya ganado xobohoxon sca jahuen bihmenohi baquexo bihxon, chopan rahcoxon, vacan piti racanxonti janin racanquin.

Carnero coirannicahbo qui Papan yonotibo cainai

⁸ Jaatian rihbi ta jaa maibo janin carnero coirannicahbo janishqui. Jaton xobo hochó copi ta pastochianxon jaton carnerobo coiranshinacannishqui.⁹ Yame coiranaiton jato qui Papan yonoti cainquirhani. Papan xaba rihbi jato janin xabarenenaiya rahte rahtecani.

¹⁰—Raqueyamanahue. Joi siri mato yohihi tah hen jahui, jatihibichin nincacax jenimahabo.¹¹ Nea netenbi ta Davidinin jema janinxon huesti haibaan jahuen baque bichishqui, mato jihuemanca coin noquen Hihbo Cristo.¹² Han honanti sca tah hen mato yohihi: chopan rahcohah vacan piti racanxonti janin racatai tah man jaa meratihi. Jistannahue —hahquin Papan yonotinin.

¹³ Jaatian sca hahchonquihran hicha Papan yonotibo sanareneni. Papa qui yohuani siricaní.

¹⁴ Noquen naihoh queha Papa ta hihi coshi shinanya qui. Nai nequebihah-bohon hihti shinanxon ta hahan sirijaquin shinanti shinan jato hinani-hqui, hihcani.

¹⁵ Papan yonotibo naihoh boress-caiboya sca carnero coirannicahbo yohinancani:

—Noquen Hihbaan noque honanmaha jisnon bonahue. Belen janin canon bonahue —hihcani.

¹⁶ Bishquihihcanahax sca nocoxon Maríaya José meracanquin. Jisbo bi

vacan piti racanxonti janin baquexo racati.¹⁷ Honanscaax janohax joquin sca Papan yonotinin noque yohihah tah non jistanai, hihxon sca jatihibi jonibo yohibenacanquin.¹⁸ Yohihahbo jatihibi rahtecani. Coirannicahbo yohuanai joi jahua hihcatsihquiquin hihcani, rahtetax.¹⁹ Rahtetaibaan bi María rahteyamahi. Jaan cahen jahuen jointinin shinanresquin, chanihibo joibo shinanquin.²⁰ Jaatian sca coirannicahbo jaton pasto janin nocorihbicani. Noquen Hihbo ta coshi shinanya qui hihcani.

—Min noque yohihipi jatihibi tah non jistanahqui, Papan. Min noque yohihipi quescabi tah qui. Hahxon tah min noque jai —hihcani.

Jesus baquexo jismahibo

²¹ Jan cainipi huesti semanan sca honantijamaxon Jesus janecanquin. Jahuen maman xahquinho jahuabi nanéyamaparihiya, Jaa tah man Jesus janeyaxihqui, Papan yonotinin jato jaho quescabijaquin janescacanquin, Jesus janeya janon.

²² Man baquexo janeho huesti hoxne senennon caman tah man Papan xobo qui samatihi hahquin ta Moisesnin huishanishqui. Jaa copi jascajacanquin. Jahuen hoxne senenscaya Papa hinani sca baquexoya bocani, Jerusalen janin.

²³ Papan joi janin ta jascajati huisha jaiqui: Jahuen maman bihmenoho bebo baque jatihibi yohihi tah man Panpanah ta qui hih man jatihi, Papa hinani.²⁴ Huetsa rihbi ta jaiqui, Papan huishamani: Haibaan baquexo bichipi copi rabe nobex hinanyamaxon rabe coma pishca mohitahpa noquen Papa Dios hinanxon rehtexonquin, hihqui jaa huisha.

²⁵ Jascajati joi copi Jerusalen janin bocani. Jaatian rihbi ta Jerusalen janin Simon janeya joni janishqui. Pontejaquin

shinanai joni. Noquen Papahon shinanai joni. Noque jahuen jonibohon shinanxon noque jihuemanica Papan raantihi honancoinax manatai joni. Jaa hbojaxon ta Dios Yoshiman honanmanishqui. ²⁶Papan raanai joni jisishma muhati tah min jatimahi, hahquin Dios Yoshiman. ²⁷Papan xoboho sca Dios Yoshiman hihuehah Simon nocoti. Jaatianbi jano Papan huishamani joi jai quescabijahi Jesusen papa betan jahuen mama rihbi jahui, Jesus hihuehi. ²⁸Jaya mapetaiton sca jaton baquexo bichinxon Simoman hicotanquin. Chihtoxon noquen Papa yohiquin.

²⁹Hihti sirijaquin sca tah hen shinanai, Hihbon. Hea yohinihxon tah min jaabijahi. Mihqui caresscanoxahnpn.

³⁰Min raanai noque jihuemanicah tah hen jisresscrai, Papan.

³¹Jatihixonbi jisibo hihxon tah min raanscrai.

³²Mia honanyamapahonihxon bi ta nea baque copi noquen nauabaan rihbi mia honanscatihqui. Noquen caibo rihbi ta miin joniboxon nea jisish hihti siribohi yohuanyaxihcanihqui, Papan

hihqui Simon.

³³Jaton baquexo yohihi Simon jascaraiya jahuen papa betan jahuen mama rahteti. Rahtetaiboya:

³⁴—Noquen Papan ta matohon shinanihqui —hihxon, baquexon mama bejisahnai sca, jahuen baquexo yohihi yohuani— Jise. Nea copi ta hicha noquen caibo jascabi behnoti sca jati-caniqui. Hicha rihbi ta nea copi jascabi sca jihuethihi. Hahqui ta caibo rihbi tiromahi yohuanyaxihqui. Noquen Papa hahan honantih bi tiromabohi yohuani. ³⁵Jonibo jenquetsahpa shinanyahpabohin non honannon ta neathon noque yohiyaxihqui. Mian rihbi

tan min jointi machexehxon masa shinanyaxihqui —hihqui Simon.

³⁶Jano rihbi ta huesti haibo janishqui, Ana janeya. Fanuelnin baque, Aserin chini baque. Papan shinanmahah yohuannica haibo. Xontacohax jahuen bene betan siete bari jihueneh bi jahuen bene muhauataiya yononma sca banenish yoxaboscai. ³⁷Ochenta y cuatro bari jai bi sca yoxabohax bi Papan xoboho nichxon bariyahpan, yame rihbi piti tenehahnan Papa yocaquin. ³⁸Simon betan nichibo merahax:

—Hahxon tah min noque jai, Papan. Jaa jisish tah hen hihti jenimahi —hihqui haibo. Jerusalen janin jihuetaibo sca yohihi cahi. Papan jihuemanica jopahinon hihquish manataibo jatihibi sca ta yohinishqui, Jaa ta jaresscraigui, hahquin.

Nazaret janin boribihibo

³⁹Jaatian sca Papan yohinib quescabijaquin queyohax Galilea main sca cahi Jesusen mama betan jahuen papa caribihi. Cahipish Nazaret jema janin jaton xobon nocorihbiscacani. ⁴⁰Jano jihueneh sca jaton baque haniscaax coshiscrai. Hihti honan. Hahan Papan hihti shinanai joni.

Papan xoboho Jesus nocotai

⁴¹Jatihibi bari tian ta Jerusalen janin jahuen mama betan jahuen papa capahonishqui. Pascua fiesta tian jano fiesta huinoti bocani. ⁴²Doce bari Jesus jaiya sca jaabo hihpahoni quescari fiesta huinoti jano bocani. Jaa rihbi jato betan cahi. ⁴³Fiesta queyoscaya sca jaton xoboho jonoxon beribicani. Jema janin jaton baque banetai bi honanaxma jahuen papabo joribicani. ⁴⁴Jahuen chahibo betan jaa rihbi jahui shinanax nihbahinahi becani. Bepi sca jaton baque yamajaxon jato betan jahuibon janin sca benacanquin. Jaton jenabo

yocacah bi yamahi.⁴⁵ Benacasquimahax sca Jerusalen janin benahi boribicani, rabebi.

⁴⁶ Jano quimisha neten benacasquimacanquin. Benabonaxon sca Papan xoboho haxemanicahbo betan jaa tsahotai meracanquin. Haxemanicahbo yohuanai nincanoxon, jano jaa tsahotai merascacanquin. Hashoan honancatsihquin jato yocaribiquin. Jato betan yohinani tsahotai.

⁴⁷ Jan honanxon yohuanquihna haxemanicahbo rahteti. Nincaqui jano tsahotaibo rihbi rahteti. ⁴⁸ Papan xobo janin jahuen haxemanicahbo yohuanquhnaiton merahax jaabo rabe rihbi rahte rahteti.

—¿Jenquetsahpahin min noque betan cayamahipiquin, baquen? ¿Min honanyamahin? Masa shinanhahnantah non mia benacasquimahipiqui —hahquin jahuen maman.

⁴⁹ —¿Jahua copi man hea benarahsin, maman? ¿Heen Papan teebo jisti hea jai man honanyamahin? —jato jaquin. ⁵⁰ Jascajaha bi jan yohihi jahua hihcatsihquiquin honanyamacanquin.

⁵¹ Jaatian sca Nazaret janin jato betan caresscái. Nococani. Jano jihuescacani. Jahuen papan, jahuen maman yohi-hah quescabijaquin hahquin. Hicha bari huinoscái bi hen huishaxon mia yohihi jatihibi jahuen maman shinanpariquin. ⁵² Jano jihuetax ta Jesus haninishqui. Jahuen shinan rihbi caicanahi. Jano jaibaan jisí ta siri joni jaa janishqui. Papan jisí siririhbihi.

Níhi naman mehax Juan yohuanai

(Mt 3.1-12; Mr 1.1-8; Jn 1.19-28)

3 Jasca sca janíbaan ta huetsa quiquin hapo jaresscanishqui, Tiberio janeya. Quince bari sca jaa jaton hapo jaiya cahen jonibo jisxonnicah rihbi jai, jahuen gobernadorbo. Judea main jahuen gobernador ta Poncio

Pilato janeya janishqui. Jaatian rihbi ta Galilea main Herodes haponishqui. Herodesnin huetsa Felipe ta Iturea main sca haponishqui. Traconite janinbo rihbi jahuen mai, jaa hihboti. Janohax ta Abilinia janinbo Lisaniásnen hihboti janishqui. ² Anas betan Caifas rihbi ta judiobaan quiquin yohuan hihbobo janishqui. Jaabo rahsi hapobo jaiya sca ta jano tsoa jihueyamahi janin jihuexon noquen Papa yohuanai Juaman nincanishqui. Jaa Juan cahen Zacáriasnen baque. Papa yohuanai nincacax jaa joi yohihi sca nichi. ³ Jordan huean janinbo sca nihnihi. Quetanhihnibahinxon quetanpaquebahinrihbiquin.

Yohibonahi nichi.

—Noquen Papan maton hohcha sohuanon shinan siri scabihnahue. Shinan behnayahpa man jaiya hen mato nashimanon benahue —Juaman jaquin yohibonaquin. ⁴ Isaíasnen rihbi ta Papan joi yohinicaxon jaa yohihi neateman huishanishqui.

Jano tsoa jihueyamahi janin tah hen quenahi: Noquen Hihbo hahan jonon bahixonnahue. Pontequin bahixonquin.

⁵ Mai xanquen jatihibi tah man bochojabonatihi. Mahchi jatihibi rihbi tah man mapaquin mispanjabahintihi. Mayabo rihbi tah man pontetih. Xanquen xanquenaibo rihbi sirijabonaquin.

⁶ Jaatian ta Papan raanah jihuemanica joresscái jatihibi jonibaan jisyaxihquiqui

hah ta Isaíasnen janishqui huishaquin.

⁷ Isaíasnen jascajani copi ta nashimamahi behibo Juaman yohinishqui:

—Papan ta mato casticantihiqui. ¿Tsoan mato Papan mato castanmis yohihah man neno jabaquihrani jahuin, rono papayahpabon? ⁸ Maton

shinan pontejacoinax siri shinanya sca jihuenuhue hih ca hen jai sen, maton shinan honanahbo. Noquen Papa ta Abraham qui hihyamarihbinahue. Nea macanbo ta Papan jonijati hahtipahiqui, Abrahanen baquebo sca janon, hahan Papa jenimahibo sca janon.⁹ Jihui reranoxon hahcajaquin ta jahuen yami bihxon Papan tarescαιqui. Siri bimijomabo tarexon cohaquin hahcajaquin ta tiroma shinanyahpabo Papan casticancscaqui. Shinannahue —jato jaquin.¹⁰ Jascahah yocascacanquin.

—¿Hicon nan? ¿Jahueja sca non jatihin?

¹¹ Yocacahbo sca jato yohiquin:

—Rabe cotonyahpaxon cotonjoma joni huesti hinannahue. Pitiyahpaxon, jascajaquin rihbi pitijoma joni hinannahue jan pinon —jato jaquin.

¹² Jaatian sca coriqui cobranaibo rihbi becani. Jaan jato hihquimatanquin nashimanon hihquish becani. Nocoxon sca yocacanquin:

—¿Noquen non jahuejatihin?
—hahcanquin.

¹³ —Hapon mato yohihi tili res cobrannahue. Man muuinmamis —jato jaquin.

¹⁴ Sontarobaan rihbi sca yocaquin.

—Noque rihbi sca yohihue. Sontaroxon non jenquetsahatihin —hahcanquin. —Man tah man tsoabi tahtijaxon jahuabi bichintimahi. Quesaxon bichintimarihbibi. Maton hapobaan mato copijahi res bihxon jaa res bihti shinannahue —jato jaquin.

¹⁵ Juaman jascajahiya manahihti quenichibo shinamehti:

—Jaa tsi ra Papan caisai joni quin —hihcani, Juan yohihi jaton jointinin shinamehti.¹⁶ Jascaraiboya:

—Hean hen mato jenen nashimahi bi ta hea mentan hashoan coshi joni jahuiqui. Ni jahuen sapato risbi pecax-

onti tah hen senenyamahi jaa hihti siri copi. Jaan ta jahuen yoshin siri mato hinanthiqui chihi rihbi mato maracanquin.¹⁷ Chishpo nihuen potanon hihxon bero romishin potaquin hahcajaquin ta Papan xecoscaqui. Bero rahsi tsamatai tsinquipon sca jahuen bexojati janin nianxon bi ta nocayosma chihin chishpo mapojayaxihqui —jato jaquin.

¹⁸ Jascapahbo joibo ta jato hicha yohinishqui, nincacoinahbo. Joi siri jato nincamaquin.¹⁹ Siri joibo jan yohihi que bi ta quiquin hapoxon Herodesnin bimmaxon sipo xoboho Juan tsahonnishqui. Jascatimahi bi tah min miin huetsan haibo betanbi hihqui, Juaman jaho copi Herodesnin jaa sipo xoboho tsahonquin. Jatihibi jan tiromajaquin hahni Juaman yohihi copi rihbi sipo xoboho tsahonquin.²⁰ Hihti tiromaxon bi ta hashoan sca tiromajaquin Herodesnin Juan bahnishqui.

Juaman Jesus nashimahi

(Mt 3.13-17; Mr 1.9-11)

²¹ Jaabi, sipo xoboho Herodesnin jaa tsahonyaxahnon ta Juaman jato nashimapahonishqui, jato nashimanon hihquish hahqui nocotaibo. Jascapahbo nashimaxon ta Jesus rihbi nashimanishqui. Nashimaha ta noquen Papa yocanishqui. Yocacahnan, nai quehpemehtai jisquin.²² Jaton jisnonbi sca naihoh quehax nobex quescapah botopaqeti jahui jisquin. Naihoh quehax yohuanairihbi nincacanquin. —Mia tah min jahan hen queenai heen baque qui. Mihon tah hen hihti jenimahi —hihqui.

Jesucriston xohtabo

(Mt 1.1-17)

²³ Jaa pecaho ta joi siri yohibonahi sca Jesus nihnishqui, treinta bari jaax. Jonibaan jisí cahen jaa Josepan baque. Jahuen chahita cahen Heli.²⁴ Heli sca

cahen Mataten baque. Matat cahen Levin baque. Leví cahen Melquin baque. Melqui cahen Janan baque. Jana cahen Josepan baque.²⁵ José cahen Mata-tiasnen baque. Matatias cahen Amosen baque. Amos cahen Nahuman baque. Nahum cahen Eslin baque. Esli cahen Nagainin baque.²⁶ Nagaí cahen Maaten baque. Maat cahen Matatiasnen baque. Matatias cahen Semeinin baque. Semei cahen Josepan baque. José cahen Ju-dapan baque.²⁷ Judá cahen Joananen baque. Joana cahen Resan baque. Resa cahen Zorobabelnin baque. Zorobabel cahen Salatielnin baque. Salatiel cahen Nerin baque.²⁸ Neri cahen Melquin baque. Melqui cahen Adin baque. Adi cahen Cosamam baque. Cosam cahen Elmodamen baque. Elmodam cahen Erin baque.²⁹ Er cahen Josuepan baque. Josué cahen Eliezernin baque. Eliezer cahen Joriman baque. Jorim cahen Matatinin baque. Matat cahen Levin baque.³⁰ Leví cahen Simeonen baque. Simeon cahen Judapan baque. Judá cahen Josepan baque. José cahen Jonaman baque. Jonan cahen Eliaquim baque.³¹ Eliaquim cahen Meleanen baque. Melea cahen Mainanen baque. Mainan cahen Matatanen baque. Matata cahen Nataman baque. Natan cahen Davidinin baque.³² David cahen Isaipan baque. Isaí cahen Obedin baque. Obed cahen Boozen baque. Booz cahen Salmonen baque. Salmon cahen Naasonen baque.³³ Naason cahen Aminadab baque. Am-inadab cahen Adminen baque. Admin cahen Arnin baque. Arni cahen Esro-man baque. Esrom cahen Faresen baque. Fares cahen Judapan baque.³⁴ Judá cahen Jacobon baque. Jacobo cahen Isaaquen baque. Isaaque cahen Abra-hanen baque. Abraham cahen Tarepan baque. Taré cahen Nacoren baque.³⁵ Na-cor cahen Seruquen baque. Seruque cahen Ragaunen baque. Ragau cahen Peleg

baque. Peleg cahen Eberin baque. Eber cahen Salan baque.³⁶ Sala cahen Caina-nen baque. Cainan cahen Arfaxad baque. Arfaxad cahen Seemin baque. Seem cahen Noeman baque. Noem cahen Lame-quen baque.³⁷ Lamec cahen Matusa-nen baque. Matusalé cahen Enoquen baque. Enoc cahen Jaretan baque. Jaret cahen Mahalalelnin baque. Mahalalel cahen Cainanen baque.³⁸ Cainan cahen Enosen baque. Enos cahen Setin baque. Set cahen Adaman baque. Adam cahen Papa Diosen baque.

Tiroma yoshiman Jesus tanahi

(Mt 4.1-11; Mr 1.12-13)

4 Dios Yoshiman shinanyahpahax sca
Jordan huean janinhax Jesus cahi. Cahi, Dios Yoshiman jano cahue hahca, jano tsoa jaitonma sca cahi. ²Cuarenta neten jano nihinxon bi ta jahuabi piyamanishqui. Tiroma yoshiman sca ta hohchamacatsihquin tana tananishqui. Jahuuen cuarenta neten sca hihti picatsih sca jaiya sca Satanasnen tanarihbiquin.

³—Papa Diosen baquexon, toa macan yohihue, piticahinscanon —hahquin.

⁴ Jascajaha:

—Piti res jaax jihueta tah man jai hah ta Papan janishqui huishamaquin —hahquin Jesusen.

⁵ Jaatian sca queya maniquihnxon bochiquixon sca jatihibi mai janin jai jemabo Satanasnen jismarenenquin.

⁶—Hoa jatihibi ta Papan hea hinan-nishqui. Queenxon tah hen mia hinantihi, mian sca jato hihbojanon. Jaton jahuabora jatihibi mina sca hihnon.

⁷ Hea bebon min miin raboxonen nichish betihihpaquexon yocakah tah hen mia hinantihi —hahquin Satanasnen.

⁸ Jascayah:

—Miin Papa Dios huesti tah min yocatihi, jaa huesti qui tah min betihihpaquetihi hih ta Papa jaiqui jahuen huisha joi janin —hahquin Jesusen sca.

⁹ Jaatian Jerusalen janin sca Satanassen hioquin. Jano sca Papan xobo pemacanya Jesus penimaxon:

—Papa Diosen baque hihquish neno-hax cayahue. ¹⁰ Jahuen yonotibo ta Papan yohithiqui, mia coiranabo hih ta jaiqui Papan huishani janin. Cayahue. ¹¹ Jahuen mequeman ta mia bihtihiqui, macan qui min joxcorohyamanon hih ta jaribinishqui jahuen quirica janin — hahquin Satanasnen.

¹² Jascalah bi:

—Hea cahra hahxoncointihquin, tanapan hihxon, Miin Hihbo Dios tanayamahue hah ta Papan janishqui —hahscaquin Jesusen.

¹³ Satanasnen hohchamacatsihquin bi jenquetsahaxon bi hohchamatimahiya sca Jesus jenebahini caresscái, joribiyax-ahpan hihquish.

Galilea mainxon Jesusen yohimenohi

(Mt 4.12-17; Mr 1.14-15)

¹⁴ Jaatian Jesus rihbi joresscái. Dios Yoshiman coshi hinanah, Galilea main sca cahi jahui. Nocotaiya, Papan coshiyahpa ta jaa qui hihqui janos jihuetaibo sca yohuan chanicanahi bocani jatihibi janin. ¹⁵ Jaton tsinquitxi xoboho mapexon ta jato haxemapahonishqui. Jan yohihi nincacax, nea ta Papan raanai joni qui hihsacani.

Nazaret jema janin Jesus nocotai

(Mt 13.53-58; Mr 6.1-6)

¹⁶ Jaa pecaho Nazaret jema janin sca Jesus nocoti cahi, janohax jan hanini janin sca nocoti. Jan japahoni quesca sca tantiti neten jaton tsinquitxi xobox janin jato betan tsinquitxi cahi. ¹⁷ Tsinquitaibaan sca noque nincamarohahue hahxon Isaíasnen huishani quirica hinancanquin. Jato nincamanoxon sca nihxon quirica quehpenxon janos nea joi jai benaxon jato nincamaquin.

¹⁸ Dios yoshiman ta hea hihquihiniqui. Jahuajomabo joi siri hen yohinon ta hea caisnishqui. Caisnixon ta hea raannishqui, hinábo hen piconon hináboma sca jaábo. Benchebo rihbi hen yohinon ta hea raannishqui hahquirihbi jisti hahtipahabo. Tiroma hihboyahpabo hen piconon ta hea raanishqui, hinábomascanon.

¹⁹ Papan jisí ta rahma jahuen joi siri nincamaha hihti siri qui hahquin jato nincamaquin.

²⁰ Jascajaquin nincamaxon jahuen quirica xehpoxon quirica coiranxonnicá hinanrihbihax tsahopaque sca jai. Tsahotaiya jaa bejisi manacani.

²¹ Jaatian sca:

—Nea hen mato nincamaha joi ta rahma maton nincanonbi jascacoin-scaiqui, Papan yohini quesca sca —jato jaquin.

²² Jan yohihah nincaquin sirijahax rahte rahtescacani. Papan noque hahxoncoinai joi ta noque nincamahaxqui hihquish rahte rahtecani. Jaatian sca shinanax:

—Nea Josepan baquema quin — hihsacani.

²³ Jascari yohuananaiboya:

—Hea rah tah man jatihxionbi hea nescajaquin yohiyaxihqui. Rahomehhue, rahonnican hah ra tah man hea jayaxihqui. Capernaum jema janinxon roqui miin coshiyaxon min jato jenquetsaja ra jaxonipi. Neno miin mainxon sca noque jascajaxonhue hah tah man hea jaribitih —jato jaquin.

²⁴ Jato jascajaxon jato hihti yohiscaquin:

—Jaabi tah hen mato yohicoinal. Jahuen main cahiton ta Papan joi yohinica jahuen caibaan sirijaquin bihtimahiqui. ²⁵ Hihcoinja tah hen mato jai. Elías yamanica jihuensi tian ta basi hoi paqueyamanishqui, quimisha bari seis

hoxnerihbi hoi yamanon. Jathihibi janin ta hihti pihamahnhan sca hihcannishqui. ²⁶Hicha maton caibo yononmabo jaatian rihbi janí que bi ta jato qui Papan Elías raanyamanishqui. Jato qui ma bi ta Sarepta jema janin Papan raannishqui, huesti sidono yononma haibo qui caxon piti caijaxonnon. ²⁷Jascajaquin rihbi ta Eliseo jihuenitian sca hicha maton caibo sipiyahpabo janí que bi jatoma bi Siria mai janinha huesti res Papan rohajanishqui —jato jaquin.

²⁸Jaton nahua Papan hahxonai nincacax sinacahincani, tsinquit xoboho jaibo rahsibi sina sinati. ²⁹Bihtanxon sca jemama qui Jesus bocanquin. Jano jai hani xanquen janin boxon rehtenoxon naman potacatsihquibo. ³⁰Rehtecatsihquiaan bi jato nabebacahini cahax Jesus caresscrai.

Yoshiman hihbojahi joni

(*Mr 1.21-28*)

³¹Capernaum jema janin sca cahi, Galilea mai janin. Nocotipixon jaton tantiti neten jato haxemaquin. ³²Jan yohihah nincacax ta rahtecanishqui, shinan hihboxon jaan jato honanmaha copi.

³³Jaton tsinquit xoboho rihbi ta tiroma yoshinyahpa joni mapenishqui. Jesus yohuanai nincacax coshin sai saihihscrai.

³⁴—¡Hahrai! ¿Noque jahuejahi min jahuin, Jesus Nazarenon? ¿Noque queyohi min joresscain? Mia tah non honanai. Mia tah min Diosen baque qui —hahquin yoshinyahpaton.

³⁵Jascayah bi:

—Jascaraxma netetax jaa jenebahini catanhue —hahquin Jesusen. Catanhue hahca yoshiman jaa joni tapon hueranbohanquin, jato tocan racanon. Jahuabi tiromajaxonma sca jaa joni jenebahinquin. ³⁶Jaa jisish raqueya sca hihcanni jaa xoboho jaibo rahsi. Raquetax yohinanancani.

—¿Jenquetsahpa coshi shinanya jaa jaiquin? ¡Jistan! Jahuen coshiyaxon ta catanhue hahquiqui. Jaan yohihah ta tiroma yoshinbo boresscapiro —hihcanni.

³⁷Jaa copi ta jaya joishi hicha bo-cannishqui, janobo jaibo chanicatsihqui xobo tihibi mapecanahi.

Pedronen haita Jesusen rohajahi

(*Mt 8.14-15; Mr 1.29-31*)

³⁸Jaton tsinquit xobo janinhax sca Simoman xobon Jesus cahi. Nocotaiya bi Simoman haita yona yonati racati. Jaa copi, Rohajaxonhue, hahcanquin, nocoscaiton. ³⁹Hihcohax jaa racatai patax nihrenenxon sca jahuen hisin Jesusen yonoquin jenebahinhue, hahquin. Yonohah, yonayamascacahini. Rohascaax huenitax jato pitijaxoni mehca mehcascai.

Hicha hisinaibo Jesusen rohajahi

(*Mt 8.16-17; Mr 1.32-34*)

⁴⁰Bari hihquiscaya sca jaton hisinyahpabo hihuecanquin. Hihuehibo mehexon sca jato rohajapaquequin.

⁴¹Hicha tiroma yoshinbo rihbi ta jaan camanishqui. Jenebahini catanhue jan jaah sai saihihcanni. Mia tah min Diosen baque qui hihcahini boresscaci. Jaabo hashoan coshin yohuanpanan ta jato netemanishqui. Jaa Cristo hihqui honanax yohuaniba copi jato netemaquin.

Galilea main sca Jesus cahi yohihi

(*Mr 1.35-39*)

⁴²Xaba paque sca jaiya sca jano tsoa jaitonma sca Jesus cahi. Tsamajaquetaibo caxon jaa benabonaxon merahax hahqui nocohihnat.

—Noque jenebahini cayamascahue, hihbon. Noque qui banejaquero-hahhue —hahcanquin. ⁴³Noque qui banejaquero-hahhue hahcabo bi:

—Huetsa jemabo janin rihbi tah hen Papan joi yohibonahi cati jai, Papan jihuematici joi honanahbo. Jaa copi tah hen jahui —jato jaquin.⁴⁴ Jaa pecaho sca judiobaan tsinquitixoboboho mapecanaxon Papan joi siri jato yohibonaquin.

Jahuen coshiyaxon jan yapa bihmahi

(Mt 4.18-22; Mr 1.16-20)

5 Jaatian sca Genesaret hian quexa sca cahax, nihxon jano jaibo honanmaquin. Nincacatsihquish sca tsama jonibo hahqui tsinquiaqueti.² Nincacatsihquibotsehquesihquin hueranbonaha jisí bi nonti rabe quexa racatai. Nonti racatai bi yapa rahconicabo yamahi, yapa rahcotani jahuem jaton tarrafa pahtsaqui mapescaibo. Huetsa nonti ta Simomana janishqui, huetsa nonti cahen jahuen companihirobaana.³ Simoman nontin nanéxon sca:

—Napon hori noque hueranbohanhue —hahquin Simon yohiquin. Jaatian sca nontin tsahoxon sca quexa nichibo haxemaquin.⁴ Yohanquin janquenjaxon sca Simon yohiquin.

—Nemin janin sca noque hioxon maton tarrafa potanahue, yapabihnoxon —hahquin.

⁵ —Pota potashinaxon bi tah non jahuabi bihyamahaqui, maestron. Jaabi, mian yohihah tah hen potahi —hahquin Simoman.

⁶ Potaxon sca hicha yapa rahcoquin. Yapa hashoan hichahiya jaton tarrafa huaxacatsihscrai. ⁷ Mapo behue behuehahxon sca jaton companihirobo quenacanquin, huetsa nontin joxon jato yanapanabo. Joxon rabebi jaton nonti bochojabahincanquin hihquicatsihscanon caman. ⁸ Yotihira jisish raquescaax Jesus bebonxon raboxonen tisquihahpaquexon:

—Hea jenebahinhue, Hihbon. Hea tah hen hohchayahpa joni qui —hahquin, Simon Pedronen.

⁹ Huestijaquin potaxon bi yotihira yapa bichish Pedro raquescái, hahbe yapa bihnicaahbo rihbi. ¹⁰ Zebedeo baque rabe rihbi ta jascarihbibi raquenishqui, Jacobo betan Juan, Simoman companihirobo rabe. Raquescaiboya:

—Raqueyamahue, Simoman. Rahma tah min joni bihnicaah sca jatihi —hahquin Jesusen.

¹¹ Taxnaxon sca cahen jaton nontibojatihibi jenebahini sca Jesus manahi sca bocanni.

Sipiyahpa Jesusen rohajahi

(Mt 8.1-4; Mr 1.40-45)

¹² Jaa pecaho sca ta janobo jai jemabo qui nocoti canishqui. Huesti jema qui nocoxon sca sipiyahpa joni behchiquin. Sipiyahpaton sca Jesus merahax taracahpaquexon Jesus hihti yocaquin.

—Jeen hihxon res tah min hea rohajatihi, Hihbon. Mian tah min hahtipahi —hahquin.

¹³ Jascajaha, mehexon sca:

—Queen ta jai. Rohascahue —hahquin. Jaatianbi jahuen bichi siricahinscái, behna sca.

¹⁴ —Hen mia rohajaha tsoabi yohiyamaxahtahi min. Min yohimis. Tsoabi yohixonma, sacerdote jismatanhue, Moisesnin yohini quescabijaquein hinanti pishcaya catanhue, rohascaxon hinanti pishca. Jascajaquin tah min jato nincamatihi, jonibo tocan hahquirihbi jihueta hahtipahnoxon —hahscaquin Jesusen.

¹⁵ Yohiyamahue hahca bi hashoan sca jonibo yohibonaquin, Jaan ta hea rohajahaxqui hahquin. Jaa copi hihti caibo sca becani. Jesus yohanai nincanoxon rahomehti becani.¹⁶ Jan cahá cahchiqui nocotahbo jaa huesti Jesus

cahi. Jano tsoa jaitonma cahax basihi, Papa yocaqui basihi.

Yora honanyamajaquetai

Jesusen rohajahi

(Mt 9.1-8; Mr 2.1-12)

¹⁷ Huetsa neten sca ta jato haxemaribinishqui. Jato yohihi bi ta fariseoboya jaton haxemanicahbo nocohihnatxa nincaqui tsahopaquecannishqui. Galilea mai mehax jahuibo, Judea mai mehax jahuibo rihbi, Jerusalen jema janinhax jahuibo rihbi nincaqui tsahocani. Papan coshiyaxon jan rohajahi sca jiscanquin.

¹⁸ Tsinquijaquetaiboya sca jahuen yora honanyamajaquetai joni becanquin. Jahuen cacajatiyaxonbi hihuexon Jesus bebonbi janacatsihquiaan bi joni hichahiya jenquetsahax hihcotimahi. ¹⁹ Jenquetsahaxonbi mapematinahiya sca jayabi xobo pamacanya hinaxon xehuabo xecabohanxon jahuen cacajatinin sca rontanpaquebohanxon Jesus bebonbi sca racanpaquecanquin. ²⁰ Jan jato rohajaxontihi shinancoinaibohi jisxon, racatai joni Jesusen yohiquin:

—Miin hohcha tah hen mia sohuaxonai, hiconin.

²¹ Jaatian jano tsahotai fariseoboya jaton haxemanicahbo jaabo rahsibi yohinancani.

—¿Jahua hihqui shinanax Diosihcamahi yohuanihquin? Papa Dios huestichin ta hohcha sohuati hahtipahiqui. ¿Neatohon rihbi hahtipahiquin? —hihcanni.

²² Jaya baxexaibo honanxon Jesusen jato yocaquin:

—¿Jahua yohuan man maton jointinin jain? ²³ ¿Jahuemeha hashoan teema yohitihquin? ¿Miin hohcha tah hen sohuaxonai hihqui nan? ¿Huenihhnatax nihaquetanhue hihqui nan? ²⁴ Jaabi, noquebaque hihxon hen mainxonbi hohcha

sohuaxonti hahtipahi honannoxxon jisnahuue —hahxon sca yora honanyamajaquetai yohirihbiquin:

—Mia tah hen yohihi. Huenihhnaxon miin cacajati bihbahini caresscatanhue, miin xobon —hahquin.

²⁵ Yohihah sca jaton jisnonbi huenicahuanxon jahuen cacajati bichish jaya cahi caresscái. Jahuen xobon cahi.

—Papa Diosen ta hea rohajahaxqui —hihcanahi cahi. ²⁶ Nincacax rahte rahtecani.

—Papan ta hahxoncoiniqui —hihcanni. Caibo rihbi hihti raquetax:

—Tsoan jisníma tah non rahma jisiqui —hihcanni.

Jesusen Leví quenahi

(Mt 9.9-13; Mr 2.13-17)

²⁷ Jaa pecaho sca caxon, tininti cobranxonai joni Jesusen meraquin, Leví janeya. Jahuen janoxon cobranti misa janin tsahotaiton meraquin. Meraxon:

—Hehbe cahi johue —hahquin.

²⁸ Jascajaha huenixon jatihibi potabahini cahi, Jesus manahi sca.

²⁹ Jaatian sca jahuen xobo janin sca hani fiesta hahqui jonon Levin Jesus quenamaquin. Jaan quenamaha hahbe cobrannicabo rihbi hicha jano jai, jaton hahberabetibo rihbi. ³⁰ Jaabo rahsi jaa manahi tsahotaiya sca fariseobo betan jaton haxemanicahbo rerer rerenxon, Jesusen haxematibo cahecanquin.

—¿Jahua copi man cobranmisboya hohchayahpbabo betan man pihi tsahotain? ¿Jahua copi man jascapa betan xe-hahin? —hahcanquin.

³¹ Jesusen sca jato joi bichinquin.

—Hisinjomabo ta rahonnica pishinyamahihqui. Hisinyahpbabo caya rahonnica pishiniih. ³² Pontebo quenahima bi ta pontemabo quenahia hea joníqui, shinanquin pontejahabo —jato jaquin.

Non piti tenetihin yocacahtaibo

(Mt 9.14-17; Mr 2.18-22)

33 Jaatian:

—Juaman haxenicabaan ta hicha piti tenehiqui. Hicha rihbi ta Papa yoca yocacaniqui. Fariseobaan haxematibaan ta jascajaribicaniqui. Minabaan ta jascajayamacaniqui. Minabaan ta pipi pipixon xeha xehacaniqui —hahcanquin.

34 —Jaton huetsa huanomahi caxon ta huanomahanan piti tenetima jacaniqui. **35** Huetsa tian ta jaton huanomati yamascatihiqui, Papan jato bichinah. Jaatian pari ta benáxon piti teneyaxihcanihqui —hahxon, honanahbo hihxon sca jaa patax queha joi jato yohiquin.

36 Nescajaquin jato yohiquin:

—Chopa payo honacatsihquin tah non hahan honanoxon hotsihahma chopa behna non teque huaxayamahi. Behna chopayaxon honanoxon non huaxahah ta behna chopa tiromascatihiqui. Payo honahah bi ta behna hotsihax chopa payo betan senenyamarihbiscatihqui. **37** Noquen xehati behna rihbi tah non xeni bichi borasa qui non bochøjayamahi. Non bochojaha bi ta pahescaxon borasa pohtoshihmahax noquen xehati yohyocohtihqui, noquen borasa rihbi tiromascanon. **38** Xehati behna tah non hestenica borasa behnabo qui bochojati jai. **39** Xehati pahe xehahax tah non bata queenyamarihbibi. Pahe ta nohuepihqui hihquish —hahquin Jesusen.

Tantiti neten bero pibonahibo

(Mt 12.1-8; Mr 2.23-28)

6 Jaatian sea tantiti neten sca bahin cahax trigo huai nabebacahini cahi. Hahbetan caquin, jahuen haxenicabaan huestibo bero tesabonaxon, bishqui bishquihahxon xocaxon picanquin. **2** Jascajahiton fariseobaan jato yocaquin:

—¿Jahua copi man jascajahin, tantiti neten non piti tsinquitimahi bi? —hahcanquin.

3 Jesusen sca jato yohiquin:

—¿Papan joi jisquin man Davidinin hahní honanyamahin? Hahbetan cahibo picatsihquiya jaa rihbi picatsihquish, **4** Papan xobo janin hihcoxon Papa jismanoxon pejanxonti paan hinanah bihxon, pixon, hahbe nichibo rihbi jan hinanni man honanyamahin? Jascapa ta tsoanbi pitimahiqui, Papa yohixonnica huestichin ta jaa piti hahtipahiqui —hahquin Jesusen.

5 Sirijaquin yohiquin sca jato yohirihbiquin:

—Hea ta hen noquebaque qui, tantiti nete hihbo —jato jaquin.

Meyosmahi

(Mt 12.9-14; Mr 3.1-6)

6 Huetsa tantiti neten rihbi sca jaton tsinquit xoboho mapexon jato haxemaribiquin. Huesti meyosma joni rihbi jan o tsahoti, mecayaho jahuen mequen yosmahi. **7** Tantiti neten ta rahonnicabaan tsoabi rahontimahihqui, tantiti netenbi jaa rohajatihiquin hihxon ta jaton haxemanicahbo betan fariseobaan jisisnishqui. Hahan cahenoxon jisiscanquin. **8** Jahua yohuan jaabo rahsi jaiquin jahuen jointinin honanxon ta jaton nin canonbi meyosma joni sca yohinishqui:

—Huenihhnatax naponbi nihhue —hahquin. Jascajaha huenihhnatax jato tocanbi nihrenenscái. **9** Reren rerenaibo sca Jesusen yocaquin:

—¿Tantiti neten non siribojaxontimahin? ¿Tantiti neten non tiromajatihin? ¿Joni huetsa non tantiti neten jihuematihin? ¿Non mahuamatihin? Hea yohinahue —hahquin Jesusen. **10** Jato jispaquexon meyosma sca yohiquin:

—Miin mequen sanahihnihue —hahquin. Yohihah mehanscaax

rohacahinscái. ¹¹Roha sca jaa jai bi janō tsahotaibo sina sinati. Jesus qui yohuan yohuanscacani, jahueja non jaa jatihin, hihqui.

Doce haxenicabo Jesusen caisai

(Mt 10.1-4; Mr 3.13-19)

¹²Jascaripish noquen Papa yohihi sca mahchi manichi Jesus cahi. Yametai bi janoxonbi Papa Dios yoca yocashinaquin. ¹³Xabacoscaya cahen jahuen haxenicabo quenascaquin. Hahqui jahuiton doce res caisxon:

—Mato tah man heen raantibo qui —hahquin. ¹⁴Jan caisni ta neabo qui: Simon, jahuen Jane huetsa cahen Pedro. Jahuen huetsa Andres rihbi, Jacoboya Juan jaabo rabe rihbi, Felipe, Bartolomé. ¹⁵Mateo, Tomas, Santiago Alfeon baque, Simon Zelotes hahcaibo ¹⁶Judas Santiaconen baque, Judas Iscarioote, jaabo rahsi. Judas Iscarioote cahen Jesus paranxon judiobo

Hicha jonibo Jesusen haxemahi

(Mt 4.23-25)

¹⁷Jato betan botoquihrani jahuex sca mai mispani janin nihrenenai bi hicha haxehibo becani. Nincaqui becani, hihti caibo. Jaabo cahen Judea mai mehax behibo, Jerusalen janinhax behibo. Tiro jema janinhahbo, Sidon jema janinhahbo, quebijistima hian quexa jihuetabio. ¹⁸Jesus nincacatsihqui jahuibo, rahomehti jahuibo. Caibo rihbi tiroma yoshinbaan hihbojani bi becani. Jascapahbo rihbi ta Jesusen rohajanishqui. ¹⁹Jesus mehehax jahuen coshin rohahibo rahsibo quen jano jaibo rahsichin jaa mehecatsihscacani.

Hahan jenimatiboya hahan benatibo

(Mt 5.1-12)

²⁰Jato honanmaxon bejisquin sca jato yohiquin:

Jenimanahue jahuaborajomabon. Papan ta mato jihuematihqui. Mato cah man jahuen jihuetaħbo.

²¹Jenimanahue pihan hihquibon. Man tah man yaniyaxihqui, rohahihrichi.

Jenimanahue huinihibon. Man tah man coin coini bitsayaxihqui.

²²Jonibaan mato jistahihmaha jenimanahue. Mato yohuanquihnyamas-caxon bi mato roa roahahbo bi jenimanahue. Man hea nincacoinai copi maton janeya tiromahi yohuanaiboya jenimarihbinaħue. ²³Mato jascahibaān bi hihti coincoinnahue. Jaton xohtabaan ta Papan joi chaninicabo jascajaribin-iħqu. Naiħoh sca ta janoxon mato hinantibo Papan mato hicha bexojaxoni-hqui. Jaa copi jenimanahue.

²⁴Jascapahbo hahan jenimati jaibo bi ta hicha coriquiyahpahax man ċHahrai! hihyaxihqui. Maton jahuaboraya jenimati shinanxon bi tah man jahuabi hashoan bihtimahi.

²⁵Rahma yanitax bi tah man Hahrai hihyaxihqui hihti pihaxmahhuan hihquish.

Rahma bitsatax bi tah man Hahrai hihyaxihqui bena benatax huaohihquish.

²⁶Jatihibi jonibo mato qui siripi yohuanaiya Hahrai hihnahue. Papan joi yohiħiċcamahi quesahiboya ta maton papabo jato qui jascariħbihi siripi yohuanpahonishqui.

Rahuibohon non shinantihi

(Mt 5.38-48; 7.12)

²⁷Mato tah hen yohihi, nincanahue. Maton rahuibohon shinannahue. Mato jistahihmhibaān bi jato sirijaquin hahxoncoinnahue. ²⁸Mato roahibaan bi jato qui Papa yocaxonnahue. Mato tahtijahibaan bi jato yocaxonnahue. ²⁹Mia copasah bi copixonma ramiqui sca jismahue. Miin coton mia bichincatsi-hquiya jaa hinanax miin camiseta ri-

hbi yohuashihyamahue. ³⁰ Mia yocacaibo jatihibi hinanhue. Mia bichinai bi bichinyamascahue. ³¹ Hea hahxoncapanhon hih min jain, jato pari hahxonhue, min jato hahxonai quescajaribiquin mia hahxonnon.

³² Matohon queenaibohon tah man copinani queenai. ¿Jaa copi man shinanyahpabo hihqui man shinanain? Nincayosmabo rihbi ta jascanica qui, jatohan queenaibohon queeni copinani. ³³ ¿Caibaan rihbi mato siribojaxonah, copinanquin sca jato siribojaxonquin bi man jaa copi hicha shinanyahpabo man jihuetai man shinanain? Nincayosmabaan rihbi ta jascajanica qui. ³⁴ ¿Jan mato hinanrihbitihi honanxon man joni huetsa coriqui hinantahbax man jaa copi shinanyahpasca Jain? Nincayosmabaan rihbi ta hahbe nincayosmabo hinantahbahiqui, jatihibi bihribiyanoxon. ³⁵ Jaabo jascahi bi tah man maton rahuibohon man shinantihi. Jascapahbo siribojaxonahue. Hinantahxon bihribiti masa shinanyamanahue. Naihohxon sca ta Papan mato hinanrihbiyahixihqui, hashoan hicha sca. Bihribiti shinanxonma hinantahbax tah man noquen naihoh queha Papan baquebo jihuetaihi. Jaan rihbi ta jahuen sinatahbohon shinanihqui, jahuen tiromabohon bi shinanquin. ³⁶ Yomanantaibohon shinannahue, maton naihoh queha Papan hahcai quescajaquin. Hohmis hohmisabohon bi maton naihoh queha Papan jatohan shinanquin hahcai quescajaribinahue.

Joni huetsa qui tiromahi yohuantima

(Mt 7.1-5)

³⁷ Min hahcai quescajayamaquin bi jaan hahcai quescajaquin joni huetsan jahuerajahie jisish, Jahuejanoxon jascajahiquin, tiroma joni tah qui hihiyamanahue. Jaatian ta mato rihbi Papan jascajayamayaxihqui. Caibaan

mato tiromajanh bi jaa tiromani shinanyamanahue, maton Papan rihbi man tiromani shinanyamanon. ³⁸ Pishinaibo hinannahue, maton papan ta mato hinanrihbiyahixihqui. Yohuashihxonma ta tasa bochojaxon bishtaxpaquexon tsahonpaquexon shaconxon hahquirhibi matsanhinhixon mato hinanrihbiyahixihcanihqui. Hinannoxon man topnai quescabijaquin ta maton Papan mato hinanrihbiyahixihqui —hahquin Jesusen.

³⁹ Jato jascajaxon jaa patax queha joi sca jato nincamaquin. Benchen ta hahbe benche bahi jismatimahiqui. Jismacatsihqui bi ta mai xanquen qui rabebi paquetihiqui. ⁴⁰ Haxenica ta jahuen haxemanicah mentan hashoan honan hihiyamahiqui. Sirijaquin haxemaha pari ta jahuen haxemanicah quescua sca jatihihi.

⁴¹ ¿Jenquetsahaxon min miin bero janin jihuuhuan jaxon bi miin huetsan bero qui jai poto pishca min yohitihin? ⁴² Miin bero janin jihui jaxon jenquetsahaxon sca min miin huetsa yohitihin, Miin bero janin jai poto pishca hean tsecanon tenehue huetsan, hah min jatihihi? ¡Quesan! Miin bero qui jai jihui pari tah min potatihi. Jaatian pari tah min jisquin sirijaxon miin huetsa bejistihi, jahuen poto bero pishca tsecanoxon.

Bimbo jisxon non jihui honanai

(Mt 7.17-20; 12.34-35)

⁴³ Jihui siribo ta bimi tiromayahpa yamatihiqui. Jihui payo rihbi ta bimi siri-boa jatimahiqui. ⁴⁴ Jenquetsahpa jihui hin hihxon tah non jahuen bimi jisxon jatihihi jihui honanai. Moxayahpa jihui queha tah non pama tsinquitimahi. Moxayahpa yora quiha rihbi tah non xeson bihtimahi. ⁴⁵ Noquen jointi janin siri shinanbo jaiya tah non siri yohuan noque jai. Jascarihbibi tah non tiroma Jonihax

noquen jointi janin tiroma shinanboya tiroma yohuan rihbi jai. Noquen jointi janin jai shinanboya tah non yohuanai.

Xobojahibo rabe

(Mt 7.24-27)

⁴⁶ „Hen jahuejanon hihxon man hea Hihbon Hihbon hahcain, hen mato yohi-hah hea nincaxonma bi hea quenaquin? ⁴⁷ Hehqui joxon hen yohihi nincaxon jaabijaquin hahcaibo rahsi jenquetsah-pabo hin hihxon tah hen mato yohihi. ⁴⁸ Jascapa hihquish tah min xobojahi joni quesca qui. Xobo jihuibo nichin-noxon ta nincacoinnicateon nemin pari mai poquinihqui, minquex mai qui no-coxon xobo jihui nichinnoxon. Jaatian ta jenehhuan joxon mai mahpobahinxon bahiquin xobo bocatsihquin bi hahti-pahyamahiqui, sirijaquin jan xobo ji-hui nichinai copi. ⁴⁹ Hen yohihah nin-caxon bi hahyamahi joni ta mashin xobojanoxon bemacanya poquinxon ji-hui nichinai quescapah qui. Jenehhuan joxon maimahah ta xobo paqueresti-hiqui, jenen huaxa huaxascanon —jato jaquin Jesusen.

Capitanen joni Jesusen rohajahi

(Mt 8.5-13)

7 Jato nincamaquin queyohax sca Capernaum jema janin cahi. ² Jano ta huesti sontaro capitan rihbi jihu-enishqui. Hahan jan hihti shinanai jahuen joni jai bi jaa jahuen joni hisini. Mahuati hisini racati. ³ Jesus nocoscai chanihi nincaxon jahuen joni rohajaxoni Jesus jonon hihxon judio hapobo sca raan-quin yohitannahue hahxon. Raanah bocani. ⁴ Jesus qui nocoxon sca hihti yocacanquin.

—Jaa hahxonrohahue, Hihbon. Nahuahax bi ta siri joni qui. ⁵ Noquen caibohon ta queenihqui. Noquen tsinquit xobo rihbi ta jaanbi noque hahxonishqui —hahcanquin.

⁶ Jascajaha jato betan Jesus cahi. Capitanen xobo qui nocoti cahiboya sca capitanen raanah caibo sca jato behchihi jahui. Behchixon yohicanquin:

—Hehon shinanax bi paxquini hocho joyamahue, Hihbon, hih ta jaiqui, Hihbon. Hea ta hen jahuama qui. Heen xobo janin mia hihquiti tah hen senenyamahi. ⁷ Jaa copi tah hen heabi mihqui cayama-haqu. Jano xonbi yohireshue. Min yohi-hah ta heen joni rohaxihquiqui. ⁸ Hen tah hen honanai. Hean rihbi tah hen heen hapon yohihah hen hahcai, heen sotarobo rihbi tah hen jai, hean yono-hibo. Hean cahue hahcá ta catihiqui. Huetsa rihbi cahen johue hahca jahui. Nescajahue hahca cahen hean yohihi quescajaquin, hih ta jaiqui, Hihbon —hahcanquin yohixonquin.

⁹ Capitan yohuanai chanihahbo Jesus rahteti. Janobi rabejaquexon chibanaibo sca yohiqui:

—Mato yohinon nincacoinnahue. Jas-capapa nincacoinnica tah hen ni huestibi Israeli baquebo merayamanihqui —hahquin.

¹⁰ Jesusen yohihah sca ta capitan janin boribixon jahuen joni rohascai meracannishqui.

Yononmanen baque Jesusen teehihmahi

¹¹ Hoxashinahax mohiyahtax res sca ta Nain hahcaibo jema janin Jesus cahi canishqui. Jahuen haxenicabo betan hicha jonibo rihbi Jesus manahi bocani.

¹² Jema xehqui qui nocoti caquin sca tsahoni jahuibo behchicanquin. Mahuatipi hiabenahibo behchicanquin. Jaa huesti jahuen baque mahuatipi quen cajon hia-acaibo jahuen maman chibanaquin. Jahuen bene yamahi, yononma. Jema mehabo rihbi hicha jaa manahi became. ¹³ Yononma jisxon hahan shinanxon:

—Huaohihyamahue —hahquin noquen Hihbaan.

¹⁴Yohixon caxon sca cajon mehequin. Jan mehehiya hiacaibo janobi nihreneni.

—Beronan. Mia tah hen yohihi, hueni-hue —hahquin.

¹⁵Jan yohihah mahuatipi tsahohi-hnascai. Tsahohihnatay yohuanscaya jahuen maman bihnon:

—Miin baque bihhue —hahquin.

¹⁶Hihti rahte sca jacani.

—Papan ta noque hahxoniqui. Jahuen joi nincamanica janon ta noque quiha huesti Papan caisnishqui —hahcanquin, Jesus yohihi.

—Noque jahuen jonibohon ta Papan shinanihqui —hihcanahi boribicani.

¹⁷Yohuanchanicanahoya sca ta Judea mai janinhahbaan jatihixonbi nincanishqui, chanihahbo, jaa senenbi jihuetaibaan rihbi nincquin.

Nashimanicahten raanaibo

(Mt 11.2-19)

¹⁸Juaman haxenicabaan rihbi Juan yohiquin. Nincaxon rabe jahuen haxenica Juaman raanscaquin. ¹⁹Noquen Hihbo yocaqui cahábo hihxon jato raanquin.

—¿Hoa jahui joni Papan noque yohini mia quin? ¿Jo hen jatiquin huetsa, non mananon? hahquin yocatannahue —hahquin. ²⁰Jaan raanah cahax nocoxon yohicanquin.

—Nashimanica Juaman ta noque raanaxqui non mia yocanon. ¿Hoa jahui joni Papan noque yohini mia quin? ¿Jo hen jatiquin huetsa, non mananon? —hahcanquin.

²¹Jaton jisnonbi sca hicha hisinaibo jaan rohajaquin. Hohmis hohmisaibo rihbi rohajaxon tiroma yoshiman jatsan-jahibo rihbi rohajaquin. Hicha benchebo rihbi rohajaquin, jisfbo sca. ²²Jaatian yocacaibo sca jaan yohiquin:

—Man jisxon nincacah Juan yohitannahue. Benchebaan ta jisresscαιqui.

Chantobo ta nihresscαιqui. Sipiyahpabo ta siricahinscαιqui. Pabebaan ta nincascaeiqui. Mahuatipibo ta jihuerehbiscαιqui. Jahuaborajomabaan ta joi siri nincaquihqui, hahquin yohitannahue. ²³Hen yohihi nincacoinaibo ta hahan jenimati jaiqui —jato jaquin.

²⁴Juan yohihi boressca jaiboya sca Juan tsoa quin honanahbo hihxon tsinquipaquaetaibo noquen Hihbaan yocaquin:

—¿Jahua jisí man jano tsoa jihuetaitonma caniquin? ²⁵¿Tahua huesti nihuen xayanai nan? ¿Jahua cahran man jisi caniquin? ¿Chopa siri sahuehi joni nan? Hihti siri chopayahpabo tah man hapobaan xoboho pari man merathihi. ²⁶¿Jahua cahran man jisi caniquin? ¿Papan joi yohinica nan? Jaa raham. Mato yohinon nincanahue. Yohinica res ma bi ta yohinica mentan hashoan coshi joibo jaa jaiqui. ²⁷Hahqui ta huishacannishqui:

Jise: Mia bebon canon tah hen heen raanti joni raanai. Mia ta bahi bexojaxoni catihiqui mia hahan canon

hih ta jaa yohihi Papan joi janin jaiqui.

²⁸Nincanahue, hen mato yohinon. Juaman yohihi joi mentan hashoan siri joi yohiti ta tsoabi yamahihqui. Papan jihuetaibo res ta jahuamahax bi Papan jihuemaha hashoan siri joi yohiti jaiqui —jato jaquin.

²⁹Jan yohihi nincacax Juaman nashimanibo sca:

—Papan ta noque hihti hahxonihqui —hihscai. Coriqui cobranxonaibo betan tsinquipaquaetaibo jascacani. ³⁰Fariseobo betan jaton haxemanicahbo jascayamahi. Juaman jato nashimati queenyamanish, rahma Papa queenai quescajati rihbi queenyamaribicani.

³¹—Rahma jihuetaibo ¿jenquetsahpabo quin? Jahua quescapahbo hin hen mato yohinon nincanahue. ³²Mato tah man baquebo jaabo rahsibi shi-

rohi quescapahbo qui, notsi notsihi nescari yohinanaibo: Man bairahnon hi-hxon non rehue hahcai bi tah man bairahyamahi. Non huinihad bi tah man noque betan huaohihyamahi hihqui ta notsihi quenananiqui. Jascapahbo tah man qui, rahma jaibo.³³ Joxon ta piti siribo Juaman piyamanishqui, xehati ri-hbi xehayamaquin. Jan piyamahiya tah man hahqui yohuanpahonihqui, tiroma yoshinyahpa tah qui, hihqui.³⁴ Hea sca joxon tah hen pixon xeharihbibi. Hen jascajahiya tah man Hoa pihanhan jisnahue. Xehanhuan tah qui. Coriqui cobranxonnicahbo ta jahuen hahber-abetibo qui. Hohchamisbo ta jahuen hahberabetibo qui hih tah man janiqui, hea yohihi.³⁵ Tsoa ponte shinanyahpa quin hihxon ta jenques jihuethquin hi-hxon jisxon pari non honantihi hih ta jacanihqui. Jascatih bi tah man hehqui yohuanresai —jato jaquin.

Fariseon xoboho Jesus nocotai

³⁶ Jaatian sca:

—Heen xobo janin pihi canoxahnhue —hah huesti fariseo jonin sca jaah, jano cahax mapetax Jesus hisquen racati, pinoxon.³⁷ Jaa jema janin rihbi huesti hahresti haibo jai. Fariseonen xobohoxon Jesusen pihi honanax jahui, pomo xecobenahi. Jahuen hahan hininjati rahoja pomo.³⁸ Mapetax Jesus cahchiqui nihrenenax jahuen tahe quiri cahco-paquetax huaohihqui. Huaohihqui bi jahuen bero jenen jahuen tahe qui toisi-hqui. Jahuen boon sca tasoxon, tahe qui tatsohahxon jahuen hinintinin jahuen tahe hininjaquin.³⁹ Jaa jisish, jahuen jointi chicho fariseo yohuanscrai:

—Papan joi chaninicaxon ta neato-hon honanquehanielhqui. Hoa haibo jen-quetsahpa quin, jenquetsahpaton mehe-hiquin hihxon cahen honanquehan, ho-hchayahpa haibo can —hihqui jahuen jointinin.⁴⁰ Fariseo jascaraiton sca:

—Mia ta pishca yohicatsihqui, Simo-man —hahquin Jesusen.

—¿Jahua hin, maestron? Hea yohiroahhue —hahscaquin.

⁴¹—Coriqui jan jato hinantahni cahen rabe jonibaan jaton patoro ribinnish. Huetsan cahen rabe bari teexon copijati ribinish. Huetsan cahen rabe hoxne teexon copijati ribinnish.⁴² Copijati hahtipahyamahiboya cahen jaton patoronen jato Jascabi sca janon, jene-nahue hahcan. Jato jascajaquin hahxonah sca jahuemeha hashoan jahuen patorohon queennishquin? Yohihue —hahquin Jesusen.

⁴³—Hean shinannah ta hoa hashoan ribinpahoni hashoan rihbi sca jahuen patorohon queennishqui —hahquin Simoman.

—Hihcoini. Pontejaquin tah min shinanai —hih sca Jesus jai.⁴⁴ Haibo jisxon sca Simon yohirihbiquin:

—Nea haibo jise. Miin xoboho mapetaiton tah min hea tachoquiti hinanyamahahqui. Neatohon caya jahuen bero jenen hea tacho tachoxon jahuen boon sca hea tasohihqui. Mapetaiton tah min hea mehuetanyamahaquin.⁴⁵ Neatohon ta hihcoxon tahe qui hea tatsohahquin jeneyamahiqui.⁴⁶ Hahan boo masquiti min hea jahubi hinanyamahah bi ta neatohon hea hahan hinintinin tasquihiqui.⁴⁷ Jaa copi tah hen mia yohihi, jahuen hohcha hichahi bi tah hen jatihibi sohuahi, jan hihti queenscanon. Non hichatahma sohuaxonah ta hichatahma rihbi noquehon queencaniqui —hahquin.⁴⁸ Haibo sca yohiquin:

—Miin hohcha tah hen sohuaxonai —hahquin.⁴⁹ Hahbetan pihi tsahotaibo sca jaton jointi chicho yohuani.

—¿Jahua hihxon hohcha sohuaxonti jaan shinanihquin? —hihcani.⁵⁰ Jas-caraiboya bi haibo yohirihbiquin.

—Hen mia hahxontihi min shinancoinai copi ta miin hohcha yama sca qui. Sirijaquin shinani sca cahue —hahquin.

Jesus yanapaniba bo haibobo

8 Janohax cahx res sca janobo jai jemabo janin caxon joi siri Jesusen jato yohiquin. Hani jemabo, hanitahma jemabo, jatihibi janin Papan jihuemat joi jato nincamaquin. Jahuen doce haxenicabo rihbi jaa manahi bocani. ² Hai-bobo rihbi jan rohajaho jato betan bocani. Tiroma yoshiman jispahoni habobo rihbi jan rohajaho jato manahi bocani. Huetsa cahen María Magdalena, siete tiroma yoshiman hihbojani bi jaan rohajaha rohascrai. ³ Huetsa cahen Juana, Cusan haibo. Jaa Cusa ta Herodesnin tininti hihpahonnishqui. Huetsa rihbi cahen Susana. Huetsa habobo rihbi cahen hicha. Huaiyahpaxon jato pitijaxonai haibobo.

Mihsahahbonanicah

(Mt 13.1-9; Mr 4.1-9)

⁴ Jemabo janinhax jonibo hahqui tsinquipijaqueti nocoscaax hichascaiton sca ta jaa patax queha joi jato nincamanishqui. Nescajaquin jato yohiquin:

⁵ Jahuen huai banahi cahen huesti joni canish. Jahuen huai chianxon sca bero romishin banaquin mihsahahbonaquin. Mihsahahbonahah cahen caibo bero bahinbi paqueti, jahuibaan jamabonascanon. Hihsabaan rihbi joxon topibonaquin queyoquin. ⁶ Caibo bero rihbi cahen chahoma main paqueti. Jaabo cahen joconax bi bemacanya hihquish xanahi pehuacanascai. ⁷ Caibo bero rihbi moxa bero tocan paqueti. Moxa bero betanbi joconax bi hanihiton moxan sca rishququin. ⁸ Caibo bero rihbi siri main paqueti. Jaabo cahen joconax, hanihax bimihi, hichahi. Huesti bero potaho joconax bimiyahpascaax cien

beroyahpascai. Berotihibi jascari —hahquin.

Jaa joi jato nincamaxon coshin sca yohiquin:

—Hahan nincati pabinquiyahpaxon nincanahue —hahquin.

Honanyamahiboya pontejaquin jan yohihi

(Mt 13.10-17; Mr 4.10-12)

⁹ Jaatian jahuen haxenicabaan sca yocaquin:

—¿Jahua noque haxemacatsihquin min jascarain, Hihbon? —hahcanquin.

¹⁰—Papan jihuematica jenquetsahpa quin man honannon hihxon tah hen jaa patax queha joi yohihi, caibaan honannonma hihxon. Jisxon bi jisyamahabo hihxon. Nincaxon bi nincayamahahbo hihxon tah hen jascapa yohihi.

Mihsahahnica jahuahi jaiquin hihxon jan yohihi

(Mt 13.18-23; Mr 4.13-20)

¹¹⁻¹² Nea tah qui. Jaa bero ta Papan joi qui. Jonibo cahen bahinxon nincacaibo. Nincascaibaan bi ta nincacoinax Papan baquebo sca jamis hihxon tiroma yoshiman jato jaa joi bichiniqui jaton jointi janin yamascanon. ¹³ Chahoma main paquetaibo ta joi siri nincacax coin coinxon bichibo qui. Bemacanya jaton tapon jai quescaxon ta basima tahni bichipixon jenebahinaibo qui. ¹⁴ Moxa chian paquetaibo ta nincacoinaibo qui. Nincacoinxon bi ta huetsa shinanbo rihbi sca bihcaniqui, masa shinantibo, jahuabora tsamanti shinanbo, mai mehabo costan costanti shinanbo. Jascapa shinanbo jointi qui bochohax ta shinan siri caitimahiqui, jahuama quesca sca jai. ¹⁵ Siri main paquetaibo ta sirijaquin bixxon nincacoinxon jeneyamahibo qui. Jascapha ta bimi hichayahpa qui.

Johue
(*Mr 4.21-25*)

¹⁶ Tsoanbi tah non johue quetejaxon quentipan sca mahpobahinyamahi. Quetejaxon tah non tapo naman rihbi tsahonyamahi. Jahuen tsahonti janin caya tah non johue tsahonai, jahuibaan sca jahuen xaba jisnon hihxon. ¹⁷ Man jonexon hahcai ta janibi sca Papan yohipaqueyaxihqui. Jan yohiyamaxihqui ta yama qui, jonexon hahcaibaan bi. Jaan honantima jonexon hahcai ta yama bi res qui. Jatihixonbi honanahbo sca ta jonexon hahcaibo jaan yohipaqueyaxihqui, jahubi jone yamascanon.

¹⁸ Jaa copi nincacoinnahue. Nete queyoscaiya ta nescajayaxihqui. Papan hinanah min jaiya ta hashoan sca jaan mia hinanyaxihqui. Jaan hinanah bi min yamahiya ta min jai pishca rihbi mia bichintihiqui —hahquin.

**Jesusen mama jahuen
huetsabo betan nocotai**
(*Mt 12.46-50; Mr 3.31-35*)

¹⁹ Jaatian jahuen mama betan jahuen huetsabo nocoti jahui. Joxon bi jonibo tsamatayiha Jesus yohuanquihnti hahtipahyamacanquin. ²⁰ Caibo sca chanishi jahui.

—Miin mama betan miin huetsabo ta jemanhihtinin nichiqui. Mia ta jiscatsihcaneihqui —hahcanquin. ²¹ Jasca jaiboya sca:

—Hean yohihi nincaxon hahcoinaibo ta heen mamaya heen huetsabo qui —hahquin.

Nihueya behchon tantijahi
(*Mt 8.23-27; Mr 4.35-41*)

²² Huetsa neten sca ta jahuen haxenicabo betan nontin naneti canishqui. Nanexon sca:

—Hian pohquejaquenahue —jato jaquin. Pohqueti caquin hoque quexa sca chibibonacanquin. ²³ Nihuen xotonah sca pohquecanahi cahi, pohquecanahi cahi, nontinbi sca Jesus hoxascanon. Hian naponbi sca nihuehhuan jato qui paqueti. Behchoman bochojaha nonti hihquicatsihscai. ²⁴ Jesus qui caxon sca mohinxon:

—Hihbon. ¡Non tah non hihquiscái, Hihbon! —hahcanquin. Huenicahuanxon sca nihueya behchonbo yohiquin. Tantinahue jan jaiya tanticahinscái. Jahua nescascái. Jaatian hahbe cahibo sca:

²⁵ —¿Man nincacoinyamabiresain? —hahquin. Jaabo rahte rahtetax yohuan yohuanaiton jato jascajaquin.

—¿Jahua joni cohren jaa quin? Jaan yohihah ta nihuen rihbi nincaquihqui. Jaan yohihah ta behchoman rihbi nincaquihqui —hihcani.

Gadra joni yoshinyahpa

(*Mt 8.28-34; Mr 5.1-20*)

²⁶ Jaatian sca nocotax Gadara main sca taxnacani, Galilea mai hoque quexa.

²⁷ Bototax mapescaiton sca jaa behchihi yoshinyahpa joni jahui, janohahbaan caibo. Tiroma yoshiman hihbojani cahen basi sca chopanma nihpahonish. Jahuen xobon jihueyamahi. Tsahon tocanbo cahuan cahuanresi. ²⁸ Jesus nocotai merahax bishquihahanai sai saihihonahi jahuem raboxonen nichish betihihpaqueti. Coshin sai saihihqui.

—¿Hea jahuejahi min jahuin, Jesusen? Mia tah min naihoh queha Diosen baque qui. Mia tah hen hihtí yocacai. Hea tiromajayamahue —hahquin.

²⁹ —Jaa joni jenebahini catanhue, tiroma yoshiman —Jesusen jaah sca yoshin jascari sai saihihqui. Hicha coti jahuen yoshiman yahtanxon bohá cahen basi sca jaa joni hohmis hohmispahoni.

Cadenanen menexxon tanexxon coiranabaan bi cahen cadena tesabahinax jano tsoa jaitonma jabapahonnish, yoshiman jatsanjahah.³⁰ Jascapa hihqui bi Jesusen yocaquin.

—¿Mia min jahua jane quin? —hahquin.

—Hea ta legión qui —hihqui. Jaa janin hicha yoshin nocohihnxon hichaxon hihbojani cahen jaa janeya janish.³¹ Picotax botannahue hahcá sca hihti yohiscacanquin yoshinbaan:

—Noquen quininhuan janin, jano Diosen noque potayaxihqui janin noque potayamahue —hahcanquin.³² Jano rihbi cochi repinica jai, pih manichi hichahi.

—Hoa cochi qui non canon yohirohahue —hahcanquin yoshinbaan.

³³—Botannahue —hahca sca jaa joni jenebahini bohax cochi qui sca hihqui hibocani. Yoshin jato qui hihquihah sca mapoho rocohihcanahi cahi, jene qui paquetax hahsacani cochibo.

³⁴ Jascabibojisish cochi coirannicahbo jacobini caresscái. Caxon jema janin jihuetaibo yohi yohixon hocho jihuetaibo rihbi nincamacanquin.³⁵ Yohihah sca jisi became. Jahua jaaxquin hihquish became. Jesus qui nocoxon sca jaa patax tsahotai jaa joni meracanquin, jahuen yoshin tiroma yamascai. Chopayahpahax res sca sirijaquin shinnani tsahotaiton meracanquin. Jaa jisish rahte rahtecani.³⁶ Raqueya sca jaibo bi caibaan sca jan rohajahi jisxon yohirihbicánquin:

—Jascajaquin ta yoshinyahpa joni rohajahaxqui —hahcanquin.³⁷ Jaatian tsinquijsaquexon Gadara janinbo jihuetaibaan sca Jesus yohiquin, Noque jenebahini catanhue, hahcanquin. Hihti raquexon Jesus camati shinanxon jascajacanquin.³⁸ Jaatian nanetax cacatsihqui bi yoshin tiroma potamaha joni ri-

hbi hahbetan cacatsihqui. —Hea rihbi hiohue —hahca bi jeenhahyamaquin.

³⁹—Miin xobon caxon Papan mia hahxona jato yohihue —hahquin. Jascajaha jatihibi janin sca yohibonahi cahi, Jesusen ta hea rohajahaxqui, hihcanahi.

Jairon baque; chixanan hisinai haibo

(Mt 9.18-26; Mr 5.21-43)

⁴⁰ Hoque quexa Jesus nocotaiton sca janohahbaan johue hahquin sirijaquin. Jaa joti manarahsihibaan jaa bihquin sirijaquin.⁴¹ Jaatian jaton tsinquit xobo hihbo jahui, Jairo janeya. Jesus bebon miracahpaquexon, Heen xoboho johue, hihxon hihti yocaquin.⁴² Jaa huesti jahuen baque haibo hisinai quen hihti yocaquin. Doce bari jahuen baque jai mahuacatsihscái. Jeenhihquish hahbetan caresscái bi jonibo hichahi. Tsinquitax hueranhahnanax Jesus qui tsehquesihcanahi bocani.

⁴³ Jaatian jano rihbi huesti haibo jai, hisinax jahui. Doce bari sca jimi pota potahi haibo. Tsoanbi jaa rohajati hahtipahyamahiya, hahchon nihxon Jesusen coton quexa mehequin.⁴⁴ Mehehax rohacahin sca jai, jimi tanticahinscái.

⁴⁵—¿Tsoan man hea mehehahquin? —hahscáquin Jesusen.

—Hen tah hen hahyamahaqui —hahcaibo rahsi jaiya sca Pedronen yohiquin:

—Hichaxon ta mia tejabohanxon mia tsahca tsahcahahbonacaniqui, maestron —hahquin.

⁴⁶—Tsoan rah ta hea mehehaxqui. Heen coshi hahqui cainai tah hen honanahqui —hahquin.

⁴⁷ Joneti hahtipahyamahax, raqueyahax saqui saquihhquish, jahue jaa bebon raboxonen nihxon sca, Hisinnixon tah hean mia mehehahqui, Hihbon, hahquin haibaan yohiquin sirijaquin. Jatihixonbi nincanon sca

yohiquin, jan rahma rohacahinscái yohiquin sirijaquin.

⁴⁸—Shinancoinax copi tah min roha sca jai, baquen. Jascabi roha sca jahue —hahquin Jesusen sca.

⁴⁹ Jaa jan jascajaquin yohiparihiya bi tsinquit xobo hihbo yohihi jahuen joni nocoti jahui.

—Miin baque ta mahuascaaxqui. Noquen haxemanica jatsanjayamascahue —hahquin.

⁵⁰ Jaa yohihi nincaxon tsinquit xobo hihbo jisanan:

—Masa shinanyamahue. Shinancoin-reshue. Roha ta jatihiqui —hahquin Jesusen. ⁵¹ Jahuen xoboho mapexon sca hahbe nichibo Jesusen mapemaya-maquin. Pedro, Juan, Jacobo, xontaconen papa, jahuen mama, jaabo rahsi res hahbetan hihcomaquin. ⁵² Texe jano tsamataibo cahen jaya huinihi. Jaya huaohihqui.

—Huaohiyamanahue. Mahuatihma bi ta hoxaresiqui —hahquin Jesusen. ⁵³ Jascajaha bi xontaco mahua sca jai honanxon Jesus hosancanquin. ⁵⁴ Xontaco mehuetanxon sca coshin yohiquin:

—Huenihue, baquen —hahquin Jesusen. ⁵⁵ Jahuen yoshin joribiscaax xontaco huenicahuanscái.

—Piti hinanhue, jan pinon —hahscäuñin Jesusen. ⁵⁶ Jahuen papa betan jahuen mama rahte rahteti. Jenquetsahaquin rohajahaxquin yohiyamahahbo sca jahuen papaya jahuen mama hihti yohiquin:

—Tsoabi yohiyamanahue —hahquin Jesusen.

Jahuen haxenicabo Jesusen raanai

(Mt 10.5-15; Mr 6.7-13)

9 Jahuen doce raantibo sca quena-maxon cahen coshi shinan jato hinanquin. Jatihibi tiroma yoshinyahpabo rohajati, jatihibi hisin rihbi rohajati

coshi hinanquin. ² Hinanxon Papan ji-huemati joi yohihahnán hisinaibo rohabonanon hihxon jato raanquin.

³—Jaya catibo bichishma botannahue. Mepiti tah man botimahi, borasa boyamaribiquin. Ni piti ni coriqui boyamaribiquin. Rabe cotonya rihbi tah man catimahi. ⁴ Xobon mato mapemaha janobinahue. Caribinoxon caman tah man jaa xoboho hoxatihí. ⁵ Mato mapenahue hahyamahiboya tah man jaton jema potabahini caquin sca maton sapato qui hueotai jaton mai poto jato qui tahabahintihí, nincayosmabohi honanahbo hihxon —jato jaquin. ⁶ Cahax sca jema tihibi qui nocoxon Papan joi siri yohihahnán hisinaibo rohajacanquin.

Juan rehtehox yohuanaibo

(Mt 14.1-12; Mr 6.14-29)

⁷ Herodes janeya quiquin hapo sca caibaan yohiquin, Jasca roqui Jesus jaiqui hahquin, jatihibi yohixon.

—Caibaan shinanah ta Juan muhanish bi jihuerihbiscaiqui —hahquiboya caibo sca:

⁸—Elías yamanica rah ta noque qui Caini joribiscaiqui —hihcáni, Jesus jaa hahqui shinanax.

—Neateman jihuapahonish bi tee-hihribiscái Papan joi yohixonnicala ratah qui —hahqui caibo rihbi sca. Jascapa nincaxon Herodesnín masa shinanquin.

⁹—Juan tah hen textenihqui. ¿Nea yohihibó Jesus jahua joni jatihiquin? ¿Jenquetsahaxon hen jaa jistihin? —hixon shinanquin.

Cinco mil Jesusen pimahi

(Mt 14.13-21; Mr 6.30-44; Jn 6.1-14)

¹⁰ Jesusen raanipi hahqui beribixon sca jaabaan caxon hahtanipi jatihibi yohicanquin. Jato canon benahue hahxon sca jaabo rahsibi sca hahbetan canon Betsaida jema janin jato hioquin.

¹¹ Jahuen bocanaxquin honanax texe rihbi jano bocani. Nocotaiton jato Benahue hahxon Papan jihuemati joi Jesusen jato honanmaquin. Hisinaibo rihbi rohajaquin jatihibi. ¹² Bepiscayai jahuen raantibo joxon yohicanquin:

—Nea jonibo camahue, Hihbon, nenobo jai jemabo janin caxon huaiyapabo janin rihbi caxon jano hoxati sca benahahbo. Jano jaton piti benahahbo. Neno ta jahuabi yamahirqui —hahcanquin.

¹³ Jascajahahbo bi:

—Maton caya jato piti hinannahue —hahquin.

—Noque tah non piti yamahi. Pichca paan pishca, rabe yapa rihbi, jaa res. Jhua hashoan tah non yamahi. ¿Yotihixon piti marohi non catihin? —hahcanquin. Cinco mil bebobo jano jai quen jascajacanquin.

¹⁴ —Cincuentabo rahsi tsahojaquetanon jato mitsahohmanahue —hahquin jahuen haxenicabo. ¹⁵ Yohihah sca jascajacanquin mitsahohmaquin. ¹⁶ Jaton pichca paanya rabe yapa bihxon sca nai bejisihnixon Papa yohixon tehcaxon jahuen haxenicabo metisahpaquequin. Hinanah, jaabi rihbi jonibo sca hinanpaquecanquin. ¹⁷ Bihxon yaninoxon caman jatihixonbi picanquin. Pixon bi texejaribicanquin. Yapaya paan tequebo piquin texejahiboya sca doce tasa bocho tsinquirihbicanquin.

Mia tah min Cristo qui Pedro jai

(Mt 16.13-19; Mr 8.27-29)

¹⁸ Jaa pecaho sca Papa yohihi jaa huesti cahiya jahuen haxenicabo sca hahqui bocani. Noco sca jaiboya sca jato yocaquin:

—¿Hea jahua joni hihqui shinancanquin? —hahquin.

¹⁹ —Mia roqui Juan yamanica qui, hoa nashimapahoni. Caibaan shinanah cah min mia Elías yamanica. Caibaan rihbi

jisí cah min neateman japahoni Papan joi nincamanicah, hahquirihbi teehihqui —hahcani.

²⁰ —¿Maton shinanah cahran? ¿Hea tsoa quin? —jato jaquin.

—Mia tah min Papan raanai qui, min jotih jan neateman yohini tah min qui —hahquin Pedronen sca.

Jan muhuayaxihqui Jesusen yohihi

(Mt 16.20-28; Mr 8.30-9.1)

²¹ —Tsoabi jascajaquin honanmaya-manahue. ²² Hicha pari tah hen teneti jai, noquebaque hen jai copi. Hapobo rihbi ta Jaa ta tiroma qui hiyaxi-hquiqui, hea yohihi. Jaton haxemanicahbaan rihbi ta jascajaribiyaxihquiqui. Jascajaxon ta hea rehtescayaxihcanihqui. Rehtehipibaan bi tah hen quimisha neten hihquish hahquirihbi teehihtihi —jahuen haxemanicabo jaquin.

²³ Jano jaibo rahsi sca yohirihbiquin:

—Hehchon jocatsihxon tah man matobi man queenaima sca man hahtihi. Hea rehtehibaan bi tah hen heen Hihbo jenetimahi hihnahue nete tihibi. Jaatian tah man heen jihuetahbo jatihi.

²⁴ Mahuati qui raquetaibo ta mahuati-hqui. Jascapa jihuetaimahi bi ta hea copi mahuataibo queyoyamanox manatihi. ²⁵ ¿Nea mai jatihobi hihbo-jahax bi mahuatax sca jahuaya man banetihin? ¿Jaabiyahpa queyosaxon man jahua jatihin? ²⁶ Hea hihbomacatsi-hyamahibo tah hen noquebaque hihxon Mia tah min henama rihbi qui hah hen jatihi. Heen joi qui hihtimahpaibo rihbi tah hen jascajatihi. Coshi shinanya joxon tah hen jascajatihi, noquebaque hihxon. Papan xabaya joxon, hicha nai-hoh queha yonotibo rihbiya joxon tah hen jascapa jascajatihi. ²⁷ Hihcoinja tah hen mato jai. Caibo neno nichibaan tah man muhauaxonma Papan jihuemati man jistih —hahquin.

Jesus xabayahpacahinai

(Mt 17.1-8; Mr 9.2-8)

²⁸Jato jascahipixon ocho netebo hihxon Pedro, Juan, Jacobo jaabo quimisha hioquin. Papa yohinoxon mahchi janin cahi. ²⁹Janoxon Papa yohihahnan sca jahuen bemanan huetsapahcahini. Jahuen chopas rihbi pehnecahini, cana bacahi quesca. ³⁰Jaatian rabe joni hahbetan yohuani sanareneni jahui, huetsa cahen Moises yamanica, huetsa cahen Elías yamanica. ³¹Jaabo rabe rihbi xabayahpahax hahbetan yohuani. Jerusalen janin jan muhuayaxihqui yohuancani. ³²Yohuan yohuanaiboya bi Pedro jaabaan hoxan hihxon bi tenexon jahuen xaba jisquin. Hahbe yohuanai xabayahpa rabe rihbi jiscanquin. ³³Yamanica rabe caresscacatsihquiya sca Pedronen Jesus yohiquin.

—Noque neno jaah ta siri qui, maestron. Quimisha tapasnonhue, mina huesti, Moisesnina huesti rihbi, Eliasnena huesti rihbi —hahquin, jahua yohuanti honanxonma jascajaquin. ³⁴Pedro jascari yohuanaiya bi nai cohiman jato mahporenenquin. Cohiman mahpobahinah raquecani. ³⁵Jaatian cohiman mehax yohuanai sca nincacanquin:

—Nea ta hen caisni heen baque qui. Jaa nincanahue.

³⁶Jascari yohuanai nincaxon jisibaan bi Jesus huesti sca jai. Jascapa jisipixon bi ta tsoabi yohiyamacannishqui. Jisyamahicamacani. Chiní sca ta yohicannishqui.

Yoshiman hihbojani Jesusen rohajahi

(Mt 17.14-21; Mr 9.14-29)

³⁷Jaa mahchi janinhax bototipish hoxashinahax mohiyahtax cahiton sca jato behchihi tsama jonibo becani.

³⁸Jato tocan huesti joni coshin yohuanhonahi jahui.

—Maestron, mia tah hen hihti yocacai. Heen baque jisxonhue. Jaa huesti heen baque tah qui. ³⁹Yoshiman hihbojaha ta sai saihihcahinax jomi jomihax bacox jancharahihqui, hihbon. Jenexonma ta yoshiman rishqui rishquihihqui. ⁴⁰Jahuen tiroma yoshin potamaxonnahue hen jaah bi ta miin haxenicaaban hahtipahyamahipicanaxqui —hahquin.

⁴¹—¡Nincacoinyosmabon! ¿Jenquetsahpahi man shinancoinyamahin? ¿Jahuentiho basi hen mato betan hihquiya pari man pontetihin? ¿Jahuentiho basi cahran hen mato teneti Jain? Miin baqueya johue —hahscaquin Jesusen. ⁴²Jan jaya jahuiyabi yoshiman sca main hueranbohanxon jomimaribiquin. Jascaraiton sca yohixon tiroma yoshin jenemabahinxon:

—Nea ta miin baque qui, bihhue —hahscaquin Jesusen. ⁴³Jan jascajaxonai jisish rahte rahtecani janoo jaibo jatihibi.

—¿Jahuentiho coshi Papan shinanyaxon noque hahxonihqui? —hihcandi.

Jan muhuayaxihqui Jesusen yohirihbibi

(Mt 17.22-23; Mr 9.30-32)

Jan jato hahxonai jatihibi jisish rahte rahtetaibo rahsi. Jaatian sca jahuen haxenicabo jaan yohiquin.

⁴⁴—Hen mato yohinon nincaquin sirijanahue. Jaabaan hea jahuejara janon ta jonibaan hea bihmayaxihcаниhqui. Jaabaan hea bihti ta hochomascaiqui —jato jaquin. ⁴⁵Jan yohihah jahua hihcatsihquiquin cahen honanyamacannish. Jaton jointi xehpotaiya cahen honancasquimacannish. Jahua hihcatsihquiquin hihxon hihbo yocatihi bi yocati qui raquecani.

Tsoa hashoan hapo quin hihquibo

(Mt 18.1-5; Mr 9.33-37)

⁴⁶ Jaa pecaho sca jaabo rahsibi yocacahanani. Tsoa non hashoan hapotihin hicani. ⁴⁷ Jaton jointi chicho yohuanaibo joi honanxon, janu nichi baque pishca bihxon jaa pataxxon jato yohiquin:

⁴⁸ —Nea baque pishca heen janen bichi jonin ta jascajquin hea bichiqui. Hea bichi jonin ta hea raanni rihbi bichiqui. Mato tocan hashoan hahxon-nica joni ta hihti shinanya joni qui — hahquin.

Noque panteyamahibaan noque yanapanai

(Mr 9.38-40)

⁴⁹ —Maestron, tiroma yoshinbo miin jane yohixon camahi joni tah non jisiqui. Jaa tah non Jascayamahue hahbenanai, jan noque betanbi nihyamahi copi —hahscaquin Juaman. ⁵⁰ Jascajaha:

—Jascapa panteyamanahue. Mato panteyamahibaan ta mato yanapaniqui —hahquin Jesusen.

Jacoboya Juan Jesusen hihti yohihi

⁵¹ Jahuen Papa qui cati hochoma sca jaonahiya sca Jerusalen janin cati shinanax, janu res cahi cahi. ⁵² Jano jan nihnoxihqui janin pari canon, jonibo raanquin. Jaan raanah bocani. Samaritano jema qui nocoscaxon noquen hihbo janu hoxati benaxonabi bi janu hoxati hinancatsihamacani, samaritanobo. ⁵³ Jerusalen janin jan cahi honanax janu hoxamatiqueenyamacani. ⁵⁴ Jano nocoscaxon jascapahbohi jisxon rabe jahuen haxenicabaan yocauquin:

—¿Naihoh quehax jato qui chihi paquexon jato queyobahinti non Papa yocatimahin, hihbon? —hahquin Jacobo betan Juaman. ⁵⁵ Jato qui rabejaquexon:

—Hahyamaquin rahan —hahxon pontequin jato hihti yohiquin. ⁵⁶ Yohiquin sirijaxon jaa jema huinobahini caress-caax cahi. Huetsa jema qui sca nococani.

Jesus betan nihcatsihquibo

(Mt 8.19-22)

⁵⁷ Janohax boribicani. Huinotaiton sca huesti jonin Jesus yohiquin:

—Jano mia cahi tihbi tah hen mia manahi catihi, miin joi yohinicanoxon —hahquin. ⁵⁸ Jascahiya:

—Caman hinobo ta jaton mai quini jaiqui. Pehiyahpabo rihbi ta nahayahpa qui. Hea noquebaque tah hen jascayamahi. Hea noquebaque tah hen jahuenbi hoxati yamahi —hahxon, huetsa sca yohiquin:

⁵⁹ —Heen joi yohinicanoxon hehbe johue —hahquin. Hehbe johue hahcá bi:

—Heen papa pari hen mihintahyax-ahnnon, hihbon —hahquin.

⁶⁰ —Mahuataibaan hahbe muhuateiba mihninnon jenehue. Papan jihuemahi joi yohibonahi cahi johue mia —hahscaquin noquen Hihbaan. ⁶¹ Huetsa sca yohuani:

—Mihbetan tah hen catihi, hihbon. Heen jenabo pari hen yohitannon man-atahhue —hahquin. ⁶² Jaa sca yohiquin:

—Miin tee queyoyamaxon bi min japhahoni janin sca miin shinan camahax tah min Papan teexonnicaah mia jatimahi —hahquin.

Setenta Jesusen raanai

10 Jasca jaipixon sca huetsa jonibo sca joi yohibonatannahue hahquin. Jascajaxon setenta raanquin, rabe rabe bohábo hihxon. Jano jaabi nocoyaxihqui xobo jatihibi qui canon jato raanquin, janu jan nocoyaxihqui jema tihbi. ² Jato raannoxxon yohiquin:

—Banaho huai johuescaax tsinquit hicha jai bi ta teexonnicaahbo huestibohiqui. Jaa copi huai hihbo yocanahue,

tsinquixonnicahbo jahuen huai chian jan raannon.³ Jistahi man. Hinobo tocan man carnerobo canon quesca tah hen mato coiranhanan raanai.⁴ Coriqui boyamanahue. Ni borasabi, ni sapatobi, boyamanahue. Bahin caxon jonibo behchixon yohuanquhnxonma huinóbahintannahue.⁵ Xobo qui nocoxon tihibi, Papan hahxonah man neno jascabih jayamahin, hahnahue sirijaquin.⁶ Mato sirijaquin bichiboya ta man yohihah quesca sca Papan jato hahxonyaxihqui. Mato sirijaquin johue hahyamahiboa ta man jato sirijaquin yohiyamahah quescatihqui.⁷ Mapetax tah man jaa xoboho sca jihuetahtihi. Jano jihuetahxon jaton piti mato hinanahbo pinahue. Jaton xehati xehaquin. Teexonnicah copijaha tah qui. Jaa copi jatona pinahue. Xobo tihibi tah man piquin betsativahi.⁸ Jemabo janin rihbi nocotaiton mato sirijaquin benahue hahca jaa xoboho hoxanahue. Mato hinanai pitibo pinahue.⁹ Jano jaibo rohajaxon, Papan mato jihuematia noscrai qui, jato janahue.¹⁰ Jemabo qui nocotaiton bi mato benahue hahyamahiboa tah man jaton jemanhihtibo janin nihxon man yohitihi:¹¹ Noquen tahe qui hueotai mai poto tah non mato qui tahabahinai man jascapahbo copi. Jaabi honannahue. Papan jihuematia hochoma sca jaonahique.¹² Mato tah hen yohihi. Casticanti neten ta sodomitobo Papan casticanai mentan hashoan coshin jaton jema jaan casticanyaxihqui.

Nincayosmabo

(Mt 11.20-24)

¹³ ¡Hahrai hih tah man jayaxihqui, corazono jonibon! Jascarihbi tah man jayaxihqui, Betsaida jonibon. Mato tocanxon heen coshiyaxon hen hahní quescajaribiquin hen Tiro jema janinxon hahcaya cahen neateman jaton hohcha

copi benaxon hahan benati chopasahue-hax chihi mapo mapocohtax tsahoxon jaton shinan pontehan.¹⁴ Tiro joniboya Sidono jonibo jan casticanyaxihqui bi ta hashoan hihtijaquin sca Papan mato casticanyaxihqui. ¹⁵ ¡Capernaum jonibon! ¿Naihoh jihuetax quescari man maton jema janin siripi jihueta shinanain? Maton jema ta maton tsahon baneyaxi-hqui —jato jaquin.

¹⁶ Jascajaxon jahuen raantibo yohirihbiquin:

—Man yohihah nincacaibaan ta hea nincacuhi qui. Man yohihah bi nincacatsihyamahiboa ta hea rihbi nincacatsihyamahique. Hea nincacatsihyamahiboa ta hea raanni heen papa rihbi nincacatsihyamacanique —hahquin.

Jahuen setenta beribiscay

¹⁷ Raanah, botanipish, jahuen setentabo jenimahonahi beribican. Nocoxon:

—Yoshinbobi tah non miin janen yonohipiqui, Hihbon —hahcanquin.

¹⁸ —Naihoh quehax cana bacahihcamahi tah hen Satanas potahah paquetai jisni qui.¹⁹ Nicanahue. Hean raanah caquin man rono jamabahinti coshi tah hen mato hinanipiqui. Nibo jamabahinti rihbi. Satanasnen yoshinbaan mato jahuejati hahtipahyamanon tah hen mato coshi hinanipiqui. Ni jahuatohonbi ta mato tiromajatimahique.²⁰ Tiroma yoshinbo man camati hahtipahi bi tah man jaa copi jenimatimahi. Naihohxon maton jane huishá sca jai copi jenimanahue —jato jaquin.

Jahuen Papa betan jahuen baque

(Mt 11.25-27; 13.16-17)

²¹ Jato jascajaxon Dios Yoshiman hanan jenimati hinanah hihti jenimaxon noquen Papa sca yohiquin:

—Hahxon tah min hea jai, Papan. Mia tah min naiyahpa mai Hihbo qui. Shina-

manhuanyahpabo betan honanbaan honancasquimanon tah min jato pantexon, miin baquebaan sca honannon min jato honanmahi, Papan. Mian jisí jascapa siri quen tah min jascajaxonai, Papan.

²² Papan ta hea jatihibi hinanihqui. Jahuen baque tsoa hin ta tsoanbi honanyamahihqui. Papa huestichin ta honanihqui. Tsoa heen Papa quin tah hen jahuen baque hihxon hea huestichin hen honanai. Caibaan ta honanyamahihqui. Hean yohihah res ta caibaan rihbi honansciqui —hahquin. ²³ Jascaxon jahuen haxenicabo rahsi sca yohirihbiquin:

—Man jisibo jisish jenimanahue. ²⁴ Man rahma jisi ta Papan joi yohixonnicaahbo betan quiquin hapobo hichaxon jiscatsihxon bi hahtipahyamacannishqui. Man nincacai ta nincacatsihxon bi nincayamacanpahonishqui —jato jaquin.

Samaritano

²⁵ Jaatian nihxon judiobaan haxemanicahton jenquetsahaxon yocaxon non Jesus tiromahi yohuanmatihin hihxon yocascaquin:

—Maestron, ¿jenquetsahax hen queyoyamanox manatihin? —hahquin.

²⁶ —¿Papan joi janin jahua huisha jaiquin? ¿Jahua min janu jisin? —hahscquin Jesusen. ²⁷ Jaan yocacah sca:

—Miin Hihbo Diosohon tah min miin jointiboyabi queentihu, miin yoshinboyabi, miin coshiboyabi, miin shinanboyabi tah min jahan queentihu. Mihbe ji-huetaibohon tah min queenrihbitihu, miabi min queemehti hihqui quescarih —hahquin.

²⁸ —Hihcoini. Jihuenox hihqui jascahue —hahscquin. ²⁹ Jascajanicah sca jan hihqui Jesus shinanmacatsihxon sca Jesus yocaribhiquin:

—¿Tsoa heen hahbe jihuetaahbo quin nan? —hahquin.

³⁰ —Nesca tah qui. Huesti joni cahen Jerusalen janinhax Jericó jema janin cahi cahpaquehti. Cahiton sca cahen tiromabaan bihxon jahuen chopas bichinxon, rishqui rishquixon hahan muhati tsehueya sca potabahincquin. ³¹ Sacerdote huesti sca janu huinoti jahui. Bahin joxon jahuen caibo janu miracahtai merahax tecayacahini caresscrai. ³² Levito baquebo huesti sca jascarihbibi, jahuen caibo. Jano nocoxon merahax tecayacahini caresscrai. ³³ Samaritano huesti sca hocho quehax jahui, jahuen nahua sca. Hahqui nocoxon jahan shinanxon bihtanxon, rahonquin. ³⁴ Olivo bimi xeniya vino rahojaxon jayaxon jahuen tsehue rahonquin. Jahuen cabacho cahracanxon sca janu hoxati xobo janin sca hioquin. Janoxon sca rahonxon coiranshinarihbiquin. ³⁵ Xaba paque sca jaiya sca rabe neten teexon cananai tih coriqui hinanxon sca xobo hihbo yohiquin: Jaa hea coiranxonhue. Jaa coiranquin min hashoan sca coriqui castanaiya tah hen joribixon mia copijatih. ³⁶ Jascajaquin yohixon sca Jesusen yocaquein:

—Yometsohbaan tsehuejaha racatai qui cahen quimisha joni nocoti. Mian shinanah, jahuemeha jahuen hahbe jihuetaah quesa janishquin? Hea yohihue —hahquin haxemanica yocaquein.

³⁷ —Hoa jahan shinanxon hahxonai rahan —hahscquin.

—Mian rihbi jascajatanhue —hahscquin Jesusen.

Martaya Maria janin Jesus nocoti

³⁸ Janohax Jesus, jaabo, boresscaax huetsa jema janin nococani. Jano cahen Marta janeya haibo jihuenish. Jaan Mapehue hahquin jahuen xobon Jesus mapenon. ³⁹ Jahuen shara rihbi cahen

jano jihuepahonish, María janeya. Jesusen haxemahi nincacatsihqui cahen jaa patax tatsahoxon jan yohihi Marian nincaquin sirijaquin.⁴⁰ Jahuuen tee hichahiya Marta tee teeti. Piti qui jaa mehca mehcatai bi Marian nincaresquin. Martan sca yocaquin:

—¿Hea huesti hen tee teenon heen sharan hea yanapanyamahi min jisyamahin, Hihbon? Yohihue, jan hea yanapannon —hahquin Martan.

⁴¹—Hicha tah min masa shinanai, baquen. Miin tee hichahi tah min jasanai. ⁴²Huesti shinanyati ta jaiqui, Papan joi nincati res. Marian ta siri-jaquin shinanax nincati queenihqui. Jan queenai ta tsoanbi bichintimahiqui —hahquin.

Papa yocati Jesusen haxemahi

(Mt 6.9-15; 7.7-11)

11 Huetsa neten sca cahen huetsa janin caxon janoxon Papa yocanish. Papa yocaquin queyoscaiya huesti jahuen haxenicaton yohiquin:

—Juaman ta jahuen haxenicabo Papa yocati haxemanishqui, Hihbon. Jasca-jaquin rihbi noque haxemahue, non Papa yocanon.

²Haxemahue hahcá jato haxemaquin nescajaquin:

—Papa yocacatsihquin nescajanahue. Papan, mia Papa Dios jai honanahbo jahue. Miin jihuetahbo non janon noque hihbojahue. Min naihoh hahcái quescajaribiquin neno rihbi hahhue.

³Nea neten piti noque hinanhue, Hihbon.

⁴Noquen hohcha sohuahue. Mihqui non hohchani min shinanyamas-cai quescajaribiquin tah non joni huetsa tenexon noque qui tirom-ahibaan bi jato sirijaquin yohuan-quihnai. Jascajaquin rihbi noquen hohcha sohuaxon jaa shinanyam-

ascahue, Papan. Satanasnen noquen coshi tanatihi janin noque hioyamahue, Papan. Satanas noquebihmayamahue

hahquin yocanahue —jato jaquin.

⁵Jascajaquin haxemaxon sca jato yohiscaquin:

—Mihqui nocotaibo pimacatsihquis-rah tah min yame pochinicon miin huet-san xobo janin caxon min yocatihi: Huet-san, quimisha pichanti pishca hea hinanhue, huetsan.⁶ Noquen jenabo ta hocco quehax jahuex hehqui nocotaxqui. Jahuabi tah hen jato pimati yamahi.⁷ Chichoxon sca cahen mia yohihan: Hea jatsanjayamahue. Heen xehpoti tah hen moa xehposcái. Heen baquebo ri-hibi ta moa hoxascáiqui. Mia hinantihbi tah hen picotimahi ¿hah mia jati-hiquin?⁸ Nincatahi man. Mia jahuen huetsa que bi hinanti queenyamaxon bi ta min hihti yocacai copi mia hinantihiqui, min yocacai tihi.⁹ Man honan-non hihxon tah hen mato yohihi. Papa yocanahue. Mato ta hinantihiqui. Benanahue. Papan ta mato meramatihiqui. Xehpoti ton ton hahnahue. Papan ta mato quehpenxontihiqui.¹⁰ Yocacai tihibichin ta bihtihiqui. Benahi tihibichin ta meratihiqui. Ton ton hahcái tihibi ta mapetihiqui.¹¹ ¿Miin baquebo mihqui caxon min mishquitanai yapa pishca mia yocacah bi min rono hinantihin?¹² ¿Hatapa bachi yocacah bi min nibo hinantihin?¹³ Honannahue. Tiromaboxon bi tah man maton baquebo qui siribo hinanti honanai. ¿Man yocacah maton naihoh queha Papan hashoan ri-hibi sca jahuen yoshin siri mato hinantimahiquin? —jato jaquin.

Yoshinyahpa tah qui hihquibo

(Mt 12.22-30; Mr 3.19-27)

¹⁴ Huetsa tian sca ta yoshiman bilihni joni rihbi jahuen tiroma yoshin camaxon rohajanishqui. Tiroma yoshiman hihbo-

jaha joyo sca banenish. Joyo banenish bi jahuen tiroma yoshin camaha yohuan-scai. Jan yohuanai jisish rahte rahtecani tsamajaquetaibo. ¹⁵ Caibo rihbi hahqui yohuani:

—Quiquin yoshin Beelzebunen coshi hinanah ta tiroma yoshinbo camahiqui —hihcanni. ¹⁶ Caibaan rihbi sca jahuen coshi tanacatsihquin:

—Miin naihoh queha coshin hahxon noque jismahue —hahcanquin. ¹⁷ Yocac-ahbo bi jaton shinan honanxon Jesusen jato yohiquin:

—Jahuen jihuetaibo jaabo rahsi bi rehtenanaiya ta hapon yonoti queyotihiqui. Jaton caibo betan rehtenancanahibo ta queyonicabo qui, jahuabi yamascanon. Jaa copi honannahue. Satanasnentia ta jahuentianbi jahuen hahbe yoshin tiromabo picotimahiqui. ¹⁸ Satanas hahbe Satanas betan rehtenanxon cahen jenquetsahxon bi sca jahuen yonotibo yonoyamahan. Jascama ta qui. Satanasnentia coshiyaxon hen tiroma yoshinbo camahi hih man jai copi tah hen mato yohihi. ¹⁹ ¿Tiroma yoshiman coshiyaxon hean tiroma yoshinbo camahi man jaiya, jahuatohon cahran maton baquebaan jato camahiquin? ¿Jenquetsahpa shinanya man quin? Jaabaanbi ta mato yohiyaxihquiqui.

²⁰ Papan coshiyaxon tah hen hean yoshinbo camahi. Jaa copi honannahue: Papan jihuematici nete ta mato qui nocu sca jaiqui. ²¹ Nesca tah qui, jisnahue. Coshi jonin cahen jahuen toohahtiyahpaxon jahuen xobo coiranah. Coiranah cahen jaho jaibo tsoanbi meheyamahan. ²² Hashoan coshi joni pari joxon ta xobo hihbo bihxon jahuen toohahti bichinnica qui, jayaxon coiranti jaa xobo hihbaan shinanah bi. Jahuen jahuaborabo rihbi bichinxon ta jahuenahbi jahuen jonibo qui sca jaan metisahpaquenica

qui. Jascapah tah hen qui. ²³ Hehbe hihyamahax tah man henaboma qui. Hea tsinquixonyamaquin tah man jabismahi.

Joribinica yoshin

(Mt 12.43-45)

²⁴ Tiroma yoshin ta joni jenebahini cahax jano jahuabi jaitonma cahax jano ji-hueti benahi cahuan cahuan caxon bi merayamahax janohax hen jahui janin caribitanpan hihcrahini cahiqui. ²⁵ Caxon ta matso siri sca jahuen xobo merascaiqui, bexojaxonah sca. ²⁶ Jaatian ta caxon hashoan tiromabo hahbe yoshin rihbi benatihiqui, siete hahbe yoshinbo. Jatihibi sca jahuex ta jaa jonin jointi janin sca jihuethiqui. Jaa copi ta jaa joni hashoan tiromacanahi sca jatihiqui, hicha yoshiman hihbojaha sca.

Jenimacointi

²⁷ Jato jascayaquin yohi yohihiya sca ta tsinquijaquetaibo tocanxon huesti haibaan coshin yohinishqui:

—Mia baquexo bihni haibo ta hihti jenimati jaiqui. Mia chocho hahmani ta hihti jenimati jaiqui —hahquin. ²⁸ Jascaya sca:

—Jaama bi ta Papan joi nincaxon bih-coinaibo caya, hahan jenimati jaiqui —hahquin.

Jahuen coshi jisti yocacaibo

(Mt 12.38-42; Mr 8.12)

²⁹ Hihti caibo sca nocohihnatayi jato yohiquin nescayaquin:

—Rahma ta jonibo shinan tiromayah-pabo qui. Non mia nincanon hahan honanti noque jismahue hah tah man jai. Man jascarai bi ta huestijaquin res hahan honanti Papan mato jismatihiqui, Jonas janí quescapah res tah man jistihi, jaa jisxon honanti. ³⁰ Jonas jisxon ta ninevitoaan honannishqui. Jaa Jonasbi ta hahan honanti janishqui. Jascapahribihi

tah hen hea noquebaque hahan honanti qui.³¹ Jonibo casticanpaqueti nete noco sca jaiya ta chiponquiha quiquin hapo yamanica nihxon rahma jai jonibo yohiyaxihquiqui: Mato tah man nincayosmabo qui hahquin. Jaa ta hocco quehax jonishqui, shinanyahpahax Salomon yohuanai nincaqui jahui. Salomon hihpahoni mentan hashoan coshi shinanya rahma neno jai bi tah man nincacatsihyamahi.³² Papan casticanti neten ta Níneve jema janin jihuelpahoni-hbaan mato metoyaxihquiqui, Jonasen yohihah jaton shinan pontenihxon. Mato tah man noque mentan hashoan nincayosmabo qui. Jonas mentan hashoan nincati jonin mato yohihah bi tah man nincayamanihqui hah ta jayaxihcаниhqui, mato yohiquin.

Non johue quescapahi

(Mt 5.15; 6.22-23)

³³ Tsoanbi tah non johue quetejaxon joneyamahi. Quetejaxon tah non quentipan mahpoyamaribibi. Quetejaxon tah non jahuen tsahotinin tsahonai mapetaibo rabsichin jahuen xaba jisnon.³⁴ Noquen yoran johue ta noquen bero qui. Miin bero siripaiya tah min xabapan nichii. Miin bero tiromahiya tah min bahquish chian nichii.³⁵ Jistahi man. Maton shinan janin xaba jai man shinanah bi bahquishcahinmis.³⁶ Miin shinan xabayahpa hihquish, jahubi miin shinan bahquishhyamaha tah min sirijaquin xabajaxonah sca min jatihi, johuepan xabajaha quescapi —hahquin.

Jaton haxenicaboyabi Jesusen fariseobo cahehi

(Mt 23.1-36; Mr 12.38-40; Lc 20.45-47)

³⁷ Jascajaquin jan yohihiya, fariseo janin sca:

—Heen xobon pihia cahue —hahquin. Jascayahah hahbetan cahax mapetax pihia tsahopaqueti.³⁸ Piriyamahax jan me-

choquihyamahi quen fariseo rahteti.
³⁹ Rahtetaiton:

—Mato fariseobaan tah man chichoma maton tasonbo rahchoxon maton platobo rahchocai. Maton jointi nahpamehtan; jano tah man tiroma shinanbo bochohi, yometsohti shinanya hihti tiromabo shinanbo.⁴⁰ Maton mequen mato hinanxon maton jointi rihbi Papan mato hinanyamanishquin, honanmabon?⁴¹ Maton jointiboyaxonbi jahuaborajomabo yanapancoinnahue. Jaatian tah man jahuabi sca rishtaya hihqui man shinanyamascatihi.⁴² ¡Hahrai! hih tah man jatihi, fariseobon. Maton haxe pehi romishin tah man texe Papa jahuena hinanxon, cahua meso rihbi texe pishca hinanxon, huai bimi rihbi texe hinanxon bi Papan yohihi quescajati man pishinmahi. Joni huetsa yanapantihbi bi tah man tiromajahi. Joni huetsahon shinanti Papan mato yohihah bi tah man hahyamahi. Man hinanaibo Papa hinanquin jenebahinxonma caibo rihbi yanapantihbi bi tah man hahyamahi.⁴³ ¡Hahrai! hih tah man jayaxihqui, fariseobon. Tsinquiti xobo janin tah man hapobo tsahotai janin tsahoti queenbiresai. Jemanhihti janin tsinquijaquetaibaan mato saludanti rihbi tah man queenyorahi.⁴⁴ ¡Hahrai, hahrai! hih tah man jayaxihqui. Mato tah man tsahonipibo quescapahbo qui. Tsahonipi maníxon bi tah non jenquetsahpa pisi chicho jaiquin non honanyamahi —jato jaquin.

⁴⁵ Noquen Hihbaan jascajaquin yohihiya sca Moisesnin joi haxemanica huesti jano tsahoxon yohiquin:

—Maestron, jascajaquin yohiquin tah min noque rihbi cahehi —hahquin.

⁴⁶ —¡Hahrai! hih tah man mato rihbi jayaxihqui, haxemanicahbon. Jonibo hihuehhuan papima papimaquin hahcajaquin tah man joi tsamanxon jato

yohihi. Yohixon bi tah man maton metotinin bocabi mehexon jato yanapanyamahi.⁴⁷ ¡Hahrai! hihnoxihnahue. Maton papabaan ta Papan joi yohinicabo rehtepahonishqui, maton sca man Papan joi yohinicabaan tsahon qui tsahonxobojanon.⁴⁸ Jascajaquin tah man maton shinanbo noque jismahi. Maton papabaan hahpahoni quescajaribiquin tah man shinanai. Jaabaan rehtenihbo tah man maton sca man tsahonxobojaxonai, hahbe rehtemisboxon.⁴⁹ Jaa copi ta honanxon Papan yohihiqui: Jato qui tah hen heen joi yohixonnocaboya heen raantibo hean raanai. Hen raanah cahiton ta texe rehtexon texe rihbi tiromajayaxihcanihqui, hahquin.⁵⁰ Rahma jihuetaibo yohihi sca ta Papan nescajaquin yohihiqui: Maton tah man heen joi yohixonnicaahbo rehtennihqui. Hen raanmenoni rehtennixon tah man rahma caman jato jatihibi rehtenpaquehi, hahquin.⁵¹ Abel rehten Nixon tah man caibo sca rehtexon, jato rehtepaquehi. Janoxon Papa yocaxonti janin jan nichi que bi Zacarías sca rehtenoxon caman tah man jato rehtenpaquehi. Mato ta Papan casticanyaxihqui, hih ca hen jai sen, jaton jimi man potamani copi.⁵² ¡Hahrai! hih tah man jayaxihqui, haxemanicahbon. Jayaxon Papa honanti huisha joiyahpaxon bi tah man honancatsihyamahi. Jascaxon tah man caibo rihbi sca man pantehi, honanpanan —jato jaquin.

⁵³ Jascabajahini caressca jan jaiya cahen jaton haxemanicahbo betan jaton fariseobo sina sinati.⁵⁴ Hashoan sca yocacanquin. Jahuemeha jahuen yohuan copi non rehteti hahtipahtihin hihxon hicha yocacanquin.

Hahcointi Jesusen yohihi

12 Quexehibaan bi hicha bi res jonio jano tsinquiaqueti. Hihti caibo tsamatax, joni huetsa qui tsehque-

sihcanahi bohiboya jahuen haxenicabo Jesusen yohiquin, behna joi sca:

—Coirametahi man. Fariseobaan coro pahe mato qui mahnemis —hahquin, fariseobaan hahcoinicamatii shinan yohiquin.

²—Rahma jonexon hahcaibo jatihibi ta Papan janibijaquin yohiyaxihqui qui. Jonetax hihquibo jatihibi ta jaan yohipaqueyaxihqui qui jatihxionbi nincacahbo.³ Tsoanbi nincayamanon hihquish man bahquish chian yohuanni joibo ta xaba chianxon jaan jato nincamayaxihqui qui. Maton xobo chicho baxexai joibo ta xobo manixon coshin nincamaquin hahcajaquin jatihibi nincamayaxihqui qui.

Tsohqui raqueti

(Mt 10.28-31)

⁴ Caibaan ta mato rehtexon bi jahua hashoan mato tiromajati hahtipahyamahi qui, hea huetsabaan. Jascaphaboo qui raqueyamanahue.

⁵ Huetsan ta mato rehtexon mato casticanti rihbi hahtipahqui. Hahqui raquenahue, bihxon chihi janin mato potamis. Hahqui caya raquenahue.

⁶ ¿Rabe soro copi non pichca hihsa romishin maroyamahin? Copi que ma bi ta jascapa muhutaiya mi huestibi Papan jato shinanbehnoyamahihqui.

⁷ Maton boo rihbi ta jahuentihi jaiquin Papan honanahqui. Raqueyamanahue hah ca hen mato jai sen. Mato tah man hicha hihsa mentan hashoan copi qui.

Cristonahbo

(Mt 10.32-33; 12.32; 10.19-20)

⁸ Jonibaan nincanon hihquish Hea ta Cristonah qui hihquibo jatihibi tah hen hean rihbi Papan yonotibo tocanxon rihbi Jaabo ta hena qui, hen jatihi, jaabo yohihi.⁹ Jonibaan nincanon hihquish Hea ta Cristonahma qui hihquibo rihbi tah hen Papan yonotibaan nin-

canonbi Jaabo ta henama qui hen jatihi.
¹⁰ Man hehqui tiromahi yohuanai bi tah hen jaa mato sohuaxonti hahtipaahthi. Dios Yoshin qui man tiromahi yohuanai ta jascayamahi qui. Jaa ta hen mato sohuaxontimahi. ¹¹ Jaton tsinquit xobo janin mato hiohax, jaton hapobaan mato casticannon hihquish quesahiboya, jahua yohuan japan, jahua hen yohiti-hin hihyamayaxahnahue. ¹² Jaatianbi ta Dios Yoshiman mato yohuan hinanti-hiqui —jato jaquin.

Masa shinantima

¹³ Jaatian, tsinquijsaquaetaibo tocan ni-hxon, huesti jonin yohiquin:

—Maestron, heen bocha yohihue, no-quen papa yamanicaton jahuaborabo jan hea texe hinanon —hahquin.

¹⁴ —Maton jahuaborabo hinannicama tah hen qui. Mato jascajaquin ponteti ta Papan hea yohiyamahiqui —jaa jasca-jaxon tsamataibo sca yohirihbiquin:

¹⁵ —Jistahi man. Coiramenahue, jahuaborabo tsinquit shinan man bihmis. Maton jahuaborabo hichahax jihuetti siriti shinanyamanahue —hahquin.

¹⁶ Jahan haxeti joi sca jato yohiquin:

—Huesti jonin cahen huai ban-hoxon tsama bi res bimibo tsinquis-caan. ¹⁷ Tsinqui tsinquijsah *¿Jahuejas-capan?* Heen bimibo hichahi copi tah hen jahuerahnon bexojatimascai, hi-hqui. ¹⁸ Shinanax sca, Heen janoo bexojati xobobo huaxepaquexon hihihosy xoboja sca janoxahpan. Jascajati ta jaiqui. Jano sca heen beroboya heen bimibo tsaman-quin bochojascaax tah hen jenimatihi.

¹⁹ Hicha bari jihuexon piti tah hen tsinqui sca jai. Tanti tantihahnan pipi-pipixon xeha xehascapan, coin coini, hih tah hen jatihi, hihqui shinamehti.

²⁰ Jahuen jointinin jan jascari yohua-naiya bi ta Papan yohinishqui: Shinan-joman, nea yamebi tah hen mia mahua-

manoxihqui. Min bexojahibo tsoa sca hihbothiquin? hahquin. ²¹ Man jascapa honanma jamis, main jihuexon, hahan jihuexahpan hihxon tsinqui tsinquixon bi Papa janin hicha tsinquiyamahi —jato jaquin Jesusen.

Papan coiranaibo

(Mt 6.25-34)

²² Jahuen haxenicabo sca yohiquin:

—Masa shinanyamanahue, hih ca hen jai sen. Jahua pitima ta jaiqui, jahua pipan hihyamanahue. Chopa tah hen yamahi, jahua hen sahuethin hihyamaribinahue.

²³ *¿Pinoxon res non jihuetaín?* *¿Chopa sahuenoxon res non yora jain?*

²⁴ Hihsabaan hahcai shinannahue. Jaabaan ta banayamahihqui. Bimi ta tsinquijsamarihbicaniqui. Piyanoxon bexojacatsihxon bi cahen jahuerahnobis bexojati yamahi. Jaton bexojati xobo yamahi bi ta Papan jato piti pishinmayamahiqui. Mato tah man hihsabo mentan hashoan copi qui, hah ca hen mato jai sen. Papan ta mato jistihiqui. ²⁵ Heen shinaman bi hashoan queyanihpan hihquish bi tah min min queyanihpan. ²⁶ *¿Jascati hahtipahyamaxon jahuejanoxon man texe copi man masa shinantihin?*

²⁷ Joabo rihbi jenquetsahpabo hin hi-hxon shinannahue. Jaabaan ta yomen-jayamahiqui. Chopa rihbi hahyamahax bi ta hihti siri rajotiyahpa qui. Salomon hicha chopa siribo japhonish bi cahen huesti joa betan senenyamanish.

²⁸ Joa ta nihi naman hicha jaiqui. Siripi hanihi bi tah non huajaxon jato mapo-jahi, copima quen. Copi que ma bi ta Papan jato hihti siri rajotibo hinani-hqui. *¿Hashoan sca jan mato coirantih man shinanyamahin?* Shinancoinnahue.

²⁹ Jaa copi, Jahua pipan, jahua xehapan jayamanahue. Jahua copi bi masa shinanyamanahue. ³⁰ Man jascapa pishinai

ta Papan jisiqui, hah ca hen mato jai sen. Piti benahi, chopas rihbi benahi ta jati-hibi nahuabo nihniciqui.³¹ Maton tah man Papa queenai quescajaquin hahtih, pitiya chopabo jaan mato hinannon.

Non naihoh queha bexojatibo

(Mt 6.19-21)

³² Masa shinanyamanahue, baquebon. Mato man hicha jihuetaima bi ta Papan mato jahuen jihue hinanihqui.³³ Maton jahuaborabo maromaxon yomanantaibo yanapannahue. Queyoyosma coriqui quescapa bihquin hahcajaquin Papa janin queyoyosma jahuaborabo bexojanahue. Jano ta yometsohtimahiqui. Champon rihbi ta jano pihantimahiqui.³⁴ Jahua ra hihti queenxon cah man jano res shinanah.

Noquen Hihbo non manatihi

³⁵ Maton Hihbo manati shinanbihnahue. Chopas sahuexon johue quetejahax manatihcamahi quescanahue.³⁶ Huanomahi catani jaton patoro yame jonoxihqui honanax ta jan nocoxon quenahi nincaxon manataibaan histon jahuen xobo xehpoti quehpenebohanxontihiqui.³⁷ Hoxahaxma manataiton jaton patoronen jato merahah ta hihti jenimacantihiqui. Jaton hihbaanbi ta jato hahxonquin pitijaxonquin jato pimatihiqui, jaanbi jato metexpaquexonquin.³⁸ Yame pochinicon joyamahax xaba paqueti hochoma sca joxon jato jascari manataiton merahah ta hihti jenimati jaabo jatihiqui, jahuerohahi tah non hoxayamahahqui hihqui.³⁹ Man honannon hihxon tah hen huetsa sca mato yohihi: Jahua hora yometso jotihiquin honanxon cahen coiranxon xobo hihbaan yometso hihquimayamahan.⁴⁰ Jascapa hoxan hihtima shinanya janahue. Hea nocotih man shinanyamahi tianbi tah hen hea

noquebaque mato qui nocotih —jato jaquin.

Siri betan tiroma

(Mt 24.45-51)

⁴¹ —¿Jaa jaa patax queha joi yohuani min hihqui bi min noquebi yohihin, Hihbon? ¿Caibo rihbi min yohihin? —hahscaquin Pedronen.

⁴² Jascayah Jesusen yohiquin:

—Shinanyahpa ta jahuen hihbaan yohihi quescabijaquin hahxonai joni qui. Jascapah ta jahuen hihbaan yohiti-hiqui, jahuen jonibo jisxon. Jato jisxonquin jaton pitibo jato hinanxonnon hihxon ta jato jisxonahue hahbahinti-hiqui.⁴³ Jahuen hihbo joxon sca jasca-jahiton merahah ta hahan jenimati jarescatihiqui.⁴⁴ Jascapa ta jahuen hihbaan yohiti-hiqui, jatihibi jahuen joni-boyah jahuen jahuarora jan jisxoncanon.

⁴⁵ Shinanyahpa hihyamahax ta heen hihbo ta basihi cahiqui hihxon jahuen hihbaan jonibo rishqui rishquixon jahuen teexonicah haibobo rihbi rishquixon, pixon, xehahax pahenscaiton sca jahuen hihbaan jisbenatihi. ⁴⁶ Joriyama ta jatihiqui hih jan jai tianbi ta hihbo sanarenentihiqui, hihbo nocorih-timahi jan shinanah bi. Joxon sca cahen caxquepaquxon nincayosmabo janin jaa potatihi. ⁴⁷ Jahuen hihbaan yohini quescabijati honanxon bi hahxonyamahi quen ta jahuen hihbaan hihti casticantihiqui.⁴⁸ Honanyamaxon tiro-majahibo ta hashoan hichama rishqui rishquiyaxihquiqui, hihti hahtih bi. Hicha mia hinannixon ta hicha rihbi mia hahquirihbi yocayaxihquiqui. Hicha mia hinantahnixon ta hicha rihbi mia bichinyaxihcanihqui.

Jesus copi join hihquinanai

(Mt 10.34-36)

⁴⁹ Chihi potahi tah hen main jonihi. Quetetax perehinhna sca japahinon

hih tah hen jai. ⁵⁰ Hihti tiromabo hen tenethi tah hen honanai. Histon huinopahinon hihxon tah hen tene tenehi. ⁵¹ ¿Huesti shinanyahax siripi jihuetaibo rahsi sca janon hea joní shinan man jain? Huetsajaquin shinanaibo qui huetsa shinanyabo rainyamanon tah hen joníqui. ⁵² Huesti xoboho pichca joni jihuetaibo bi ta texe qui rabe rainyamatihiqui. Jascayamahiya ta rabe qui texe rainyamatihiqui. ⁵³ Huetsa ta jahuen baque qui rainyamatihiqui. Huetsa rihbi ta jahuen papa qui rainyamatihiqui. Huetsa haibo ta jahuen baque qui rainyamatihiqui. Huetsa rihbi jahuen mama qui rainyamahi. Yaya rihbi jahuen hihni qui rainyamahi. Hihni rihbi jahuen yaya qui rainyamahi —hahquin noquen hihbaan.

Hahan honantibo

(Mt 16.1-4; Mr 8.11-13)

⁵⁴ Jahuen haxenicabo jascajaxon, tsin-quijaquetaibo sca yohirihbiquin:

—Jano bari hihquihi quiri jisxon nai cohin hanicanahi merahax tah man Hoi ta jahuiqui hihqui. Hihcoini. Jasca ta jatihiqui. ⁵⁵ Chiponquihax nihue jahuiya tah man Rahma ta barinoxihqui qui hihqui. Jascacoinrihbibi. ⁵⁶ Honanihcamahibon, ¿nihueya cohinbo jisxon jahua jatihiquin honanxon jahua copi sca man Papan yohihah jahua jatihiquin man honanyamahin, jan mato yohihah bi?

Noquen Hihbo betan non bexotih

(Mt 5.25-26)

⁵⁷ ¿Jahua jenquetsahaxon man matonbi shinanxon ponte res jihuetaibo shinanyamahin? ⁵⁸ Mia demandana juez janin caquin bahinxon bi mia demandanai betan bexohue. ¡Juez janin mia ninitana juezin sca jahuen porisia yohixon mia sipo xoboho rehuinmamis!

⁵⁹ Chicho tsahonah tah min copijabahin-quin queyoyamahax janohax picotimahi —jato jaquin.

Shinan pontehax jihuenicabo

13 Jaatian Pilatonen hahni sca caibaan yohiquin. Galilea mai mehabaan roqui jaton yohinahbo rehtexonquin Papa mapojaxoncannish, Papa Dios hinancatsihquin. Jaton yohinahbo mapojahiton bi roqui Pilatonen jato rehtenish. Rehtexon qui jaton jimin qui jaton yohinahbo nashimaquin, jonin jimiya sca maponon. ² Jaa chanihibo sca Jesusen yocaquin:

—¿Jatihibi jonibo mentan hashoan hohchayahpabo quen Papan jato jasca-jani shinan man jain? ³ Jascayama ta jaiqui. Maton shinan ponteyamahax tah man mato rihbi jascapahbo rihbi jayax-ihqui, queyocahinscaibo rahsi. ⁴ ¿Hoa dieciocho jonibo, jato qui jaton xobohhuanen paquequin bishtaxni cahran? Jatihibi ta mahuacannishqui. ¿Jatihibi Jerusalen janin jihuetaibo mentan jaabo hashoan hohchayahpabo hi shinan man jain? ⁵ Jascayamahi rahan. Maton shinan ponteyamahax tah man mato rihbi queyocahinyaxihqui.

Bimijoma jihui

⁶ Jato jascajaxon jaa patax queha joi sca jato nincamaribiquin:

—Huesti jonin cahen bimi jihui bananish. Bananish, bimiyahpa sca rah ta qui hihquish, cari carixon jisi bi jahuen bimi yamahi. ⁷ Bimi yamahiya sca jahuen huai teexonnica yohiquin: Jise. Quimisha bari sca tah hen bimi bihcatsihquish jori jorichai. Jahuabi ta yamahihqui, rahma caman. Rerascahue. ¿Jahua janon jaa nihtihiquin? hahquin. ⁸ Huesti bari pari jenetahhue, hihbon, mai cahuenbohanxon hen jaa naman taro payobo tsamanbohantannon. ⁹ Jas-

cajaha bimihiya jascabiscanon. Jascajahah bi bimiyamahiya tah non rerascatihi hahquin jahuen huai teexonnicathon — hahquin.

Cahcoya haibo Jesusen rohajahi

¹⁰ Jato jascjahipish huetsa neten sca jaton tsinquitit xoboho Jesus mapexon jato haxemarihbiquin, jaton tantiti neten. ¹¹ Jano tiroma yoshinyahpa haibo rihbi mapeti. Yoshiman hihbojaha dieciocho bari sca hisini. Cahcopaquecanahi nihnica. Jenquetsahax bi pontetimahi. ¹² Jaa meraxon mequeman mehehax Jesus coshin yohuani:

—Rohascahue, chocan —hahquin. ¹³ Jan yohihah, pontecahin sca jai. Jascari rohacahinscaax Hahxon tah min hea jai, Papan, hihqui Papa Dios yohihi. ¹⁴ Jaton tantiti netenbi Jesusen jaa rohajahiya jaton tsinquitit hihbo rainyamacahini. Rainyamaxon jano tsinquitaito sinajaquin:

—Seis nete ta hahan teeti netebo qui. Jaa netebaan rahomehti benahue. Tantiti neten tah man rahomehtimahi — hahquin. ¹⁵ Jato jascjahiton Jesusen sca pontejaquin yohiquin:

—Qesan, ¿xehpohipixon tantiti netenbi man maton vaca pecaxon, jaa hihyamahiya maton cabacho pishca pecaxon, hioxon man jene xehamayamahin? ¹⁶ ¿Satanasnen nea haibo jisxon nexahah dieciocho bari nexá sca nichí quen non tantiti neten jaa rohajatimahin? ¿Maton caibo que bi nexá bi res janon man rohajamacatsihyamahin? ¹⁷ Jato jascjaha jano tsahobehcoinaibo hihtimahcahinscái. Jaabo hihtimanon bi texe tsinquiaquetaibo jenimahi. Jahuen coshi shinaman jan jato hahxonah quen hihti jenimacani.

Moxo bero

(Mt 13.31-32; Mr 4.30-32)

¹⁸ Jaa copi ta jato yohinishqui:

—Papan jihuematí jenquetsahpa quin, Jenquetsahpa hin hihxon tah hen mato yohihi. ¹⁹ Huesti moxo bero pishca quesa tah qui. Jascapah non noquen huai chian banahah cahen hanicahuan-scaax jihuiscái. Jihui tihopa sca jaiya cahen jahuen mebibo romishin janin hihsabaan nahajaquin.

Hahan paan soohihmati

(Mt 13.33)

²⁰ Hahquirihbi sca jato yohiquin:

—¿Papan jihuematí jenquetsahpa quin? ²¹ Jaa ta hahan paan soohihmati quescapa qui. Jascapa bihxon cahen tasa bocho misi janin haibobaan niahán. Jano niahah ta tasa bocho jatihibi soohihcahuaniqui —hahquin.

Hanitahma xehqui

(Mt 7.13-14, 21-23)

²² Jaatian sca cahi. Jerusalen janin cahi caquin janobo jai jemabo janin banehuanax caribihiton sca:

²³ —Hihbon, ¿Papan jihuematí hichatahmabo quin? —hahquin huetsan.

²⁴ —Papan hani tahma xehqui huesti janin hihcoti shinannahue. Hicha ta Hihcopan hihxon bi hihcoti shinanyamahiqui. ²⁵ Xobo hihbaan jahuen xehqui xehpobohanscái bi tah man jeman nihxon sca xehpoti ton ton hahxon Noque quehpenxonhue Hihbon man jatihi. Man jascaraiton ta Mato tah hen honanyamahi, jahuerahnahabro ra tah man qui hah ta mato jatihi qui. ²⁶ Jaatian tah man Mihbetan tah non pipahoniqui, mihibetan rihbi tah non xehpahonihqui, noquen jemabo janinxon tah min haxemapahonihqui hah man jatihi. ²⁷ Jaatian ta mato

yohiyaxihquiqui: ¿Jahuerahnhahbo mato quin? Hen tah hen mato honanyamahi. Nenohax botannahue, tiromabon.²⁸ Jascajaha tah man huaohiyaxihqui. Abraham, Isaaque, Jacobo, Papan joi yohixonnicahbo jatihibi rihbi, jaabo jatihibi Papan jihuetauhboxon jaa janin jihuetai jisxon tah man hihti masa shinanbahinscatihi. Jato qui tah man hihcotimahi. Jatoma qui ta mato potayaxihquiqui.²⁹ Caibo caya ta hocho quehax nocohihnyaxihcanihqui. Bari cainai quirihax, bari hihquihi quirihax, reboquihax, chiponquihax, janobohax nocohihnxon ta Papan jihuetauhboxon jaa janinxon fiestajayaxihcanihqui, benahue Papan jato jaah.³⁰ Jaatian ta rahma chini chinitaibo bebonicabo sca jatihibi. Caibo rihbi rahma bebonicabo ta chinitaibo sca jayaxihquiqui —jato jaquin.

Jerusalen copi Jesusen benatai

(Mt 23.37-39)

³¹ Jato jascajahiya bi fariseobo sca nocoxon:

—Nenohax catanhue. Herodesnin ta mia rehtecatsihquiqui —hahcanquin.

³²—Hoa quexenica yohitannahue. Tiroma yoshinbo camaxon tah hen hisinaibo rahma rohajaxon, bahquish rihbi rohajaxon hoqueha bahquish sca hen janquenjayaxihqui.³³ Jaabi tah hen rahma jari caparihi. Bahquish rihbi tah hen caparinoxihqui, hoqueha bahquish rihbi tah hen capariyaxihqui. Maton quiquin jema janinbi tah man tiromabon Papan joi yohinica rehtematihi.

³⁴ Jerusalen janinhahbon. Man hea nincacoinpahinon, Jerusalen janinhahbon. Papan joi yohinicabo rehtemisboxon tah man mato qui Papan raanni-hbo rihbi macaman tsacaquin rehtepa-honiqui. Jahuentihi coti sca hen mato

tsinquimaha bi tah man queenyamahi. Hatapanen jahuen baque romishin tsin-quixon jahuen pehi naman jato paxajaquin hahcajaquin hen mato tsin-quimaha bi tah man queenyamahi.³⁵ Jistahi man. Jahuen baquemabo sca man janon ta Papan mato jenehiqui. Man tah man hea jisyamascatihi, hen joribinon caman. Jaatian pari tah man yohuanyaxihqui, Papan baque ta hihti shinanya nete hihbo jahuiqui hihqui —jato jaquin.

Tahsóhiihqui Jesusen rohajahi

14 Jaa pecaho sca quenamaha huesti fariseo hapon xoboho pih i cahi, jaton tantiti neten. Jaa piquihinxon jahua hahxon non cahetihin hihxon jis jiscanquin.² Jascapa tocaxon pihanen jisi bi huesti tahsóhiihqui joni rihbi jaa bebon tsahotai jai.³ Jaton joi xeni haxemanicahboa jano jai fariseobo sca Jesusen yocaquin:

—¿Tantiti neten non rohajatihin?
¿Non rohajatimahin? Hea yohinahue —jato jaquin.⁴ Yocakah bi jahua hihyamacani. Jahua hihyamahiboya sca tahsóhiihqui mehexon rohajaxon, caresscahue hahquin Jesusen.⁵ Tsahohahtanaibo sca yohiquin:

—¿Maton baque mai poquin chicho paquetaiya, jaa hihyamahiya maton ganado mai poquin chicho paquetaiya tantiti neten que bi man histon bihtimahin?⁶ Yocakah bi jahua yohiti honanyamacanqui.

Huanomahi canon quenamahibo

⁷ Quenamahabo ta pih i tsahocatsihquin hapobaan tsahotibo bihcatsihquibo rahsi jano janishqui. Jascapahbo rahsihi jisxon, jaa patax queha joi sca jato yohiquin:

⁸—Heen xobo janin pih i cahue hahcahax jahuen hanibo tsahotihu

janin tsahopaqueyamanahue. Mia mentan hashoan hapo rihbi quenamaxon mi-hqui sca caxon, Hori cahue, jaa neno tsa-honon, hah mia jamis. ⁹ Jan mia jasca-hah tah min hihtimahpax chini chini sca tsahoti catihi. ¹⁰ Jaa copi quenamaha ca-hax janoo chinibo jaiton tsahopaquehue. Jaatian rah ta piti hihbo joxon sca mia Jari hapobo quiri tsahohihnarohahue mia jatihiqui. Jan jascajahiya ta mihibe quenamahabo jatihibichin mia shinanya hihqui mia jistihiqui. ¹¹ Hea rah tah hen caibo mentan hashoan shinanyahpa qui hihquibo jatihibi ta hihtimahyaxi-hquiqui. Hea rah tah hen caibo mentan hashoan jahuama qui hihquibo ta shinan siri Papan hinanyaxihquiqui —jato jaquin.

¹² Jaatian sca jaton piti hihbo sca yohiquin:

—Pih benahue hahnoxon pitijaxon miin hamicobo quenamayamahue. Miin huetsabo rihbi quenaxonma, miin jenabo rihbi quenaxonma, mihibe coriquiyahpabo rihbi quenamayamahue. Mia pimanoxon copiquin sca mia quenamaribicanmis.

¹³ Hichaxon pitijacatsihquin, jahuaborajomabo, tobi pishcabo, chantobo, benchebo, jascapahbo quenamanoxahnhue. ¹⁴ Jaabaan mia pimaquin copiti hahtipahyamahi quen tah min hahan jenimati jaresscatihi. Jahu baquebo Papan huenihhnixon ta mia hahan jenimati hinanyaxihquiqui —hahquin.

Hichaxon pih benahue hahca joyamahibo

¹⁵ Jato tocan pih tsahotax huetsa joni sca yohuani:

—Papan jihue janinxon pihibo ta hihti jenimatihiqui —hihqui.

¹⁶ Jascayah:

—Piti fiestajayanoxon cahen huesti jonin hicha jonio quenamahan.

¹⁷ Jahu piti hihres sca jaiya sca jahu joni raanquin, jan quenamahipibo yohinon hihxon. Raanah, Benahue hih ta jaiqui, Ma ta hihresscaiqui hahquin jato yohibonaquin. ¹⁸ Yohihah bi huesti cacatsihyamahi. Jaa cacatsihyamahiya jatihibi sca cacatsihyamascancani. Jan yohimenohah cacatsihyamaxon joi bichinscaquin: Huai tah hen marohipiqui. Pihi catahin tah hen heen huai jisi cahi. Pihi cati tah hen hahtipahyamascai hahquin hea yohixontanhue hahquin. ¹⁹ Huetsan sca: Hean tah hen diez toro marohipiqui, rabexon nininicabo. Pihi catahin tah hen rahma jato tanahi cahi. Pihi cati hen hahtipahyamascai piti hihbo yohixonhue hahquin. ²⁰ Huetsan rihbi sca: Hen tah hen haibo bichipiqui. Jaa copi tah hen cati hahtipahyamascai hahquin. ²¹ Jato yohitani nocoxon sca, jaabo yohuanai jahu jahuen patoro yohiquin. Yohiha jahuen patoro rainyamascai: Rahmabi caribitanhue. Bahin nichibo janin sca caxon jano jaibo, jema quexabi nichibo rihbi yohitanhue. Jahuaborajomabo, tobi pishcabo, benchebo, chantobo jaabo sca yohixon hihuetanhue hahquin. ²² Jascajatani joxon sca: Min yohihah quescajaquin non hihuehah bi ta piti hicha pari jaiqui, hihbon, hahquin jahuen jonin. ²³ Jemama qui sca caxon, min bahinxon behchihibo sca bihxon tapasoho jihuetaibo rihbi hihuetanhue heen xobo bochoscanon. ²⁴ Non quenamamenohibaan ta jahuabi noquen piti tanatimabiresiqui hihca hen jai sen hahquin.

Shinanquin sirijahax hinamehcointi

²⁵ Jascajaquin jano tsahotaibo Jesusen yohihiya hihti caibo sca hahqui nocohihnat. Nocotaibo sca jaan yohiquin:

²⁶ —Maton papabo jistahihmahaxma hehqui jahuibo ta heen haxenicabo

jatimahiqui. Maton papa, maton mama, maton haibo, maton baquebo, maton huetsabo, maton chocabo jistahihmahaxma, maton yoshin rihbi jistahihmahaxma tah man heen haxenicabo jatimabiresai. ²⁷ Hea retehibaan bi tah hen heen Hihbo jenetimahi hihnahue. Jascaxon nincacoinnahue. Jascajayamaxon tah man heen haxetibo jatimahi. Man shinannon hihxon tah hen yohihi. ²⁸ ¿Xobojacatsihxon, jahuentihi copitihiquin, heen coriqui senentihiquin hihxon man shinanquin sirijaxon pari xobojayamahin? ²⁹ Shinanquin sirijayamaxon xobo jihuibo nichinxon bi janquenjati min hahtipahyamahiya ta jisibaan sca mia hosantihiqui. ³⁰ Hoa jonin ta xobojacatsihxon bi janquenjati hahtipahyamahiqui hih ta jaticaniqui. ³¹ ¿Quiquin hapobo rihbi hahbe quiquin hapo betan rehtenani canoxon tsahotahxon veinte mil sotaroyahpa hahqui jahui bi diez mil pishcayaxon jaa tenetihin hihxon sirijaquin shinanyamaparihiquin? ³² Tenetimahi shinanxon ta hoa huetsa hocho pari jahui bi comision hahqui raantihiqui jenquetsahax non bexotihin hihxon. ³³ Jascajaquin rihbi shinanquin sirijaxon maton jihue jatihibi jenebahinyamahax tah man heen haxetibo jatimabirestihi.

Tashi jahuijoma

(Mt 5.13; Mr 9.50)

³⁴ Tashi ta siri qui. ¿Hahan non pitijacatsihqui bi noquen tashi jahuiyamascaya, jahuatohon sca non noquen piti jahuijatihin. Non tah non hahtipahyamascatihi. ³⁵ Jascapa tashi tah non hahquiribi mai sca hihnon hihxon noquen banabo janin minchintimahi. Non payomacatsihquin piti huecax potahi janin rihbi tah non jascapa tashi tsamantimahi. Jascapa tashi tah non potare-

sai. Hahan nincati pabinquiyahpaxon nincanahue.

Manónica carnerobo

(Mt 18.10-14)

15 Jaatian sca cobranmisbo betan hohchayahpabo rahsi sca became. Jesus yohuanai nincaqui became. ² Jascapa hahqui nocotaiya fariseobo betan jaton xenibaan joi haxemanicahbo hahqui yohuanscay. Hohchayahpabo sirijaquin bihxon ta jascapa betan pihiqui, hihcani.

³ Jaa copi ta jaa patax queha joi jato yohinishqui:

⁴—¿Cien carnero jaax bi huesti manotaiya, jaa manotai huesti benahi canoxon man texe noventinueve janobi jenebahini caquin, man benahi sca cayamahin? ⁵ ¿Meranoxon caman man benahi cayamahin? ¿Meranoxon man jenimahanan papibehnanimahin? ⁶ ¿Xoboho nocoxon sca maton jenaboya mahbe jihuetaibo quenaxon, Jahuerohajaquin tah hen heen carnero baue manotai bi merahahqui, Jenimanonhue hah man jatimahin? ⁷ Jascarihbibi ta naihoh quehax jenimacaniqui. Huesti hohchaya jonin mainxon jahuen shinan pontehiya ta jenimacaniqui. Noventinueve jaton shinan ponteti pishinyamahi shinanaibohon jenimayamahax bi huestichin jahuen shinan pontehiya jenimacani.

Coriqui manotai

⁸ ¿Jascarihbibi ta huesti haibaan diez libra jaxon bi huesti manomaxon, johue quetejaxon xobo matsoquin sirijaxon meranoxon caman benabonatimahiquin? ⁹ Meranoxon sca jahuen jenaboya jahuen hahbe jihuetaibo quenaxon Jahuerohajaquin tah hen hen manomaha coriqui hen merahahqui, jan jatimahiquin? ¹⁰ Jascarihbibi ta

mainxon huesti hohchaya jonin jahuen shinan pontehiya Papan yonotibo jenimacaniqui —jato jaquin.

Bexnanya haibo copi coriqui potaresai beronan

¹¹ Huetsa rihbi sca jato yohiquin:

—Huesti joni cahen rabe bebo baque janish. ¹² Haniscaxon cahen jahuen chini baquen jahuen papa yohiquin: Papan, texe hena hihnon min mahuaquin potabahinyaxihquibo hea rahmabi hinanscahue. Jascajaha jahuen baquebo hinantijaxon jaa sca jahuena hinanscaquin. ¹³ Jahuenahbo jatihibi bichipish jaabiyahpa caresscrai, hocho sca huetsa main cahi cahi. Cahi nocoxon sca bexnanbo maroquin. Haibobo copi rihbi jahuen coriqui potaquin queyobahinquin, jahuabi yamascanon. ¹⁴ Jaa maibo janin piti pishin sca jaiboya, jaa rihbi pihan hihscrai. ¹⁵ Pihan hihxon janoha joni patorojascaquin. Jahuen patoronen sca jaan jahuen cochibo pimahi canon jahuen pasto chian sca raanquin, cochi coirantanhue hahxon. ¹⁶ Tsoanbi piti hinanyamahah, pihan hihquish cochin piti bimi romishin piti shinanbahinquin. Jascapah que bi yanicasinnoxon caman piti shinanquin. ¹⁷ Jaatian sca shinanquin sirijahax, Heen papan jonibo hichahi bi ta jaton piti pishinyamahiqui. Neno ca hen pitin mahuacatsih sca jai. ¹⁸ Rahma ran heen papa janin hea caresscatihi. Nocoxon tah hen yohitihi: Papan, noquen Papa Dios qui hohchatax tah hen mihqui rihbi hohchatai. ¹⁹ Tiroma copi tah min hea Baquen hahtimascai. Miin joni quesca sca hea jahue. ²⁰ Jascatanpan hihcahini sca caresscrai, jahuen papa janin cahi cahi.

Nocoti jahui bi hocho pari hihquiya manan huinoquihrani jahuiton jahuen papan meraquin. Jointi xecahihnxion

hahan hihti shinanax bishquihicanahi caxon jahuen baque hicantanxon betso-hahquin. ²¹ Hicotanah sca: Papan, noquen Papa Dios qui hohchatax tah hen mihqui rihbi hohchanahqui. Hea tiroma quen tah min hea Baquen jatimascai hahscaquin jahuen baquen. ²² Jascahah bi yosibaan jahuen jonibo yohiquin: Sahuemanoxon tari siriya berinahue. Mehesetiya joxon mehesennahue. Sapato rihbi bexonnahue jan sahuenon. ²³ Non xoamarashi toro baque bihtannahue rehtenoxon. Hicha pitijaxon pihi non coin coinnon. ²⁴ Nea heen baque ta mahanish bi jihuerehbiscaiqui. Manonish hen shinanah bi tah hen heen baque merahahqui, jato jaquin. Jenimascrai, jahuen papa.

²⁵ Jahuen baque bebo quiyah teeti. Huai chian teetanax jorescaquin bi xobo hochomaxon sca rehuen behua behuáhibo nincaquin. ²⁶ Jahuen papan joni huesti quenaxon sca yocaquin: ¿Jahua copi jascacaniquin? hahquin. ²⁷ Jochica ta nocotaxqui. Jaa copi ta toro xoa pishca papan retehaxqui, jaa siripi nocotai quen hahquin. ²⁸ Honanscaax jahuen bocha rainyamahax xoboho hihcocatsihyamascai. Picoxon jahuen papan Johue, Johue hahca bi joi bichinquen: ²⁹ Jahuentihi bari sca hen mia teixonai bi tah min heen hahbe rabetibo betan hen jenimanon jahuentianbi hea chibo baque bocabi hinanyamaniqui. Basi teixonquin bi tah hen jahuentianbi mia nincayama yamaniqui. Hea teemis que bi tah min hea jahuabi rehtexonyamaniqui. ³⁰ Hoa miin baque jahuen hahresti haibobo janin caxon miin coriqui queyontanax jahuiya cah min noquen toro xoa rehtexonah, hahquin. ³¹ Jaatian sca: Mia tah min jascabihi hehbetan jihuetai, baquen. Hea jai jatihibi rihbi ta mina qui. ³² Jan jahui quen non coin coinax jenimaha ta siri qui. Miin jochica ta mahanish bi ji-

huerihbiscaiqui. Manonish bi ta rahma hahquirihbi merahah sca qui.

Patoronen joni tiroma

16 Jascajaxon jahuen haxenicabo sca Jesusen yohirihbiquin:

—Huesti coriquiyahpa joni cahen janish, jahuaborayahpa joni. Huesti neten sca ta chanicannishqui: Miin jahuabora coirannicahton ta miin coriqui mia queyonihqui.² Jascaraiboya jahuen coirannica quenamaxon jahuen hihbaan cahescaquin. ¿Hihcoini yohuancaniquin? Hen mia hinantahni coriqui topopnapehue non jisnon. Heen coiranxonica tah min jatimascai hahquin.³ Jascalah shinamehti: ¿Jahuejascapan? Heen patoronen ta hea heen tee hea bichinihqui. Yosmaxon tah hen horo horoti hahtipahyamahi. Yocamis sca hihtihbi bi tah hen yocati hihtimahpai.⁴ Hen honanai quescajaquin hahpan, heen tee jan hea bichinai bi caibaan sca sirijaquin jaton xoboho hea jihuemahabo hihcahrain sca caxon jahuen patoro ribinai jonibo sca quenamaquin.⁵ Jahuen patoro ribinaibo quenamapaquexon sca: ¿Jahuentihi min heen patoro ribinain? hahquin, jan quenamamenohi.⁶ Cinco mil botella olivo xeni tah hen ribinai hahquin. Tsahohue, miin hahan huishati bihxon tres mil botella min copijascai huishahue hahquin.⁷ Huetsa rihbi sca yocaquin: ¿Mian cahran? ¿Jahuentihi min ribinain? hahquin. Hean tah hen mil tasa trigo ribinai hahquin. Miin huishati bihxon ochenta res min ribinai huishahue hahscapain.⁸ Jan jascajahi chanihibo nincacax sca jahuen patoro yohuani: Jaa ta yometsohti honan qui hihqui, coirannica yohihi jascari. Jascapahbo rihbi ta mai mehabo qui. Jaton caibo jatohon queennon hihxon ta nea mai

mehabaan hahquiqui, xaba baquebo mentan hashoan honan ta jacaniqui.

⁹ Maton rihbi rah tah man yometsohxon, jaa coriquinin sca jonibo hesetih, maton coriqui queyo sca jaiya jaabaan sca jaton queyoyosma jihue janin mato jihuemanon —hahquin fariseobo yohiquin.

¹⁰ Hicha tahma hinanah, jayaxon sirijaquin hahxon tah man hicha hinanah jayaxon sca sirijaquin hahtihi. Hicha tahma hinanah bi jayaxon tiromajaquin hahxon tah man hicha hinanah sca jayaxon rihbi tiromajatihi.¹¹ ¿Nea mai meha jahuaborayaxon man sirijaquin hahyamahiya tsoan sca mato naihoh queha jahuaborabo hinantahtihquin?¹² ¿Caibaana man jaton jahuaborabo coiranxonquin sirijayamahiya tsoan sca mato matonah hinantihquin?

¹³ Patoroyahpaxon tah man jaa sirijaquin teexonhanan huetsa patoro rihbi sirijaquin teexontimahi. Huetsa queenxon tah man huetsa sca jistahihmatihi. Huetsa hahxonquin sirijaxon tah man huetsa sca nincayamascatihi. Maton Papa Dios hahxonquin tah man jahuaborabo rihbi tsinqui tsinquit hahtipahyamascatihi —jato jaquin.

¹⁴ Jan yohihi jatihibi nincaxon bi yohuashihboxon hosancanquin fariseobaan.¹⁵ Hosanaibo sca jaan yohiquin:

—Man siribo hihqui jonibaan shinananhbo hihquish tah man siripihamahi yohuanai. Siripi yohuanihcama man jai bi ta maton shinanbo Papan honanihqui. Hihti siri tah qui hih jonibo jai que bi ta jascapahbo shinanyabo Papan jistahihmahiqui.

Papan jihuematici

¹⁶ Juan jonon caman ta Moisesnin huishani joibo janishqui, Papan joi yohixonnicaahbaan yohini joibo rihbi.

Juan joní pecaho tah non Papan ji-huetahboti joi siri sca non yohihi. Jaa copi ta histon sca jahuen jihuetahbosca jacobahincaniqui. Nincati queenaiborahsi.¹⁷ Papan joi ta queyotimahiqui. Naiya mai queyókahinyaxihqui bi ta ni huesti teque pishcabi jahuen joi manotimahiqui.

Haibo potatima Jesusen yohihi.

(Mt 19.1-12; Mr 10.1-2)

¹⁸ Miin haibo potaxon huetsa sca bichish tah min hohchayahpa sca jai, noquen Papa qui tiromahi. Huetsa jonin potahah haibo bichish tah min jascaribibi, noquen Papa qui hohchayahpa sca jai.

Lázaro betan hani patoro

¹⁹ Huesti joni cahen coriqui hicha bi res janish. Yanconihboya joxonihbo jahuen quiquin chopabo sahuexon cahen jatihibi neten hihti nohuenihbopipipahonish. Jenimahanan jihueta can.²⁰ Jahuen xoboho jaa jascari jihuenon cahen jemanihihti hoque huesti yocamis janish. Patoronen xobo xehqui janin cahi bahin potahahbo racati, jahuen yora nobepan rahbojocotax hisini racati.

²¹ Racatax sca: Haitara, jahuen misa janinhax paquetai teque romishin hea hinanpahinnon, hahan hen pihi yan-ahinno, hihqui pihan hihquish.²² Jas- cari jaax muhucasai. Papan yonotibo sca joxon jano Abraham siripi jihuetai janin jaa hioscaquin, jano sca siripi jihuenon. Coriquiyahpa rihbi sca muhauati. Muhatai mihincanquin jonibaan.²³ Jano jas- capa bexojati janinxon sca hihti hisin hisinxon hoque jisxon hocho Abraham meraquin. Lázaro rihbi hahbetan pihi tsahoti.²⁴ Abraham quenaxon sca: Hehon shinanhue, Papan. Lázaro raanrohahue, jahuen metoti rebo pishca jenen mehchajaxon jan heen jana matsijaxon- non. Nea chihin ta hea jeneyamahiqui.

Hihti tiroma hisin tah hen jai, hahquin.²⁵ Shinanhue, baquen. Jihueparihax tah min siriboyahpa janiqui. Lázaro cahen tiromabosrahi. Rahma cahen pihihue hahca nenoxon pihi jihuetai. Mia cah min hisin jaroma teneti jai.²⁶ Hono naponbi rihbi ta hihtihosi xanquen jaiqui, jen- quetsahax bi nenohax jari tsoabi botop- quetimahi. Jarihax rihbi tsoabi neno po- hquequihrani jotimahi, hahquin Abra- hanen.²⁷ Jaatian hihti yocaribiscaquin: ¡Hahrai, Papan! Jascahiya heen papan xobo janin jaa raanrohahue.²⁸ Pichca ta heen huetsabo jaiqui. Raanrohahue, caxon jan jato yohinon, nea hi- htii tiroma janin joyamahabo, hahquin coriquiyahpa hihpahoniton.²⁹ Moises- nin huishani joibo ta jaabo jaiqui, Pa- pan joi yohinicabaan huishani joi ri- hbi. Jaa joibo jaabaan nincacoinnon, hahquin Abrahanen.³⁰ Jascahah: Jaa joi ta nincayamacaniqui, Papan. Mahuatipish bi jato qui huesti cahiya pari ta nincacointicaniqui, hahquin.³¹ Moises nincayamaxon, Papan joi yohinicabo rihbi nincayosmaboxon ta huesti mahuatipish bi hahquirihbi jihuexon jato yohihah bi nincatimarihbicaniqui, hah sca Abraha- nen jaa janon —jato jaquin.

Hohchati shinanbo non bihmis

(Mt 18.6-7, 21-22; Mr 9.42)

17 Jascajaxon jato yohirihbiquin: —Hahan hohchati shinanya ta jotihiqui. Man jaa jotimajati hahti- pahyamahi bi ta jaa jomahi joni hi- htii sai saihihyaxihquiqui, casticannah.² Hohchati shinan hinanyamanon macan renti tenexxon jenenencanya potahah cahen hashoan siriquehahni.³ Coirame- nahue. Miin huetsa hohchataiya pon- tejaquin yohihue. Shinanquin sirijahiya sca sirijaquin yohuanquihnhue.⁴ Mia tiromajaxon bi Hen tah hen tiromaja- hahqui, huetsan. Pontejaquin sca tah hen shinanai mia jaah tah min sirijaquin

yohuanquihntihi, jan mihqui tiromahah tah min shinanyamascatihi. Huesti neten mia siete coti jascajaha bi tah min hahxontihi —jato jaquin.

Nincacointi shinan

⁵ Jascalah:

—Hahan nincacointi shinan noque hashoan hichajaxonhue, Hihbon —hahcanquin.

⁶—Moxo berotihopa shinan pishcayahpaxon man nea huishtinanti jihui yohixon Mexecahinax hian janin cayacahintanhue man jaah cah man yohihah quesca sca jaquehahni.

Noquen Hihbo non hahxoncointi

⁷ Patoroboxon man yonohah, maton joni huai chian teebahinahax jascamaxon maton hinabo pimaxonax xobon sca jahuiton sca man Johue, mapexon piresscahue ¿hah man jatihin? ⁸ Hea pitijaxoni sca johue, hahqui mehca mehcaxon hea bexonhue, hen pixon xehanon. Jascajaxon pari mian sca Pinoxahnhue, xehanolahnhue, ¿hah man patoroboxon jatimahin? ⁹ Man yonoha jan hahcaiya, Hahxon tah min hea jai, ¿hah man jatihin? ¹⁰ Maton jonin mato hahxonai quescajaribiquin maton Hihbo hahxonnahue. Maton hihbaan mato yohiha jatihibi hahcax Noque tah non tiromabo teexonnicahbo qui. Jan noque yohihah res tah non hahcai, hihnahue —jato jaquin.

Diez sipiyahpabo Jesusen rohajahi

¹¹ Jaatian sca Jerusalen janin sca cahi cahi. Galilea mai senenbi cahi, samaritanobaan mai quetanpaquebahini cahi. ¹² Jaton jema huesti qui nocoxon sca sipiyahpabo jahuibo behchiquin. Diez joni, sipiyahpabo rahsi. Jesus merahax, hocho nihxon coshin quenacanquin:

¹³—¡Maestron, Jesusen, noquehon shinanrohahue! —hahcanquin.

¹⁴ Jato jisxon:

—Man rohahi sacerdotenin jisnon jismatannahue —jato jaquin. Jascalah boresscacani. Bahin caquin jisi bi jaton sipi rohacahinscrai. ¹⁵ Rohahipibo bi huesti res loribishi.

—Papan ta hea hihti hahxonihqui —hihonahi jahui. Nincacahbo hihquish coshin yohuani. ¹⁶ Jesus qui nocoxon sca hahqui betihihpaquexon:

—Hihti hahxon tah min hea jai, Hihbon —hahquin. Jaa joni cahen samaritano.

¹⁷—¿Rohascaibo diez hihyamahipishquin? ¿Texe cahran? ¹⁸ ¿Caibo jonoronma nea nahua huesti Hahxon tah min hea jai, Papan hihonahi jahuiquin? —hahscuin Jesusen. ¹⁹ Jascajaxon jaa yohuiquin:

—Huenitax caresscatanhue. Hihcoinjaquin shina nax copi tah min siri sca jai —hahquin.

Hihbo joti hochomahiya jayaxihquibo

(Mt 24.23-28, 36-41)

²⁰ Jaa pecaho sca ta fariseobaan yocannishqui:

—¿Papan jihuematii jahuentian jotihiquin? —hahcanquin. Yocacahbo sca:

—Papan jihuematii ta jistimahiqui. Maton beron tah man jaa jistimahi. ²¹ Neabi tah qui, Hoa tah qui hih tah man jatimaribipi. Papan ta mato tocanxon mato jihuematihqui. ²² Fariseobo jascajaxon jahuen haxetibo sca yohuiquin:

—Huetsa tian tah man Noquen Hihbo noque betan hihpahinon, huesti nete pishca res jan hahquirihbi noque betan nihpahinon, hih tah man jayaxihqui. Hea jiscatsihxon bi tah man hea jisyamayaxihqui. ²³ Hoa tah qui hihyamahax ta Neno tah qui hihyaxihcanihqui. Jascalahbo bi jano yohihibo janin boyamayaxahnahue. Jato chibanyamayaxahnahue. ²⁴ Naihoh ramihoh quehax rami-

hoh queha cana bacatanicamahi ta hea naihoh quehax jahuiya jatihiqui. ²⁵ Jascayahnoxon pari tah hen hicha teneti jai. Hea queenyamahax ta mai mehabo hea yohihi, Tiroma tah qui hihihiqui. ²⁶ Neateman Noen jihueni tian japahoni quescaribibi ta jayaxihcanihqui hea naihoh quehax hahquiribhi joresscanon. ²⁷ Jaatian ta pixon xehacanpahonishqui. Bebobaan haibo bihquin. Haibobaan rihbi bebo bihquin, jahuen xobo nontin Noen nanenon caman. Jaatian ta jenehhuhnen joxon jato queyonishqui. ²⁸ Lot jihuensi tian janiboh quescaribibi ta jayaxihcanihqui. Picanquin, xehacanquin, marocanquin, maro-macanquin, huajacanquin, xobojacanquin. ²⁹ Sodon jema janinhax Lot picotai betanbi ta naihoh quehax johuehinhacahinai chihi jato qui paquetah queyocahincannishqui, sodomobo. ³⁰ Jascaribibi ta jayaxihquiqui, naihoh quehax hea noquebaque sanarenenaiya.

³¹ Jaatian maton xobo cahchian tsahoxon bi maton xobo chicho jai jahuaborabo bichi cati shinanyamanahue. Huachian teetax jascarihibi, xobon cayamasca. ³² Loton haibo hihni shinannahue. ³³ Noque rehtecanmis hihxon hea hihbomayamahibo ta queyocahinyaxihquiqui. Hea jenebahinyamahibo ta retehah bi jihuecoinyaxihquiqui.

³⁴ Jaa yamebi huesti bachiho rabe joni hoxahi bi tah hen huetsa bihxon huetsa rihbi hean jenebahinyaxihqui. ³⁵ Rabexon rene reneliboya tah hen huetsa bihxon huetsa rihbi hen potabahinyaxihqui. ³⁶ Huai chian teetaibo jascajaribiquin. Huetsa bihxon bi huetsa jenebahinquini.

³⁷ Jato jascajaha:

—¿Jahuerahonon nan, Hihbon? —hahscacanquin.

—Jano nami racatai bi ta hishmin tsinquitihqui —jato jaquin.

Yononmanen tininti yoca yocacai

18 Jaatian sca Papa yocati jenebahinyamahahbo hihxon jaa patax queha joi sca jato haxemaquin. Jaayocaqui paxquinyamahahbo hihxon jato haxemaquin.

²—Huesti tininti cahen jahuen jeman jihuetan, Papahon shinanyosma, jionihon shinanyosma. ³ Jano rihbi cahen huesti yononma haibo janish. Jahuen tininti yohihi sca yononma cari carichi. Hea tiromajahi joni hea casticanxonehue hahqui cari carichi. ⁴⁻⁵ Basi jascacahchihi bi tininti queenyamahi. Basihax res sca hahmebi shinamehti: Dios qui raquexonma tah hen jonibo qui rihbi raquexamaxon bi nea haibaan hea jaajatsanjaha jan demandanai hean casticanxontihi, hea jatsanjayamascanon, hihqui.

⁶ Jaa joi jato nincamaxon Jesusen jato yohiscaquin:

—Jaa tiroma tininti yohuanai shinannahue. ⁷ ¿Man yocabahinaxon yocashinahah noquen Papan tiromajahibo pontequin mato hashoan histon hahxontimahiquin? ¿Man yocacai tenexon jaan manarestihiquin? ⁸ Histon bi res ta mato hahxontihiqui. Jan histon mato hahxonai bi ¿naihoh quehax joquin man nincacoinai hen mato jisbenayaxihquin?

Fariseo betan cobrannica

Papa yocacai nichi

⁹ Jato jascajaxon huetsa jaa patax queha joi sca jato yohiquin. Hea caya tah hen hohchajoma qui hihxon bi caibo sca jistahihmahiboya nescajaquin jato nincamaquin:

¹⁰—Rabe bebo cahen janoxon Papa yocati xoboho mapexon Papa yocanish. Huetsa cahen fariseo joni, huetsa cahen coriqui cobranxonnica. ¹¹ Nichish cahen fariseo nescari hahri horahi: Hahxon

tah min hea jai, Papan. Hea tah hen caibo jonibo quescapahma qui. Jaabo ta yometsohbo qui, tiromabo, tsinibo. Hoa coriqui cobrannica quescayamarihba ta hea qui.¹² Semanan tihibi tah hen rabe coti samacai. Hen teexon cananai tihibi tah hen texe mia hinanai.¹³ Jaa jascari yohuannon bi hocho nichish nai bejisinhiti hihtimahpax hahri xohtíhihqui nihxon cobrannicaton yohiquin: Papan Dios, hea tah hen hohchayahpa qui. Tenexon hea sohuahue, Papan, hahquin.¹⁴ Man honannon hihxon tah hen mato yohihi. Papan jisí ta hoa fariseo jahuen hohchaya jascabi janishqui, hoa cobranxonica ta hohchajoma sca jahuen xobon caresscanishqui. Hea caya ta siri qui, hihquibo jatihibi ta Papan rabin-mayaxihqui. Hea ta jahuama qui hihquibo ta caibo mentan hashoan siri qui, Papan jisi —jato jaquin.

Baquebo Jesusen yocaxonai

(Mt 19.13-15; Mr 10.13-16)

¹⁵ Baquexobo rihbi ta hihuecan-nishqui, jan jato mehenon. Jaya jahuibo jisxon, jahuen haxenicabaan jato yohiquin, jascapahya beyamanahue, hahquin.¹⁶ Pantehibo jisxon jato quenaxon:

—Baquebo hehqui jonon jenenahue. Jato panteyamanahue. Jascapa ta Papan jihuetahbó qui.¹⁷ Hen mato yohi-non nincanahue: Baquebaan Papan joi nincacoinai quescajayamaquin nincar-esabaan ta Papan jihuetahbó hahti-pahyamahiqui —jato jaquin.

Coriquiyahpa betan Jesus yohuani

(Mt 19.16-30; Mr 10.17-31)

¹⁸ Huesti hapon sca yocaquin:
—Siri Maestron, ¿jenquetsahax hen hea queyoyamanox manatihin?

¹⁹ —¿Jahua copi min hea siri yohi-hin? Tsoabi siri ta yama qui, Papa huesti res.²⁰ Papan yohini joibo tah min ho-

nanai. Tsiniyamahue. Joni huetsa rehneyamahue. Yometsohyamahue. Quessayamahue. Miin papan yohihah nincahue, miin maman rihbi yohihah nincacuin —hahquin Jesusen.

²¹ —Baque pishcaxon nincanixon tah hen rahma caman jaa min yohihi quescabijaquin hahcai —hahquin.

²² —Huestijati sca tah min pishinai. Miin jahuaborabo jatihibi maromabahinxon jahuajomabo jaa coriqui hinanreshue. Jaatian tah min naihoh sca siri jahuabora jatihi. Jascajatanax hehbe johue —hahquin Jesusen.

²³ Nincaxon masa shinanscaquin, jahuen jahuabora hichahiya.

²⁴ —Coriquiyahpabo Papan jihuetahbó jaah ta hihti tee qui.²⁵ Xohmox quini janin hahua huinomaha ta tee qui. Tee que bi ta coriquiyahpahuan Papan jihue janin hihquiti hashoan tee qui —jato jaquin Jesusen.

²⁶ Jan jascahiya: —¿Coriquiyahpabo Papan jihuetahbó timahiya tsoabo sca non Papan jihuetahbó jatihi? —hahscacanquin.

²⁷ —Jonibaan jisí jenquetsahaxon hahtimahi bi ta Papan hahtipahiqui —jato jaquin.

²⁸ —Jise. Noquen tah non jatihibi jenebahinxon mia chibanoi, Hihbon. ¿Non queyoyamanox jihuetahbó? —hahscacanquin Pedronen.

²⁹⁻³⁰ —Papan jihuemati joi bihcoinnxon tah man maton xobo potabahinai. Maton xobo, maton haibo, maton huetsabo, maton papabo, maton baquebo rihbi, jaabo jatihibi jenebahinxon tah man nea mainxon bi hashoan hihti caibo rihbi man bihtihi. Naihoh sca tah man queyoyamanox jihuetahbó. Jatihibi potabahinax bi tah man hashoan sca jatihi —jato jaquin.

**Jan mahuanoxihqui
Jesusen yohirihbihi**

(Mt 20.17-19; Mr 10.32-34)

³¹ Jahuen doce joni sca quenaxon:
—Nincanahue. Jerusalen janin tah non cahi cahi. Jano sca ta Papan joi yohinicabaan huishani joibo jai quesca sca jatihibi jaresscatihqui, noquebaque hihqui bi hea yohihi joibo. ³² Hea ta nahuabo bihmayaxihcanihqui. Hosan hosanxon ta hea hicháyaxihcanihqui. ³³ Hea betoshbanhahxon ta rishquitinin rishqui rishquixon hea rehtescayaxihcanihqui. Hea rehtehipibo bi quimisha neten hihquish tah hen hahquirihbi hueníyaxihqui —jato jaquin. ³⁴ Yohihah bi nincayamacanquin. Jaabaan nincacah cahen honantima joi. Jahua hihcatsihququin honanyamacanquin.

Jericó benche Jesusen rohajahi

(Mt 20.29-34; Mr 10.46-52)

³⁵ Jaatian sca Jericó jema janin sca nocoti bocani. Jema hihcoti bahin bocani. Jaa bahi quexabi benche joni tsahoti. Coriqui yocaqui tsahoti. ³⁶ Huinojaquetai nincacax yocacahti:

—¿Tsoabo man huinotain? —hihqui.

³⁷ —Nazaret janinhah Jesus ta huinotihqui —hahcanquin.

³⁸ —Jesusen, Davidi baquen, hehon shinanhue —hahquin, coshin. ³⁹ Hahbe huinotaibaan sca: —Netehue. Netehue —hahcabo bi hashoan sca sai saihihqui:

—Davidi baquen, hehon shinanco-hahue —hahquin. ⁴⁰ Nihrenenxon sca:

—Jaa neno hihuenahue —hahquin Jesusen. Hihuehah, jaa senenbi nichiton sca benche yocaquin:

⁴¹ —¿Hen mia jahuejaxonti min queenain? —hahquin.

—Heen bero hea rohajaxonhue, Hihbon —hahquin.

⁴² —Jisresscrahue. Hen mia rohajati min shinancoinai quen tah hen mia ro-

hajasca jai —hahquin. ⁴³ Jaatian jahuen bero siricahin sca jai. Bero siricahinxon Jesus chibabanohi caquin, Papa Diosen ta hea hihti hahxonihqui hihcanahi. Jaa jisish jatihibi sca jascarihbibi; Papa Dios ta hihti siri qui hihcanacani.

Jesus betan Zaquo

19 Jericó jema nabebacahini cahi sca bocani. ² Jano Zaquo janeya joni jai, cobrannicabaan hapo. Coriquiyahpa joni. ³ Jenquetsahpa hin hihxon Jesus jiscatsihqui bi jonibo tsamajaquetaiya jenquetsahaxon jistimahi. Queyanihmaxon jisti hahtipahyamaquin. ⁴ Bishquihihcanahi cahi. Jari Jesus huinoxihqui quiri cahi, jihuin hinacahini. Jesus jiscatsihqui hinacahinxon manaquin. ⁵ Hinatax manatai bi jaa jihui ponte sca nocoxon bejisihnxon bototi Jesusen yohiquin:

—Botopaquehue, Zaquo, histon. Rahma tah hen miin xoboho tantih cacatsihqui.

⁶ Botocahinax res sca hahbetan caxon jenimahanan jahuen xobon mapemaquin. ⁷ Jan jano mapetai jisish, jatihibi reren rerenscacani.

—Hohchayahpa jonin xoboho mapetax ta janobi tantihqui —hihcani. ⁸ Reren rerenaibaan bi nihinaxon:

—Hihbon, texe heen coriqui hena hihnon tah hen jatifi rihbi jahuajomabo hinannoixihqui. Paranaxon hen bichinni-hbo rihbi tah hen chosco coti jatifi rihbi tsamanxon jato hinanrihbitihi, hihbon —hahquin Zaquo.

⁹ —Nea netenbi ta nea xoboho jihuetai joni Papan jihuemahiqui, queyoya-manox manascanon. Nea rihbi Abrahanen baque, can. ¹⁰ Manonihbo benahi tah hen naihoh quehax joni, jato jihuemanoxon. Jaa copi tah hen queyoya-manox manati yohihahqui —jato jaquin, Jesusen.

Patoronen coriqui hinanai

¹¹ Jato jascajahax Jerusalen hochoma sca nichiya sca:

—Jaa rah ta quiquin hapo sca Papan hihmanoxihqui qui. Jaa rah tah non rahmabi jisnoxihqui —hihcani. Jascajaquin shinanaibo quen jaa patax queha joi sca jato yohiscaquin.

¹²—Huesti hani patoro cahen hocho canish, janoxon quiquin hapo sca hihmahahbo. Quiquin haposcaax joribiyanoxon cahi. ¹³Cariyamaxon diez jahuen jonibo quenaxon joni tihibi coriqui hinantahquin, joni tihibi diez mil soles. Hinanaxon jato yohiquin: Hen joribinon caman jayaxon maroxon maromanahue hichajanoxon, jato jaquin. ¹⁴Jan caresscaipi cahchiqui sca texe jahuen jihuetahbao jaa jistahihmaxon comision raanquin. Jano jaton patoro cahi janinbi cahax nocoxon Jaa patoro noquen quiquin hapo hihti tah non queenyamahi yohihi cahabo hihxon comision raancanquin.

¹⁵Jaabi, quiquin haposcaax joribixon sca jan coriqui hinantahnihbo quenamaquin. Joni tihibichin jahuentihi cananihquin hihxon jato quenamaquin. ¹⁶Huesti joxon: Hihbon, min hea hinantahbahinni tah hen diez coti rihbi jatíhi rihbi hahcai, hahquin. ¹⁷Min tah min sirijahi. Mia tah min siri joni qui. Hicha tahma hinanah bi tah min sirijaquin hahcai. Jaa copi tah min diez hani jemabo sca min hihbotihi hahquin jahuen hapon. ¹⁸Huetsa sca jahui. Min hea hinanbahinni coriqui tah hen pichca coti rihbi jatíhiribi hahcai, Hihbon, hahquin. ¹⁹Mia rihbi tah hen pichca hani jemabo sca hinanai, min hihbonon, hahscäuin. ²⁰Huetsa rihbi sca jahui. Joxon: Nea ta min hea hinantahbahinni coriqui qui, Hihbon. Chopan rahcoxon tah hen sirijaquin mia bexojaxonnihqui. ²¹Mihqui raquexon

tah hen bexojaniqui, Hihbon. Mia tah min sina qui. Mian jananihma tah min bichinai. Min banayamanih tah min tsinquirihbihi, hahquin. ²²Min yohuanai quescabija tah hen mia jatihi, tiroman. ¿Hea sina hihqui min honanihquin? ¿Hen jananihmabo hean bichinain? ¿Heanbi banayamanihbo tsinquinica min hea honanain? ²³¿Jahua copi sca min heen coriqui jaya teenica hinanyamanihquin jan jaya teenon? Joxon cah hen heen coriquinin cananai hashoan hicha bihibiquehahnai. ²⁴Jano nichibo sca yohiquin: Jahuen coriqui bichinxon, diez tsama jai joni hinannahue. ²⁵Jaatian: Ma ta diez jaresscapiro, Hihbon, hahcanquin. ²⁶Jaa jaibo rahsi tah hen hashoan sca hinantihi. Jahuajomabo rihbi tah hen jan jai pishca hean bichintihi, hih ca hen jai sen. ²⁷Hoa hea jaton quiquin hapoti queenyamahibo sca neno hihuenahue. Heen rahuibo tah qui. Heen jisnon bi jato rehetequenahue. —Jascajaquin ta haxehahbo Jesusen jato jaa patax queha joi yohinishqui.

Jerusalen janin Jesus nocotai

(Mt 21.1-11; Mr 11.1-11; Jn 12.12-19)

²⁸Jaa joi jato nincamahax Jerusalen janin sca cahi caribibi. ²⁹Betfagéya Betania jemabo hochoma sca Olivo janeyahpa mahchi ponte nococani. Janoxon sca rabe joni raanquin.

³⁰—Hoque racatai jema janin botannahue. Nocoxon tah man cabacho baque nexá meratihi, tsoabi jaa cahtsahonima. Pecaxon hahbenahue. ³¹¿Jahuejanoxon man pecahin? yocacab sca, Noquen hihbo ta pishinihihi hihnahue —jato jaquin.

³²Raanan boresscacani. Cahi nocoxon jan yohiha quescabri meracanquin.

³³Cabacho baque pecahiton sca cabacho hihbaan jato yocacuin:

—¿Jahuejanoxon man pecahin? —
jato jaquin.

³⁴—Noquen Hihbo ta nea pishini-hqui —hahscacanquin. ³⁵ Jascajaxon be-canquin. Jaya noco sca jaiya sca, jaton chop a hahan pohenxon tsahotijacanquin. ³⁶ Jaa cahtshotax cahiya sca caibaan rihbi jaton taribo pecaxon babin mijanquin, hahan nihnon hihxon. ³⁷ Olivoya mahchi naman sca nocotaiya jahuen haxenicabo jatihibi jeni-macanahi yohuancanahi, coshin bi res:

—Papan shinanyaxon ta hihti hahxonihqui —hihcani. Papan coshiyaxon Jesusen jato hahxonrahshi jisipish jascacani.

³⁸—Quiquin hapo ta jahuiqui, Papa Diosen janen ta jahuiqui. Shinanya siri tah qui. Papan ta noquehon shinanxon hahxonihqui. Noquen naihoh queha Papa ta hihti siri bi res qui —hihcani. ³⁹ Caibo fariseobo rihbi jato tocan nihxon Jesus yohiquin:

—Jascayamanon miin haxenicabo netemahue, maestron —hahcanquin.

⁴⁰—Jaabo netetaiya ta toa minchihi macanbo coshin yohuanquehanihqui —jato jaquin.

⁴¹ Mahchi cahpaquehxon hori Jerusalen jema racatai jisish Jesus jaya huaohihqui.

⁴²—¡Rahmabi Papa betan siripi jihuete man honanpahinon, Jerusalen janinhahbon! Jaa honantihi bi tah man benchebo qui. ⁴³ Tiromabo netebo ta mato qui nocoti jahuiqui. Mato qui tsequeti joxon ta mai tsamanxon mato chiquehahtanbohanxon mato tejatanbohanxon jatihibi janinxon mato tiromajayaxihcanihqui. ⁴⁴ Maton xobobo potojaquetanxon ta maton baquebo rehteyaxihcanihqui. Hahan xobojaquin man tsamanni macan ta ni huestibi huetsa macan cahchian tsahoyamascatihqui. Mato jascayaxahnnon bi tah man Papan

mato rahma sirijacatsihqui man honanyamahi —jato jaquin.

Papan xobo janin tiromahibo jan camahi

(Mt 21.12-17; Mr 11.15-19; Jn 2.13-22)

⁴⁵ Jema janin hihcohax sca Papan xoboho mapeti. Mapexon janoxon maromahibo cainmabahinquin.

⁴⁶—Heen xobo ta jahoxon hea yocati xobo qui hih ta Papan joi janin jaiqui. Nenoxon Papa yocatihi bi tah man jano yometsohbo tsinquitijahi —hahxon jato jabamaquin. ⁴⁷ Jatihibi neten sca ta jaa xobohoxon jonibo haxemanishqui. Jan haxemahiya cahen judiobaan hapobo betan jaton haxemanicahbaan jaa rehteti shinannish. Judio patorobo betan rihbi jascajaquin shinanxon bi jenquetsahaxon rehteti merayamacanquin. ⁴⁸ Jan haxemahi nincacatsihqui jonibo hashoan hicha tsinquiaquetaiya cahen jenquetsahxon rehtenoxon bihtimahi.

Tsoan yohihah min jascajahin hihquibo

(Mt 21.23-27; Mr 11.27-33)

20 Huetsa neten sca Papan xobohoxon jonibo haxemahanan jan joi siri yohihiya sca judiobaan hapobo mapeti jahui. Jaton hapobo, jaton haxemanicahbo, jaton yohuan hihbobo, jaabo rahsi jano mapeti jahui. ² Mapexon yocacanquin:

—¿Tsoan janen min jascajahin? ¿Tsoan jascajahue hahca min jascajahin? Noque yohihue —hahcanquin.

³—Hean rihbi tah hen mato huesti yocatihi, maton pari hea yohinon. ⁴ ¿Tsoan yohiha Juaman nashimapahonnishquin? ¿Jonibaan yohihah nan, Papan yohihah nan? —jato jaquin. ⁵ Jascajaquin yocacah jaabo rahsibi yocacahanannancani:

—¿Jahua non yohitihin? Papan yohi-hah rahan hah non jaiya ta jahua copi sca man jaa nincayamanihquin hah noque jatihiqui. ⁶ Jonibaan res yohihah rahan hih non jaiya ta nea tsamajaque-taibaan noque macaman tsacaxon rehtetihquin. Papan joi yohinica ta Juan janishqui hah ta jacanihqui jatihixonbi, hih ca hen jaihsen —hihcani, jaabo rah-sibi yohuani. ⁷ Jascalahahnxon sca:

—Tsoan yohiha jaan nashiman-ishquin, non tah non honanyamahi —hihcani.

⁸ —Man hea yohiyamahi quen tah hen tsoan yohihah hean nescajahin hean ri-hbi hen mato yohiyamahi —jato jaquin.

Huai teexonnicahbo

(Mt 21.33-44; Mr 12.1-11)

⁹ Jaatian sca jaa patax queha joi sca jonibo yohirihbiquin:

—Huesti jonin cahen bimi huai banan-ish. Huajaxon ta teexonnicahbo jahuen huai hinantahnishqui, canoxon. Hinantahbahini cahi, hocho cahi caresscái. ¹⁰ Basixon sca texe jahuen bimi bihx-onnon hihxon hochoxon jahuen joni raanquin. Raanah nocotaiton sca hinantahnibaan rishquixon mequen sca camarihbicanquin. ¹¹ Huetsa rihbi jahuen joni sca raanrihbiquin. Jaa rihbi rishqui rishquixon roaxon mequen bi res camarihbicanquin. ¹² Huetsa rihbi sca raanquin, jahuen quimisha sca. Jaa rihbi tse-hue tsehuejaxon potacanquin.

¹³ ¿Jahuejascapan? Hahan hen queenai heen baque sca raanpan. Jaa rah ta nincayaxihcanihqui, hahxon raanquin. ¹⁴ Jaa sca nocoti jahuijisish, yohinancani jahuen hinantahnibo. Jahuen papa yama sca jaiya ta nea sca huai hihbo hihyaxihqui. Rehtenonhue, jahuen huai noquena sca hinon hihcani. ¹⁵ Jascaxon huaima qui hioxon sca rehtecanquin. ¿Huai hihbobi joxon sca jahueja jaan

jato jatihiquin? ¹⁶ Joxon ta jahuen hinantahnibo rehtepaqueyaxihqui. Jato queyobahinxon sca ta huetsabo sca jahuen huai hinantihqui —jato jaquin.

—Jascjayama jacanpanhilon —hihscacani, nincacax.

¹⁷ Jato bejispaquequin sca:

—¿Nea huishani jahua hihcatsi-hqui? Jaa nahuita jihui ta tiroma qui hihxon xobojahibaan potahibaan bi ta jaabaan potahi jihui qui hean xobojacoinai hih ta jaiqui huishani joi. ¹⁸ Jaa nahuita jihui qui paquetaibo ta tobicahintihiqui, jatihibi. Caibo qui paquequin ta jaa jihuun jato champajabahintihiqui —jato jaquin.

Hapon cobranah non copijati

(Mt 21.45-46; 22.15-22; Mr 12.12-17)

¹⁹ Jato qui jan jaa joi yohihi honanxon ta jenquetsahaxon non jaa bihtihin hihxon jaton haxemanicahbo betan jaton hapobaan tanaxon bi bihti hahti-pahyamacannishqui, jonibo qui raquexon. ²⁰ Noquen Hihbo nincacoinihcamahax manahihi cahabo sca caibo copijacanquin. Jaama joi yohuanmatannahue hahxon copijacanquin. Jaama yohihi-ton bihxon tah non noquen hapo hinanscatihi, noquen gobernador rihbi hinanquin hahcanquin. ²¹ Nincacoinihcamaxon sca Jesus yocacanquin:

—Mian tah min sirijaquin yohihi, maestron. Pontejaquin tah min haxemahi. Tsohquibi raquexonma tah min jaabijaquin jatihibi jonibo yohihi. Papa qui cahi bahi tah min honanmacoinai. ²² Noque yohihue: ¿Quiquin hapo Cesaronen noque cobranah non copijatihi? ¿Non copijatimahin? —hahcanquin.

²³ Paranxon yocacaibohi honanxon:

²⁴ —Coriqui huesti hea jismanahue. ¿Tsoan mapo jano jaiquin? ¿Tsoan huisha jano jaiquin? —jato jaquin.

—Cesaronena rahan —hahcanquin.

²⁵—Jahuena hihquiya jaa hinannahue. Papana hihquiya tah man noquen Papa hinanribitihu —jato jaquin. ²⁶Tsinquitaibaan jisiya ta jenquetsahaxon yohuanquihnxon bihtima jacannishqui. Jato joi bichinah neteresscani, rahtetax.

**Jonibo hahquirihbi
teehihtihiquin hihquibo**

(Mt 22.23-33; Mr 12.18-27)

²⁷Saduceobo sca jahui, tsoabi ta mahuatax hahquirihbi huenitimahiqui hihnicabo. Jaabaan sca tanaquin yocaquin.

²⁸—Maestron, Moisesnin ta huishanishqui, noquen bocha baquejahaxma hihxonaiya non jahuen yononma bihxon hahqui noquen huetsa yamanica non baquejaxonti. ²⁹Siete joni ta janishqui, jaa mama quiha rahsi. Bebo quihatón ta haibo bichish bi baquejahaxma mahuanishqui. ³⁰Jahuen chini jaa bichish bi jascarihbibi. ³¹Huetsa rihbi sca jahuen chini, jascarihbibi. Jatihibi sca jascarihbibi, baquejahaxma queyocani. ³²Hahchon sca ta jaton haibo rihbi mahuanishqui. ³³Papan noque hahquirihbi huenihiya sca, ¿tsoan haibo jaa jatihiquin? Jatihibichin jaa hahuinjani —hahcanquin.

³⁴—Rahma jihuetaibo ta haibobihmahahnaniqui. ³⁵Papan caisxon hahquirihbi jihuemahibo ta huanoyamascayaxihcanihqui. Huanomayamaribiquin. ³⁶Jaabo ta mahuayosmaboyaxihqui. Papan yonotibo hihqui quescaribibi ta jayaxihcanihqui. Papan jato jihuemaha ta jahuen baquebo rahsi sca jayaxihcanihqui. ³⁷Mahuanicabo hahquirihbi hueníosmabohi man shinanah bi ta huenínicabohi Moisesnin yohinishqui, nescajaquin: Hea tah hen Abrahanen Papa Dios qui, Isaaquena

rihbi, Jacobona rihbi. ³⁸Papa Dios ta mahuanibaan Diosma qui. Jaa ta jihuetaibaan Papa Dios qui, Jaan jisi jatihibi japarihi quen —jato jaquin.

³⁹—Hihcoini rahan —nih sca jaton haxemanica huesti jai. ⁴⁰Hashoan yocati qui raquescaax jascari.

**Cristo yocacahtai: ¿tsoan
baque hea quin?**

(Mt 22.41-46; Mr 12.35-37)

⁴¹Netetaiton sca:

—¿Jahua jisxon Cristo ta Davidin baque hihyaxihquiqui jacanighquin?

⁴²Man jisyamahin, behua huishaquin ta jaa yohihi Davidinin yohinishqui: Xaba hihbaan ta heen hihbo yohinishqui, Hea mecayahohihbo tsahohihnahuea

⁴³Miin rahuibo miin hinabo sca hihnon hen jato namanjanon caman neno tsahotihue

hah cahen Davidinin janish huishaquin.

⁴⁴Heen hihbo jan hihquiya ¿jenquetsahax res sca jahuen hihbohax bi jahuen baquetihiquin?

**Judiobaan haxemanicahbo
quescapahbo non jamis**

(Mt 23.1-36; Mr 12.38-40; Lc 11.37-54)

⁴⁵Jato jascajaxon jatihixonbi joni-baan nincanon sca jahuen haxenicabo yohiquin:

⁴⁶—Jaton haxemanicahbo hihqui quesca man jamis. Coiramenahue. Jaton chopasiribohi sahuehax jano joni-botsinqui jaquetai nihti ta costancaniqui, jisibohihquish jano nichii. Caibaan jato Hapon hahnon hihxon ta costancaniqui. Tsinquitixoboho ta hapobaan tsahotibojanin tsahocatsihcanihqui. Pihi johue hahca ta xobo hihbo patax bi res tsahoxon picatsihcanihqui. ⁴⁷Yonomma meraxon ta tahtijaxon jahuen jahuaborabo jatihibi bichincaniqui. Parinquen ta Papa basi yocacaniqui,

jatihixonbi nincanon hihxon. Jascapa ta Papan hihti casticanyaxihqui —jato jaquin.

**Yononmanen coriqui
pishinxon bi hinanai**

(*Mr 12.41-44*)

21 Jaatian sca coriquiyahpabo jano nichi jisquin. Papa qui hinancat-sihquin coriqui naneti bohnanti janin coriqui nanehi nichibo jisquin, hicha coriqui nanehibo. ²Huesti yononma sca joxon jahuen coriqui yamahi bi jahuen rabe coriqui romishin nanequin. Jaan nanehi jisxon sca Jesusen jato yohiquin:

³—Hoa jahuaborajoma yononmanen ta caibo mentan hashoan hicha nanehiqui. ⁴Hoabaan ta hicha bi res jaxon texe hinanihqui. Hoa yononmanen ta jatihibi pishinxon bi jan jai jatihibi hinanihqui —jato jaquin.

Papan xobo potojaquetanyaxihquibo

(*Mt 24.1-2; Mr 13.1-2*)

⁵ Jaatian Papan xobo yohihi caibo yohuani.

—Macanbo hihti siribo tah qui. Jise. Sirijaquin ta hahcannishqui, xobo siri —hihcani.

⁶—Nea man jisi xobo ta potojaquetanyaxihcanihqui. Ni huesti macanbi ta huetsa cahtsahotimas-catihiqui. Potaquin ta ni huestibi pishinmayamayaxihcanihqui —jato jaquin.

Noquen Hihbo jahui hahan honanti

(*Mt 24.3-28; Mr 13.3-23*)

⁷—¿Jahuentian jascajayaxihcani-hquin, maestron? ¿Jahua jisxon non min yohihi quesa sca jacatsihqui non honantihin? —hahcanquin.

⁸—Coiramenahue, mato parancan-mis. Hea tah hen qui hihqui ta heen janen hicha joyaxihqui. Nete ta queyocatsihscainqui hih ta jaribiyax-

ihcanihqui. Jascascaibaan bi jato nincayamaxahn nahue. ⁹Rehtenanaibo joi nincacax bi rahteyamaya xahn nahue. Mai hihbocatsihxon rehtehibo joi nincacax rahteyamaribiyaxahn nahue. Jascapahbo pari ta jatihi qui. Jascapa jai bi ta nete queyorihyamatihqui —jato jaquin.

¹⁰Jascajaxon jato yohirihbiquin:

—Huetsa jonibo ta jaton nahuabo betan rehtenanyaxihcanihqui. Quiquin hapobo ta hahbe quiquin hapobo betan rehtenantihqui. ¹¹Mai rihbi ta coshin bi res mihuanyaxihqui. Nahuan pahen ta hisinyaxihcanihqui, muhuti hisini. Hicha janin ta jascayaxihqui. Hahqui raquetibo ta jatihi qui. Naihoh rihbi ta hahan honantibo jayaxihqui.

¹²Jaabi ta jascapahbo jariyamahi bi mato tiromajanoxon mato yahtanyaxihcanihqui. Tsinquixon mato tiromajanoxon ta jaton tsinquit xoboho mato boyaxihcanihqui. Jaton sipo xoboho rihbi ta mato tsahonyaxihcanihqui. Man heen janen yohihi copi ta jaton gobernadorbo janinxon mato demandanyaxihcanihqui. Jaton quiquin hapobo janinxon jascajaribiquin. ¹³Hioxon ta mato Hihcoini sca yohuanhue hahxon mato tana tanayaxihcanihqui. ¹⁴Mato jascajahabo bi rahtexonma maton jointinin shinanquin sirijanahue. Jahua yohipan hihyamanahue. ¹⁵Jaatianbi tah hen mato shinan hinantih, hahan yohuanti hinanquin. Man hahan yohuanaiya ta mato joi bichinti hahtipahyamayaxihcanihqui. Mato joi bichincatsihquibo rahsichin ta Jascama ta qui hahti hahtipahtimahiqui.

¹⁶Hahan yohuanti shinan hen mato hinanah bi ta mato qui yohuanxon caibo maton papabaan, maton mamabaan, maton huetsabaan, maton jenabaan, maton hahbe rabetibaan maton tinintibo mato bihmayaxihcanihqui.

Caibo rihbi ta mato rehteyaxihcanihqui.
¹⁷ Man hea nincacoinai quen ta mato jistahihmayaxihcanihqui. ¹⁸ Jaabi tah man manotimahi, ni huestibi ta maton boo queyocahintimahi qui.
¹⁹ Hea jenebahinyamahax tah man queyoyamanox manatihi.

²⁰ Mato jascajayaxihquibo bi nahuan sontarobo nea Jerusalen mayahahtanbohanai jisxon, nea jema tiromajabahinti nea pishca sca jai honannahue. ²¹ Jaa jisish Judea main jihueta tax mahchi janin jabacahintannahue. Jerusalen janin hihquish rihbi picocahintannahue. Jemama qui nichibo rihbi jema janin joyamas canon. ²² Huishani joibo jai quesca sca janon ta hihti tiromabo netebo jatihiqui. ²³ Jascapa hahqui nocotah ta tohoyabo hohmis hohmisyaxihquiqui. Xoma hahmahib o rihbi jascarihbibi. Nea main jihueta ibo ta hihti tiromabo huinoyaxihquiqui, Papan jato casticanah. ²⁴ Sontarobaan ta hicha jonibo rehteyaxihquiqui. Jato bihxon rihbi ta jatihibi nauabaan main jato borestihi qui. Nea Jerusalen rihbi ta nauabaan hihbojayaxihquiqui, jaton nete senennon caman.

Noquebaque joyaxihqui

(Mt 24.29-35, 42-44; Mr 13.24-37)

²⁵ Hahan honanti rihbi ta jayaxi hquiqui, bari huetsapahi. Hoxne rihbi huetsahpacahini, huishibo jascarihbibi. Quebijistima nian coshin behchon behchonax tsahca tsahcaya que-taiya ta jatihibi janin jihuetaibaan rihbi hihti masa shinanyaxihcanihqui. ²⁶ Jahua sca noque huinomatihi qui hihquish ta raqueya jihueta tax jaton jointi masacahinax jonibo muhuayaxihquiqui. Naihoh queha coshibo ta Papan shacon shaconyaxihquiqui. ²⁷ Jaatian ta naihoh quehax hea noquebaque botopaque-tai jisyaxihcanihqui, nai cohiman hihti

coshi xabaya hea jahuiya. ²⁸ Hen mato yohihi quescari jacatsihscaya yobac ahinnahue. Hen mato bichi joti nea pishca sca jai honanax, bejisihnbahin-quin hahcajahi jihuenahue.

²⁹ Jato jascajaquin yohixon, jaa patax queha joi jato yohiquin:

—Banabo jihuibo jisnahue, jatihibi jihui rihbi jisnahue. ³⁰ Bochocohi jisish tah man Bari tian sca ta jatihiqui hih man jai. ³¹ Jascajaquin rihbi hen mato yohihah quescari jaresscay jisxon, mato bichi hea joti nea pishca sca jai honannahue.

³² Hen mato yohihah quescari jatihibi jascascaiya pari ta nete queyoyaxihquiqui. ³³ Naiya mai queyoyaxihqui bi ta heen joibo jahuentianbi queyotimahi qui.

³⁴ Coiramenahue. Pahen pahenax man jointi xehpomis. Tiroma netebo huinotax, Hahrai jahueja sca non jatihin hihquish man jointi xehpomis. Huetsa janin man maton shinan camahiya hanhan hea jahui nete mato qui nocorenemis. ³⁵ Jatihibi main jihueta ibo qui ta jaa nete histon nocorenenyaxihquiqui. ³⁶ Hen mato yohihah quescari jaresscaccatsihquiboya mato cahnehahbo hihxon jatihibi tian hoxa tenexon jaayocanahue. Hea naihoh quehax jahuiya, hea bebon nihnicahnoxon hihxon, jaayocanahue — jato jaquin.

³⁷ Jato jaa joibo yohinoxon ta bariyahpan Papan xobohoxon jonibo haxemahax yamebo sca Olivoya manan janin hoxahi capahonishqui. ³⁸ Xaba paquescaya ta Papan xoboho jonibo hahquirihbi tsinquipaquepahonishqui, jan haxemahi nincaqui jahue tsinquicani.

Rehtecatsihqui yohinani

(Mt 26.1-5, 14-16; Mr 14.1-2, 10-11; Jn 11.45-53)

22 Jaatian pascua fiesta hochoma sca jai, chahoma paan piti fi-

esta.² Jesus yohihi, Jenquetsahaxon non jaa mahuamatihin hih sca jacani, judio hapobo betan jaton haxemanicahbo. Jonibo qui raquetax jascacani.

³ Jaatian Judas Iscariote Satanasnen hihbojaquin. Jaa Judas ta Jesusen haxenica hihpahonishqui, jahuen doce joni huesti. ⁴ Caxon judio hapobo yohuanquhnxon jaton tinintibo rihbi jaan yohuanquhnquin. Jenquetsahaxon Jesus bihmatihin honanscaxon jato yohiscaquin. ⁵ Jan jato yohiha jenimacani. Jenimahanan:

—Mia tah non copijatihi
—hahcanquin.

⁶—Mato tah hen bihmacointihu
—hahquish, Jahua hora jonibo yamahiquin, Jaatianbi bihmahah ta siri qui hihscai Judas, shinamehti.

Hihbo shinanhahnhan piti

(Mt 26.17-29; Mr 14.12-25;
Jn 13.21-30; 1 Co 11.23-26)

⁷⁻⁸ Fiesta hani neten sca jaton paan pinon jaton carnero baque rehteti netenbi Juanya Pedro Jesusen yohiquin:

—Noquen fiesta piti hahxontannahue non pinon —hahquinn.

⁹—¿Jahuerahnoxon piti non hahtihin, Hihbon —hahcanquin.

¹⁰—Jema janin caxon tah man jene bihtanax poo hiabenahi jahui joni behchinoxihqui. Jaa tah man chibantihi. Jano jaa mapetai janin rihbi tah man jaa xoboho mapetih. ¹¹ Mapexon xobo hihbo yohinahue: Jahoxon heen haxenicabo betan hen pascua piti pinon jahoxon piti chique jahuen hin hah ta mae-stronen jaiqui hahquin yohitannahue. ¹² Man jascalah ta bochiquiha chique hani mato jismanoxihqui qui bexojaha siriscai bi. Janoxon pitija noque jaxontannahue —jato jaquin. ¹³ Caxon sca jan jato yohihah quescabi meracanquin. Janoxon sca pascua pitijaxoncanquin.

¹⁴ Ma hihresscaya pihi tsahopaque-can, Jesus jahuen haxenicabo betan.

¹⁵—Janin hea tiromajacanmis tah hen mato betan nea pascua piti herti queenahqui. ¹⁶ Papan jihuetahbo janon hen jaton hohcha queyobahinon caman tah hen pascua piti piyamacatihi —jato jaquin. ¹⁷ Hahqui xehati sca bihxon:

—Nea bihxon hinanpaquenahue. ¹⁸ Nea hompa tah hen xehatimascay, mato jihuemahi jonoxon caman.

¹⁹ Jato jascaxon, posen sca bihxon Papa yohixon tehcaxon jato hinanrihbiquin.

—Nea ta heen yora qui, man jihuemon hihxon tah hen hehrí jato rehtemahi. Mahuaquin tah hen mato hahxonai. Jaa shinanhahnhan piti ta nea qui. Hen mato hahxonai shinanhahnhan pinahue —jato jaquin.

²⁰ Pixon xehati sca bihxon jan piti yohihah quescajaribiquin:

—Nea xehati hahnahue. Hahxontijanixon mato hahxonscaxon tah hen behna sca hahquirihbi hahxontijahi. Hahxontijaxon hen jahuentianbi huetsajatimahi honanahbo tah hen heen jimi potahi. Jaa shinanhahnhan xehnahue. ²¹ Jaa hen mato jascajaquin yohihi que bi ta hea bihmahi jonin hehbetanbi piti bichiqui. ²² Papan yohini quescabih ta hea tiromahabo jatihiqui. Hea tiromajayaxihquibo bi ta hea jato bihmanoxihqui joni Papan hihti casticanyaxihqui —jato jaquin. ²³ Jato jascalah, yohinancani. Tsoan cahra jascajatihiquin hahquish yocacahanancani, jaabo rahsibi.

Tsoa hashoan hapo quin hihquinanaibo

²⁴ Caibo sca yohinani, Tsoa non hashoan hapo hihyaxihqui qui hihquish. Jascaraibaan bi Jesusen jato yohiquin:

²⁵—Nahuabaan quiquin hapobaan ta jato hihti hihbojahiqui. Jato yono yonohah bi ta Jaa ta hapo siri qui hihcаниhqui. ²⁶Mato tah man jascapahbo jatimahi. Cacannicahax bi tah man jatihibichin yonoti quesca man jatihi, jato hahxonnicah. Mato bebonica ta maton chini quesca jatihi, mato hahxonnicah. ²⁷Huetsan pinon ta huetsan rihbi metexoniqui. ¿Jahuemeha hashoan hapo quin? ¿Pinica hashoan hapoma quin? Maton hihbo hihxon bi tah hen mato tocan jihuexon mato hihti hahxonai. ²⁸Caibaan hea tiromajahah bi tah man jenebahinyamarahsihi. ²⁹⁻³⁰Hea quiquin hapo hihnon heen Papan hea yohini quescajariquin tah hen hean sca mato rihbi yohihi, hapobo sca man janon, hea quiquin hapo quen man hea janin hehbetanbi pixon xehayaxahnnon. Hen mato hinanah tsahoxon tah man quiquin hapoboscaxon israelibaan doce jenabo man yonoyaxihqui.

Pedro paranahxihqui

(Mt 26.31-35; Mr 14.27-31; Jn 13.36-38)

³¹—Simoman, nincahue, Simoman. Bimi bero rahsi bihcatsihquin tohaquin hahcajaquin mato tana tananoxon hihxon ta Satanasnen coshin yocacaxqui. ³²Jaabi tah hen mia yocaxonaqui, min nincacoinquin jeneyamanon. Hahquirihbi miin shinan pontexon sca miin huetsabo coshi hinanyaxahnhue.

³³—Sipo xoboho hea tsahonahbaan bi tah hen mia jahuentianbi jenebahintimahi, hihbon. Hea retehibaan bi tah hen mia jenebahintimahi —hahscaquin Simoman.

³⁴—Yohicoin tah hen mia jai, Pedron. Nea yamebi ta hatapa queori jaima quimisha coti min Hea tah hen jahuen jonima qui hih min jatihi hea yohihi.

Jesus rehteti hochomahi

³⁵Pedro jascajaxon jatihibi sca yohiquin:

—Coriquijoma tah hen mato raannihqui, borasajoma rihbi, sapatojoma rihbi. Jascapa raanah bi ¿jahua man pishinnihquin?

—Jahuabima rahan, hihbon —hahcanquin.

³⁶—Rahma tah hen mato yohihi. Borasayahpahax jaya cahue. Coriquiyahpahax jascarihbibi. Hahan retenanti machitojomaxon miin coton maromaxon machito marohue. ³⁷Hea yohihi, Hahbe yometsohbo betan ta hihquiqui hih ta hea yohihi jacanihqui, hehqui huishani joi jai quescajaquin ta hea janoxihcanihqui. Jaa copi tah hen yometsoh yohuanihcamaquin mato yohihahqui. Neateman huishaxon yohini quescabisci ta jaresscatihqui, hea yohihi joibo —jato jaquin.

³⁸—Jise, Hihbon. Neno tah non machito rabe jai —hihcanci.

—Jascabi sca janon jenenahue —hahquin.

Getsemaní huai chianxon Jesusen yocacai

(Mt 26.36-46; Mr 14.32-42)

³⁹Xobo janinhax cahax, jan hihcachihi quesca Olivoja manan manichi cahi. Hahchon bi jahuen haxenicabo rihbi manahi cahi. ⁴⁰Nocoxon:

—Tiroma yoshiman mato tanayamanon Papa yocanahue —hahquin. ⁴¹Jato jascajahax hori pishca non macan pishca potahi tihixon jaa huesti cahi. Cahax, raboxonen nihxon, Papa yocascaquin:

⁴²—Papan, rahma janoxihquibo hea cahnemahue, queenxon. Jaabi, hea queenai quescarihma bi mia queenai quesa janoxihnon —hahquin.

⁴³ Jaatian Papan yonoti naihoh quehax hahqui botopaquexon coshi hinanai jiscanquin. ⁴⁴ Jaatian bená benaxon Papa hihti yocascaquin. Yocahahan niscani, jimi toisihquicamahi niscani. Mai qui toisihquiya mai mehchascái. ⁴⁵ Yocati queyohax res sca huenicahuanax jahuen haxenicabo qui joxon benaya hoxahiton jato meraquin.

⁴⁶ —¿Jahua jenquetsahax man hoxa hoxahin? Huenixon Papa yocanahue; tiroma yoshiman mato tanamis.

Jesus bihxon nexahibo

(Mt 26.47-56; Mr 14.43-50; Jn 18.2-11)

⁴⁷ Jan jato yohihi betanbi jonibo nocoti. Jato betan jahuen haxenica Judas rihbi jato beboxoni jahui. Jesus qui joxon betsohahquin saludanquin.

⁴⁸ —¿Betsohahquin min hea jato bihmahin, Judasen? —hahscquin Jesusen. ⁴⁹ Jaatian Jesus tejabohanaibohi jisxon sca:

—¿Non jato rerascatihin, hihbon? —hahcanquin jahuen haxenicabaan. ⁵⁰ Judio hapon yonoti sca huestichin reraquin. Reraquin bi jahuen pabinquin mecayaho paxtebahinquin.

⁵¹ —Jenenahue —hahxon jahuen pabinqui Jesusen mehexon rohajaquin. ⁵² Jaya tejacahuanaibo cahen porisiabo, sacerdotebo, mesco hapobo. Jato jatihibi yocaquin:

—¿Yometsoh yahtanquin hahcajahi man machitoya jahuin? —Maton huinoboya man jahuin? ⁵³ Nete tihibi Papan xobohoxon honanmahanan hen mato betan hihrasihbi bi tah man hea bihyamahipiqui. Yame bhinicahbo tah man qui, yame baqueboxon.

Pedro paranahti

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Jato jascayah bi bihxon judio hapon xobon Jesus bocanquin. Hocho tahni

cahen Pedronen jato chibanbonaquin.

⁵⁵ Jesusyabi caibo mapenon, caibaan jemanhihtian chihi requenjaquin. Pehchihi tsahotaiboya sca Pedro rihbi jato tocan pehchihi tsahoti. ⁵⁶ Pehchihi tsahotai jisxon, Pedro bejisxon huesti haibaan sca yohiquin:

—Nea rihbi ta hahbetan nihrasihiqui —hahquin.

⁵⁷ —Quesahi. Jaa tah hen honanyamahi joni qui —hihscai Pedro.

⁵⁸ Jahuen hihbo jan hihbomayamahah basima sca huetsan rihbi bejisahnhan yohiquin:

—Mia rihbi tah min jahuen joni qui —hahquin.

—Jaama tah hen qui —hihribiscai.

⁵⁹ Basima huesti hora tihixonpahax huetsa rihbi yohuani:

—Hihcoini ta jato betan nea nihcachihiqui, Galilea mai meha joni can —hihqui. ⁶⁰ Jan jascarai bi:

—Min yohihi tah hen honanyamabire-sai —hihribihi Pedro. Jan yohuanai betan bi hatapa queoscai. ⁶¹ Xobohoxon sca rabejaquexon Jesusen Pedro bejisquin. Jaatianbi ta Jesusen yohihah joibo Pedronen shinanscanishqui, janin hatapa queonon tah min quimisha coti hehqui paranahxihqui jan yohihah shinanscaquin. ⁶² Shinanax, picotax huao-hihscrai. Hihti huaonihqui, Pedro.

Jesus hosanaibo

(Mt 26.67-68; Mr 14.65)

⁶³ Xobohoxon sca Jesus xecoxon hosanhahnan rishquicanquin.

⁶⁴ Bebepoxon beshrishquixon yocacanquin:

—Jisxonma yohihue. —Tsoan mia beshrishquihiquin? —hahcanquin.

⁶⁵ Hicha jascapa join hosan hosancanquin.

**Tsinquitai hapobo janin
Jesus nihmahibo**

(Mt 26.59-66; Mr 14.55-64; Jn 18.19-24)

⁶⁶Xaba paque sca jaiya sca, jaton hani hapobo tsinquitit became. Sacerdote hapobo betan jaton huisha honanbo tsinquicani. ⁶⁷Bexon, jato tocan sca Jesus nihmacanquin. Nihmaxon:

—¿Mia min noquen Cristo quin?
Noque yohihue —hahcanquin.

—Hen mato yohihah bi tah man nincatimahi. ⁶⁸Hen mato yocacah bi tah man yohitimarihbihi. ⁶⁹Rahma tah hen hea noquebaque Papa mecayaho tsahonox-ihqui, janoxon sca jahuen coshiyaxon yononoxon.

⁷⁰Jato jascaha, joi bichincanquin:

—¿Mia min Papa Diosen baque quin nan?

—Jaa tah hen qui. Man yohihi quescabi rahan —hahquin.

⁷¹—¿Jahua hashoan nincati non pishinain? Jan jascari yohuanai tah non noquenbi nincacai —hahscacanquin.

Pilato janin Jesus hiohibo

(Mt 27.1-2, 11-14; Mr 15.1-5; Jn 18.28-38)

23 Canon benahue hahxon sca Pilato janin sca Jesus hiocanquin jatihixonbi. ²Janoxon sca quesa cahecanquin.

—Nea tah non noquen caibo hihbojacatsihquiton merahahquin. Quiquin hapo Cesaro copijayamahabo ta jato haxemahiqui. Quiquin hapo Cristo jan hihqui ta yohirihbihiqui —hahcanquin.

³—¿Mia min judiobaan quiquin hapo quin? —hahscacuin Pilatonen.

—Min yohihi quesa rahan —hahquin Jesesen.

⁴—Hean jisi ta jahua copi nea joni demandanti yamahihqui —judio hapoboya jano tsamajaquetaibo Pilatonen jaquin.

⁵Coshi coshixon sca:

—Neatohon ta jonibo sinamaxon coromahiqui. Judea mai janin jatihibincon nihxon ta jato jascati haxemahiqui. Reboqui Galilea janin pehocohnish ta neno caman sca jahuiqui, jascati honanmabenahi —hahcanquin.

Herodes janin sca Jesus hiohibo

⁶—¿Galilea mai meha joni hin?
—Pilatonen jato yocaquin. ⁷Herodesnin mai meha joni Jesus hihqui honanxon, Herodes janin sca jaya bohabo jato raanscaquin. Herodes rihbi Jerusalen janin jaatian jai quen hahqui sca jato raanquin. ⁸Jaatian Jesus jisish, Herodes coin coinscrai. Jaya johibo nincanish basi sca jaa jiscatsihquish jenimascai. Jahuen coshiyaxon hahcái jiscatsihquish jenimahi. ⁹Jahuen coshi jiscatsihxon sca yoca yocaquin. Yocacah bi jahua hihyamahi. ¹⁰Jan jahua hihyamahi bi ta jano rihbi nihxon judio hapobo betan jaton haxemanicahbaan quesaquin coshin bi res cahe cahecannishqui. ¹¹Jahuen sontarobo betan Herodesnin Jesus tiromajaquin yohixon hosan hosanscaquin. Quiquin hapon tari sahuemaxon sca Pilato janin raanrihbiquin. ¹²Pilato betan Herodes rainyamapahonish bi jaatianbi raescrai rabebi.

Jesus rehteti yohihibo

(Mt 27.15-26; Mr 15.6-15; Jn 18.39-19.16)

¹³Pilatonen sca judio hapoboya jaton meyayahpabo quenamaxon, jaton jonibo rihbi quenamaxon jato yohiquin:

¹⁴—Noquen jonibo noque bichincatsihqui joni tah qui hahxon tah man nea joni hihuehahqui. Maton nincanonbi tah hen sirijaquin jaa yocacahqui. Honanquin sirijaxon tah hen jahua copi caheti merayamahi. ¹⁵Herodesnin ta merayamaribbihaxqui. Hen hahqui raanah

bi ta noque qui raanrihbihaxqui. Jahua copi rehteti ta yamahihqui, jan tiro mani yamahi.¹⁶ Jaa copi tah hen rishqui rishquimaxon picoxihqui —jato jaquin Pilatonen.

¹⁷ Jaton fiesta tian cah qui huesti joni jato picoxonpahonnish, hahpahonibo quescajaquin.¹⁸ Pilatonen jato yohihah bi coshin bi res sai saihihcanni jatihibi.

—Jaama rahan. Barrabas caya noque picoxonhue —hahcanquin.¹⁹ Barrabasnen ta jaton jema janinhahbo sinamaxon rehtenanmanishqui. Jaa copi ta sipo xoboho jaa tsahoncannishqui, jan joni rehteni copi rihbi.²⁰ Sai saihihquiboya coshin sca Pilatonen jato yohirihbiquin:

—Jesus tah hen mato picoxontihi.²¹ Pilato coshin yohuanai bi sai saihihquin mahuincanquin.

—Jihui qui hueonhue. Jihui qui hueonhue, mahuanon —hihcanni.²² Jato yohirihbiquin, quimisha coti sca:

—¿Jahua tiroma hen janishquin nan? Hean jisi ta jahua copi rehteti yamahihqui. Jaa copi tah hen rishquimaxon jenebahintihi —hahquin Pilatonen.²³ Hashoan sca coshicahinxon coshin bi res yohicanquin.

—Jihui qui hueonxon rehtehue — coshin yohiquin Pilato mahuincanquin, sai saihihxon.²⁴ Jaabaan yohihi quescajati ta jaiqui hihxon sca²⁵ hoa joni rehtenica sca jato picoxonquin, jaabo queenai quescajaquin. Rehtenanmanica joni picoxonxon bi Jesus jato hinanquin, jaabo queenai quescajhabo.

Jihuin hueonaibo

(Mt 27.32-44; Mr 15.21-32; Jn 19.17-27)

²⁶ Jesus boxon sca jemama quirihax jahui joni behchixon bihxon jaa jahuen coros hiamacanquin. Simon janeya joni ta jaa janishqui, Cirene mai meha. Jesus chibanbonanon hiamacanquin.

²⁷ Hicha jonibo rihbi hahchon bocani. Haibobo rihbi hahchon bocani, huini

huinicanahi. Jaya huaohihcanacani.²⁸ Jato qui rabejaquexon sca Jesusen jato yohiquin:

—Heya huaohihyamanahue, Jerusalen haibobon. Maton yoraya huaohihnahue, maton baqueya rihbi huaohihnahue.²⁹ Tiromabo netebo ta mato qui nocoti jahuiqui. Jaatian tah man masa shinanyaxihqui: Hea rihbi baquejoma japahinon, baquexo jahuentianbi bihyamaha cahen hashoan siripan. Jahuentianbi baquexo xoma hahmayamani cahen siripan hih tah man jayaxihqui.³⁰ Noque qui paquenahue mananbon. Noque mahpobahinnahue, mahchibon, hah tah man jatihi.³¹ Xoo pari jihui jai bi nescajahibo jaiya ¿jihui xanascaiyia jenquetsahpabo jatihiquin? —jato jaquin.

³² Huetsa joni rabe rihbi ta bocan-nishqui, tiroma rabe. Jesus hueonxon jaabo rabe rihbi jihuin hueonnoxon bo-canquin.³³ Mapo xao janeya mahchi manixon sca janoxonbi jihuin hueoncan-quin. Jesus naponbi janon, jaa patax tiroma joni huesti hueonxon nichinxon, ramiho sca huetsa joni tiroma.

³⁴ —Jaton hohcha jato sohuaxonhue, Papan. Hea honanyamaxon ta hea nesca-jacanighqui —hihqui Jesus.

Jihuin Jesus hueonxon sca tsoan jahuen chopas bihtihiquin hihxon macan bero pishca borasa qui nanexon chico-hah huetsa macan pari cainaiya huetsan jahuen chopas bihnnon, huetsa macan pari cainaiya huetsan sca jahuen chopas bihnnon hihxon, jascajaquin jahuen chopas bihcanquin.³⁵ Jano tsinquijsaquecahuani nihxon, jonibaan jis jisquin. Hosan hosancanquin, jaton hapobaan.

—Caibo ta rohajapahonishqui. Papan Cristohax hahrí sca rohajahanon, Pa-pan caisah jonihax hahri rohajahanon —hihcanni jaton hapobo.³⁶ Sontarobaan ri-

hbi sca jano nihxon hosan hosanquin.
Mae cachani bexon, hinanquin.

³⁷—Judiobaan quiquin hapohax
mihri rohajahahue —hahcanquin.

³⁸ Jahuen mapo bochiqui quirica rihbi
hueoncanquin. Nea ta judiobaan quiquin
hapo qui hihqui jaa quirica.

³⁹ Jaa patax hueonahbo huesti sca
yohuani, yometsoh huesti:

—¿Mia min Cristo quin? Mihri rohajahatax botoxon noque rihbi hahxonhue —hihqui hosani. ⁴⁰Ramiho quehaton sca joi bichinxon jahuen hahbe tiroma joni qui rainyamascai:

—¿Mia min Dios qui raqueyamahin?
Mia rihbi tah min mahuanoxihqui.
⁴¹ Noque rabe non tiromajani copi
tah non rahma mahuatai. Non caibo
hahni quescaja ta noque jacanihqui.
Noque quescayamahi ta nea jahua
tiromayamanishqui —hahxon, Jesus sca
yohiquin:

⁴²—Quiquin haposcaxon, hehon shi-
nanyaxahnhue, Jesusen —hahquin.

⁴³—Nea netenbi tah min hehbetanbi
heen jihue janin jacoинnoxihqui —
hahscaquin Jesusen.

Jesus mahuascai

(Mt 27.45-56; Mr 15.33-41; Jn 19.28-30)

⁴⁴ Barin manan tsacahiya sca, jatihibi
janin bahquishihcrahini, bari mahpohah
yamecahini, bari racapaquescanon ca-
man bahquishihcrahini. ⁴⁵Papa yocati
xoboho rihbi chopas chique naponbi
huaxacahini, quexe rabe sca janon.
⁴⁶Coshin bi res sca Jesus yohuani:

—Hea bihhue, Papan. Mihqui tah hen
hinamehtai —hihquish mahuascai.

⁴⁷ Jatihibi jisish jano nichi sontaro
capitan sca yohuani:

—Papa Diosen ta jisiqui. Nea joni
ta siri joni hihquishqui —hihqui. ⁴⁸Jisi
jahuibo rihbi hen mia yohihibo jisish
rahte rahteti. Masa shinanax xohpatsi-
htax sca boribicani. ⁴⁹Hahbetan nihpa-

honibaan rihbi hocho nihxon jatihibi
jisquin. Galilea mai janinhax jaa manahi
jahuipi haibobaan rihbi jatihibi jisquin,
hochoxon.

Jesus mihinaibo

(Mt 27.57-61; Mr 15.42-47; Jn 19.38-42)

⁵⁰⁻⁵¹ Jaatian ta Jerusalen janin José
janeya joni japahonishqui, Arimatea
jema janinha joni. Arimatea ta ju-
diobaan jema rihbi qui. Jaa José ta ja-
ton cacannica rihbi janishqui, hihcax
bi siri joni, pontejaquin shinanai joni.
Noque jihuemanica Papan raanpanhilon
hihnical. Jaan jisí cahen jahuen hahbe
hapobaan tiromajaquin shinanrahsih.
Jesus rehtecatsihqui quescayamahi
ta jaa janishqui, jaabaan hahcachihi
quescayamaquin. ⁵²Jaa José sca Pi-
lato janin caxon Jesusen yora yocaquin.
⁵³ Jesusen yora bihpaxon sca, sabanan
rahcoquin sirijaxon, mai xanque-
man poquin quiniho sca mihinquin, jano
tsoabi tsahonnihma. ⁵⁴Tantiti neten
piyanoxon ta jaton pitijati neten jaa tsah-
onnishqui, tantiti nete nea pishca sca
jaiya. ⁵⁵Galilea mai mehax Jesus betan
jahuipi haibobo ta José chibonbonahi
canishqui, jan tsahoni cahiya. Tsahon
honanxon, jan jascajaquin racanai ji-
sish, boresscacani. ⁵⁶Hahan yora hinin-
jati mescohi bocani. Mirra janeya hahan
hininjati rihbi bichi bocani. Tantiti neten
sca tanticani, Moisesnin yohini quescari.

Hihquipish bi Jesus teehihribiscrai

(Mt 28.1-10; Mr 16.1-8; Jn 20.1-10)

24 Tantiti nete huinoscaipish
xaba honanax sca tsahon
janin boribicani. Jaton hininjatibo
rahojahipixon papibahini bocani.
²Nocoxon, hahan xehpohipibo macan
tarabohana sca meracanquin. ³Tsahon
janin hihcoxon bi noquen Hihbo Jesusen
yora merayamacanquin. ⁴Jahuen hea
bohancanaxquin hihquiboya sca rabe

joni jano sanareneni. Jaton chopá cahen bahri bahrichi.⁵ Hihti raquetax, jato qui betihihpaquecani haibobo. Betihihpaquetaiton:

—Mohitahpa joni tah man benahi. ¿Jahuajanoxon man neno tsahonnihibo janin man benahi jahui nan?⁶ Nenoma ta qui. Ma ta hueniscaaxqui. Galilea mainxon jan mato yohiho shinannahue.⁷ Hohchayahpabo qui tah hen hea noquebaque hinamehti jai, jihuín hueonxon rehtescaabo. Jaa pecaho tah hen jahuen quimisha neten sca hahquirihbi teehihtih hah ta mato jahoxqui —hahcanquin, sanareneni jahuibaan.

⁸ Yohihah, Hihcoini, jasca ta jahoxqui hihcanni. ⁹ Jacahini sca tsahon janinhax boribicani. Jahuen once haxenicabo yohitannon benahue, jato jatihibi yohi-non benahue. Texe rihbi jano jaibo yohi-non benahue hihcagini bocani. ¹⁰ Jaa ta María Magdalena qui, Juana, Jacobon mama María rihbi. Caibo hai-bobo rihbi jato betan bocani. No-coxon jahuen haxenicabo yohicanquin. ¹¹ Yohihah bi yohuanresaibo shinanxon jato nincayamacanquin.

¹² Pedro sca picotax bishquihihcanax tsahon janin nocotax cahcopaque-xon jisi bi jano jahuen sabana jano huesti tsamati. Jahua jenquetsaxquin hihquish, rahtetax, xobon sca caribihi.

Emaus jema janin cahibo

(Mr 16.12-13)

¹³ Jaa neten bi sca jato quiha rabe joni cahi, huetsa jema janin cahi bocani. Emaus janeya jema janin cahi bocani, Jerusalen janinhax tahan cahá cahen rabe hora. ¹⁴ Yohuan yohuancanahi bocani. Jisipiboya rahma nincabehnanaibo rahsi shinanax yohuan yohuancanahi cahi. ¹⁵ Yohinancanahi bohiboya sca, jato chibarbonahi caxon jato huinon-quin bi jato manahi sca Jesus nichi.

¹⁶ Jaa hihqui bi bebepohah quescaxon jaa honanyamacanquin.

¹⁷ —¿Jahua yohuan man jain, man yohinani nihcanahin? —jato jaah, nihrenencani jaton bemanan huetsapahc-ahini. ¹⁸ Cleopas janeya sca yohuani:

—¿Jerusalen janin jihuetahxon bi min mia huestichin jano jaipibo joi min honanyamahin? —hahquin.

¹⁹ —¿Jahua jaipishqui nan? —hahquin.

—Jesus nazareno jaipibo rahan. Jaa ta Papan joi yohinica hihpahonishqui. Jatihibichin jisnon bi ta Papan coshiyaxon hahpahonishqui. Papan shinanyaxon ta noque haxemapahonishqui.

²⁰ Noquen hapobo betan noquen cacannicabaan rehtenon ta hinanipicanaxqui, jihuín hueonxon retehahbo. ²¹ Noque israelibо jihuemanicah tah qui hih non jarasihi que bi ta retehipicanaxqui. Neayanish ta quimisha netescaiqui, retepibo. ²² Rahma rihbi ta noquen chocabaan noque rahtehaxqui. Hihari tsahon janin caxon roqui jahuen yora xahbanjacanax. ²³ Merayamahax qui joquin sca Papan yonotibo jato qui cainai qui jiscanquin. Jihue ta jaiqui qui jaa yonotibo jai, yohuani. ²⁴ Jaatian ta noque janinhax caibo rihbi sca jahuen tsahon janin bocanaxqui. Haibobo yohuanah quescabi roqui meracanax, jahuen yora yamascai —hahcanni.

²⁵ —Honanyamahibon. ¿Yotihochahoma maton jointi quin? Papan joi yohinicabaan yohini joibo jatihibi man nincapanan. ²⁶ ¿Jascapa tiromabo huinoti Criston jai yohiyamacannishquin? ¿Jaa pecaho sca naihoh queha quiquin hihbo jaa jatihi yohiyamacannishquin? —jato jaquin.

²⁷ Jato jascajaxon, Moisesnin huishani joibo jato honammaquin sirijaxon, texe Papan joi yohinicabaan huishani joibo

sca jato honanmapaquequin, Cristo yohihi joi rahsi.

²⁸ Jano jaabo cahi jema qui sca nococani. Hojno caparihi quesa jaa jai bi hhti yocacanquin:

²⁹ —Noque qui banetahhue. Bepi sca ta jaiqui. Bari ta hihquicatsihscaiqui.

Jeenhihquish mapeti. ³⁰ Jaabaan Pi-hue hahcá piti bihxon Papa yocaxon tehcxon jato hinanquin. ³¹ Jaatian pari jaton bero quehpemehxon quescaxon jisxon jaa hihqui honanscacanquin. Jaatian jaabaan jisi bi jaa yamacahin sca jai.

³² —Bahnxon noque yohixon huis-hani joibo noque honanmaxon ¿noquen jointibo xecahihnimayamahaxquin? — hihcani. ³³ Jaatianbi cahax, Jerusalen janin boribicani. Nocoxon jahuen once haxenicabo tsinquitaiton meracanquin. Texe rihbi jato betan tsinquititi.

³⁴ —Noquen Hihbo ta teehihrhibi-hiqui. Hueni coin ta jaaxqui. Pedronen ta jisishqui —hihqui tsinquitaito.

³⁵ Jaatian jaabo rabechin bahinxon jisxon nincatanah yohixon, jan paan tehcxonaiya jaa hihqui honanaibo yohicanquin.

Jahuen haxenicabo qui Jesus sanareneni

(Mt 28.16-20; Mr 16.14-18; Jn 20.19-23)

³⁶ Jato yohiparihiya bi jato tocan jaa sanareneni jahui. ³⁷ Rahte rahtetax, yoshin tah qui hihquish, raquepahhuancani. ³⁸ ¿Jahua jenquetsain man rahtetain? ¿Jahuejahi man maton jointi janin raqueya yohuanain? ³⁹ Heen mequen jis-nahue. Heen tahe jisnahue. Hea tah hen qui. Mehexon jisnahue. Yoshinma tah hen qui: yoshin ta nami yamahirhqui, xaobo yamarihbihi. Hea ta jascapahma qui.

⁴⁰ Jato jascajaxon, jahuen mequen jato jismaquin. Jahuen tahe jato jismaquin.

⁴¹ Hihti jenimaya rahte rahtexon jaa

hihqui shinanyamaparihiboya sca jato yocaquin:

—¿Man piti yamahin? —jato jaquin.

⁴² Yapa xohi teque pishca hinancanquin.

⁴³ Bihxon jaton jisnon bi sca piquin.

⁴⁴ Pixon jato yohiquin:

—Mato betan jihueparixon tah hen mato yohiniqui, hea yohihi Moisesnin huishani jatihibi jai quesa ta jatihibi. Huetsa Papan joi yohinicabaan huishani joibo, Davidinin behua janin rihbi jaibo quesa sca ta jatihibi jatihibi.

⁴⁵ Jascajaquin yohixon jaton jointi quehpenxonquin Papan huishani joibo honancoinahbo jato yohiquin.

⁴⁶ —Tiromahabo bi Cristo mahuathi, jan hihquipish bi quimisha neten hihquish hahquirihbi teehihti ta huishacannishqui. ⁴⁷ Maton shinan pontenahue jan maton hohcha sohuaxonnon hahquin Jerusalen janin yohimenohax janohax jatihibi jonibo janin sca jahuen janen jascajaquin yohiyaxihcani, jaa jatihibi ta huishaxon yohicannishqui. ⁴⁸ Yohinibho jai quesa sca jai jisxon tah man honanquin sirijahi. ⁴⁹ Papan mato hinantijani tah hen mato qui raanyaxihqui. Nea jema janin banetahnhahue, heen naihoh queha coshi mato qui noconon caman —jato jaquin.

Jesus naihoh hinahihnati

(Mr 16.19-20)

⁵⁰ Jato jascajaxon Betania jema janin caman jato hioquin. Janoxon sca jahuen mequen sanahihnxon siri shinanya janoxihquibo sca jato yohiquin. ⁵¹ Jato yohihahnan sca caresscái, naihoh hinahihnati. ⁵² Jaabo sca hihti jenimahanan Jerusalen janin boribicani. ⁵³ Papaá yocati xoboho res mapexon Papa yocacanquin, Hahxon tah min noque jai, Papan, hahquin.

JUAN

Juaman huishani joi siri

Papan joi hihbo jonihi

1 Jahuabi jaríyamanon ta Papan joi hihbo janishqui. Papa Dios betan jihuetaibaan. Papan joi hihbo ta Papan shinanyahpa qui. Dios bi res ta jaa joi qui. ² Naiyahpa mai jaríyamanon ta Papa Dios betan jaa joi hihbo janishqui. Jahuaben Jane cahen Jesus. ³ Jaan ta jatihibi janishqui. Jaan hahyamani quen ta jahuabi yamaquehanehiqui. ⁴ Jaan ta jatihibi yoshinyahpabobojaquin jihuemanishqui. Jaa noquen jihuemanicah ta noquen xaba qui. ⁵ Bahquish chian xabatai bi cahen yamepan bahquishjayamaquin.

⁶ Noquen xaba hihbo ta jahuiqui hihqui jonon ta Juan janeya joni Papan raannishqui. ⁷ Jaa ta xaba hihbo qui hihxon yohicoini jonon. Joxon, jatihixonbi nincacoinahbo hihxon jato yohicoquin. ⁸ Jaa Juan cahen xaba hihquishma bi xaba hihbo qui yohicoini jahui. ⁹ Jaa xaba hihbo ta jatihibi joni xabajanicah qui. Xaba hihbo hihquish bi cahen noque janin jaa jahui.

¹⁰ Jan hahni nete janin jaabi jahue que bi cahen januetaibaan huetsapahascaquin, jaabi que bi. ¹¹ Jaton caibo que bi Johue hahyamacanquin, jaanbi hahni nete janin nocotai bi. ¹² Caibaan res Johue hahquin. Jaa Johue hahcaibo cahen: Diosen baquebo sca janahue, mato rahsibi, hea nincacoinaibo rahsi, xabapan jato jaquin. ¹³ Jaa Johue hahcaibo Papa Diosen baquebo hihnon, jimiyahpa papa janonma bi queeyahpa papajomabo hihnon, bebaan baquejaha hihnonma bi: Papan baquebo janahue xabapan jato jaquin.

¹⁴ Yorayahpahax ta noque betan jaa Papan joi hihbo jihuenehqui. Jan hi-

hti coshin hahcai tah non jisniqui. Jaa huesti jahuen papa xohtahi, nete hihbohi. Yohuani hihcoinai. Shinanyahpa siri. ¹⁵ Hahqui chanicoini cahen Juan coshin yohuani, nescari:

—Hoa ta hen mato yohipi noque qui, hea pari jomenoni que bi ta hehchon jahui noquen hea muuiniqui, jaa pari jihue hihbonixon —ihiqui. ¹⁶ Jahuaben shinan hihti caibohi tah non jatihixonbi bihniqui, jaan hinanresah. ¹⁷ Xabapan shinan non bihnon hihxon ta Papan Moses yononishqui, noquen nincati joi Mosesnin huishanon. Jaa pecaho ta Jesucriston sca jahuen shinan noque hinanresiqui, hihcoinai joi non honannon, noquehon Papan shinanai non honannon. ¹⁸ Tsoanbi ta noquen Papa Dios jisyamanishqui, jahuentianbi. Non jisyamani bi ta hahan jan shinanai jahuen baquen noque yohiha, jenquetsahpa noquen Papa Dios quin non honanscái.

Jesucristo ta Papan baque qui

(Mt 3.11-12; Mr 1.7-8; Lc 3.15-17)

¹⁹ Yocacahbo hihxon ta Jerusalen janinha judiobaan jaton sacerdoteboya levitobo Juan qui raannishqui.

—¿Mia min tsoa quin? —Juan yocacahbo. Yocacahbo ta jato yohicinnishqui. ²⁰ Paranxonma jato yohicoinquin:

—Hea ta hen Cristoma qui —hahquin.

²¹ Jasca jan jaiya, yocaribicanquin:

—¿Tsoa min quin? ¿Mia min Elías yamanica quin? —hahcanquin. Jasca-hahbo bi:

—Hea ta jaama qui —hahquin.

—¿Hoa Dios joi yohinica nan? —hahscacanquin.

—Hea ta jaama rihbi qui —hahquin.

²² Jaatian yocaribicanquin:

—¿Tsoa min quin? Noque Yocatan-nahue hahcaibo non yohihi sca canon, Jaa ta hen qui noque jahue, mianbi —hahcanquin.

²³—Cahchihoxon quenahi ta hea qui, Hihbo hahan jonon bahi najisti chai jaxonnahue hahnical. Papan joi yohinica hihxon Isaiasnen noque yohini quescabijaquin tah hean jai —jato jaquin. ²⁴Yohihahbaan bi fariseobaan sca hahquirihbi raanah, yocarihbicanquin:

²⁵—¿Jahua copi min Cristo hihxonma bi min jato nashimahin, Elías rihbi hihxonma bi, hoa Dios joi yohinica rihbi hihxonma bi min nashimahi nan? —hahcanquin Juan yocaquin.

²⁶—Hean ta hen jenen res nashimahi. Mato tocan ta man honanyamahi joni nichiqui. ²⁷Hehchon jahui que bi tah hen jahuen sapato risbi pecaxonti senenyamahi, jaa hihti siri copi —Juaman jato jaquin. ²⁸Jordan huean hoque quexaxon, janoxon Juaman jato nashimahi janinxon bi ta jascajauquin yocacannishqui, Betania jema janinxon.

Jesus ta Papan carnero qui

²⁹ Huetsa bahquish sca jari Jesus jahui qui jisxon, Juaman jato yohiquin:

—Jisnahue. Hoa ta Papan carnero joni qui, main jihuetaibaan hohcha copi mahuayaxihqui joni. ³⁰Hen mato yohihipi tah qui, Hehchon jahui jonin ta hea mahuiniqui, jaa pari jihue hihbonixon hahquin. ³¹Hean rihbi jaa honannixonma bi tah hen israelibaan jaa jisxon honannon hihxon hean jenen nashimahi joníqui —Juaman jato jaquin. ³²Jato jascajaxon yohirihbicoinquín:

—Naihoh quehax Dios Yoshin botopaqetax, nobex quescapa hahqui bototí manahi jahui tah hen hean jisoqui. ³³Jaa tsoa quin tah hen hean rihbi honanya manihqui. Hen honanyamahi bi ta Papan hea yononishqui, jenen nashimahi hea jonon. Botopaqetax heen yoshin siri jaa manahi jahui min jisyaxihqui ta heen yoshin siri bichibo nashimaquin

hahcajanicah qui, heen yoshin siri jato hinanquin, hih ta Papa jahoxqui. ³⁴Jan jascajahi jisoxon ta hen mato yohicoinal: Papa Diosen baque tah qui —Juaman jato jaquin.

Jesusen caismenoribó

³⁵ Huetsa bahquish sca, jahuen haxenica rabe betan nihribixon, ³⁶Jesus nichi jisxon:

—Jisnahue. Jaa ta Papa Diosen carnero qui —jato jaquin. ³⁷Jan jascarai nincacax rabebi jahuen haxenica cahi, Jesus chibani sca. ³⁸Rabejaquexon, chibanaí jato meraxon Jesusen jato yocaquin:

—¿Jahuejahi man behin? —jato jaquin. Yocacah:

—¿Jahuen min jihuetaín, Rabin? —hahcanquin. Rabin ta maestron hihcatsihqui qui.

³⁹—Jisi benahue —hahscaquin. Jaatian boresscaxon, jan janó jihuetaí jisish, bepiscaiya jaa netenbi jahuen xoboho banecani. ⁴⁰Huesti ta Andres janishqui, Simon Pedro huetsa. Huetsa joni betan nihxon, Juan yohuanai nincaxon, Jesus res sca chibanquin. ⁴¹Jahuen huetsa Simon benaxon meraxon:

—Mesías tah non merascai —hahquin. Mesías cahen Papan raanah joni hihcatsihqui, Cristo, jaton join. ⁴²Jascajaxon, Jesus janin Simon hioquin. Nocotaiya bejisxon Jesusen yohiquin:

—Mia tah min Simon qui, Juaman baque. Cefas janeya sca tah min jayaxihqui —hahquin. Cefas ta macan hihcatsihqui qui.

Felipeyá Natanael Jesusen quenahi

⁴³ Huetsa bahquish sca Galilea main cacatsihquin Felipe meraxon:

—Hehbe cahue —hahquin Jesusen.

⁴⁴ Betsaida jema janin ta Felipe jihuepa honishqui, Andres betan Pedro jano ji-

huepahoni janin.⁴⁵ Natanael meraxon, Felipenin yohiquin:

—Papan joi huishaquin Moisesnin yohini joni tah non meratanai. Papan joi yohinicabaan rihbi hahqui huishaxon yohini. Josepan baque Jesus tah qui, Nazaret janinhah —hahquin.

⁴⁶—¿Nazaret janinha jahua siri jati-hiquin? —hihqui Natanael.

—Jisihue —hahscquin Felipenin.

⁴⁷ Natanael hahqui nocoti jahui jisish Jesus yohuani:

—Jisnhue. Jaa ta israeli baque coin qui, paranyosma joni —hihqui.

⁴⁸—¿Jenquetsahaxon min hea honanain? —hahquin Natanaelnin.

—Higo jihui naman tsahotai ta hen mia jisiqui, Felipenin mia quenarihyamanon —hahquin Jesusen.

⁴⁹—Mia tah min Papa Diosen baque qui, Maestron. Mia tah min israelibaan quiquin hapo qui —hihscai Natanael.

⁵⁰ Jesusen sca Natanael yohiquin:

—¿Higo jihui naman tsahotai ta hen mia jisiqui hen mia jaiya min ninca-coinain? Heen coshiyaxon hahcai tah qui. Hashoan rihbi heen coshiyaxon hen hahcai tah min jisyaxihqui.⁵¹ Yohicointa hen mato jai: nai huiso quehpemeh-taiya hea janinhax hinahihnhatax hea noquebaque qui nocoti botopaquetai tah man Papan yonotibo man jisyaxihqui —jato jaquin.

Caná jema janinxon huanomahibo

2 Jan jascahipi quimisha neten sca Galilea main huanomahibo jai, Caná jema janin. Quenamaha jano rihbi Jesusen mama cahi.² Jahuen haxenicaboyabi canon Jesus rihbi quenamacanquin, huanohihbo jisi canon.³ Jaton xehati queyoscaiqui:

—Hompa ta yamascaiqui, baquen —hihqui jahuen mama.

⁴—¿Min jascaraiya bi jahueja hen jati-hin, maman? Heen coshiya teeti nete ta

nocorihyamahiqui —hahquin Jesusen.

⁵ Xehamanicahbo sca:

—Jaan mato yohihi quescabijanahue —jahuen maman jaquin.

⁶ Janobi rihbi cahen seis macan poo tsahoti jene paxa hahqui bexojatibo. Hanibo poo can, huesti cuñete hihyamax rabe cuñete betan senenai tihopabo, hahan judiobo mechoquiti, tachoquiti, jaton hihti quesbari.

⁷—Poo qui jene bohasaxonnahue —jato jaquin Jesusen. Jaatian bohasabahincanquin.

⁸—Huehaxon, fiesta hihbo nomimatannahue —Jesusen jaah sca, huehaxon nomimacanquin.

⁹ Jaa jene hompacahinscrai bi fiesta hihbaan tanaquin. Tanaxon bi jahuerahnkah hin honanyamaquin. Jene bihtanaibaan honanai bi fiesta hihbaan honanyamaquin. Tanaxon jahuen huanoni quenaxon sca fiesta hihbaan yohiquin:

¹⁰—Pahenscaiton jato tiroma xehati xehamanoxon tah non siri pari jato hahmanica qui. Mian tah min rahma pari hompa siri cainmahi —hahquin.

¹¹ Galilea mai janinhah Caná jema janinxon ta Jesusen jascajamoquin hahan honantijanishqui. Jahuen coshi jato jismahah cahen jahuen haxenicabaan nincacoincaquin, Papan caisai joni hihqui honancoincanquin.

¹² Jaa pecaho jahuen mama, jahuen jochicabo rihbi, jahuen haxenicaboyabi Capernaum janin hahbetan cahax nocotax jahuentihi ra netebo jano baneti, basima tahni.

Papan xobo tiromajahibo Jesusen jabamahi

(Mt 21.12-13; Mr 11.15-18; Lc 19.45-46)

¹³ Judiobaan pascua fiesta nea pishcascaiya Jerusalen janin Jesus cahi. ¹⁴ Nocoxon Papan xobohoxon jaton ganadoya carnero maromahiton

jascapa maromanicahbo meraquin. Nobex maromanica joniboya coriqui mahnenannica jonibo rihbi jano tsahotai merarihbiquin.¹⁵ Jascajahiton meraxon risbipan hahan rishquitijaxon jeman jato potaquin. Jatihibi potaquin, jaton ganadaboya jaton carneroboya bi. Jaton coriqui napabohanxon coriqui misa rihbi behonjanquin.¹⁶ Nobex maromanicahbo sca yohiquin:

—Nescapahbo botannahue. Heen papan xobohoxon jascajayanamanahue. Janoxon marotima tah qui —jato jaquin.¹⁷ Jato potahi jisxon, Hea tah hen miin xobo hihti jenipahichai jaa jiscatsihqui, hihqui neateman huishani joi jahuen haxenicabaan shinanscaquin.¹⁸ Jahuen haxenicabaan sirijaquin shinanai bi judiobaan sca joi bichinquin:

—¿Jahua hahan honanti min noque jismahin, nescajanoxon? —hahcanquin.

¹⁹—Nea xobo potojaquetannahue, quimisha nete huinoxon hen jaa xahnennenbi hahribinon —Jesusen jato jaquin.

²⁰—¿Cuarenta y seis bari teexon janquenjanibo xobo min quimisha neten xobojaquin queyotihin? —hahcanquin.²¹ Jahuen yora yohihi jan hihqui bi janoxon Papa Dios yocati xobo yohihi shinancanquin.²² Hihquipish bi tee-hihrihbihiya pari ta jan jascajaquin jato yohiho jahuen haxenicabaan shinanscanishqui. Shinanax, Hihcoini Papan huishamani joi ta jaa yohihi jaiqui, noquen Hihbo Jesusen rihbi ta noque jascajaquin yohinishqui, hihcansi.

Jatihibi jonibo Jesusen honanai

²³Pascua fiesta tian Jerusalen janinxon hahan honantibo Jesusen hahcái jisxon:

—Papan caisai noque tah qui —hahcanquin hicha jonibaan.²⁴ Jascaraibaan bi jato jatihibi honanax

jato tocan Jesus nihresyamahi.²⁵ Jatihibi jonibaan shinanai jaanbi jahuen jointinin honanscái copi, Jasca ta shinancaniqui hihncia pishinyamahi.

Jesus qui Nicodemo nocoti

3 Huesti fariseo joni ta judiobaan ca-cannica hihpahonishqui, Nicodemo janeya joni.² Jesus qui yame caxon yohiquin:

—Noque honanmahi mia jonon ta mia Papan raannishqui, Maestron. Non tah non honanai. Mian tah min hahan honantibojahi. Mihibetan Papa Dios hi-hyamahiya cahen min jascajati hahtipahyamahan —hahquin.³ Jaatian:

—Mia tah hen yohicoinali. Behnajaquin jonijahama jonin ta Papan jihue jistimabiresiqui —Jesusen jaa jaquin.

⁴—¿Yosibohax non jenquetsahax hahquirihbi jonitihin? Noquen maman xahquin janin non hahquirihbi hihquitihin, jonirihbinoxon?
—Nicodemon Jesus jaquin.

⁵—Mia tah hen yohicoinali: Dios Yoshiman jonijahama joni ta Papan jihue janin hihcotimabiresihqui. Jenen rihbi jonijahama joni ta jano hihcotimabiresihqui.⁶ Namin jonijaha ta yorayahpa qui. Dios Yoshiman jonijaha ta yoshin rihbi qui.⁷ Hahquirihbi joniti tah min jai hen mia jaah bi rahteyamahue.⁸ Jano jan queenaiton ta nihue cahiqui. Jahuerahnohax cainax jahuen cahiquin tah min honanyamahi, xoo hihqui nincaxon bi. Dios Yoshiman jonijaha jatihibi ta jascarihbi qui —Jesusen jaquin.

⁹—¿Jaa min yohihi jenquetsahati-hiquin nan? —nihqui Nicodemo.¹⁰ Jesusen sca yohiquin:

—¿Israelibaan honanmanicahxon bi min hean mia yohihah min honanyamahin?¹¹ Yohicoinali tah hen mia jai: Honanxon non mato yohihah bi tah man nincayamahi. Jisxon non

yohihah bi tah man nincayamahi non hihcoinai bi. ¹² Nea mai meha joi yohihah bi nincacoinyamaxon tah man jenquetsahaxon bi naihoh queha hen mato yohihi joi nincacointimahi.

¹³ Tsoabi naihoh catanni que ma bi tah hen janohax botopaquetai hea huesti jano canicah qui, hea noquebaque. ¹⁴ Nincacoinaibo queyoyamanox mananon ta cahchihoxon Moisesnin rono nichinhihninoxon jihuin hueonni quescajaquin hea noquebaque nichinhihninoxon hueonyaxihcanihqui. ¹⁵ Hea noquebaque qui hinamehxon nincacoinaibo jatihibi ta queyoyamanox manatihiqui.

Main jihuetaibohon Papa Dios hihti queenai

¹⁶ Nai nequebihabo hihti queenxon ta jahuen baque hea huesti Papan raannishqui, hinamehxon nincacoinaibo jatihibi queyoyamanox mananon, tsoabi mehtexehtaxma jihuonon. ¹⁷ Main jihuetaibo castican jonor hihxonma bi hen jato jihuemahi jonor hihxon ta Papan hea raannishqui.

¹⁸ Nincacoinai jonibo ta jahua copi casticantimabo qui. Nincayosma jonibo ta casticanscatihiqui, Papan baquen yohihah bi jahua nincayamahibo. ¹⁹ Mai janin xaba jahue que bi ta xaba jenipahiyamacaniqui. Yame caya ta jenipahicaniqui tiromabohax. Jaa copi ta jato casticanyaxihquiqui. ²⁰ Nenoxon tiromajahibo rahsi ta johue jiscatsihyamahax xaba quiri cayosmabo qui, tiromajahibo caibaan jismis hihquish xaba quiri cayamahi. ²¹ Hihcoinai ta xaba quiri canicah qui. Papan jisi hah ta jaan jaiqui caibo hihnon hihquish —Jesusen Nicodemo jaquin.

Juan Jesus qui yohuani

²² Jaa pecaho ta jahuen haxenicabo betan Jesus canishqui Judea mai janin. Jano jato betan banexon nincacoinaibo hihquimatanquin nashimaquin.

²³ Enon jema janinxon Juaman rihbi nashimaquin Salim hochoma jano noayahpa huean jaiton. Juaman jato nashimanon caibo jano cahi. ²⁴ Sipo xoboho Juan tsahonrihyamahiboya jano jonibo bocani.

²⁵ Jascascahiya Juaman haxenicabo betan judiobo yohinani:

—¿Jenquetsahaxon non noquen hohcha potatihin? —hihqui yohinani rainyamahi. ²⁶ Juan qui caxon sca yohicanquin:

—Jordan hoque quexa mia manatipi jonin rihbi ta nashimahiqui, maestron. Min noque yohiconipi joni tah qui. Jise. Hahqui sca ta jatihibi bocanhiqui —hahcanquin. ²⁷ Jascalahabu jato yohiquin:

—Papan noque hinanyamahah tah non tsoanbi jenquetsahpabi bihti hahti-pahtimahi. ²⁸ Hea ta hen Cristoma qui. Hean pari yohixonon jonor hihxon res ta Papan hea yononishqui. Hen jascahipi tah man matonbi honancoinai. ²⁹ Nesca tah qui, jisnahue. Jahuen haibo hihnon cahen bebo huanocatsihqui. Jan yohuanai ta jano rihbi nihxon jahuen hahberabetinin nincatihiqui. Jan yohuanai nincacax coincoini. Jascarihbui ta hen hea coin coini jai. ³⁰ Caiti ta jaa jaiqui. Jahua hihtima ta hea jai —jato jaquin.

Bochiquihax jahui joni

³¹ Bochiquihax jahui jonin ta jatihibi joni hihbojahiqui. Mainxon jonijahabo ta mainxon jisish jan jisiboya yohuanihqui. Naihoh quehax jahui joni ta jatihibi jonibaan hihbo qui.

³² Naihohxon jisnibo yohuancoin jan jai bi ta tsoanbi nincacoinyamahihqui. Jan

nincanihbo yohuancuin rihbi jan jai bi ta tsoanbi nincacoinyamaribihiqui. ³³Jan yohicoinh nincacoinaibo ta Papa Dios ta hihcoinnicah qui hihquiqui. ³⁴Papan raannica joni hihxon ta Papan joibo yohihiqui. Hahqui ta jahuen yoshin siri Papa Dios yohuashiyamahiqui. ³⁵Jaa jahuen baquehon queenxon ta Papan jatihibi jaa hinannishqui, jaan sca hihbojanon. ³⁶Jaa Papan baque qui hinamehxon nincacoinai joni ta queyoyamanox manatihiqui. Jahuen baquen yohihah bi nincayamahi joni ta jihueticahiqui. Jascapa ta Papan hihti jistahihmahiqui, hahquin.

Samaritano haibo Jesusen yohuanquihnhai

4 Juaman honanmaxon nashimahi mentan hashoan hihti caibo Jesusen honanmaxon nashimahi cahen fariseobaan nincascaquin. ²Jaabi Jesusen nashimayamahi bi ta jahuen haxenicabaan res nashimanishqui. ³Jahuen nashimatibo caichai fariseobaan joi nincacai honanxon Judea mai Jesusen potabahinquiu, Galilea main caribinoxon.

⁴Galilea main canoxon cahen Samaria mai nabebacahinti jai. ⁵Cahi, Samaria mai meha jema janin nocoti, Sicar janeya jeman. Jacobonen jahuen baque José hinanni mai hochomahi. ⁶Jene bihnoxon ta janobi Jacobonen mai poquinnishqui. Poquinxon chiqueribiquin. Jano sca ta Jesus noconishqui. Bahin nihnihi paxquinax, barin manan tsacahiya jaa mai poquin quexa Jesus tsahopaqetui. ⁷⁻⁸Jahuen haxenicabo jema janin piti benahi canon cahen jan manati. Manahahnhan, samaritano haibo jene bichi jahuiton, yocauquin:

—Hen nominon jene pishca hea bihxonhue, haibon —hahquin Jesusen.

⁹Jaatian:

—¿Jenquetsahaxon min mia judio hihxon bi hea samaritano haibo jene yocacain? —samaritano haibaan Jesus yocauquin. Judiobaan samaritanobo jistahihmah copi haibaan jascajaquin.

¹⁰—Tsoan mia jene yocacai honanxon cah min mianbi jaa yocacan. Papan mia hinanai rihbi honanxon cah min yocacan. Jaatian ta mia jene mohini hinanquehanishqui —Jesusen jaquin.

¹¹—Mai poquin ta nemin qui, bebon. Hahan tsecati rihbi tah min yamahi. ¿Jahuen min jascapa jene mohini bihtihin? ¹²Noquen xeni Jacobonen ta nea noa xehanishqui. Jahuen baqueboyaxonbi jahuen yohinabaan rihbi nea jene xehaquin. Nea noa noque jaan hinannih que bi cahran min jaa mentan hashoan coshi quin? —hahquin haibaan. ¹³Jaatian Jesusen sca:

—Nea jene hahcaibo ta hahquirihbi nomicatsihnoxihihi. ¹⁴Hean jene hinanah xehahax ta jahuentianbi jiricatisiyamascatihiqui. Jaa chicho quehax ta hen hinanai jene mohini jahuentianbi taraxaxma jabascatihiqui —haibo jaquin.

¹⁵—Jaa jene hea hinanhue, bebon, jiricatisiyamascaax hen neno jene bichi jori joriyamascanon —haibaan Jesus jaquin. ¹⁶Jesusen sca:

—Min bene quenatanhue, joribinoxon —jaa haibo jaquin.

¹⁷Jaschah:

—Heen bene ta yamahihqui —hahquin haibaan.

—Yohiquin sirija tah min jai, miin bene yamahi. ¹⁸Pichca miin bene janish bi cah min rahma huetsa betan hihribibi, miin benema rihbi. Hihcoin tah min jai —hahquin Jesusen.

¹⁹—Papan joi yohinica mia quin hen ta hen honanscái, bebon. ²⁰Nea machinxon ta noquen xenibaan betihihpaquexon Papahon shinanpahonishqui, Jerusalen janinxon non Papahon shi-

nanti jai man maton jai bi —hihqui haibo.²¹ Jesusen sca:

—Hen mia yohihah nincacoinhue, haibon. Papahon shinanaibaan ta nea mahchinxonma bi Jerusalen janinxonma rihbi noquen Papahon man shinanyax-ihqui.²² Man honanyamahi naman tah man betihihpaquetai, Papahon shinancatsihqui. Non honanai naman betihih-paquexon tah non noquen shinanai. Jihuemanicah ta judio xohta qui.²³ Hahan Papahon shinanti nete jahuem bi ta nocoscaiqui, Papa qui betihihpaquexon shinancoinaibaan jahuen yoshin siriyaxonbi Papahon shinanbiresnon, hahan shinancoinquin. Jascapa shinanaibohon ta noquen Papa queenihqui.²⁴ Noquen Papa ta yoshin qui. Jahan shinanai noquebo ta jahuen yoshinyaxonbi shinancointi jaiqui —haibo Jesusen jaquin.

²⁵—Papa Diosen caisai joni, Cristo hahcaibo, joyaxihqui ta hen honanai. Joxon ta jatihibi joi noque yohiyaxi-hquiqui —hihqui haibo.

²⁶—Hea tah hen jaa qui, mia yohihi joni —hahquin Jesusen.

²⁷ Jasca jan jaiya bi jahuen haxenicasabonocoti. Haibo betan yohuanaiton merahax rahtecani. Rahtexon bi ¿Jahue-jahi min hahbe yohuanahquin, jahua yohuan min jain, hahbetan? Jesus yocacatsihquin bi yocayamacanquin.²⁸ Jaatian jahuen poo tsahonbahini jema janin haibo cahi cahi. Cahi nocoxon jonibo yohiquin:

²⁹—Jatihibi hean janíbo hea yohihi joni jistannahue. ¿Jaa Cristoma hin? —jato jaquin.³⁰ Jaatian jema janinhax cainax Jesus jisi bocani.³¹ Jasca sca jaiboya:

—Pihue, maestron —jahuen haxenicasabaan Jesus jaquin.³² Pihue jaibaan bi:

—Man honanyamahi piti ta hea jai —Jesusen jaquin.³³ Jasca jan jaiya jahuen haxenicabonjaabo rahsibi yohuanai:

—¿Tsoan cahra piti bexonaxquin? —hihcani yohuani.³⁴ Jascahibo bi:

—Hea yononi queenai quescajaxonti ta heen piti qui. Jahuen tee queyoxonti rihbi ta heen piti qui.³⁵ ¿Chosco hoxne hihquish pari ta banabo tsinquitiri siri sca jatihibi hih man jayamahin? Man jascarai bi ta hen mato yohihi. Huachian bana johuescái jisnahue. Tsinquitiri siri sca ta jaiqui hah ta hen mato jai.³⁶ Cananhahnán ta tsinquinicaton jascabi jihuetai bimi tsinquihihqui. Bananica betan tsinquinica jenimascanon ta jaton tsinquitibó queyoyamanox manati-hqui.³⁷ Huetsan tsinquixonyaxahnon ta huetsan banahihqui hih ta jacanihqui. Hihcoini.³⁸ Man bananixonma bi tsinquitannon tah hen mato yononihqui. Caibaan hahni tee tah man tsinquitih —jato Jesusen jaquin.

³⁹ Jaa jema janinha samaritanobaan ta hichaxon Jesus nincacoinnishqui. Jatihibi hean janíbo ta hea yohihaxqui hahquin haibaan jato yohicoinai copi nincacoincanquin.⁴⁰ Jesus qui caxon yocaquin:

—Noque qui banehue. Cayama sca jahue —hahcanquin. Jascalahbo jato betan rabe neten baneti.⁴¹ Jaanbi jato yohihiya nincacoincanquin hashoan tsamaxon sca.⁴² Nincacoinxon haibo yohicanquin:

—Mian noque yohihah nincacoinipixon bi tah non jaa yohuanai noquenbi nincaxon non hashoan sca nincacoinscái. Jaa coin ta nai nequebihabo jihuemanicah qui, honancoin sca tah non jai —hahcanquin.

Hapon baque Jesusen rohajahi

⁴³ Rabe neten jato betan banetax janohax Galilea main sca cahi caresscái.

⁴⁴ Caquin sca ta jato yohinishqui:

—Jahuen main jihuetai bi ta jahuen caibaan Papan joi yohinica nincacatsihyamahihqui —hahquin.⁴⁵ Jascahi bi

jatihibi jan Jerusalen janinha fiesta janinxon hahcai jistanipixon Galilea main jihuetaibaan Johue hahquin jaton main nocotaiton.

⁴⁶ Janoxon jan jato jene hompajaxonni jema janin nocoribhi, Caná janeya jema, Galilea main. Capernaum jema janin cahen huesti tinintinin baque hisini jai. ⁴⁷ Judea mai mehax Galilea mai janin Jesus joresscái chanihah jaa yocaqui tininti jahui.

—Heen baque hea rahonxoni cahue. Hihcatsih sca ta jaiqui —hahquin.

⁴⁸ —Hahan honanti jisyamaxon tah man nincacoinyamahi, hahqui rahtetibo rihbi jisyamaxon —tininti Jesusen jaquin. ⁴⁹ Jan jascrai bi:

—Jani heen baque mahuanon carihue, hihbon —hahquin tinintinin.

⁵⁰ —Careshue. Miin baque ta jihuethiqui —tininti Jesusen jaquin. Min yohihi quescabi ta jacoointihiqui hihquish tininti cahi caresscái. ⁵¹ Cahipish cabahinahi bi jahuen jonibaan behchibenaquin.

—Miin baque ta rohscaipishqui —hihcáni. ⁵² Jascraiton jato yocaquin:

—¿Jahuerahnon bari racataiya jahuen yona tantihipishqui?

—Bahquish bari hihpaquescaya ta yona tantihipishqui —hihcáni. ⁵³ Jano bari racatai bi Miin baque ta jihuethiqui Jesusen jaipi jahuen papan honanscaquin. Jaatian sca jahuen xobo janinhahbo betan jatihxonbi Jesus nincacoinascaquin.

⁵⁴ Jaa ta Judea mai mehax Galilea janin joribixon sca jahuen rabe sca jahuen hahan honanti Jesusen jato hahxonishqui.

Yora honanyamajaquetai Jesusen rohajahi

5 Jaa pecaho judiobaan fiesta jaiya Jerusalen janin Jesus caribhi. ² Jerusalen janin ta jema xehpoti

jaiqui, carnero janeya xehpoti. Jema xehpoti hochoma cahen noa pishca racatah Betesda hahcaibo, judiobaan join. Jaa hian quexa ta pichea xobo tsahotihqui. ³ Jaa xoboho cahen hicha hisinaibo racati, benchebo, tobi pishcabo, yora honanyamajaquetabio. Noa pishca bahinon jaabo manati. ⁴ Jaa noa janin roqui Papan yonoti paquepahonish. Paquexon qui jene bahimaquin. Bahihiya qui jenenencanya paquemenohi joni rohahi siripi. Jahuen hisin jatihibi rohacahini. ⁵ Jano cahen huesti joni racati, treinta y ocho bari jascabi hisini. ⁶ Racataiton jisxon hicha bari sca hisinai honanscaxon:

—¿Min rohacatsihyamahin?
—hahquin Jesusen.

⁷ —Jene bahihiya hea jenenencanya potanica ta yama qui, hihbon. Hea cahiya bi huetsa pari hihquih —hihqui hisinai.

⁸ —Huenihue. Huenixon miin cacajati bichish caresscatanhue —Jesusen jaquin. ⁹ Jaatianbi rohacahinxon jahuen cacajati bichish caresscái. Jaton tantiti neten ta Jesusen jascajanishqui. ¹⁰ Jaa copi ta jan rohajahi joni judiobaan yohinishqui:

—Rahma ta tantiti nete qui. Tantiti neten tah min miin cacajati botimahi —hahcanquin. ¹¹ Jascahahbo bi:

—Miin cacajati bichish caresscatanhue hah ta hea rohajahi jonin jaaxqui —jato jaquin.

¹² —¿Jahua joni jaa quin, mia Miin cacajati bichish jaya catanhue hahcái? —hahcanquin. ¹³ Yocacahbo bi Jesusen jane honanyamaquin, jano jonibo hicha nichiton Jesus rebesohtai copi. ¹⁴ Jaa pecaho Papan xobohoxon jaa merarihbxion:

—Jise. Mia tah min siriscái. Hohchayamascahue hashoan tiromamis —Jesusen jaquin. ¹⁵ Jaatian caresscaxon judiobo yohiquin:

—Hea rohajahi joni ta Jesus qui — hahquin.¹⁶ Tantiti neten jan rohajahi copi judiobo Jesus qui rainyamahiton jaan jato joi bichinquin:

¹⁷—Heen papa ta rahma caman teetihqui. Hea rihbi ta hen teetai —Jesusen jato jaquin.¹⁸ Jascajaha hashoan sca Jesus rehtecatsihquibohi. Jan tantiti neten tantiyamahi copi rehtecatsihquibo. Papa Dios betan jasca rabe hihquish, Papa Dios ta heen papa qui jan jaiton.

Papan yohihah jahuen baquen haxemahi

¹⁹ Jesusen jato yohirihbiquin:

—Yohicoin ta hen mato jai: Papan baquexon bi tah hen hehmebi jahuejati hahtipahyamahi. Heen papan hahcai jisxon pari tah hen hahcai, jatihibi heen papan hahcai quescabijaquin hean rihbi hahquin.²⁰ Hea jahuen baquehon shinanxon ta heen papan jatihibi jan hahcai rihbi hea jahuen baque jismahiqui. Jahuen coshiyaxon hen hahcai bi ta nea mentan hashoan coshin hen hahcai rihbi hen mato jismayaxihqui, man raftenon.²¹ Mahuanibho huenixon heen papan jihuemahi quescajaribiquin tah hen jahuen baque hihxon hea hen queenaibo hean jihuemahi.²² Tsoabi casticanxonma ta Papan hea yonohihqui hean sca jatihibi jointi honanxon casticanyaxahnon.²³ Papa Dios Nete Hihbohi man honanai quescajaribiquin man jahuen baque Nete Hihbohi man jatihixonbi honannon ta jascjahiqui. Jahuen baque ta nete hihboma qui hihquibo ta Jaa raanni jahuen papa rihbi ta nete hihboma qui hihnicahbo qui.

²⁴ Yohicoin tah hen mato jai: heen joi nincaxon bi hea raanni heen papa rihbi nincacoinai joni ta queyoyamanox manatihqui. Jaa casticanxonma ta Papan mahnescaiqui, mahuataibo janinhax ji-huetaibo qui mahnenon.²⁵ Yohicoin ta hen mato jaribibi: mahuanibbaan ta Pa-

pan baquen yohihi nincascaiqui, ninccaibo jihuescanon.²⁶ Jahuen papa tee-hihmanicahi quescarihbibi tah hen hea jahuen baque jaa xohtahi, Mia rihbi jato tee-hihmanicahue, Papan hea janí.²⁷ Mia tah min noquebaque qui. Mian sca jato casticanhue hah ta heen papan janishqui.²⁸ Hen mato yohihah bi rahteyamanahue. Hean quenahah ta tsahon janinhahbaan jatihixonbi nincayaxihquiqui.²⁹ Sirijanibo ta cainax huenicahintihqui, jascabi sca queyoyamanox manati jihuexon. Tiromajanibo rihbi ta cainax huenitihqui, jascabijaquin casticanahbo janoxon.

Hahan Jesus honanti

³⁰ Hehmebi tah hen jahuejati hahtipahyamahi. Papa nincaxon res tah hen jato casticantih. Jaa copi tah hen ponte-jaquin shinanxon casticanyaxihqui. Jaan hea yononixon shinanai quescajaquin tah hen jascajatihi. Heabi hen queenajah ta hen jayamahi.³¹ Hehqui heabi yohuanax cahen heen yohuan jahuabi hihyamahan.³² Hea jahua quin honanahbo ta huetsa yohuancoinihqui. Hea yohihi jan hihcoini yohuanai tah hen honanai.³³ Honancatsihquin man Juan qui raanah ta hihcoini jaa yohuancoinnishqui.³⁴ Jonibo res yohuanai joi ta hean nincayamahi. Papan mato tee-hihmanon hihxon res ta hen mato yohihi.³⁵ Johue quetejaha xabatai janin quescari tah man Juan qui caniqui, jahuen xaba chian sca basima jenimanoxon quescapi.³⁶ Heen papan ta hea teebo yohinishqui hean queyoxonnon. Jaa ta hen hahcai, hea papan raanni man honancoinnon hihxon. Hean hahcaibo ta hea yohihi joi quescia qui, hanhan hea honanti. Juaman yohini nincaxon hahan hea honantih bi hean hahcai jisxon hashoan sirijaquin honanti.³⁷ Hea raanni heen papan ta hehqui yohicoinihqui. Jan yohuanai tah man

jahuentianbi nincayamanihqui. Beron rihbi tah man jaa jisyamaniqui jahuentianbi.³⁸ Jaan raanni joni man nincacoinyamahiya ta maton jointi janin Papan joi yamahihqui.³⁹ Papan huishani joi jisquin sirijanahue. Hea yohihi joi ta jaa qui, hahan hea honantihu bi tah man hahan muhauataxma jihueta man shinanai.⁴⁰ Hean mato teehihmanon hehqui jotihi bi tah man jocatsiyamahi.

⁴¹ Jonibaan res hea Yotihos coshi mia quin hahti tah hen queenyamahi.⁴² Mato tah hen honanai. Noquen Papahon tah man queenyamahi.⁴³ Heen papan hea raanah hen jahui bi tah man hea Johue hahyamahi. Jaabaanbi shinanax jahuibo tah man Johue hahtihi.⁴⁴ ¿Jenquetsahaxon man mato qui siripi yohuanaibo benaxon man noquen Papan joi nincacointihin? Papa huesti noquen Dios hihqui bi tah man jaa siripi mato qui yohuanti man queenyamahi.⁴⁵ Heanbi noquen Papa maton hohcha yohipaqueyaxihqui shinanyamanahue. Mato cahenica ta Moisesnin huisha qui, hahan jihueta man shinanai que bi.⁴⁶ Moisesnin huishani joi nincacoinxon cah man hea rihbi nincaquehanai. Hehqui ta jaan huishanishqui.⁴⁷ ¿Jenquetsahaxon man heen joi nincacointihin, Moisesnin huisha rihbi nincacoinxonma bi? —jato Jesusen jaquin.

Cinco mil Jesusen pimahi

(Mt 14.13-21; Mr 6.30-44; Lc 9.10-17)

6 Jaa pecaho sca ta Galilea mai meha hian pohquejaqueti Jesus canishqui. Tiberias cahen jaa hiaman jane huetsa.² Papan coshiyaxon hisinaibo Jesusen rohajahi jisxon hichaxon Jesus chibancanquin.³ Mahchi manichish jano jahuen haxenicabo betan Jesus tsahopaqet. ⁴ Judiobaan pascua fiesta nea pishca sca jai.⁵ Jari jisxon hihti caibo hahqui jahui meraxon Felipe yocaquin:

—¿Jahuerahnon non piti marotihin jaabaan pinon?

⁶ Felipe tananoxon ta jascajanishqui, jaanbi piti caijanoxon bi yocaquin.
⁷ Jaatian:

—Doscientos libras non jai bi ta hahan paan marohah jato jatihixonbi piti senentimahiqui, hexti pishca cohren huesti hinanah bi —Jesus Felipenin jaquin.⁸ Huetsa rihbi jahuen haxenica jahui, Andres, Simon Pedron huetsa.

⁹ —Neno ta beronan jaiqui. ¿Pichca cebada paanya rabe tsatsa rihbi jan jai bi hen neatihu noquebo janon bi jaa jahuejatiquin? —Jesus jaquin Andresnin.

¹⁰ —Jato tsahopaqemanahue —Jesusen jaquin. Hani pasto jano jaiya, jano tsahopaquecani. Bebobos rahsi toponah ta cinco mil joni janishqui.¹¹ Jaatian jaa paan pishca bihxon Papa yocaxon tehcaxon tsahotaibo Jesusen hinanpaquequin. Tsatsa sca jascajaribiquin jaabo queenai tihi.¹² Yaniscaiboya:

—Texejaha teque romishin tsinquitannahue, jahuabi yohyocohyamanon —jahuen haxenicabo Jesusen jaquin.

¹³ Jascajaha tsinquieranquin. Pichca cebada paan pihibaan texejahi tequebo tsinquieron, doce tasa bohasacanquin.

¹⁴ Jascajaquin Papan coshiyaxon jan hahcái jisish:

—Nea coin ta Papan joi yohinica main joyaxihqui yohicanpahonishqui —nihqui pihia tsahotaibo.¹⁵ Jaton quiquin hapo sca hihnon jaa bichi jocatsihquiaan bi honanscaax mahchi janin jaa huesti Jesus caribibi.

Jesus jene benichi

(Mt 14.22-27; Mr 6.45-52)

¹⁶ Bepiscaya jaton nonti janin jahuen haxenicabo nihpaqueti cahi.¹⁷⁻¹⁸ Non-tin nanetax Capernaum quiri pohquejahqueti cahi. Yamescaya jato qui Jesus joriyamahi bi nihuen coshin behchon-

jaquin. ¹⁹ Basi huina huinaxon yame jisbaan bi hahchon hian benichi Jesus jahui, nonti hochoma sca. Hian benichai merahax rahtecani. ²⁰ Rahtetaibaan bi:

—Hea ta hen qui, raqueyamanahue —hihqui Jesus. ²¹ Jaatian nontin nanemacatsihquibo bi nococ ahinscacani, janoo jan cahi hoque quexa.

Jesus benahibo

²² Xaba paquescaya cahen hoque quexa banetipibaan benahah bi Jesus yamascai. Jahuen haxenicabo betan ta Jesus naneyamahipishqui. Jaabo rahsibi nontin cahi tah non jisipiqui. Jaa huesti nonti res ta jaipishqui, huesta yamahi. ¿Jahuenrahnon Jesus cahipishquin? hihxon benahahbo bi yamahi. ²³ Janoxon jan Papa yocaxon jato paan pimahipi hochoma sca Tiberias janinhax jahui nontibo nocoti. ²⁴ Jahuen haxenicaboyabi Jesus xahbanjahax, hahan behibo nontin sca nanetax, Capernaum janin jahui becani, Jesus benahi.

Jesus noquen hahan jihueti piti

²⁵ Pohquequihrani joxon Jesus meraxon yocacanquin:

—¿Jahuentian min neno jahuequin, maestron? —hahcanquin.

²⁶ —Yohicoin ta hen mato jai: Papan coshiyaxon hen mato hahxonai jisipixon bi tah man jaa copima hea benahi. Paan pih Yanitipixon copi tah man hea benahi. ²⁷ Queyonica piti copi teeyamanahue. Jahuentianbi queyoyamanox manatai piti copi teenahue. Noquebaque hihxon hen hinanyaxihqui piti ta jas-capah qui. Hea jascapa hinannica man honannon hihxon ta jahuen shinanyaxon hen hahnon Papan hea hinanihqui —Jesusen jato jaquin. ²⁸ Jan jascahiya: —¿Jahueja non jatihin, Papan tee hah-noxon? —hahcanquin.

²⁹ —Papan raanai joni nincacointi ta jaa tee qui —Jesusen jato jaquin.

³⁰ —¿Jahua hahan honanti min hah-cain, jisxon non nincacoinnon hihxon? ¿Jahueja min jain, Papan shinanyaxon?

³¹ Cahchihoxon ta noquen xenibaan maná piti pipahonishqui. Jaa yohihi ta Naihoh queha piti ta jato hinannishqui, pihabo, hih Papan huisha janin jaiqui —Jesus jacanquin.

³² —Mato tah hen yohicoinai: nai-hoh queha piti ta Moisesnin mato hinanyamanishqui. Heen papan caya ta mato naihoh queha piti coin hinanihqui. ³³ Jaan hinanai piti ta naihoh quehax botopaquetihqui, jaa pihx jihuetahb —Jesusen jato jaquin.

³⁴ —Jascapa piti noque hinanquin jeneyamaxahnhue, Hihbon —hahcanquin.

³⁵ —Hea ta hen hahan jihueti piti qui. Hehqui jahuibo ta picatsihyamas-catihqui. Hea nincacoinaibo ta jiricat-sihyamascatihqui, jahuentianbi. ³⁶ Hea jisxon bi tah man nincacoinyamahi hah cah hen mato jai. ³⁷ Heen papan hea hinanai tihibi ta hehqui joti qui. Hehqui jahuibo tah hen potatimahi, ni huestibi.

³⁸ Hea queenai quescajahi tah hen joyamaniqui. Hea raanni queenaijahi tah hen naihoh quehax botopaquetax joníqui.

³⁹ Ni huestibi manomaxonma tah hen jan hea hinanai jatihibi hean hueniyaxi-hqui nete queyoscanon. Hean jascajati ta hea raanni queenihqui. ⁴⁰ Jahuen baque jisxon jaa nincacoinaibo queyoyamanox manati ta heen papa queenihqui. Nete queyoscanon tah hen jato hueniyaxihqui —jato jaquin.

⁴¹ Jan jascahiya judiobo hahqui renren renreni. Naihoh quehax botopaqueni piti ta hea qui jan jaiya hahqui rainyamacani.

⁴² —¿Nea Jesus janeya joni Josepan baquema hin? ¿Jahuen papa, jahuen mama non honanyamahin? ¿Jenquetsa-

haquin sca Hea tah hen naihoh quehax paquenihqui hah noque jaiquin? — hihcani.

⁴³ Jaatian:

—Mato rahsibi yohuani renren renreyamanahue. ⁴⁴ Heen Papan Johue hahca ta hehqui jahuibo jahuiqui. Jan Johue hahyamaha cahen joti hahtipahyamahan. Hehqui jahuibo tah hen hueniayixihqui, nete queyoscanon. ⁴⁵ Papan honanmahibo rahsi ta jatihiqui; jascajaquin ta Papan joi yohinicabaan huis-hanishqui. Heen papa yohuanai nincaxon honanaibo jatihibi ta hehqui jotihiqui.

⁴⁶ Tsoanbi noquen Papa jisyamani que bi ta Papa janinha huestichin jaa jisnicaah qui. ⁴⁷ Hihcoinja ta hen mato jai: ninacoinaibo ta jahuentianbi queyoyamanox manatihqui. ⁴⁸ Hahan jihueti piti ta hea qui. ⁴⁹ Cahchihoxon maná piti pihax bi ta maton xenibo mahuanishqui. ⁵⁰ Naihoh queha piti pihax tah man mahuaya-mascatihi. Jascapa piti ta naihoh quehax botopaquetihqui. ⁵¹ Naihoh quehax botopaqueni piti mohitahpa ta hea qui. Jascapa piti pihax tah man queyoya-manox manascatihi. Hean hinanai piti ta heen yora qui. Mai mehabo jihueyaxahnon tah hen jato hinanai —jato jaquin.

⁵² —¿Jenquetsahaxon noque jahuen yora hinantihiquin, non pinon? —ihquish jaabo rahsibi judiobo join bahchinnanscrai. ⁵³ Join rehtenanaiboya Jesusen jato yohiquin:

—Yohicoin tah hen mato jai. Noquebaquen yora piyamaxon jahuen jimi rihbi xehayamahax tah man jihueyamahi. ⁵⁴ Heen yora pixon heen jimi rihbi xehahi noque ta queyoyamanox manatihqui. Jaabi rihbi tah hen hueniayixihqui, nete queyoscanon. ⁵⁵ Heen yora ta piti coin qui. Heen jimi rihbi ta xehati coin qui. ⁵⁶ Heen yora pixon heen jimi rihbi xehahi tah man heen hahberabetiboi qui, hea rihbi maton hahberabetai. ⁵⁷ Heen

papa ta jihuethqui. Hea ta raannishqui. Hea jaa copi jihuetai quescarihbi ta hea pihibo jihuethqui, hea copi. ⁵⁸ Jas-capah ta naihoh quehax botopaquetai piti qui. Noquen xenibaan piti pihax bi mahuanih quescayamahi. Nea piti pihax queyoyamanox manati, jascabi sca jihuenox manati, —jato jaquin. ⁵⁹ Caper-naum janin haho tsinquit xobohoxon ta Jesusen jato jascajaquin yohinishqui honanmaquin.

Queyoyamanox manati

⁶⁰ Jan yohuanai nincaxon:

—Honantima tah qui, jan yohuanai. ¿Tsoan nincatihquin? —ihqui hicha jahuen haxenicabo. ⁶¹ Jahuen haxenicabo hahqui renren renrenai jahuen jointinin honanxon jato yocaquin:

—¿Hen yohuanai nincacax man rahtetain? ⁶² ¿Janohax hen jonítón hen hahquirihbi hinahihnatái jisish cahran man hihti rahtetimahin? ⁶³ Dios Yoshiman ta mato jihuematihqui. Maton yora betan res tah man jahua bihtimahi. Hen mato yohihi joi ta yoshinyahpa qui, hahan jihueti. ⁶⁴ Hahan jihueti joi hen mato yohihah bi tah man caibaan nincacoinyamahi —jato jaquin. Jato jismenoxon ta tsoabo nincayosmabohin Jesusen honannishqui. Paranxon jaa bihmayaxihqui joni rihbi honanquin.

⁶⁵ —Jaa copi ta hen mato jascajahipiqui. Papan shinanyamahiya ta tsoabi hehqui jotimahiqui —hahquin. ⁶⁶ Jan jascaraiya ta hicha jahuen haxenicabaan jaa potabahinnishqui. Haxehi hahbetan nihyamascacani.

⁶⁷ —¿Maton rihbi man hea potabahincatsihquin? —jahuen doce haxenicabo Jesusen yocaquin.

⁶⁸ —¿Tsohqui non catihin nan, Hihbon? Mian tah min noque hahan queyoyamatí joi nincamahi. ⁶⁹ Mia Papan raanai jahuen caisti joni tah non mia ho-

nancoinai. Shinanquin sirijaquin tah non honanscrai —hahquin Simoman.

⁷⁰—¿Mato doce hen caisyamani-hquin? Mato quiha huesti ta tiroma yoshin qui —Jesusen jato jaquin. ⁷¹ Jan yohihi ta Judas qui, Simon Iscariotenin baque. Jahuen doce quiha hihxon bi Jesus bihmati shinanai joni.

Jahuen huetsabaan nincacoinyamahi

7 Jascahipish Galilea mai janin res Jesus nichi. Judea main nihcatsihyamascai, judiobaan rehtecatsihquiya. ²⁻³ Judiobaan tapasohoxon fiestajati nete nea pishcascaiya, jahuen huetsabaan Jesus yohiquin:

—Nenohax Judea main carestanhue, janoxon min hahcaibo miin haxenicabaan rihbi jisnon. ⁴ Sirijaquin jisibo hihxon ta jonexon tsoanbi jahuejayamahiqui. Papan coshiyaxon hahan honanti hahcatsihquin janibixon hahhue, jatihixonbi jisquin sirijahabo —hahcanquin. ⁵ Nincacoinyamaxon copi ta jahuen huetsabaanbi jascajanishqui. ⁶ Jesusen sca jato yohiquin:

—Caritima pari tah hen jai. Mato caya botannahue. Jahua copi hea manatima tah man jai. ⁷ Mato jistahihmajati ta mai mehabaan hatipahyamahiqui. Jaabaan tiromajahi hean hihcoinjaquin yohihiya ta hea jistahihmajacanihqui. ⁸ Fiesta janin botannahue, mato. Caritima ta hea jai. Queenax ta hea catihi.

⁹ Jato jascajaquin yohihax, Galilea main banetahbi.

Tapasax jihuetahbahibo janin Jesus cahi

¹⁰ Jahuen huetsabo fiesta janin cahipisca jaa rihbi cahi, caibaan jisnonma sca, janibima. ¹¹ Jonetax cahi bi fiesta janinxon judiobaan jaa benaquin:

—¿Jahuen jaa quin? —hahcanquin.

¹² Hihti caibo jaya baxex baxxi.

—Siri joni tah qui —hihqui caibo.

—Sirima ta qui. Jonibo ta paranhiqui —hihqui caibo rihbi. ¹³ Judiobo qui raquetax tsoabi coshin jaya yohuanyamahi, honahaxbi yohuancani.

¹⁴ Fiesta naexbi sca Papan xoboho mapexon Papan joi Jesusen haxemaquin. ¹⁵ Jan jascahiya rahtetax judiobo yohuani:

—¿Jenquetsahaxon neatohon huisha joi honanishquin tsoanbi quirica honanmanima bi? —hihcaci. ¹⁶ Jascahiton Jesusen yohiquin:

—Hen jato honanmahi ta heen joima qui. Hea yononihiton joi tah qui. ¹⁷ Papan shinanaijati hahcatsihquiaan ta honantihiqui. ¹⁸ Papan shinanaiya honanma hen jain? ¹⁹ Heanbi shinanxon honanma hen jain? Jaabaan ta hen yohuanai honantihiqui. ²⁰ Coshi joni hihqui shinanahbo hihquish ta jaabaanbi shinanax yohuanai jaiqui. Hea raanai heen Papa coshi hihqui honanahbo hihquish tah hen hea yohuanai. Jascapa yohuanica ta hihcoini yohuannica qui. Jahuabi tiroma yohuanyamahi. ²¹ ¿Maton nincati joi Moisesnin hinanyamanishquin? Ni huestichinbi tah man jaa joi nincayamahi, jaan hinanni que bi. ²² Hean mato jahua hahca man hea rehtecatsihquin? —Jesusen jato jaquin.

²⁰—Mia rah ta yoshiman hihbojahiqui. ²¹ Tsoan mia rehtecatsihquiquin? —hihcaci. ²² Jesusen jato yohirihbiquin:

—Hen hahcái huesti jisish tah man jatihibi rahtetai. ²² Jaanbi shinanxonma bi noquen xenibaan pari yohihah ta Moisesnin mato honantiyahpati yohinshqui. Tantiti netenbi tah man baquexo honantijahi. ²³ Moisesnin yohini quesjacatsihquin tantiti netenbi joni huetsa honantijanicaboxon ²⁴ jahua copi sca man tantiti neten hean huetsa joni rohajahiya man hehqui rainyamahin?

²⁴Beron jisxon res huetsa jonin shinan honanti shinanyamanahue. Shinanquin sirijaxon pari joni huetsa honannahue —jato jaquin.

Nai janinhax Jesus joni

²⁵Jasca jan jaiya caibo Jerusalen janinhahbo yohuanscái:

—¿Neama hin, rehtecatsihquibo joni? ²⁶Jistan. Janibi nichish yohuanai bi ta jahua hihyamacanihqui. ¿Cristo hihqui noquen cacannicabaan honancoinscainiquin? ²⁷Janobihax nea joni jahui tah non honanai. Cristo joni jahuiya roqui tsoanbi jahuerahnohax jaa jahuiquin hihxon honanyamayaxihcanihqui —hihcáni.

²⁸Jaa copi cahen Papan xobohoxon jato haxemahi sca Jesus coshin yohuani:

—¿Hea man honanain nan? Janobihax hea jóni man honanrihbíhi nan? Hehme mehax ta hen joyamaniqui. Hihcoinnicahton ta hea raannishqui. Jaa tah man honanyamahi. ²⁹Hean tah hen jaa honanai. Jaan hea raanah ta hen jaa janinhax joni qui —hahquin Jesusen. ³⁰Jasca jan jaiya xecotancatsihxon bi jaa bihxon rehteti siriymaparihiya tsoanbi meheyamaquin. ³¹Rehteti shinan caibaan jai bi hicha noquebaan Jesus nincacoinquin.

—Neatohon ta hahan honanti hahquiqui, hicha. ¿Cristo joxon, neatohon hahcai quescajaxon bi hashoan hicha rihbi hahan honanti hahtihiquin? —hahcanquin

Fariseobaan Jesus bihcatsihqui

³²Jascari baxexaibaan bi fariseobaan nincaquin. Nincaxon, sacerdote hapobo betan fariseobaan sca jaton porisiabo raanquin, Jesus bihtannahue hahxon. ³³Bihcatsihscáibo copi cahen jato yohiquin:

—Basima tahni sca tah hen mato betan hihtihi. Hea raanni janin sca hea cati

ta hochoma sca qui. ³⁴Hea benaxon bi tah man hea meratimahi. Hea cahi janin tah man cati hahtipahyamatih —jato jaquin Jesusen. ³⁵Jaabo rahsibi sca jidiobo yohuani:

—¿Jahuenbi cacatsihquiquin, non jaa merayamascanon? ¿Nahuabo qui caníbo janin cacatsihquiquin, nahuabo sca honanmahí? ³⁶¿Benaxon bi tah man hea meratimahi jan hihqui bi jahua hihcatsihquiquin? Hea cahi janin tah man cati hahtipahyamahi. ¿Jan jascari yohuani hen jahua hihcatsihquiquin? —hihcáni.

Jene mohini bahihi

³⁷Hahan fiesta queyotai neten, jaton hami netenbi, nichish Jesus coshin yohuani:

—Jiricatsihquish hehqui benahue, xehahi. ³⁸Hea nincacoinai joni janinhax ta jene mohini huean bahihihcamaxi-hihqui, jahuen jointi janinhaxbi, Papan huisha joi jai quescari —hahquin. ³⁹Jan jene yohihi ta Dios Yoshin qui, nincacoinaibaan bihyaxihqui Dios Yoshin. Jesus huenihihnriryamaxon ta jahuen yoshin Papan hinanyamaparinishqui.

Join bahchinanaibo

⁴⁰Jan jascari yohuanai nincacax tsinquijaquetaibo yohuanrihbíhi:

—Nea coin ta Papan joi yohinica qui —hihcáni.

⁴¹—Noquen hapo hihnon Papan caisai joni tah qui —hihqui caibo rihbi.

—¿Galilea mai janinhax Papan caisai joni jotihiquin? ⁴²David xohtahax ta David jihuepahoni janinhax Papan caisai joni picotihiqui, Belen jema janinhaxbi. ¿Jascayamahin, Papan huisha joi janin? —hahcanquin caibaan rihbi. ⁴³Jascapa mesco shinanyahpabohax join bahchinanascáani. ⁴⁴Caibaan Jesus xecotancatsihquin bi tsoanbi meheyamaquin.

Nincayamahi hapobo

⁴⁵ Jano sacerdote hapobo betan fariseobo manatai janin jaton porisiabo nocorihbihiton yocacanquin:

—¿Jenquetsahpa hin man hihueyama-hahquin? —hahcanquin.

⁴⁶ —Tsoabi ta jan yohuanai quesca jayamanishqui, jahuentianbi —hihqui jaton porisiabo sca.

⁴⁷ —¿Mato rihbi jaan paran paranaxquin? ⁴⁸ Maton hapobaan ni huestichin jaa nincayamahi ¿man jisyamahin? Fariseobaan rihbi ta jaa nincayamahihqui. ⁴⁹ Nea tsamatai rahsi ta yohitimabo qui, Papan huisha joi honanyamahibo —jato jacanquin fariseobaan.

⁵⁰ Nicodemo janeya Jesus qui johuanni joni jato betan hihxon jato yocaquin:

⁵¹ —¿Huetsa joni yohuanquihnxonmabi, jan hahcai rihbi honanxonma bi non jaa casticantihin? ¿Papan huisha joi janin jascajati joi jaiquin? —jato jaquin Nicodemonen.

⁵² —¿Mia rihbi tsi ra min Galilea mai meha quin? Papan joijisquin sirijaxon, Galilea mai janinhax Papan joi yohinica jotima honanhue —jacanquin.

Tsinihi haibo

⁵³ Janohax picotax, jatihibi jaton xoboho bocani.

8 Olivoyahpa mahchin sca Jesus cahi. ²Hihari sca Papan xoboho cahi. Jano sca roqui hahqui jatihibi joni tsin-quitaiton tsahoxon jato yohi yohinish. ³ Jan jato haxemahiya qui jaton haxemanicahbo betan sacerdote hapobaan qui huesti haibo hihuequin, joni huetsa betan hihqui qui meraxon. Jato tocan jaa nichinxon qui Jesus yocacanquin:

⁴ —Joni huetsa betan hihqui bi tah non nea haibo merahahqui, maestron.

⁵ Huishaxon ta Moisesnin yohinishqui,

nescapa non macaman tsacaquin rehtenor. ¿Mian cahran? ¿Jahua min mian yohihin? —hah qui jacanquin. ⁶ Jaton hapobo yohinoxon qui Jesus tanaquin jascajacanquin, hahqui yohuanti qui janon. Jasca jaabo jaiya qui cahcopaquexon qui jahuen metotinin mai huishaquin. ⁷ Jascabi yocacahbo qui huenixon qui jato yohiquin:

—Hohchajomaxon mato janinha hues-tichin macaman tsacamenonon —hah qui jato jaquin. ⁸ Cahcopiaquerihibixon qui mai huisharibiquin. ⁹ Jan yohihi nincacax qui yosibobo rahsi pari cahi. Jaa pecaho qui huesti huestibo cahi, jaa xobo janinhax caini. Jesus patax haibo huesti qui banenon. ¹⁰ Huenixon qui haibo Jesusen yocaquin:

—¿Jahuen bocanaxquin? ¿Mia tsoanbi casticancatsihyamahiquin? —hah qui jaquin.

¹¹ —Tsoanbi hihbon —hihqui haibo.

—Hean rihbi ta hen mia casticanyamahi. Caresscatanhue. Jahuentianbi hohchayamascahue —hah qui jaquin Jesusen.

Jesus noquen xaba hihbo

¹² Huetsa tian rihbi ta Jesusen jato yohinishqui:

—Jatihibi main ta hen hean jato xabajaxonai. Hea chibanaibo ta bahquisch chian nihyamahiqui. Hahan jihueta xabapan sca ta mayaxihcanihqui. ¹³ Jan jascajahiya:

—Mianbi shinanax tah min yohuan-resai. Chanicoин tah min jayamahi, no-quen nincatima hih —fariseobaan sca hahquin. ¹⁴ Jesusen sca jato pontequin:

—Jahuerahnokah jahuex jahuen sca hea catihin hen honanax yohuanai hen mato yohihi ta maton nincati qui, yohicoinai joi. Heabi yohihi hen yohuanai bi tah man nincacointi jai. Janohax jahuex hea jahuerahnokah man tah man honanyamahi. ¹⁵ Beron res jisxon

tah man joni huetsana jahuen shinan honanti shinanai. Jascajaquin shinanxon tah man casticannoxon Papan rahuibo yohiti shinanai. Hean ta hen tsoabi jascajaquin yohiyamahi.¹⁶ Yohixon tian tah hen hahcoinquin yohitihi. Hea raanni heen papa betan tah hen jaton shinan honanai, hea huestichin yohixonma bi hahbetanbi yohixon.¹⁷ Maton nincati joi janin ta nescapa huisha jaiqui. Rabechin yohihah pari ta yohuan coin qui, nincati.¹⁸ Rabe tah non qui hah ca hen mato jai sen. Hea yohihi heabi hihqui bi ta hea raanni heen papan rihbi hea yohihihqui —jato jaquin Jesusen.¹⁹ Jaatian:

—¿Jahuen hin, miin papa?
—hahcanquin.

—Hea honanyamaxon tah man heen papa rihbi honanyamahi. Hea honanxon cah man heen papa rihbi honanan —jato jaquin.²⁰ Janoxon Papa Dios coriqui hinnanti chiquehoxon ta Jesusen jato jascajaquin yohinishqui, Papan xobohoxon honanmaxon. Jahuen mahuati hora no-coriyamahiya tsoanbi meheyamaquin.

Jano jaa cahi janin jaabo catimahi

²¹ Jahuen Papa honanyamahibo copi jato hahquirihbi yohiquin:

—Hea tah hen cahi. Hea benahax bi tah man maton hohchayabi mahuatihi. Jano hea cahiton tah man catimahi —hahquin.²² Nincaxon bi honanyamahax sca:

—¿Jano hea cahiton tah man catimahi hihquish bi hahri rehtécatsihquiquin? —hihcami judiobo.

²³ —Mato tah man naman mehabo qui. Hea tah hen bochiquiha qui. Mato tah man nea xabapan meha qui. Hea tah hen nea xabapan mehama qui.²⁴ Jaa copi tah hen Maton hohchayabi tah man mahuatihi hah hen mato jaahqui. Hea hihqui shinanyamahax tah man maton hohchayabi mahuatihi —Jesusen jato jaquin.²⁵ Jan jascajahiya:

—¿Mia min jahua quin?
—hahcanquin.

—Jaa yohi tah hen mato jai.²⁶ Mato qui yohiti ta hen hicha jai. Mato casticanti rihbi tah hen hicha jai. Man tiromahibo bi ta hea raanni hihcoini yohuannica qui. Jan yohuanai nincaxon ta hen jaa joi rihbi main jihuetaibo yohihi —jato jaquin Jesusen.²⁷ Jahuen papa yohihi jan hihqui bi ta honanya-macannishqui.²⁸ Honanyamahiton Jesusen yohiquin:

—Hea noquebaque jihuin hueonxon pari tah man hea hihqui honantihi. Hehmebi jahuejaxonma bi papan hea yohini joi rahsi yohi hen jai tah man honantihi.²⁹ Hea raanni noque ta hehbe hihquiqui. Jaa queenai quescajaquin hen jai copi ta hea jeneyamahihqui.

³⁰ Jascajaquin jato yohihah hichaxon nincacoincanquin.

Papan baqueboya hina baquebo

³¹ Nincacoin ta jai hihquibo judiobo sca Jesusen yohiquin:

—Heen joi jascabijaquin nincacax tah man heen haxenicabo jacointihi.³² Hih-coin hen jani quen tah man honantihi. Jaa honanax tah man hinabomascatihu —Jesusen jato jaquin.

³³ —Noque tah non Abrahanen baquebo qui. Tsoanbi ta noque hinajayamanishqui, jahuentianbi. ¿Jenquetsahpahin min noque Hinaboma sca tah man jatihi min noque Jain? —Jesus jacanquin.³⁴ Jascaraiton jato yohirihbiquin:

—Yohicoин tah hen mato jai. Jati-hibi hohchataibo ta hina qui, hohchan-pan hihbojahah.³⁵ Hina ta xoboho jascabihi jihue jihueyamahihqui. Xobo hi-hbaan baque res ta jano jihuena qui, queyoyamanox mana jihuetai.³⁶ Papan baquen mato hohcha sohuaxona tah man hihcoini hinabomascatihu.³⁷ Abra-hanen baquebo man jai tah hen honanai.

Jahuen baqueboxon bi tah man hea rehtecatsihqui, maton jointi janin heen joi hihquicasquimahiya.³⁸ Heen papan hea jismahi ta hen mato yohihi. Maton rihbi tah man maton papan yohihi quescabijaquin hahcai —jato jaquin Jesusen.

³⁹—Noquen papa xeni ta Abraham qui —hahcanquin. Jesusen sca:

—Abrahanen baqueboxon tah man jahuen tee hahquehahnai.⁴⁰ Hea tah man rehtecatsihscai, Papan hea yohihi hen mato yohicoinh bi. Abrahanen ta jascajayamanishqui.⁴¹ Maton papan tee tah man hahcai —Jesusen jato jaquin.

—Noquen mama ta tsiniyamanishqui. Huesti res ta noquen papa qui, noquen papa Dios —hahcanquin.⁴² Jesusen sca:

—Papa Dios maton papa hihquiya tah man hehon queenquehanai. Papa Dios janinhax jonish tah hen hea jahui. Hehmbe i tah hen joyamaniqui. Jaan ta hea raannishqui.⁴³ ¿Jenquet-sahpahin man hen mato yohihah bi man honanyamahi? Heen joi nincayosmaboxon tah man honanyamahi.⁴⁴ Tiroma yoshin ta maton papa qui. Jaa queenai hahti res tah man maton rihbi shinanai. Noquebo jamenohitian rehtemis hihnish ta rahma caman jascabi rehtemis qui, maton papa. Jaabiyahpa quesamisax, jascabihi que-sahi. Quesa hihxon ta caibo sca que-samaribiqui. Hihti quesa, maton papa.

⁴⁵ Hihcoini yohuan hen jai copi tah man nincacoinyamahi.⁴⁶ ¿Tsoan man hea heen hohcha yohitihin? ¿Jenquet-sahpahin man hea hihcoini yohuanai bi man hea nincacoinyamahi?⁴⁷ Papan baquebo ta jahuen joi nincanicabo qui. Jahuen baquemaboxon tah man nincayamahi —Jesusen jato jaquin.

Abraham jariyamahiya Cristo jihue hihboni

⁴⁸ Jan jato jascajahiya:

—Mia tah min Samaria mai meha qui. Yoshiman ta mia hihbojahiqui. ¿Hihcoinja non mia jayamahin?

⁴⁹ Jascahahbo jato Jesusen yohirihbiquin:

—Yoshiman ta hea hihbojayamahiqui. Heen papa qui tah hen siripi yohuanai. Mato tah man hehqui tiromahi yohuanai.⁵⁰ Hehqui siripi yohuanainbo benahi ta hen joyamahi. Jatihibi shinan honanica ta jaiqui. Jaan ta mato yohihiqui, hehqui siripi yohuanxon.⁵¹ Hihcoinja ta hen mato jai. Heen joi nincacai jonibo ta mahuayamanox manatihqui —jato Jesusen jaquin.

⁵²—Mia yoshiman hihbojahi tah non honanscrai. Abraham ta mahuanishqui. ¿Papan joi yohinicabo rihbi hihni que bi min jascarain, Heen joi nincacai noque ta mahuayamanox manatihqui, hihqui?⁵³ ¿Mia min noquen papa yamanica Abraham mentan hashoan coshi quin? Papan joi yohinicabo rihbi ta mahuanishqui. ¿Jahua hihqui shinan mian jain? —Jesus jacanquin.⁵⁴ Jato Jesusen yohiquin:

—Hehqui siripi yohuanainbo benaxon tah hen jahuabi bihtimahi. Heen papa ta hehqui siripi yohuanahqui, Jaa ta noquen Dios qui hih man jai que bi.⁵⁵ Jaa man honanyamahi bi tah hen hean honanai. Mato quescapa quesamis hihquish pari ta hen Jaa ta hen honanyamahi hen jatihi. Jaa ta hen honanai. Jahuen joi rihbi ta hen nincacoinai.⁵⁶ Hea neno joyaxihqui honanax ta maton papa yamanica Abraham jenimanishqui. Hea jahui jisish sca ta coin coinnishqui —jato Jesusen jaquin.⁵⁷ Jan jascaraiya:

—¿Cincuenta bari jariyamaxon bi min noquen xohta yamanica Abraham jis-niquin? —judiobaan Jesus jaquin.

⁵⁸—Hihcoinja tah hen mato jai. Abraham cainrihyamahi bi tah hen hea janíqui —jato jaquin.⁵⁹ Jan jascaraiya,

tsacanoxon macan bichibaan bi jonetax
Papan xobo janinhax Jesus cainscrai.

Benche cainni joni Jesusen rohajahi

9 Jano huinoxon benche joni jisquin,
benche jahuen mamanbihni.

² Jahuen haxenicabaan sca yocauquin:

—¿Tsoa tsi ra hohchanishquin, Maestro,
benche hoa jahuen mamanbihni?
¿Jahuen papabo nan? Jaabi nan?
—hahcanquin.

³ —Jan hohchani copima ta qui.
Jahuen papabo rihbi hohchani que
ma bi tah qui. Papan coshiyaxon
jaa rohajahi jisíbo ta benche jahuen
mamanbihniqui. ⁴ Hea raanni
heen papan teebo jahti ta noque jai,
bari queya parihiya. Tsoabi teeti
hahtipahyamascanon ta yametihiqui.
⁵ Mai mehabo tocan jihuexon tah hen
jato xabajaxonai.

⁶ Jascajaxon mai qui toshbanhahxon
huaho berojaxon benche betsamxon
yohiquin:

⁷ —Siloé janeya noaho benashitanhue
—hahquin. Siloé ta raanah hihcatsi-
hiqui. Jascahah, cahax, benashitani
joquin jisbenascaquin. ⁸ Jan coriqui
yocacahtai jispahonibaan sca yocauquin:

—¿Neama hin, yoca yocauqui tsahop-
honi joni?

Jahuen hahbe jihuenehbaan rihbi jas-
cayaquin yocauquin.

⁹ —Jaabi ta qui —hahqui caibo.

—Jaamahax bi ra ta jaa quescapih qui
—hahqui caibo rihbi.

—Hea tah hen qui —hahqui jaabi sca.

¹⁰ Honancatsihquin sca:

—¿Miabi hihquish jenquetsahax min
bero sirscainquin? —hahcanquin.

¹¹ —Jesus janeya jonin huaho bero-
jaxon heen bero qui betsamxon hea
Siloé janin nashitanhue hahcrah tah hen
nashihi sca cahaqui jisresscanoxon —
hahqui.

¹² —¿Jahuen hin, jaa joni?
—hahcanquin.
—Hen ta hen honanyamahi
—hahquin.

Benche yoca yocacanquin

¹³ Benche hihpahoni joni fariseobo
janin sca bocanquin. ¹⁴ Tantiti neten
cahen Jesusen huaho berojaxon jahuen
bero rohajanish. ¹⁵ Fariseobaan sca
yocarihbiquin:

—¿Jenquetsahaxon miin bero roha-
jaxquin? —hahcanquin.

—Jaan heen bero qui huaho tsamanah
benashixon tah hen jisresscrai —jato
jaquin.

¹⁶ —Papa Diosen raanahma tah qui.
Tantiti neten jan tantibahinayamahi
copi tah non honanai —hihcanci caibo
fariseobo sca.

—¿Jenquetsahaxon hohchayahpa
jonin jascapa hahan honanti jatihquin?
—hihcanci caibo rihbi. Caibo huetsa
shinanya hihnon caibaan rihbi huetsa
shinanquin. ¹⁷ Benche hahquirihbi
yocacanquin:

—Mia ta bero rahonaxqui. ¿Mian jisi
jenquetsahpa joni quin? —hahcanquin.

—Papan joi yohinica tah qui
—hahquin. ¹⁸ Jan benche hihpahonixon
bi rahma pari jisi judiobaan
nincacatsihyamahi. Hihcoinai
shinanyamacanquin. Jahuen papa,
jahuen mama yocarihyamaxon hihcoini
jaa yohuanai shinanyamacanquin.

¹⁹ —¿Nea hin, maton baque, benche
ta cainnishqui hih man jain? ¿Jen-
quetsahaxon sca rahma jisiquin? —
hahcanquin. ²⁰ Jascahah:

—Jaa ta noquen baque qui,
non tah non honanai. Jan benche
cainni tah non honanrihbibi.

²¹ Jenquetsahaxon jan rahma jisiquin,
non tah non honanyamahi. Tsoan
jahuen bero rohajaxquin, non tah non
honanyamarihbibi. Jaabi yocanahue.

Hani sca ta jaiqui, jaanbi ta mato yohitihiqui.

²²Judiobo qui raquexon jahuen papan, jahuen maman jascajaquin. Ju-dioaan cahen jatihixonbi yohinish, Cristo tah qui hihquibo jatihibi tah non potati jai, noquen tsinquitit xoboho mapeyamascaábo, tsoanbi jato yohuan-quihnyamascaábo tah non jato potatihi, hahcanquin huesti shinanyaxon. ²³Ju-dioaan jascahipi copi raquetax:

—Jaa ta haniscai qui. Jaabi yocanahue —nihresi jahuen papa. ²⁴Jascaraiya, rabe coti sea benche jahuen maman bi-hní joni hahquirihbi quenamacanquin.

—Papa Diosen caya ta hea rohaja-haxqui hihhue. Hoa joni ta hohchamis qui, non tah non honanai —hahcanquin.

²⁵—Jahuen hohcha yamahihquin, hen ta hen honanyamahi. Nea res ta hen honanai: benchepahonixon bi ta hen rahma jisi —jato jaquin.

²⁶—¿Jahueja mia jaaxquin? ¿Jenquetsahaxon mia jismahaxquin? —hahcanquin.

²⁷—Moa ta mato yohihahqui. Hen yohihah bi tah man nincacatsihyama-hahqui. ¿Jahua copi man hahquirihbi nincacatsihquin? ¿Mato rihbi man jahuen haxenicabocatsihquin? —jato jaquin. ²⁸Jaa sinajascacanquin:

—Mia tah min jahuen haxenica qui. Noque tah non Moisesnin haxenicabo qui. ²⁹Papa Diosen ta Moises yohin-ishqui, non tah non honanai. Jahuer-ahnkahox hoa joni jonishquin, non tah non honanyamahi —hihcani. ³⁰Jaabo jascaraiya:

—Man jascaraiya tah hen rahtetai. Jahuerahnkahox jaa jonishquin man honanyamahi bi ta hea bero rohajahaxqui. ³¹Hohchamisbo ta Papan nincayamahi-hqui. Jaa tah non honanai. Papahon shinancoinaibo, Papa queenai quesca-jahibo, jascapahbo ta Papan nincaqui-hqui. ³²Tsoanbi ta benche cainni joni

bero rohajayamanishqui. Benche rohajahi ta tsoan jascajanima qui, nete ja-menomi tian, rahma caman. ³³Papa Dios betan hihyamaxon cahen Jesusen jahue-jatibi hahtipahyamaquehaniqui —jato jaquin.

³⁴—Mia tah min hohchaya bi res piconihqui. ¿Jascapahxon bi min noque honanmacatsihquin? Catanhue —hahxon picocanquin.

Jaton shinan xehpohibo

³⁵Catanhue hahcaibo joi nincaxon benche hihpahoni meraxon Jesusen yocaquin:

—¿Noquebaquen yohihah min nincacoinyamahin?

³⁶—¿Tsoa jaa quin, hapon, hen nincacoinnon? —hahquin.

³⁷—Hea min jisi tah hen qui, mihibetan yohuanai.

³⁸—Hean tah hen nincacoinai, hihbon —hixhon raboxonen nichish betihihpaqueti.

³⁹—Honanahbo tah hen naihoh que-hax joni qui, jisyamahibaan jisíbo, jisibó rihbi benche sca banenon —hahquin Jesusen. ⁴⁰Jan jascajahi caibo fariseobaan hochomaxon nincaxon yocacanquin:

—¿Noque rihbi non benche quin? —hahcanquin.

⁴¹—Benchehax tah man hohcha ya-maquehanai. Non tah non jisi man jai copi ta maton hohcha banetihqui —jato jaquin.

Carnero chique

10 —Hen mato yohinon nincanahue. Carnero chiqueho hihquicatsihquish xehpoti janimma bi huetsanco hinatax hihconica ta yometsoh qui, bichinmis joni. ²Xehqui janin hihconica ta carnero coirannicah qui. ³Jan hihconon ta xehpoti coirannicahton quehpenxoniqui. Jahuen carnerobaan rihbi ta jahuen

joi nincaquihqui. Jaan rihbi ta jaton Jane quenapaquexon jato cainmahiqui.
⁴ Jahuuenah rahsi jatihibi cainmaxon ta jato beboxoniqui. Jaton hihbaan joi nincaxon ta carnerobaan chibanihqui.
⁵ Huetsa joni cahen chibanyamacanquin, jahuen joi honanyamaxon. Jato bichi huetsa jahuiya cahen jabarescani —Jesusen jato jaquin.
⁶ Honanahbo jato jascajaquin yohihah bi nincayamacanquin. Jan yohanai honanyamacanquin.

Jesus noquen coirannicah siri

⁷ Jaa copi jato hahquirihbi yohiquin:
—Man honannon hihxon tah hen yohihi: hea tah hen carnero janot hihcoti quescapa qui. ⁸ Hea joriyamanon jonibo ta yometsohbo qui, bichinnicabo. Carnerobaan ta jato nincayamanishqui. ⁹ Hea tah hen janot hihcoti quescapah qui. Hea janin hihcohibo ta queyoyamanox mananicabo qui. Hihcohax ta picorihbihihqui, jaton piti rihbi pishinyamahi.

¹⁰ Yometsohti res ta yometso jahuiqui. Retehi rihbi jahui. Masajahi rihbi jahui. Jihuetahbota tah hen hea jahui, siripi ji-huetahbota. ¹¹ Hea ta carneroba coirannicah siri qui. Siri coirannicahton ta jahuen carneroba jeneyamahihqui, retehibaan bi. ¹² Jahuuenah que ma bi carneroba coirannon hihxon copijaha janin cahen hino jahui jisish carneroba potabahini caresi, coirannicah hiyamahax copi. Hinon sca cahen hahchixon jato jabisjaquin. ¹³ Coriqui copi coiranhue hahca bi cahen joni jebatih, carnero-hon shinanyamaquin.

¹⁴ Hea tah hen carnero coirannica siri qui. Henabo tah hen hean honanai. Henabaan rihbi ta hea honanihqui. ¹⁵ Heen papan hea honanai quescajaquin tah hen hean rihbi heen papa honanai. Carnero mahuayamanon hihxon tah hen paxajaquin hehri jaton sinatahbo hean re-

hemahi. ¹⁶ Hea ta huetsa carneroba jaribih, nea chiquehoh quehama. Jaabo rihbi beti tah hen jai. Heen joi ta nincayaxihcanihqui, huesti repinica res janon, coirannicah rihbi huesti res.

¹⁷ Hahquirihbi teehihnoxon tah hen heen jihuetahbota jihuemon hihxon jaton sinatahbo paxajaquin hehri retemahi. Jaa copi ta heen papan hehon shinanihqui. ¹⁸ Tsoanbi ta hea reteresymahiqui. Heanbi shinanxon tah hen hehri jato retemahi. Heanbi shinanax ta hen hahquirihbi teehihtih, jascahue heen papan hea janí —Jesusen jato jaquin.

¹⁹ Jan jascajaquin yohihah, caibo judiobo huetsa shinanya janon caibo rihbi huetsa shinanya hihqui. ²⁰ Mesco shinanya hihquiaan bi hichaxon caibaan yohiquin:

—¿Jahua copi man hashoan nincatin? Yoshinyahpa tah qui. Tehquehiah ta jaa jaiqui.

²¹ —Jan yohihi joi ta yoshinyahpa jonihamo qui. ¿Yoshiman benche jismati hahtipahiquin? —hahcanquin caibaan rihbi.

Jesus queenyamahibo judiobo

²² Jene tian sca jaiya cahen Jerusalen janin judiobaan fiesta jai, Papan xobo jato behnajaxonnihbo copi fiestajacanquin. ²³ Jaa xoboho sca Jesus nichi, Salomon janeya chiquehoh. ²⁴ Hahqui tsinqui jaquexon yocacanquin:

—¿Jahuentian caman min noque honancasquimamatihin? Cristo hihxon, Hea ta hen Cristo qui hahquin noque yohiquin sirijahue —hahcanquin.

²⁵ —Moa hen mato yohihah bi tah man hea quescahi shinanai. Heen papan hea Jascabajue hahca hen hahcaibo ta jaa jisxon hahan hea honanti qui. ²⁶ Jaabi tah man nincayamahi, heen repinica janinhahmaxon copi. ²⁷ Hean quenahah ta heen carnerobaan hea nin-

caquihqui. Hean rihbi tah hen jato honanai. Hea ta chibancaniqui.²⁸ Hean tah hen jato teehihmahi, queyoya manox mananon, jahuentianbi manoya manon. Heen mequeman hen xecohibo ta tsoanbi hea bichintimahihqui.²⁹ Heen papan ta hea jato hinanihqui. Jaan ta jatihibi mahuiniqui. Jaan xecohi ta tsoanbi mebichintimahihqui.³⁰ Heen papa betan tah hen huesti yora qui — jato jaquin Jesusen.

³¹ Judiobaan sca ta macan bihribinshqui, Jesus rehtecatsihquin hahan tsacanoxon. ³² Macan bichiton jato yohiquin:

—Hen hicha siri hahcaibo tah hen mato jismasci, Papan hea Siribojahue hahcah. ¿Jahuemeha hen hahcai copi man hea rehtecatsihquin? —jato jaquin.

³³ —Min siribo hahcaima bi min Papa Dios qui tiromahi yohuanai copi rahan. Mia jonihax bi Diosax quescapi yohuanai copi —hahcanquin. ³⁴ Jesusen sca:

—¿Davidinin huishani joi janin nea huisha yamaquin? ¿Mato tah man diosbo qui hah ta hen mato jai hahquin huishayamanishquin?³⁵ Papan huishamani ta tsoanbi huetsajati hahtipahyamahiqui. Jato yohihi Mato tah man diosbo qui Papa janí que bi man hehqui rainyamascaín?³⁶ ¿Hea ta hen Papa Diosen baque qui hen jai copi man Dios qui tah min tiromahi yohuanai hah man hea Jain? Baquen hahxon Papan hea naihohxon raanni que bi ¿man jascarain?³⁷ Heen papan teebo hean hahyamahiya hea hihcoinai shinanyamanahue.³⁸ Hen hahcoinaiya, hean mato yohiha copi que ma bi hean hahcai jisxon copi hihcoinai shinannahue. Jascajaquin tah man honanxon nincacointihu, hea janin heen papa hihqui, hea rihbi heen papa janin hihqui —hahquin.³⁹ Jascajiton jaabaan hahquirihbi bihcatsihqui bi cahi, mequen sca cahabo.

⁴⁰ Jaatian sca cahax Jordan huean hahquirihbi pohquejaquetax, janoxon Juaman nashimamenoni janin cahi. Cahi nocotax janobi sca baneti. ⁴¹ Jano sca hihqui honanax ta hihti caibo hahqui nocoti bocannishqui.

—Juaman ta hahan honanti hahyamanishqui. Hahyamahax bi ta hihcoini nea joni qui chaninishqui, jatihibi jan yohini quescabi ta nea Jesus jaiqui —hahcanquin. ⁴² Janoxon sca hichaxon nincacoincanquin.

Lázaro muhuatai

11 Betania jema janin ta Lázaro janeya joni jihuapehonianishqui, janu María jahuen hohshi Marta betan jihuetai jeman.² Jaa Marianen ta hahan hinintinin noquen hihbo tachixon jahuen boon tasonishqui. Jahuen roha cahen Lázaro. Lázaro cahen hihti hisini.³ Hisinaiya ta jahuen chocabaan huetsa joni raannishqui:

—Min hahan shinanai joni ta hisiniqui, hihbon —yohihi canon.⁴ Yohiha Jesusen yohiquin:

—Mahuanoxonma bi ta hisiniqui. Papa Dios nete hihbohi jisibo ta hisiniqui. Hea Papan baque xaba hihbohi honanahbo ta hisiniqui —jato jaquin Jesusen.⁵ Jaabo ta Jesus hihti queenpanishqui, Marta, jahuen huetsa, Lázaro rihbi.⁶ Jan hisinai honanax bi janobi rabe neten hihribihi.⁷ Rabe neten hixhon sca jahuen haxenicabo yohiquin:

—Judea main hahquirihbi canon bonahue —hahquin.⁸ Jascahah:

—¿Rahma pishca mia janohahbaan macaman tsacaquin rehtecatsihquipi que bi min hahquirihbi caribcatsihquin, Maestron? —jahuen haxenicabaan Jesus jaquin.

⁹ —¿Huesti neten doce hora yamahiquin? Bariyahpan nichish tah non joxcorohyamahi, bari xaba jisish.

¹⁰ Yame nichish tah non joxcorohtai,

jano nihti jisyamahax —jato jaquin.

¹¹ Jato jascajaxon:

—Noquen huetsa Lázaro ta hoxahihqui. Mohini tah hen cahi —jato jaquin.

¹² —Hoxahax ta hahquirihbi rohatihiqui, hihbon —hahcanquin jahuen haxenicabaan. ¹³ Lázaro mahuatipi Jesusen yohihi bi hoxaresai shinancanquin. ¹⁴ Jaa copi ta jato sirijaquin sca yohinishqui:

—Lázaro ta mahuatipishqui. ¹⁵ Jahuerohahi tah hen hea janohiyamahipiqui, man honancoinnon. Man nincacoinnon hihquish ta hen janohiyamahipiqui. Jaabi, jisnon bonahue —Jesusen jato jaquin.

¹⁶ —Noque rihbi canon bonahue, hahbetan mahuanoxon —hahquin Tomasen, rabe nane hahcaibo Tomasen.

Jesus noquen teehihmanica

¹⁷ Nocoxon sca chosco neten sca tsahonipibo yohihibo Jesusen nincaquin.

¹⁸ Betania ta Jerusalen hochoma qui, media hora taken cahah. ¹⁹ Jaa copi ta janohax hihti caibo judiobo Marian xoboho bocannishqui, janohax hihti caibo Marian xoboho. Jaton roha mahuatipi quen manahi bocani. ²⁰ Jesus nocoti jahui yohiha jaa behchihi Marta cahi, xoboho María banenon.

²¹ Behchixon yohiquin:

—Mia neno hihquiya ta heen roha mahuayamaquehanihqui, Hihbon. ²² Jan mahuatipi que bi ta min Papa yocacai rahsi mia hahxontihiqui. Hen tah hen honanai —hahquin.

²³ —Roha ta huenirihbitihiqui —hahquin Jesusen.

²⁴ —Nete queyotaiya Papan noque Hueninahue hahca ta huenirihbiyaxihiqui. Hen tah hen honanai —hahqui Marta. ²⁵ Jesusen sca:

—Hea ta jato hueninica qui, teehihmanicah. Hea nincacoinai joni ta mahuatax bi teehihribitihiqui. ²⁶ Jihuexon hea

nincacoinai joni ta queyonox jascabi mahuatah jatimahiqui. ¿Mian min hea hihcoinai shinanyamahin? —hahquin Jesusen.

²⁷ —Hen tah hen mia hihcoinai shinanai, Hihbon. Mia tah min Cristo qui, Papan baque. Mia tah min naihoh quehax jonicah qui. Min hihcoinai tah hen shinanai —hahquin Martan.

Lazaroya Jesus huaohihqui

²⁸ Jascajaquin yohihax jahuen shara quenahi cahi. Nocoxon hexti pishca join jahuen shara yohiquin:

—Honanmanicah ta nocoscáiqui. Mia ta quenamahiqui —hahquin. ²⁹ Nincacax, histon huenicahuanax, picotax cahi. ³⁰ Jema janin cahen Jesus nocorihyamahi, janohax jahuen shara yohiquin:

³¹ Maria histon huenicahuanax picotai jissón, Tsahon janin ta huinihi cahiqui hihxon jaa manahibaan chibankin.

³² Jesus janin María nocoxon, mera-hax, Jesusen tahe naman betihhpaqueti.

—Mia neno hihquiya ta heen roha mahuayamaquehanihqui, hihbon —hahquin huaohihhanan. ³³ Jaa huaohihquiya hahbe jahui judiobo rihbi huinihiya, jahuen jointi hihti xecahihniquin. Masa shinanscaquin.

³⁴ —¿Jahuen man tsahonipiquin? —jato jaquin.

—Jisihue, hihbon —hahcanquin.

³⁵ Jesus huaohihscái. ³⁶ Huaohihqui jisish:

—Jise. Hahan ta hihti shinanihqui —hahquin judiobaan.

³⁷ —¿Benche jismahipixon cahra nea rihbi mahuayamanon rohajati hahtipahyamaquehahnipishqui? —hahcanquin caibaan rihbi.

Lázaro teehihribihi

³⁸ Jesus sca hahquirihbi jointi hihti xecahihnihax tsahon janin nocoti cahi.

Tsahonxon macan champanin behpohipibo janin nocoti.

³⁹—Macan janabohannahue —jato jaquin Jesusen.

—Neatian ta pisisciaqui, hihbon. Chosco nete sca tah qui jan hihquipi —hahquin Martan, yamanicaton chocan.

⁴⁰—¿Hihcoinai shinanxon tah min noquen Papa nete hihbohi jistihi hen mia jayamahaquin? —Jesusen jaquin.

⁴¹ Jaatian sca macan janabohancanquin. Bochiqui sca jisxon:

—Papan, hen yocacah tah min nincacai. Hahxon tah min hea jai. ⁴² Hen yocacai tihibi tah min nincacai. Hen ta honanai. Jaabi, nea neno nichibaan nin canon hihxon tah hen mia yohihi, mian min hea raanni hihcoinai shinanahbo —hahquin. ⁴³ Jascajaxon coshin bi res quenaquin:

—Lazaron, picohue —hahquin. ⁴⁴ Jaatian sca hihquipi joni picoti. Jahuen mequen, jahuen tahe chopas quexen yabi yabihah, payoman rihbi bebepohipibo.

—Pecanahue, jan nihtatahnnon —Jesusen jato jaquin.

Jesus bihnixon yohinanaibo

(Mt 26.1-5; Mr 14.1-2; Lc 22.1-2)

⁴⁵ Jan Lázaro teehihmahia jisxon María manahi jahui judiobaan sca hihti cai boxon nincacoinquin. ⁴⁶ Caibo rihbi jaton hapobo yohihi bocani. Nocoxon, Jasca ta jaaxqui, hahcanquin. ⁴⁷ Yohihah sacerdote hapobo betan fariseobo tsinquit, hapobo rahsi.

—¿Rahma can? ¿Non jahuejatihin? Hoa jonin ta hahan honantijahiqui, hicha. ⁴⁸ Jan jascajaresnon non jahua hahyamahiya ta jatihxionbi jaa sca chibanyaxihcanihqui. Romanobo sca joxon ta noquen janoxon Papa Dios yocati xobo pohtastihiqui, noquen jihuetaibo rihbi ta noque bichinyaxihcanihqui —hahcanquin.

⁴⁹ Huesti joni sca jato tocan nihinati, Caifas janeya joni. Sacerdotebaan hapo hihxon jato yohiquin:

—Maton tah man jahuabi honanyamahi. ⁵⁰ Huetsa jonio jihuemon huesti joni muhuatah ta siri qui. Noquen jihuetaibo jatihibi queyoyamanon jascatihbi bi tah man honanyamahi —jato jaquin. ⁵¹ Hahmebi shinanxonma ta jascajanishqui. Jaa bari tian sacerdote hapo hihxon ta honanxonma bi jayaxihqui joi yohinishqui. Jaton caibo jihuemon Jesus muhuatihi yohihi. ⁵² Jaton caibo res jihuetaibo Jesus muhuayamahi. Hocho hocho jihuetai Papan baquebo tsinquinoxon cahen Jesus muhuati, jato huesti yorajanoxon. ⁵³ Caifas jascari yohuanipiya sca Jesus rehtenoxon yohinan yohinancani, jatihibi neten.

⁵⁴ Jaa copi ta judiobaan jisnonma sca jonetax Jesus nihnishqui. Janohax carresscái, chiponqui. Jano tsoa yamahi hochoma, Efrain janeya jeman sca nocoti. Jano baneti jahuen haxenicabo betan. ⁵⁵ Judiobaan pascua fiesta hochomascaiya ta hocho jihuetaibo Jerusalen janin bocannishqui. Jaton rishta sohuamahi bocani, janin pascua fiesta noconon hihquish. ⁵⁶ Nocoxon Jesus benacanquin. Papan xoboho hihquihax yohinancani:

—¿Fiesta janin jaa jotimahiquin? ¿Jahua min shinanain? —yohihahnancani. ⁵⁷ Jasca jaibaan bi jaton hapobaan jato yohiquin:

—Jano jan hihqui honanxon, noque yohinahue, non porisia bihmanon —jato jaquin.

Jesus tachocai haibo

(Mt 26.6-13; Mr 14.3-9)

12 Pascua fiesta joti seis nete pishi naiya cahen Betania janin Jesus joribibi. Jano Lázaro jihuetai jema, muhuatipi que bi jan hahquirihbi tee-

hihmahipi.² Jesus nocoscaya pitijacanquin, hichaxon piti. Martan cahen jato piti metexxonquin. Misaxon Jesus betan pihibo tocan sca Lázaro tsahoti.³ Marian sca nardo hahan hininti pomo bocho bihxon Jesus tachiquin. Hihti copi, hahan hininti. Tachixon, jahuen boon sca tasoquin, jatihobi xobo hinin potonon.⁴ Jaatian sca jahuen haxenica Judas Iscariote, Jesus paranxon bihmayaxihquiton yocaquin:

⁵—¿Jenquetsahpahin jahuen hininti tres mil soles copi maromayamahaxquin, jahuaborajomab sca hinannoxon? —jato jaquin Judasen.⁶ Jahuaborajomabohon shinanxon copima jaan jato jascajaquin. Yometso hihxon copi jascajaquin. Jaa rihbi jaton coriqui coirannicahax ta jaton coriqui rihbi yometsohpahonishqui.⁷ Jesusen sca Judas yohiquin:

—Jenehue. Hea muhataiya hahan hea hininjati ta hea hininjaxonihqui, jenehue.⁸ Mato janin ta jahuaborajomab jascabi jatihiqui. Hea tah man yamajayaxihqui —jato jaquin.

Lázaro rehtecatsihqui

⁹ Jan janu hihqui honanax tsama bi res judiobo jaa jisi bocani. Jesus huestima bi Lázaro rihbi jiscatsihqui bocani, hihqui que bi hahquirihbi huenihipi joni jiscatsihqui.

¹⁰ Jaa copi ta Lázaro rihbi rehteti shinanscacannishqui, jaton hapobaan.¹¹ Lázaro copi hichaxon judiobaan jato potabahinxon Jesus sca nincacoainaboya ta jaton hapobo sinanishqui. Jaa copi ta Lázaro rihbi rehtecatsihscacannishqui.

Jerusalen janin Jesus hihcohi

(Mt 21.1-11; Mr 11.1-11; Lc 19.28-40)

¹² Huetsa neten sca ta fiestajahi bohibo tsinquihihnhanishqui. Fiesta janin ta Jesus jahuiqui hahquin yohihahbo nincacanquin.¹³ Honanax binon pehi bi-

hbahinax Jesus behchihi bocani. Que-nacanahi bocani:

—Hosanná. Nete hihbaan raanai joni ta jahuiqui, israelibaan quiquin hapo. Papan shinanyahpa tah qui —hihcanahi bocani.

¹⁴ Jascahibaan bi cabacho baque merahax jaa cahtsahotax Jesus jahui. Jan jascanon ta huishani joi jaiqui:

¹⁵ Raqueyamanahue, Sion jema baquebon. Maton quiquin hapo ta jahuiqui, cabacho baque cahtsahotax.

¹⁶ Jaa huisha joi nincamenoxon ta jahuen haxenicabaan honanyamanishqui. Jan naihoh cahipi cahchiqui ta jan jascayaxahnon huishani joi jai shinancannishqui. Jaatian pari ta honancannishqui, Jesusen hahyaxihqui jaabaan huishani honanscaquin.

¹⁷ Caibo jascari quenacananon cahen caibaan yohibonaquin. Lázaro muhautipi bi ta picohue hahxon jan hahquirihbi teehihmahí non jisipiqui hahbonaquin.¹⁸ Papan coshiyaxon Jesusen jascajaquin hahquipi nincacax tsinquijsquetaibo jaa behchihi bocani.

¹⁹ Bohiboya sca:

—Jisnahue. Non tah non jahuabi hahyamahi. Jatihixonbi ta jaa chibancaniqui —hahcanquin fariseobaan sca.

Jesus benahi nahuabo

²⁰ Caibo fiesta janin bohibo ta jaton nahua quescapahbo sca janishqui.

²¹ Felipe cahen Betsaida jema janinhah, Galilea mai meha. Felipe qui caxon, jaa nahuabaan yocaquin:

—Noquen tah non Jesus jiscatsihqui, hapon —hahcanquin.²² Andres yohihi sca Felipe cahi. Yohihax, Felipe betan sca cahi, Jesus yohihi. Yohihah bi:

²³—Hea noquebaque Papan shinanya hihqui ta rahma jisnoxihcanihqui.

²⁴ Nincanahue hen mato yohinon. Main paqueyamahax ta bimi bero

jaa huesti banetihqui, queyoyamahi. Banahoh queyotax pari ta bimi hicha caichihqui.²⁵ Mahuapaho hihxon Papan joi bihcatsihyamahibo ta mahuatihqui. Non main res jihuetah ta jahuama qui hihquibo ta queyoyamanox manatihqui, jihuecointi.²⁶ Heen hahxontibo ta hea chibanti jaiqui. Jano hea hihquiton tah heen jonibo rihbi hihtihqui. Hea hahxonai jonibo qui rihbi ta heen papa siripi yohuanyaxihqui.

Mahuanoxihqui Jesusen yohihi

²⁷ Rahma tah hen masa shinanai. ¿Jahua hen yohitihin? ¿Janoxihquibo tiromabo hea cahnemahue Papan, hih hen jatihin? Hihyamahi. Hea janoxihquibo copi tah hen nea nete qui noconihqui. ²⁸ Papan, mia nete hibbo shinanahbo jahue —hahquin Jesusen. Jaatian naihoh quehax yohuanai nincacanquin.

—Jascajaxon tah hen hahribitihi —hihqui. ²⁹ Hochomaxon nincacax tsama-jaquetaibo yohuani:

—Terenihih ta jaiqui —hihcani.

—Papan yonoti ta hahbetan yohuani-hqui —hihqui caibo rihbi.³⁰ Jesusen sca jato yohiquin:

—Maton honanon hihquish ta yohuanihqui, hean honanon hihquishma.³¹ Mai mehabaan hohcha casticanti hora ta nocoscainqui. Rahma ta mainxon yononica yoshin naman potapauenoxihqui. ³² Hea jihuin hueonihhnipibo tah hen jatihibi jonibo hehqui jomatih —jato jaquin.³³ Jihuin hueonahbaan jan mahuanoxihqui honanahbo hihxon jato jascajaquin yohiquin. Tsamajaquetaibaan sca yocaquin:

³⁴ —Cristo roqui queyoyamanox manayaxihqui. Huishanibho joi roqui jascari jai. ¿Jahua copi sca min Noquebaque ta hueonihhnixihcanihqui hah min noque Jain? ¿Noquebaque min hi-

hqui tsoa quin? —hahcanquin.³⁵ Jesusen jato yohiquin:

—Basimaxon sca tah man xaba jisti jenexihqui. Xaba chian nihnahue, jani yamenon. Bahquish chian nichi jonin ta jahuen nihti honanyamahihqui.³⁶ Xaba jaxon jaa xaba nincacoinnahue, xabapan baquebo janoxon —jato jaquin. Jato jascajahax, caresscái, jaabaan jisyamascanon.

Nincacoinyamahi judiobo

³⁷ Jaton jisnon bi hicha hahan honanti jan hahcai bi nincayamacanquin.

³⁸ Papan joi yohinica Isaíasnen yohini quescapahbo:

¿Non yohihah bi tsoan nincaquihqui, hihbon? ¿Nete hihbaan jahuen coshi jato jismahah bi tsoan nincaquihqui?

hihqui jaa huisha joi.³⁹ Jascapahboxon copi ta nincacoinyamacannishqui. Huetsa joi rihbi ta Isaíasnen huishanishqui:

⁴⁰ Jaton beron jismis hihquish ta benchecahincaniqui. Jaton jointinin nincacoinmis hihquish ta jaton jointi xehpocahiniihqui, hean jato rohajamis hihxon ta jaton shinan huetsajacaniqui

hihqui.⁴¹ Papan xaba jisxon ta jasca-jaquin Isaíasnen huishanishqui. Jasca ta Papa jaiqui jato japhalonixon jascajaquin sca huishaquin.

⁴² Jaabi Jesusen yohihah hichaxon nincacoincanquin. Caibo jaton jonibaan rihbi nincacoinquin. Nincacoinxon bi fariseobo qui raquexon tsoabi yohiyamacanquin.

—Tsoanbi noque yohuanquihnyamas-canon noquen tsinquitx xoboho noque mapemayamascacanmis —hihcani.

⁴³ Papan hea siri jisnon yohipan hihtih bi hapobaan hea sirijaquin yohuanquihnnon tsoabi yohiyamapan hihxon yohiyamacanquin.

**Nincayamahiboya Papan
jato casticanyaxihqui**

⁴⁴ Jaabo netetai bi coshin bi res Jesus yohuanai:

—Hea nincacoinax hinamehtaibo ta hehqui hinamehyamahiqui. Hea raanni qui caya ta hinamehtiqui.
⁴⁵ Hea jisi jonin ta hea raanni rihbi jisiqui. ⁴⁶ Jato xabajahi tah hen nai naman joniqui, hehqui hinamehtaibo bahquish chian baneyamanon.
⁴⁷ Hea nincaquin bi nincaresaibo tah hen heanbi casticanyamahi. Mai mehabo casticannoxonma bi tah hen jato teehihmahi joníqui.

⁴⁸ Hea Johue hahyamaxon, heen joi rihbi nincacatsihyamahibo ta honantiyahpabo qui. Hean yohihi joi ta hahan jascapahbo honanti qui, nete queyoscaya. ⁴⁹ Hehmbebi shinanax ta hen yohuanyamahi. Hea raanni heen papanbi ta hea yohihiqui. Jascari yohuanhue, jaa yohihue hea jaquin. ⁵⁰ Jahuentianbi queyoyamanox manati jato jihuemahue hih ta jaiqui. Jaa copi ta heen papan hea yohihi quescabijaquin hean mato yohihi —jato jaquin Jesusen.

Jahuen haxenicabo Jesusen tachocai

13 Pascua fiesta nocorihyamahi bi mai jenebahini Papa qui cati sca jan jai Jesusen honanquin. Jahuen joni-bohon shinanaxon mahuanoxon caman jatohon shinanaxin.

² Pascua piti piriyamahiboya cahen Judas, Simon Iscariotenin baque, tiroma yoshiman bihxon tiroma shinan jahuen jointi janin niascaquin, Jesus paranxon bihmanoxahnnon. ³ Pascua piti pihi tsin-quiscacani, Jesus jahuen haxenicabo betan. Mian sca jato jatihibi hihbojahue Papan jai cahen Jesusen honanquin. Jahuen Papa janinhax jonish bi hahquir-ihbi hahqui cahi cahen honanrihbiquin.

⁴ Misa janinhax huenixon sca jahuen tari potahax hani payoman chinexehti. ⁵ Bandeja qui jene chicoxon jahuen hax-enicabo tachoquin. Tachoxon hahan jan chinexehtai payoman sca jato tasoquin. Jascajaquin jato tachopaquequin.

⁶ Simon Pedro qui nocoquihranscái.

—¿Hea rihbi min tachocatsihquin, Hihbon? —hahquin Simoman.

⁷ —Hen mia tachoca jahua hihcatsihquiquin, rahma honanxonma bi tah min huetsa tian pari honanyaxihqui —hahquin Jesusen.

⁸ —Hea tah min jahuentianbi tachotimahi, hihbon —hahscaquin Pedronen.

—Hen mia tachóyamahah tah min henama sca jatihi —hahquin Jesusen.

⁹ —Hea tachoxon mepanxon manashimarihbihue, Hihbon —hahscaquin Simon Pedronen.

¹⁰ —Nashitanax ta tsoabi nashiti pishinyamascaiqui, tachoquiti huesti pishini, jatihibi rishtama sca hihnoxon. Mato tah man rishtajomaboscai, hihcax bi jatihibima —jato jaquin Jesusen.

¹¹ Jesus parannoxihqui joni honanxon copi jato jascajaquin, jatihibima jaquin. ¹² Jato tachocatin queyoxon jahuen chopa sahuerihbihax jahuen tsahotinin tsahopaquexon jato yocaquin:

—¿Jahua man haxenon hihxon hen mato tachocain? ¿Man honanyamahin?

¹³ Hihbon, Honanmanican, hah tah man hea quenaquin jai. Hahcoinquin. Jaa tah hen qui. ¹⁴ Maton hihbo, mato honanmanicah rihbi hihxon bi hean mato tachocaiya tah man maton rihbi joni huetsa tachotihhi. ¹⁵ Hen hahcái jisxon man jascajaribinon tah hen mato jismahahqui. ¹⁶ Mato tah hen yohicoinal. Yonoti ta jahuen hapo mentan hashoan tee hihboma qui. Raana joni rihbi ta jaa raanai joni mentan hashoan yohuan hihboma qui. ¹⁷ Nea hen mato yohihi joibo honanxon, hen mato yohihi

quescabijahax tah man hahan jenimati jaresscayaxihqui.

¹⁸ Mato jatihibi qui tah hen yohiyamahi. Heen caisaibo tah hen honanai. Papan huishamani joi jai quescabi ta janoxihqui. Heen paan pih i jonin ta jotsistonen hea jamaquihqui hihqui jaa huisha joi.

¹⁹ Janoxihqui. Janoxihqui. Jarifyamahi bi tah hen mato rahmabi yohihi, jaressca jaiboya man hea hen qui man honannon.
²⁰ Hen mato yohinon nincanahue: hean raanah cahax nocotaiton mato johue hahcaibaan ta hea rihbi johue hahquiqui. Johue hea jaibaan ta hea raanni rihbi johue hahquiqui.

Judasenbihmanoxihqui Jesusen yohihi

(Mt 26.20-25; Mr 14.17-21; Lc 22.21-23)

²¹ Jato jascajaquin yohixon masa shinanxon jato yohicoquin:

—Man honannon hihxon tah hen mato yohihi: mato tocan tsahotai hues-tichin ta hea paranxon bihmanoxihqui —jato jaquin. ²² Jahuen haxen-i-cabo bejisahantanani.

—¿Tsoa yohihiquin? —shinancanquin. ²³ Hahan Jesus queenai jahuen haxenica cahen Jesus senenbi tsahoti. ²⁴ Simon Pedron sca jaa cohan cohan hihxon:

—¿Tsoa yohihiquin? Yocahue —hahquin. ²⁵ Jesus senenbixon yocascaquin:

—¿Tsoa hin, Hihbon?

²⁶ —Nea paan tequen netinxon hen hinanai joni tah qui —hahquin Jesusen. Jascaxon paaman netinxon Judas shinannquin. Simon Iscariotenin baque can, Judas. ²⁷ Paan teque bichiton jahuen jointi Satanasnen hihbojaquin.

—Hoa min hahcatsihqui hahtanhue, Judasen, histon —hahquin Jesusen.

²⁸ Jahua yohihiquin jascahiquin misa janin tsahotaibaan honanyamaquin.

²⁹ —Noquen coriqui coiranai copi rah ta hahan fiestajati piti non pishinai marotanhue hahquiqui —shinanquin caibaan.

—Jahuaborajomabo coriqui hinantanhue hah ra ta jaiqui —shinanquin caibaan rihbi. ³⁰ Hahtanhue hahca jahuen paan bichish Judas caresscrai, yamescrai bi.

Behna joi

³¹ Caresscaya Jesusen jato yohihiquin:

—Hea noquebaque nete hihbo hihqui ta rahma jisnoxihcanihqui. Jisquin ta noquen Papa rihbi nete hihbo hihqui jiscantihqui. ³² Hea jisxon Papa Dios nete hihbo hi honanaiboya ta nete hihbo hihxon jato jismatihqui, jahuen baque rihbi nete hihbo hi honanahbo. Rahmabi ta jascajatihqui. ³³ Basima bi res tah hen mato betan hihihi, heen baquebaan. Man tah man hea benayaxihqui. Hen jidiobo yohihiipi quescajaquin ta hen mato rahma yohihi. Hea janos cahiton tah man cati hahtipahyamahi. ³⁴ Joi behna ta hen mato yohihi. Nincanahue. Joni huetsahon shinannahue, hean hen matohon shinanai quescajaquin. Joni huetsahon shinannahue. ³⁵ Man joni huetsahon shinanaiya ta heen haxenicabo mato qui jatihixonbi honancantihqui —jato jaquin.

Jesus qui Pedro paramehxihqui

(Mt 26.31-35; Mr 14.27-31; Lc 22.31-34)

³⁶ —¿Jahuerahnon min canoxihqui, Hihbon? —hahquin Simon Pedronen.

—Hen janos cahiton tah min rahma chibantimahi. Huetsa tian tah min hehchon catihi —Jesusen jaquin. ³⁷ Pedronen yocauquin:

—¿Jahua copi hen mia rahmabi chibanti hahtipahyamahin? Hea rehtecatsihqui que bi tah hen mia jenetimahi —hahquin.

³⁸—¿Mia rehtecatsihquibo que bi min hea jetenimahin? Nincahue, hen mia yohinon: hatapa queorih jaima bi tah min quimisha coti heen joni hihtima min yohinoxihqui.

Jesus Papa qui cahi bahi siri

14 Masa shinanyamanahue. Papan joi nincacoinnahue. Hea rihbi nincacoinnahue. ²Heen papan jihu janin ta xobo hicha qui. Yamahiya ca hen Mato ta hen jihuettjaxoni cahi hen jayamahan. ³Caxon mato jihuettjaxonax tah hen joribiyaxihqui, mato bichí sca. Hea janoo hihquiton man mato rihbi hih non tah hen mato bichi joyaxihqui. ⁴Ha han hean cahi bahi tah man honanai —jato jaquin.

⁵—Jahuen min cahin? Non tah non honanyamahi, Hihbon. ¿Jenquetsahaxon non mia janoo cahi bahi honantihi? —hahquin Tomasen.

⁶—Hea ta Papa qui cahi bahi qui. Yohuani hihcoinai joi tah hen qui. Han han jihuetai ta hea qui. Hea janoo hihquiton cayamahax ta tsoabi Papa qui nocotimahiqui. ⁷Hea honanxon tah man heen papa rihbi honanquehanai. Rahma tah man honanscái. Jaa tah man jisiqui —jato jaquin Jesusen.

⁸—Noquen Papa noque jismahue, Hibon. Jaa res tah non queenai —hahquin Felipenin.

⁹—¿Yotihixonpahi hen mato betan hihqui bi min hea honanyamahin, Fe lipin? Hea jisi jonin ta heen papa jisiqui. ¹⁰Jahua copi min hea Noquen Papa noque jismahue hah min Jain? Jano heen papa hihquiton tah hen hea rihbi hihqui. Hea janin ta heen papa rihbi hihqui. ¿Min hihcoin shinanyamahin? Hen mato yohihi tah hen heanbi shinanxon mato yohiyamahi. Hehbe hihxon ta heen papan jahuen tee hahqui qui.

¹¹Heen papa betan tah hen hehbe

tan rihbi heen papa hihqui. Hea hih coinai shinannahue. Yohihah copi res shinanyamaxon, heen tee jisxon copi hihcoinai shinannahue. ¹²Mato ta hen yohicoinali: hen hahcai teebo ta hea nincacoinai jonin rihbi hahtihiqui. Hen hah cai hahxon bi ta hashoan hanibo rihbi hahtihiqui, hea heen papa qui cahiya sca. ¹³Jatihibi man heen janen yocacai tah hen hahxontihi. Heen papa nete hihbo hi honanahbo tah hen hahxontihi, jahuen baque hihxon. ¹⁴Man heen janen yocacai jatihibi tah hen mato hahxontihi.

Dios Yoshin jan noque hinantihi

¹⁵Hehon shinanxon tah man hen mato yohihi man hahtihhi. ¹⁶Hean rihbi tah hen heen papa yocatihi, huetsa yanapannica jan mato hinannon. Jaa ta jascabi sca mato betan jatihiqui. ¹⁷Jaa ta yohuancoinai hihbo qui, Dios Yoshin. Jaa jisyamaxon ta mai mehabaan jaa bithimahiqui, jaa honanyamaxon copi rihbi. Maton tah man jaa honanai. Mato betan ta hihresscainqui. Mato chicho rihbi sca ta jayaxihquiqui. ¹⁸Jaabiyahpa cayama ta jai. Joribiyaxonoxon tah hen cahi. ¹⁹Mai mehabaan hea jisyamas canon caman ta basima sca qui. Jaabaan hea jisyamasca bi tah man maton hea jistihhi. Hea jihuetai copi tah man mato rihbi jihuetai. ²⁰Jaatian tah man honantihi, hea heen papa betan hihqui, mato rihbi hehbetan hihqui, hea rihbi mato betan hihqui. ²¹Hen yohihi honanxon nincacoinaibaan ta hehon shinannicabo qui. Hehon shinanaibohon ta heen papan rihbi jatohon shinanhiqui. Hean rihbi hen jatohon shinanai. Jaabaan hea honannon hihxon tah hen heen yora hean jato jismatihi —jato jaquin Jesusen.

²²Judasen sca yocaquin (Iscarioten inma, huetsa Judasen):

—¿Jenquetsahaxon min noque mabi jismatihin, mai mehabaan mia jisnonma? —hahquin.

²³ Jesusen yohiquin:

—Hehon shinanaibaan ta heen joi bithiqui. Jatohon ta heen papan shinanthiqui. Jato qui cahax tah non hahbetanbi jihuetai. ²⁴ Hehon shinanyamahi jonin ta heen joi bihyamahiqui. Hen mato yohihi joi ta henama qui. Hea raanni heen papanah ta qui. ²⁵ Mato betan nihparixon tah hen mato yohihi. ²⁶ Dios Yoshin sca ta mato yanapan-nicah qui. Jaa ta heen janen heen papan raanyaxihquiqui, jatihibi joi mato honanmanon. Hen mato yohipahoni joi jatihibi ta mato shinanmayaxihquiqui.

²⁷ Hahan jihuetai siri mato hinanbahini tah hen cahi. Heen hahan sirijaquin shinanti tah hen mato hinanai. Mai mehabaan hinanai quescajayamaquin tah hen mato hinanai. Masa shinanya-manahue. Raqueyamanahue. ²⁸ Caress-caax ta hen jorihbiyaxihqui hen mato jaah tah man nincacahqui. Heen papan ta hea muuinahqui. Hehon shinanax cah man jenimahan, heen papa qui hea cahiya. ²⁹ Janoxihquibo tah hen mato yohiscaáqui, jaresscaiboya man hicoinal shinannon.

³⁰ Mato betan tah hen basi yohuanya-mascatihi. Mai mehabo yoshin hihbo ta jahuiqui. Hea ta jahuejati hahtipahyamahiqui. ³¹ Jaabi tah hen heen papahon hea queenai mai mehabaan honannan hihxon heen papan hea yohihi quescia hean jai. Hueninahue. Caress-canonical bonahue.

Bimiyahpa mebibo

15 Hea ta bana jihui yora coin quescapah qui. Heen Papa cahen huai hihbo. ² Jatihibi heen bimijoma mebibo ta jaan mextehiqui. Bimiyahpa mebi jatihibi ta boxtepaquehiqui, hashoan bimi hichanon. ³ Mato tah

man boxtehahscaqui. Hen mato yohiha join ta Papan mato boxtehiqui. ⁴ Jahuen jihui yora jahuen mebin jenebahintimahi quescia hehbetan jascabihi janahue. Hea rihbi tah hen mato betan jascabihi jai. Mebi ta hahmebi bimiti hahtipahyamahiqui; jahuen yora qui rechihah pari bimihi. Mato jascarihbibi; hehbetan hihyamahax cahen jahuabijomabo mebibo.

⁵ Hea tah hen jihui yora quescahpa qui, mato cahen heen mebibo. Jahuen yora janin jahuen mebi rechitax hicha bimiyahpa hihqui quescajaquin tah man hehbetan hicha hahtihi. Hehbetan hihyamaxon cah man jahuabi hah-timahi. ⁶ Hehqui rechitaima mebibo ta huai hihbaan mextexon potatihiqui mebi choshihi quescanon. Shinannahue: mebi choshiho ta tsinquixon mapojacanihqui.

⁷ Rechitax quescia man hehbetan jihuexon, heen joi rihbi maton jointi janin hihquiya tah man man queenai jatihibi yocatihi, hen mato hahxonnon. ⁸ Hicha bimiyahpabo quescaxon man hicha no-quen Papa hahxonaiya ta mato jisxon, heen Papa nete hihbohi jonibaan ho-nanyaxihcanihqui. Jascapahbo tah man heen haxenicabo jatihi. ⁹ Heen papan hehon shinanxon hahxonai quescajaribiqui tah hen hean rihbi matohon shinanxon hahxonai. Hen mato hahxonnon jascabijaquin nincacinnahue. ¹⁰ Heen papan hea yohihi quescabijaquin tah hen jai, jaa queenai quescabijaquin hea hahxonnon. Jascajaquin rihbi man hen mato yohihi quescabijaquin jaiya tah hen hea queenai quescabijaquin hen mato hahxontihi.

¹¹ Hea jenimahi hihqui quescari man mato rihbi jenimanon hihxon tah hen mato yohihi, man hinti jenimanon.

¹² Nea tah hen mato yohihi: matohon hean shinanai quescajaribiqui maton rihbi joni huetsahon shinannahue. ¹³ No-

quen hahbe rabetibohon hihti shinanxon tah non mahuanoxon caman jato hahxonquin yanapantih. Jascapa hahxonnicah ta tsoanbi hahxonquin mahuin-timahiqui.¹⁴ Hen mato yohihi quescajaquin hahcaibo tah man heen hahbe rabetibo qui.¹⁵ Mato tah hen “heen jonibon” hahyamascai. Jahuen hihbaan hahcai ta jahuen jonin honanyamahi-hqui. Jatihibi heen papan hea yohipahoni mato honanmaxon copi tah hen mato “heen hahbe rabetibon” hahcai.¹⁶ Hea man caisnima bi tah hen hean mato caisnihqui. Caisxon tah hen mato janescai, man hicha hahqui canon. Man hahcai queyoyamanox mananon tah hen mato raanai. Jascapahboxon man yocacai jatihibi noquen papan mato hahxonnon tah hen mato raanai.¹⁷ Joni huetsahon man shinanon hihxon tah hen jascaquin mato yohihi.

Jesusyabi noque jistahihmajayaxihqui

¹⁸ Mai mehabaan mato jistahihmahiya honannahue: hea pari ta jistahihmacanishqui, mato chini sca.¹⁹ Mai mehabo man hihquiya cahen mai mehabo matohon queenquehan, jaton caibo copi. Jascapahboma tah man qui. Mai mehabo hahyamacanontah hen mato caisnihqui. Jaa copi ta mai mehabaan mato jistahihmahihiqui.²⁰ Hen mato yohihi joi shinanbehnoyamanahue. Yonoti ta jahuen hihbo mentan hashoan yohuan hihbo hahyamahiqui. Hea tiromajacatishquin hea chibannixon ta mato rihbiscacha chibanyaxihcanihqui. Heen joi nincanixon ta maton joi rihbini nincayaxihcanihqui.²¹ Hea raanni heen Papa honanyamaxon ta mato tiromajayaxihcanihqui heen jonibo man hihqui copi.

²² Hen jato yohiyamahah cahen hohchayahpaboyamahan. Hean yohihah copi ta Honanyamahax tah hen hohchanihqui jati hahti-

pahyamascacaniqui, hohchanihxon.²³ Hea jistahihmahi jonin ta heen papa rihbi jistahihmahi qui.²⁴ Tsoan jascajani que ma bi tah hen Papan coshiyaxon jato hahxonpahonihqui. Jato tocan hen hihyamahiya cahen hohchayahpabohihyamahan. Hen jato hahxonai jisxon bi ta heen papayabi hea jistahihmacaniqui.²⁵ Papan huishamani joi janin ta nea jaiqui: Jahua copima bi ta hea jistahihmarescaniqui. Jaa joi jai quescabi ta jacanihqui.

²⁶ Mato yanapannicah sca tah hen heen Papa janinxon mato qui raanyaxihqui. Jaa ta yohuancoinai hihbo qui, Dios Yoshin. Papa janinhax jahuex ta hehqui yohuancoinyaxihqui qui.²⁷ Hen haxemamenoni tian hea nincanish tah man rahma caman haxehi hehbetan nihnicahbo qui. Jaa copi tah man mato rihbi heya joiji yohuancointi jai.

16 Hea jeneti shinan tsoanbi mato hinanyamanon hihxon tah hen nea rahsi hen mato yohihahqui.² Jaton tsinquitixoboma qui ta mato potayaxihcanihqui, tsoanbi mato yohuanquihnyamacanontah hen mato caisnihqui. Mato retehibo ta Mia retequin Papa Dios hahxonpan hihnicahbo rahsi jatihiqui.³ Heen papa honanyamaxon ta hea rihbi honanyamaxon jascajayaxihcanihqui.⁴ Nea hen mato yohihi quescjaresscaya Noque ta yohinishqui hahyaxahnahue. Man honannon hihxon tah hen mato yohihi.

Dios yoshiman tee

Mato manati hahtipahparixon tah hen mato honanmamenoxon jaa joi mato yohiyamanihqui.⁵ Hea raanni heen Papa janin sca tah hen canoxihqui. Hen canoxihqui bi tah man Jahuen min canoxihquin hea jayamahi.

⁶ Jascajaquin hen mato yohihah copi tah man jointinin benatihi.⁷ Man benatai bi tah hen mato yohicoinali. Hea cahah ta siri qui. Hea cayamahiya cahen

mato yanapannica joyamahi. Caxon ta hen raantihi, mato qui jonon.⁸ Joxon ta jatihibi jonibo honancoinmatihiqui, jahua tiroma quin, jahua siri coin quin, jahua Papan casticantihiqui, jato honanmaquin.⁹ Hea nincayamahibо copi ta jaton hohcha copi Papan jato casticanyaxihqui jato honanmatihiqui.¹⁰ Heen papa qui hea cahiya man hea jisyamascai copi ta jahua siri coin quin hihxon jato honanmatihiqui, jihueta honanahbo.¹¹ Mai meha hihbojanica yoshin casticanti jaresscαι copi ta tiromabo copi Papan casticanyaxihqui jato honanmatihiqui.

¹² Mato yohiti hicha pari jai bi tah man rahmabi nincati hahtipayahamahi.¹³ Joxon ta yohuancoinai hihbaan mato jatihibi hihcoinai joi honanmayaxihquique. Hahmebi shinanxonma bi ta Papan yohiha jan nincacai joibo mato honanmayaxihquique. Joyaxihquibo rihbi ta mato yohiyaxihquique.¹⁴ Hea nete hihbohi honanahbo ta yohiyaxihquique. Hean yohihi joibo bihxon ta jaan mato honanmayaxihquique.¹⁵ Heen papanahbo jatihibi ta henabо qui. Jaa copi tah hen mato yohihahqui, hean yohihi joibo bihxon ta jaan mato honanmayaxihquique hahquin.

Benatax bi jenimacahinti shinan

¹⁶ Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui —Jesusen jato jaquin.¹⁷ Caibo sca jahuen haxenicabo yohinani:

—¿Jan yohuanai jahua hihququin? Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui. Hea heen papa qui cahiya jan hihqui bi ¿jahua yohihi jascarihquin?¹⁸ ¿Basima sca jan hihqui bi

jahua hihcatsihququin? Jan yohihi tah non honanyamahi —hihcanni.

¹⁹ Yocacatsihquibo hih honanxon Jesusen jato yohiquin:

—Man hea jisquin jenenon ta nea pishca sca jaiqui. Basima tahni hea jisyamascaipixon tah man hea hahquirihbi jisyaxihqui hen mato yohihah copi ¿jaa jahua hihcatsihququin hah man yocacahanan jayamahin?²⁰ Hen mato yohinon nincanahue: man tah man huinitihi, huaohihqui, mai mehabo jenimanon. Bena benatax bi tah man hihti jenimaribithi.²¹ Jahuen baquexo bihti nete nocotaiya ta hisinxon jahuen baque caincatsihquin haibaan masa shinanihqui. Jahuen baquexo bihresscaxon sca ta jan masa shinanah shinanbehnoscapiro. Joni behna noquen neten jahui copi jenimahi.²² Mato jascarihbihi. Rahma masa shinanax bi tah man jointinin jenimayaxihqui, hen mato hahquirihbi jisiya. Man jenimahi yohuan ta tsoanbi mato bichintimahihqui.

²³ Jaa neten tah man hea jahuabi yocayamayaxihqui. Man honannon hihxon ta hen yohihi: man queenaibo man heen janen noquen naihoh queha Papa yocacah ta mato hinanyaxihquique.²⁴ Rahma caman tah man jahuabi heen janen yocayamahi. Yocanahue. Jenimanoxon tah man bihtihi.

Mai mehabo Jesusen cahnetimahi

²⁵ Papan jihuemati ta jascapah qui hahxon tah hen mato haxemapahoniqui. Huetsa tian tah hen jaa patax queha joi mato yohiyamacatih, heen Papan joi mato yohiquin sirijascaquin.²⁶ Jaatian tah man heen janen yocayaxihqui. Mato qui tah hen noquen Papa yocaxonyaxihqui hah ta hen jayamahi.²⁷ Man hehon shinanxon heen papa janinhax hea joní man shinancoinai copi ta matohon shinanihqui.²⁸ Heen papa janinhax tah hen

joniqui. Naihoh quehax jonish tah hen hahquirihbi heen papa qui cahi, mai mehax sca —jato jaquin.²⁹ Jahuen haxenicabaan sca yohiquin:

—Rahma caya tah min yohiquin siri jahi, jaa patax queha joima.³⁰ Mian tah min jatihibi honanai. Noquen tah non honanscrai. Jahuabi yocacahtima sca tah non jai. Non tah non honanscrai. Jaa copi tah non hihcoinai shinanai, Mia tah min Papa Dios janinhax joniqui —hahcanquin.³¹ Jesusen jato yocaquin:

—¿Man rahma nincacoinscain?³² Hea huesti hihnon tah man jabacahini cahax jabisnoxihqui. Jaabi tah hen hea huesti hen banetimahi, heen papa ta hehbetan hihihiqui.³³ Heen shinan bihxon man shinanquin sirijanoxahnon hihxon ta hen mato yohihahqui. Mai mehax tah man hohmis hohmisyaxihqui. Jascarax bi jenimanahue. Mai mehabo ta hen namjanasca jai.

Jahuen haxenicabo Jesusen yocaxonai

17 Jato jascajaquin yohixon nai be- jisahanan sca yohiquin:

—Hen tah hen janquenjascai, Papan. Hea miin baque nete hihbohi jato honanmaschahue, mia nete hihbohi honanahbo, hean rihbi jato honanmanon.² Hen mia hinanai jatihibi teehihmanoxon jatihibi yorayahpabo hihbojahue hah tah min hea janiqui. Jahuentianbi queyoyamanox manati jihuetahbó tah hen jato teehihmascatihí.³ Mia huesti tah min Papa Dios coin qui. Queyoyamanox manataibo ta mia honanax jihuetaibo qui. Mia honanxon, hea mian raanni Jesucristo rihbi honanax ta jihuecoinnicabo qui.

⁴ Hen hahxonnon min hea hinanni tee queyoxon tah hen mainxon hen mia nete hihbohi jato jismapahonihqui.⁵ Mai tsahonrihyamahax bi tah hen mihibetan nete hihbo hihquish xabanihqui. Mia

jano jaiton sca hea rihbi nete hihbohi jisibo heen xaba jato jismahue, Papan.

⁶ Min hea hinanni mai meha jonibo tah hen noquen Papa jenquetsahpa quin hahxon jato honanmaniqui. Minabo tah min hea hinannihqui. Miin joi ta bihresscacanishqui.⁷ Min hea hinanni joibo jatihibi ta mina qui. Jaa ta honanscancnihqui.⁸ Min hea hinanni joi hean jato hinanah ta honancaniqui. Jaa bihcoinxon ta mia janinhax hea joní honancoincaniqui. Mian min hea raanni ta hihcoinjaquin shinancoincaniqui.

⁹ Jaabo ta hen yocaxonai. Mai mehabo yocaxonma bi tah hen min hea hinannihbo hen yocaxonai. Jaabo ta mina qui.¹⁰ Henabo jatihibi ta mina qui. Minabo jatihibi rihbi ta hena qui. Jaabo heen shi nanyahpabo quen ta hea nete hihbohi honancantihqui, mai mehabaan.

¹¹ Rahma tah hen mai mehabo tocan hihyamascai. Jaabo res ta mai mehabo tocan hihquiqui. Mihqui tah hen cahi. Hahan min hea janeni miin janen jato coiranhue, jaabo huesti hihnon, noque rabe non huesti hihqui quescaribibi.¹² Jato betan hihxon tah hen min hea hinanni miin janen jato coiranpanhoniqui. Hean jato coiranah ta tsoabi manoyamahihqui. Nincayosma tiroma huesti res ta manotihqui, huishani joi jai quescabi janon.

¹³ Mihqui sca tah hen cahi. Mainxon tah hen nea joibo mia yohihi, hea jenimahi hihqui quescarabho.¹⁴ Miin joi tah hen jato yohiscaniqui. Hea mai mehama hihqui quescaribibi ta jaabo mai mehaboma quen mai mehabaan jato jistahihmahihqui.¹⁵ Mai janinha jato tsecahue hah ta hen jayamahi. Tiroma yoshiman jato jahuejayamanon jato jisxonhue hahquin tah hen jato yocaxonai.¹⁶ Hea mai mehama hihqui quescaribibi ta jaabo mai mehamabo qui.¹⁷ Nincacointi shinan jato hinanxon hihcoinai join jato mequexonhue. Miin joi ta

jaa joi qui, hihcoinai joi. ¹⁸Mian min hea mai mehabo tocan raanni quescajaribiquin tah hen jato raanscrai mai mehabo tocan canon. ¹⁹Hihcoinai joi honanxon mihqui hinamehxon teneti shinan bichibo tah hen jaton hohcha copi hen hinamehtai.

²⁰Jaabo res ma tah hen yocaxonai. Jaabaan sca yohihah hea nincacoinyaxi-hquibo rihbi ta hen yocaxonai. ²¹Jaabo jatihibi huesti yora hihnon, mia hehbetan hihqui quescari, hea rihbi mihibetan hihqui quescaribibi, noque betan jaabo huesti yora jihuemon. Non jascaraiya ta mian min hea raanni honan-coinyaxihqui qui jonibaan. ²²Min hea hinanni coshi shinan tah hen jato hinan-rihbinhqui, jaabo huesti hihnon, noque non huesti hihqui quescaribibi. ²³Jato betan tah hen jihuetai. Hehbetan rihbi tah min jihuetai, jaabo rihbi huesti yora siripi jihuemon. Jascaraiya ta min hehon hihti queenai quescaribibi, hea raanax min jatohon hihti queenai mai mehabaan honanyaxihqui qui.

²⁴Jano hea jaiton min hea hinanni jonibo rihbi jati tah hen queenai, Papan, nete jariyamanon hehon queenxon min hinanni coshi jisibo. ²⁵Mai mehabaan mia honanyamahi bi tah hen hean mia honanai, Papan. Hea min raanni rihbi ta heen jonibaan honanihqui. Mian tah min pontejaquin shinanai. ²⁶Hahxon-nica Papa siri min hihqui jato honan-manixon bi tah hen jato honanmarih-bitih, min hehon queenxon hahxonni quescajaribiquin jatohon shinanxon min jato hahxonnon. Hea rihbi jato betan hinnoxon tah hen jato honanmanoxihqui.

Jesus bichibo

(Mt 26.47-56; Mr 14.43-50; Lc 22.47-53)

18 Jascayah jahuen haxenicabo betan cahax Cedron janeya texpa pohquetax jano huai jaiton cahi. ²Jesus bihmactsihqui Judasen ta jaa huai ho-

nanrihbinishqui, jaa huai chian jahuen haxenicabo betan Jesus cahiya cahen jaa rihbi janu capahoni. ³Jano Jesus cahi honanxon sontarobo sca benaxon sacerdote hapobo janin porisiabo rihbi benaxon jaa huai chian jato hioquin. Caibo johueyahpabo, caibo ramparinyapabo, jaton jashiya bocani. ⁴Huai chian nocotaiton Jesusen jato behchiquin. Jahuejanoxihquibo jatihibi honanax, jato behchihi cainxon yocaquin:

—¿Tsoa man benahin? —hahquin.

⁵Nazaret janinha Jesus rahan —hihcani.

—Hea ta hen qui —hihqui Jesus. Jesusbihmanica hihquish Judas jato betan nichi.

⁶Hea ta hen qui Jesus jaiya jaabo chitihihrenenax paqueti miracahrenencani.

⁷—¿Tsoa man benahin? —jato jaribiquin.

—Jesus Nazaret janinhah rahan —hihcani.

⁸—Hea ta hen qui hih ca hen jai sen. Hea benaxon heen jonibo jenenahue, botanahbo —Jesusen jato jaquin. ⁹Min hea hinanni jonibo tah hen ni huestibi manomayamahi jan yohihah quescabi janon hihxon jascayaquin. ¹⁰Simon Pedronen sca machito jaxon, tsecaxon, sacerdotenin joni reraquin bi mecayaho res paxtebahinquen. Malco ta jaa jonin Jane qui.

¹¹—Miin machito bexojahue. ¿Heen papan hea jascayahue hahca hen hah-timahin? —Jesusen Pedro jaquin.

Jaton hapobo janin Jesus bohibo

(Mt 26.57-58; Mr 14.53-54; Lc 22.54)

¹²Jaatian sontaro hapon yohihah porisiabo betan jahuen sontarobaan Jesus bihtanxon menexcanquin.

¹³Menexxon Anasen xobo janin pari bocanquin. Anas cahen Caifasnen coca. Caifas cahen jaa bari tian sacerdote hapo hihpahoni. ¹⁴Caifas ta Huetsa

jonibo jihuenon huesti joni mahuatah ta siri qui hihnicah qui.

Jesus qui Pedro paranahti

(Mt 26.69-70; Mr 14.66-68; Lc 22.55-57)

¹⁵ Anasen xobon bohiboya pari ta huetsa jahuen hahbe haxenica betan Simon Pedronen jato chibansonanishqui, Jesus bohiboya. Jahuen hahbe haxenica ta sacerdote hapon honannishqui. Jaa copi ta sacerdote hapon xoboho mapetaiboya jemanhihti janin jahuen hahbe haxenica hihconishqui. ¹⁶ Jaa hcohi bi jemanhihti xehqui senenbi Pedro banereneni. Jahuen hahbe haxenica sca sacerdote hapon honanai joni hiquish picoxon xehpoti coirannica haibo yohixon Pedro hihcomaquein, jemanhihti janin. ¹⁷ Jemanhihti janin nichiton sca xehpoti coirannica haibaan Pedro yocauquin:

—¿Mia rihbi min jahuen haxenicama quin? —hahquin.

—Jaama ta hen qui —hahqui Pedro. ¹⁸ Matsihiya sca cahen hapon jonibo betan porisiabaan chihi requenjaquin. Perehiquiya janio pehchicani. Pedro rihbi jato betan pehchihi nichii.

Hapobaan Jesus yoca yocacai

(Mt 26.59-66; Mr 14.55-64; Lc 22.66-71)

¹⁹ Xoboho cahen jaton hapo yocacahti: —¿Tsoabo miin haxenicabouquin? ¿Jahua yohiquin min jonibo haxemahin? —hahxon yocapaquequin. ²⁰ Yocacah Jesusen yohiquin:

—Janibixon tah hen jathibi joni yohirahsihi. Maton tsinquit xobohoxon haxemaxon, Papan xobohoxon haxemaxon, janio judiobo tsinquitaiton tah hen jato honanmarasihi. Jonexon tah hen jahuabi yohiyamarahsihi. ²¹ ¿Jahua copi sca min hea yocacain? ¿Hea nincar ahhsihibaan jahua yohihipishquin? Jaabo caya yocahue. Jascajati ta jaiqui. Hen

yohirahsihi nincaxon ta honancaniqui —hahquin. ²² Jascahiton:

—¿Jascajaquin min sacerdote hapo joi bichinain? —hahxon jaa senenbi nichiporisianen Jesus copatsahquin.

²³ —Ponte hen yohiyamahiya Jascama ta qui hahhue. ¿Hen ponte yohihiya jahua copi sca min hea rishquihin? —hahquin Jesusen. ²⁴ Jaatian hahquirihbi menexti jato yohixon Caifas janin sca Anasen jato raanquin, Caifas hashoan hapo copi.

Pedro Jesus qui paramehribihi

(Mt 26.71-75; Mr 14.69-72; Lc 22.58-62)

²⁵ Xoboho pari jaabo jai bi jemanhihtin Pedro nichii pehchihi.

—¿Mia rihbi min jahuen haxenicama quin? —hahcanquin.

—Jaama tah hen qui —hahquin, Jesus qui paramehquin. ²⁶ Sacerdote hapon joni sca Pedronen paxteha jonin jenabo hihxon yocauquin:

—¿Huai chian min hahbetan nichii hen mia jisyamahaquin? —hahquin. ²⁷ Jascajaquin yocacah hahquirihbi jahuen joni hihlima yohiquin. Jaatianbi sca hatapa queoscai.

Pilato qui Jesus nocoti

(Mt 27.1-2, 11-14; Mr 15.1-5; Lc 23.1-5)

²⁸ Caifasnen xobo janinhax picoxon gobernador xoboho sca Jesus bocanquin. Xaba paquecatsihscrai. Nahuan xoboho mapetax rishtaxon non pascua fiesta piti hahtipahyamamis hihquish jahuen xoboho mapeyamacani. ²⁹ Jaa copi jato qui Pilato picoti.

—¿Jahua man hahqui yohuanain? —jato jaquin.

³⁰ —Tiroma joni hihyamahiya cah non mia hinanyamahan —hahcanquin.

³¹ —Boxon, maton xenibaan huishanhbo joi jisxon jaa joi jai quescajaquin hahnahue matonbi —Pilatonen jato jaquin.

—Noquen cah non rehteti hahtipahyamahi. Noquen rehtetima joi ta jaiqui —hahcanquin. ³² Jascajaquin ta hea rehteyaxihcainhqui hahxon Jesusen jato jaipi quescabijaquin janon, jascajacanquin. ³³ Jahuen xoboho hihcorihbixon Jesus quenaxon Pilatonen yocaquin:

—¿Mia min judiobaan quiquin hapo quin? —hahquin.

³⁴ —¿Mianbi shinanxon min hea yocacain? ¿Caibo hehqui yohuanah min hea yocacain? —hahquin Jesusen.

³⁵ —Hea judio quin? Jaton sacerdote hapobo betan ta miin caibaan mia hihuexon hea casticanmacatsihqui. ¿Jahuejah min jaipiquin? —Pilatonen jaquin.

³⁶ —Hean hihboti ta nea mai mehama qui. Nea mai meha heen hihboti jaiya cahen heen jonibo coshicahinquehanihqui, judiobaan hea bihyamahahbo. Nea mai mehama ta heen hihboti qui —Jesusen jaquin.

³⁷ —¿Mia min quiquin hapo qui nan? —Pilatonen yocaquin.

—Quiquin hapo hea hihqui hah tah min miabi jai. Jaamama jaabijaquin yohinoxon tah hen cainnihqui. Jaa copi tah hen nai naman joniqui. Jatihibi hihcoinai yohuannicaton ta heen joi nincapuihqui —hahquin Jesusen.

³⁸ —¿Hihcoinai jahua quin? —hihscai Pilato.

Jesus rehteti yohihibo

(Mt 27.15-31; Mr 15.6-20; Lc 23.13-25)

Jascahax Pilato caini judiobo qui.

—Jahua hohchabi ta hen jisyamahi. ³⁹ Pascua fiesta tian yocanicabo tah man qui, hen sipo xoboho tsahonni huesti mato picoxonnon. ¿Judiobaan quiquin hapo hen mato picoxonti man queenyamahin? —jato jaquin.

⁴⁰ —Jaama bi Barrabas —hahcanquin, coshin bi res. Barrabas ta yometsoh hihpahonishqui.

19 Jaatian sca Jesus rishquihahbo jahuen sontarobo Pilatonen yohiquin. ² Sontarobaan sca rishquixon moxa maitijaxon Jesus maimaquin. Yancon tari rihbi sahuemacanquin, hapon tari. ³ Sahuemaxon hahqui jori jorixon:

—Jihuehue, judiobaan quiquin hapon —hahcanquin. Jascajaxon tihibi tantashahcanquin.

⁴ Jaatian judiobo qui Jesus hahquirihibi picoxon Pilatonen jato yohiquin:

—Jisnahue. Man jisnon tah hen mato jismahi. Hean jisi ta jahuen hohcha yamahihqui. Man honannon hihxon tah hen mato yohihi.

⁵ Jascahiya Jesus picoscai, moxa maitiya, yancon tariya.

—Nea tah qui —jato jaquin Pilatonen.

⁶ Sacerdote hapobo betan porisiabaan sca Jesus meraxon coshin yohiquin:

—Jihuin hueonhue. Jihuin hueonhue —hahcanquin.

—Jihuin hueonnhahue matonbi. Jahuen hohcha ta yamahihqui, hean jisi bi —jato jaquin Pilatonen.

⁷ —Huishani joi tah non noque jai. Hea ta Diosen baque qui jan jai copi tah non jaa rehteti jai, noquen nincati joi nincaxon —hahcanquin.

⁸ Jascaraibo nincacax Pilato hashoan raquescai. ⁹ Jahuen xoboho hihcorihbixon Jesus yocarihbiquin:

—¿Jahuerahnah mia quin?

—hahquin. Yocakah bi jahua hihyamahi. ¹⁰ Jahua hihyamahiya Pilatonen yocaquin:

—¿Min hea yohicatsihyamahin? Mia tah hen picoti hahtipahi. Mia jihuin hueonxon rehteti tah hen hahtipahribihi ¿min honanyamahin? —hahquin.

¹¹ —Naihohxon mia coshi hinanyamahah tah min hea jahuejati hahtipahya-

maquehanai. Jaa copi ta hea bihxon mia hinanai joni hashoan hohchaya qui — Jesusen Pilato jaquin.¹² Jascalah Pilatonen picocatsihqui bi judiobo coshin yohuani:

—Min jaa picohi tian tah min quiquin hapo Cesaronen hamicoma sca min jatihi. Jatihibi quiquin hapocatsihquibo ta Cesaronen rahuibo qui —hahcanquin.

¹³ Jascaraibo nincaxon Jesus cainmavax, casticanti yohinoxon janoxon yohiti tsahotinin tsahopaqueti. Gabata janeya jemanhihti janin, judiobaan join cahen Gabata macan champani tapojahibo hihcatsihquiqui.¹⁴ Pascua fiesta piyanoxon jaton pitijati neten barin manan tsacahiya cahen janu tsahoxon judiobo sca Pilatonen yohiquin:

—Nea ta maton quiquin hapo qui —hahquin.¹⁵ Jascahiya sai saihiscacani:

—Rehtehue. Rehtehue. Jihuin hueonhue —hihcanci.

—¿Maton quiquin hapo hen jihuin hueontihin? —Pilatonen jato jaquin.

—Cesaro huesti ta noquen quiquin hapo qui, huetsama —hihcanci sacerdote hapobo.¹⁶ Jaatian jihuin hueonahbo sca jato Bihnahue hahquin. Bihnahue hahca Jesus bihcancuin.

Jihuin hueonaibo

(Mt 27.32-44; Mr 15.21-32; Lc 23.26-43)

¹⁷ Bihxon boxon jahuen coros hiamabahincanquin. Cahax mapo xao janeya manan qui nococani. Judiobaan join cahen Gólgota.¹⁸ Janoxon sca tasaxon nichinxon jihuin hueoncanquin. Huetsa joni rabe rihbi jascajarihbicanquin, ramihoh huetsa nichinxon ramihoh rihbi huetsa nichincanquin. Naponbi cahen Jesus.¹⁹ Quirica huishamaxon ta Jesusen coros qui Pilatonen jaa quirica hueonmanishqui: Nazaret janinha

Jesus, judiobaan quiquin hapo hihqui jaa quirica.²⁰ Hihti caiboxon ta judiobaan jaa quirica jisnishqui, jema hochoma hueonaibo quen. Judiobaan join huishaxon bi Latin join rihbi hahxon, Griego join rihbi huishahah, jaa quirica.²¹ Jaa quirica jisxon judiobaan hapobaan sca Pilato yohicanquin:

—Judiobaan quiquin hapo hahquin huishayamahue. Judiobaan quiquin hapo ta hen qui jan hahcai, hahquin huishahue —hahcanquin.

²² —Hen huishahah ta huisha sca qui —hahquin Pilatonen.

²³ Jihuin hueonxon sca ta jahuen chopabo sontarobaan bihnishqui. Chosco sontaro hihquish jahuen chopa metisihpaeccani. Jahuen tari sca cahen metisihpanan rechijoma hihnish, jahuen tepan janinhax jahuen quecatocaman sayá.

²⁴ —Jahuen tari huaxayamanahue. Tsoana banetihquin hihxon macan bero pishca borasa qui nanexon chicoti ta jaiqui —hihcanci. Jascaxon huishani joi janí quescabijacanquin.

Heen chopabo ta bihpauecanihqui. Heen sahueti bhnnoxon ta macan bero potacaniqui.

hihqui jaa joi. Jaa joi jai quescabijacanquin cahen sontarobaan hahquin.

²⁵ Jasca jaibaan bi Jesusen coros patax jahuen mama, jahuen mama huetsa, María Cleofas haibo, María Magdalena, jaabo nichi.²⁶ Jahuen mama jisxon hanhan jan queenai jahuen haxenica rihbi hochoma nichi jisxon jahuen mama Jesusen yohiquin:

—Hoa ta miin baque qui, maman —hahquin.²⁷ Jahuen haxenica sca yohiquin:

—Nea ta miin mama qui —hahquin. Jaa copi ta jahuen xoboho sca jaa haxenicateon Jesusen mama jihuemanishqui.

Jesus muhuatai

(Mt 27.45-56; Mr 15.33-41; Lc 23.44-49)

²⁸ Jaatian sca jatihibi janquenja sca jan jai honanxon huishani joi jai ques canon hihquish:

—Xehan tah hen hihqui —hihqui Jesus. ²⁹ Jano cahen tason bocho xehati cachani tsahoti. Jesus jascaraiya sca taco quescapa hahan maosahxon mehcha jaquin, jashi taxoyaxon jahuen jana janin sanancanquin. ³⁰ Cachani tanahax sca:

—Janquenja sca ta jai —hihqui. Jas carax jahuen mapo betihiquish muhuati.

Sontaronen Jesus pishnacohi

³¹ Pilato janin caxon sca pitijati nete sca jai copi, Janin yamenon muhuamati ta jaiqui hahxon judiobaan yocaquin. Jaton huihux tobanon yohihue, mahua sca jaiton jaton yora botonxon botanahbo hahcanquin yocaquin. Tantiti neten jaton yora coros janin hueyamanon hihxon jascajacanquin. Jaa tantiti nete jaton hani fiesta nete hihqui copi. ³² Tobatannahue hahca sontarobaan caxon jaa senenbi hueonah rabebi jahuen huihux tobaxon huetsana jascajaribicanquin. ³³ Jesus qui nocoxon sca muhuascai meraxon jahuen huihux tobayamascaquin.

³⁴ Tobayamaxon bi huesti sontaronen jashin Jesus pishnacoquin. Pishnacoha jimiya jene caini. ³⁵ Jaa jisnixon tah hen mato yohicoinai, maton rihbi man nincacoinnon. Hen tah hen hihcoinai. Honancoinax tah hen hihcoinai maton rihbi man nincacoinnon hihquish. ³⁶ Huishani joi jai quescabi janon ta tobayamacan ishqui. Jahuen xao ta ni huestibi tobati mahiqui hihqui jaa joi.

³⁷ Jaa pishnaconixon ta jaabi jisyaxi hcanihqui hihqui huetsa rihbi huishani joi.

Jesus mihinaibo

(Mt 27.57-61; Mr 15.42-47; Lc 23.50-56)

³⁸ Jaa pecaho Arimatea janinhax José janeya joni joxon Pilato yocaquin Jesusen yora botannoxon. Jaa José cahen nincacoinnica. Nincacoinnicaxon bi judiobo qui raquexon tsoabi yohiyamaquin. Rahma sca jahuen yora yocaquin. Yocakah Pilato jeen hihqui. Jeen hihquiya caxon jahuen yora botonxon boquin. ³⁹ Jesusen haxemamenohiya hahqui yame canicah rihbi jahui, Nicodemo. Mirra, áloe jahan hinintibo mesco bequin hicha. Hahan mihinti rahobo jan behi cahen cuarenta kilo hihuepai. ⁴⁰ Jesusen yora bihxon judiobaan hahpahoni quescajaquin hahan hininjatiya bi joxo chopas quexen yabi yabicanquin. ⁴¹ Jano hueonahbo janin cahen jihui huai jai. Jaa huai janin rihbi mai poquin behna jai, jaho tsahonti quini, jano tsoabi tsahonrihyamahi. ⁴² Jaa tsahon hochomahi copi janobi Jesus tsahonbahincanquin pitijati neten copi hishtocani.

Jesus huenirihbih

(Mt 28.1-10; Mr 16.1-8; Lc 24.1-12)

20 Jahan semana pehocohtai neten sca hihari xaba paqueri jaima tsahon janin María Magdalena jahui. Nocoxon hahan tsahon behpohipibo macan taranbohanah sca jisquin. ² Bishquihih canahi caxon Pedroya huetsa haxenica yohiquin. Jaa huetsa cahen jahan Jesus queenai joni.

—Tsahon janinhah ta noquen hihbo tsecacanaxqui. Jahuerahn racanaxquin tah non honanyamahi —hahquin.

³ Yohiha jaa huetsa haxenica betan picotax tsahon janin bishquihih canahi Pedro cahi. ⁴ Rabebi bishquihih canahax bi jaa huetsa pari tsahon janin no-

coti, hashoan coshin cahax. ⁵Cahcopaquexon najisquin. Hahan yabihipibo joxo chopas janos tsamana jisish bi hihcoyamahi. ⁶Hahchon sca Simon Pedro nocoti. Jahuex pontecahini tsahon quiniho hihcohi. Hihcoxon jisí bi jahuen chopas quexe tsamanah racati. ⁷Hahan bebepohipibo payon cahen huetsanco, joxo chopas quexebo betan racayamahi. Jaa cahen hahmebi boxca boxcahah racatan. ⁸Huetsa sca tsahon janin hihcohi, jaa pari nocotax bi chini hihcohi. Jisxon, Bohancion ta jacaanaxqui hihqui shinancanquin. ⁹Jaa hihquipish bi hahquirihbi teehihti hihqui huis-hani joi honanyamaxon jascajaquin shinanquin. ¹⁰Jaatian sca jaton xoboho rabebe caribihi.

**María Magdalena qui
Jesus sanareneni**

(*Mr 16.9-11*)

¹¹Tsahon patax banetax María nichi, huaohihqui. Huaohihanhan cahcopaquexon tsahon najisquin. ¹²Jisí bi Papan yonoti rabe. Jano Jesusen yora racanipi janin joxo chopayahpa yonoti rabe tsahotai. Tsahon mapo quiri huesti tsahoti, tahe quiri huetsa.

¹³—¿Jahua copi min huaohihquin, haibon? —yocauquin.

—Heen hihbo hea bohanahbo copi, rahan. Jahuen racancanaxquin hen ta hen honanyamahi —ihqui María. ¹⁴Jascanax rabejaquexon jisí bi janobi Jesus nichi. Jaa que bi Marian honanyamaquin.

¹⁵—¿Jahua copi min huaohihquin, haibon? ¿Tsoa min benahin? —Jesusen yocauquin.

Jaa huai hihbo hihqui shinanxon:

—Huetsanco hea bohanxon jahuen min racantanai hea yohihue, jonin, hen botannon —hahquin haibaan, jisxonma.

¹⁶—Marian —hahscaquin Jesusen. Jascahah rabejaquetax judiobaan join yohuani:

—Raboni —ihqui. Maestron hihcatsihqui, jaton join.

¹⁷—Hea xecoyamahue. Heen papa qui tah hen hinahihnariyamahi. Heen huetsabo yohitanhue, hea heen papa qui, maton papa qui, heen Dios qui, maton Dios qui hea hinahihnatai yohitanhue.

¹⁸Yohitanhue hahca caxon jahuen haxenicabo María Magdalenanen yohiquin:

—Noquen hihbo tah hen jistanai —jato jaxon jan nincacah jato yohiquin.

Haxenicabo qui Jesus sanareneni

(*Mt 28.16-20; Mr 16.14-18; Lc 24.36-49*)

¹⁹Jaa pecaho sca jaa neten, hahan jaton semana pehocohtai neten, jano jaabo jai xoboho mapexon judiobo qui raquexon jahuen haxenicabaan xehqui xehpoquin sirijaquin. Bepiscayi sca jahuex jato tocan Jesus nihreneni jahui.

—¿Man siripi jayamahin? —jato jaquin. ²⁰Jato jascajaxon jahuen mequen jato jismaquin. Jahuen pishi jato jismaquin. Noquen Hihbo jisish jahuen haxenicabo jenimahi. ²¹Jato yohirihbiquin:

—¿Man siripi jayamahin? Heen papan hea raanni quescajribiquin tah hen mato raanai. ²²⁻²³Jato jascajaquin yohixon jato xoonhahxon:

—Dios Yoshin bahnahue —jato jaxon— Man huetsa joni hohcha sohuamahiya tah hen jaa sohuaxontihi. Man huetsa joni hohcha sohuamayamahiya ta jahuen hohcha jascabi jaiqui —jato jaquin.

Teehihibihi Tomesen jisquin

²⁴Rabe nane janeya Tomas ta jahuen doce haxenica janinha huesti janishqui. Jesus jahui bi cahen jato betan Tomas

hihyamahi. ²⁵Jaa copi cahen jahuen hahbe haxenicabaan yohinish:

—Noquen hihbo tah non jisiqui —hahcanquin. Yohihahbaan bi:

—Jahuen mequen janin clabon metasipi quini jisyamaxon, jaa clabon quini janin heen metoti rihbi niyamaxon, pishnacohipibo janin heen mequen rihbi niyamaxon tah hen hihcoinai shinantimabirestihi —jato jaquin.

²⁶Jan jascahipi ocho neten sca jaa xoboho jahuen haxenicabo hahquirihbi tsinquit. Jato betan Tomas hihqui. Xehqui xehpotai bi jato tocan Jesus nihreneni jahui.

—¿Man siripi jayamahin? —jato jaquin. ²⁷Jato jascajaxon Tomas sca yohiquin:

—Miin metoti niah iohue. Heen mequen jisihue. Heen pishi janin miin mequen niah iohue. Paranaibo shi-nanyamahue. Hihcoinai shinanhue —hahquin.

²⁸—Heen hihbo, heen Dios —hihscai Tomas.

²⁹—¿Hea jisxon copi min hihcoinai shinanain? Jisxonma bi hihcoinai shi-nanaibo ta hahan jenimati jaiqui —Jesusen jaquin.

Non jihu-enon Juaman huishahi

³⁰Jahuen haxenicabaan jisnon bi hicha hahan honantibo Jesusen hahní bi tah hen nea quirica huishaxon texeres yohihi; hashoan hicha jan hahnibo tah hen yohiti pishinai. ³¹Jaabi Jesus noquen Papa Diosen baque Cristo hi man honancoinnon hihxon tah hen nea huishahahqui, nincacoinax Jesus qui hinamehtax man jihueyaxihnon.

Sietebo qui Jesus sanareneni

21 Jascari jato qui cainipish ca-hen Tiberias hian quexa sca jahuen haxenicabo qui Jesus sanare-

neni joribinish. Jan sanareneni jahui ta nescanishqui.

²Simon Pedro, Rabe nane janeya Tomas, Galilea mai meha Cana jema janinha Natanael, Zebedeonen baque rabe, huetsa jahuen haxenica rabe rihbi, jaabo jano hihcami.

³—Hea tah hen tsatsa benahi cahi —Simon Pedronen jato jaquin.

—Cahue non mihibetan canon —hahcanquin. Cahax nontin nanecani. Tarrafa potashinaxon bi jahuabi bihyamacanquin. ⁴Xaba paquescaiya quexabi jahuex Jesus nihreneni. Jesus que bi jahuen haxenicabaan honanyamaquin.

⁵—¿Man tsatsa bihyamahin, heen baquebaan? —Jesusen jato jaquin.

—Bihyama tah non jai —hahcanquin.

⁶—Mecayaho sca tarrafa potanahue. Jano tah man meratihi —jato jaquin. Jascayah potaxon bi naneti hahtipahyamascacanquin tsatsa hichahiya. ⁷Hahan Jesus queenai jahuen haxenicaton sca Pedro yohiquin:

—Noquen Hihbo tah qui —hahquin. Chopanma teexon bi Noquen Hihbo tah qui hihqui nincaxon jahuen chopa Pedronen sahuequin. Sahuehax jenenencanya cayahi. ⁸Texe jahuen haxenicabo nontin taxnati cahi. Tarrafa tsatsa bochohi ninibonahi cahax taxnacani, quexa hochoma hihquish cien metro ti-hixonpahi. ⁹Mapexon tsiste requeman tsatsa xohihi meracanquin. Paan rihbi jano racatai meracanquin.

¹⁰—Man rahma rahcohi tsatsa pishcaya benahue —Jesusen jato jaquin.

¹¹Nanexon jaton tarrafa ninibenaxon Simon Pedronen mapemaquin. Hanibo tsatsabo tarrafa bochohax bi huaxyamahi, ciento cincuenta y tres tsatsa.

¹²—Pihi benahue —Jesusen jato jaquin. Tsoa min quin tsoanbi jahuen haxenicaton yocayamaquin, raquexon. Noquen Hihbo hihqui honanscacanquin.

¹³Joxon paan bihxon Jesusen jato hinanquin. Tsatsa rihbi jato hinanquin.

¹⁴Jaa cahen jahuen quimisha coti sca jan hihquipish bi hahquirihbi tee-hihquipish jahuen haxenicabo qui jaa sanareneni jahui.

Pedro beten Jesus yohuanai

¹⁵Piquin jaabijahiboya Simon Pedro sca Jesusen yohiquin:

—Simon, Juaman baquen, ¿neabo hehon queenai bi hashoan bi res min hehon queenain? —hahquin.

—Jeen. Mihon ta hen queenai, Hihbon. Min tah min honanai —hihqui Simon.

¹⁶—Heen carnerobo pimahue —hahxon yocarihbiquin jahuen rabe coti sca:

—Simon, Juaman baquen, ¿min hehon queenain? —hahquin.

—Jeen. Mihon tah hen queenai, Hihbon. Min tah min honanai —hihqui.

—Heen carnerobo pimaxonhue —hahscaquin Jesusen.¹⁷ Jahuen quimisha coti sca yocarihbiquin:

—Simon, Juaman baquen, ¿min hehon queenain? —hahquin. Min hehon queenain hahquin jan quimisha coti yocacai copi Pedronen masa shinanscaquin.

—Mian tah min jatihibi honanai, Hihbon. Mihon tah hen queenai. Min tah min honanai —hahquin Pedronen.

—Heen carnerobo pimaxonhue.¹⁸ Mia tah hen yohicoinai: beronan hihquish tah min miin chopasahuehax min jan oqueenaiton nihpahoniqui.

Yosiboscaax tah min miin mequen cataxon sanatih, huetsan mia sahue-maxon jano min cacatsihyamahiton mia bonon —hahscaquin Jesusen.¹⁹ Jan yohihi ta jascahahbo mahuaxon noquen Papa Dios Nete Hihbohi Pedronen jato honanmayaxihqui qui honanahbo. Jaa pecaho:

—Hea chibanhue —Jesusen Pedro jaquin.

Jahan jan jenimahi haxenica

²⁰Rabejaquexon hahan Jesus queenai jahuen haxenicanen jato chibanheneh Pedronen jisquin. Jaa cahen pihiboya Jesus senenbixon yocaquipi, Tsoan mia parannoxihqui, Hihbon, hihnicah.²¹ Jaa jisxon cahen Pedronen Jesus yocaquin:

—¿Hoa cahran, Hihbon?

²²—Hea jonon caman jaa manati hen queenaiya, ¿mihqui jahua hihti qui? Mian hea chibanhue —Jesusen jaquin.²³ Jaa copi ta jaa pecaho hicha noquen huetsabo jaya joiji yohuanpahonishqui:

—Jaa haxenica ta mahuayamayaxihqui —hihcani. Jasca que ma bi Jaa ta mahuayamayaxihqui Jesus hihiyamani. Hea jonon caman jaa manati hen queenaiya, mihqui jahua hihti qui hihresi.²⁴ Jaa haxeniconxon tah hen honancoinxon nea joibo huishahahqui. Honancoinxon yohuana joi tah qui. Non tah non honanai.

²⁵Hashoan hicha rihbi ta Jesusen hahnishqui. Jatihibi huishapaequehah rah cahen mai senenyamascaan, quirica bochohi.

HAHNIBO

Criston raantibaan hahnibo

Jahuen yoshin noque hinantijani

1 Mihqui huishamenoxon tah hen Jeseusen hahni jatihibi mia yohini-hqui, señor Teófilon, jan honammani rihbi mia yohiquin. ²Hinahihnanaxon caman jan hahpahoni jatihibi tah hen mia yohinihqui. Hinahihnarihyamaxonta jan caisni jahuen raantibo jaan yohinishqui jascalahbo. Dios Yoshiman shinanmaha jato yohiquin. ³Jihui qui hueonahbo mahuatipish bi cahen jaabaan jisfbo hihquish jato qui sanareneni jahui, jan hahquirihbi jihuetai honanahbo. Cuarenta neten cahen jato betan hihcanahi. Jato nihquihinxon jenquetshaquin Papan noque jihuemayax-ihquin jato honanmaquin.

⁴Jato betan pixon cahen jato yohiquin:

—Jerusalen jema potabahinamaxa janobinahue, Papan yohini nocoyaxahnon caman janobi mananahue. Jaa ta Papan hinanyaxihqui qui hah ta hen mato janiqui. ⁵Juaman mato jenen nashimani bi ta Papan mato jahuen Yoshin hinanyaxihqui qui nashimaquin hahcajaquin hicha hinanresquin. Jan jascajati nete ta nea pishca sca jaonahiqui —jato jaquin.

Naiho Jesus hinahihnatai

⁶Jaatian hahqui tsinquirihbixon Jesus yocacanquin:

—¿Noquen caibobi sca hahquirihbi noquen hapo janon min rahmabi noquen nahuabo camatin, Hihbon? —hahcanquin. ⁷Yocacahbo jato yohiquin:

—Jaabi hihbo hihxon ta jayaxihquibo Papan yohinishqui. ¿Jahuentian jaticaniquin? ¿Jahua neten jayaxihcani-

hquin? Man tah man honantimahi. ⁸Jaa man honantimahi bi ta Dios Yoshiman mato coshi hinanyaxihqui qui botopaquexon. Coshi bichish tah man hehqui chanicoinyaxihqui Jerusalen jema janin, Judea mai jatihibinco rihbi, Samaria mai janin rihbi, jano nai chibechijaquehtancahuanaiton rihbi —jato jaquin.

⁹Jascahiton cahen Papan jaa bihininiquin jaton jisnonbi. Nai cohiman pantehah cahen jisyamascacanquin. ¹⁰Jan cahiya nai bejisihnihi nih nichaibaan bi joxo chopaya rabe jato patax nihreneni jahui. ¹¹Nihrenenxon yocacanquin:

—¿Jahua jenquetsahin man naihoh jisichain, Galilea mai mehabaan? Maton jisnon bi jan naihoh hinahihnatai quescauirrani ta joribiyaxihqui qui, Jesus, jaabi, huetsama —hahcanquin.

Judas xahbanen Matías caisaibo

¹²Jasca jaabo jaiya cahen Olivo janeya mahchin mehax Jerusalen janin boribicani. Jaa mahchi ta Jerusalen hochoma qui noquen xobo janinhax noquen huai tihixon. ¹³Nocotax rabe tapoyahpa xoboho bocani bochiquiha chique janin, jano jaabo jihuetai janin. Pedro, Juan, Jacobo, Andres, Felipe, Tomas, Bartolomé, Mateo, Alfeon baque Jacobo, Simon Celador, Jacobon baque Judas. ¹⁴Jaabo rahsichin Papa jaayocacanquin jaa shinan huestiya hihxon. Jato betan haibobaan rihbi yocacanquin. Jesusen jochicabaan rihbi, jahuen mama Maríán rihbi yocacanquin.

¹⁵Jano cahen noque huetsabo tsinquierihbixon, ciento veinte rah. Jato tocan mehax huenihhnaxon Pedronen yohiquin:

¹⁶—Papan huishamani joi jai quescari ta jahoxqui, noque huetsabaan. Judasen jascajayaxihqui ta Davidinin huishanishqui, Dios Yoshiman shinan-

mahah. Jesusbihmanoxon ta Judasen Jesus qui jonibo hihuehoxqui.¹⁷ Jaa Judas ta noque betan hihpahonishqui, jaa rihbi nea tee hihbomahah.¹⁸ Jan hohchaquin cananai coriquinin ta mai marohoxqui. Marohax paqueti behoracareneni pohtoshihcahinax jahuen pocobo napaquehreneni.¹⁹ Jan jascajahi jatihixonbi honanxon ta Jerusalen janin jihuetaibaan jaa mai janenishqui Acéldama, jaton join. Jimiyahpa mai hihcatsihqui.²⁰ Salmos quirica janin ta nea joi huishá jaiqui: Jahuen xobo xahbanscanon tsoabi jano jihueyamascanon

hihqui jaa quirica janin.

Jahuen tee rihbi huetsan hihbojanon hihqui huetsa quirica janin rihbi.

²¹⁻²² Jascabi sca janon huetsa sca caisnahue. Noque betan huetsa sca yohinica caisti ta jaiqui. Juaman noquen Hihbo nashimani tian noque betan nihni joni huesti. Noquen Hihbaan noque nihuihinpahoni tian noque betan nihxon rahma caman noque manapahoni joni huesti caisnahue, noquen jisnonbi noquen Hihbo hinahihnanon caman noque manapahoni joni. Jaan ta noque betan noquen Hihbo Jesus rehthahbo bi hahquirihbi jihuetai yohicointihiqui — jato jaquin Pedronen.

²³ Jaatian cahen rabe joni naponbi nihmacanquin. Huetsa cahen Matías. Huetsa cahen José, Barsabas hahcaibo. Justo jahuen jane huetsa.²⁴⁻²⁵ Jaatian cahen Papa yocacanquin:

—Hihbon, mian tah min jatihibi joni-baan shinan honanai. Criston raantibaan tee ta Judasen potabahinhoxqui jano jan cacatsihquiton canoxon. Rabe joni tah non naponbi nihmahi. ¿Jahuemeha min caisain Judasen tee jan hihbojanon? Noque jismahue non honannon —hahcanquin.²⁶ Jascajaquin yocaxon jahuemeha hin honannoxon macan bero borasa qui nanexon chicoxon jiscanquin.

Jisxon Matías honanscacanquin. Criston once raantibo betan sca hihnon jaton hahbe raanti janecanquin.

Dios yoshin jahui

2 Pentecostes fiesta nete nocotaiya cahen jaabo jatihibi huesti xoboho tsinquit. ² Jano tsahotaibaan bi nihuehhuan corotihcamahi naihoh quehax jahuemex jaa xoboho coshin corotai nincacanquin jatihibichin.³ Jascascaiya cahen chihi perehiquicamahi romishin jato qui paquereneni. Chihi perehiquicamahi joni tihibi maracahreneni.⁴ Dios Yoshiman sca jato jatihibi hihbojaquin. Jaan hihbojaxon shinanmaha huetsa join sca yohuancani.

⁵ Jerusalen janin ta jatihibi mai janhinhax jahuemex Papahon shinanai judiobo jihuecanishqui.⁶ Yohuanaibo nincacax cahen jato qui hicha tsinquiaqueti. Yohuanaiboya jatihixonbi jahuenahbi jahuen joi nincaquin. Huetsan jahuen joi nincaquin. Huetsan rihbi jahuena nincaquin. Jascajaquin jato joibi nincaquin jatihixonbi. Jascascaiya jahua copi jascarihquin honanyamacanquin.⁷ Rahte rahtexon yocacanquin:

—¿Yohuanaibo Galilea janinhahbo rahsima hin?⁸ Jascaraiboya ¿jenquetsahaxon non noquen mai meha joibi non nincacain jatihibichin?⁹ Neno tah non jai partobo, medobo, elamitabo, Mesopotamia janinhahbo, Judea janinhahbo, Capadoccia janinhahbo, Ponto janinhahbo, Asia janinhahbo,¹⁰ Frigia janinhahbo, Panfilia janinhahbo, Egipto janinhahbo, Cirene hochoma Africa mai janinhahbo, Roma janinhax pasijahi jahuib,¹¹ noquen caibo, nahua hihpahonish bi noquen caiboscaibo rihbi, cretensebo, árabebo. Papan coshin hahcai joi yohuanaiboya non nincacai, noquen joinbi —hahcanquin.¹² Rahtetax jahua

copi jascarihquin honanyamahax yocacahnancan i jatihibi:

—¹⁴Jahuatohon yohuanihquin non jascajaquin nincanon? —hihcani.

¹³Jascahibo bi yohuanxon sca caibaan

hosanquin:

—Pahenax ta jascari yohuancaniqui

—hahcanquin.

Pedro yohuanni

¹⁴Jascaraibaan bi hahbe raantibo betan nihrenenxon Pedronen jato coshin yohiquin:

—Judea mai mehabon, Jerusalen janin jihuetaibaan. Man honannon hihxon tah hen mato yohihi. Hea nincanahue. ¹⁵Noque pahenai shinan man jai bi tah non pahenyamahi. Bari ta queyarihyamahiqui. Nescaran ta tsoabi pahenyamahihqui. ¹⁶Pahenaxma bi tah non Papan joi yohinica Joelinin yohini quescia noque jai. Joelinin ta nescajaquin huishaxon yohinishqui:

¹⁷Papan ta yohihihqui: Nete queyoti hochomascaiya tah hen jatihibi jonibo heen Yoshin hinanrestihi. Hinanah sca ta maton baque bebobo, maton baque haibobo rihbi hean shinanmaha yohuanyaxihquiqui. Maton beronanbaan ta namaquen hahcajaquin hahan honantibo jisyaxihquiqui. Maton yosibobaan rihbi ta namayaxihquiqui hean jismaha jisquin.

¹⁸Jaa neten tah hen heen teexonicahbo bebobo, heen teexonicahbo haibobo rihbi heen Yoshin hinanrestihi. Hinanah ta hean jismahah yohuanyaxihquiqui.

¹⁹Naihoxon tah hen hahan rahtetibo cainmatihi. Main rihbi hahan honantibo sca cainmaribiquin. Jimi, chihi rihbi, chihi cohin rihbi jato jismaquin.

²⁰Bari ta bahquishihcahinscatihihi. Hoxne ta joshincahintihihi.

jimi quescacahini. Jascapahbo ta jatihiqui Hihbo joriyamanon. Jahuen joti nete nocotaiya ta jato casticani jotihiqui jahuen coshi jato jismanoxon.

²¹Hea hihbojahue Hihbon, hihquibo jatihibi ta Hihbaan teehihmatihiqui. Jascajaquin ta Joelinin huishanishqui.

²²Hen mato yohihi nincanahue, heen caibaan. Jesus ta Nazaret janinha joni hinanishqui. Papan raanai joni jaa hihqui man honannon hihxon ta jahuen coshi Papan hinannishqui tsoan jascajani que ma bi jaa coshiyaxon jan hahnon. Jisish hahan rahtetibojamaquin. Hahan honantibojamaquin. Maton jisnonbi ta jascajanishqui man tah man honanai.

²³Man rehteyaxihqui honanxon Papan yohini quescabijaxon ta Judasen mato jaa Jesus hinanhoxqui. Hinanah tah man rehtehohqui nincayosmabo jaa jihui qui hueonmaquin. ²⁴Rehtehipibaan bi ta Papan huenirihbihoxqui teehihmaxon. Jaa ta jascabi muhatai jatimahiqui. ²⁵Hahqui yohuanxon ta Davidinin rihbi huishanishqui:

Netetihibi noquen Hihbaan hea manahi ta hen honanai. Hea pataxxon ta hea yanapaniqui, hen masa shinanyamanon.

²⁶Jaa copi tah hen coin coinax siripi yohuanai, muhatax bi hen hahquirihbi jihuetai honanax.

²⁷Hea jascabihi muhatai hihyamanon tah min hea potabahintimahi. Minabi min joni tah min pisimatimahi.

²⁸Hea jahuentianbi queyoyamanox manati tah min hea honanmahi. Hea manaxon tah min hea hihti jenimamatihhi.

Jascajaquin ta Davidinin huishanishqui.

²⁹Honanquin sirjaxon tah hen mato yohihi, heen caibaan. Neateman jihuetai noquen xeni Davidi ta muhatai tsahoncannishqui. Jahuen tsahon

ta rahma caman jaiqui. Jatihixonbi tah non jaa honanai.³⁰⁻³¹ Miin jihuetahbajan yononon hihxon tah hen miin xohtha quiquin hapomayaxihqui hah ta Papan janishqui, jahuentianbi jahuen joi huetsajayosmaxon. Jan jascani honanxon Papan jismaha yohinica rihbi hihxon ta Cristo hihquipi bi Papan huenirihbitihi jaan honannishqui. Jaa yohihta jan jascabihi muhuatai hihyamanon potabahintimahi, jahuen yora rihbi pismatimahi hihnishqui David.³² Jaa Jesus hihquipi bi Papan huenirihbihi jisoxonta non mato yohicoinai jatihixonbi.

³³ Quiquin Hihboscahue Papan jaah ta jaa mecayaho sca Jesus tsahotihqui. Papan noque Dios Yoshin hinantijanixon ta nea man jisxon nincacai jaan hinanresiqui.³⁴ David ta naihoh nihinahyamanishqui. Jaanbi ta yohinishqui:

Noquen Hihbaan ta heen Hihbo yohinishqui, Hea mecayaho tsahotihue.

³⁵ Miin rahuibo hen mia namarjaxonnon caman tsahotihue, hahquin.

³⁶ Jaa copi honanquin sirijahue, heen caibaan jatihixonbi. Jaa man jihui qui hueonmaho Jesus ta Papan yohiscaiqui jaa huesti Hihbo hinon, jan caisaijoni —jato jaquin Pedronen.

³⁷ Jan jascahi nincaxon masa shinanxon Pedro, jahuen hahbe raantiborihibi yocacanquin:

—¿Jahueja sca non jatihin, noque huetsabaan? —hahcanquin.

³⁸ —Maton shinan pontenahue. Cristo sca maton Hihbo hihnon hihxon non mato nashimanon yohinahue maton hohcha jan sohuanon. Jascjahiton ta mato Dios Yoshin hinantijanishqui,³⁹ Mato ta hinantijanishqui, jahuen yoshin mato hinnanti, maton baquebo rihbi, jatihibi hohcho quehabo rihbi, noquen Papan quenahibo rahsibi —jato jaquin Pedronen.

⁴⁰ Basi yohuanxon cahen jato yohiquin sirijaquin:

—Nea tiromabo qui nocoyaxihqui casticanti mato xahbanjamanahue —jato jaquin.

⁴¹ Jaatian sca jan yohiham nincacoinaibo nashimacanquin. Jaa netenbi ta tres mil jonibaan Cristo bahnishqui.⁴² Criston raantibaan honanmaha cahen nincaquin jeneyamacanquin. Jato manacanquin. Noquen hohcha copi Cristo muhuaho shinanhahnan picanquin. Papa yocaquin jeneyamacanquin.

Nincamamenonibo

⁴³ Hicha hahan rahtetibo jahuen raantibaan hahcai jisish rahtecani. Hahan honantibio rihbi hahcaibo jisish raquecani jatihibi.⁴⁴ Hahmerihbi cahen jihuecani nincacoinaibo rahsi. Jaabo jai jaton jahuaborabo jatihixonbi hihbojacanquin.⁴⁵ Jaton jahuaborabo, jaton mai rihbi maromaxon cahen coriqui hinanpaquecanquin jaabo pishinai tihi jato hinanquin.⁴⁶ Jatihibi neten huesti shinanayahax Papan xoboho nocohihncani. Jenimaxon shinanquin sirijaxon jaton xobohoxon sca picanquin.⁴⁷ Papa qui siripi yohuani jihuecani. Janohahbaan rihbi jato sirijaquin yohuanquihncani. Jato betan nocohihntaibo caicananon jan teehihmahibo noquen Hihbaan rihbi jato nocohihnamaquin jatihibi neten.

Chanto rohajahibo

3 Bari racapaquescaya cahen jaabo hihqui quescari jascaran Papa yohihi tsinquitaboya Pedro betan Juan Papan xoboho mapeti cahi.² Jano rihbi cahen huesti joni chanto jahuen mamanbihni jascabi sca caibaan hioxon xehqui patax racanquin jaa neten tihibi. Siri Xehqui hahcaibo patax racaxon Papan xoboho mapetaibo coriqui yocaquin chanton.³ Pedro betan Juan jaa xoboho mapecatsihscayi jisxon jahuen mequen mehanahxon coriqui pishca jato

yocaquin.⁴ Yocaca jaa jisquin sirijaxon sca:

—Noque jise —hahcanquin.⁵ Jasca-hahbo coriqui pishca bihti shinanxon jato jisquin.

⁶—Heen coriqui yamahi bi tah hen hen huetsa jai pishca mia hinanai. Jesucristo Nazarenon janen ta hen mia yohihi. Nihrescahue —hahquin Pedronen.⁷ Jascajaxon mecayaho mehue-tanxon huenihihniquin. Huenihihniha jahuen tahebo jahuen tapoxcobo jahuen ponobo coshicahinax cayatani nihrenenscrai.⁸ Nihaquehtanscrai. Nihaquehtanax jato betan sca Papan xoboho mapescrai. Nichish cayacanahax:

—Papan ta hea hahxonihqui —hihqui.⁹ Nichish jascari Papa qui siripi jaa yohuanai jisxon cahen janو hihquibo rahsichin jaa honanquin.¹⁰ Siri Xehqui hahcaibo patax jaabi tsahoxon Papan xoboho mapetaibo coriqui yocarahsihi honancanquin. Jan siriscrai honanax hiti rahtecani. Rahte rahtecani.

Pedro yohanai

¹¹ Pedroya Juan jaa jonin xecohiya janо hihquibo rahsibi rahtetax Salomonen xobo hahcaiboho jato qui tsinqui-jaqueti, xobo rechiho.¹² Tsinquijaque-taibo jisxon Pedronen sca jato yohiquin:

—Heen caibon. ¿Jahua copi man nea jisish rahtetain? ¿Jahua copi man no- quen coshinbi noquen shinamanbi non nea joni nihmahi quesca man noque jisin?¹³ Noquen xenibo hihpahoni ta Abraham qui, Isaaque rihbi, Jacobo ri-hbi. Jaton Papa Dios ta noquenah qui. Jaa noquen Papan ta jahuen joni Jesus shinanya hih mato jismahihqui, Pi-lato jaa Jesus hinanax man queenyamahoh que bi. Pilatonen jaa picocatsiqui bi tah man queenyamahohqui, noque ji-huemanicahma tah qui hihquish.¹⁴ Jaa ponte joni que bi tah man queenyamahohqui, jaa Papan baque que bi. Queenya-

maxon tah man rehtemis joni mato picoxonti man yocahohqui.¹⁵ Noque jihuemanicah tah man matonbi rehtemahoqui. Rehtehipibaan bi ta Papan teehihmarihbihoxqui. Jan teehihmahi jisoxon tah non mato yohiscrai.¹⁶ Cristo honancoinxon tah non jahuen janen nea joni rohajahaqui, nea man jisi man honanax jonibi. Jan noque hinanax shinaman tah non nea coshijahaqui, maton jisnonbi.

¹⁷ Honanyamaxon tah man rehtemahoqui, noque huetsabaan. Maton tinintibaan rihbi honanyamaxon rehtequin. Hen tah hen honanax.¹⁸ Cristo ta hohmis hohmisyaxihqui qui hihxon Papan joi yohinicabaan jatihixonbi janí quescaja ta Papan jahoxqui jascahahbo.¹⁹ Jaa copi maton shinan pontenahue, maton hohcha Papan sohuanon.²⁰ Sohuaxon hahan maton shinan behnajati netebo Papan mato hinannon. Pontejaquin shinanax sca jihuenahue. Jan mato hinanax jahuen Cristo ta Jesus qui. Jaa jan raanon pontejaquin shinannahue.²¹ Jahuen joi yohinon hihxon ta jahuen joi yohinicabo Papan caisnishqui. Jaabaan yohini jatihibi quescia janon caman ta noquen Jesus naihoh banetahbiqui.²² Moisesnin ta yohinishqui: Maton huetsabi ta joi yohinica Papa Diosen mato qui raanyaxihqui qui jaa maton huetsabi hea quescapa joni. Jan yohihi jatihibi tah man nincathihi.²³ Jaa joni nincayamahi jatihibi tah man Papan baqueboma qui picomaxon queyobahintihi, hahquin huishaquin.

²⁴ Samuel jaa pecaho joxon yohinicabo rihbi jatihibi ta jascarihbibi yohuannishqui, nea netebo yohihi.

²⁵ Mato tah man hoa yohinicabaan baquebo qui. Main jihuetaibo jatihibi jato shinan siri hinannon tah hen miin baquebo sirijaquin shinamatih, hah ta Papa Diosen Abraham janishqui. Jaanbi mato hahxonnoxon ta maton

xenibo rihbi jascajati yohinishqui. Jaa copi ta jaa joi matonah rihbi qui, Papan jisnonbi man jascanon.²⁶ Jahuen baque raanxon ta mato qui pari Papan jaa raannishqui. Maton hohcha potamaxon mato jatihibi sirijaquin shinanmahi jonon hihxon mato qui jaa raanquin —jato jaquin.

Quenamahabo Pedro betan Juan cahi

4 Sacerdotebo betan Papan xobo coiranai sontarobaan hapo sca becani. Saduceobo rihbi jato betan jahui. Joxon sca tsiniquitaibo yohihiton meracanquin. ² Jan Jesus hueniho quescajaquin mahuanihbo Papan hueniyaxihqui hihxon cahen janoo jai jonibo Pedro betan Juaman nincamaquin. Jato honanmahi merahax sinaxon jato bihcanquin. ³ Bihxon bepiscai copi bahquish pari jato casticanyaxahpan hihxon sipo xoboho jato tsahoncanquin. ⁴ Jaabi ta Criston joi siri nincacaibaan hichaxon nincacoinnishi qui, cinco mil jonibaan.

⁵ Hoxashinahax mohiyahtax jaton hapobo jatihibi jaton hanibo betan tsinquiscái. Huishani honanbo rihbi jato betan Jerusalen jema janin tsinquit becani. ⁶ Jaton quiquin sacerdote Anas, Caifas, Juan, Alejandro, jaabo, quiquin sacerdotebaan jenabo jatihibi rihbi jato betan tsinquit. ⁷ Pedro, Juan naponbi nichinxon yocacanquin:

—¿Jahua coshin man hahquipiquin?
¿Jahua janen man jascajahipiquin? —jato jaquin.

⁸ Dios Yoshiman hihbojaha sca Pedronen jato yohiquin:

—Jema hihbobon, noquen hapobon.
⁹ ¿Jenquetsahaquin man nea chanto rohajahipiquin? ¿Jahuatohon man jaa rohajahipiquin? hah man noque jaiya tah hen mato yohihi, man honannon hihxon. ¹⁰ Jatihibi noquen caibaan honannon hihxon tah hen mato yohihi. Ma-

ton tah man Jesus Nazareno jihui qui hueonmaxon rehthehohqui. Jaa man rehthehipi bi ta Papan hahquirihbi tee-hihmahoxqui. Jahuen janen tah non nea rohajahipiqui, rahma siri sca mato bebonbi nihnon.

¹¹ Jaa Jesus ta hahqui xobojati jihui quescapah qui, tiroma tah qui hihxon man xobojahibaan potanih que bi. ¹² Jaa huestichin ta noque teehihmati hatipahiqui. Huetsa noque teehihmanica ta yamahihqui ni jahuenbi. Jaa huestichin jonibo teehihmanon ta Papan jaa yohihiqui —jato jaquin.

¹³ Raquetaxma Pedro betan Juan yohuanai jisxon, escuela janin hihpahonima bi jemama qui hanini rabe jato honanax rahtecani. Jesus betan nihpahonibo sca jato honancanquin. ¹⁴ Rohajahipi joni jato patax nichi jisxon joi bichincatsihxon bi jahua yohiti hahtipahyamacanquin. ¹⁵ Tsinquitaiboma qui jato picomahax res sca yohinannanscacani:

¹⁶ —¿Jahueja non jato jatihin? Hanhan honanti hani ta hahquipicanaxqui. Jatihixonbi ta Jerusalen janinhahbaan honanilhqui. Hahyama ta jaipicanaxqui, hih tah non jatimahi. ¹⁷ Jaabi, jaa joi huetsabo janin caícanayamanon jato yohinon benahue. Jaa janen yohuanya-mascanahue, non mato rishquimis jistahi man tan, hahquin jato yohinahue —hihcáni. ¹⁸ Quenamaxon sca jato hihti yohicanquin:

—Jesusen janen yohuanya-mascanahue tsoh. Jahuen janen tsoabi yohiyamanahue —jato jacanquin. ¹⁹ Jascahahbo Pedro betan Juaman jato yohiquin:

—¿Papan jisi jahuemeha ponte quin?
¿Mato noquen nincati nan? ¿Noquen Papabi non nincati nan? Shinannahue.
²⁰ Noque tah non non jisnibo chaniti jai, non nincanihbo rihbi yohiti jai. ²¹ Jascaraiton jato tahtijaribican-

quin. Jema janin jato nincacatsihquibo hicha jai quen jenquetsahaxon casticanti honanyamaxon tahtijaribixon jato Boresscatannahue hahrescanquin. Jaa rohajahipi honanxon texe jatihixonbi, Hahxon tah min jaa jai Papan, jaiboya, casticanti hahtipahyamacanquin. ²² Han han honantijaquin jaabaan rohajahipi joni ta cuarenta bari janishqui, hashoan rihbi. Jaa copi cahen jatihixonbi jaa honancanquin.

Papan coshi yocacaibo

²³ Boresscatannahue hahcabo sca jaton hahberabetibo qui caxon jaton sacerdote hapobo betan jaton hanibaan jato tahtijahi yohicanquin. ²⁴ Yohiha jatihixonbi Papa yocacanquin:

—Hihbon, naiyahpa mai, hian, janobo jai jatihibi rihbi tah min hahniqui. ²⁵ Miin Yoshin siri mian hinanah ta noquen xenibo David miin jonixon miin joi yohinishqui:

¿Jahua copi noquen nahuabo sina sinatihquin? ¿Jahua copi noquen caibaan honanma jai joibo yohiti shinanihquin?

²⁶ Mai meha quiquin hapobaan ta jaton sontarobo nichiniqui rehte manoxon. Jaton hapobo tsinquecani, noquen Papa rehtecatsihqui, jan cai sai joni rihbi rehtecatsihqui

hah ta Davidinin janishqui huishaquin.

²⁷ Jascacoini. Herodes, Poncio Pilato, nahuabo, noquen caibo, jaabo jatihibi ta nea jema janin tsinquihoxqui. Minabi miin joni qui sinatax ta tsinquecan hoxqui. Min caisai miin Jesus qui ta sinacanhoxqui. ²⁸ Mian shinanxon miin mequeman hahmaha jayaxihquibo min yohini quescabija ta jaabaan jahoxqui. ²⁹ Rahma jaabaan hahan noque tahtijahi joibo jise, Hihbon. Raquexonma non miin joi yohinon noque coshi hinanhue, noque miin jonibo. ³⁰ Miin mequeman mehexon jonibo rohajahue. Miin baque

Jesusen janen non hahan honantibo hahnon hahan rahtetibo rihbi non hahnon jahue —hahcanquin. ³¹ Papa yocaquin janquenza sca jaiboya jaabo jano tsinquitai xobo xayascai. Dios Yoshiman jato jatihibi hihbojaha sca raquexonma Pan pan joi yohicanquin.

Jaabo jai jatihibi hinancanquin, jatihibichina sca janon

³² Jaatian cahen nincacoinaibo jaa shinan huestiya hihcani. Jatihixonbi jaa huesti shinancanquin. Jan jaibo yohihi, jaa ta hena res qui, hih tsoabi jayamahi. Jatihibi jaya hihqui. ³³ Papan coshiyaxon hahxon cahen noquen Hihbo Jesus hahquirihbi teehihscai yohicanquin jahuen raantibaan. Jato jatihibi ta hicha shinan Papan hinannishqui. ³⁴ Jato tocan tsoabi jahuabi pishinyamahi. Xobo jaxon maromacanquin. Mai jaxon jaa rihbi maromacanquin. ³⁵ Maromaxon coriqui bihxon caxon Criston raantibo hinancanquin. Jaabaan sca pishinaibo hinanpaquenon. ³⁶ José janeya huesti ta Criston raantibaan Bernabé janenishqui. Bernabé cahen sirijaquin shinanai baquebo hihcatsihqui. Jaa cahen Chipre janinhax jóni, levito joni. ³⁷ Mai hihbon cahen jahuen mai maromaxon coriqui bichish jaya caxon Criston raantibo hinanscaquin.

Ananías betan Safira

5 Ananías janeya jonin sca jahuen haibo Safira betan jaton mai maromaquin. ² Coriqui bihxon, Jascajahue jahuen haibaan rihbi jaah, texe mequecanquin. Texe mequeman texe boxon Criston raantibo taracanquin. ³ Pedro nen sca yocaquin:

—Ananin. ⁴ Jenquetsahaxon Satanasnas miin jointi hihbojahaxquin, min maromahi texe yohuashihxon Dios Yoshin paranti min shinannon?

⁴ ¿Maroyamaha minabi hihyamahipishquin? ¿Maromaxon sca jaa coriqui hihboxon quesayamaxon min queenai quescajati min hahtipahyamahin? ¿Jahua copi sca min jascajaquin paranain? Jonima bi tah min noquen Papabi parancatsihqui.

⁵ Jan yohihah nincacax Ananías racareneni mahuascai. Jaa chanihu joi nincacaibo rahsi sca hihti raquecani. ⁶ Beronanbaan sca huenixon Ananías rahcoxon boxon tsahoncanquin.

⁷ Quimisha horabo huinohax jahuen haibo sca hihcohi. Jaan cahen jahuen bene jascarax mahuatah honanyamaquin. ⁸ Jaa sca Pedronen yocauquin:

—Hea yohihue. ¿Man noque hinanah tih copitai min mai maromahaquin? —hahquin.

—Jatihi copitai rahan —hahquin. ⁹ Pedronen sca:

—¿Jenquetsahpahin man rabexonbi Dios Yoshin tanati shinanahquin? Nincahue. Miin bene tsahontanaibo ta mapescαιqui. Mia rihbi sca ta hioxihcanihqui —hahquin.

¹⁰ Jaatian cahen Pedro taracahrene-nax haibo mahuati. Hihcoxon cahen haibo mahuascai meraxon beronanbaan boresscaquin. Boxon jahuen bene janin tsahonscacanquin. ¹¹ Jaatian ta nincacoinaibo jatihibi hihti raquenishqui. Jaa joi nincacaibo rahsi raqueti.

Papan rahtetibojahi

¹² Jaa jema janinxon ta Criston raantibaan hicha hahan honantibo hahnishqui, hahan rahtetibo rihbi hahquin. Salomonen rechí xoboho sca jatihibi tsinquicani. ¹³ Tsinquitaiboya caibo tsoabi jato betan tsinquiayahi raquetax. Raquexon bi jema janinhahbaan jato hihti siri jisquin.

¹⁴ Nincacoinaibo cahen caícanascai. Bebobo, haibobo rihbi tsamascai.

¹⁵ Hihti caiboscaiaya cahen jema bahinbi jaton pishinbo, jaton cacajatibo racanxonxon jaton hisinyahpabo jano racancanquin, Pedro jahuiya jahuen bari yoshiman bocabi jato huinonon hihxon. ¹⁶ Jerusalen hochoma jemabo janinhax sca hicha jonibo jahui. Jaton hisinyahpabo hihuecanquin. Tiroma yoshinyahpabo rihbi hihuecanquin. Jato jatihibi ta Criston raantibaan rohajanishqui.

Pedroya Juan bichibo

¹⁷ Jasca sca jaiboya jaton quiquin sacerdote jahuen hahbe saduceobo betan notsi notsiscai. ¹⁸ Notsi notsixon porisiaboo bihmaxon Criston raantibo sipo xoboho tsahoncanquin. ¹⁹ Tsahonahbaan bi yame noquen Hihbaan naihoh queha yonoti joxon sipo xobo xehpoti quehpenxonxon jato picoquin. Picoxon:

²⁰ —Botannahue. Papan xoboho mapexon jonibo nea hahan jihueta joi jatihibi yohitannahue —jato jaquin. ²¹ Jan yohihi quescabijascacanquin. Xaba paquetaiya bi Papan xoboho mapexon jonibo haxemascacanquin.

Jaatian cahen quiquin sacerdote, jaabo, jahuen hihti janin nocoxon hahbe hapobo tsinquimaquin israelibaan hanibo rahsi. Jato tsinquimaxon porisia sca sipo xobo janin raancanquin jato hihuenon hihxon. ²² Sipo xobo janin nocoxon sca porisiabaan jato xahbanjaquin. Joribixon sca jan xahbanjatanai yohicanquin:

²³ —Xehpoti jascabi xehpohah tah non meratanai, hihti xehpohah. Sipo xobo coiranicaah rihbi tah non jahuen xehqui xehnichai jistanai. Non quehpenxon jisí bi ta tsoabi yamahaxqui —hahcanquin.

²⁴ Chanihibo nincacax Papan xobo coiranai sontaro hapo betan quiquin sacerdotebo rahtecani, ¿Jahua sca janox-

ihquiquin? hihcani. ²⁵Jato yohihi sca huetsa jahui.

—Man sipo xoboho tsahonipibaan ta Papan xobohoxon jonibo haxemahiqui —hahquin. ²⁶Jahuen sontarobo betan caxon jaa xobo coiranai hapon sca jato hihuequin. Jan hapo qui hihuehi copi jonibaan jato macaman tsacapaho hihxon coshixonma jato hihuequin honax-onbi. ²⁷Hihuexon hapobo tsinquitai naponbi sca jato nichinquin. Quiquin sacerdotenin sca jato yohiquin:

²⁸—Jaa janen yohiyamascanahue hah tah non mato jaipiqui, sirijaquin yohiquin. Yohihah bi tah man Jerusalen jatihobi maton honanmati joi jato nincamahi. Jaa joni rehtehoh quen tah man jaa hohcha noque hihbomacatsihqui —jato jaquin.

²⁹Hahbe raantibo betan Pedronen sca yohiquin:

—Joni mentan tah non hashoan noquen Papa nincati non jai. ³⁰Noquen xenibaan Papa Diosen ta Jesus teehihmarihbihoxqui, jihuin hueonxon man rehtehipi que bi. ³¹Jaa ta noquen Papa Diosen huenihihnihoxqui, jaa mecayaho tsahonon quiquin hapo sca jonibo teehihmanicah. Noque israeli baquebo ponte shinan hinanxon noquen hohcha sohuanon ta noquen Papa jaa huenihihnihoxqui. ³²Noquenbi jisoxon tah non yohiscai. Noque ta jahuen Yoshin siri rihbi Papan hinanihqui jahuen joi nincacoinaibo rahsibi. Noque ta yanapanihqui —hihqui Pedro.

³³Jascalahabno nincaxon cahen hihti sinaxon jato rehtecatsihscacani. ³⁴Jano rihbi huesti fariseo tsahoti, Moisesnin huishani joi honan, Gamaliel janeya. Jatihibi jonibaan siri jisi joni. Hapobo tocan nihrenenxon Criston raantibo jatoma qui picomatahtahxon jaan jato yohiquin:

³⁵—Heen caibaan. ¿Jahueja man jaabo jacatsihquin? Sirijaquin

shinannahue. ³⁶Neateman ta Teudas jonishqui. Hapohihti shinanax yohuanaiton sca ta hicha tahni jonibaan jaa chibannishqui hahbetan nihcatsihquiaan. Cuatrocientosbo. Jaabi hihbocatsihqui bi ta rehtexon jaa chibanaibo rihbi jabamacannishqui, jahuabi sca yamanon. ³⁷Jaa pecaho ta Galilea janinhax Judas jonishqui jonibo topopaquehibo tian. Caibo hiohiton bi ta jaa rihbi rehtexon hahbe cahibo rihbi jabamacannishqui. ³⁸Jaa copi tah hen mato rahma yohiscai. Jaabo jenenahue, jenebahinquín. Jaabaan bi shinanxon hahcaiya cahen jahuabi jatimahi. ³⁹Papa Diosen shinanmaha hahcaiboya cah man jenquetsahaxon bi jato pantetimahi. Dios betanbi man rehtenanai man meramis —jato jaquin.

⁴⁰Nincacax jeenhihcani. Criston raantibo quenamaxon sca rishqui rishquimaxon Jesusen janen yohuanyamascaabo hihxon tahtijaxon jato camascacanquin. ⁴¹Picohahbo hapobo janinhax jenimacanahi bocani. Criston jonibo copi ta mato tiromajacaniqui. Tenescaibo tah man qui Papan jaiya jenimacani. ⁴²Jatihibi neten Papan xoboho yohuanax jaton xoboho rihbi yohuancani. Jesus ta Papan caisai joni qui hihcane. Honanahbo nete tihibi nincamahi tantiyamacani.

Siete hahxonnicabo

6 Nincacoinaibo caícanahiya sca ta hebreobo qui helenistabo rerer rerencanishqui. Nete tihibi piti hinanpaquehibaan jaton yononmabo hinanyamahiya rerer rerenscacani. ²Nincacoinaibo tsinquimaxon sca Criston raantibaan jato yohiquin:

—Non Papan joi yohiquin jenebahinxon piti metexxona ta tiroma qui. ³Jaa copi man honanai siri jonibo caisnahue. Siete caisnahue, Dios

Yoshiman hihbojahi rahsi. Shinan siriya rahsi caisquin, piti hinanpaqueti tee non jato hinannon.⁴ Noque cah non yocaxonxon Papan joi yohinicabo sca jatih —jato jacanquin.

⁵ —Jascalah ta siri qui —hihxon sca jatihixonbi caiscanquin. Huetsa cahen Esteban, shinanya siri, Dios Yoshiman hihbojahi joni. Huetsa cahen Felipe. Texe cahen Prócoro, Nicanor, Timon, Parmenas, Nicolas, jaton nahua hihpanish bi judioni Antioquía janinhah. Jaa rahsi caiscanquin.⁶ Criston raantibо bebon jato nichinxon mehexon jato yocaxoncanquin.

⁷ Hashoan sca cahen Papan joi caícanascai. Jerusalen janin nincacoinaibo rihbi hashoan caícanahi. Sacerdotebaan rihbi cahen hichaxon nincacoincanquin.

Esteban bichibo

⁸ Hicha Papan shinanyaxon sca Estebanen hihti hahan rahtetiboaquin. Jonibo rohajaquin. Hahan honanti-jaquin Papan coshiyahpaxon.⁹ Jaatian sca judiobaan Esteban joi bichincanquin. Hinaboma sca hahcaibo, cirenobo, alejandrino, Cilicia janinhahbo, Asia janinhahbo. Jaabo rahsichin Esteban joi bichincanquin.¹⁰ Dios Yoshiman yanapana hashoan honanax Esteban yohuanaiya sca hahbetan yohinanti hahtipahyamacanquin.¹¹ Yohinanti hahtipahyamacaxon jonexon coriqui hinanxon caibo sca yohuanmacanquin, quesahabho hihxon.

—Moises qui tiromahi yohuanai tah non jaa nincaquipiqui. Noquen Papa qui tiromahi yohuanai rihbi tah non jaa nincaquipiqui —hihcani quesahi.¹² Esteban qui sinatax coro corotahbo cahen jonibo rihbi judiobaan coro coro-maquin. Jaton hanibo rihbi, huishani honanbo rihbi sinamacanquin. Jaabaan sca Esteban panterenexon bixhon jaton hapo tsinquitai janin bocanquin.¹³ Que-

samisbo sca yohuanmacanquin hahqui yohuanahbo.

—Jaa joni ta nea Papan xobo qui tiromahi yohuanihqui. Noquen Moisesnin huishani joi qui rihbi tiromahi yohuani. Tiromahi yohuani ta tantiyamahihqui.¹⁴ Joxon ta nea xobo Jesus Nazarenon fotojaquetanxon noquen hihti quescayamascai non jihuuenon Moisesnin joi rihbi huetsajayaxihqui qui hah ta jaipishqui noquen nincanonbi —hihcani.

¹⁵ Jano tsinquitai hapobaan sca Esteban bejisquin sirijaxon jahuen bemanan naihoh queha Papan yonoti bemanan quesa sca jiscanquin jatihixonbi.

Estebanen jato yohi

7 —¿Jascama hin? —hahquin quiquin sacerdotenin sca.

² Esteban sca yohuani:

—Hea huetsabaan, heen papabaan, hea nincanahue. Xaba Hihbo noquen Papa ta noquen xohta Abraham qui cainnishqui, Haran jema janin jihuetai cariyamahax, Mesopotamia mai janin jihuetaiya.³ Miin mai, miin jenabo rihbi potabahini catanhue, hen mia jismatihi main sca cahi catanhue hah ca noquen xohta janish noquen Papan.⁴ Papan Cahue hahca cahen Caldeo mai potabahinax Haran janin sca jihuetai. Jahuen papa mahuatipi peccaho ta neno sca Papan jaa hihuensisqui. Nea main man neno rahma jihuetai mai janinbi ta hihuensisqui.⁵ Jaabi ta nea mai jaa hihbomayamanishqui. Ni huesti tamanehcahinti hihbomayamaquin. Hihbomaya-maxon bi hinantijaquin, jahuen hihyaxahnon jahuen baque yamahi que bi jahuen baquebaana, jahuen chini baquebaana rihbi hihyaxahnon jato hinantijaquin.⁶ Jahuen chini baquebo sca jaton nahuabaan main cahiton jaton nahuabaan jato hihbojaxon cuatrocientos bari jato tiromajayaxihqui ta yohirih-

binishqui.⁷ Jaabi ta jato hinajahi jonibo hean casticanyaxihqui. Jaatian ta picós-caxon nenoxon sca hehon shinanyaxih-canihqui hih ta Papa janishqui.⁸ Miin baquebo caijaxon jato jano jihueta hi-nanah ta heen jonibo hiyaxihcanihqui hea nincacoinaibo hah ta Papan janishqui, Abraham yohiquin. Jaabo honantiyahpabo jayaxahnon hihxon sca ta Honantiyahpa jahue Papan jaa janishqui. Jaa pecaho ta Abrahanen baquejanishqui. Jahuen baquexo Isaaque cainipi huesti semanan huinoxon ta jahuen ocho neten sca Abrahanen jaa jahuen baquexo honantijanishqui. Isaaquen baque sca ta Jacobo janeya janishqui. Jacobonen baquebo rihbi sca ta noquen doce xohtabo janishqui, noquen xenibo.⁹ José qui notsi notsixon ta noquen xenibaan jaa maromaxon hinancannishqui, Egipto mai janin bohábo.¹⁰ Jaabi ta noquen Papa Dios hahbetanbi nihxon jan yomanahyamascanon yomanahтайtihibi jaa yanapannishqui. Egipto mai janin quiquin hapon José siri joni hi-hqui shinannon ta José honan joni hi-hqui jismanishqui. Quiquin hapon sca ta Egipto mai jatihibi jaa José hihbomanishqui. Jahuen xobo hihbomaxon, jahuen xoboho jihuetaibo rihbi jatihibi hihbomaquin.

¹¹ Jaatian ta Egipto mai janin Canaan mai janin rihbi jahuenbi piti yamascaiyapihan hihcannishqui. Hihti hohmis hohmisan. Piti merayamabirescanquin noquen xenibaan.¹² Egipto mai janin tsinquinibо bimi bero tsama jai joi nincaxon ta Jacobonen noquen xenibo raannishqui marohi cahábo.¹³ Jato raanhohxon raanrihbiquin. Jaatian pari ta Hea tah hen qui, Josepan jahuen huetsabo janishqui. Jaatian pari ta Tsoabo Josepan jenabo quin jaa mai meha quiquin hapon honanscanishqui.¹⁴ Jahuen huetsabo raanxon cahen jahuen papa Jacobo, jahuen jenabo

jatihibi Josepan quenamaquin jano bohábo setenta y cinco jonibo.¹⁵ Jahuen baquen quenamaha sca Egipto main Jacobo cahi. Canish cahen janohaxbi muhuati. Noquen xenibo rihbi yosibohax janohaxbi muhuati.¹⁶ Muhuataiton cahen Siquem janin jato boxon jano Abrahanen jahuen coriquinin maroni jano tsahonti main sca jato tsahoncanquin Siquem janinbi. Hamoren baquebo jan maronni tsahon janinbi.

¹⁷ Papan Abraham yohini quesca sca jaonahiya ta Egipto janin noquen caibo caípahonishqui. Hichascai, jaabo.¹⁸ Huetsa quiquin hapo sca ta jaresscanishqui, José honannihma joni sca.¹⁹ Jaan cahen noquen caibo paranxon jato tiromajaquin. Jaton baquexobo mahuanon hihxon jato nihi naman potabahinmaquin.²⁰ Jaatian ta Moises baquexo jahuen maman bihnishqui. Noquen Papa Diosen jisí, baquexo siri pishca. Quimisha hoxne xobohoxon jaa coirancanquin jahuen papan jahuen maman.²¹ Tahua naman sca jonebahinscacanquin. Jano racanahbo sca jaton quiquin hapon baque haibaan jaa meraquin. Meraxon cahen jahuen baquebi hahcajascaquin hanijaquin.²² Haniscaiton cahen Egiptobaan quirica jatihibi jaa honanmacanquin. Haniscaxon hicha honanquin. Jan hahcai hochoxon joi nincacanquin.

²³ Cuarenta bari jaresscaxon ta jahuen huetsabo pasijahi cati shinannishqui jahuen caibo pasijacatsihquin.²⁴ Jahuen caibo tiromajahiton egipto joni meraxon cahen jahuen caibo yanapanquin. Jaa tiromajahi joni copiquin rehtequin.²⁵ Noque piconon Papan yanapanai joni tah qui hih ta hea yohihi janoxihcanihqui hihqui shinamehti. Hihcax bi jascayamahi.²⁶ Hoxashinahax mohiyahxon sca noquen caibo rabe sinacananaiton

meraxon cahen jato sina tantimacat-sihquin yohiquin: ¿Jahua jenquetsahin man maton huetsabo betanbi tiromahanain? jato jaquin. ²⁷ Jascalah bi jahuen caibo tiromajahi jonin sca Moises hueranbohanxon: ¿Tsoan yohihah min noquen hapo jacatsihquin? ¿Noque pontenica hihnon tsoan mia yohihiquin? ²⁸ ¿Hoa egipo joni min hahquipi quesca-jaquin min hea rihbi sca rehtecatsi-hquin? hahquin. ²⁹ Jascarai nincacax ta Moises jabascanishqui. Madian mai janin sca jahuen nahua tocan jihuexon rabe baquejaquin.

³⁰ Cuarenta bari huinorihbi sca jaiya ta Sinaí nihi namanxon sca jihui na-man tiha pishca mapohihcamahi janin Papan yonoti jisnishqui. ³¹ Jascapa mer-ahax rahteti. Jisquin sirijacatsihquish ta hochoma pishca caxon noquen Hihbo yohuanai nincanishqui. ³² Hea tah hen miin papabaan Papa Dios qui. Abraham, Isaaque, Jacobo jaton Papa Dios ta hea qui hihqui nincaquin. Nincacax tastahihqui. Jisti raquescai. ³³ Noquen Hihbo sca yohuanrihbihi: Hea janin tah min nichí. Miin tahe xaca potasc-ahue. ³⁴ Egipo janin heen jonibo hohmis hohmisai tah hen jisi. Jaabo sai saihi-hcanahi tah hen nincacai. Jaa copi tah hen jato picohi sca botopaqetai. Jo-hue hihcaisen hen mia Egipo mai janin raannon hahquin.

³⁵ Egipo janin jihuetahbaiton, Tsoan yohihah min noquen hapo jacatsihquin, pontenica mia hihnon tsoan mia yohihiquin hah jaabaan Moises janí que bi ta jaamama jaabi Papan raannishqui jaton hapo sca hihnon. Jato piconica sca hihnon raanquin. Naman tiha jihui mapohi janin jahuen yonoti raanxon ta Papan jascajaxon Moises sca raannishqui. ³⁶ Egipo mai janinxon sca cahen hahan rahtetibojaxon hahan honantibojaxon rihbi Moisesnin jato picoquin. Hian Joshini janinxon rihbi jascajaquin. Nihi

namanxon sca cuarenta bari rihbi jasca-jaribiquin hahan rahtetibojaque. Hahan honantibojaribiquin. ³⁷ Jaa Moisesnin ta noque israeli baquebo yohinishqui:

Mato tocan ta hea quescapa jahuen joi yohinica Papan cainmatihiqui ma-ton huetsabo janinhahbi, hahquin. ³⁸ Jaa Moises ta noquen caibo xenibo tsin-quitai tocan nihnishqui. Papan naihoh queha yonoti betan ta nihnishqui. Sinaí mahchi janin rihbi ta Papan yonoti betan yohuannishqui. Noquen xenibo betan yohuanni Papan yonoti betan rihbi ta jaa nihnishqui. Hahan jihuetahbaiton joi ta Papan jaa hinannishqui, mato sca jaan rihbi nincamanon hihxon.

³⁹ Jaabi ta noquen xenibaan nincacat-sihyamanishqui. Jaa potabahinxon ca-hen jaton jointinin Egipo shinanrihbi-canquin. ⁴⁰ Aaron sca yohicanquin: ¿Hoa Moises, Egipo mai janinhah noque pi-coho Moises, jahuen cahipishquin? Non tah non honanyamahi. Noque bebon jaabo sca canon santobo noque hahx-onhue jaabo sca noquen diosbo hihnon hahcanquin. ⁴¹ Jascajaxon toro quescapa santojacanquin. Jascajaxon jaton hinábo jaa santo rehtexoncanquin. Jaton mequemanbi jascapahahax hahan jenimacani. ⁴² Jaa copi ta noquen Papan jato potabahinnishqui. Jahuen joi yohinicabaan huishaxon yohini quescajaquin jato potabahinquín, huishi, bari, jaabo jaton dios sca hihnon.

¿Man cuarenta bari nihi namanxon hinábo rehtexonxon hea mapojax-onpahonihquin; israeli baquebaan?

⁴³ Hea queenyamaxon tah man Molou-quin chopa xobo bihniqui. Huishi rihbi tah man chibapahonihqui, Renfan janeya maton dios jai quen. Santojarihbi tah man janiqui jaa sca yocanoxon. Jaa copi tah hen Babilo-nia hoque tocan mato potatihi hah ta Papan jato janishqui jahuen joi yohinicabo huishamaxon.

⁴⁴ Noquen Papan jato yohini jahan honanti chopas xobo ta noquen xenibotocan janishqui jaabo nihi naman nihnpahoni tian. Hen mia jismaha quescapahhue hahxon ta Papan Moises yohinshqui jascajaquin jan jaa xobojanon. Jaa copi ta Papan Moises jismani quescapajanishqui. ⁴⁵ Josué betan noquen papabaan jaton mai hihbojanon sca ta neno jihuelpahoni nahuabo Papan camaxonnishqui jaton mai bichinahbo. Jan camaxona ta Papan chopas xoboyabi becannishqui nea mai hihbojahi sca. David quiquin hapo hihnon caman ta jaa xobo janishqui. ⁴⁶ Jaa David cahen Papan jisquin siri joni. Jas-capahxon ta Papa Dios xobojaxoncatsihxon Davidinin noquen Papa yocanishqui, jahuen xohta Jacobo yamanicaton Papa Dios. ⁴⁷ Queenxon bi ta Davidinin jaa xobojayamanishqui. Salomonen ta jaa hahnishqui. ⁴⁸ Jascapa xobo jai bi ta mequeman xobojahibo janin Xaba Hihbo jihuayamahihqui. Papan joi yohinica yohuanni quescari tah qui:

⁴⁹ Nai ta heen tsahoti qui. Mai ta heen taracahti qui. Jatihibi janin ta hea jai. ¿Jenquetsahpa xoboja sca min hea jaxontihin? ¿Hea janu hihti jahua jaiquin?

⁵⁰ ¿Hoa jatihibi hean hahyamaniquin? hih ta noquen Hihbo jaiqui hih ta Papan joi janin jaiqui.

⁵¹ Nincayosmabon, Papan baquebo hihqui shinanax bi tah man jahuen nahuabo res qui. Maton jointinin shinanxon maton pabinquinin nincaxon bi tah man Papa nincayamabiresai. Dios Yoshin tah man jaapantehi, mato jahuen shinan hinanpanan. Maton xenibotaní quescaribhi sca tah man jai. ⁵² Papan joi yohinicabo jatihibi ta maton papabaan tiromajacannishqui. Papan ponte joni joyaxihqui yohihibo rihbi ta rehtecannishqui. Maton sca tah man jaa jahuen ponte joni paranxon rehtehohqui. ⁵³ Ha-

han jihueta joi Papan yonotinin mato hinanni que bi tah manbihnixon bi nincayamabiresai —jato jaquin Estebanen.

Esteban rehtehibo

⁵⁴ Jascajaquin yohihah cahen sina sinacani. Sinaxon xeta yeres yeresahcanquin. ⁵⁵ Jaatian sca Dios Yoshiman hihbojaha jaan nai bejisihniquin. Bejisihniquin cahen Papan xaba jisquin. Papa mecayaho Jesus nichi rihbi jisquin.

⁵⁶ —Jisnahue. Nai quehpemehtai tah hen jisi. Papa mecayaho noquebaque nichi tah hen jisi —jato jaquin. ⁵⁷ Jascahah bi coshin sai saihihscacani. Mequeman pabepobahini caxon jaa xecotancanquin. ⁵⁸ Jemama qui sca boxon macaman tsacacanquin. Jato betan nichi bebo cahen jano jai, Saulo Janeya, beronan tahni. Jaan coiranxonnon hihxon jaton chopas pecaxon jaa taracanxon Esteban tsacacanquin rehtenoxon. ⁵⁹ Macaman tsaca tsacahibaan bi:

—Heen yoshin bihhue, heen Hihbo Jesusen —hahquin Estebanen. ⁶⁰ Jascajahax raboxonen nichish coshin sca yohuani:

—Hea nescabajahax hohchataibaan bi jato casticanyamahue, Hihbon —hihqui. Jascahax cahen muhascái.

Saulonen tiromajahji

8 Saulo rihbi cahen jaa mahuati queeni. Jaatianbi ta Jerusalen janinxon noquen huetsabo tiromajamenocannishqui hihti tiromajaquin. Tiromajahahbo jatihibi jabisi. Judea maibo janin, Samaria maibo janin rihbi jabiscani. Criston raantibo res jabayamahi. ² Papahon shinanaibaan ta hihti huinixon Esteban tsahonnishqui. ³ Hoa Saulonen ta noquen huetsabo potojaquetannishqui. Jaton xoboboho hihquicahinxon cahen jato bihquin. Bebobobo, haibobo rihbi coshin bi res boxon sipo xoboho jato tsahonquin.

Samaria janin Felipe cahi

⁴ Jabisipibaan sca Papan joi yohi-bonaquin jaabo jano cahiton. ⁵ Samaria jema janin caxon ta Felipenin jato Cristo joi yohibonanishqui. ⁶ Jan yohihi nincaxon cahen jan hahan honantibojahi jisxon huesti shinanyaxon nincacoincanquin hahqui tsamajaquetaibaan. ⁷ Jaan yohihah ta hicha tiroma yoshinyahpabo janinhax tiroma yoshinbo coshin sai saihiquish piconishqui. Yora honanyama-jaquetaibo betan chantobo hihti caibo rihbi rohacahini. ⁸ Jaa copi ta jaa jema janinhahbo hihti jenimanishqui.

⁹ Felipe nocorihyamahiya cahen jaa jema janin huesti joni janish, Simon janeya. Jahuen yobepan hahxon cahen Samaria mai mehabo rahtehax, Hea tah hen coshi joni qui hihcachihi. ¹⁰ Jaa yobe yohuanaiya ta jatihixonbi nincacanpahonishqui. Jaton jonibaan, jaton patorobaan, jatihibichin nincaquin. Nea joni ta Diosen coshi qui, jahuen hihti coshi hahcaibo, hahcanquin.

¹¹ Jahuen yobepan basi jan jato rahte rahtepahoni copi jaan yohihah nincacanquin. ¹² Jaabi Papan jato jihuemayaxihqui joi siri Felipenin yohihah nincacoincanquin. Jesucristo joi siri yohihah nincacoinaiton Felipenin jato nashimaquin, haibobo, bebobo rihbi. ¹³ Simoman rihbi sca nincaquin. Felipenin nashimaha Felipe manati sca hahbetanbi nichí. Hahan honantibo Felipenin hahcai, jan Papan coshiyaxon tsoan jascajani que ma bi hihti coshin hahcai jisish Simon rahte rahtescái.

¹⁴ Samaria mai mehabaan Papan joi bihcoinai honansaxon cahen Jerusalen janinxon Criston raantibaan Pedro betan Juan jato qui raanquin. ¹⁵ Raanahbo cahax nocoxon sca Dios Yoshin bichibo hihxon jato yocaxonquin. ¹⁶ Jesusen Jane huestichin Felipenin jato nashimahi quen ta Dios Yoshin jato qui botopa-

querihyamanishqui. Jaa copi cahen jato yocaxoncanquin. ¹⁷ Yocaxonxon mehehah Dios Yoshinbihresscacanquin.

¹⁸ Criston raantibaan mehehah Dios Yoshin bichibo jisxon Simon jato coriqui hinancatsihscái.

¹⁹ —Hea rihbi jascajati hahtipahmanahue, hean mehehahbaan sca Dios Yoshin bihnon —jato jaquin.

²⁰ Pedronen sca:

—¿Papan hinanresai jahuen yoshin min coriquinin maroti shinanain? Miin coriquiyabi mia queyoyaxihnon. ²¹ Min tah min jahuabi bihtimahi. Jahuabi tah min bihyamayaxihqui. Papan jisí ta miin jointi tiromah qui. ²² Min tiromajaquin shinanai pontescahue. Hibbo yocahue, min tiromajati shinanai jan sohuanon. ²³ Jointi mocapaiya mia notsi notsihi jihuetai tah hen jisi, hohchapán hiná tah hen mia jisi —hahquin Pedronen.

²⁴ —Maton caya hea yocaxonnahue man hea yohihi quesca jayamanon —hahquin Simoman.

²⁵ Jaatian sca jaabaan jisobo yohixon noquen Hihbaan joi siri rihbi yohihax Jerusalen janin cahi caribihi. Samari-tanobaan jemabo janin joi siri yohi-bonahi bocani.

Etiopía joni betan Felipe behchinani

²⁶ Noquen Hihbaan yonotinin sca ta Felipe yohinishqui:

—Caresscahue. Jerusalen janinhax Gaza janin cahi bahin picoti catanhue chiponqui —hahquin. Jaa bahin cahen tsoabi jihueyamahan. ²⁷ Caresscaax jano sca cahi. Picoti cahi jisí bi Jerusalen janin Papahon shinantanipish Etiopía joni jaa bahin jahui. Jaa cahen hapo. Etiopíabaan quiquin haibo hapon coriqui coirannicah. Jahuen hapon Jane cahen Candace. ²⁸ Isaíasnen huishani joi jisanan jahuen taramehtinin tsahotax cabachonen ninihah taramehquirani

jahui. ²⁹Dios Yoshiman sca Felipe yohiquin:

—Behchitanhue. Jahuen taramehti janin nanetanhue —hahquin. ³⁰Bishquihihcanahi caxon sca Isaías janeya Papan joi yohinicaton huishani joi jisish jaa yohuanhonahi nincaquin. Nincaxon yocascaquin:

—¿Min jisi joi min honanain? —hahquin.

³¹—¿Jenquetsahaxon hen honantihin, huetsan hea yanapanyamahiya? Hea patax tsahoti nanehue —hahquin. ³²Jan jisbenahi huishani joi ta nea qui: Carnero rehtenoxon hiohah bi neteresai quescarihbibi ta jahua hiyamahiqui. Jahuen rani rahmaxcorohah bi carnero baque sai sahihyamabiresai quescarihbibi ta yohuanyamahihqui.

³³Jaa rabinmaxon ta pontejayamaquin casticancaniqui.

Rehteres ta Tsoa jahuen xohtabo quin hih tsoabi jayamascanon hihqui jaa quirica.

³⁴Jaatian:

—¿Yohinica jascarai tsoa yohihiquin? ¿Jaabi nan? ¿Huetsa joni nan? Hea yohi-rohahue —Felipe yocaquin. ³⁵Jaatian sca jaa quiricaya yohuanxon Jesusen joi siri Felipenin yohiquin. ³⁶Bahin tarame-hcanahi cahax jano hian jaiton sca nococani.

—Jise. Jano ta jene jaiqui. ¿Jenquet-sahpahi min hea nashimatimahin, Je-susen joni sca hea hihnon? —Felipe yocaquin.

³⁷—Miin jointiboyaxonbi nincacoinaiton tah hen mia nashimatih —hahscaquin Felipenin.

—Jesucristo ta Papa Diosen baque qui. Hen tah hen shinancoinai —hahquin.

³⁸Jahuen taramehti janobi racare-nennon cahen cabacho rebinica yohis-caquin. Jaton taramehti racarenenaiya cahen bototax rabebi jene nenichi, Fe-

lige betan jaa Etiopía hapo. Janoxon sca cahen Felipenin jaa hihquimatan-quin nashimaquin. ³⁹Jaabo mapescaya bi Dios Yoshiman Felipe bilihniquin. Felipe jisyamascaa bi jaa huesti sca jenimahanan sca caresscaribibi. ⁴⁰Azoto jema janin sca sanarenenxon ta jano jai jemabo janin sca joi siri Felipenin yohibonanishqui, Cesarea jema janin no-conoxon caman.

Saulo Hihbo qui hinamehti

(Ha 22.6-16; 26.12-18)

9 Jasca Felipe jai bi cahen noquen Hihbo qui hinamehtaibo tahtijaxon, Hen tah hen mato rehtetih, Saulonen jato jaquin. Jato tahtijahax quiquin sacerdote janin cahi. ²Caxon, yocaquin: Jayaxon joni bihti quirica hea hinanhue hahquin. Jascajaxon cahen Damasco jema janin tsinquitai judiobo qui hinanti quirica huishamaquin. Criston joi bichibo meraxon jato nexaxon jaa quiricayaxon Jerusalen janin bebobo, haibobo rihbi hionoxon jascapa quirica huishamaquin. ³Huishamahax jaya cahi. Damasco qui nocoti hochoma nichibo sca naihoh quehax xabacahinai xabapan jato xabajaquin. ⁴Main paquerenexon sca yohuanai joi nincaquin.

—Saulon, Saulon. ¿Jahua copi min hea tiromajacatsihquin chibana?

⁵—¿Tsoa min quin, Hihbon? —hahscaquin.

—Hea ta Jesus qui, hea tiromajacatsihquin min hea chibana. ⁶Hueni-hue. Jema janin catanhue. Jahueja min jatihin, jano ta mia yohinoxihcani-hqui —hahquin. ⁷Yohuanai nincaxon bi jahuabi jisyamahax hahbe nichibo rahtetax nihreneni. ⁸Main racatax huenic-ahuanxon jahuen bero rahcoyamaquin bi Saulonen jahuabi jisti hahtipahya-mascaquin. Jisyamahiton sca hahbe nichibaan mehuexon Damasco jema janin sca hioquin. ⁹Quimisha neten sca

jano hihqui. Jahuabi jisyamascaquin. Jahu piyamaquin. Xehayamarihbiquin.

¹⁰ Jaa Damasco jema janin cahen Criston joni jai, Ananías janeya. Jaan cahen namaquen noquen Hihbaan quenahi nincaquin:

—Ananin.

—Neno tah hen qui, Hihbon —hihscai.

¹¹ —Huenihue. Derecha janeya bahin caxon Judasen xoboho Tarso janinha joni benatanhue, Saulo janeya. Hea ta yocaquihqui. ¹² Namaquen jismahah ta miin janeya joni jisishqui. Jahuen xoboho hihquixon jahuen bero sirinon hihxon jaa mehehi ta namaquen jisishqui —hihscai noquen Hihbo.

¹³ —Jerusalen janinxon noquen huetsabo jan hicha tiromajahi tah hen hichaxon yohihi nincarahsihi, Hihbon.

¹⁴ Neno sca roqui sacerdote hapobaan quiricaya jahui, mia yocacaibo rahsi bichí —hihqui Ananías.

¹⁵ —Jaabi cahue. Hen caisax jaya teeti tah qui. Huetsa jonibo, quiquin hapobo, israeli baquebo rihbi jan heen jane jato nincamanon hihxon tah hen jaa caisai. ¹⁶ Hea copi jan hihti teneyaxihqui tah hen jaa jismayaxihqui —hihqui noquen Hihbo.

¹⁷ Jascayah caresscrai Ananías. Jaa xoboho hihcoxon mehexon yohiquin:

—Heen huetsa Saulon, min hahan jahui bahin mihqui cainipixon ta noquen Hihbo Jesusen hea raanihqui, miin bero siriscanon. Dios Yoshiman rihbi mia hbojanon —hahquin.

¹⁸ Jaatianbi jahuen bero janinhax poto quescapa romishin pototani. Jahuen bero siricahinscaa xueniti. Huenis-caiton cahen Ananíasnen nashimaquin.

¹⁹ Pihax Saulo tantiscrai. Damasco janinha Criston jonibo betan sca basima tahni jihueta, jahuentihi nete rah.

Damascobo Saulonen nincamahi

²⁰ Jaatian sca judiobo tsinquit xoboboho mapecanaxon jaan jato yohibonaquin, Jesus ta Papa Diosen baque qui, hahbonaquin Saulonen.

²¹ Jaa nincacaibo rahsi rahte rahteti.

—¿Jesusya yohuanaibo rahsi neatohon Jerusalen janinxon tiromajayamarahsiquin? ¿Jato tiromajinoxon neno joyamahipishquin? ¿Jato nexaxon sacerdote hapobo qui hiohi joyamahipishquin? —hihcani.

²² Jaabo jascarai bi Saulo coshihi. Nete tihibi hashoan coshicanaxon Damasco janinha judiobo netemaquin. Jesus ta Papan caisai joni qui hihxon Papan huishamani joi yohiquin jato honanmaquin.

Saulo cahnecahini cahi

²³ Basiscaxon cahen jaa rehteti judiobaan shinanscaquin. ²⁴ Rehtenoxon bariyahpan yame rihbi jahuen xobo xehqui quexecanquin. Mia ta rehtecatsihcanihqui Saulon, hahscapuin caibaan. ²⁵ Criston jonibaan sca yame jema macan chique huinomaxon tasa qui Saulo nanexon botonpaquecanquin catannon.

Jerusalen janin Saulo nocoti

²⁶ Botonahbo cahi Jerusalen janin nocoti. Criston jonibo janin hihquicatsihqui bi raquecani jatihibi. Criston joni hihqui shinanyamacanquin.

²⁷ Mapemacatsihyamahiboya cahen Bernabé janeya jonin sca Criston raantibo janin Saulo hioquin. Hiohah bahinxonbi noquen Hihbo jisxon jan nincaquipi jato yohiquin. Damasco janinxon jan raquexonma Jesusen joi siri yohirahsihi jato yohiquin. ²⁸ Jato betan sca jihuexon Jerusalen janin jato pasijapaquexon raquexonma noquen Hihbaan joi siri yohiquin. ²⁹ Judiohax

bi griego joi yohuanaibo judiobo sca huetsayohuani. Joi bichincatsihquiaan bi:

—Jascama ta qui —jato jaquin. Jaabaan rihbi jaa rehtecatsihscrai.
³⁰ Rehtecatsihquiabo honanxon noquen huetsabaan Cesarea janin sca Saulo hioquin. Janohax sca Tarso jema janin canon raancanquin.

³¹ Jaatian jatihibi janin siripih sca jihupecani; Judea main, Galilea main, Samaria main rihbi noquen huetsabo siripi jihuescrai. Coshijaquecani. Noquen Hihbo qui hohchati qui raqueti ji-hueti. Dios Yoshiman rihbi jato siri-jaquin shinanmaquin.

Eneas rohajahibo

³² Jato tocan ta jatihibi janin Pedro nih nipahonishqui. Lida janin jihuetai Papan baquebo qui nocorihbibi. ³³ Jano cahen Eneas janea joni meraquin. Ocho bari yora honanyamajaquetax jahuen racatinin racatai meraquin.

³⁴ —Enin, Jesucriston ta mia rohahiqui. Huenixon miin cacajati bihue —hahquin Pedronen. Yohihah cahen hueniscrai. ³⁵ Jaa jisxon ta Lida jema janin jihuetaibo Cristo qui hinamehnishqui jatihibi. Saron jema janin jihuetai jatihibi rihbi Cristo qui hinamehti nincacoinax.

Dorcus teehihribihi

³⁶ Jaatian ta Jope jema janin rihbi Criston joni janishqui, haibo. Tabita jahuen Jane. Tabita ta chaxo hihcatsihquipi. Jaa haibaan ta caibo siri-bojaxonpahonishqui hicha. Jato yanapanquin jatohon shinanxon. ³⁷ Jascaphax bi hisinax muhuati. Muhuascai bi nashimaxon bochiquiha tapon racancanquin xoboho. ³⁸ Jope ta Lida hochoma qui. Lida janin Pedro jai honanxon cahen Noque janin histon jorihue yohihi canon, Criston jonibaan rabe joni raan-

quin. ³⁹ Yohihahbo cahen jato betan Pedro cahi caresscrai. Nocotaiton jano haibo racanahbo chique janin Pedro hio-canquin bochiquiha tapo janin. Jano yononmabo rahsi tsahoti mayacahuani. Huinihi tsahocani. Cotonbo, sahuetibo jan jihueparixon jato quehxexonrasahi jismahi tsahocani. ⁴⁰ Jato jatihibi picomaxon raboxonen nihxon Papa yocaxonquin Pedronen. Yocaxonxon muhuatuh haibo jisxon sca:

—Tabitan, huenihue —hahquin. Jascahah jahuen bero peehaftanxon Pedro jisish tsahohihnsacrai. ⁴¹ Tsahoscai bi mehuetanxon Pedronen huenihihniquin. Papan baquebo quenaxon yononmabo rihbi quenaxon teehihqui jato jismaquin. ⁴² Jan jascajaha Jope janin jihuetaibo jatihibi yohiscacanquin. Nincaxon hichaxon nincacoinax noquen Hihbo qui hinamehti. ⁴³ Basi tahni sca Jope janin Pedro jihuetai, Simoman xoboho. Simon ta yohina bichi poconica hihpahonishqui sapatojatijaquin.

Cornelio betan Pedro

10 Cesarea jema janin ta sontaro hapo japahonishqui Cornelio janeya. Cien sontaroboyahpa hapo. Italiano hahcaibo cahen jahuen sontarobo. ² Jaa sontaro hapo cahen Papahon shinanai joni. Jahuen xoboho jihuetaibo jatihibi hahbetan Papa qui hohchati qui raqueti. Jema janin jahuajomabo coriqui hinanresquin. Papa Dios jaayocaquin. ³ Bari racapaquescaya cahen Papan yonoti hahqui nocoti jahui jisquin namaquen jisijaquin.

—Cornelion —hahquin Papan yonotinin. ⁴ Jaa jisish hihti raquetax:

—¿Jahua min queenain, Hihbon? —hihscrai.

—Min yocaxonai ta Papan nincaquihqui. Min joni huetsa yanapannoxon

coriqui hinanresai ta shinanihqui.⁵ Jope janin canon jonibo raanscahue, jano jai Simon neno hihuehahbo. Jahuen Jane huetsa ta Pedro qui.⁶ Huetsa Simoman xoboho ta jihueteihqui, yohina bichi poconicaton xoboho, quebijistima hian quexabi —hahquin Papan yonotinin.

⁷ Papan yonoti yamacahinscaya rabe jahuen hahxontibo quenaxon Papahon shinanai sontaro rihbi quenaquin jahuen xobohoxon teexonai jahuen sontaro.⁸ Jan rahma jisibi jato yohixon Jope janin jato raanscaquin.

⁹ Raanah becani. Nichish bahin hihshinahax mohiyahtax nihnichi jema hochoma sca jaabo jahuiya jaa xobo champani pamacanyaxon Papa yocaqui Pedro mapeti barin manan tsacahiya.¹⁰ Pihan hihquish picatsihscrai bi cahen xobohoxon pitijaquin janquenjariyamacanquin. Jaatian namaquen jisijaquin jisquin.¹¹ Nai quehpemehtai jisquin. Hani sábana quescapa hoquen panexbehcoinxon main caman botonai jisquin.¹² Jaa chicho cahen jatihibi yohinahbo main ninotaibo rihbi, hihsabo rihbi jai.

¹³ —Huenihue, Pedron. Rehtexon pi-hue —hihqui nincascaquin.

¹⁴ —Hen tah hen pitimahi, Hihbon. Jahuentianbi tah hen rishtayabo piyamaniqui, pitimabo —hahquin.¹⁵ Yohuanai nincaribiquin:

—Siri sca ta qui Papa jaiya tah min tiroma ta qui hih min jatimahi —hihqui.

¹⁶ Quimisha coti jascahahnani. Jaatian jisi bi naihoxon sábana bilihinhiribiquin.

¹⁷ Jan namaquen jisibi jahua jenquetsi jascarihquin hihxon shinanscaquin. Shinan shinanaiya bi Cornelionen raanipibo xehqui janin nocoscrai. Simoman xobo yocacahcani.

¹⁸ —¿Simon Pedro hahcaibo neno ji-hueyamahiquin? —hihcanti yocacahti.

¹⁹ Jan jisíbo Pedronen shinanparihi bi Dios Yoshiman yohiquin:

²⁰ —Hoa ta mia benahi jahuibo qui. Huenihue tahca. Bototax basihaxma jato betan caresscatanhue. Hean horixon raanah ta becanihqui —hahquin.

²¹ Botoxon sca:

—Hea tah hen man benahi joni qui. ¿Jahua queenax man jahuin? —jato jaquin.

²² —Noquen hapo ta Cornelio qui, cien sontaroboyahpa. Sirijaquin shinanai joni tah qui. Noquen Papahon shinanai. Jatihibi judiobo ta jahan jenimahiqui. Jaa ta Papan yonotinin yohihipishqui, Jonibo raanhue, hahquin. Mian yohihi joi jan nincanon hihquish tah non mia bichi jahui jahuen xoboho min catannon —hahcanquin.

²³ —Mapenahue —hahxon sca jano jato hoxamashinaquin. Hoxashinahax mohiyahtax sca jato betan caresscrai. Caibo Jope janinha noquen huetsabo rihbi ta jaa manahi bocanishqui.

²⁴ Nihbabinahipish huetsa neten sca Cesarea janin nococani. Pedro nocoti manahahnan jahuen jenabo jatihibi quenamaxon, jahuen hahbe rabeti siribo rihbi Cornelionen jato quenamaquin.

²⁵ Pedro mapescaya cahen behchihi cahax jahuen tahe naman betihihpaqueti.

²⁶ Jaa hueniquin Pedronen yohiquin:

—Huenihue. Hea rihbi tah hen mia quescapa joni qui —hahquin.

²⁷ Jaa yohuanquinhanan xoboho hihcoxon hicha jonibo nocohihnascai meraquin.

²⁸ Jato meraxon:

—Nahuabo pasijatima joi ta noque jidiobo jai. Nahuabaan xoboho mapetima joi cahen noque jai. Jaa cah man honanai. Jaabi ta Papan hea jismahipishqui, mehetima rishtayah ihen tsoabi jayamanon. Jato yohuanquihnx noque rishtaya jai ta tsoabi yamahihqui. Hen honannon hihxon ta Papan hea jis-

mahipishqui. ²⁹ Jaa copi tah hen joresscái, Caresscatanhue Papan hea jaáh. Hea yohiscanahue tahcah. ¿Jahua copi man hea quenamahipiquin? —jato jaquin.

³⁰ Cornelio sca yohuani: —Chosco nete sca nescaran bari racapaque sca jaiya tah hen heen xobohoxon Papa yocaxon pehneni chopaya joni hea bebon sanarenenai hean jisipiqui. ³¹ Hea ta yohihipishqui: Cornelion, min yocaxonai ta Papan nincaquihqui. Min joni huetsa yanapannoxon coriqui hinanressai ta shinanihqui. ³² Jope janin jonibo raanscahue, Simon Pedro hahcaibo quenamaquin. Yohina bichi poconica Simoman xoboho ta jihuetihqui, quebijistima hian quexabi, hah ta hea jaipishqui. ³³ Jaatianbi tah hen mia quenamanoxon raanipiqui. Jahuerohahi tah min nocoscai. Neno tah non noquen Papan noque jisiya noque tsinquitai, noquen Hihbaan mia yohihi joi nincacat-sihqui —hahquin.

Cornelion xoboho Pedro yohuanai

³⁴ Pedronen sca jato yohiquin:

—Rahma tah hen honancoinscái. Papan ta caibo mentan huetsabo hashoan siri jisyamahiqui. ³⁵ Papahon shinanxon ponte hahcai nahuabo ta Papan siri jisiqui. Hen tah hen honancoinscái. ³⁶ Noque israeli baquebo qui ta jahuen joi raannishqui. Jatihibi jonibaan Hibbo hihxon ta Papan rahuiboma sca noque janon Jesucristonen noque hihbojahiqui. ³⁷ ¿Judea mai jatihibi janin jahua jahoxquin? Man tah man honanai. Galilea mai mehax ta joi behna jamenonishqui, Juaman yohixon nashimahipipecaho. ³⁸ Nazaret janinha Jesus ta Papan caisai joni qui, non honannon hihxon sca ta jahuen Yoshin siri Papan jaa hinannishqui, jahuen coshi rihbi hinanquin. Papan yanapana sca ta jonibo sirijabonahi nihnnishqui, tiroma yoshiman hihbojaha jonibo rihbi jato

jatihibi sirijabonaquin. Man tah man honanscái. ³⁹ Neno noquen judiobaan mainxon jan hahpahoni, Jerusalen jema janinxonbi rihbi jan hahpahoni jatihibi tah non jis Nixon yohinica qui. Jihuun hueonxon rehtehibo rihbi jisoxon tah non yohihi. ⁴⁰ Jan hihquipi jahuen quimisha neten sca Papan huenirihbixon jisíbo hihxon noque qui cainmahi jisoxon tah non yohirihbihi. ⁴¹ Jan hihquipish bi hahquirihbi teehihquipi non hahbetan pixon xehacahchihi ta Papan noque caisoxqui, Cristo jihuerihbiscái joi yohihibo sca noque janon. Jatihibichin jisnon hihxonma bi noque jan caisaibaan jisnon hihxon ta noque janin jaa cainmahoxqui. ⁴² Jahuen joi siri non jonibo yohinon ta noque yohihoxqui. Jihuettaibo betan mahuanibó jan siri hin tiroma quin hihxon jisnon hihxon ta Papan jaa yohinishqui. Jaa joi rihbi non yohinon ta noque yohihoxqui. ⁴³ Cristo nincacoinai jonibo jatihibi ta jaan jaton hohcha sohuaxoniqui. Jatihibi Papan joi yohinicabo ta jascari yohuannishqui —jato jaquin.

Dios Yoshin bichibo judiomabo

⁴⁴ Jascari Pedro yohuanparihi bi nincacaibo jatihibi Dios Yoshiman hihbojaquin. ⁴⁵ Judioxon bi nincacoinaibo Pedro betan jahuec rahtescoai. Jaton nahuabo que bi Dios Yoshiman jato hihbojahi jisish rahtecani. ⁴⁶ Huetsapahi yohuanai jato nincacanquin. Papa Dios qui jaabo hihti siripi yohuanai nincacax rahte rahtecani. Jato sca Pedronen yohiquin:

⁴⁷ —Non haho quescajaribiquin ta neabaan Dios Yoshin bichiqui. Non jato nashimanon. Tsoanbi ta Jato nashimayamanahue noque jatimahiqui —Pedronen jato jaquin.

⁴⁸ Jascajaxon Jesucriston janen jato nashimanon Pedronen yohiquin. Nashimaha sca:

—Huetsa neten cayanoxon noque qui banetahhue —Pedro jacaquin.

Jerusalen janinhahbo Pedronen yohihi

11 Jaa pecaho cahen Judea mainxon Criston raantibo betan janoha noquen huetsabaan nincaquin. Jaton nahuabaan rihbi Papan joi bichipi nincaquin.² Jerusalen janin nocotaiton sca Pedro pontecatsihquin, Jato honantijati ta jaiqui hihnicabaan Pedro yocaquin:

³—¿Jahua jenquetsahin min noquen nahuabo janin hihcohipiquin? ¿Jahua jenquetsahin min jato betanbi pihipiquin? —hahcanquin.

⁴ Jan jisipibo sca Pedronen jato yohiquin sirijaquin:

⁵—Jope jema janinxon noquen Papa yocaxon tah hen namaquen jisijaquin hihtihosi sábana quescapa jisipiqui, hoquen panexbehcoinxon naihohxon botonai. Hea bebonbi ta botonipishqui.

⁶ Jisquin sirijaxon tah hen yohinahbo, nami pinicahbo, ninotaibo, hihsabo rihbi jisipiqui. ⁷ Yohanai sca hean nincaquin, Huenihue, Pedron, rehtexon pihue, hea jaquin. ⁸ Hen tah hen jascajatimahi, Hihbon, jahuentianbi tah hen pitimabo rishtayabo piyamaniqui, hahquin hean. ⁹ Jaabi hahquirihbi naihoh quehax yohuani, Siri sca ta qui Papa jaiya tah min tiroma ta qui min jatimahi, hihqui. ¹⁰ Quimisha coti non jascahrainanai bi naihohxon jatihibi hahquirihbi ninihihniquin.

¹¹ Jaatianbi ta noque jano hihqui xobon quimisha joni nocotipishqui Cesarea jemanxon raanipi. ¹² Nahua tah qui hihquishma hen jato betan catannon ta Dios Yoshiman hea yohihipishqui. Nea seis noquen huetsabo rihbi ta hea manahi bohipicanaxqui. Jahuen xoboho tah non hihcohipiqui. ¹³ Jaan ta noque yohihipishqui. Jan jisi bi jahuen xoboho nichi Papan yonoti

jahui. Nihrenenxon cahen Jope janin joni raanhue Simon Pedro hahcaibo hihuemon, hahquin.¹⁴ Hahan mia Papan teehihmah i joi ta mia yohixihqui miin xoboho jihuetaiboyabi, hah ta Papan yonotinin jaa jaipishqui.¹⁵ Hean jato yohimenohiya bi ta Dios Yoshiman jato hihbojahipishqui non yohimenohi tian jan noque hihbojaho quescajaribiquin.¹⁶ Jaatian tah hen noquen Hihbaan noque yohini joi shinanscaipiqui, Juaman jenen nashimahi bi tah hen jenen nashimaquin hahcajaquin mato Dios Yoshin hinanyaxihqui, hah jan noque janí tah hen shinanscaipiqui.¹⁷ Noquen Hihbo Jesucristo nincacoinaiton Papan noque hinanho Yoshin jato rihbi jan hinanaiya ¿jahua hihxon hen Jascajayamahue Papan hen jatihin? —jato jaquin.

¹⁸ Nincacax netecani. Papa qui sca siripi yohuancani:

—Nahuabo rihbi ta shinan pontemaxon jato teehihmahihqui, hicahisen —hihcaci.

Antioquía janinhahbo noquen huetsabo

¹⁹ Hoa Esteban rehtexon jato tiromajaha jabisabio ta Fenicia main caman bo-cannishqui. Chipre mai janin, Antioquía janin rihbi ta nococannishqui. Caquin bi judiobo rahsi Papan joi yohibonacanquin.²⁰ Caibo Chipre mai janinhahbo hihxon, caibo rihbi Cirene janinhahbo hihxon, Antioquía janin nocoxon sca jaton nahuabo rihbi noquen Hihbo Jesusen joi siri yohiquin.²¹ Noquen Hihbaan ta jato yanapannishqui. Jaabaan yohihah ta hiti caiboxon nincacoinxon noquen Hihbo bijnishqui.

²² Jascajahibo nincaxon ta Jerusalen janinxon noquen huetsabaan Bernabé raannishqui Antioquía janin canon.

²³ Nocoxon Papan jahuen shinan jato

hinanai jisish jenimahi. Noquen Hihbo jeneyamahahbo hihxon cahen jaan jato yohiquin sirijaquin noquen Hihbaan yohihi quescabijaquein hahcabo hihxon.²⁴ Janohahbo hicha joni sca noquen Hihbaan hihbojaquin. Bernabé ta siri joni janishqui Dios Yoshiman hihbojaha joni. Papan jato hahxontihi cahen jaan shinancoinquin.

²⁵ Saulo benahi sca Tarso janin Bernabé cahi sca cahi. Saulo meraxon Antioquía janin hihuequin. ²⁶ Huesti bari Papan caisaibo betan tsinquixon cahen rabechin hicha jonibo haxemaquin. Jano pari ta Criston jonibo cristianobo janemenocannishqui.

²⁷ Jaatian Jerusalen janinhax Papan jismaha yohihibo nocoti Antioquía janin. ²⁸ Agabo janeya sca jato tocan nihxon jatihibi main piti pishinscaax pihan hihyaxihquibo jato Dios Yoshinyaxon yohiquin. Jan jascani cahen jascacoinscai, Claudio quiquin hapo hihqui tian. ²⁹ Jaa copi cahen Judea main jihuetai noquen huetsabo qui coriqui raanti Criston jonibaan shinannish. ³⁰ Jatihixonbi hahtipahnoxon caman raanti shinancanquin. Shinanxon jaabaan shinanai quescabijacanquin. Jaton pastorobo qui hinantannon hihxon Bernabé betan Saulo jaya catanon hihxon raancanquin.

Jacobo retehipixon Pedro sca bichibo

12 Jaabo cahiya ta jaton quiquin hapo Herodesnin caibo Papan joi nincacoinaibo bihnishqui, jato tiromajanoxon bihquin.² Juaman huetsa ta Jacobo janishqui. Jaa ta Herodesnin rehtenishqui.³ Jaa retehiya judiobo jenimahi jisxon Pedro rihbi bihquin chahoma paan fiestajahiboya.⁴ Bihxon sipo xoboho tsahonquin. Chahoma paan fiesta pecaho reteyaxahpan costanahbo

hihxon jahuen sontarobo Pedro coiramaquin. Chosco coiranti janahue, huesti coiranti cahen chosco sontaro, jato jaquin.⁵ Sipo xoboho Pedro tsahotaiya cahen noquen huetsabaan noquen Papa hihti yocaxonquin.

Hihbaan Pedro picohi

⁶ Jisibo hihxon bahquish Pedro rehtenoxahpan hih Herodes jai bi sipo xoboho Pedro hoxahi. Jaa yamebi rabe cadenanen jato qui menexah rabe sontaro napon Pedro hoxahi. Xehqui janin rihbi sontaro coiran xehqui janichi.⁷ Jaatian noquen Hihbaan raanah jahuen naihoh queha yonoti sanareneni jahui. Sipo xobo chicho xaba siri jaresscái. Rahpasxon Pedro mohinquin.

—Huenihue histon —hahquin. Huenitaiya hahan menexipi cadena mepequehti.

⁸ —Miin chopá sahuexon tahe xaca rihbi sahuehue —hahquin Papan yonotinin. Jascajaha sahuequin.

—Miin tarin rahcoxon hea chibanhue —hahquin.

⁹ Jascayahah hahbe cahi picoscái. Papan yonotinin hahcoinai honanyamaquin. Namaquen jisija tah hen jai hihqui.¹⁰ Huetsa coiranai sontaro huinoxon huetsa rihbi huinohax yami xehpoti qui nococani, jano jema qui cati. Hahmebi xehpoti quehpemehti. Picotax babin sca bocani. Cahiya bi Papan yonoti yamacahinscái.¹¹ Shinanscaax:

—Herodesnin hea rehteyamanon hihxon ta jahuen yonoti Papan raanaxqui heen caibaan hea jacatsihqui jatihibi rihbi hea jayamanon hihxon. Rahma tah hen honanquin sirijascái —hahqui Pedro.

¹² Honancoinscaax Marian xobon cahi. Jaa María ta Juaman mama qui. Juaman Jane huetsa cahen Marcos. Jaa xoboho tsinquixon ta Papa yocacannishqui hichaxon Pedro

yocaxonquin. ¹³Jemanhihti xehpoti Pedronen tontonhahcai nincacax Rode janeya xontaco jisi jahui. ¹⁴Pedro joi nincaxon honanax hihti jenimahax quehpexonti shinanaxma bishquihicanahi caribibi xobon. Hihcohax:

—Pedro ta jemanhihti janin nichiqui —hihqui.

¹⁵Min tah min tehquehihqui —hahcanquin.

—Hihiyama tah hen jai. Jaa coin tah qui —hihresi.

—Jahuen yoshin rah ta qui —hihscacani. ¹⁶Pedronen xehpoti tontonhahquin jeneyamaquin. Quehpencaxonjisish rahte rahtecani. ¹⁷Netetahbo jahuen mequen sanaxon sipo xobo janinhah noquen Hihbaan jaa picohah jato yohiquin.

—Jacobo, noquen huetsabo rihbi yohiscatannahue —jato jabahini huetsa xoboho caresscrai.

¹⁸Xaba paquescaya sca rahtetax sontarobo coro coroti, hihti corocani. ¿Jahuen Pedro cahaxquin? hihcani. ¹⁹Jato Benatannahue hahca bi benacasquimahiboya coirannica sontaro yocapaquexon, Nea coirannicahbo rehtenahue hahscquin Herodesnin. Jascajahax Judea mai janinhax Cesarea jema janin jihueta sca Herodes cahi.

Herodes mahuatai

²⁰Jaatian sca Tiro mai janinhahbo qui Herodes sinati. Sidon janinhahbo qui sinarihibihi. Jaa copi huesti shinanya-hax hahqui nococani. Nocoxon jahuen xobo coirannica Blasto yohuanquihnxon jeenhihmacanquin jan jato yanapannon. Quiquin hapo sca hihti yocacanquin jan jato qui sinayamascanon hihxon. Jahuen mai janinhax jaton piti jahui copi rae-jacatsihcani. ²¹Jaa neten yohuanyax-ahnpa hih jan jaipi jaa nete nocotaiya jahuen quiquin hapo tarisahue-

hax, jahuen quiquin hapo tsahotinin tsahoxon basi yohuanquin Herodesnin jato yohi yohiquin. ²²Herodes yohuanai nincacax:

—Diosax tah min yohuanai. Joni yohuanaima ta mia qui —hihcani coshin. ²³Jaatianbi, Jascama ta qui, Papa Dios huesti ta Dios qui, hih jan jayamahi copi noquen Hihbaan yonotinin Herodes rishquiquin. Rishquihah xenahax mahuati.

²⁴Herodes mahuataiya sca Papan joi caícanascai. Hashoan hocho sca nococanahi.

²⁵Jaatian antioquiaabaan coriqui hinana Jerusalen janin noquen huetsabo qui jaa coriqui hinantanax Bernabé betan Saulo joribiscrai. Juan rihbi becanquin, Marcos cahen jahuen Jane huetsa.

Bernabé, Saulo canon raanaibo

13 Antioquía janin ta Papan cai-saibo tocan haxemanicahbo betan Papan jismaha yohinicabo japhonishqui, huetsa cahen Bernabé, huetsa cahen Simon, joni huisoni hahcaibo, huetsa cahen Cirene janinhah Lucio, huetsa cahen Manaen jaton gobernador Herodesnin yanapannicah, huetsa cahen Saulo. Jaabo rahsi. ²Piti tenehahnhan Papahon shinanaiton Dios Yoshiman jato yohiquin:

—Hen jato yohihi tee jatannon Bernabé betan Saulo raannahue —jato jaquin. ³Jascajaha piti tenehahnhan Papa yocaxon jato metsoncanquin, mato tah non yanapantih hahxon jascajacanquin. Jascajaxon jato camacanquin.

Chipre janin Papan joi nincamahibo

⁴Jascajaquin Dios Yoshiman camahah Seleucia jema janin cahax Chipre mai pishca caman quebijistima hian non-tin pohquejaqueti. ⁵Salamina jema janin mapexon judiobaan tsinquitit xobohoxon

Papan joi yohicanquin. Juaman rihbi ta jato yanapannishqui.⁶ Jaa mai pishca nabebacahini cahax Pafos jema janin nococani. Jano ta yobe joni meracanishqui, Barjesus janeya. Judio. Papan jismaha yohinicahicamahi.⁷ Jaa ta janoha tintinti teexonai joni hihpahonishqui. Tintinti ta Sergio Paulo janeya janishqui, honan joni. Papan joi nincacatsihxon jaa tintinin Bernabéya Saulo quenamaquin.⁸ Jaa yobepan jane huetsa cahen Elimas, yobe hihcatsihqui. Jaan jato Jascama ta qui, hahquin, tinintinin nincacoinmis hihxon.⁹ Jaatian Pablo hahcaibo Saulo Dios Yoshiman hihbojaha jaa yobe bejisquin sirijaxon yohiquin:

¹⁰—Mia tah min tiroma yoshiman baque qui. Jatihibi pontejaquin shinanibaan rahui ta mia qui. Paran paranmis. Hihti tiromajaquin shinanai ta mia qui. ¿Papan ponte bahibo min mayamahi tanticasihyamahin?¹¹ Jisresskahue. Noquen Hihbaan ta mia mehehiqui, benchescaxon min bari basi tahni jisyamascanon —hahquin.

Jan jascahiya bi jahuen bero coropax bahquishcahinscai. Tsoan hea mehue-tanxon hiotihiquin, hihquish joni benahi huea hueacanahi cahi.¹² Jaa jasc-ahi jisxon noquen Hihbaan joi nincacax rahtexon jaton tinintinin nincacoinquin, jahuen jointiboyaxonbi nincacoinquin.

Antioquía janin nocotaibo

¹³ Jaatian Pablo, jaabo, Pafos mai potabahini nontin caresscaax Panfilia mai janin nocoti Perge jeman. Jano jato potabahini ta Jerusalen janin sca Juan caribinishqui.¹⁴ Perge janinhax cahax Pisidia mai meha Antioquía qui nococani. Jaton tantiti neten sca janoha jidiobaan tsinquit xoboho hihcohax tsahocani.¹⁵ Moisesnin huishani joi nincamaxon Papan joi huishaxon yohini-cabaan joi nincamaxon tsinquit xobo

coirannicahbaan jano tsahotai bi jato quenaquin:

—Noque huetsabaan, jonibo yohiti joi jaxon nihhinaxon noque yohirohahue —hahcanquin.

¹⁶ Jascalahbo nihhinaxon mequen sanaxon Pablon jato yohiquin:

—Heen caibon, noquen Papa Diosohon shinanaibon, hea nincanahue.

¹⁷ Noque israelibaan Papa Diosen ta noquen xenibo caisnixon Egipto main jaabo jihuetaiya jato caíjanishqui. Jahuen coshi jismaxon ta janohax piconon jato hionishqui.¹⁸ Cuarenta bari sca ta jato tenenishqui nihi naman nih nichaiboya.¹⁹ Canaan mai janin sca siete quiquin hapobo jaton jihuetahboyabi camaxon ta jaa mai israelibaana sca hihnon hihxon jato hinannishqui.

²⁰ Cuatrocientos cincuenta bari jano jihuescanon jato jaa mai hinanquin. Jahuen joi yohinica Samuel janon caman ta jato pontenicabo hinannishqui.²¹ Quiquin hapo sca noque hinanhue, hah sca ta jacannishqui. Yocacahbo cahen Cisin baque Saulo jato hinanquin. Jaa ta Benjamin baquebo janishqui, Saulo. Cuarenta bari ta jaan jato coirannishqui.²² Jaa potascaxon ta Davidinin sca jato coirannon hihxon jaa sca quiquin hapomanishqui. Jaa yohihi ta Papan nescajanishqui: Isaín baque David tah hen heen shinanya jisi. Hea queenai quescabija ta jaan jatihiqui hea hahxonquin.²³ Jaa Davidinin chini baquebo janinhah ta noque israelibo teehihmanica Papan cainmascanishqui, Jesus, jan yohini quescabijaquin.

²⁴ Jaa jonon ta jaton shinan pontexon nashimati Juaman jato yohinishqui, jatihibi noquen caibo yohiquin.²⁵ Jato yohiquin queyoti hochoma sca: ¿Hea jahua quin shinan man Jain? Hea ta jaama qui. Hehchon ta huetsa jahuiqui. Jaa hihti siri copi tah hen jahuen

sapato risbi pecaxonti hahtipahyamahi hahquin jaan.

²⁶ Heen huetsabaan, Abrahanen baquebaan, Papahon shinanaibaan. Noquen nincanon hihxon ta Papan noque jaa joi raannishqui, hahan teehihti joi non nincanon. ²⁷ Jaa teehihmanica jisxon bi ta jaa honanya-macannishqui. Jathibi tantiti neten Papan yohinicabaan joi nincamaha bi nincayamaribixon ta Jerusalen janin jihuetaibaan jaton hapobo betan jaa rehtemacanishqui, jayaxihquibo Papan yohini quescabijaquin. ²⁸ Jahua copi rehteti yamahi bi Pilato yocacanquin jaa rehtemanon. ²⁹ Jaa yohihi huishani joi jai quescabijaxon jihuin hueonahbo mahuascai botonxon ta tsahoncannishqui. ³⁰ Hihquipi bi ta Papan teehihmarihbinishqui. ³¹ Hahquirihbi teehihquish ta hahbetan Galilea janinhax Jerusalen janin cahipibo qui cainnishqui, jaabaan sca jan teehihribihi jisnicahboxon caibo sca yohinon.

³² Joi siri tah non mato yohihi, hea huetsabaan. Noquen xenibo jan hahx-ontijani quescabija ta Papan jaiqui. ³³ Jesus hihquipi bi hahquirihbi teehihmaquin ta jan hahxontijani quescabijaquin Papan noquen xenibo hahxonihqui, noque teehihmanica janon. Jahuen rabe behua huishaquin Davidinin yohini quescabi ta qui: Mia tah min heen baque qui. Nea neten tah hen heen baque mia hihqui jato honanmasca. ³⁴ Jaa hihquipish bi jahuentianbi yora pisiyamascanon hahquirihbi teehihmahi ta nescajaquin rihbi yohinishqui: Hen jahuentianbi huetsajatima joi siri hen David yohini quescabijaquin tah hen mia hahxonscai, hih ta jaiqui huetsa quirica janin rihbi. ³⁵ Jaa yohihi ta huetsa behua janin rihbi nescarihqui: Min caisai miin baque tah min pisimati mahi hihqui. ³⁶ Jihueparixon ta Papa

queenai quescajaquin Davidinin hahnishqui. Muhatai tsahonahbo ta jahuen yora payoscanishqui. ³⁷ Papan hahquirihbi teehihmah i joni ta jascayamahihqui: jaa ta payoyamanishqui. ³⁸ Jaan ta maton hohcha sohuaxonti hahtipahiqui. Man honannon hihxon tah non mato yohihi, hea huetsabaan. Moisesnin noque yohini quescabijaxon bi man potati hahtipahyamahi hohcha jathibi ta jaan sohuahihqui nincacoinaibo rahsi. ³⁹ Jaa nincacoinaibo jathibi ta Papan siri jisiqui. ⁴⁰ Papan joi yohinicabaan ta nescajaquin huishaxon yohinishqui:

⁴¹ Jisnahue, hea hosanaibaan. Rahtenahue queyoscanoxon. Man jihuetai netenbi hen hahan rahteti hahcaiya bi tah man hihcoinai shinantimabiresai. Papan ta jascajaaxqui hih huetsa jai bi hih ta jahuen huisha jaiqui. Jistahi man. Jan yohihi quescabija jan mato jamis — jato jaquin.

⁴² Jascahax cainscaiton huetsa tantiti neten rihbi noque yohirihbiyaxahnhue hihxon jato hihti yocacanquin. ⁴³ Tsinqixon yohuanaiibo nincaquin queyoxon sca, jaton nahua hihpahonish bi Papahon shinanax judioscaibo betan judiobaan hichaxon Pablo, Bernabé chibanbonaquin. Chibanahbo Papan shinanai quescari jihuetahbo hihxon jato sirijaquin yohiquin. ⁴⁴ Huetsa tantiti neten sca Papan joi nincaqui jaa jema janinhahbo jathibi tsiniquican. Huestibo res pishini. ⁴⁵ Pablo yohuanai nincacaiibo hihti caibohijisish notsi notsixon:

—Jascama ta qui tiroman —hahcanquin judiobaan. ⁴⁶ Pantecatsihquiaan bi raquexonma Bernabé betan Pablone jato yohiquin:

—Mato pari tah non Papan joi nincamati jai. Queyoyamanox manataibamaxon man jaa joi potascaiya tah non

nahuabo sca yohihi.⁴⁷ Non jascajanon ta noquen Hihbaan noque yohinishqui:
Nahuabo min xabajaxonnon tah hen mia yohihi janو nai chibechijaque-tancahuanaiton caman hahan tee-hihmati joi min jato nincamanon hah ta noquen Hihbo janishqui —jato jaquin.

⁴⁸ Jan jascarai nincacax judiomabo jenimacani. Papan joi hihti siri jiscandinquin. Queyoyamanox jihueyaxihquibo rahsi noquen Hihbo qui hinamehti, Papan caisnibo rahsi. ⁴⁹ Janohax sca cahen janoha maibo janin Papan joi caicanahi. ⁵⁰ Papahon shinanax bi haibo patorobo sca ta jaa judiobaan Pablo qui sinamanishqui, jaa jema janin ji-huetaibo haibo patorobo. Janoha patoro rihbi sinamacanquin Pablo Bernabé ri-hbi picohahbo hihxon. Sinamahabo cahen jato jaa mai janinhah picocanquin. ⁵¹ Jaabaan picohah yohitimabohi honanahbo hihxon jaton sapato poto jato quiri tahabahini Iconio jema janin sca boresscacani. ⁵² Jaabi Jesusen jonibo hti jenimahi. Dios Yoshiman hihbojaha jenimahi jihuecani.

Iconio janin nococani

14 Iconio janin sca judiobaan tsinquit xoboho mapexon jato yohiquin nincacoinahbo. Yohihah hichaxon nincacoincanquin judiobaan, judiomabaan rihbi. ² Nincacoainaboya cahen nincayosma judiobaan judiomabo sinamaquin. Noquen huetsabo jistahihmanon hihxon jato tiroma shinan hinancanquin. ³ Jaabi ta janobi basi tahni jihuescacannishqui raquexonma noquen Hihbaan joi jato yohihahnhan. Jatohon shinanaxon Papan hahxonai joi nincacoinahbo hihxon ta noquen Hihbaan rihbi yanapanquin hahan honantiboya hahan rahtetibo jato jaxonnishqui. ⁴ Jema janinhahbo sca caibo huetsa shinanya hihnon

caibo rihbi huetsa shinanya hihqui. Judiobo res caibaan nincaquin. Caibaan rihbi Criston raantibo res nincaquin. ⁵ Jasca sca jaiya cahen jato tiromajaxon macaman tsacanon benahue hihcani judiomabo, judiobo, jaton hapobo rihbi. ⁶ Macaman tsacacatsihqui bo honanax jabascacani. Licaonia main, Listra, Derbe, jaa jemabo janin bocani. ⁷ Jano sca Papan joi siri yohicanquin.

Listra janin Pablo tsacahibo

⁸ Listra janin ta chanto joni mercannishqui, jahuen ponobo yosmahi cainniss jascabisca. Jahuentianbi nihti hahtipahyamani. ⁹ Jaan cahen Pablo yohuanai nincaquin. Jaa Pablonen bejisquin sirijaquin. Jisanan Papan mehe-hah rohatihi jan shinanai honanxon coshin sca yohiquin:

¹⁰ —Huenihue. Nihrenenhue —hahquin. Jascayah cayahihnat tax nichi tana tanascai. ¹¹ Pablonen jascajaha jisish tsinquipaquetaboo coshin yohuanscrai:

—Yorayahpa quescapahax ta dios rabe noque qui botopaquetaxqui —hihcani jaton join, Licaonicabaan join.

¹² Bernabé ta Júpiter janecannishqui. Pablo cahen Mercurio janecanquin, yohuan hihbo hapo quen. ¹³ Júpiter hiná rehtexonnicah sca hicha jonibo betan cahi. Pehi toronjaxon ganado tejomaxon jema xehqui janin jano Júpiter hahcaibo jaton diosen xobo jaiton jaton ganado rehtecatsihscrai, Pablo hinancatsihquin, mapojaxonnoxon. ¹⁴ Jascayahibo nincaxon Criston raantibo Bernabé betan Pablonen jaton chopa huaxabahinxon tsamatai jonibo tocan cayatanxon jato coshin yohiquin:

¹⁵ —Jahueja man jacatsihquin, joni-bon? Noque tah non mato quescapa jonibo qui. Nescapa tiroma shinan potabahinxon jihuatica Dios man bih-non hihxon tah non jahuen joi siri mato

yohihi. Nai, mai, hian, jano jai jatihibi ta jaan hahnishqui.¹⁶ Neateman ji-huepahoniibo ta jaabo jihueta queenai quescari jaan jihuemanishqui.¹⁷ Jaabi ta hahan honanti jato pishinmayaman-ishqui jato yanapanquin naihoxon hoi paquemaquin, bimibo hinanquin, piti mato hinanquin, hahan jenimati mato hinanquin —jato jaquin.

¹⁸ Jascajaquin yohi yohihah pari ta jaabaan jaton ganado jato rehtexonquin bi rohajacanishqui.

¹⁹ Jaatian Antioquia janinhax judiobo jahui. Iconio janinhax rihbi nocoxon judiobaan janohahbo sinamaquin, Pablo retehahbo hihxon. Sinaxon Pablo macaman tsacacanquin. Jemama qui ninibonaxon mahua sca ta jaiqui hihxon janobi potabehnancanquin.²⁰ Criston jonibo jaa mayajaquetaiya hueniscaax jema janin caribihi. Jano hihshinahax Bernabé betan caresscrai. Derbe jema janin cahi caresscrai.

²¹ Nocoxon Papan joi siri jato yohican-quin. Yohihahbo hichaxon nincacoin-quin. Janohax sca Listra janin caribihi. Janohax sca Iconio janin. Janohax sca Antioquia janin.²² Criston jonibo coshi hinanbonahi cahi, shinancoin-quin jeneyamaxahcabo hihxon jato hihti yohiquin.

—Papan jihuematii janin noconoxon tah non hicha teneti jai —hahquin.²³ Piti tenehahnhan mequeman mehexon Papa yocaxon nincacoinaibo jano jaiton tihibi siri jonibo caisxon Mia pastoro-hue, Mia rihbi pastorohue hahcanquin. Jascajaxon jaabaan nincacoinipi quen noquen Hihbaan jato coirannon hihxon Papa yocaribicanquin.

Antioquia janin nocorihbicani

²⁴ Pisidia mai sca nabebacahinax Pan-filia mai janin nococani.²⁵ Perge janin sca caxon joi siri yohiscaax Atalia janin cahpaquehcani.²⁶ Janohax sca Antio-

quía janin cahi nontin boribicani. Hoa chai yohitanahbo hihxon janoxon Papa jato yocaxonnibo janin nocorihbicancani, janohax jaabo catanni janin.²⁷ No-coxon noquen huetsabo tsinquitaxon jato betan Papan hahrasih iatihibi yohicanquin. Judiomabo jan jascajaquin nin-camamenohi jato yohiquin.²⁸ Basi sca janin Criston jonibo betan jihueme.

Jerusalen janin tsinquitaxo

15 Jaatian Jerusalen janinhahbo sca joxon noquen huetsabo yohiquin:

—Moisesnin yohini quescabijaquin honantijayamahah tah man hahquirihbi teehihtimahi —hahcanquin.

² Jaamajahibo copi ta Bernabé betan Pabloden jato pontequin sca yohinishqui. Yohihah bi hahbetan sca yohinanresi. Join bahchinani. Criston raantibo yocacahti ta jaiqui, hihxon sca Jerusalen janin bohábo sca raancanquin Pablo, Bernabé, caibo rihbi. Jerusalen janin caxon Criston raantibo yocacahbo cahen raancanquin. Noquen huetsabo shinanyahpabo yocacahti canon raancanquin.

³ Noquen huetsabaan sirijaquin camahah cahen bocani. Judiomabaan shinan pontexon Papan joi bichi jato yohihahnan Fenicia mai nabebacahinax Samaria mai rihbi nabebacanahi bocani. Yohiha janoha noquen huetsabo hihti jenimacani.

⁴ Jerusalen janin nocotaiton sca Criston raantibaan jato Benahue hahquin. Janoha pastorobaan jatihibonbi jato Benahue hahcanquin. Benahue hahcabo jato betan Papan hahrasih jato yohirihbicanquin.⁵ Fariseoboxon bi nincacoinaibo sca nihrenenxon yohiquin:

—Jato honantijaxon Moisesnin yohini quescia jaahbo tah non jato yohiti jai —hahcanquin.

⁶ Jaa joi sca shinanquin sirijanoxon ca-hen Criston raantibo betan pastorobo ri-hbi jano huesti tsinquit. ⁷ Basi yohinan-nan sca jaiboya nihrenenxon Pedronen-jato yohiquin:

—Heen huetsabaan, neateman ta Pa-pan hea mato tocan mehax canon hea yohinishqui jahuen joi siri hean yohihah-noquen nahuabaan nincacoinnon. Man-tah man honanscái. ⁸ Jonin jointi ho-nanxon ta Papan jaabo siri hihqui noque jismanishqui, noque jahuen Yoshin siri-jan hinanai quescajaribiquin jaabo ri-hbi hinanquin. ⁹ Noque ta jascapa rabe jisnishqui. Jaabaan nincacoinai copi jaabo rihbi jaton jointi sohuaxonquin. ¹⁰ Non papiti hahtipahyamani bi no-quen xenibaan rihbi papiti hahtipahyamani hihue papimaquin hahcajaquin tah man Criston jonibo judionahue hah-cai. ¿Jahua copi man jascajaquin no-quen Papa Dios tanahin? ¹¹ Noquen Hi-hbaan noquehon shinanxon noque tee-hihmatihi quescajaribiquin ta jaabo ri-hbi teehihmatihiqui. Jaa tah non shinanc-coinai —jato jaquin.

¹² Jaatian pari netexon Bernabé be-tan Pablo yohuanai nincacanquin. Nin-cacaiton judiobaan nahuabo janin caxon-hahan honantibo hahan rahtetibo jato betan Papan hahquipi jato yohipaque-quín Pablonen, Bernaben rihbi.

¹³ Yohiquin queyoscaya Jacobo sca yohuani:

—Hea nincanahue, hea huetsabaan.

¹⁴ Jahuenahbi jaabo hihnon hihxon jahuen joi siri noquen nahuabo Papan nincamamenoni ta Simoman noque yohiscaaxqui. ¹⁵ Papan yohinicabaan rihbi ta huishaxon jascajaquin yohinishqui. Nincanahue:

¹⁶ Jaa pecaho joribixon tah hen Da-vidinin xobo poxoni huenirihbixon hahcajaquin jahuen jihuetauhbo hi-nanrihbitihi. Payonihbo hahribixon

hahcajaquin tah hen jahuen jihue-tahbo hinanrihbyaxihqui.

¹⁷ Texe jonibaan jaton Hihbo benahahbo hihxon tah hen jascajayaxihqui. Mat-on nahuahax bi hehqui hiname-htaibo jatihibichin hea benahahbo hihxon tah hen jascajayaxihqui.

¹⁸ Nea joi neateman yohinihxon ta no-quen Hihbaan jascjahiqui.

¹⁹ Hean shinanah tah non jaton shi-nan pontexon noquen Papan joi ninca-coinaibo noquen nahuabo non jatsan-jatimahi. ²⁰ Jato qui raannoxon quirica huishati ta jaiqui, santoya rishtayama-hahbo joni huetsa betan tsiniyama-hahbo, hahsataibo piyamahabo, jimi ri-hbi piyamahabo. ²¹ Jatihibi jema jan-inxon ta neateman Moisesnín joi nin-camanixon rahma caman nincamacani-hqui. Nincamaxon ta jaa jahua hihcatsi-hquiquin hihxon yocaribicaniqui, tant-titi nete tihibi jaton tsinquit xobobo-hoxon. Jaa copi tah non jato qui joi raantihi —jato jaquin.

²² Jeenhihxon sca jonibo raanah ta siri qui hihxon Criston raantibo, janohahbo pastorobo, jatihibi noquen huetsabo, jatihixonbi sca Bernabé betan Pablo manahi cahabo mananicabo caiscanquin, Antioquía janin jato raannoxon. Judas Barsabas hahcaibo, Silas rihbi, caiscanquin. Jaabo hihti shinanya noquen huetsabo copi jato caiscanquin. ²³ Jato betan raanti quirica sca huishamacanquin:

Maton huetsabo, Criston raantibo, pastorobo, noque rabsibixon tah non mato qui joi raanai, man jascabi jayamahin, hahquin. Antioquía, Siria, Cilicia maibaan jihuetai noquen caibohaxma bi noquen huetsabo qui tah non raanai. ²⁴ Noquen raanahma bi noque quihax caxon yohixon mato masa shinamahibo joi tah non nincacai.

²⁵ Nincaxon tah non jatihixonbi sca shinanquin sirijaxon noque quiha jonibo

caisai, Bernabé betan Pablo manahi mato janin canon. Bernabé betan Pablo ta hahan non shinanai noquen huetsabo qui. ²⁶ Caibaan jato rehtecatsihqui baan bi ta noquen Hihbo Jesucriston joi siri yohihi caresscahoxqui. ²⁷ Jaa copi tah non Judas betan Silas raanai, jaabaan sca non mato yohihi joi mato yohiquin sirijanon. ²⁸ Judiobaan mato jisi copi man jascajati jai joi res tah non mato yohihi, jahuabi hashoan mato hihuejayamanoxon. Non jascayahah ta siri qui hihxon tah non yohihi, Dios Yoshiman rihbi noque jascajaquin shinanmaha. ²⁹ Jaa copi tah non mato yohihi, santo rehtexona nami piyamanahue, jimi rihbi piyamanahue, terehahxon rehtehibo rihbi piyamaquin. Joni huetsa betan tsiniyamanahue. Non mato yohihi quescarax tah man siritihi. Jaa res tah non yohihi, hahcanquin huishaquin.

³⁰ Raanahbo Antioquia janin bocani. Jano noquen huetsabo tsinquixon jaa quirica jato hinancanquin. ³¹ Jaa quirica bihxon jisxon shinanquin sirijascacanquin. ³² Papan jismaha yohinicabxon Judas betan Silasen jato hicha yohixon noquen huetsabo coshi hinanquin. ³³ Jano jihuetahbax cacatsihscaboya jato raanipibo qui caribinon sirijaquin jato camacanquin. ³⁴ Hihcax bi Silas cayamahi. Baneti jan shinanaiya Judas huesti cahi. ³⁵ Antioquia janin Pablo betan Bernabé baneti. Banexon jato honanmaquin. Hicha noquen huetsabo betan jaa joi siri yohicanquin.

Papan joi yohihi Pablo caribihi

³⁶ Jahuentihi ra nete jano hihxon:
—Jano non noquen Hihbaan joi non jato yohinton caribinon cahue jato jisi. Jenquetsahpi jacanihquin jisnon cahue jatihibi jema janin —Bernabé Pablonen jaquin.

³⁷ Juan Marcos hahcaibo Bernabenin hiocatsihqui bi Pablo queenyamahi. ³⁸ Panfilia janin jato potabahini jato betan Papan joi yohihi cayamani copi cahen jaa hioti Pablonen shinanyamaquin. ³⁹ Huesti shinanyamascaax cahchinanbehcoini. Chipre janin Marcos betan canoxon cahen Bernabé nontin naneti. ⁴⁰ Pablo cahen Silas betan cahi, noquen huetsabaan noquen Papa yocaxonah. ⁴¹ Siria nabebacahinax Cilicia mai rihbi nabebacahini cahi noquen huetsabo shinan hinanbonaquin.

Timoteo sca jato manahi cahi

16 Derbe janin nocotax janohax cahx Listra janin nocorihbihi. Jano Timoteo janeya Criston joni jai. Jahuen mama judiohax bi nincacoinnica. Jahuen papa cahen judiobaan nahua. ² Jaa Timoteo qui ta Listra janinha noquen huetsabo siripi yohuannishqui. Iconio janinhahbo jascarihibi yohuani. ³ Jaa hiocatsihxon bihxon janobo judiobo jai copi Pablonen jaa honantijaquin. Nahua papayahpa jaa honanaiboya jaa honantijaquin. ⁴ Jemabo sca nabebacanahi caquin jato yohibonaquin. Jerusalen janinxon Criston raantibo betan jaton pastorobaan yohihi joibo jato yohibonaquin. Jaa joi nincaxon jascari jihuetahbilo hihxon jato yohiquin. ⁵ Jaa copi ta noquen huetsabaan hashoan sca nincacinnishqui. Nete tihibi cafcanaahi.

Macedonio joni Pablonen namacai

⁶ Frigia mai sca nabebacahinax Galacia mai rihbi nabebacahini bocani. Asia mai janin cacatsihqui bi Dios Yoshiman jato jano yohimayamaquin. ⁷ Misia main nocotax, Bitinia main sca cacatsihqui bi Papan Yoshiman jato panterihbiquin. ⁸ Misia mai huinojaquetax Troas jema janin sca cahpaquehcani. ⁹ Huesti yame cahen namaquen Macedo-

nia janinha joni Pablonen jisquin. Jaa bebon nihrenenxon jaa macedonio jonin hihti yocaquin:

—Macedonia janin noque yanapani johue —hahquin. ¹⁰Namayama sca jan jaiya jenquetsahax non Macedonia janin caman pohquetihin hihxon hahan pohqueti benaquin noquen. Non jano jahuen joi siri yohihi canon Papan noque quenahi tah non honanquin sirijaniqui.

Filipos janin nococani

¹¹Nontin nanexon Troas potabahinquin noquen. Samotracia quiri ponte res cahi. Nihshinahax huetsa neten sca Neápolis jema janin taxnati. ¹²Mapetax Filipos jema janin cahi. Filipos ta romanobaan tsahonni jema qui, jano jai jemabo mentan hashoan hani. Jano tah non jahuentihi ra nete hihniqui. ¹³Tantiti neten sca tah non jema jemanhihtinin caniqui, huean quexabi. Janoxon ta judiobaan noquen Papa Dios yocaquihqui hihquish tsahopaque-tax non jano behchinanai haibobo betan noque yohuani. ¹⁴Huesti haibo ta Lidia janeya jano janishqui. Papahon shinanai haibo. Yancon chopas maromanicah. Tiatira jema janinhah haibo. Jaan cahen nincaquin sirijaquin. Pablonen yohihi joi nincati shinan noquen Hihbaan hinanah nincaquin. ¹⁵Jatihibi jahuen xoboho ji-huetaibo betan nashimaha sca noque hihti yohiquin:

—Noquen Hihbaan joi hen nincacoinai shinanax heen xoboho botanahue. Jano sca banenahue —hahxon jano sca noque hioquin.

¹⁶Janoxon jaabaan Papa yohihi janin sca non cahi bi huesti hiná haibaan noque behchiquin. Tiroma yoshinyahpa haibo hihxon ta jayaxon jonibo yohipahonishqui. Honancatsihquin yocakah jaan yohiquin. Jascajaxon ta jahuen hihbobo hicha coriqui cananxonpahonishqui. ¹⁷Jaa haibaan

cahen Pablo chibanbenaquin. Noque rihbi chibanbenaquin. Noque chibanhahnan coshin yohuani:

—Nea jonibo ta Xaba Hihbo Diosen jonibo qui. Hahan teehti joi ta mato yohicaniqui —hihqui.

¹⁸Hicha neten jascarihbibi. Jatsan-scaax mayacahuhanxon Pablonen jaa yoshin yohiquin:

—Jesucriston janen tah hen mia yohihi, jaa haibo janinhax picohue —hahquin. Jan yohihah cainscái.

¹⁹Hahan coriqui cananti yamascai jisxon jahuen hihbobaan Pablo bihquin. Silas rihbi bihcanquin. Bihxon tinintinin jemanhihti janin hioxon jaton hapobo quenacanquin. ²⁰Jaton hapobo jahuija:

—Neabo ta judiobo qui. Noquen jema ta tiromajacaniqui. ²¹Noque jascatima joi ta noque yohihihqui, jascapa noquen nincatimahi bi. Noque jascatimahi joi tah qui. Noque tah non romanobo qui —hihcáni.

²²Jano tsamajaquetaibo rihbi jascari jato qui yohuani. Jascaraiboya jaton chopas potamaxon, jihuun jato cahrishqui cahrishquinon jaton hapobaan yohiquin. ²³Tsehue tsehuejaxon siro xoboho jato tsahonxon siro xobo coirannica yohicanquin sirijaquin jan coirannon. ²⁴Jascajaquin yohihahbo chicho queha chiqueho jato niaxon hahan tabitaxtinin jato tabitaxpaquequin.

²⁵Yame pochimicon sca Pablo betan Silasen noquen Papa yocaquin. Papa qui siripi behuahi. Hahbe sirojahipibaan cahen jato nincaquin. ²⁶Jaatian mai coshin miuhanreneni. Xobo jihuibo taxca taxcahihqui. Jatihibi xehpoti quehpemehscái. Hahan jato menexipi cadenabo mepequehcahini. ²⁷Siro xobo coirannica sca mohixon jaa xobo xehpoti jatihibi quehpemehtai jisish machitonen nacocatsihscái. Hahmebi rehtecatsihqui sirojahipibo jabascái shi-

nanax. ²⁸Nacocatsihqui bi Pablonen coshin quenaquin:

—Jascari tiromayamahue. Neno tah non qui jatihibi —hahquin.

²⁹Jascajahah:

—Johué quetejanahue —hihquish sipo xobo hihcocahinax tastahihcanahi cahi Pablo betan Silas janin taracahreneni. ³⁰Hueniscaxon

jemanhihti janin jato picoxon yocaquin:

—¿Queyoyamanox mananoxon hean hen jahuejati jain, jonibon?

³¹Noquen Hihbo nincacoinax tah min queyoyamanox manatihi. Miin xoboho jihuetaibo jascaribibi —hahcanquin.

³²Jascajaxon jahuen xoboho jihuetaibo rihbi Papan joi yohiquin sirijacanquin. ³³Jaatianbi yamebi jato hioxon jaton tsehue chocaxon:

—Nincacoin tah hen jai. Hea nashimanahue. Heen xoboho jihuetaibo rihbi nashimanahue —jato jaquin. ³⁴Jahuen xoboho jato mapemaxon sca jato pimaquin. Papa nincacoinax jaa, jahuen haibo, jahuen baquebo, jatihibi hihti jenimahi.

³⁵Xaba paquescaya sca jaa jema hapobaan porisia raanquin, yohihi cahabo.

—Hoa jonibo picotanhue botanahbo —hahcanquin. ³⁶Sipo xobo coirannicah-ton sca jascajaquin Pablo yohiquin:

—Hapobaan ta joi raanihqui hen mato piconon. Picoscanahue tahca. Siripi catannahue.

³⁷Jascahah bi Pablonen jato yohiquin:

—Noque romano jonibo que bi ta jatihxonbi jisnon hihxon noque rishqui rishquimahipicanaxqui non jahuejahipi honanxonma bi. Jisíbo hihxon ta noque sipojahipicanaxqui. ¿Jonexon tsoan honannonma sca noque picocatsihcanihquin? Jascajatima ta jaticaniqui. Jaabobi joxon noque piconon —hahquin.

³⁸Hapobo yohihi sca bocani porisiabo. Romano jonibo ta qui hihqui nincacax raquescacani. ³⁹Jaabo sca joxon jato raejacatsihquin jato sirijaquin yohuanquinquin:

—Honanyamaxon tah non mato jascajahipiqui —hahxon jato picoxon sca Noquen jema potabahinrohanahue —hahcanquin. ⁴⁰Jascari sipo xobo janinhax picotax Lidia jisi bocani. Noquen huetsabo jisxon sca jato yohiquin. Nincacoinquin jeneyamaxahnahue jato jaax caresscái.

Tesalonicabo corotaibo

17 Anfípolis jema nabebacahinax Apolonia jema sca nabebacahinax Tesalónica jema janin nococani. Jano cahen judiobaan tsinquití xobo jai. ²Jahuen hihti quescarax janó Pablo mapeti. Quimisha tantiti neten jato betan yohinani, tsoa noquen teehihmanicah quin hihqui yohinani. ³Papan huishamani joiboyaxon cahen Pablonen jato honanmaquin. Papan caisai jahuen baque hohmis hohmisax hihquipish bi teehihribiti jaa janí jato jismaquin sirijaquin, Jaa Papan caisai jahuen baque ta Jesus qui, jaa hen mato yohihi, hahquin.

⁴Nincacoinmaha Pabloya Silas manahi sca caibo cahi. Judiocabixa bi judiocatsihquiaan rihbi hichaxon nincacoinquin. Patoro haibobaan rihbi nincacoinquin hicha tahnixon. ⁵Jaa copi ta notsi notsixon shinanjoma tiromabo tsinquixon jema janinhah judiobaan jato coro coromanishqui. Jasoman xoboho sca jaa corotaibo mapeti, Criston raantibo benahi. Corotaibo bebonbi jato nichincatsihquin jato benacanquin. ⁶Criston raantibo benacasquimaxon Jason sca bihxon caibo noquen huetsabo rihbi bihxon jema hapobo janin jato ninitancanquin.

—Jatihibi janin tiromajaquin jonibo coromabenani ta neno sca neabo no-

cotipishqui. Jasoman rihbi ta jahuen xoboho jato hoxamahiqui.⁷ Jatihixonbi ta noquen quiquin hapo Cesaro nincacatsihyamascacanihqui, huetsa quiquin hapo Jesus jaresscai shinanxon copi — hihcani.

⁸ Jascajaxon jonibo coromacanquin. Nincaxon jema hapobaan masa shinanscaquin. ⁹ Jaabi Jason cobranxon caibo rihbi cobranxon:

—Boresscatannahue —jato jacanquin.

Berea janin nococani

¹⁰ Jaa yamebi ta Pablo, Silas rihbi noquen huetsabaan hionishqui Berea jema janin cahábo. Berea janin nocotax sca judiobaan tsinquitit xoboho mapecani. ¹¹ Jaabo ta Tesalónicabo mentan hashoan shinanya janishqui. Hihti honancatsihxon Papan joi nincacanquin. Jasca coin hin hihxon jatihibi neten Papan huishamani joi jisquin honancatsihquin. ¹² Hichaxon ta nincacoinnishqui. Jaton nahua patoro haibobo rihbi hicha. Bebobo rihbi huestima. ¹³ Papan joi Berea janinxon rihbi Pablonen yohihi honanscaax Tesalónica janinha judiobo jano rihbi bocani. Nocoxon jonibo sinamaxon jato coro coromacanquin. ¹⁴ Jaa copi histon sca noquen huetsabaan Pablo camacanquin. Quebijistima hian quiri hiocanquin. Jema janin sca Silas betan Timoteo baneti. ¹⁵ Pablo hiohibaan ta Atenas jema caman jaa nocomanishqui. Janohax jaabo caribinon ta Pablonen jato joiya raannishqui, Silas betan Timoteo hahqui histon jonon.

Atenas janin Pablo nocotai

¹⁶ Atenas janin jato manahahnan jatihibi janin santobo jai jisxon Pablonen masa shinanquin. ¹⁷ Judiobaan tsinquitit xoboho jato betan yohinanax Papahon shinanai judiomabo betan rihbi yohnani. Jatihibi neten rihbi jaton janoxon

maroti jemanhihti janin jano jaibo betan yohinani Papan joi nincamacatsihqui.¹⁸ Jaton honan joi honanaibo rihbi ta jano nihnínishqui, caibo epicúreobo, caibo estoicobo. Jaabaan ta Pablo yohuanquihnnishqui. Yohuanquihnxax:

—Jahua yohuan nea paranmis jaiquin? —hihqui caibo.

—Nahuan dios joi yohinica ra tah qui —hihqui caibo rihbi. Jesus hihquipish bi hahquirihbi teehihqui joi jan yohihiya jascacani. ¹⁹ Jaatian sca jaabihxon Areópago janeya mahchi janin hiohax yocacahcani:

—Nea min honanmahi joi behna min noque yohirohatimahin?²⁰ Min noque yohihi nincacax tah non rahtetai. Jahua min yohirohatimahin hih tah non jai honancatsihqui.

²¹ Jatihibi Atenas janinhahbo betan huetsancohax johox jano jihuetaibo ta jahuabi teeyamapahonishqui. Joi behna yohixon nincaqui jihueresi.

²² Areópago mahchi naponbi nihrenenax sca Pablo yohuani:

—Atenas janinhahbon, hicha diosbo man shinanai tah hen jisi. ²³ Jema janin huinoxon tah hen maton diosbo huishaxon man tsahonxonne macanbo jisbonaxon hen nea huishayahpa huesti merahipiqui. Non honanyamahi diosenah hihqui jaa quirica. Jaa honanyamaxon bi hahan man shinanai Dios tah hen mato yohiscai.

²⁴ Nea naiyahpa mai, jano jaibo jatihibi rihbi hahní Dios ta nai hihbo qui, mai hihbo. Jaa ta jonin mequeman xobojahi janin jihueyamahihqui.

²⁵ Jaa ta jonibaan hahxonti pishinyamabiresiqui. Noquen mequeman tah non jaa jahuabi hahxontimahi. Jaan caya ta jatihibi jihuemaxon noquen piti, jatihibi noque hinanihqui. ²⁶ Huesti joniamenonixon ta jahan sca jatihibi jonibo cainmanishqui jatihibi main jato jihuemanaxon. Janobi jihueyaxahnahue. Jaa-

tian pari jihueyaxahnahue hih ta jaa janishqui. ²⁷Noquen Papa Dios benahabo ta jascanishqui. Mehebonaquin meraxon hahcajaquin merahahbo ta jascanishqui, noque hochoma jan hihqui bi. ²⁸Jaan ta noque yora jihuemahiqui. Hahan jatihibijati coshi hinanxon ta hahan jihueta shinan rihbi noque hinanishqui. Caibo maton quirica huishan-icabaan rihbi ta jascajaquin huishanishqui: Noque tah non jahuen chini baquebo qui, hihqui. ²⁹Papan chini baquebo hihxon tah non noquen Papa Dios oro quescapa hihqui shinantimahi. Yami pehnene quescapahma, macan quescapahma, jonibaan mequeman sirijaquin hahcai quescapahma, jonin shinanai quescapahma ta jaa qui. ³⁰Honanmabo jai bi ta Papan jato tenepahonishqui. Jato tenenixon bi ta rahma jatihibi jonibo sca jatihibi janin jaan yohiscaiqui shinan pontehahbo hihxon. ³¹Jahuen hahan casticanti nete janox-ahnon ta yohiscanishqui. Jahuen hahan casticannicah ta jaribscainqui, Mia tah min jonibo pontejaquin casticannicah qui hah cahen jaa janish. Jahuen casticannicah tsoa quin non honannon ta hihquipi que bi jaa hahquirihbi teehih-manishqui —jato jaquin Pablonen.

³²Hihquipi bi hahquirihbi teehihmahai yohihi nincacax bitsa bitsacani.

—Huetsa tian min noque yohirihbinon tah non nincayaxihqui —ihhqui caibo rihbi.

³³Jascahiya jato janinhax Pablo picoscai. ³⁴Caibaan rihbi nincacoinax Pablo manahi bocani. Huesti cahen Dionisio Areopagito, huetsa cahen haibo, Dámaris janeya. Caibobo rihbi jato betan cahi.

Corinto janin Pablo nocotai

18 Jaa pecaho ta Atenas janinhax picotax Corinto jema janin Pablo canishqui. ²Jano ta huesti ju-

dio meranishqui, Aquila janeya. Jaa ta Ponto mai janinha joni hihpahonishqui, jahuen haibo betan Italia janinhax jahuem nocotipi. Claudio quiquin hapo hihxon Roma jema janinhax jatihibi judiobo picoti jaan yohihiya janohax Aquila jahuipi. Jato jisi sca Pablo cahi. ³Jaa Aquila cahen chopax xobojanicah. Pablo rihbi ta jascajanica janishqui. Hahbe chopax xobojanicah honanax jaton xoboho jihuetax hahbetanbi Pablo teescasi. ⁴Tantiti netebo nocoscaya judiobaan tsinquitxi xoboho caxon jato betan yohinanxon judiobo, jaton nahuabo rihbi Papan joi nincamaquin.

⁵Macedonia janinhax Silas betan Timoteo nocoscaya Papan joi yohihi sca jihuetai. Jesus ta Papan caisai joni qui hihxon judiobo honanmaquin. ⁶Honanmaha bi nincacatsihyamacani. Pablo qui tiromahi yohuancani. Jascaraiton jahuen chopax peren perenhahxon jato yohiquin:

—Nincacatsihyamahax tah man hohchaya muhuatihi. Min tah min noque honanmayamaniqui hah tah man hea jatimascai. Nahuabo sca tah hen yohitih —jato jaquin.

⁷Jato jascajabahini cahax jaa tsinquitxi xobo patax jihuetai jonin xoboho mapescasi. Jaa joni ta Justo janeya janishqui judiocatsihqui joni. ⁸Jaton tsinquitxi xobo coirannicahton ta noquen Hihbo nincacoinnashqui, Jahuen Jane cahen Crispo. Jahuen xoboho jihuetaibaan rihbi nincacoinquin jatihixonbi. Hihti caibo rihbi corinto jonibaan Papan joi nincaxon nincacoincanquin. Nincacoinaiton jato nashimacanquin. ⁹Yame namaquen sca noquen Hihbo yohuanai Pablonen nincaquin:

—Raquexonma yohireshue. Neteyamahue. ¹⁰Mia tah hen manahi cahi, tsoanbi mia tiromajaquin jahuejayamanon. Nea jema janin tah hen hicha joni jai —ihhqui.

¹¹ Huesti bari seis hoxne rihbi ta jano jihuensisqui jato tocan jihuexon Papan joi honanmaquin.

¹² Acaya main Galion sca gobernador hihquiya judiobo rahsi tsinquiscái. Tsinquixon jatihixonbi Pablo bihti shinancanquin. Bihxon jaton hapo janin hiocanquin.

¹³ —Noquen xenibaan yohini quescayaquín bi ta huetsajaquin Dioso-hon shinanahbo hihxon neatohon jonibo yohihqui —hahcanquin.

¹⁴ Pablo sca yohuancatsihscái bi ju-diobo Galionen yohiquin:

—Huetsa joni jan tiromajahiya tah hen jaa copi mato nincaquehanai, ju-diobon. Jan tiromahiya tah hen nin-caquehanai. ¹⁵ Man yohuanresai joi tah hen nincacatsihyamahi. Janebo, ma-ton xenibaan joibo, jascapa joibo copi man yohinanai tah hen nincacatsihyamahi. Botannahue. Bexonahue, ma-tobi. Jascapa joi copi tah hen tsoabi pontecatsihyamahi.

¹⁶ Jascajaxon jahuen ponteti xobo janinxon jato cainmaquin. ¹⁷ Cainmaha jaton tsinquití xobo coirannica bihcanquin, Sóstenes janeya. Bihxon hapon ponteti xobo xehqui ponte nihxon rishqui rishquicanquin. Jascjahibaan bi Galion jahua hihyamahi, jisresquin.

Antioquía janin nocotax caribihi

¹⁸ Basi tahni jano jihuetahbax, Hen ta hen caresscái noquen huetsabon, hah jato jaax Pablo caresscái. Hen yohi-hipi quescabija tah hen jai hihxon honanahbo hihxon Cencrea jema janinxon sca jahuen boo maxcoroham-abahinquín. Siria main caman nontin pohquejaquenoxon janohax nanecani. Priscila betan Aquila rihbi cahi hah-betan. ¹⁹ Efeso jeman pari taxnatax jato potabahini cahi, judiobaan tsin-quiti xoboho mapeti. Janoxon judiobo

yohuanquihnnquin. ²⁰ Basi pari banetah-hue hahcabó bi Pablo queenyamahi.

²¹ —Hen tah hen caresscái. Noquen Papa queenaiya tah hen joribitihí —jato jaquin.

Nanerihbixon Efeso jema potabahin-quin. ²² Cesarea jema janin sca mapetax Jerusalen janinha noquen huetsabo pasi-jatani joresscaax Antioquía jema janin cahpaquehcahini cahi. ²³ Jano ta jihuensisqui basima tahni. Janohax sca cahax Galacia mai nabebacahini cahax Frigia mai rihbi nabebacahini cahi. Noquen huetsabo shinan coshjabonahi cahi.

Efeso jema janin Apolos yohuanai

²⁴ Huesti Apolos janeya judio ta Efeso janin noconishqui Alejandría janinha joni. Joi yohinica. Papan huishani joi honanquin sirijahi. ²⁵ Criston joi honanmahabo hihti yohicatsihxon jaan jato yohiquin. Jesus joi jato yohiquin sirijaquin jaamama. Hihcax bi jatihibi honanyamaquin. Juaman nashimati joi honanxon Criston janen nashimati joi honanyamaquin. ²⁶ Raquetaxma ta jaton tsinquití xoboho yohuannishqui. Jan yohuanai nincaxon jaton xoboho boxon Priscila betan Aquilanen hashoan sirijaquin Papan joi honanmaquin. ²⁷ Acaya main jaa cacatsihquiton, Catanhue, hahxon noquen huetsabaan quirica huishaquin, jaya cahiton Criston joni-baan sirijaquinbihnon hihxon. Cahi nocoxon nincacoinaibo hicha shinan hinanquin. ²⁸ Papan huishani joi jismaxon ta Cristo ta Papan caisai joni qui hihxon judiobo yohinishqui. Jatihixonbi nincacahbo hihquish ta janibi nichish yohuannishqui. Sirijaquin jato yohihiya ta nincacoinaibaan shinan bijnishqui.

Efeso jema qui Pablo nocotai

19 Corinto janin Apolos jaiya manan cahpoquetax Efeso janin

sca Pablo cahpaqueti. Jano Papan joníbo huestibo meraquin.

²—¿Nincacoinxon man Dios Yoshin bihyamahin? —jato jaquin.

—Dios Yoshin joi tah non honanyama-parihi —hihcani.

³—¿Tsoan janen mato nashimacan-nishquin? —jato jaquin.

—Juaman nashimapahoni quescajaquin rahan —hihcani.

⁴—Jaa hahchon jahui joni ninca-coinahbo hihxon yohixon ta Juaman nashimapahonishqui shinan pontehiton. Jaa hahchon joni ta Jesus qui —jato jaquin.

⁵ Jaa honanscaxon cahen noquen Hihbo Jesusen janen sca jato nashimanon yohicanquin. ⁶ Pablonen jato mehehiya Dios Yoshin jato qui nocohihnat jahui. Jaa bichish huetsapahi yohuancani. Papan honanmaha yohuancacani. ⁷ Doce joni rah ta jaabo janishqui.

⁸ Judiobaan tsinquit xoboho mapetax sca tsoanbi chihtehahma Pablo yohuani. Quimisha hoxne jato betan yohinani, Papan jihuemayaxihqui joi yohinani. Yohuanquihnannani. ⁹ Jaatian ta nincayosma jointi chahomayahpabo noquen Hihbaan joi qui tiromahi yohuan-scanishqui, janibi sca hichaxon nincacahbo. Jaa copi ta janohax Pablo picoscaxon Criston jonibo hioxon jatihibi neten Tiranno escuela xobohoxon jato yohinishqui. ¹⁰ Janoxon ta rabe bari haxemanishqui. Jaan jato haxemahiya jatihibi Asia janin jihuetaibaan noquen Hihbaan siri joi nincacuin. Judiobo betan judiomabaan nincacanquin. ¹¹ Pablo ta noquen Papan hahan hihti rahtetibo hahmanishqui. ¹² Payon bihxon, jaa hi-hyamahiya chopas pishca bihxon jayaxon Pablo mehexon ta jaton hisinaibo sca han-rahoncannishqui. Rahona jaton hisinbo picoti, jaton tiroma yoshinbo rihbi picoti.

¹³ Nihresai judio yobebo sca nocoti jahui. Nocoxon tiroma yoshinyahpabo meraxon noquen Hihbo Jesusen janen jaton yoshinbo yohicanquin picotahbo hihxon:

—Hoa Pablonen yohihi Jesusen janen tah non mia yohihi —hahcanquin.

¹⁴ Jaton papa ta Esceva janeya janishqui, judiobaan quiquin sacerdote. Jahuen baquebaan siete hihxon jasca-jaquin. ¹⁵ Jascajaquin yohihiton tiroma yoshiman jato joi bichinquin:

—Jesus tah hen honanai. Pablo rihbi tah hen honanai. ¿Mato man tsoabo quin? —hahquin.

¹⁶ Jato jascajaxon jaa yoshinyahpa jonin jato qui cayatan cayatanxon jato bahchinquin. Jato jatihibi taponbi potaquin. Jaan huexahah chopanma tsehue tsehueya sca jaa xobo janinhax jabascacani. ¹⁷ Efeso jema janin jihuetai judiobaan ta jaa joi nincanishqui jatihibonbi. Judiomabaan rihbi jatihibonbi nincaquin. Nincacax ta hihti raquescacannishqui. Noquen Hihbo Jesus hihti coshi honancanquin.

¹⁸ Nincacoinaibo hicha joxon tiroma-jaquin hahpahoniboxon jaton hohcha yohipaquecanquin, jascapa jenebahin-nixon. ¹⁹ Hicha yobe hihpahonibaan rihbi jaton yobepan quirica bexon jatihibonbi jisnon hihxon janibixon jaton quirica mapojacanquin. Jaabaan mapo-jahi quirica topovah ta cien mil soro copinishqui. ²⁰ Jaatian ta noquen Hihbaan joi hashoan sca caícananishqui. Huetsa joi potaxon jaa sca bihcanquin.

²¹ Jaa pecabo cahen Jerusalen jema janin cati sca Pablonen shinannish. Macedonia mai nabebacahini cahax Acaya mai rihbi nabebacahini cahax Jerusalen jema janin nocoti shinanquin. Janohax tah hen Roma jema janin catihi hihqui. ²² Jaatian Macedonia janin be-botannon hihxon jahuen yanapannica

rabe raanquin Timoteo betan Erasto.
Jato raanax Asia main jihuetahbibi.

Efesobo coro corotai

²³Jato raanipi pecaho ta noquen Hihbaan joi copi rainyamahax hihi caibo corocahinquihrani nocohihncan-nishqui. ²⁴Demetrio janeya joni ta jano janishqui, yami charajahi teenica. Jaton santo Diana xobojaxonnica. Jasca-jaquin ta jahuen hahbe santo xobojanic-abho hicha jato cananmanishqui. ²⁵Jato quenamaxon jascapahbo hahnicahbo ri-hbi quenamaxon ta jato yohnishqui:

—Nescapahbojaquin tah non coriqui cananai. Man tah man honanquin siri-jahi. ²⁶Hihti caibo yohixon ta Pablonen jato honanmahiqui jaa sca chibanaahbo. Efeso janin res ma bi ta jatihibi janin jato jascajaquin yohihiqui. Casi jatihibi Asia mai mehabo ta jato nincamascaiqui. Jaa tah man jisxon nincaribhibi. Jonin mequeman hahcaibo ta diosmabo qui hih ta jaiqui. ²⁷Jan jascajaquin noquen tee tiromajamis hihxon tah hen mato yohirihbibhi. Jascajaquin yohihah ta noquen dios xobo caibaan jahuama shi-nanscatihiqui, noquen hihti siri haibo dios Diana xobo. Jaa rihbi ta jahuama shinantihcanihqui. Asia mai janin jihuetaibaan jatihixonbi hahan shinanai que bi ta jahuama sca jatihibi —jato jaquin. Jatihibi mai janin jihuetaibaan hahan shinanai que bi jahuama sca.

²⁸Jan yohuanai nincacax hihti rainyamahax sai saihicani.

—Noque Efeso janin jihuetaibaan Diana ta hihti shinanya qui —hihcani.

²⁹Jaa jema bahibo janin jatihibi coro cororescani. Jahuua nincatimasca. Pablón companihro rabe sca bihxon ninibonahi bocani. Janoxon yohuanabó nincati mai xanqueman sca bishquihihcanahi bocani. Pablón companihro cahen Gayo, huetsa cahen Aristarco, Macedonia janinha rabe.

³⁰Pablo rihbi jano hihquicatsihqui bi ta caibaan Criston jonibaan huinómayamanishqui. ³¹Caibo patorobo rihbi Pablón amicobo hihxon joi raanquin, jan jaton jaho tsinquití mai xanqueman cayamanon hihxon, rehtecanmis hihxon. ³²Corotaibo Pablo qui chanicatsihquish caibo huetsa yohuanya janon caibo rihbi huetsa yohuanya sai saihicani.

Coro coroquin nincatimajacanquin. Jahuejahi non tsinquitain hihxon hichaxon honanyamarihbicanquin. ³³Mia sca yohuani cahue hihxon judiobaan pehueranbonaha janohax yohuanti janin Alejandro mapeti. Jonibo nincamacatsihquin jahuen mequen sanaquin. ³⁴Jahuen mequen sanahihnihiya hihti sai saihihscacani. Judio tah qui hihquish sai saihihresscacani, jaa yohuanai nincatsihyamahax. Rabe horabo jano coro corocani.

—Noque Efeso janin jihuetaibaan haibo dios Diana ta hihti shinanya qui —hihcani coshin.

³⁵Corotaibo tantimascaax jaton tininti yohuani:

—Efeso janinhahbaan, noque Efeso janin jihuetaibaan tah non noquen hihti shinanya Diana xobo coiranxonai. Naihoh quehax paqueni jahuen santo rihbi tah non coiranxonai. Non jascajahi ta jatihixonbi honancaniqui.

³⁶Jascama ta qui, hih ta tsoabi jatimahiqui. Jaa copi tah man tantitihi. Sirijaquin shinanyamaxon jahuabi jahuejayamanahue. ³⁷Jaabaan maton diosen xobo jahua tiromajahi que ma bi tah man nea rabe joni neno hihue-hahqui. Maton dios qui rihbi tiromahi yohuanai que ma bi. ³⁸Demandanaibo nincati netebo ta jaiqui. Noquen gobernadorbo rihbi ta neno jaresscainqui. Nea jonibo qui chanicatsihxon jahuen hahbe teenica betan Demetrionen jato deman-

dantannon.³⁹ Huetsa joi rihbi ninca-macatsihxon janoxon jascajati jai jan-inxon hahtannahue.⁴⁰ Man rahma coro corotai joi nincacax, noque rah ta pota-catsihcanihqui romano hapobo jamis. Jaa copi tah hen mato yohihi. Jahua copi man coro corocanahi tsinquitain hahcah tah non jahua yohiti yamahi — jato jaquin jaton tinintinin.

⁴¹ Jato jascajaha jaton xoboho boresscacani.

Macedonia nabebahax Grecia main cahi

20 Coroyama sca jaiboya Criston jonibo quenamaxon nincacoinquin jeneyamaxahnnon hihxon jato yohihax, Hen tah hen caresscrai, hihquish Macedonia mai janin cahi Pablo caresscrai.² Macedonia maibo nabebacahini caquin jano jai noquen huetsabo hicha yohiquin. Jato yohibonahi cahi Grecia main nocoti.³ Jano sca quimisha hoxne hihqui. Siria main caman pohquenoxon nontin nanepanan ta jano sca jaa cacatsihqui honansaxon judiobaan jaa bihti shinannishqui. Bihcatsihquibo nincarihbihax Macedonia main caribhax janohax sca cati Pablonen shinanscaquin.⁴ Hahbetan ta caibo rihbi canishqui. Huetsa cahen Sópater, Pirron baque, Berea janinhah. Huetsa cahen tesalónicabo rabe, Aristarco betan Segundo. Huetsa cahen Gayo, Derbe jema janinhah. Huetsa cahen Timoteo. Huetsa cahen Asia mai meha rabe, Tíquico betan Trófimo.⁵ Jaabo rahsi bebotanax Troas jema janin noque manati bocani.⁶ Chahoma paan fiesta huinotipish Filipos jema janinhax noque cahi. Pichca nete nihxon Troas janin jato merahax jano sca siete neten rihbi noque baneti.

Troas qui Pablo nocotai

⁷ Hahan semana pehocohtai neten sca pihi noque tsinquit. Bahquish sca cayanoxon jato betan Pablo yohuan yohuani. Yame pochinicon caman jaa yohuani.⁸ Jano noque tsinquitai chiqueho cahen hicha ramparin xabati.⁹ Jano ta xehqui pishca janin huesti beronan tsahonishqui Eutico janeya. Pablo basi yohuan yohuanaiya ta hoxa teneyamascaa paquenishqui. Jaton quimisha tapoyahpa xobohoh quehax paqueti bochiquihax. Mahuascai bihtancanquin.¹⁰ Hahqui botopaquesaxon Pablonen jaa racatai hicobahinquin.

—Masa shinanyamanahue. Jihue ta jaiqui —noque jaquin.

¹¹ Jaatian sca maperihbixon posen tehcaxon pihax, xaba paquenon caman yohuanrihbihax, caresscrai.¹² Jaa beronan mohitahpa mapemahiya ta siri-jaquin sca shinancannishqui.

Troas jenebahini Mileto jema qui nocotai

¹³ Ason jema caman Pablo main cacatsihquiya tah non nontin bebohi caniqui. Cahax Ason jema janin Pablo bichi taxnati.¹⁴ Jano noque merahi jorescaya tah non nanemahax Mitilene jema caman noconihqui.¹⁵ Jano hoxashinahax mohiyahtax tah non caribiniqui. Cahi Quío mai pishca qui nocoti. Janohax caxon hian naponbi racatai mai pishca huinobahinquin, Samos janeya mai pishca. Janohax jahuen quimisha neten sca Mileto jema janin nocotax taxnati.¹⁶ Janin Pentecostes fiesta noconon hihquish ta Jerusalen janin Pablo histon nococatsihnishqui hahtipahax. Jaa copi ta Asia mai janin basiyamanoxon Efeso jema huinoresti shinannishqui.

Efeso pastorobo Pablonen yohihi

¹⁷ Mileto janixon sca Efeso janinha pastorobo jaan quenamaquin. ¹⁸ Noco-taiton jato yohiquin:

—¿Asia main noconish jenquetsi hen mato tocan jihuenehqui? Man tah man honanquin sirijahi. ¹⁹ Jahuabi hapo quescaxonma tah hen noquen Hihbo te-exonniqui. Heen caibaan hea tiromajacatsihqui tana tanahah tah hen masa shinani jihuenehqui. ²⁰ Mato sirjanoxon tah hen jahuabi mato yohiquin pish-inmayamaniqui. Tsinquitaiton yohixon tah hen heen xobohoxon rihbi yohixon mato honanmaniqui. ²¹ Papan joi nincaxon shinan pontexon noquen Hihbo Jesucristo sca nincacoinnon hihxon tah hen heen caibo yohixon heen nahuabo rihbi yohicoinnihqui. ²² Dios Yoshiman hiohah sca tah hen Jerusalen janin cahi. ²³ Janoxon hea jahuejaticaniquin? Hen tah hen honanyamahi. ²⁴ Jatihibi jema janin ta Dios Yoshiman hea yohihi. Cadenanen nexaxon ta mia hiti tiromajayaxihcanihqui, hah ta hea jaiqui. ²⁵ Jaabi hea rehtecannis hih ta hea jayamahi. Noquen Hihbo Jesusen hea yohini quescabijaquin Papan jathon shinanai joi siri yohiti res tah hen queenai. Papan hea yohihi cahue hahca tah hen cahi, jano hea raanaiton.

²⁶ Mato tocan caquin tah hen Papan mato jihuemahi joi mato yohiniqui. Hea tah man jisyamascatihi. Hen tah hen honanai. ²⁷ Jaa copi tah hen mato rahma yohihi. Maton hohchayabi mahuatax tah man Joi siri Pablonen yohiyamahah bi tah non mahuatai, hih man tsoabi jatimahi. ²⁸ Papan noque yohihi jatihibi tah hen mato sirijaquin yohini-hqui. ²⁹ Coiramenahue. Criston jonibo rihbi coirannahue. Jaabo man coiran-non hihxon ta Dios Yoshiman mato pastorobomanishqui. Carnero pimaquin hahcajaquin man Papan caisaibo shi-

nan hinannon hihxon ta mato jaa tee hinannishqui. Jahuuen jimi potaquin ta Criston jahuuen caisaibo bilihishqui jahuuen carnerobo. ³⁰ Hea caresscaho pecaho ta mato tocan tiroma jonibo nocoyaxihqui qui carnerobo reteresai hinobaan hahcajaquin. ³¹ Hea chibannahue Criston jonibon hihnicah rihbi ta mato quihabo caibo jayaxihqui qui. Jaa copi coirannahue. Quimisha bari tah hen matohon hihti shinanxon yame, bariyahpan rihbi hen mato yohipaquehi tantiyamanihqui. Jaa shinannahue.

³² Jato coiranhue Hihbon, hahbahini tah hen cahi. Jahuuen joi bihquin jeneyamanahue, hahan tah man jihuetahi, matohon shinanxon hinanai jahuuen joi. Jaan ta mato shinan hinanxon jatihibi jahuuen baquebo tocan mato jahuuen jihue hihbobo sca jaan mato hihmati hahtipahiqui. ³³ Maton oro, maton coriqui, maton chopas tah hen jahuentianbi mato bichincatsihyamanihqui. ³⁴ Heen mequeman teexon tah hen hen pishinaibo bilihiqui. Heen hahberabetibaana rihbi tah hen bikhonnihqui. Man tah man honanai. ³⁵ Hea hihqui quescaribhi man janon hihquish tah hen jihuenehqui. Jascajaquin teexon noquen Hihbo Jesusen joi shinanxon yomanahquetaibo yanapanti tah hen mato haxemaniqui. Hinanti ta bihti mentan hashoan siri qui, hah cahen noquen Hihbaan janish —jato jaquin.

³⁶ Jatihibixonbi sca raboxonen nihxon Papa yocacanquin. ³⁷ Huaohihscacani jatihibi. Pablo mehuetanax hicotanax huaohihcanni. ³⁸ Jan jato yohihah nincacax jaa jisyamascatihi nincacax bena be-natax nontin caman jaa manahi bocani.

Jerusalen janin Pablo cahi

21 Jaatian tah non nanetax jato potabahini caniqui. Cos mai janin caman tah non ponte caniqui. Jano hoxashinahax mohiyahtax cahax

Rodas mai janin sca nocoti. Janohax Pátara jema janin taxnati cahi.² Fenicia mai janin pohquejaqueti cahi, nonti jano merahax hahan sca nanetax quebijistima hiaman caribishi.³ Caquin tah non noque memiho Chipre maijisniqui. Jaa potabahinax Siria mai janin cahax Tiro jeman taxnatax mapeti. Jahuen jahuaborabo nonti hihbaan jano mapemahi cahiya tah non jano mapenihqui.⁴ Tiro janin tah non Criston baquebo meranihqui. Jato betan tah non siete neten banetahnihqui. Dios Yoshiman shinanmaha Pablo yohicanquin, Jerusalen janin cayamahue hahxon.⁵ Jahuentihi ra neten jano hihquish tah non caribiniqui. Jema jemanhihti janin ta jaabo jaton haibobo jaton baquebo noque manahi canishqui. Jemanhihtinin sca tah non raboxonen nihxon Papa yocanihqui.⁶ Papa yocacax nontin noque naneti, jaabo xobon boribihahbo.

⁷ Tiro potabahinax Tolemaida jeman taxnatax noque mapeti, main sca canoxon. Jano noquen huetsabo jisi caxon huesti neten rihbi jato pasijaquin.⁸ Hoxashinahax mohiyahtax caribihax Cesarea jeman nocotax Felipen xoboho mapeti. Felipe ta Papan joi siri nincamanicah hihpahonishqui hoa siete caisnibo quihah. Jahuen xoboho tah non banejaquenihqui.⁹ Jaa ta chosco haibo baqueyapha janishqui bebo honanyamahibo rahsi. Papan shinanmaha ta jaabo yohuanpahonishqui.¹⁰ Jahuentihi ra neten non jano jaiya Judea mai janinhax Agabo janeya joni nocoti, Papan shinanmaha yohuannica.¹¹ Nocoxon Pablón sintonon bichinax jahan sca tanexehtax menexehtax yohuanscái:

—Dios Yoshiman ta yohihiqui: Nescajaquin ta Jerusalen janinha judiobaan nea sintonon hihbo nexayaxihcanihqui.

Nexaxon ta nahuabo sca jaa hinanyaxihcanihqui —hihqui.

¹² Jan yohuanai nincaxon tah non Jerusalen janin jaa cayamascanon hihxon Pablo noquen yohiniqui. Janohahbaan jascajaribiquin.¹³ Jascajahabaan bi Pablón yohiquin:

—¿Jahuejanoxon man huaohihxon hea masa shinanmacatsihquin? Hea noquen Hihbo Jesusen joni copi hea nexayaxihquibo bi tah hen cati shinanai. Jerusalen janin hea rehteyaxihquiaan bi tah hen cati shinanai —hahquin.

¹⁴ Banemati hahtipahyamahax noque netescái.

—Noquen Hihbo queenai quescai janon —hihquish.

¹⁵ Jaa pecaho sca non pishinaibo bichish Jerusalen janin noque cahi.

¹⁶ Cesarea janinha noquen huetsabo caibo noque betan caxon Mnasoman xoboho noque hiocanquin. Mnason ta Chipre janinha joni qui, Criston joni xeni. Jaan ta noque jahuen xoboho hoxamanishqui.

Jacobo jisi Pablo cahi

¹⁷ Jerusalen janin noco sca non jaiya jenimahanan noquen huetsabaan noque bihquin.¹⁸ Hoxashinahax mohiyahtax sca noque betan Pablo cahi, Jacobo jisi. Jano ta jatihibi jaton pastorobo tsinquinishqui.¹⁹ Man jascabi jayamahin hahxon jaton nahuabo tocan Papan hahan honanti jaa hahmatanho jato yohipaquequin.²⁰ Jan chanihi nincaxon:

—Papan ta hahquiqui —hahxon yohicanquin:

—Noquen caibo nincacoinaibo ta jahuentihi ra mil jaresscái. Jatihixonbi ta Moisesnin joi chibancaniqui. Min tah min honanscái.²¹ Mian roqui min hochó jabisnihbo noquen caibo mian honanmahi Moisesnin joi jenebahinnon. Jaton baquebo

honantijayamati roqui mian jato yohihi. Moisesnin yohini quescayamascarihbihiji jihuuenon roqui mian jato yohihi. Jascaraibo ta nincacaniqui.²² ¿Jahueja sca min jatihin? Min nocotai ta honannoxtihcanihqui.²³ Jaa copi non mia yohihi quescabijahue. Neno ta chosco beronan jaiqui, Hen yohihi quescabijaquin tah hen jatih ihiquipibo yohuani.²⁴ Jato hiohax jato betan nashitanxon jaton mapo maxcorohabahinnon copijaxonhue. Min jascajahi jisxon ta jaabaan nincacai jahuama hihqui honannoxtihcanihqui. Man Moisesnin joi chibanchihin ta honannoxtihcanihqui.²⁵ Santo rehtexona nami nincacoinai judiomabaan piyamanon hihxon jimi rihbi piyamanon hihxon terehahxon rehtehibo rihbi piyamanon hihxon joni huetsa betan tsiniyamanon hihxon tah non jato moa huishaxon yohiniqui. Jaa ta honanscacaniqui —ihqui Jacobo.

Papan xobohoxon Pablo bichibo

²⁶ Jascaha jaa beronanbo hiohax huetsa neten sca jato betan nashihax Papan xoboho Pablo mapeti. Mapexon:

—Jatih neten hihquish tah non mequejaqueti queyoscatihi. ¿Jahua neten non jatihibichina noquen hinanti non betihin hinannoxon? —ihqui Pablo, hapo yocacahti.

²⁷ Jahuen siete nete nocoti pishca pishinaiya Asia janinhax judiobo nococani. Papan xoboho Pablo meraxon jonibo coro coromaxon Pablo bihcanquin.²⁸ Coshin sca quenacanquin:

—Noque yanapannahue, noque cai-
bon. Nea ta jatihibi janin nihxon noque qui tiromahi yohuanai joni qui. Nea ta Moisesnin joi qui yohuaniqui. Nea xobo qui tiromahi yohuanrihbihiji. Jas-
cabajax ta Pishin pari ta jaiqui hi-
hquish, Papan xoboho nahuabo rihbi

mapemaxon nea mequexonti xobo rish-
tajahiqui —hahcanquin.

²⁹ Efeso janiha joni betan Pablo jaton jema janin nichi jisipixon Papan xoboho Pablonen jaa mapemahi shinancanquin. Trófimo cahen jaa joni.

³⁰ Jascajahiboya jema jatihobi cobinai quescapi jonibo rainyamahax bishqui bishquihicanahax Papan xoboho nocohihnat. Pablo bihxon jemanhihti janin ninixon xehpotibo xehpobahincanquin.³¹ Jaa rehtehibaan bi ta sontaro hapo qui cahax caibo chaninishqui, Jerusalen janin ta jatihibi coro corocaniqui, hi-
hqui. ³² Sontarobo quenamaxon jaton capitano rihbi histon quenamaxon jato betan jema janin hishtocahinquihrani sontaro tininti jahui. Jaton hapo betan sontarobo jahui honanxon Pablo rishquiquin jenebahinscacanquin.³³ Noco-
xon Pablo bihxon cahen rabe cade-
nanen nexahahbo hihxon sontaro hapon jato yohiquin. Jascajaxon sca:

—¿Tsoa min quin? ¿Jahuejahi mer-
axon mia jascajacaniquin? —hahquin.

³⁴ Corotaibo cahen mesco yohuanyah-
pabo. Coro corotaiboya jahuabi honanquin sirijati hahtipahyamaxon son-
tarobo sca yohiquin: Xoboho hiotan-
nahue —jato jaquin jaton hapon.³⁵ Re-
htenahue hihqui coro corocanahibo sina
sinataiya tapiti qui Pablo nocotaibon
sontarobaan jaa hiascacanquin.

³⁶ —Rehtenahue —coshin
hihcanacani coro corotaibo.

Pablonen jato yohicoinai

³⁷ Sontarobaan xobo xehqui qui nocoscaxon sontaro hapo Pablonen yohiquin:

—¿Hen mia pishca yohinon min hea
nincarohatimahin? —hahquin.

—¿Griego join min yohuanain?

³⁸ ¿Mia min hoa Egipto mai meha
jonimah quin? ¿Hapobo potanon
nihxon jato sinamaxon cuatro mil

rehtemisbo nihi naman sca hiohipi, mia min jaamah quin? —hahquin yocaquin sontaro hapon.³⁹ Jascajaha Pablonen yohiquin:

—Hea ta Tarso janinha judio qui. Cilicia main hani jema janinhah. Nea jonibo hea yohimarahahue —hahquin.

⁴⁰ Jan jeenihquiya tapitinin mapexon jato qui jahuen mequen Pablonen sanaquin. Netecahinscacani. Jaton joinbi sca Pablo yohuani, judiobaan join sca.

22 —Hea huetsabaan, heen papabaan, hea tsoa quin hen mato rahma yohinon nincanahue —jato jaquin.

² Jaton joinbi jan yohuanai nincacax hashoan sca netecani. Pablo yohuanparihi:

³ —Hea ta judio qui, Cilicia mai Tarso janinhax cainni joni. Nea jema janinxon ta maton haxemanicahbaan hea haxemapahonishqui. Gamaliel ta heen haxemanica hihxon hea haxemaquin sirijanishqui. Noquen xenibaan yohini quescabijaquin hen hahnon ta hea haxemanishqui. Man hihqui quescaribhihi tah hen noquen Papan joi hihti jenipahichai.⁴ Hean rahma nincacoinai joi nincacoinaibo tah hen rehtenoxon caman jato chibanpahonihqui. Cadenanen nexaxon tah hen haiboya bebo jato sipojapahoniqui.⁵ Hen jascajapahoni ta sacerdotebaan hapon, jatihibi noquen hani hapobaan rihbi mato yohitihiqui. Jaabaan ta hea jayaxon jato bihti quirica hinannishqui, Damasco janinha noquen huetsabo hen hinantanon hihxon. Jaya caxon jano jaibo cadenanen nexaxon casticannocon sca neno Jerusalen janin jato hihuehi tah hen caniqui.

**Noquen Hihbo qui tah
hinamehniqui hihqui Pablo**
(Ha 9.1-19; 26.12-18)

⁶ Barin manan tsacahiya ta Damasco hochoma bahin cahiton naihohxon sca hani xabapan hea xabajanishqui.⁷ Main paquexon sca hea yohihi joi hean nincacuin: Saulon, Saulon, ¿jahua copi min hea tiromajaquin chibana? hea jaquin.⁸ ¿Tsoa min quin, Hihbon? hahquin hean. Hea ta Jesus Nazareno qui, min hea tiromajaquin chibana, hea jaquin.⁹ Hehbetan cahibaan ta jaa xaba jisxon bi hehbetan yohuanai joi nincayamanishqui.¹⁰ Hean hen jahuejati jain Hihbon, hean jaah ta Huenihue. Damasco janin catanhue. Jano ta mian hea hahxonti jai mia yohinoxihcanihqui hah ta hea noquen Hihbaan janishqui.¹¹ Hoa xabapan bechaxah tah hen jisti hahti-pahyamascaax hehbe cahibaan mehue-tanxon hiohah sca Damasco jema janin noconihqui.

¹² Jano ta Ananías janeya joni janishqui, Moisesnin joi nincanica. Jano ji-huetai judiobaan ta jatihixonbi jahan shinannishqui.¹³ Hea janin nocoxon ta hea pataxxon sca, Heen huetsa Saulon, jise, hea janishqui. Jaatianbi tah hen jisresscaxon jaa meranihqui.¹⁴ Noquen papabaan Papa Diosen ta mia caisihqui, mian jaa hahxonti jan shinanai min honannon hihxon. Jahuen nincanica baque min jisnon, jan yohuanai min nincarihibi-non ta mia caisihqui.¹⁵ Min jisibo, min nincacaibo rihbi tah min jatihibi jonibo yohiyaxihqui.¹⁶ ¿Jahuejahi sca min basitihin? Mia nashimanon huenihue. Noquen Hihbo yocaxon miin hohcha sohu-mascahue, hea jaquin.

**Noquen nahuabo yohinon ta
noquen Hihbaan hea
raannishqui hih Pablo jai**

¹⁷ Jerusalen janin nocorihbixon tah hen Papan xobohoxon Papa yocaxon namaquen hahcajaquin noquen Hihbo jisniqui. ¹⁸ Histon Jerusalen janinhax carihue. Hean hen jato hahxonai min jato yohihah ta nincayamaxihcanihqui, hea jaquin. ¹⁹ Hihbon, noquen tsinquit xoboboho hihcoxon mia nincacoinaibo meraxon hean sipojaxon jato rishqui rishquipahoni ta honancaniqui. ²⁰ Miin joi yohinica Esteban retehiboya rihbi tah hen janu rihbi nihxon jascajanahue hihxon jaa retehibaon chopa hean coiranxonnihqui, hahquin hean. ²¹ Catanhue, hocho tah hen mia raantihu nahuabo janin, hea noquen Hihbaan jaquin —hihqui Pablo.

Hapon Pablo bichi

²² Jano caman res nincacanquin. Jaton nahuabo yohihi Pablo catih niñacax coshin sca sai sahihcani:

—Jascapa joni main yamascanon rehtenahue. Jascapah ta jihueticahiqui —hihcani. ²³ Jaton chopa pecaxon mai poto rihbi bochiqui potahihncanquin. ²⁴ Jascajahibo jisxon Xoboho botanahue hapon jahuen sontarobo hahquin. Jahua copi jonibo hahqui jatiho sinatiquin hihxon sca rishqui rishquixon hisinjanon jato yohirihbiquin. ²⁵ Yohihah rishquinoxon nexacanquin. Jano jai capitan sca Pablonen yocaquin:

—¿Jahuen hohcha honanxonma romano joni rishquiti joi man jain? ²⁶ Jan yocacai nincacax hapo janin caxon capitanen yohiquin:

—¿Jahueja min jacatsihquin? Jaa ta romano joni qui —hahquin. ²⁷ Hahqui caxon sca hapon yocaquin:

—¿Mia min romano quin?

—Hea rahan —hahquin.

²⁸ —Hea tah hen hicha copijahax romanoscaniqui —hahquin hapon.

—Hea tah hen romano cainnihqui —hahquin Pablonen.

²⁹ Histon sca jaa hisinjacatsihquibo pitoti bocani. Romano que bi jan cadenanen jaa nexahi copi hapo rihbi raquescái.

Judiobo hapobo bebon Pablo nichi

³⁰ Jascajahipi huesti nete sca jahua hahqui yohuan jacoainiquin hihxon Pablo pecaxon sacerdoteaan hapobo, judiobaan hanibo jatihibi betan tsinquinon yohiquin. Jato qui hioxon sca jato bebonbi Pablo nichinquin.

23 Tsinquitai hapobo jisanan Pablo-nen jato yohiquin:

—Hea huetsabaan, shinanquin siri-jahax, tiromahaxma jihuepahonish tah hen rahma caman jascarai, Papan hea jisi honanax.

² Pablonen jascajahiya jaa pataxaibaan Pablo copasnon sacerdoteaan hapon jato yohiquin.

³ —Papa Diosen ta miabi rishquiyaxihquiqui, maoxen sicaha chiquepan. ¿Jascajatima Moisesnin yohinib que bi min hea jato copasmahin? ¿Jascajaquin min hea Moisesnin yohini quescajaquin min hea pontecatsihquin? —hahquin Pablonen.

⁴ Jaa pataxaibaan sca:

—¿Papa Diosen sacerdote hapo min jascajaquin tiromajaquin yohihin? —hahcanquin.

⁵ —Sacerdoteaan hapo tah hen honanyamahahqui, hea huetsabaan. Maton hapo tah man tiromajaquin yohitimahi hah ta huishani joi jaiqui —hahquin Pablonen.

⁶ Jaatian caibo fariseobo caibo rihbi saduceobo honanscaxon hapobaan nincahbo coshin sca yohuani:

—Hea ta fariseo qui, hea huetsabaan. Fariseobaan baque ta hea qui. Mahuanibbo ta Papan hahquirihbi

teehihmayaxihqui qui hen jai copi ta hea casticancanihqui.

⁷ Jan jascaraiya fariseobo betan sadoceobo join bahchinanscrai. Jaa copi caibaan Pablo casticancatsihqui bi caibo queenyamascrai. ⁸ Mahuanhbo ta Papan teehihmaribitimahqui. Papan nai-hoh queha yonotibo ta yamahihqui, yoshin rihbi ta yamahihqui, hih sadoceobo jai bi ta Hah ta jatihiqui, jaí rahan, jaí rahan, fariseobo jaiqui. ⁹ Join bahchinani corotaiboya fariseo huishani honanbo nihrenenxon hani join coshin jato yohiquin:

—Noquen jisi ta nea joni hohcha yamahihqui. Yoshiman jaa yohuanquih-naiya jaa hiyamahiya Papan yonotinin jaa yohuanquihnaia mato jahua hihtihin? —hahcanquin.

¹⁰ Hashoan sca rainyamacani. Nininanquin Pablo huaxabahincanmis hihxon, Jato bichinnahue hapon jahuen sotarobo jaquin. Mehuetani caxon bichinxon coshin ninibehnantanxon jaton xoboho sotarobaan Pablo boresscaquin.

¹¹ Jascajahip i huesti neten sca yame Pablo janin noquen Hihbo sanarenenxon:

—Raqueyamahue. Neno Jerusalen jema janinxon min hehqui jato yohicoinal quescajaribiquin tah min Roma jema janinxon jatihi —hahquin.

Pablo rehteti shinanaibo

¹² Xaba paquescaya Pablo rehteti shi-nancanquin judiobaan.

—Non jaa rehtenoxon caman tah non pitimahi, xehatimarihbibi. Non jaa rehteyamahiya noque sca Papan rehtenon —hahcanquin. ¹³ Cuarenta joni hihxon jascajacanquin. ¹⁴ Jascajahax jano sacer-dote hapobo betan jaton hanibo jaiton bocani. Nocoxon:

—Non yohihi quescabijaquin non hahyamahiya Papan noque rehtenon hihxon tah non yohihahqui, Pablo rehtenoxon caman tah non jahuabi piti nohuejatimahi. ¹⁵ Tsinquitai hapobo yocaxon sontaro hapo rihbi yocanahue jan neno mato janin jaa bexonnon. Pablo yohuanai man sirijaquin sca nincacatsihqui janahue. Janin noconon tah non rehtetih, non tah non manascrai —hahcanquin.

¹⁶ Rehteti shinanaibo honanax Pablone pihasha pishca cahi sotarobaan xoboho caxon Pablo yohiquin. ¹⁷ Jaan sca capitan quenaquin. Jahuiton:

—Nea beronan miin hapo janin hiox-onhue jan nincabehnanai jan yohitan-non —hahquin.

¹⁸ Jahuem hapo janin sca capitane hioquin.

—Non bichipi Pablonen ta hea quenaxon nea beronan mihqui hihuexonnon hea yocacaxqui. Mia roqui nincamacatsihqui qui.

¹⁹ Jascajaha mehuetanxon hahmebi hiohax sca yocacahti:

—Jahua min hea yohicatsihquin?

²⁰ —Heen caibaan ta hashoan sirijaquin honancatsihquin hahcajaquin mia nescajaquin yocati shinanihqui. Non Pablo yocanon hapobo tsinquitai janin bahquish Pablo hioxonyaxahnhue hih ta jacanihqui. ²¹ Jaabo hihcoinal shinanyamahue. Cuarenta hihxon hashoan hicharihbixon ta jaa rehtenoxon caman pitimahi, xehatimahi yohicaniqui, rehteyamahiboya jaabo sca Papan rehtenon hihxon. Rahma ta quexescacaniqui rehtecatsihquin. Min jeenhahn res ta manacaniqui —hahquin beronanen.

²² —Hea min jascajahi tsoabi yohiyamatahin min. Caresscatanhue —hahquin hapon.

**Gobernador Félix janin
sca Pablo raanaibo**

²³ Rabe capitan sca quenaxon jato yohiquin:

—Doscientos sontaro tsinquinahue. Cabachonen nichibo rihbi setenta sontaro. Jashiyahpabo rihbi doscientos sontaro. Yame sca jaiya Cesarea jema janin caman Pablo botannon jato raannahue. ²⁴ Hahan Pablo rihbi cati cabacho bexonnahue, gobernador Félix janin caman sirijaquin hionoxon. ²⁵ Jato jascajaxon quirica sca nescajaquin huishaquin:

²⁶ Hea Claudio Lisias hihxon tah hen mia noquen gobernador Félix mihi qui joi raanai. ¿Min jascabi jayamahin?

²⁷ Hen mihi qui raanai joni judiobaan rehtepanan tah hen sontaroya nocoxon romano joni honanxon jato bichinipiqui.

²⁸ Jahua tiroma jaiquin hihxon hen jaton hapobo jano tsinquitaiton hiohipiqui.

²⁹ Jaton xenibaan joi jan nincayamarai copi res jaabaan sinajahi bi ta jahua copi rehteti yama qui. Jahua copi sipojati yamaribibi tah hen honanscaipi qui. ³⁰ Jaa rehtenoxon caman piyamaxihquibo jai chanihah tah hen histon res mihi qui raanti shinanscaipi qui. Hahqui yohuaniba rihbi tah hen yohihipiqui, hahqui yohuanti joi jaxon mia hihbaan yohuantanon, hahquin huishaquin.

³¹ Hapon yohiha quescabijaquin cahen Pablo bihxon nihshinaxon Antípatris jema janin caman sontarobaan hioquin. ³² Bariyahpan sca cabachonen nichibo hahbetan catannon texe sontarobo jaton xobon caribhi. ³³ Hiotanxon Cesarea jema janin nocoxon cabachonen nichibaan janoha gobernador qui jaa quirica hinanquin. Hinanxon Pablo rihbi hahqui hihuecanquin. ³⁴ Jaa quirica jisxon jahuerahnaha mai meha mia quin hihxon Pablo yocascaquin. Cilicia mai meha rahan jan hihnon:

³⁵ —Min yohihi tah hen nincatihi mihi qui yohuaniba nocotaiya —hahxon Herodesnin quiquin hapo xobohoxon coiranahbo hihxon jahuen sontarobo yohiquin.

Felixnin quenamaha Pablo yohuanai

24 Jan jano nocotipi pichca neten sca sacerdotebaan hapo Ananías nocoti jahui. Hahbetan rihbi caibo jaton hanibo. Yohuanxon yanapannicah rihbi Tértulo janeya. Jaa rahsi jahui. Pablo qui jaabo yohuanti jai joi jaton gobernador nincamacanquin. ² Pablo quenamaha noco sca jaiya hahqui yohuani Tértulo pari yohuani:

³ —Mia copi ta noquen caibo siripi jihuetaihqui, Félix hapon. Mia tah min hihi siri qui. Mian yohihah ta pontejaquin sca shinanxon nea noquen caibo coiran-caniqui. Jatihibi janinxon tah non jatihibijaquin, Min tah min noque hahxonai, hahcai, mia yohiquin. ⁴ Jaabi tah hen mia hashoan jatsanjacatsihyamaxon hen mia pishca yohicatsihqui. Siri joni hihxon min hahcai quescajaquin hea nincarohahue, hen mia yohinon. ⁵ Nea joni ta hisin pahe quescapah qui. Non tah non honanscái. Jatihibi main jihuetai noquen caibo ta jaan rainymamahiqui, noquen quiquin hapobo non potanon hihxon. Jaa ta nazareno joi chibanaibaan hapo qui. ⁶ Noquen Papa Diosen xobo rishtajahiton tah non jaa bichipiqui. ⁷ Noquen xenibaan yohini quescajaquin non jaa japanan ta sontaro hapo Lisias joxon coshin noque bichinipishqui. Mia hihbaan sca non demandani jonon ta noque yohihipishqui. ⁸ Queenax miabi jaa yocacahhue. Jascaxon tah min non mia yohihi joibo jaa yohuanmaribitih —hahqui.

⁹ —Jascacoin tah qui —hihcáni hahbetan jahui judiobo.

¹⁰ Jaa sca yohuannon gobernadornen mequen sanahiya Pablo yohuani:

—Hicha bari sca min noquen caibo pontehi honanxon tah hen sirijaquin shinanhahnhan mia yohihi, jahueja hen Jain min honannon hihxon.¹¹ Doce nete res sca tah qui, hen Jerusalen janin Papahon shinani cahipi. Yocacahxon tah min hea hihcoinai hea honantihi.¹² Jahuenbi ta hea jonibo betan yohinanaiton merayamahipicanaxqui ni Papa Diosen xoboho, ni jaton tsinquit xoboboho, ni jema bahinbi. Jonibo sinamaxon coromahiton ta hea jahuenbi merayamahipicanaxqui.¹³ Hehqui rahma yohanai joi rihbi ta jenquetsahaxon bi jan hihcoinai mia honanmatimahiqui.¹⁴ Min honannon hihxon tah hen mia yohihi. Heen papabaan Papa Dios tah hen shinancoinai. Moisesnin huishani joi jatihibi, Papan joi yohinicabaan huishani joi jatihibi rihbi tah hen nincacoinai. Criston bahan caxon tah hen nincacoinai, jaa bahi cahen nazareno joi neabaan yohihi.¹⁵ Siriboya tiromabo Papan huenirihbiyaxihqui jaabaan shinanai quescajaquin tah hen shinanai.¹⁶ Jaa copi tah hen hea tiromayamahi Papan jisnon hihxon, jonibaan rihbi jascajaquin jisnon hihxon, pontejaquin shinanax hea jihuetai.

¹⁷ Hicha bari cayamanish tah hen jahuajomabo heen caibo yanapannoxon coriquiya cahipiqui, Papa Dios rihbi pishca hinani tah hen cahipiqui.¹⁸ Jaatian ta nashihax Papa Diosen xoboho nichiton hea merahipicanaxqui, noque janin tsamajaquetaibo yama, noque jahuabi coroyamahi.¹⁹ Asia mai mehax jahui judiobaan ta neno jahuet hehqui yohuanti jaiqui, hehqui yohuanti jaax.²⁰ Jaabo joyamahiya, jaton hapobo tsinquitai tocan hea nichiton jahua hen tiromajahi jaton hapobaan merahipishquin? Neabobi yohimahue.²¹ Nea res tah hen jato tocancion

coshin yohihipiqui: Mahuanihbo Papan huenirihbiyaxihqui hen shinanai copi ta hea casticancatsihcaniqui. Jascajaresquin —hahquin Pablone.

²² Jan yohihi bahi ta Felixnin honanquin sirijanishqui. Honanxon bi ta jaa netenbi jato nincacatsihyamanishqui.

—Sontaro hapo Lisias jahuiya pari tah hen mato jisyaxihqui —jato jaquin.

²³ Jascajaxon capitán sca yohiquin Pablo coirannon. Jan xoboho nihnon, jahuen amicobo rihbi pitibo hinani hihcocatsihquiya jato hihcomanon capitán yohiquin.

²⁴ Felixnin haibo cahen judio, Drusila janeya. Jato jascjahipish jahuentihi nete ra jahuen haibo betan joxon Pablo quenamaquin. Quenamaxon non Cristo nincacoinai joi Pablo yohimaquin.²⁵ Non ponte jihuetai jai, non coirameti jai, Papan casticanyaxihqui joibo rihbi Pablone yohihiya Félix rahte rahtet. Nincaxon:

—Caresscahue. Hen tee hichayamahiya tah hen mia hahquirihbi quenamatih —hahquin.

²⁶ Jaa pecaho coriqui Pablone hinannon hihxon quenamaricahtixon yohuanquihnnquin.²⁷ Rabe bari huinoscaya Porcio Festo sca Félix xahbanen haposcái. Judiobo jenimanon hihxon jaan rihbi haho sipojati xoboho Pablo banemaquin.

Feston Pablo quenamahi

25 Jaa mai janin Festo nocoscai. No cotipish quimisha neten hihquish Cesarea janinhax Jerusalen janin cahi.² Janoxon sca sacerdote hapobo betan judiobaan hanibaan Pablo qui yohuanti joi jaa yohiquin.³ Bahin jahuiton quexexon rehteti shinanaxon Jerusalen janin Pablo hihuexonnon Festo yocacanquin.

⁴ —Jaa ta Cesarea janinbi xehpó qui. Hea rihbi tah hen jano caresscatihi basihaxma.⁵ Jaa copi hahqui yohuanti

jaax maton hanibo hehbetanbi canon janohax yohuannoxon —jato jaquin Feston.

⁶Ocho neten hihyamahiya chonca neten jato janin hihquish Cesarea janin caresscrai. Nocotipish mohiyahxon janoxon jonibo ponteti xoboho tsahoxon Pablo quenamaquin. ⁷Quenamaha nocotaiya Jerusalen janinhax nocotipi judiobo jaa nihaquehtancahuani. Hicha hahqui yohuancani. Jaa ta hihti tiroma qui, hihcani. Jascaxon bi hihcoinaibo jismati hahtipahyamacanquin. ⁸Jaatian:

—Noquen xenibaan joi qui tah hen hohchayamahi. Papa Diosen xobo qui rihbi tah hen hohchayamahi. Cesaro qui rihbi tah hen tiromayamabiresai —Pablonen jaa jaquin.

⁹Judiobo jenimanon hihxon sca Feston Pablo yocaquin:

—¿Jaabo mihiyi yohuanai jatihibi hen nincaquin sirijanon min Jerusalen janin cacatsihyamahin? Janoxon hen nincanon —hahquin.

¹⁰—Quiquin hapon pontexonnica bebon tah hen nichi. Nenoxonbi hea pontehue. Judiobo qui tah hen jahuabi tiromayamahi. Min tah min honanai. ¹¹Hen tiromahi copi hea rehteti jaiya tah hen Hen tah hen mahuacatsihyamahi, hen hihtimahi. Huetsa joni hen tiromajani copi hea rehteti jaiya tah hen jascaribitimihi. Hehqui yohuanaibo quesahiya ta tsoanbi jato hea hinantimahiqui. Cesaronen sca hea jisnon hahqui hea raanhue —Pablonen jaquin.

¹²Feston sca jahuen yanapannicahbo betan yohuantahxon:

—Cesaro qui hea raanhue hah tah min jai. Hahqui sca tah min catihi —hahquin Feston.

Quiquin hapo Agripanen Pablo quenamahi

¹³Jan jascjahipi pecaho Berenice betan quiquin hapo Agripa janu nocoti

jahui Festo jisi Cesarea jema janin. ¹⁴Jano jahuentihi ra neten hih jan jaresscaya Pablo cahehipibo Feston yohiscaquin:

—Felixnin xehpobahinni joni ta neno jaiqui. ¹⁵Jerusalen janin hea cahiya ta sacerdote hapobo betan judiobaan haniabaan hahqui yohuanxon Pablo rehteti yocaquicanaxqui. ¹⁶Hahqui yohuanaibaan nincanon bi jan jato joi bichinon hihxon yohimayamaxon tah non noque romanobaan hahqui yohuanai- boyaa jascajaquin rehteresyamahi, hah ta hen jato jaipiqui. ¹⁷Jaa copi ta hehbetan behipicanaxqui. Non nocotipi mohiyahtax tah hen janoxon jonibo ponteti janin tsahoscaxon jaa joni quenamahipiqui. ¹⁸Hahqui yohuanaibo nincaxon bi tah hen hean shinanipi quescapa tiroma hean merayamahipiqui. ¹⁹Jaton dios hahxonti joibo copi res ta yohinanipicanaxqui. Huesti Jesus yamanicaton joi copi rihbi. Jihue ta jaiqui, hih ta Pablo jaiqui, jaa yohihi. ²⁰Jenquet-sahaxon jato sirijaquin nincatihin, honanyamaxon tah hen Pablo yocaquipiqui: ¿Jerusalen janinxon hen mia jisnon min janu cacatsihyamahin? ²¹Hen jascajaha bi ta queenyamahipishqui. Cesaronen sca jaa jisnon hihxon hen xehpotahxon raanyaxahnnon hea yocacah tah hen xehpomahipiqui Cesaro qui raanti hahtipahnoxon caman —hahquin Feston.

²²—Jaa joni tah hen nincacatsihqui heanbi —Festo jaquin Agripanen.

—Bahquish tah min jaa nincanoxihqui —hahquin.

²³Hoxashinahax mohiyahtax sca Agripa betan Berenice jaton quiquin hapo chopasahuehax jaton joniboya joribih. Jaton sontaro hapobo betan jaa jema janinha hapobo betan rihbi janoxon nincati xoboho mapecani. Janoxon sca Feston Pablo quenamaquin.

²⁴Quenamaha nocotaiya sca Festo yohuani:

—Agripa quiquin hapon, noque betan tsiniquitaibaan, nea tah qui. Jerusalen janinxon hea yocaxon ta nenoxon rihbi jatihibi judiobaan hea coshin yocaquipishqui nea hen muhuamascanon. ²⁵Jaabi tah hen jahua copi casticanxon rehteti merayamahipiqui. Cesaro janin hen raannon hihxon hea yocacah tah hen raanti sca shinanipiqui. ²⁶Huishaxon joi raantihi bi tah hen hahqui hihcoini yohuanaibo shinanyamahipiqui. Jaa copi tah hen man nincanon hihxon quenamaribishaqui. Mian nincaxon hashoan honanxon min hea yohiha jaa sca huishanonoxon tah hen mia jaa nincamahi, Agripa quiquin hapon. ²⁷Hahan caheti joi huishaxonma bi sipojaxon joni raanah ta tiroma qui hean jisi —jato jaquin.

Hapo Agripa janin Pablo yohuani

26 —Queenxon jato joi bichinhue — Pablo jaquin Agripanen. Jaatian nincacahbo mequen sanahihnxion:

²—Jahuerohajaquin tah hen mia nincamati hahtipahi, Agripa quiquin hapon. Heen caibo hehqui yohuanai joi bichinquen tah hen mia nincamahi. ³Jenquetih noque judiobo jihuetai, mian tah min honanquin sirijahi. Non yohinanai joi tah min hashoan honanai. Jaa copi hea tenexon hen mia yohihi nincarohahue.

Noquen Hihbo qui hinamehriyamaxon tah hen jato hihi tiromajapahonihqui hih Pablo jai

⁴Beronanax tah hen Jerusalen janin haninbihqui heen caibo tocan. Jatihixonbi ta heen caibaan jaa honanbihqui. ⁵Hihcoini yohuancatsihxon ta mia yohixihcanihqui. Fariseohax tah hen fariseobaan shinanai quescari

hen basi jihuenehqui. Moisesnin yohini quescari caibo judiobo jihuetai bi ta fariseobaan hihti nincacoinmax jihuenehqui. ⁶Noquen Papa Diosen noquen xenibo hahxontjanixon jan jato hahxoncoinscrai hen shinanai copi ta hea demandancaniqui. ⁷Jan noque hahxonnon ta noquen caibaan bariyahpan yame rihbi hahan shinanbihqui. Jaa ta hihti manacaniqui. Jan noque hahxonscrai hen shinanai copi ta hea demandancaniqui, quiquin hapon. ⁸¿Mahuanbihbo Papa Diosen huenicointima shinan man jain?

Noquen huetsabo Pablonen tiromajapahoni

⁹ Jesus Nazareno joi nincayamahahbo hihxon hen jato hihti tiromajati ta Papa queenbihqui hihxon tah hen Jerusalen janinxon jascajapahoniqui. ¹⁰Jano tah hen hicha jahuen baquebo sipo xoboho tsahonnhiqui. Hen jascajati joi ta noquen hapobaan, noquen quiquin sacerdotebaan rihbi hea huishaxon hinanncannishqui. Jaa jonibo retehahoya tah hen Jascajanahue hihpahoniqui. ¹¹Jatihibi tsinquitit xoboboho hihquixon tah hen hicha bihxon Cristo qui jato tiromahihqui yohuanmanoxon hihxon jato rishqui rishquipahonihqui. Jato qui hihti rainyamahi tehquehixon tah hen hocho queha nauabaan jemabo janin caman hen jato chibanpahonihqui.

Noquen Hihbo qui jan hinamehni Pablonen yohirihbihi

(Ha 9.1-19; 22.6-16)

¹²Jato jascajanoxon tah hen noquen hapobaan quirica hinanah Damasco jema janin cahi caniqui. ¹³Barin manan tsacahiya tah hen bahin caquin naihoh quehax xabatai jisniqui, quiquin hapon. Bari mentan hashoan coshin xabatai. Hea, hehbetan cahibo rihbi xabajaquin. ¹⁴Noque jascajaquin xabajaha jatihibi

racareneni. Noquen join yohuanai sca hea quenahi hean nincaquin: Saulon, Saulon, *ç*jahua copi min hea tiromajaquin chibana? Hahan toro chichachiti tahuah cahchihohri jamaquihcamahi tah min hisinai.¹⁵ Jaatian: Tsoa min quin Hihbon, hahquin hean. Hea ta hen Jesus qui, min hea tiromajaquin chibana?¹⁶ Huenitax nihresscahue. Mia caisnoxon tah hen mihqui cainai. Min hea teexonnon tah hen mia caisai. Min hea jisresscái tah min jonibo yohiyaxihqui, hen mia jismayaxihqui min yohicinnon hihxon tah hen mia caisai.¹⁷ Miin caibaan mia rehtecatsihqui bi tah hen mia rehtematinahi. Jato qui tah hen mia raanyaxihqui. Miin caibomabaan rihbi mia rehtecatsihqui bi tah hen mia rehtemayamayaxihqui.¹⁸ Min jato xabajonnon hihxon tah hen mia raantihi bahquish chian jaabo nichish bi xabapan sca nihnon hihxon. Satanasnen jato hihbojani bi Papa sca jato hihbojamanon hihxon tah hen mia raantihi. Papan jaton hohcha sohuaxonah hea nincacoinaibo tocan jaabo jihueyaxihnon hihxon ta hen mia raantihi hea jaquin.

Noquen Hihbaan yohini Pablonen nincacoinai

¹⁹ Papan hea jismaxon yohini quescabijaquin tah hen yohiquin pishinmayamaniqui, Agripa quiquin hapon. ²⁰ Damasco janinxon pari yohixon Jerusalen janinhahbo sca yohixon Judea mai mehabo jatihibi yohixon judiomabo rihbi sca tah hen jato yohiniqui. Shinan pontexon Papa Dios sca nincaxon behnajaquin shinanxon quescabijaquin sca hahcabohihxon tah hean jato yohiniqui. ²¹ Jaa copi res ta Papan xoboho hea bihxon heen caibaanbi hea rehtecatsihquipicanaxqui. ²² Papan yanapana tah hen rahma caman jaa joi yohiquin jeneyamahi, hanibo yohixon

jahuaborajomabo rihbi yohiquin. Papan yohinicabo betan Moisesnin ta jayaxihqui yohinishqui. Jaa joi res tah hen jato honanmahi huetsa joima.²³ Papan caisai joni tiromajayaxihqui ta yohicannishqui Moises, jaabaan. Hihquipish bi jaa pari huenixon noquen caibo jan xabajaxonyaxihqui noquen nahuabo rihbi jan xabajaxonyaxihqui ta yohicannishqui. Jaa joibi tah hen yohihi, huetsama —jato jaquin Pablonen.

Noquen Hihbo qui Agripa hinamehnnon hihquish Pablo yohuanai

²⁴ Jascayaquin joi bichinaiton Feston coshin yohiquin:

—Min tah min tehquehilihqui, Pablón. Hashoan hicha quirica honanax tah min mapo masascai —hahquin.

²⁵ —Tehquehilihama tah hen jai, Festo hapon. Hen yohihi ta hihcoinai yohuanti qui, shinanquin sirijahax yohuanti. ²⁶ Noquen quiquin hapo hihxon tah min hen yohuanai min honanquin sirijahi. Jaa copi tah hen shinanquin sirijahanan yohuanai. Hen yohuanai tah min honanscái. Hen tah hen honanai. Hen mia rahma yohihi tah hen jonéxon hahyamaniqui. ²⁷ *ç*Papan yohinicabaan huishaxon yohini joi min nincacain, Agripa quiquin hapon? Ninca tah min jai. Hen tah hen honanai —hahquin Pablonen.

²⁸ —Hicha tahma res ta pishiniqui, min hea Cristo qui hinamehmati —Pablo jaquin Agripanen.

²⁹ —Hicha tahma pishinyamahax hicha pishinai bi tah hen Mian nincacoinpahinon hen jai. Mia huestima bi hea rahma nincacain jatihibi hea hihqui quescari japhahinon. Nea cadenabo res man yamanon —hahquin Pablonen.

³⁰ Pablo jascaraiya quiquin hapo, gobernador, Berenice, jato betan tsahotaibo jatihibi nihrenenscái, canoxon. ³¹ Picoscaibo yohinaní:

—Nea jonin ta jahua copi casticanxon rehteti hahyamahiqui, jahuabi. Jahua copi sipojatima ta jaiqui —hihcáni.

³² —Cesaro qui raanti yocayamahipiá tah non jaa picoquehahnai —Festo jaquin Agripanen.

Roma qui Pablo raanahbo cahi

27 Italia mai janin sca non nontin canon ta hapobaan yohinishqui. Yohihiya ta Pablo, jahuen hahbe sipojanibó rihbi Julio janeya capitán en jato coirannishqui, jato coiraní cahue hapon jaah. Jaa capitán cahen Augusto janeya tsama quiha. ² Adramitio mai meha non-tin tah non nanenihqui Asia mai meha jemabo janin nihuen xotonah taxnati cahiya. Huesti Macedonia mai meha joni tah non hionihqui, Aristarco, Tesalónica janinha joni. ³ Janohax cahax nihshinahax nihbahinahax Sidon jema janin taxnati. Hahan shinanxon ta Julionen Pablo mapemanishqui jano jan honanai jan jistannon, jato jisxon jan pishinaibo rihbi jan maronon. ⁴ Janohax cahax tah non nihuen noque behchihiya Chipre mai quexa caniqui, jano jaa main nihue pantehiton. ⁵ Cilicia, Panfilia, jaa maibo ponte sca quebijistima hian pohqueja-quetax Licia mai quirí Mira jema janin taxnati.

⁶ Jano ta Alejandría janinha nonti noquen sontaro capitán en meranishqui. Italia mai janin jaa nonti cacatsihquiya hahqui sca noque nanebohanquin. ⁷ Janohax cahax tah non jahuen-tihi ra neten honahax bi caniqui. Huina huinabonahax Gnido ponte nocoscái. Nihuen noque behchirihbihiya cahen janohax Creta main cahi Salmon hohoma. ⁸ Jano honahaxbi quexa cahax

Puerto Bueno hahcaibo janin nocoti. Jaa hochoma ta Lasea jema jaiqui.

⁹ Non basihi jisxon bari tian huinoscái bi nontin cahax reocohtax non jene meran camis hihxon Pablonen jato yohiquin:

¹⁰ —Jisnahue, amicobaan. Nontin cahax non querabequemis. Behchoman ta noque tsahcatihiqui, man bohi jahuabora manoscanon, nea nonti rihbi manoscanon, noque rihbi hihquiscanon —jato jaquin.

¹¹ Pablonen yohihah bi ta capitán en nincayamanishqui. Jaabi canon cahue nonti hihbo jaiya, nonti chibinica rihbi jascaraiya ta capitán en jato nincanishqui. ¹² Behchoman nonti tiromajatihi hihxon cahen janoxon jene tian huinomatima nonti hihbaan shinanquin. Janohax cati shinancanquin, hashoan hichaxon. Fenice jema janin nocoxon pari jene tian huinomati shinancanquin. Fenice ta noa hani qui, ramiho quexa bari hihquihi chipon hori, ramiho quexa bari hihquihi rebo hori naxba qui.

Quebijistima hiaman caxon nihuenhuan behchihibo

¹³ Jaatian hian reboquihax nihue siri pishca jahuiya, cati siri sca ta jaiqui hihquiyo, mai potabahinax Creta mai quexa cahi. ¹⁴ Non quexa cahi bi jari bari cainai chiponhohrihax nihue coshin nocoreneni. ¹⁵ Mai quirihax joxon jaa nihuen noquen nonti hueranbohanquin. Jaa behchihahnán huinacasquimaxon, noque xotonresnon noquen jenequin. ¹⁶ Claudia janeya mai pishcaton nihue pantehiton sca caxon tee teexon noquen nonti pishca noquen hani nontin nanequin noquen. ¹⁷ Hahan nihuen xotonti chiarihbxion nonti caxquemis hihxon noquen nonti rahnexcanquin. Jaatian sca Sirte janin mai chahchimis hihxon, hahan nihuen xotonti sebixon sca, nihuen noque xotonnon jenerihbiquin.

¹⁸ Jascajahipish nihshinahax cahi bi behchoman noque coshin tsahca tsahc-ahiya nonti hihueyamanon hihxon texe jaton jahuabora jenenencanya potasca-canquin. ¹⁹ Jahuen quimisha neten sca jaabaanbi jaton nonti jahuabora sca potacanquin. ²⁰ Jahuentihi ra neten bari jisyamascaxon, huishi jisyamascaxon, nihuen rihbi jascabi coshin tsahcaha ji-huetima shinanscaquin noquen.

²¹ Basi piyamahipiboya jato qui caxon Pablonen jato yohiquin. Hen yohihipi man nincacax tah man hashoan siri jaquehahnai, amicobaan. Creta non potabehnanyamahipish tah non nescari tiromayamaquehahnai. Non tah non jahuabi manomayamaquehahnai. ²² Jaabi raque potanahue. Nonti huesti ta tiromatihiqui. Tsoabi tah non mahuatimahi. ²³ Hea ta Papa Diosen joni qui. Hean tah hen jaa teexonai. Nea yamebi tah hen jahuen naihoh queha yonoti jisiqui. ²⁴ Raqueyamahue, Pabl. Cesaro janin tah min nihyaxihqui. Mihbetan cahibo jatihibi ta Papan mia hinanihqui, hah ta hea jaaxqui. ²⁵ Jaa copi raqueyamanahue, amicobaan. Papan hea yohihi quescabi ta jatihibi. Hen tah hen honanai. ²⁶ Mai pishca janin rah tah non nocoti cahi —jato jaquin.

²⁷ Rabe semana huinotax yame sca Adria quebijistima hian janin nihuen noque jascabi nontan nontanaiya yame pochinicon sca mai hochoma sca jai shinancanquin nonti mehax teenicabaan. ²⁸ Jahuentiho nemin hin hihxon toponah ta veinte brasa janishqui. Caribixon to-ponrihbicanquin. Quince brasa sca jai. ²⁹ Jene bemacanya macan chahchimis hihxon nonti chishqui quiri chosco han-han mai mespoti nexaxon potacanquin. Xaba paquepahinon hihxon manaquin. ³⁰ Nonti potabahinti shinanxon nonti rexo qui huetsa hahan mai mespoti nex-

ahihcamaxon nontin teenicabaan jaton nonti pishca jenenencanya paquequin.

³¹ —Hoa jonibo nea hani nontin baneyamahiya tah man jihueticimahi —sontaroboya capitan Pablonen jaquin.

³² Jascajaha ta sontarobaan risbiboxatenishqui, nonti pishca jabascanon.

³³ Xaba paquescai bi piti pinon hihxon Pablonen jatihibi yohiquin:

—Rabe semanan sca tenehahnahna tah non pihaxma nonotai. Jahuabi tah non piyamarasihi. ³⁴ Piti piresscanahue hah tah hen mato jai, hahan coshihax man jihuemon. Tsoabi tah man mahuatimahi, jahuabi tiromayamahi.

³⁵ Jato jascajaxon jatihixonbi nin-canonbi Papa yocaxon piti tehcaxon piresscaquin. ³⁶ Piti shinanscaxon jati-hibichin sca picanquin. ³⁷ Noque jaa nontin cahibo rahsi cahen doscientos setenta y seis. ³⁸ Pihi yaniscaxon nonti hihueyamanon hihxon trigo sca jenenencanya potacanquin.

Jaton nonti hihquihi

³⁹ Xaba paque sca jaiya mai meraxon bi jahua mai hin honanyamacanquin. Mashiayahpa hani noa jisxon hahtipahxon jano nonti taxnacatsihcanni.

⁴⁰ Jenenencanya banenon hahan mai mespotibo pecacanquin. Hahan chibiti nexahipibo pecaxon jahan nihuen xotonati chiahihnicanquin. Nihuen xotonah sca mashihohti cahi. ⁴¹ Caquin bi bemacanya mashi chachihax nonti peracahti. Jahuen rexo mashi peracahrenenax tsequetimahi bi jahuen chishqui behchoman caxque caxquequin. ⁴² Nonahax jabacanmis hihxon sontarobaan jaton sipojaniborehtecatsihscrai. ⁴³ Rehtecatsihscibaan bi Pablo jihuemacatsihxon capitanejenhahyamaquin. Nonati honanaibo pari jenenencanya cayahax nona nonahi mai qui canon sca jaan yohiquin.

⁴⁴ Caibo sca jihui caxque xecoyamaxon

nonti quexe xecohax canon yohiquin. Jascahax mai qui nococani jatihibi.

Malta mai pishca qui Pablo nocotai

28 Main sca nihxon tah non jaa mai jane Malta honannihqui. ² Janohahaan ta noque sirijaquin bi-hnishqui. Hoiyahpa matsu jahuiya sca chihi requenjaxon non jatihibi pehchihi canon noque quenacanquin. ³ Pablonen ta caro bihxon chihi janin tsaman-hihni bi xanahax caro mehax rono picoxon mequen qui jaa pinishqui. ⁴ Jahuen mequen qui rono hueotai jisish janohahbo yohuani:

—Jaa rah ta joni rehtemis qui. Hiaman rehtequin bi cahnehah bi ta ponte yoshiman jihuematimahiqui —hihcandi.

⁵ Mequen qui ronon piha hueotai bi cahen meshbishcohquin chihi qui potaquin. Jahuabi hisinyamahi.

⁶ —Rahmabi ta soohihquish mahuati sca paquexihquiqui —hihcandi. Basi man-axon jahuabi yamahi jisxon shinan huetsajascacanquin.

—Jaa rah ta dios qui —hihscacani.

⁷ Jaa hochoma ta jaa mai patoronen maibo janishqui Publio janeya patoro. Noque bihquin sirijaxon quimisha neten jahuen xoboho noque jihuemaquin. ⁸ Publion papa bachiho hisinax racati yonati, chixoti. Hahqui caxon Papa yocaxon Pablonen mehequin. Jascajaha rohascái. ⁹ Jaa jisish jaa mai janinha hisinaibo sca becani. Jaabo rihbi rohajaquin. ¹⁰ Jaabaan rihbi sca noque hicha hinanresquin. Noque janohax caresscacatsihquiya non pishinaibo jatihibi noque hinancanquin.

Roma jema qui Pablo nocotai

¹¹ Quimisha hoxne huinohax tah non Alejandría janinhax joho nontin noque nanenihqui. Jaa nonti cahen jene tian huinonon caman janó taxnani. Jahuen Jane cahen Rabe nane. Jahuen rexo

janin jaa jane jai, hahan jaa nonti honanti. ¹² Cahax Siracusa jema janin tax-natax jano sca quimisha neten hihqui. ¹³ Janohax cahi quexa cahax Regio jeman nocoti. Nocotipish mohiyahxon jisi bi reboquihax nihue siri jaresscái. Jaan xotonah tah non jahuen rabe neten sca Puteoli jema janin nocotax mapeni-hqui. ¹⁴ Jano tah non noque huetsabo meranihqui. Banenahue hahcabó tah non jato betan siete neten rihbi hihniqui. Janohax Roma jeman sca cahi cahi, main sca. ¹⁵ Non cahi joi honanax ta Roma meha noque huetsabaan noque behchihi becannishqui, Foro de Apio hahcaibo jema janin noque behchinoxon. Tres Tabernas hahcaibo jema janin sca caibaan rihbi noque behchiquin. Jato meraxon, Hahxon tah min hea jai Papan, hahxon sirijaquin sca Pablonen shinanquin. ¹⁶ Roma janin non nocotaiya ta hahmebi Pablo jihuemacannishqui jahuen coirannica sontaro betan.

Roma janinxon Pablonen yohihi

¹⁷ Jan nocotipi quimisha neten sca judioaan hanibo Pablonen quenamaquin. Tsinquitaiton sca jato yohiquin:

—Noquen caibo qui tah hen jahuabi tiromajayamaniqui, hea huetsabaan. Noquen papabaan joi qui tah hen jahuabi tiromajayamarihbíhi. ¹⁸ Jerusalen janin hea bihxon ta nahua hea hinancannishqui. Jaabaan sca ta hea yoca yocaxon jahua copi hea rehteti merayamaxon hen catannon hea jeneti shinannishqui. ¹⁹ Jaabaan hea jenecatsihqui bi ta noquen caibo queenyamanishqui. Jaa copi tah hen Cesaronen sca hea jisnon hea hahqui raanmaniqui. Heen caibo qui tah hen jahuabi demandanti yamahi. ²⁰ Jaa copi tah hen mato jiscatsihquipiqui, mato yohuanquihncatsihquin. Noquen caibo jan yohini quescabijaquin Papan noque

hahxonai hen shinanai copi res tah hen nea cadenayahpa qui —jato jaquin.

²¹ Judea mai mehax mihqui yohuanai ta noque qui joi nocoyamahihqui. Mihqui yohuanai noquen huetsabo rihbi ta tsoabi nocoyamahihqui. ²² Jaa Jesusya joihibo qui ta jatihibi janin tiromahi yohuancaniqui. Jaa tah non honanai. Jaa copi tah non miabi yohuanmacatsihqui —hahcanquin.

²³ Jaa netenbi tah non joribiyaxihqui hihquish bocani. Cahipish hicha sca jahuen xoboho mapeti became. Papan noque jihuemayaxihqui joi ta Pablonen jato yohinishqui. Yamequiribi yohixon, yohibahinaxon yame caman Moises-nin joi jismaxon Papan joi yohini-cabaan huishani joi rihbi jismaxon Jesus joi jato honanmaquin. ²⁴ Jan yohihi caibaan nincacoinquin. Caibo nincacat-sihyamahi. ²⁵ Jan shinanai quescajaya-maquin shinanax boresscacani. Cahiton Pablonen jato yohiquin:

—Hihcoinjaquin ta Papan joi yohinica betan Dios Yoshiman noquen papabo yohihi nescajanishqui:

²⁶ Nea jonibo yohitanhue: Maton pabin-quinin tah man nincaxon bi ho-

nanyamayaxihqui. Jisquin tah man jisxon bi meratimahi.

²⁷ Nea jonibaan jointi ta xehpo qui. Jaton pabinquinin nincapanan ta nincayosmabo qui. Jaton bero ta beracocanighqui, jisxon honanmis hihxon, pabinquinin nincamis hihxon, jointinin honanmis hihxon. Shinan pontehiton hean jato rohajamis hihxon ta jascajacaniqui

hih ta jaiqui huishani joi.

²⁸ Jaa copi honannahue. Noquen caibomabo qui ta nea hahan Papan noque teehihmah i joi Papan raanscailqui. Jaabaan ta nincatihiqui.

²⁹ Jato jascajahiya judiobo sca bocani. Joi bichinnannani bocani.

³⁰ Copijaha hinantahni xoboho ta Pablo jihuenshqui rabe bari. Jano jihuexon ta jaa jisi jahuibo jaan jisnishqui. ³¹ Jato jisanan Papan jihuemahi joi yohixon tsoanbi chihtehahma jato honanmaquin. Jahuatohonbi pantehahma noquen Hihbo Jesucristo joi honanmaquin.

ROMANOBO

Romanobo qui Pablonen raanni joi

Roma janin jihuetaibo qui Pablonen joi raanai

1 Hea Pablo Jesucriston joni hihxon tah hen mato qui raannoxon nea joi huishahi, hea huetsabaan. Heen tee hea hinanquin ta Jesucristonen hea yohinishqui, Papan joi siri hean yohibonascanon. Jaa copi tah hen huishahi.

2 Jahuen joi yohinicabo huishamaquin ta neateman bi res Papan yohinishqui, noquen Hihbo Cristo jan raanyaxihqui yohiquin. **3** Jan raanscrai ta jahuen baque qui, Cristo. Tsoa jahuen xohtabo quin hihxon ta topopaquexon quiquin hapo yamanica David jahuen xohta coin hihpahonishqui, non honanah. **4** Noquen naihoh queha Papan ta jahuen coshiyaxon noquejismanishqui, jahuenahbi jahuen baque Cristo hihqui non honannon. Jan hihquipi bi hahquirihbi teehihmaxon huenixon ta Papan noquejismanishqui. Jaa jahuen baque Jesucristo ta noquen Hihbo qui. **5** Jaan ta heen tee hea hinannishqui, jahuen raanti sca hea janon. Jatihibi jonibo yohinon ta hea raanihqui. Jaabo queyoyamanox mananon tah hen jato nincaointi yohihi, Criston jihuetaibo jaábo. **6** Mato rihbi tah man jascapahbo qui, hea huetsabaan. Jesucriston caisahbo tah man qui. Man Roma jema janin jihuetaibo noque huetsabohon ta Papan hiti shinanhqui.

7 Mato tah man caisahbo scah qui, jahuenahbi man janon. Noquen Hihbo Jesucristo betanbi ta Papan mato mehehiqui. **8** Jahuen yoshin siripan mato mehehah man sirijaquin shinanyamahin, hea huetsabaan?

Roma janin Pablo cacatsihqui

8 Hahxon tah min noque jai, Papan, hah tah hen Jesusen janen jai, mato jatihibi yocaxonquin. Tiromahahbo bi man tenehi ta jatihibi janinxon honancaniqui. **9** Mato yocaxonnixon tah hen Hahxon tah min hea jai, Papan, hahscrai. Hicha bi res hen mato yocaxonai ta Papan honanahqui. Heen jointiboyaxonbi jahuen baquen joi yohinixhon tah hen shinanbehnoxonma mato yocaxonai. **10** Papa yocaxon tihibi tah hen mato yocaxonai, hea huetsabaan. Mian jisí, texe maibo janin catanish Roma janin sca hea cahá siripaiya, janosca hea camahue, Papan, hah tah hen jai yocaquin. **11** Mato jisi tah hen hiti cacatsihqui, hea huetsabaan. Hahan coshiti shinan tah hen mato yohicatsihqui. **12** Non tah non hinanhahnantiki. Hea jai shinan mato hinanah tah man matona jai shinan rihbi man hea hinantiki, jatihixonbi non Criston shinanyaxon sirijaquin shinannon.

13 Hicha coti tah hen mato janin cacatsihquish bi tee hichahiya hen rahma caman cati hahtipahyamahi. Caibo jonibo hen yohihi quescajaribiquin tah hen mato rihbi Papan joi siri yohicatsihqui, man Papan shinanyahpahax shinan caicanascanon. Man honannon hihxon tah hen mato yohihi, hea huetsabaan. **14** Jatihibi jonibo hean yohiti ta noquen Hihbo queenihqui, hea huetsabaan. Jema janin jihuetaibo, cahchiho jihuetaibo, hicha quirica honanaibo, quirica honanyosmabo, jatihibi tah hen yohiti jai. **15** Jaa copi tah hen caxon mato rihbi jaa joi siri yohicatsihqui.

Papan joi ta coshi qui hihqui

16 Jaa joi yohiti qui tah hen rabinyamabiresai, hea huetsabaan. Papan coshi joi tah qui. Jayaxon ta

nincacoinaibo rahsi jaan jihuemahiqui. Nincacoinaiton ta jato bichiqui, queyoyamanox manatahbo. Jato qui nocoxon tah hen judiobo pari yohihi. Jaa pecaho sca judiomabo rihbi yohiquin.¹⁷ Jaa joiyaxon ta Papan noque honanmahiqui, nincacoinaiton jaan noque bichi non honannon. Non nincacoinaiton ta noque bichiqui. Jahua ta hashoan pishinyamahihqui, nincacointi res. Huishani joi jai quesca tah qui. Nincacoinaiton Papan bichibo ta queyoyamanox manatihiqui hihqui.

Jaton hohchabo jan hihbomahibo

¹⁸ Tsoabo jan casticanyaxihquiquin hihxon ta noquen naihoh queha Papan noque honanmaribihiqui, jahuen rahuibo rahsi jan casticantih non honannon, nincayosmabo rahsi. Jahuen joi pantecatsiquin tiromajahibo rahsi. Jascapahbo jatihibi ta casticanyaxihquiqui.¹⁹ Noquen naihoh queha Papa jenquetsahpa quin ta honantihbires qui. Jaabaan rihbi ta honanihqui, Papan jato jismahah.²⁰ ¿Noquen Papa jenquetsahpa shinanya quin? ¿Jahuen coshi jenquetsahpa queyoyosma quin? ¿Jaa huesti jatihibi hihboyamahiquin? Honantih bi res ta jaa jaiqui, jan jonijanibo jisxon honanquin. Jaa copi ta Honanyamaxon tah non tiromajanihqui, Papan, tsoanbi jati hahtipahyamahiqui.²¹ Tsoa noquen naihoh queha Papa quin honanax bi ta Mia tah min noquen naihoh queha Papa qui hahyamacannishqui. Papan jato hahxonah bi ta Hahxon tah min noque jai, Papan, hahyamaribiccannishqui. Jascahaxma ta honanmabo sca banecannishqui, shinanjomabo. Pontejaquin shinanyosmabo sca.²² Hea tah hen honan qui hihquish bi ta hihti honanmabo sca banecannishqui.²³ Jascapahax ta noquen Papahon queenyamacannishqui, queyoyosma

noquen Papa hihqui que bi jahan queenyamacanni. Papan shinan siri queenyamaxon ta jaton mequemanbi santobo jacannishqui, joni quescapahbo santobo, caibo rihbi hihsabo quescapahbo, caibo ninotaibo quescapahbo. Mahuanica rahsi quescapahbo santojacanquin. Jaton mequemanbi jascapahbo jacanquin, hahqui sca yocanoxon.

²⁴ Jaa copi ta Papan rihbi jato jenebahinnishqui, jaabo queenai quescari sca hashoan sca tiroma sca jaahbo. Jan jenehah ta jaton yoraquibi hohchanoxon sca tiromacannishqui.²⁵ Noquen Papa coin queenyamaxon ta dios que ma bi dios romishin sca bihcannishqui. Papan hahnibo qui sca tisquihahpaquexon ta jascapahbo qui sca yocacannishqui. Noquen Papan jatihibi jonijani que bi jahan queenyamacani. Noquen Papa ta hihti siri qui. Hahqui jascabihbi siripi yohuantih bi ta huetsa shinan bihcannishqui.

²⁶ Jaabo jascanica copi ta Papan jato jenebahinnishqui, tiroma bi res tiromabo rahsi sca jaábo. Jaton haibobaan ta jaton bebobo jenebahinxon hahbe haibobo sca benejacannishqui.²⁷ Jascajaribiquin ta jaton bebobaan haibo hihquihinti shinanyamacannishqui. Haibobo jenexon ta hahbe bebobo sca hahcannishqui, hahbe bebobo hihti hahcatsihqui hahcannani. Hahbe bebo betan ta hihti jaroma sca jacannishqui. Jaa copi ta jaton shinan hihti tiroma sca janishqui. Shinan sirijomabo sca ta banecannishqui.

²⁸ Noquen Papa shinancatsi-hyamahibo quen ta Papan jato jenebahinnishqui, jaton shinan masas-canon. Jaa copi ta jascacannishqui.

²⁹ Jahuabi siri ta jayamacannishqui, tiromati res shinancanquin. Caibo

tiromajati shinancanquin. Caibaan jahuabora jato bichincatsihcami. Yohuashihtax sinacahanani. Rehteti res shinanquin. Rehtenanti res shinanquin. Paran paranquin. Jistahihmahanannani. Caibo qui yohuan yohuani.³⁰ Caibo qui quesahi. Noquen Papa jistahihmacanquin. Jaton caibo hichaquin. Siribohihcamaxon bi caibo rahninquin. Hahmebi siripihamahi yohuani, coshihihamahi. Jaton huetsabo tiromajati shinancanquin. Jaton papabaan yohihah bi nincayosmabohi.³¹ Shinanjomabohi. Yanapanyosmabohi. Mia hahxonxahnpn hihquinanax bi yanapannanyamarihbibi. Caibo yomanahmarescanquin.³² Jascapahbo ta jascabi sca muhuatahbo jayaxihqui Papan yohihah honanax bi ta hihrescannishqui. Rahma caman rihbi ta jascacaniqui. Hahresquinma bi caibo rihbi hesequin, tiromajati queenahbo hihxon.

Sirijaquin shinanxon Papan casticanai

2 Caibaan tiromajahi honanax copi tah min Honanyamahax tah hen jascanhqui, Papan, min jatimahi. Caibo yohihi, Jaa ta tiroma qui hihquish bi tah min jascari miin yora qui bi min yohuanai. Jaabo tiromahi hihqui quescarihbibi tah min mia qui.² Jascapa tiromahibo ta Papan hihti casticanyaxihqui qui. Tsoabi ta cahnetimahiqui. Jahuen quirica jisxon tah non jaa honanai.³ Jascapahbo ta tiroma qui hihquish bi mia rihbi jascapahax, ¿Papan mia casticanyamanon hihquish min cahneti shinanain?⁴ Papan ta mia hicha hahxonihqui. Tiromahi quen mia histon casticantih bi ta basi sca mia tenehiqui. Papan mia jascajaxonah bi Jahuama tah qui ¿hih min Jain? Pontejaquin sca min shinannon hihxon

ta jaan tenehiqui. ¿Honanxon bi min jaamahi nan?⁵ Min pontenon hihxon mia tenexonai bi tah min nincayosmahi. Shinan coinjoma tah min qui. Jaa copi ta hashoan sca mia casticanyaxihqui qui. Siribo hihqui jisxon sirijaquin jahuen jonibo bihxon sca ta tiromabo sca casticanyaxihqui qui. Jaatianbi ta hihtijaquin mia casticanyaxihqui qui.⁶ Noquen shinanbo honancoinxon ta tiromabo jaan tiromajayaxihqui qui. Siribo rihbi ta sirijaquin bihyaxihqui qui.⁷ Queyoyamanox manati queenxon sirijahibo ta Papan yohiyaxihqui qui: Mato tah man siribo qui. Maton tah man sirijapahoni qui. Queyoyamanox manataibo sca janoxihnahue hah ta noque jayaxihqui qui.⁸ Papa nincayosmaboxon ta jan yohihi nincacatsihyamaxon bi tiromati caibaan hesehah pari nincaquihqui. Jascapa ta Papan sinajayaxihqui qui. Mato tah hen hihti tiromajanohihqui, heen rahuibaan, hah ta jato jayaxihqui qui.⁹ Jascajaxon ta jato hihti casticanyaxihqui qui. Jaan casticanah ta tiromapahonibo rahsi hihti hohmis hohmisyaxihqui qui. Judiobo pari casticanxon ta judiobomabo sca jascajaribiyaxihqui qui.¹⁰ Sirijapahonibo caya ta jascajayamayaxihqui qui. Mato tah man siribo qui. Man tah man sirijapahoni qui. Queyoyamanox manataibo sca hehbetan jihuena hue hah ta jato jayaxihqui qui. Judiobo pari jascajaxon ta judiomabo sca jascajaribitihqui, siribo rabsibi.

¹¹ Non jenquetsahpabohin ta Papan honanquin sirijahqui, hea huetsabaan. Jaa copi ta tsoabi cahnetimahiqui, tiromabo casticanxon siribo bihqui.¹² Tiromabo ta jenquetsahax bi cahnetimahiqui. Papan huishamani honanaxma hohchanihbo ta jascabi sca casticana jatihiqui. Papan huishamani honanax bi hohchanihbo rihbi ta Pa-

pan jascajaquin casticanyaxihqui qui, jan Moises huishamani jai quescajaquin. ¹³ Moisesnin huishani joi nincaresaibo ta sirima qui, Papan jisí. Jaan jisí ta Moisesnin huishani jai quescabijaquin hahcaibo siribo qui. ¹⁴ ¿Moisesnin huishani jojomaxon copi judiomabaan ponte jihuetai honanyamahihquin? Honan ta jacanighqui. Papan huishamani jojomaxon bi ta hahmebi shinanaxon, jan huishamani jai quescari jihuetai yohicaniqui, Papan huishamani jai quescabijaquin yohiquin. ¹⁵ Ponte jihuetai honanon ta jaton jointi janin jaa honan Papan nianishqui. Jaa copi ta jascari jihuetai yohinancanighqui. Jaa copi rihbi ta jaton jointinin shinani, Tiroma ra tah hen jai, hihyamahax Sirija rah tah hen jai hihcanighqui. Caibo betan yohinani ta cahenannancaniqui. Caibo rihbi sca, Jaan ta hea jascamahaxqui hihqui, hohchamati yohihi. ¹⁶ Papan shinanyaxon hean yohihi quesa ta jayaxihqui qui, hea huetsabaan. Jonetax japhonibio ta Papan yohiyaxihqui qui, Man tah man jascari janiqui hahquin. Jan jaa copi jato casticantihi honantih bi res sca janon ta jonibo jascajayaxihqui qui, casticanti nete nocotaiya.

Moisesnin huishani joiyahpabo

¹⁷ ¿Hea tah hen judio qui hih man jain? ¿Moisesnin yohini joiyahpa tah non qui hih man jain? ¿Noque tah non Papa Diosen jonibo qui, hih man jain, judiobon? ¹⁸ ¿Non jenquetsahpi jihuetai Papa queenihqui? ¿Noque judiobaan tah non honanai hih man jain? ¿Jenquet-sahpabo siribo quin Papan joi honanaxon tah non honanai hih man yohuani jain? ¹⁹ Hean caya tah hen benchebo bahi honanmaquin hahcajaquin Papan joi honanyamahibo haxematihi, hih tah min jai. Xabajaquin hahcajaquin tah hen Papan jojomabo honanmacointihi, hih tah min jai. ²⁰ Shinanjomabo tah non honan-

matihi hih tah man jaribihi. Baquebo hanijaquin hahcajaquin tah hen jato haxematihi hih tah man jaribihi. Moisesnin huishani joi tah non jai. Jaa copi tah non shinancoinyahpabo qui. Non yohihi ta quesa joima qui hihnika rihbi tah man qui. ²¹ Jascalicaxon tah man huetsa jonibo haxemah. ¿Siripi jihuetai jato haxemahax bi mianbi min yohihi quescaraxma min jihuetai? Yometsohyamanahue hihnicahax bi ¿min yometsohaintai? ²² Tsiniyamanahue jaax bi ¿min miabi tsinbih? Santobo jistahihmahihax bi tah min Papahon shinanihcama-hax jahuen xoboho cahax Papahon shinanaxma tsahoresai. ²³ Hea caya tah hen Papan joiya qui jaax bi tah min Papan joi jai quescama jihuetai. Min tah min jaamahi, judiobon. ²⁴ Mian tah min tiromajaquin caibo shinanmahi, noquen Papa sirima hihqui shinanmaquin. Papan jato caheni jai quescapahbo tah man qui. Man tiromahi jihuetai jisish ta nahuabo tiromahi hehqui yohuan-caniqui hah ta Papan jato janishqui cahequin. Mato rihbi sca tah man jas-capahbo qui, judiobon.

²⁵ ¿Jahan judiobo honantiyahpa min quin? Min jaya hihqui bi ta Papan mia casticanyaxihqui qui. Jaa honantiyahpahax Moisesnin yohini jai quescari min jihueraibhiya pari ta Papan mia yanapantihi qui. Jaa honantiyapahax min jascari jihueyamahiya ta Papan jisí mia jayajoma quescapah qui, jahuenahma. ²⁶ Jahan judiobo honantijomahax bi Moisesnin huishani jai quescari jihuetaibo ta Papan jisí jahuen joni coin qui, jahuen shinanyahpabo. ²⁷ Jahan judiobo honanti yamahax bi Moisesnin yohini jai quescapa tahni ta caibo jihuethqui. ¿Mia cahran, judion? Jaa honantiyahpahax bi tah min jascayamahi jihuetai. Jaa copi ta Papan casticanti neten maton nahuabaan mato yohiyaxihqui qui, Mato caya tah man noque mentan hashoan

nincayosma qui hahquin.²⁸ Bemacanya res judio quescapahbo hihquibo ta jidioboma qui. Hahan judiobo honantiyahpahax bi hihresaibo ta judiomabo rihbi qui.²⁹ Judion ta jahuen jointiboy-axon bi Papahon shinanihqui. Caibaan jisnom hihxon res hahcaiboma bi ta hahcoinaibo Papan judiobo qui. Hea siri hihqui caibaan shinanahbo japan hihquibo ta Papan judioma qui. Papan hea siri jisnom jaa queenai quescari jihuecoinpan hihquibo ta jahuen judio qui, jahuen caisahbo.

3 ¿Papan noque jascajaquin jisiya tsi ra noque judio baquebo jahuamabo non quin? hih sca rah tah min jai. Jascari vocacahyamahax rah tah min ¿yanca bi res non honantiyahpabo quin? hih min jai. Min jascarai bi tah hen Yancama rahan hih hen jatihi.² Jascapahbo non janon ta jahuen joi huishamaxon Papan noque hinannishqui, non jaya hihnon.³ Noque hinanah bi caibo nincayosmabohi copi Papan noque hahxonti hahtipahyamascaquin?⁴ Hahtipahi rahan. Hen mia yohinon nincahue: Papa ta hihcoiniqui. Noque jonibo res tah non jaamajanicahbo qui. Papan huishamani quescabi tah qui:

Mian tah min pontejaquin casticanai, Papan, hah ta caibaan jatihiqui. Caibaan rihbi ta Jenquetsahaquin min casticanain, Papan jacatsihxon bi Ponte bi res tah min qui Papan hah jayaxihcaniqui, yohicoinqui. Jascá ta jaa huishani joi janin jai qui.

⁵ Non hohchataiya ta noque quescapahma Papa hashoan ponte hihqui jisyaxihcannihqui jonibaan. Jaa copi ta noque casticanah pontema qui ¿hih non jatihi? Hihyamahi rahan. Noquenahbi noquen tiroma shinaman pari tah non jascathi. ⁶ Jaan pontemabo casticana siriymahiya ta jenquetsahxon bi jatihibi tiromabo casticanti hahtipahyamaquehahniqui.

⁷ Jan yohini quescajaquin hahtihi bi non quesa jahiya ta Papan hahcoinai jiscanthihqui. Noquen Papa siri hihqui jiscanquin. ¿Jascacoinaiya jahua copi sca noque casticantihquin hah non jatihi? Hahyamabiresquin rahan.⁸ Caibo ta hehqui quesa hihqui. Papa huesti siri banenon tiromanonhue hihroqui hea jai. Quesa ta jacanihqui. Jascapa shinanyahpabo quen ta Papan jato casticancoinyaxihqui qui.

Non hohchayahpabo rahsi jai

⁹ ¿Papan joiyahpabohax copi noque judiobo hashoan siribo quin? Hihyamabiresi. Jascapa rabe tah non qui, hohchayahpabo rahsi, judiobo, judiomabo rihbi. Ma tah non jaa yohiscahaqui.¹⁰ Papan huishamani joi jai quescabi tah qui:

Ponte joni ta yamahihqui, ni huestibi.

¹¹ Ponte shinanya jonibo yamabiresi. Papahon shinancoinaibo yamahi.

¹² Papan babin niyahamahibo rahsi tah qui, tiromahibo rahsi. Siribojanicabo ta yamabiresihqui, ni huestibi yamahi.

¹³ Jaton yohuan ta rishtaya qui. Mahutipi tsecaxon quehpenxon xetehah pisi hihqui quesa ta jaton jana jai qui. Jaton jana rebo ta hahan paranti res qui. Ronon shinanyahpa ta jacanihqui, joni tiromajati res.

¹⁴ Roa roati, hichá hichati res ta shinancaniqui.

¹⁵ Joni huetsa rehte retehi cacatsihqui ta hishto hishtocaniqui.

¹⁶ Jano jaabo huinotah quen ta masataibo sca jaiqui, hihi hohmis hohmisabio.

¹⁷ Caibo betan siripi jihuetai ta honanyamacaniqui.

¹⁸ Jaton Papa Dios ta ni pishcabi shinanyamacaniqui.

Jaabohihi ta Papa jascarihqui, jahuen joi janin.

¹⁹ ¿Tsoabo yohihi jascanishquin nan? Jatihibi jonibo rahan. Jahuen jonibo ta jahuen joi Papan hinannishqui, jaa joi jai jatihibichin sca nincacahbo. Jaa copi ta neteti jacanihqui jatihibi. Nincayosma tah hen qui hihquish, neteti. ²⁰ Papan yohihi quesvari jihuetaibo ta yama qui, Papan jisí. Jahuen joi jaxon tah non jaa honanai. Hohchamisbo rahsi non hihqui honanquin. Honanax copi tah non neteyaxihqui.

Noquen Hihbo qui hinamehtax queyoyamanox manati

²¹ Hohchayahpa rahsi non hihqui bi ta Papan jahuen bahi noque jismahihqui, siribo sca non nihnon. Huishaxon ta Moisesnin noque yohinishqui, non Cristo qui hinamehtax jihuetaibo jai. Jascapa ta Papan jisí siri qui. Hahqui hinamehtax non siribo sca jai ta neateman Papan huishamanishqui, Moises, texe jahuen joi yohinicabo rihbi jaa joi huishamaquin. ²² Cristo nincacoinax hahqui hinamehtaibo rahsi res ta siribo qui, Papan jisí. ²³ Jatihibi jonibo hohchamisbo copi ta jascapa rahsi noque jisiqui, hahbe jihuetai hahtipahyamahibo. ²⁴ Noque jascapa rahsi que bi ta Papan noque hihti hahxonishqui, Cristo raanxonquin. Mahuaquin ta Criston noque bijnishqui, hohchapan hinábo non jayamascanon. Criston noque hahxonah ta Papan noque siribo sca jisiqui. ²⁵ Neateman ta hicha bi res noquen xenibo tiromapahonishqui. Tiromahibo que bi ta Papan jato tenexon jato queyobahinyamanishqui. Jaa ponte hihxon jato teneni non jatihixonbi honanon hihxon ta janibi sca Jesucristo raannishqui. Noque copi jan mahuani quen tah non hahqui hinamehtax noquen hohcha copi non mahuatimascái. ²⁶ Noquen Papa ponte bi res hihqui non honanscanon hihxon

ta jascajaquin Cristo raanxonnishqui. Jaa copi honannahue: Papa ta ponte bi res qui. Jaan jisí ta Jesus qui hinamehtaibo pontebo qui, jahua copi chihí janin catimascai.

²⁷ Papan noque jascajaxonah tah non Hea caya tah hen siri qui hihtimabiresai. ¿Jahua copi non jascatimahin? ¿Non jahuabi hahyamabiresai copi nan? Jaa copi ma. Non hahqui hinamehtaiya Papan noque sirijaquin bichi copi tah non jascari yohuantimahi. ²⁸ Non sirijaquin hahni copima ta Papan noque bichiqui. Non hinamehtai copi res ta noque bichiqui. ²⁹ ¿Papa Dios tsoabaan Papa quin? ¿Judiobaana res nan? Jatonah res ma rahan. Caibaana rihbi rahan. ³⁰ Noquen Papa Dios ta jaa huesti Papa Dios qui. Nincacoinax hinamehtai judiobo ta sirijaquin bichiqui. Caibo rihbi jascajaribiquin: nincacoinaiya jato sirijaquin bihquin. ³¹ Cristo nincacoinxon tah non Moisesnin huishani joi sca tiroma hihqui shinantimabiresai. Hashoan sca tah non siri hihqui shinanai.

Abraham janí quescajati non jai

4 Shinanscanahue. Abraham ta noquen xohta qui, noque cah non jahuen chini baquebo qui. ¿Jahua copi Papan jaa siri jisnishquin? ² ¿Min sirijaquin hahcái copi tah hen mia siri jisi hah Papan jaa janishquin? Hahyamaquin rahan. Jascajaha ta Abraham jaya joiti jaquehahnishqui. Hea caya tah hen siri qui hih ta jaquehahnishqui. Hihcaxbi jascayamahi. Papa Dios bebon nichish tah non jenquetsahax jascatimahi. ³ Papan huishamani joi ta nescari qui: Papa Díosen yohihah ta hihcoinjaquin Abrahanen shinannishqui. Jaa copi ta Abraham siri hihqui Papan jisnishqui, hihqui jaa huishamani joi. ⁴ Teexonnicanton cananai quescama tah qui. Teexonnicica copijaquin tah non copijacoinai, noque teexonai copi. Mia

tah hen hinanresai hah tah non copi-jaquin jatimahi.⁵ Papan noque hahxonai ta jascayamahiqui. Hen sirijaquin hahcai copi hea siri jise Papan, hihnicia ta tiroma qui, Papan jisí. Papan siri jisi joni ta nescanica qui: Min hihcoinai tah hen shinanai, Papan. Min yohihi quescabih ta jacointihiqui. Min tah min hea sirijaquin bihtih, hihqui. Papa hihcoinai non shinanaiya ta siri hihqui noque jisiqui.⁶ Non hahcai copima bi ta hahxonresquin Papan siri hihqui noque jisiqui. Jaa copi tah non hihti jenimati jai. Davidinin rihbi ta jascajaquin yohinishqui, jahuen behua huishaquin.

⁷ Papan noquen hohcha sohuaxona tah non hihti jenimati jai. Noquen hohcha yamascaiyah tah non jenimati jai.

⁸ Hen hohchani Papan hea caheyamahah tah hen hihti coincointi jai
hih ta Davidinin huishaquin janishqui.

⁹ ¿Papan hahxonah, tsoabo sca hanan jenimati jaiquin? ¿Judiobo res nan? ¿Caibo rihbi nan? Jatihibi rahan. Hen yohihah quesca tah qui: Hihcoinai Abrahanen shinanni quen ta jaa siri Papan jisishqui.¹⁰ ¿Papan jaa siri jisiya jenquet-sahpa Abraham janishquin? ¿Judiobo honantiyahpa sca janishquin? Jayajoma pari janishquin? Jayajoma pari rahan.

¹¹ Hahan honantijoma pari xon ta Mia jascaraiya ta jacointi qui Papan Abrahanen janishqui. Jaa pecaho sca ta jaa siri hihqui jisxon, Honantiyahpa sca jahue, Papan janishqui. Papan siri joni jaa hihqui honanahbo hihxon jascajaquin, Jaa copi ta jatihibi nincacoinaibo Abrahanen xohtabo qui, jahuen honantijomahax bi Papa qui hihcoinai. Jan jaa jisní quescajariquin ta noque siribohi jisiqui, Papa hihcoinai non shinanai quen.¹² Hahan honantiyahpaxon nincacoinaibo rihbi ta jahuen xohtabo qui. Jahuuen honantijoma pari xon Abrahanen Papa Dios nincacoini quescajarihibi

jaabo jai, jahuen xohtabohi. Jaa cahen jaton quiquin xohta.

Hahqui hinamehtaibo Papan hahxontijahi

¹³ Papan ta Abraham nescajaquin yohinishqui: Minabo hihnon tah hen mia jatihibi jonibo hinanrestihi, miin xohtabaana rihbi hihnon, hahquin. Jan hahni copima bi jan hihcoinjaquin shinanni copi ta siri hihqui jisxon Papan jascajaquin hinantijanishqui.¹⁴ Abraham ponte res jihueni copi hinantijanixon ta hinanresquin hinanah jayamascaquehahniqui. Jaatian ta Papa hihcoinai non shinanai rihbi jahuama sca jaquehahniqui.¹⁵ Papan noque jahuabi yohiyamahah tah non jahuabi rihbi nincati yamaquehanai. Jaan noque yohihah tah non nincati jai. Nincati jaxon bi tah non jaamajaresai. Jaa copi ta noque casticanti jaiqui.

¹⁶ Jaa copi ta jan hihcoinai non shinanaiya noque hahxonresiqui. Queenxon res hahxonti hahtipahnoxon ta nincacoinaibo hahxontijanishqui. Hahxoncatsihxon copi res hahxonti yohinixon ta jan yohini quescabijaquin jaan hahxontihiqui, Abraham xohtabo hinanquin. Jahuuen honantiyahpabo res ma bi jaa xohtahi nincacoinaibo rahsibi jahuen xohtabo sca janon ta Abraham hinantijanishqui. Jaa copi ta Abraham noquen xohta qui, jatihibichina.

¹⁷ Papan huishamani jai quesca tah qui: Mesco jonibo tah hen mia hicha xohtamayaxihqui hihqui jaa joi. Papan jascajaha ta Abrahanen yohinishqui: Min yohihi quescabii ta jacointihiqui, Papan, hahquin. Non muhatai bi Papan noque jihuematih ta Abrahanen honannishqui. Jayaxihquibo jaríyamahi bi ta jaresscái quescapahbo jato Papan yohihi. Jaa rihbi ta Abrahanen honannishqui.

¹⁸Jatihi ta miin xohtabo jayaxi-hqui qui Papan jaáh, hihcoinjaquin shinanquin. Yamayaxihqui shinantihi bi hicha xohtaboyahpa sca jayanoxon nincacoinquin. ¹⁹Cien baribo nocotaiya, yosiboscaax mahuati hochoma quescapahxon, jahuen haibo Sara jisi bi baque bihyosma janish rahma hihti yoxaboscai, jenquetsahaxon baque bithimascai. Non nescapah jai bi ta noquen baque jayaxihqui qui, hihqui. ²⁰Papan yohini quescra rah ta jatimascaiqui shinanyamaquin. Hea rah ta baque hinanyamayaxihqui qui hihiyamahi. Jascaxonma bi hashoan sca nincacoinquin. Min tah min hea hahxonyaxihqui, Papan. ²¹Hen tah hen honanai. Min yohini quescabijati tah min hahtipahi. Min hea baque hinantihi tah hen honanai, hahquin. ²²Jan jascajaquin shinanni copi ta jaa siri Papan jisnishqui.

²³Jaa siri jisnixon ta jaa joibi Papan huishamanishqui. Abraham jascabihi copi Moises huishamaquin. ²⁴Abraham jascabihi copi res ma bi ta jascarihi non janon hihxon huishamanishqui, hea huetsabaan. Noquen hohcha non yamascanon ta noquen hihbo mahuanishqui, Jascahue Papan jaáh. ²⁵Hihquipish bi ta hahquirihbi teehihnishqui, Papan huenihah. Noque rihbi hahxonquin ta jascajanishqui. Jan huenicinni non jointinin shinancoinaiya ta noque rihbi siri jisiqui.

Papan sirijaquin bichibo hahan jenimati jai

5 Jaa copi ta non nincacoinaiya siribo sca noque Papan jisiqui hea huetsabaan. Noquen Hihbo Jesucriston noque hahxonah ta Papan noque sirijaquin bichiqui, siriresi non hahbetan jihuemon. ²Noquen Hihbaan noque hahxonni quen tah

non noquen Papa betansca non nichí. Hahbetan nichibo sca tah non qui, jahuen jihuetauhbo hahan hihti shinanai. Non hahbetanbi jihueyaxihqui honanax tah non hihti jenimascai. ³Jaa copi jenimaxon bi tah non tiromabo tenehax hashoan rihbi jenimahi. Tiromabo tenequin tah non coshi shinan bichi. Jascapa non bihtihi honanax tah non tiromajahabo bi hihti jenimahi. ⁴Hahan teneti coshiyahpascaax tah non shinanyahpa sca non jatihi. Shinanyahpahax res sca tah non honanyahpa sca non jai, Papa janin non jihuethi honanax sca. ⁵Noque ta jahuen yoshin siri noquen jointi janin niaxoniqui. Jaan sca ta noquen jointinin non honannon noque hihti honanmahiqui, noquehon jahuentiho queen noquen Papa jaiquin hihxon non honannon. Jaa honanxon tah non noquen Papa betanbi non hihcoini jihueyaxihqui non honancoinrihbibi.

⁶Shinanscanahue. Nincayosmabohax non mahuatihi bi ta noque jihuemanoxon Cristo mahuanishqui, yosmabo non jai bi. Jahuen joti neten jonish ta noquen hohcha copi mahuanishqui. ⁷Noquen jisí, huetsa ponte jihuetai joni jai bi tah non jaa jihuemon hihxon nohri jato retemati hahtipahyamahi, mahuacatsihyamaquin. Jahuen siri amico jihuemon hihxon pari rah ta caibaan hahri jato retemati shinantihiqui. ⁸Papan ta noque jascajaxonihqui. Hohchayahpabo non hihqui que bi ta noque copi mahuati jonon Papan jaa raanxonnishqui. Jaa copi tah non honanai: Jahuentiho queen jan noquehon jaiquin ta Papan noque jismanishqui, noquen Hihbo Cristo raanxonquin. ⁹Noque copi Cristo mahuani quen Papan noque siri jisiya cahen non Cristonahbo jaiya noque xahbanen noquen casticanti paqueyaxihquiqui. ¹⁰Papan rahuibo non janí que bi ta jahuen baque noque copi mahuani copi noque

sirijaquin bichiqui, jahuen jihuetahbosca non janon. Cristo jihuerihbiscai quenta hashoan rihbi sca noque jahuen jihuetahbosca Papan sirijaquin jihuemayax-ihquiqui.¹¹ Jaa copi tah non sirijaquin shinanai. Sirijaquin shinani res ma bi hihti jenimaribibi. Noquen Hihbo Jesusen noque hahxonah tah non Papan baqueboscaax hihti jenimaribitihi.

Adan betan Cristo

¹² Jaan noque hahxonah quen tah non honanai, hea huetsabaan. Jamenoni joni huesti ta hohchamenonishqui. Hohchatax ta mahuanica sca janishqui. Jaa xohtahi ta jatihibi sca hohchayahpa sca jacannishqui. Jaa copi tah non mahuanicabo sca non jai.¹³ Papan Moses huishamariyamahi bi ta hohchayah-paboscaax rahsi jaresscanishqui. Hohchataibo bi ta Man tiromahibo copi tah hen mato casticanpaqueyaxihqui Moses huishamaquin jato yohiriyamanishqui.¹⁴ Jaa bi ta Adan pecaho Moses janon caman mahuanicabo rahsi japhonishqui. Rahma caman rihbi tah non jascapahbo rahsi jai. Adaman hahni quescajayamahax bi ta mesco hohchayahax mahuanicabo rahsi non jai. Adan bebonica janí quescaribhi ta Cristo sca noquen quiquin bebonica scah qui.

¹⁵ Hihcax bi jascapa rabe hihyamanish. Adaman ta noque mahuanamanishqui. Cristo sca ta noque queyoyamanox jihuemahiqui. Hohchatax Adan mahuanica hihni quescaribhi tah non noque jai, hohchatax mahuanicabo sca. Hohchanish bi jihuemicabo sca non janon ta hihti sirijaquin Cristo noque hahxonishqui, noquehon hihti shinanxon.¹⁶ Adaman noque mahuanami que bi ta Cristo noque jihuemahiqui. Hohcha hohchayahpa rahsi non hihqui bi ta Cristo copi Papan noque sirijaquin bichiqui.¹⁷ Noquehon ta Papan hihti shinanihqui. Non

nincacoinaiton ta hihti hahxonquin siribo sca noque jisiqui. Jaa copi honanquin sirijanahue, hea huetsabaan: Adan hohchani quen non mahuacoren mahuanicabo qui, cahnetima quescapahbo non hihpahoni bi tah non jascayamasca. Hihti huetsapah sca tah non jai, Criston noque hahxonah tah non queyososma jihue hihbotihi.

¹⁸ Jasca tah qui. Bebonica joni hohchamenoni quen tah non jatihibi sca hohchamisbo qui, casticantibo. Huetsan sca sirijaquin hahxonni copi sca tah non siribo sca qui, jihue hihbobo.¹⁹ Hohchamenoxon Adaman noque hohchayahpaboscaax rahsi hihmani quescajayaquin ta nincanicaxon Criston noque Papan shinanyahpaboscaax hihmahi-hiqui, jahuen caisahbo sca.

²⁰ Noquen hohcha hihti jaroma hihqui honanahbo hihxon ta Papan Moses huishamanishqui. Hashoan jaroma non hihqui bi ta hashoan sirijaquin rihbi Papan noque hahxonrihbihiqui.²¹ Hohchapan hinábo rahsi tah non hihpahoniqui, jenquetsahax hohchajomatimahi. Mahuanicabo rahsi tah non janíqui. Rahma tah non jascayamasca. Papan ta noque hihti hahxonihqui, Cristo noque raanxonixon. Honan-scanahue: Noquen Hihbo Jesucristo copi res tah non queyoyamanox jihuescrai.

Hohcha qui mahuataibo, Cristo qui jihuetaibo

6 ¿Papan noque hihti hahxonah non hashoan hohchacanatihin? ¿Noque hohcha sohuanon hohcha hohcharesnonhue hih non jatinh? ² Jascayamahi rahan. Mahuatahbo ta tioma yoshiman hohchamaya-mascaiqui. Mahuatahbo sca tah non qui, jaan hohchamatimasca. ¿Jahua copi non hashoan hohcha benabonatihin? Hahyamaquin rahan. ³ Hahan honantijaquin ta mato jeneho

hihquimattannishqui, hea huetsabaan, Jesucristo maton Hihbo hihqui honanahbo. Mihinquin hahcajaquin jene chicho mato hihquimatanah tah man muhuascaibo quescanihqui, Cristo betan muhuanhbo sca. Jaa tah man honanscrai.⁴ Jaa copi tah man hihquimatanah hahbe mihinahbo qui. Jaa hihquipi bi Papan jahuen coshiyaxon hahquirihbi teehihmahah quesa tah man behnabo sca jihuetai.

⁵Hahbe muhuatahbohax tah non hahbe teehirhibiibo sca qui. Behna jihue sca tah non bichi. ⁶Cristoyabi mato rehtenih quesa tah man qui, hea huetsabaan, maton shinan xeni man jenesanon. Man tiromati queenpahoni quescayamscanahue. Hohchapan yonotimabо sca janahue. ⁷Mahuanixon sca tah non jahuentianbi hahquirihbi hohchati shinantimascai. ⁸Cristo betan non muhuan i quen tah non hahbetanbi jihuescrai. Jaa tah non honanai. ⁹Noquen Papan hahquirihbi teehihmahah ta Cristo hahquirihbi muhuatimascaiqui. Mahuatima jihuescrai. ¹⁰Noquen hohcha copi mahuaquin ta huestijaquin res noque sohuaxonnishqui, jahuentianbi muhuatimascai. Jihue hihbo sca jaax ta Papa queenai quescari jihuetahqui, hahbetanbi. ¹¹Matobo sca jascarihbinahue. Tiromahax tah hen muhuanhqui hihnahue. Mahuanish bi tah hen Cristonah sca qui, Papan ta hea jihuemahiqui hihnahue.

¹²Jaa copi hohchati qui raquescanahue. Man tiromajati res ta Satanas hihti queenihqui. Jahuen shinan tiromabо man bihmis. ¹³Mato tiromamanoxon ta mato bihcatsihqui. Bihmayamanahue. Hahqui hinamehtaxma noquen Papa Dios qui caya hinamehnahue. Mahuatipish bi rahma hahquirihbi teehihnika baqueboscaax Papa qui

hinamehnahue. Ponteres jihuenahue. ¹⁴Maton shinaman res tah man Moisesnin yohini quescacatsihqui. Jan yohini quescati hahtipahyamahax bi tah man Papa qui hinamehtax sca man jihuetai, Satanasnen yono yonohahma sca.

Joni hina quescapahbo

¹⁵¿Jahua sca non shinanti jain? Moisesnin yohini quescatima sca ta jaiqui. Hohcharesnonhue, Papan noque sohuaxonresnon ¿hii non jathin? Jahuentianbi tah non jascajaquin shinantimahi.

¹⁶Nincanahue mato yohinon: Jahuen joni sca hihnoxon patoro qui hinamehtax tah man jahuen yonoti sca qui. Jaan yonohah tah man nincathi. Jascarihbibi: Hohchati qui hinamehtax tah man Satanasnen yonoti sca man jatihi, nincayosmascaax muhuanoxon. Papa qui hinamehtax tah man jahuen jihuetahbo man jatihi. Rahma rah tah man jaa honanscrai. ¹⁷Neateman tah man hohchapan hinabo hihpahoniqui, hea huetsabaan. Rahma tah man jascapahbomascai. Maton jointiboyaxonbi tah man Cristo bihniqui, caibaan mato yohi-hah. ¹⁸Hohchati shinanbo man jai ta Papan mato sohuaxonnishqui. Papa qui hinamehtax tah man pontejaquin shinani sca man jihuetai. Jaa copi tah hen mato yocaxonquin Hahxon tah min jato jai, Papan, hahcai. ¹⁹Jaabi, hahquirihbi tiromamis hihxon tah hen mato yohihi, man nincanon hihxon. Tiromati qui tah man hinamehpahoniqui, hea huetsabaan. Hohchapan hinabo sca tah man janiqui. Jahuen patoronen yonohah jahuen yonotinin nincati jai hahcajahi tah man hohchapan hinabo hihpahoniqui. Tiromabi res nincayosmahi jihuetai. Jascayamascanoxon Papa qui sca hinamehnahue, jaa queenai quescari sca siri bi res jihuexon.

²⁰Hohchapan masajaha tah man ponte jihueyosmabo man japahoniqui.
²¹Jascapahboxon tah man siri shinanbo bihyamaniqui. Man japahoni shinanax tah man hihtimahscai. Tiroma hahcaibohax tah man mahuanicabo man japahoniqui. ²²Rahma man hinabo hihyamascai honannahue. Papan mato hahxonah tah man jahuen jihuetahbo sca jai. Jaa copi tah man hashoan ponte sca jihuetai jai. Papa betan queyoyamanox manatibo sca tah man qui. ²³Jaton ribin jismaquin hahcajaquin ta hohchataibo Papan jismapaqueyaxihqui, jato masa masamascanaxon. Jato masajaxon bi ta noque hahxonrestihiqui. Noquen Hihbo Jesucristonen noque hahxonni quen tah non queyoyama sca janoxihqui non manatihi.

Hahan haxeti joi

7 Caibaan tah man honanai, Papan huishamani joi. Mato sca tah hen yohihi, hea huetsabaan. Moises huishamani jai quesvari jihuetaibo ta jihueparihax Moisesnin yohini quesvari jihuetai jaiqui. ²Jahuen bene mahuanon caman ta jahuen haibo jascabibi hahbetan jihuetai jaiqui hih ta jaiqui jaa joi janin. ³Jaa copi ta jahuen bene jihueparihax bi jaa haibaan huetsa bebo bichiya hahqui yohuancantihiqui, jaa haibo ta tsini qui hihcani yohuani. Moisesnin yohini jai quescayamahi jihuetai quen jascacani. Hihcax bi jahuen bene mahuan pecaho huetsa sca jaa haibaan bichiya Tsini tah qui hihyamacani. ⁴Mato tah man jascarihbibi. Maton hohcha copi Cristo mahuan quen tah man Moisesnin huisha janin jai casticanti qui man cahnescatih. Mahuan copi sca tah man huetsanah sca qui, Cristonah sca. Jaa mahuatipi bi ta Papan hahquirihbi teehihmanishqui. Jahuenah sca tah man

qui. Papa queenai quesa sca man siri sca jihuemon. ⁵Papan shinanjomaboxon tah non hicha tiromabo hahpahoniqui. Jascayamanahue hahca, hashoan bi res tiromacatsihscai. Jaa copi tah non mahuanicabo hihpahoniqui. ⁶Hohchanish bi tah non mahuanicabo hihyamasca jai. Cristo bichish tah non noquen hohcha copi mahuascanibo sca qui. Behna shinanyahpabo sca tah non qui. Papan jihuetahboxon tah non jaa queenai quescajaquin noquen jointinin non jaa hahxonai. Noquen shinan xeniya jihueyamascai.

Hohchapan noque pantehi

⁷ ¿Behnaboxon sca shinanah, Moisesnin joi jenquetsahpa hin? Moisesnin joi ta tiroma qui hih tah non jatimabiresai, ni jahuentianbi. Jaa quirica yamaxon tah hen heen hohcha hihti jaroma hihqui hen honanya quehanai. Caibaan jahuabora non bichincatsihqui ta tiroma qui. Jascalah tiroma hihqui tah hen Moisesnin quiricajomaxon hen honanya quehanai. ⁸Tiroma shinanyahpahax tah hen tiromayamahue hahca bi hohchacatsih sca janiqui. Jascapa hohcha hohchamis hea hihqui tah hen honanya quehanai, Moisesnin huishanijomaxon. ⁹Huetsa tian tah hen jahuabi Papan joi honanyamaphoniqui. Tiromayamahue Papan hea jaah bi tah hen hihti tiromati res queenpahonihqui. ¹⁰Jaa copi ta hea mahuatih hen honannihqui. Papan joi nincayosmahax ta mahuacoin sca hea janiqui. Papan joi hahan ponte jihuetai hihqui bi tah hen nincayosmahax mahuanica sca janiqui. ¹¹Hohchayamahue hahca bi tah hen hihti tiromati res sca queennihqui. Hen tah hen hihti tiromati mahuanica sca janiqui. Paramehtax tah hen hohchatax mahuanica sca janiqui. ¹²Jaa copi honannahue, hea huetsabaan. Moisesnin huishani ta Papan joi qui. Pa-

pan noque honanmani joibo ta siri bi res qui. Ponte bi res hihcoinaibo rahsi can.¹³ Papan huishamani joi ponte que bi tah hen jan huishamani copi mahuati jai ¿hih hen yohuani jatihin? Hihyamabiresi rahan. Hohchatax caya tah hen mahuatihi. Hihti nincayosma hea hi-hqui hen honanscanon ta jaa joi Papan huishamanishqui.¹⁴ Papan huisha ta jahuen yoshin siriyahxon huishacannishqui. Jaa huesti nincatihbi bi tah hen tiroma yoshiman shinanmaha jaama-jaquin sca shinanai.¹⁵ Jascajati ta jaiqui hihxon bi tah hen hahyamahi, sirijati honanxon bi. Jascajatima ta jaiqui hihxon bi tah hen jaabi hahcai. Tiro-mascaax tah hen shinamehtai, Jahua copi hen jascajaquin hahcain hihqui.¹⁶ Queencoinyamahax bi tah hen tiromahi, hih tah hen jai. Hen jascari yohuanah ta hahan honanti qui, Papan joi siri hihqui hen mato yohihi.¹⁷ Jasca tah qui. Queencoinxonma bi tah hen tiro-majaquin hahcai. Jenquetsahax bi tah hen pontetimahi. Hohchapan heen jointi tiromajaquemahah tah hen hihrescrahini hohchatai.¹⁸ Heanbi shinanax tah hen siripi jihueticahi, hohchapan heen shinanax tiromajaquemahah. Sirijaquin shinanax bi tah hen yosmajaquetai. Hen shinanai quescabijaquin hahcatsihquin bi tah hen hahtipahyamahi.¹⁹ Jascati ta jai qui hihnicahax bi hahcoinyos-mahi can. Jascatima ta jaiqui hihquish bi jascabihi.²⁰ Queencoinyamahax bi tah hen jointi chicho hohchapan tiromajaquemahah jascabihi tiromahi.²¹ Jas-canica tah hea qui. Sirijaquin shinanax bi ta tiromati res teema qui.²² Moisesnin huishani joi jai quescabihi tah non jihueticai jai hihquin tah hen ponte-jaquin shinanax.²³ Jaa huisha joi siri hihqui honanxon bi ta jaamajamis joni hea qui hen honanrihbibi. Sirijati shinanax bi tah hen sirijayosma hea qui. Hohchapan tiromajaquemahah tah hen

jascapahi.²⁴ Jaa copi tah hen hihti masa shinanai. Mahuacatsihbahinaxon shinanquin hahcaja tah hen jai. Hen hihpahoni quescayama sca jihuenoxon tah hen hea yanapannica sca queenai.²⁵ Jaa hea yanapannica ta Cristo qui. Hahxon tah min hea jai, Papan. Jesucristo raanxonquin tah min hea yanapanai hah sca tah hen jai. Jascá tah qui, hea huetsabaan. Papan joi ta siri qui hah tah hen jai, heen shinaman shinanxon. Jascajaquin shinanxon bi tah hen jaan yohini quescari jihueyamahi.

Dios Yoshiman noque jihuemahi

8 Hashoan sca hen mato yohinon nincanahue, hea huetsabaan. Non Cristo qui hinamehtaibo yohihi ta Jascabi casticanabo sca banenahue hah Papan noque jatimahiqui.² Min Cristo qui hinamehtaiya ta jahuen Yoshiman mia jihuemahiqui, hohchapan hiná hihyamascanon. Jaa copi ta mia mahuati Papan yohiyamascaiqui.³ Noquen yora quescapahya jan jonon ta jahuen baquebi Papan raannishqui. Jonish ta noquen hohcha copi mahuanishqui. Jaa mahuamaquin ta noquen hohcha Papan noque queyoxonnishqui. Jan yohini quescabihi non jihueticai hahtipahyamahi bi ta noquen hohcha sohuaxonnishqui, jascabi casticana non banequehanai.⁴ Noquebi non queenai quescayamasca bi jan yohini quescari non jihuemon sca ta jascajanishqui. Dios Yoshiman jahuen shinan noque hinanah tah non jihuecoinsca. Papan shinanyahpabo sca.⁵ Noquenbi non shinanai quescapahya jihuecatsihxon tah non Satanas queenai quescajaquin shinanax. Dios Yoshiman shinanyahpaxon tah non Papa queenai quescajaquin shinanax.⁶ Hahmebi shinanax jihuecatsihquibo ta masa masanoxon mahuatihiqui. Dios Yoshiman shinan hinanah ta

jascapahma qui. Jascapahmabo ta queyoyamanox mananica qui, siri shinanya sca jihueta. ⁷Hahmebi shinanax jihuetaibo ta Papan rahuibo qui, jahuen joi nincayamahax copi. Hohchapan pantehah ta nincati hahtipahyamacanihqui. ⁸Jascapah ta Papan jenimayohuanquihnyamabiresiqui.

⁹Mato tah man mahmebi shinanax jihuetaiboma qui. Maton jointi janin jahuen yoshin siri Criston niahah tah man jahuen shinanyahpabo sca qui. Criston yoshinjomabo ta Cristonahmabo qui. ¹⁰Maton jointi janin Cristo jihuetai quen tah man jihuecointihi, Papan mato siribo jisi copi jihuecoini. Maton yora hohchapan muhuamaha bi tah man jihue hihbobo sca jacoinyaxihqui. ¹¹Noquen Hihbo Jesus huenihhnixon ta mato rihbi yora behnaya Papan huenihnniyaxihqui. Jahuen yoshin siri maton jointi janin jai quen ta jayaxon mato behnajaxon sca huenihhnixihi qui. ¹²Jaa copi tah non noquenbi shinanax quescayamahi non jihuetai jai, hea huetsabaan. Behnabo jihuetai sca tah non jai. ¹³Matonbi man shinanai quescari jihuetax tah man jascabi sca muhuatahbo man jatihi. Dios Yoshin queenai quescajaquin tah man man japhoni shinanbo jenebahinti jai. Jaatian tah man noquen Papa betan jihuetaihi, jahuen baqueboscaax.

¹⁴Jahuen yoshin siripan shinamahibo rahsi tah non jahuen baquebo qui. ¹⁵Dios Yoshin tah man bihniqui, hea huetsabaan, hohchati qui hinamehyamascanoxon. Papan baquebo sca janoxon tah man jahuen yoshin siri bihniqui, hea huetsabaan, jahua copi raquetimascai. ¹⁶Jaan shinamaha tah non noquen Papa Dios yohiquin Papan hah non jai. ¹⁷Noque jahuen baquebo quen ta jahuen jihue hihbobo noque hihmayaxihqui. Cristo jaa hinanquin ta noque rihbi jaabi

rihbi hinanyaxihqui. Cristo betan tiromabo tenehax tah non hahbetan rihbi Papan jihuetai janin hihboyaxihqui.

¹⁸Hean shinanah ta Cristo betan sca hihboscaxon non tenepahoni non jahuama sca jisyaxihqui. ¹⁹Cristoya Papan noque hihbomayaxihqui jenquetsahpa hin hihxon ta manacaniqui, hea huetsabaan. Papan jonijani jahuaborabo jatihibichin ta hihti jiscatsihquin manacaniqui. ²⁰Jahuen jahuaborabo queenai copima bi ta queenxon res Papan jato yohnishqui: Hen mato behnajanon caman manaresnahue, hahquin. Jaa copi ta rahma caman manácaniqui. ²¹Payonicabo jayamascanon ta Papan jato behnajayaxihqui. Jaan jahuen baquebo jato hihbomahi tian ta jatihibi rihbi behnajayaxihqui. ²²Jan jonijani jatihibi ta payomisbonish rahma caman jascapah rahsi qui. Jascapahboxon ta tene tenecaniqui, Papan jato behnajanon caman. ²³Jahuen jahuaborabo behnacahincatsihqui hihqui quescarihbibi tah non jato betanbi noque rihbi jascarihbibi. Noquen yora behnabo Papan noque hinanti tah non queenai. Texe rihbi jan noque hinantijani non bihcointihi tah non honanrihbihi. ²⁴Noquen hohcha noque sohuaxonxon ta Papan yohnishqui, Hen maton yora behnajayaxihnon mananahue hahquin. Jaa copi tah non manatai, noquen yora behnabo jisriyamaxon bi bihcatsihqui. Jisriyamaxon ta manánicabo qui. Jisresscaax cah non jisti manayamascaehehanai. Jisresscaax tah non jisyanoxon manatahpan hih non jayamahi. ²⁵Jaa copi tah non jisymaparixon bi non jisyaxihqui manáhahnan non tenehi.

²⁶Non coshi pishinaiya ta Dios Yoshiman noque yanapaniqui, coshi shinan hinanquin. Jayaxon tah non

teneti jai, noquenahbi noquen coshin teneti hahtipahyamaxon. Yocati honanyamaxon tah non Papa queenai quescajayamaquin texe yocacai. Jaa copi ta Dios Yoshiman noque yocaxoniqui. Joinma bi ta jahuen shinaman noque hihti yocaxoniqui.²⁷ Papa queenai quescabijaquin ta Dios Yoshiman noque yocaxoniqui. Jaan shinanai ta Papan honanihqui. Jatihibichin shinanai honannicaxon honanquin. Jaa copi ta Dios Yoshiman noque yocaxona jaan yocaxonai quescabijaquin noque hahxonihqui.

Teneccoinaibo

²⁸ Mesco tah non masa tenehi, hea huetsabaan. Jaabi tah non tenexonai. Noquen jisi jascapahbo tiroma que bi ta siri sca noque hihmanoxon Papan noque jascapahbo huinomahiqui. Jaa copi ta noque hahan jan queenai noquebo qui jascapahbo noque huinomahiqui, hea huetsabaan. Non tah non honanai: heen baquecoin janoxihnahue noque janixon ta jascapa masa noque tenemahiqui.²⁹ Jahuenehbo non jayaxihqui honanni-hxon ta yohinishqui: Heen baquecoin hihqui quesa sca tah man jayaxihqui hahquin noque yohiquin. Jaa jahuen baque noquen huetsahax bi noquen Hihbo rihbi hihnon ta jascajaquin yohinishqui.³⁰ Jascajaxon ta Heen baquebo sca janoxihnahue hah sca noque janishqui. Jascajaxon sca Heen siri baquebo sca janahue hahscaquin. Jascajaxon sca Heen baque betanbi hahbe hapobo sca hihnahue hahquin.

³¹ Hen mato yohihah nincaxon, honannahue, hea huetsabaan. Papan to noque hihti hahxonihqui. Jaa copi ta noquen rahuibo qui non raquetimabiresai.³² Noquen hohcha copi jahuen baque muhuti jahui bi ta Papan jaa panteyamanishqui. Pantexonma ta hashoan sca jomanishqui.

Jahuen baque yohuashihxonma ta noque hinanxon jaya jatihibi rihbi noque hinanrihbixihihqui.³³ Papan noque caisah ta tsoanbi sca noque caheti hahtipahyamahiqui. Siribo Papan noque jisiya cahen tsoanbi noque non japahoni cahetimascai.³⁴ Cristo ta mahuatipish bi hahquirihbi teehihnishqui, Papa mecayaho sca hihti hihboscai tsahonoxon. Jaan ta noque yohuanxoniqui. Jaa copi ta Tiromabon hah tsoanbi noque jatimahiqui.³⁵ Cristo noquehon shinanyamascanon hihxon noque jenemacatsihqui bi ta tsoanbi jahuejati hahtipahyamahiqui, hea huetsabaan. Jaa ta jascabihi noquehon shinanihqui. Non yomanahaiton ta noquehon shinanihqui. Non masa shinanai bi noquehon shinanquin. Caibaan noque tiromajahi bi noquehon shinanquin. Non pihan hihquiya bi rihbi, non chopanma hihquiya rihbi. Noque tiromajacanmis hih non jai bi. Noque rehtecanmis hih non jai bi. Criston noque jenenon hihxon hahquin bi ta tsoanbi noque Cristo jenemati hahtipahyamahiqui.³⁶ Papan huishamani joi jai quescari jaiboya bi ta noquehon jaashinanihqui.

Minabo non hihqui copi ta noque rehte-bahinacaniqui, Papan. Yohinahbo rehteresquin hahcajaquin ta noque queyocaniqui

hihqui jaa huisha joi.³⁷ Jascapahbo non tenehi bi ta noquen Hihbaan noque shinanbehnoyamahiqui. Noquehon hihti shinanxon ta hashoan sca non teneti hahtipahnon noque coshijahiqui.³⁸ Noquehon shinanxon ta noquen Hihbo Jesucristo Papan raanxonnishqui. Noquehon shinanquin ta jahuentianbi Papan noque jenebahintimahiqui, ni jenquetsahpabi. Non muhatai bi noque jeneyamaquin. Non jihuetaiya jeneyamaribiquin. Yoshiman sontarobaan bocabi ta jaa noque

jenematinahiqui. Main jai tinintibaan jenemayamaribiquin. Rahma jaibaan rihbi jenemati hahtipahyamaquin. Jayaxihquiaan rihbi hahtipahyamaribiquin. Quiquin tiroma yoshiman bocabi hahtipahyamaquin.³⁹ Ni naihoh jaibaanbi, ni nai naman jaibaan rihbi. Ni jahuatohonbi ta noquen Papa jenemati hahtipahyamahiqui.

Jahuen baquebo Papan caisni

9 Cristo queenai quescajaquin tah hen mato yohicoinai, heen huetsabaan. Hen tah hen mato paranyamahi. Dios Yoshiman hea shinamaha tah hen heen jointiboyaxonbi mato yohiscai.² Hen tah hen hihti benatai. Heen caibo shinanxon tah hen heen jointi xecahihnihi.³ Heen caibaan Cristo nincacoinpahinon. Heen caibobi heen caibo hean nincamaha nincacoincancapahinon. Jaabo bihnoxon Criston hea potahah que bi cahen jaabo jahuenahbo sca hihquiya hea jenimaquehanai.⁴ Israelito ta Papan caisahbo janish qui. Heen baquebo janahue hah ta Papan jato janishqui. Jahuen xaba rihbi ta jato machi xabacananishqui. Hen mato hahxonnon hen mato yohihi quescabijaquin hahnahue jato jaquin. Jascajaxon ta jahuen joi siri rihbi huishamaxon hinannishqui, jihueta honanahbo. Huishaxon ta jato honamanishqui, Papa yocati honanahbo. Jaa huishapan rihbi ta jato hahxonquin ji-huemanica jan raanxontihi jato yohirihbinishqui.⁵ Jaton xohta xenibo ta Papan caisnhbo rahsi janishqui. Caisxon ta jato yohinishqui, jaton chinibaquebo jan hahxontihi yohiquin. Cristo rihbi ta jaton caibo qui, Quiquin Hihbo. Jaa ta noquen Dios qui. Jaa yohihi tah non Mia tah min Xaba Hihbo qui, Hihbon, hihqui. Jascacoini rahan.

⁶ ¿Heen caibo nincayosmabohiya jahua yohuan sca hen jatihin? ¿Papan ta jato yohinihxon bi jan yohini

quescajamaquinma jahuen jonibo hahxonyamascaiqui hih hen jatihin? Jahuentianbi tah hen jascatimahi. Papan caisahbo ta judio rahsima qui.⁷ Abrahanen chini baquebo jaabo hihqui que bi ta Mato jatihibi tah man Abrahanen xohtabo qui hah Papan jato jayamahihqui. Jascanoxonma bi ta Abraham Papan yohinishqui: Isaaquen chini baquebo sca hihnon hean mia hinanyaxihquibo miin xohtabo ta jayaxihquiqui.⁸ Abrahanen chiní baque copi jaa jimi jahuen jenabo hihqui que bi ta jaa rahsiboma Papan baquebo qui. Jaan Abraham hinantijani jonibo caya ta Abrahanen xohtabo qui, Papan jisí.⁹ Papan yohimi quescia tah qui: Mihqui joribiyanoxon tah hen mia yohihi, min hahqui baquejaha ta miin haibo Sara baquexoyahpa sca jayaxihquiqui hah ta Papan janishqui Abraham yohiquin.

¹⁰ Yosiboscaax noquen xohta Isaaque yamanica janí quescarihbi ta jai qui. Jahuen haibo Rebeca baque bihyosma que bi ta Papan yohihah jahuen benen hahqui baquejati hahtipahscanishqui, rabe nane sca jahuen baque janon.¹¹ Jaa rabe nane cainrihyamahi bi ta Papan yohinishqui: Miin bihmeno baquen ta jahuen chini teexontihiqui, hahquin. Jaabo rabe cainrihyamaxon jahuabi siribojaquin hahriyamahi bi ta Papan yohinishqui, jan shinanai quescabi sca janoxihnon. Jahuabi rihbi tiroma hahriyamahibaan bi Papa jascari yohuani.¹² Jaabaan hahcai copima bi ta hahmebi queenxon Papan Jacobo caisnishqui. Jaa copi ta Rebeca yohinishqui. Miin bihmeno baquen ta jahuen huetsa teexontihiqui hahquin.¹³ Jahuen joi huishamaxon Papan yohini quescia ta janishqui: Jacobonenhon jenimaxon bi tah hen Esau queenyamabiresai hihqui noquen Papa.

¹⁴ ¿Jan jascani honanax jahuahih sca non jatihin? Papan ta tiromajahiqui hih

tah non jatimabirestihi. ¹⁵ Jaan Moises huishamani quesca ta jai qui. Heabi queenxon tah hen caisai. Jahuen chinihon queenax copi res tah hen jahan shinanai hih ta jai qui, Moisesnin huis-hani joi. ¹⁶ ¿Jahua copi Papan noque jihuemahiqui? ¿Non jihuecatsihqui copi nan? ¿Non coshi coshicahinai copi nan? Jaa copima bi ta noque caisnixon copi noque jihuemahiqui. ¹⁷ Jan Faraon yohini quesca tah qui: Heen coshi jato jismanoxon tah hen mia quiquin hapo-maniqui, Faraonen. Hea coshi hihqui jatihibi janin jihuetaibaan honanahbo hihxon tah hen mia nea mai hihbo-maniqui. Jasca ta Papan huishamani joi jaiqui. ¹⁸ Jaa copi honannahue: Queenxon copi res ta noquehon shinanihiqui. Queenxon copi rihbi ta huetsa rihbi jahuen jointi xehponihqui.

¹⁹ Jaa copi rah tah man hea yocatihi: ¿Jahua copi sca Papan noquen hohcha noque hihbomahiquin? Jan queenai quescajaquin ta Papan hahquiqui, tsoanbi tah non jaa jascayamahue hahti hahtipahyamahi hih sca rah tah man jatihi. ²⁰ Man hea jascahah bi tah hen yocatihi, ¿Jahua hihxon man noquen Papa Dios joi bichincatsihquin? hahquin. Hihbo hihxon ta jaa queenai quescajaquin Papan hahquiqui. Quentijanicaton quentijaquin hahcai quesca tah qui. Yohuanti hahtipahxon Jahua copi min hea poo hahyamahaquin hah quentipan jatihiquin? Jascayamabiresi. ²¹ Jaa queenai quescajaquin ta quentijahnicaton quentijahiqui. Queenxon ta jahuen mapo tonco bihxon quenti huestijaxon quene queneya poojascatihiqui.

²² Jaa queenai quescajanicaxon ta Papan jascajaribiqui. Caibo jonibo ta tiromabo picotihqui, chacabahinti res. Tiromabo casticannica Papa hihqui non honannon jato casticanthi bi ta Papan

jato tenetenehiqui. Jahuentiho coshi noquen Papa quin non honannon ta tiro-macahinaibo tenehiqui. ²³ Caibo rihbi ta hahan jan shinanaibo qui. Jahuen hihti siri shinan noque hinannoxon ta noque jonijanishqui. Jahuentiho siribo shinan jaan noque hinantihiquin non honannon ta jato teneribbihiqui. ²⁴ Jahuen caisahbo tah non qui, hea huetsabaan. Caibo judiobo, caibo rihbi judiomabo ta noque caisnishqui. ²⁵ Oseas Papan huishamani jai quesca tah qui:
Jahuen joni hihyamapahonibo ta Heen
jonibon Papan mato jatihiqui. Jan
queenyamapahonibo ta Heen siri-
bon mato jatihiqui.

²⁶ Huetsa janin jaibo yohihi sca Mato tah
man heen joniboma qui jato janixon
ta Mato tah man heen baquebo sca
qui, jihuemanicahton baquebo, hah
jato jatihiqui.

Jasca ta Oseasnen quirica janin jaiqui. ²⁷ Isaías ta jascapa joi rihbi Papan huishamanishqui: Israel baquebo hicha-hax huean quexa mashi bero hicha jai quescarai bi tah hen texe pishca res jato jihuemayaxihqui, texe sca quey-oquin, hih ta noquen Hihbo jaiqui. ²⁸ Jan yohini quescabijaquin ta noquen Hihbaan jaiqui, hahcoinquin. Histon bi res ta hahtihiqui jatihibi janin. Jasca ta Isaíasnen huishani joi jaiqui. ²⁹ Isaíasnen ta nea joi rihbi huishanishqui:

Noquen naihoh queha Papan noque pishca texejayamaha tah non Sodon jema quesa queyónihbo non jaque-hahnai. Gomorra jema janin quey-onihbo quesa tah non jaquehahnai, queyobahinah.

Judiobo yohihi ta Isaías jascanishqui.

Nincacoinaibo betan judiobo

³⁰ Judiobo casticanxon bi ta jahuen jonibo Papan bichiqui. Jaa copi honannahue, hea huetsabaan. Judiobaan nahuabaan ta Moisesnin joi

honanyamapahonishqui. Papan siribo jati ta shinanyamacanpahonishqui. Jascapahbo que bi ta Cristo qui hinamehtaiton Papan jato sirijaquin bichiqui.³¹ Judiobo ta hinamehyosmabo janishqui. Papan yohihi quescabijati ta jaiqui hihquish ta tee teepahonishqui. Non sirijaquin hahcai copi tah non Papan siribo qui hihquish ta coshi coshicannishqui. Jascahax bi ta Papan yohini quescayamacannishqui. Huetsapahaquin. Jaa copi ta Papan jato bihyamanishqui.³² Papa hihcoinai shinanax bi ta hahqui hinamehxonma jaton coshinbi Papa qui nocohihnat shinancannishqui. Bahin naracatai macamahhuan qui joxcorohtai hahcajaquin ta hahcannishqui, jaamajaquin.³³ Jascapahbo ta Papan huishamanishqui:

Jistahi man. Maton hani jeman tah hen macamahhuan janahi, bahi xehpoquin. Man hahqui joxcorohmis. Jaa merahax man bahinma sca camis. Jaa hen janahi qui hinamehtaibo tah hen hen yohihi quescabijaquin hahxoncointihi.

Jascá ta Isaásnen huishani joi jaiqui.

10 Jan jato jihuemanon noquen Papa qui heen caibo hinamehpahinon hih tah hen jai, hea huetsabaan. Hinamehtahbo hihxon tah hen jato yocaxonai.² Papan bahin nihti shinanax ta coshi coshicaniqui, heen caibo. Jascapahbohax bi ta honanaxma nihcanihqui caresi.³ Papan siribo jenquetsahpabo jihuetai jaiquin ta honancatsihyamacaniqui. Jaa honanaxma bi ta jaabaanbi shinanai quescajaquin tanatanacaniqui. Jascajaxon ta Papa nincacatsihyamacaniqui.⁴ Nincacoinax ta Cristo qui hinamehcanquehanihqui. Papan huishamani joi ta Cristo yohihi joi qui. Papan jisí ta Cristo qui hinamehtaibo

rahsi jahuen siribo qui. Non honannon ta jaan jaa joi huishamanishqui.

⁵ Moisesnin ta jaa rihbi huishamanishqui: Jaan jato siribo jisnon hihxon Papan yohini quescajaquin hahcaibaan ta hahrestimahqui. Hahcoinsihquibohax tah man jan yohihi quescabih jihuetai jai, jahuebi nincati pishinmahaxma, hah ta Moisesnin janishqui.⁶ Cristo qui hinamehtai jahuen siribo ta huetsapahbo qui. Huetsa shinanyahpabohi yohihi ta huetsa quirica huishaquin Moisesnin yohirihbinishqui. Miin jointinin yohuani tah min Tsoa cahra naihoh catihiquin hih min jatimahi. Tsoan Cristo botomatihiquin hih ta jacatsihquiqui jaa joi.⁷ Tsoa cahra mahuanihbo janin botopaqetax joti hahtipahiquin hah tah man jatimaribihi. Mahuanihbo janin caxon tsoan Cristo bexontihiquin hihyamanahue hih ta jacatsihquiqui jascari. Cristo ta hocho qui, jaan yohihi tah non hahtipahyamahi hihyamanahue.⁸ Papan huishamani joi jai quescabi tah qui: Heen joi ta mia ho-choma qui. Miin jana janinbi tah qui, miin shinan janinbi tah qui, hih ta jaa huisha jaiqui. Jan yohihi ta Cristo joi qui, non hahqui hinamehtaibo Papan noque sirijaquin sca bihtihi jai.⁹ Noquen Hihbo Jesus ta Papan hahquirihbi huenicoinnishqui hihxon, jointinin hihcoinai shinanax, miin janan rihbi Jesus ta heen Hihbo qui hihquish tah min jihue hihbo sca min jatihi, Papan jihuemahah.¹⁰ Noquen jointinin hinamehxon, noquen janan rihbi non Papa yohihiya ta jaan noque siri jisiqui, noque jihuemanoxon.

¹¹ Papan huishamani jai quescabijati qui. Hihcoinai shinanax hehqui hinamehtaibo jatihibi tah hen hean yohihi quescabijaquin hahxoncointihi hihqui.¹² Mesco jonibo rahsi noque jonijanixon ta judiobo jascajaquin yohixon judiomabo rihbi jascajaquin

rihbi Papan yohihiqui. Hea hihbojahue Papan hih non jaah ta jaabahinxon noque hihti hahxonihqui.¹³ Jaa yohihi ta Papan nescajaquin huishamanishqui. Hea hihbojahue Papan hihquibo rahsi tah hen jihuemayaxihqui, hihqui.¹⁴ Hihcoinai shinanyamaxon ta jenquet-sahaxon bi Hea hihbojahue Papan jati hahtipahtimahqui tsoanbi. Jahuen joi nincayamanixon ta hihcoinjaquin shinanti hahtipahyamarihbicaniqui.¹⁵ Tsoanbi raanyamahah ta tsoanbi rihbi Papan joi jato yohiyamahihqui. Tsoanbi yohiyamahah ta tsoanbi rihbi nincayamahiqui. Jahuen joi nincayamanixon ta hihcoinai shinanyamaribicaniqui. Hihcoinai shinanyamaxon ta jenquetsahxon bi Hea hihbojahue Papan jatimaribicaniqui tsoanbi. Jaa copi ta non raanah hihti siri qui, huishani joi jai quescari. Siri joibo noque yohinoxon nocotaiya tah non hihti jenimatih ihih ta jaiqui jaa huishani joi.¹⁶ Joi siri nincamaha bi ta jathixonbima nincacaniqui, caibaan res. Isaásnen ta nescajaquin jaa yohnishqui: Miin joi hen yohihah bi ta nincayamacaniqui Hihbon hahquin.¹⁷ Hen yohihah quesa tah qui, hea huetsabaan. Jaa joi siri ta Criston joi qui. Jaa joi siri nincamaha pari ta hihcoinjaquin shinancantihqui.

¹⁸ ¿Tsoanbi jato nincamayamanishquin? Noque yocacah tah non nincamaquin rahan hah non jathihi. Huishani behua jai quesa tah qui: Jatihibi janin ta yohihi bocannishqui.

Jonibo yama sca jaiton caman ta yohihi bocannishqui

hihqui jaa behua.¹⁹ Yohihah bi tsí ra judiobaan honanyamapahonishquin hih sca rah tah non jathihi yocacahti. Honanquin rahan hihxon ta Moisesnin nescajaquin sca huishanishqui, Papan huishamaha:

Maton nahuabohon shinanxon jato sirijaquin hahxonquin tah hen mato notsimayaxihqui. Honanma nahuabohon shinanxon tah hen mato sinamayaxihqui hah ta Moisesnin huishaquin janishqui.²⁰ Isaásnen ta hashoan sirijaquin sca yohnishqui, nescajaquin: Maton nahuabaan ta benayamaxon bi hea meranishqui. Jaabaan quena-hahma bi tah hen jato qui caniqui hihqui.²¹ Judiobo sca yohiquin ta nescajanishqui Heen mequen rabe sanaxon tah hen jato Benahue Benahue jabahinahi. Hen jato quenabahinaha bi ta nincayosmaboxon joi bichinrescaniqui. Papa jascari yohuanai ta Isaásnen huishanishqui.

Nincacoinaibo Papan baquebo

11 Jahuen jonibo Papan potabahinyamanishquin yocacah bi tah hen Hahyamaquin rahan hahcai. Hea rihbi tah hen judiobo qui, Abrahanen chiní baquebo can, jahuen xohta Benjamin baquebo.² Papan ta jahuen caisahbo potabahinyamahiqui. Papan huishamani joi jisxon tah non jaa honanai. Papa yohiquin ta Elíasnen nescajanishqui, israelibo cahequin:³ Papan Dios. Miin joi yohinicabo ta rehtecanhoxqui. Tsoanbi mia shinanyamas canon hihxon ta janoxon mia yocatibo potojaquetancanhoxqui. Hea huesti banetaiya sca ta retequin bi cahnexon hea benacaniqui, hea rehtenoxon, hihqui.⁴ Elíasnen jascalah bi ta Papan yohnishqui: Jascama tah qui. Siete mil bebo tah hen paxajahoqui. Jaabaan ta santo qui raboxonen tisquihapaekeyamahiqui hahquin.⁵ Rahma ta jascarihbihiqui, hea huetsabaan. Texe judiobo nincayosma que bi ta noquehon shinanxon texe pishca huestibo sca Papan noque caisihqui.⁶ Jaan noque

caisah ta non hahcai copima qui. Jaan noquehon shinanxon copi res. Non hahcai copi res noque caisti jaxon ta noquehon shinanxon res caisti yamascaquehahniqui.

⁷Jaa copi nincanahue, hea huetsabaan, hen mato yohinon: judiobo ta Papan siribo hihcatsihquish bi hihiyamacannishqui. Papan caisahbo res

ta jahuen siribo qui. Texe ta nincatima shinan sca Papan hinannishqui.

⁸Huishani joi jai quesca tah qui. Honanyosmati shinan ta Papan jato hinannishqui. Beroyahpaxon bi jisyamahabo ta jato mehenishqui, pabinquiyahpaxon bi nincayamahahbo jato mehequin. Rahma caman

ta jascapahbo qui hihqui jaa joi.

⁹David yamanica ta jascarihbih yojuannishqui, nincayosmabo yohiquin:

Papan baquehihcamaxon pipi pipichaiton bi Papan jato yahtan-pahinnon. Jaton pitin paranquin hahcajaquin jan jato yahtanxon tiromajaphinon. Siri siri tah non jai hihquiaan bi jan tiroma bi res jato qui paquepahinon. Rohahihrity shinanaiboya bi jato casticanpahinon. Jaan jato tiromajabahinon.

¹⁰Benchecahinxon quescajaquin jahuabi sca honanyamacanpahinon. Jascabi sca huehro huehocana quesca sca jaahbo jato hihuejaphinon

hihqui jaa huishani joi.

Judiomabo Papan jihuemahi

¹¹Jaa copi tah hen yocacahtai: ¿Cristo jenebahinax jascabi sca Papan rahuibo jayamayaxihcanihquin? Hihyamahi rahan. Jaabo bahinma cahiya ta jaton nahuabo sca Papan sirijaquin bichiqui. Jan mato sirijaquin bichi jisish ta jaabo rihbi Papan bahin sca nihribinoxon Papahon

queenrihbiyahcihcanihqui. ¹²Jaabaan noquen Hihbo potabahinaiya ta jatihibi janin sca Papan joi siri nocotihqui. Judiobo jahuen shinan siribo bichinxon ta mato sca jaa shinan Papan sirijaquin hinanihqui. Jaa copi ta judiobaan hahquirihbi jaton shinan pontehax Cristo qui hinamehtaiya hashoan sca Papan mato hihti hahxontihqui.

¹³Hen mato yohinon nincanahue judiomabon. Jahuen joi siri hen mato yohinon ta Papan hea mato qui raannishqui. Jaa copi tah hen coshin bi res teetai. ¹⁴Hihti queentsain, huestibo tahni hehbe judio Cristo qui hinamehnon hihquish tah hen coshin bi res teetai, Papan joi siri yohihi.

Jaabo rihbi Cristo betan jihuetai tah hen hihti queenai. ¹⁵Jahuen judiobo potabahinxon ta jahuen sinatahbo hihpahoni mato Papan sirijaquin bishnishqui. Hahquirihbi sca jahuen judiobo Papan sirijaquin bichiya tah non jatihibi hihti jenimayaxihqui, noquen huetsa muhuatax bi hahquirihbi teehihqui merahax quescari. ¹⁶Noquen Papa qui jahuabora hinancatsihxon tah non sirimahin hihxon tehcxon siri jisxon, jatihibi siriscanon non honanrihbihi. Jihui ta jascarihbih qui. Jahuen tapon siri hihquiya ta jahuen mebibo rihbi siri qui. Judiobo ta jascarihbih qui: texe Papan hahquirihbi sirijaquin bichiya ta jatihibi rihbi bihti siri qui.

¹⁷Jahuen bana jihui coiranquin hahcajaquin ta Papan noque jisiqui. Xanahiton texe mebibo tsecaxon ta miabo sca nihi naman meha mebi que bi jano mia rechihiqui. Texe jahuen yora quiha mebi tocan mia joconnon jano mia rechiquin. Jano rechihah sca tah min jahuen coshin hanihi, texe mebibo hihqui quescari. ¹⁸Papan mia jano rechihah bi Hea ta hashoan siri qui, Siri copi ta huetsa mebibo tsecaxon hea sca rechi-

hiqui hihyamahue. Jascacatsihquin honanscahue: Mebixon tah min jihui yora qui coshi hinantimahi. Jihui yoran caya ta jahuen mebi coshi hinanihqui.

¹⁹ Hea tah hen hashoan siri qui hihyamahue hen mia jaah bi Hea rechinoxon ta huetsa mebi tsecanishqui hahrah tah min jatihi joi bichinquin. ²⁰ Hihcoini. Hihcaxbi mia hashoan siri copima. Nincacoinyamahi copi ta jato tsecanishqui. Min hinamehtai copi res ta miabihnishqui. Jaa copi tah min Hea tah hen caibo mentan hashoan siri qui min jatimahi. Shinanquin tiromajahiton mato rihbi potarihbimis. ²¹ Jahuen mebi coinbo yohuashihxonma potanixon ta hinamehyamahiton mato rihbi sca jascajarihbithiqui. ²² Honannahue. Papan ta mato sirijaquin bichiqui. Heen caibo ta potaresnishqui. Nincacatsihyamahibocopi jato potaresquin. Jaabo potanihxon bi ta matobo sca sirijaquin hahxontijahqui. Man jascabihi hinamehtaiyata jascabi jaquin mato sirijaquin hahxontihiqui. Man nincayosma hihquitonta reraquin hahcajaquin mato potatihiqui. ²³ Heen caibo potanihxon bi ta jaton chini baquebo hahquirihbi hinamehtaiton jato bihrubitihiqui. Rechiquinhahcajaquin ta jato hahquirihbi sirijaquin bihtihiqui. Heen xenibo potanihxon bi ta Papan jaton baquebo hahquirihbi rechiti hahtipahiqui. ²⁴ Nihi naman meha mebi bihxon baná yora qui rechixon hahcajaquin ta Papan mia sirijaquin bichiqui. Hashoan sca ta banámebiborechiquinhahcajaquin jahuen judiobo jaan sirijaquin bihribitihiqui.

Israeli baquebo Papan jihuemayaxihqui

²⁵ Hen mato yohinon nincanahue, hen huetsabaan. Hashoan siribo copi Papan mato sirijaquin bichi man shinamis hihxon tah hen tsoan honanikhma joi mato rahma yohihi. Hashoan hicha

ta heen caibo jointi xehpotihqui. Jaton nahuabo janin sca jahuen jonibo jatihibi Papan caisquin queyonon caman ta jointi xehpóyahpa judiobo jayaxihquiqui. ²⁶ Jascajaquin judiobo notsimaxon ta jahuen jonibo rahsi Papan caisyaxihqui qui jan huishamani jai quescabijaquin. Jaa huishamani ta nesca qui:

Judiobo janinhax ta quiquin jihuemanca joyaxihquiqui. Joxon ta judiobo jaton hohchati shinanbosohuayaxihquiqui.

²⁷ Hinamehtaiton tah hen hean yohini quescabijaquin jaton hohcha sohuaxontihi hihqui jaa quirica.

²⁸ Matohon shinanxon jahuen joi siri mato qui nocomanoxon ta judiobo Papan rahuijanishqui. Jato rahuijanixon bi ta jaton xohtabo hahxontijanixon jato caisnixon rihbi Papan jatohon shinanribihiqui. ²⁹ Hahxonti yohixon ta huetsajati sca Papan shinanyamahiqui. Jahuen joniboscanon noque caisnixon ta Papan shinanquin huetsajayamahiqui. Jaa copita judiobo Papan jascabijaquin potatimahiqui. ³⁰ Nincayosmapahonixon bitah man rahma Papan joi siri bihcoinai, jan mato sirijaquin bihnon. Judiobaan rahma nincayamahi bi tah man matton nincacoinai. ³¹ Jascajaquin rihbi ta jaabaan rahma nincayamaxon bi man hahcai quescajaquin Papan joi siri bihcoinyaxihcaniqui. Man nincacoinquin hahcai quescajaquin rihbi ta jaabaan nincacoinyaxihquiqui.

³² Nincayosmabo rahsi non hihqui non honannon ta Nincayosmabon hahquin noque janenishqui. Jascapahbo rahsi non hihpahoni bi ta noquehon shinanxon noque hicha caisihqui jahuen jonibo sca non janon. ³³ Noquen Papa ta hihti siri qui. Sirijaquin ta noquehon shinanihqui. Jahuejati sca non Jain non jai bi ta jaan honanquin siri-

jahiqui. Hihti siri shinanyahpa ta jaa qui. Jahuen shinan ta hihti coshi qui, noquen honantimahi. Jahuen honan betan tah non senentimahi jahuentianbi.³⁴ Papan shinanai ta tsoanbi honanyamanishqui. Jahuentianbi rihbi ta tsoanbi noquen Papa haxemayamanishqui.³⁵ Papan jato copi hinanrihbinon hihxon bi ta tsoanbi jaa pari jahuabi hinanya-manishqui.³⁶ Papan ta jatihibi shinan siriyahpaxon noque jihuemahiqui. Jahuenehbi jahuen jihuetahbbo rahsi non janon ta noque hahxonihqui. Hahxon tah min noque jai Papan. Mia tah min hihti siri qui hih tah hen jascabibi jai.

Noquen Hihbaan jihuetahbbo

12 Jaa copi tah hen mato hihti yohihi, heen huetsabaan. Noquen Papa Dios qui yohuashihja-quetanaxma hinamehnahue. Matohon jaan hihti shinanai copi hahan queenax copi rihbi hinamehnahue. Jahuenehbo sca jihuexon, hohchajoma siri janoxon, hahan jan jenimahibo janoxon hinamehnahue. Jascajxon tah non Hahxon tah min noque jai Papan non jacointihi.² Nincayosmabo jihueta quescayamahi jihuenehue. Jaabo hihqui quescaxonma behnabo hihnoxon maton shinan pontejaquin shinan behnabo bihnahue. Papa queenai quescajaquin shinannoxon, shinan behnabo bihnahue. Shinan behnabo bihxon tah man honantihi, jahua siri quin, jahua Papa queentihiquin, jahua ponte quin. Man tah man honantihi.

³ Papan hea raanah tah hen mato yohihi, hea huetsabaan. Shinan behnabo bihnahue, jatihixonbi. Papan ta mesco shinanbo hinanpaquehiqui. Hinanpaquehah bihxon jayaxon man jahua jaa hahxontihin honanquin sirjanahue. Man hashoan coshi hihqui shinamis. Sirijaquin shinanxon, jahuejati shinanyahpa min quin honanquin siri-

jahue, paramehxonma.⁴ Papan ta mesco shinanbo mato hinanpaquehiqui, man mesco teebo rihbi hahxonnon. Noquen yora hihqui quescia tah non qui. Non tah non hahan jisti jaax, hahan xecoti jaax, hahan nihti jaax, hahan nincati jai. Jas-capahbo mesco mebibo jaax bi ta noquen yora huesti qui.⁵ Noque Criston baquebo tah non hichahax bi jascarihibihi. Hichahax bi tah non huesti yoraya qui. Criston yora tah non qui. Noquen Hihbo nincacoinax huesti yorahax bi mesco jonibo, jahuenehbo rahsi, yanapanhananaibo rahsi.

⁶ Mesco jonibo man hihqui quescaribibihi ta Papan mato hinanai mesco teebo jaiqui. Mesco teebo mato hinanpaquexon ta hahan hahxonhi shinanbo rihbi mato hinanpaquehiqui, mesco shinanbo. Jaa copi jayaxon sca jaa hahxonnahue. Heen joi siri yohinicahue mia jaah, honanquin sirijaxon yohihue.⁷ Miin huetsabo yanapannicahue mia jaah jato hahxoncoinquin yanapanhue. Caibo haxemanicahue jan mia jaah, jato haxemahue.⁸ Hahan jenimati shinan hinannicahue mia jaah hahan jenimati shinan jato hinanhue. Pishinaibo yanapannicahue mia jaah, jaa pishinaibo hinanreshue, bichinrihbiti shinanxonma. Jonibo teemanicahue mia jaah chiquishxonma hihti teexon jato teequihnhue. Yomanalhaiba yanapannicahue mia jaah jenimahanan jato yanapanhue.

Shinancoini non jihueta jai

⁹ Caibohon shinanihcamaxonma jato yanapanquin hahxoncoinhue. Tiroma joibo rahninxon bi siri joibo jeneyamahue.¹⁰ Joni huetsahon shinanquin jato sirijaquin yohuanquihnhue. Sirijaquin shinanax joni huetsa qui siriresi yohuanhue.

¹¹ Coshin noquen Hihbo teexonhue. Chiquishaxma tee teeti. Dios Yoshiman

yanapanana jenimahue. Jenimahanan noquen Hihbo teexonquin.

¹²Papan mia hahxonyaxihqui honanax coincoini jaa joti manahue. Masá tenehue. Papa yocaquin rihbi jeneyamahue.

¹³Mihbe nincacoinaibo yomanah-taiton jaa pishinai hinanhue. Mihqui noquen huetsabo nocotaiya jato pimaxon jato janو hoxati rihbi hinanhue.

¹⁴Caibaan mato tiromajahah bi jato yocaxonnahue. Jato join bahchinnanxonma bi Papa jato yocaxonnahue, jan jato shinan siri hinanon hihxon.

¹⁵Hahan jenimati jaax copi caibo jenimahiya jato jenimaquinhue. Caibo rihbi benataiya benáquin bi jato tenequinhhue.

¹⁶Caibo betan siripi yohinani jihuenahue. Caibo mentan mia hashoan siri hihqui shinanyamahue. Jascajaxonma bi jahuaborajomabo yohuanquinhquin sirijaquin. Jaabaan mia yohihah bi caibo mentan mia hashoan honan hihqui shinanxon min jato nincayamamis.

¹⁷Caibaan mia tiromajahah bi jato copiyamahue. Jatihibi jonibo yohuanquihnoxon siri yohuanyahue. ¹⁸Hahtipahax, jatihibi jonibo betan siripi jihuehue. Caibo sinatai bi hahtipahxon jato siri shinan hinanhue, siri sca ji-huenoxon. ¹⁹Tsoabi tah min jahua copibi copitimahi, noque huetsan. Papan ta mia copixontihiqui. Jaa copi tenehue. Jaa copi ta huishani joi jaiqui: Heanbi tah hen copitihi. Jaabo tiromahibo jihuetai copi tah hen jato masajabahintihi hih ta noquen Hihbo yohuani jaiqui. ²⁰Jaa copi miin rahui copixonma bi picatsihquiton pimahue. Jiricatsihquiton xehamahue. Jascajaquin tah min jaa jahuen shinan pontexontihi. ²¹Caibaan mia tiromajahah, mian rihbi sca min tiromajamis. Jaton tiroma-

shinanbo potamanoxon sirijaquin jato hahxonnahue.

13 Gobierno hapobo nincanahue jatihixonbi. Jascapa hapo jatihibi ta Papan mato hinanah qui. Papan hinanahma ta yamahiqui; jaan hinanah rahsi ta jaiqui. ²¿Hapon yohihah bi min nincacatsiyamahin? Papan hinanah hapo tah min nincayamahi. Min nincanon hihxon tah hen mia yohihi. Nincayosmabo ta hapobaan casticanti qui. ³Sirijahibo ta casticanyamacaniqui. Tiromajahibo caya ta casticanti qui. Jaa copi tah min siripi jihuecatsihxon jato nincatihi. Min sirijaquin hahcaya ta mia yohiyaxihqui, Mia tah min siri joni qui hahquin. ⁴Min siripi jihuemon ta hapobaan tiromabo casticaniqui. Noquen naihoh queha Papan jascajahue hahca ta tiromabo casticanquin noquen Papa hahxonihqui. Jaa copi tah min tiromahax min raquetihi. Policia ta hahan casticanti qui. Yncaresma ta jaa jaiqui. Tiromabo qui noquen Papa sinataiya ta jascapahbo noquen hapobaan casticaniqui, Papa hahxonquin. ⁵Tinintinin mia casticamis hihxon tah min Papa queenai quescayamahi hea japaho hihxon rihbi mia tinintinin yohihah min nincatihi. ⁶Jaa copi rihbi tah min gobiernobo copijati jai. Coriquin ta gobiernobaan jaton tee hahqui, sontarobo copijaquin. Jascajaquin ta Papa hahxoncaniqui. Jaa copi tah min jato copijati jai. Copijanahue hahca copijaquin.

⁷Huetsa joni ribinax tah min hahqui miin coriqui min yohuashihtimahi. Ribinyahpaxon tah min miin ribin queyobahintihi. Coriqui cobranah copijaquin. Teeti yohihah teexonquin. Hapobaan yohihah, nincaquin. Jaabaan yohihi quescabijaquin hahxonquin, joi bichinxonma. Hapobaan yohihah,

can. ⁸Man ribinai jatihibi tah man copijacointihu. Copijaquin queyobahinquin. Joni huetsa yanapanti shinan hashoan sca bihbonanahue. Joni huetsahon shinanquin tah non hahxoncoinquin Papan yohini quescabija sca non jai. ⁹Tsiniyamahue. Joni huetsa rehteyamahue. Yometsohyamahue. Caibaan jahuabora bichinti shinanyamahue. Nincayosmayamaxon tah min joni huetsahon shinanxon, miabi min queemehtai quescajaribiquin joni huetsahon shinantihu. ¹⁰Joni huetsahon shinanxon tah min jahuentianbi jaa tiromajatimahi. Joni huetsahon shinani jihuetahbó hihxon ta jascapa joibo jatihibi Papan noque yohinishqui.

¹¹Noquen Hihbo tah man hahxonti jai, hea huetsabaan, coshin hahxonquin. Min hihti hoxahax mohixon jisi bi bari queyasca jaiya tah min coshin sca tee teetai, tee hichahi copi. Jascajaquin rihbi noquen Hihbo coshin teexonnahue. Noque bichi jaa joribiti hochoma tahniscái honanxon coshin sca teexonquin. Non nincamenoni tian jaa joribiti hochoma tahni hihnish bi ta rahma nea pishcasca jaiqui. ¹²Hihshinahax xaba paqueti nea pishcasca quescaribhi tah qui. Cristo joti hochomahi copi man tiromahi jihuepahoni quescayamanahue. Sirijaquin hahxonti shinanyabo sca janahue. ¹³Papahon shinanibaan hahcái quescajanahue. Pahen pahentimascai. Paheni coro corotimascai. Tsinitimascai. Haibo mehehax jaya yohuani jayamascai. Sinacanantimascai. Caibaan noque muhuinah bi notsi notsimascai. ¹⁴Noquen Hihbo Jesucriston shinan bichish jihuenaahue. Nincayosmabo jai quescayamanahue, jaabo jascarai bi queenyamabiresnahue.

Caibo qui yohuanyamahue hihqui

14 Caibaan ta Cristo qui hinamehxon bi man honanai jatihibi honanyamaparihiqui. Jan honanyamaparihi bi tah man jaa pontecatsihquin join hihquinantimahi. Jahuabo non pitimahin hihquish joinannoxonma nocotaiton bihquin sirijanahue. ²Jatihibi pití tah non pitihí hih huetsa jai bi ta non tah non nami pitimahi hihxon huetsan nami piyamahiqui. ³Nami pinicahxon, nami piyosma yohiquin Honanman hahyamahue. Nami piyosmaxon tah min miin huetsan nami pihiya Pitima tah min pihí, hohchayahpan, hah min jatimaribibi. Nami pinicaboya nami piyosmabo ta Papan jato rabebi sirijaquin bichiqui, Cristo qui hinamehtaiton jato rabebi sirijaquin bihquin. ⁴¿Mia jahuaxon huetsa joni teexonnicá min sinajatihin? Jahuen patoro jan teexonai bi jan teetai mian costanyamaxon tah min jahuen patoro hihyamaxon jaa sinajatimahi. Jahuenaahbi jahuen patoronen ta jaa yohitihiqui jan sirijaquin hahcái jisxon sirijaquin yohiquin. Jan tiromajaquin hahcái jisxon sinajascaquin. Jahuenaahbi jahuen patoronen ta yohitihiqui. Jascajaquin rihbi tah min noquen Hihbaan joni huetsa mihbe honanyahpa hihyamahiya mian jaa sinajatimahi. Noquen Hihbaan ta shinan hinanti hahtipahxon jaa hinantihiqui, jan hahcái sca noquen Papan siri sca jisnon.

⁵Jaa copi mianbi min hahcái jisxon shinanquin sirijahue, noquen Hihbaan mia Sirijaquin tah min hahcái hah mia janon. Huesti nete ta tantiti nete qui, Papa shinanti nete hih huetsa jai bi ta huetsa sca Jatihibi nete ta jascapah rahsi qui Papa shinanti nete rahsi hihribihi. Jascapa mesco honanyahpa hihqui bi hahbetan join hihquinan-

manahue. ⁶Huesti nete ta tantiti nete qui hihquish ta jaa neten noquen Hihbo hon shinani caibo tantihiqui. Noquen Hihbo hihti siri copi jascacani. Nami pini cabaan rihbi ta Mia copi tah hen pih Papan hahxon, nami pihiqui. Noquen Hihbo hihti siri copi jascajacanquin. Nami piyosmabaan rihbi ta Mia copi tah hen pih Papan hahxon, jaton huai mehabo pihiqui. Noquen Hihbo hihti siri copi rihbi jascajacanquin.

⁷Papan noque jisima tah non jihuayamahi. Papan noque jisima tah non mahuayamaribhi. ⁸Jihuetaibohax tah non noquen Hihbo queenai quescari non jihuetai. Noquen Hihbaan noque johue hahca tah non jaa queenai tian non mahuaribhi. Jaa copi tah non jihueparihax non noquen Hihbaan jonibo qui. Mahuatax rihbi jascabihi noquen Hihbaan jonibo. ⁹Noquen Hihbo ta noque jatihibi hihbohi qui, jihuetaibo, mahuataibo rihbi. Noque jatihibi hihbonoxon ta mahuatipish teehihribinischqui.

¹⁰Papan ta noque jatihibi jispaqueyaxihquiqui, non hahpahonibo siri quin tiroma quin hihxon noque jispaquequin. Jaa copi ta min hahcai quescajayamaquin miin huetsan pih bi mian jaa sinajatimahi. Jaan rihbi ta mia yohiquin honanman hahtimahiqui.

¹¹Papan huishamani jai quescabihi ta jayaxihquiqui:

Tsoabi cahnexonma tah hen hea naman jato tisquihahpaquemayaxihqui.

Hea quiquin Hihbo hihqui ta yohiyaxihcanihqui. Mia tah min Papa Dios coin qui hah ta hea jayaxihcanihqui

hihqui jaa huishani joi. ¹²Jaa copi honannahue. Mianbi min hahcai ta Papan mia yohiyaxihquiqui, Min tah min siri janiqui hahyamaxon Min tah min tiro majaniqui hahquin.

Miin huetsa hohchamayamahue hihqui

¹³Jaa copi joni huetsa betan join hihquinannanyamascanahue. Join hihquinannanxonma bi miin huetsa min hohchamamis hihxon shinanquin sirijahue. Hohcha qui min paquemamis. Noquen Hihbo min jenemamis.

¹⁴Pitima pihax copi non hohchayahpa sca jai caibaan shinanah bi ta jascapa pitima yamahihqui, hea huetsabaan. Noquen Hihbaan hea shinanmaha tah hen honanquin sirijahi. Jascapa pitimabo yamahi bi ta jascapa jai shinanxon jaabi pipan hihxon pihax, non hohchayahpa sca jai, pitimahi shinanxon bi pihax hohchayahpa sca jai. ¹⁵Mian pitihbi bi pitimahi miin huetsan shinanaiya ta jan pinon Jaabi pihue mian jaah tiroma qui. Hahan shinanyamaxon pari tah min jascajaquehahnai. Miin huetsa copi rihbi ta Cristo mahuanishqui, noque huetsan. Jaa copi miin huetsahon shinanhue. Pitimahi jan shinanaiya Jaabi pihue hahyamahue. Miin huetsa min masajamis. ¹⁶Miin piti mian piha siri que bi jaa hohchamaxon miin piti qui min jaa tiromahi yohuanmamis.

¹⁷Papan jihuetaiboxon tah non jahuabo pitima quin, jahuabo xehatima quin hihxon shinantimahi. Papan jihuetaiboxon tah non ponte jihuetai shinantihi, noquen huetsabo betan siripi jihuetai, coin coini jihuetai, Jascati caya tah non shinantihi jahuen yoshin siriyahpaxon. ¹⁸Jascajaquin caibohon shinani jihuexon tah min sirijsaquin noquen Hihbo Cristo teexontihi. Min jascapa hihquiya ta noquen Papa mihon jenimahiqui. Jonibaan rihbi ta mia siri jisiqui.

¹⁹Jaa copi joni huetsa betan siripi jihuetai shinan bihcoinnahue. Joni huetsa coshi hinanhahnannahue,

hashoan sca noquen Hihbo betan nihnon hihquish.²⁰ Jaan pitimahi bi mian pihue pihue hahca, pihax, masa shinani sca noquen Hihbo betan jan siripi nihyamascamis. Jatihibi piti ta siri qui, noquen Hihbaan jisí. Siri que bi pitimahi shinanxon miin huetsan picatsihyamahi bi mian Pihue hahca piresax, tiroma hi.²¹ Jaan pitima shinanxon jaan pimis hihxon miin huetsa nami piquihinyamahue. Jascajaquin rihbi ta pahe xehati xehayamahah, siri qui, miin huetsa min hohchamamis hihxon xehayamahah. Jahuabi tah non noquen huetsa non hohchamatimahi, hahan shinanxon.²² Jaa copi join hihquinanyamanahue. Miin Hihbaan mia jisi honanxon mihmebixon sca min honanai quescajaquin pihue. Shinanquin sirijahax tah min pitima tah qui hihxonma pihax min coin cointihi.²³ Pitima ta qui hihxon bi pihax tah min Hohcha tah hen jai hihscatihu. Jaatian tah min masa shinantihi. Pitima ta qui hihxon bi pihax hohchayahpa sca jai. Jatihibi ta jascari qui. Jascatimahi hihquish bi jascarax hohchayahpascai.

Min huetsa coshinon jahue hihqui

15 Jascajaquin tah non non honanai betan senenyamahibo non teneti jai, hea huetsabaan. Noquebi non queenai quescajaquinma bi tah non jatohon shinanti jai.² Jatihibijaquin tah non jascajati jai. Noquen huetsan hashoan sca nincacoinnon hihxon res tah non hahan shinanax noquebi non queenai quescatimahi.³ Noquen Hihbo Cristo rihbi ta jaabi queenai quescayamahi bi noquen naihoh queha Papa queenai quescanishqui. Jaa copi ta hahqui rainyamacannishqui, jonibo. Jaa yohihi ta huishani joi jaiqui: Mia hicha-caibaan ta hea sca hichaquiqui hihqui jaa joi.⁴ Papan huishamani joibo jati-

hibi ta non haxenon hihxon huishamanishqui. Tiromabo tenehahnhan, jahuen joi siri jisxon, jaa noquehon shinanai honanxon, jahuen shinan bichish, noque bichi jaa joti non jenimahanan mananon ta jaa joibo huishamanishqui.⁵ Noquen naihoh queha Papan ta siri shinan hinanbihqui, noque sirijaquin shinamaquin. Hahan jenimati shinan hinanquin ta noque jenimamahiqui. Jahuen shinan siri hinanah man siripi joni huetsa betan jihuemon tah hen mato yocaxonai, hea huetsabaan, man jaa shinanyahpa rahsi jihuemon hihxon, Cristo queenai quescari man jihuemon.⁶ Jaa shinan huestiyahpa rahsihax man jaa yohuan huestiya noquen Papa qui siribiresi yohuannon hihxon tah hen noquen Papa Dios mato yocaxonai. Noquen Hihbo Jesus Criston Papa qui bi man siribiresi yohuannon hihxon tah hen yocaxonai mato.

Judiomabo joi siri yohihi

⁷ Jaa copi sirijaquin joni huetsa Johue hahnahue. Noquen Hihbo Criston mato sirijaquin Johue hahni quen maton rihbi joni huetsahon shinanxon sirijaquin Johue hahnahue. Jaatian ta Papa Dios ta hihti siri qui hihyaxihcanihqui, mato jisish.⁸ Papan raanah ta judiobo hahxonni Cristo jonishqui. Noquen xenibo hahxontjanixon Papan yohini quescabijaquin hahxonni jahui.⁹ Judiomabohon rihbi shinanxon ta Papan jato sirijaquin bichiqui. Mato judiomabo jahuen jihuetahbohax sca Hahxon tah min noque jai, Papan, jaahbo hihquish ta hahxonni Cristo jonishqui. Papan huishamani jai quesa ta jatihibiqui.

Judiobaan nahuabo ta siripi yohuanyax-ihquiqui. Jato tocan tah hen mihqui siriresi yohuanyaxihqui. Jano tah hen mihqui behuayaxihqui hihqui jan huishani.¹⁰ Huetsa jan huishamani ta jascarihbihiqui:

Papan jonibo betan jenimanahue judiomabon hihqui.¹¹ Huetsa rihbi sca: Hahxon tah min noque jai, Papan, hahnahue judiomabon. Mia tah min Quiquin Hihbo qui, Papan, hahnahue jatihibi jonibon hihqui jan huishani.¹² Isaásnen rihbi ta jascajaribiquin huishanishqui: Isaínen chini baque ta jayaxihquiqui. Jaa ta jatihibichin Quiquin Hapo hi-hyaxihquiqui. Jaan jato hahxonah ta sirijaquin shinanax manayaxihcanihqui, jato bichi jonon caman, hihqui Isaásnen huishani joi janin.

¹³ Papa Dios mato yocaxonquin tah hen Jaton jointi janin miin shinan hicha niaxonhue Papan hen jai. Hahan jenimati shinan hinanxonhue. Miin hahan sirijaquin shinanmati shinanbo jato hinanhue, hihti jenimahabo. Miin yoshin siripan jato hihbocahinhue, min jonon caman manati tenenon, hah tah hen jai, mato yocaxonquin.

¹⁴ Man sirijaquin shinanxon joni huet-sahon shinanai tah hen honanai, hea huetsabaan. Papan joi man hicha honanscrai tah hen honanrihbibi. Joni huetsa yanapannoxon yohinanti man hahtipahi tah hen honanrihbibi.¹⁵ Man honanscrai bi tah hen texe noquen Hihbaan joi rihbi mato shinanmanoxon hen hihtimahxonma nea joibo huishahi. Jesucriston joi mato yohinon ta Papan hea yohinishqui, judimabo jatihibi hen yohinon. Jaa copi tah hen nea huishahi.¹⁶ Papan joi mato yohihah, Dios Yoshiman rihbi mato shinan siri hinanah, noquen Hihbo qui hinamehtah matohon noquen Papa jenimanon hihxon tah hen mato jaa joi siri yohihi, heen huetsabaan.

¹⁷ Jesucristonen hea yanapana tah hen Papan joi siri yohiquin sirijahi. Jascajahue Papan jaah tah hen jascajahi.

¹⁸ Judiomabaan nincacoinnon hihxon heyaxon Criston hahcai tah hen mato

yohitihi. Heanbi shinanxon hahcai tah hen yohitimahi.¹⁹ Jahuen shinanyaxon yohixon jahuen coshiyaxon hahxon tah hen yohibonanihqui. Jahuen coshiyaxon tah hen hahan honantibojaniqui. Jahuen coshiyaxon rihbi tah hen hahan rahtetibojaniqui. Jascajaquin tah hen Dios Yoshiman coshiyaxon jahuen joi siri nincamabonanihqui. Jerusalen janinhax yohibonahi cahax, mayátani cahax tah hen Ilirico mai janin caman noconihqui, Criston joi siri yohijaquetancahuanax jahuem jano nocoti.²⁰ Jano tsoanbi Criston joi yohiyamahi janin yohitanpan hihquish tah hen jascanhqui, hea huetsabaan. Caibaan jato yohiscrai janin tah hen yohicatsihyamahi, behna yohicatsihqui.²¹ Huishani joi jai quesa janon hihquish tah hen jascahi:
Tsoanbi jato yohiyamaphonih bi ta honanscayaixihcanihqui.
Tsoan yohinib que ma bi ta nincacoinyaxihscaihqui
hihqui jaa huishani joi.

Roma jema janin cayaxahpan hihqui

²² Nenobi heen tee hashoan hichahiya tah hen mato qui cati hahtipahyamaniqui, hea huetsabaan.

²³ Cati hahtipahyamaphonish bi neno yohiti pishinyamascaax tah hen mato sca jisi cacatsihscrai. Mato jisi jahuentihi ra baritian cacatsihpahonish tah hen España janin cahi caquin mato qui banejaquetahyaxihqui, huinocahinscanoxon.

²⁴ Huinonoxon mato qui banejaquetahxon tah hen mato sirijaquin yohuanquinhyaxihqui. Jaa pecaho sca tah man hea yanapantihi, hen caribiscanon.

²⁵ Jascayahnoxon tah hen rahma Jerusalen janin pari catatahbahi. Jano tah hen noquen huetsabo coriqui pishca hinani cahi.

²⁶ Jerusalen janin ta texe noquen huetsabo yomanahqui. Jaa copi ta Macedonia janinhahbo betan Acaia

janinhahbaan jato yanapanti shinanxon coriqui tsinquicanhoxqui, jato qui raannoxon.²⁷ Hen yohihah ta jaabaan bi shinanxon raancaniqui. Jerusalen janinhahbaan pari jaton caibo jato qui raanah ta judiomabaan Papan shinan siri bihcannishqui. Jaa copi ta jaabaan sca copiquin sca jaton coriqui pishca raanti jaiqui.²⁸ Jaa pishca tah hen jato hinani cahi. Jato hinantanax tah hen España janin sca cahi caquin mato jisbahinyaxihqui.²⁹ Nocoxon, hen honanai joibo yohiquin tah hen hicha Criston shinan mato hinanyaxihqui, man hihti sirijaquin sca shinannon.

³⁰ Noque jatihibi tah non Jesucristonahbo qui, hea huetsabaan. Dios Yoshiman ta noque shinamahiqui, non joni huetsahon shinannon. Jascahananxon noquen Papa hea yocaxonnahue.³¹ Judea mai janin cahiton janohah nincayosmabaan hea tiromajayamanon hea yocaxonnahue. Coriqui hinanah sca noquen huetsabaan rihbi sirijaquin bihnon hihxon hea yocaxonribiquin.³² Jaa pishca jato hinantanax Papa queenaiya sca hen mato qui sca canon hea yocaxonnahue. Jaatian tah non shinan hinanhananax non mato betan jenimatihi.³³ Mato rihbi tah hen yocaxonai, noquen naihoh queha Papan mato shinan hinannon mato yanapannon. Jascari rahan.

Jato shinanpaquexon yohihi

16 Noquen choca Febe ta mato qui nocoti cahiqui, hea huetsabaan. Cencrea jema janin jihuexon ta janoha noquen huetsabo yanapanchahchihiqui.² Criston joniboxon non Criston jonibo bihti jai quescabijaquin jaa noquen choca sirijaquin bihnahue. Jan jahua pishinihquin honanxon hinannahue, hahxonresquin. Jaan rihbi ta hicha noquen huetsabo yanapanxon hea rihbi hahxonnishqui.

³ Priscilaya Aquila yohixonnahue, man jascabi jayamahin hahquin. Rabechinbi ta hehbetanbi Jesucristo teexonpahonishqui.

⁴ Tiromabaan jato retequin bi cahnenon ta hea hihti yanapancannishqui. Jaabo rabe copi tah hen jihueparihi. Jaa copi tah hen Maton tah man hea hahxonnihqui hahcai. Jatihibi nenobo jai noquen huetsabaan ta jascajaquin rihbi yohihiqui judioxonma bi nincacoinaiboxon.⁵ Jaton xobo janin tsinquiqaquetai noquen huetsabo rihbi yohixonnahue Man jascabi jayamahin hahquin. Heen huetsa Epeneto rihbi yohixonnahue. Jahan tah hen hihti shinanai. Jaan pari ta Acaya main jihuexon nincacoinnishqui, chiní sca jahuen caibaan.⁶ María rihbi yohixonnahue. Jaan ta mato hicha yanapannishqui.⁷ Andrónicoya Junias rihbi yohixonnahue. Jaabo rabe ta heen caibo qui. Heyabi tsahonahbo ta hehbetanbi sipo xoboho rabebi tsahopahonishqui. Criston raantibaan ta jato honanquin sirijahiqui, hihti nincacoinaibo copi. Jaabo Cristo qui hinamehni pecaho ta hea sca hinamehni qui, jaton chiniscanon.

⁸ Amplias jascajaribiquin yohixonnahue. Jahan hen shinanai tah qui, noquen Hihbaan shinanyaxon hen shinanai joni.⁹ Urbano rihbi salud yohixonnahue. Jaan rihbi ta hehbetanbi Cristo tee teexonpahonishqui. Estaquis rihbi saludanxonnahue. Hahan tah hen hihti shinanai.¹⁰ Apeles rihbi salud yohixonnahue. Criston shinancoinyahpa tah qui. Aristóbulo jenábo rihbi salud hinanxonquin.¹¹ Heen caibo Herodion jascajaribiquin yohinahue. Noquen Hihbo qui hinamehtaibo Narciso baquebo rihbi yohixonnahue.¹² Noquen choca rabe Trifenaya Trifosa salud hinanxonrihbinahue. Rabebichin ta tee teexon noquen huetsabo hicha

yanapannishqui. Heen choca Pérsida rihbi yohixonquin. Hahan tah hen shinanai. Jaan rihbi ta noquen Hihbo hihi tee teexonnishqui. ¹³Rufo rihbi yohixonquin. Jaa ta teemis qui, noquen Hihbo teexonnica. Jahuen mama rihbi saludanxonquin. Jaa tah hen hean rihbi Maman hahcai. ¹⁴Asíncrito rihbi yohixonnahue. Flegonte rihbi. Hermas rihbi. Patrobas rihbi. Hermes rihbi. Jato betan hihqui noquen huetsabo rihbi. ¹⁵Filólogo rihbi yohixonquin. Julia rihbi. Nero rihbi. Jahuen choca rihbi. Olimpas rihbi. Jato betan hihqui noquen huetsabo rihbi, jatihibi.

¹⁶Noquen Hihbaan shinanyaxon jatihibi noquen huetsabo hicotannannahue. Nenobo tsinquiaquetañai noquen huetsabaan rihbi ta mato saludanihqui, Criston joniboxon.

¹⁷Nea tah hen matohon shinanxon hihti yohiscái, heen huetsabaan: Man join bahchinannon hihxon ta caibaan mato huetsa shinan hinanti tanayaxihqui. Cristo joi hexenihxon bi man huetsa joi sca bihnón hihxon ta mato caibaan huetsajaquin sca shinanmati tanayaxihcanihqui. Jascapahbo honanquin sirjanahue. Jascapahbohí honanxon jato yohuanquihnyamascanahue. ¹⁸Jascapahbaan ta noquen Hihbo teexonyamahqui. Jahua mato bichinpan hihxon ta mato hihbojacatsihcanihqui. Jaa copi ta siripihamahi yohuanxon parancaniqui. Hihcoinaibohí shinanxon caibaan jato chibannon hihxon ta paran parancaniqui. Jascapahbo qui coiramenahue. ¹⁹Noquen Hihbo man histon nincacoinai ta chanihabho jatihibi janinxon honancaniqui, heen huetsabaan. Hen huishaxon mato yohihah man jascajaribiquin nincatihu tah hen honanrihbi. Jaa copi tah hen jenimahi. Honanbohax man siripi jihuenon hihxon tah hen jenimahanan

nea huishahi, tiromayosmabo man jihuenon. ²⁰Sirijaquin jihuemanicahxon ta Papan mato coshi hinannoixihqui qui, jamabahinquin hahcaja man janon, Satanas yosmajaquin. Noquen Hihbo Jesusen mato hicha shinan hinanon tah hen mato yocaxonai, heen huetsabaan.

²¹Nenoxon ta hehbe teenica Timoteonen Man jascabi jayamahin hahqui qui. Lucionen rihbi. Jasoman rihbi. Sosípatronen rihbi. Jaabo quimisha ta heen caibo qui, mato salud raanaibo.

²²Pablo nea huishaxonquin tah hen hean Tercio mato salud raanai, mahbe Criston shinanyahpaxon.

²³Gayon rihbi ta salud raanihqui. Jaa ta xobo hihbo qui, jahuen xobohoxon tah non huishahi. Haho rihbi tah non neno behuahi tsinquiaquetai.

²⁴Erastonen rihbi ta jahuen salud mato qui raanihqui. Jaa ta nenohah agente municipal qui. Noquen huetsa Cuartonen rihbi ta salud raanihqui.

Hahxon tah min jai hihqui

²⁵⁻²⁶Noquen Papa ta Quiquin Hihbo qui, heen huetsabaan. Jesucristo ta jihuemanicah qui hihbonahi non canon ta Papan jahuen joi siri noque hinanishqui. Neateman ta jaa joi siri Papan tsoabi honanmayamapahonishqui. Nea rahma tahni ta noque honanmanishqui, non honannon hihxon. Jahuenbihax piconihma bi jascabibi janíxon ta Papan rahma tahni jahuen joi huishanicabo yohinishqui, huishahabo. Jaa huishanibho jissón, Papan rihbi noque honanmaha honanxon tah non honanquin sirijascai. Jatihibi jonibaan nincacoinax hinamehtax queyoyamanox sca jihuenon hihxon ta noque honanmahiqui, noquen Papan. Jaa joi siri tah hen jaayohihi. Jaa joi siri nincacoinxon man jahuentianbi potayamanon ta Papan mato coshijati hahtipahiqui, heen huetsabaan.

²⁷ Jaa huesti ta shinan Hihbo qui, honan Hihbo. Jesucristo raanxonquin ta noque hihti hahxonnishqui. Mia tah min

Quiquin Hihbo qui, Papan. Hahxon tah min noque jai hahnahue jascabi sca. Jascacoin sca janon rahan.

1 CORINTO

*Corinto janinhahbo qui
Pablonen raanni joi*

Corinto qui Pablonen joi raanai

1 ¿Papan shinanya man jascabi jayamahin, corinto jonibon? Hea tah hen Pablo qui. Jesucriston raanti joni mia jahue Papan hea janí. Noquen huetsa Sóstenes betan tah hen nea joi huishahi. ²Papan ta mato quenanishqui Jesucristo betan ta Papan mato Heen baquebaan hahquiqui. Jatihibi janinxon noquen Hihbo Jesucristo yocacaibo ta jahuen baquebo qui, jaa rihbi jaton Hihbo, noquenah rihbi. ³¿Jahuen shinanya man jihueyamahin? Noquen Papa Dios betan noquen Hihbo Jesucristonen shinanmaha ¿man jointi siripax jihueyamahin?

Criston noque hahxonai

⁴Jesucristo qui man hinamehni copi ta Papan matohon shinanxon mato hihti hahxonihqui. Jaa copi tah non Hahxon tah min noque jai, Papan, hahcai. Noquen Papa yocaxon tihibi tah non jascajahi. ⁵Mato ta hicha jahuen shinan hinanihqui, sirijaquin honanax man siripi yohuannon hihxon. Jaa copi tah hen Hahxon tah min jato jai, Papan, hahcai. ⁶Cristo ta noquen Hihbo qui hih man janon hihxon ta jahuen shinan mato hinanihqui. ⁷Dios Yoshiman ta mato jatihibijahti coshi hinanihqui, noquen Hihbo Jesucristo sanareneni jonon caman man mananon. ⁸Jonoxon caman ta noquen Hihbo Jesucriston mato coshijatihqui, nete queyotaiya mato qui jahua yohuan yamanon. ⁹Noquen Papan ta mato jenetimahiqui. Mato ta caisnishi, noquen Hihbo Jesucristoya man

janon hihxon. Jaa jahuen baque ta noquen Hihbo qui.

Mesco shinanyahpa

¹⁰Jahuen janen tah hen mato hihti yohihi, hea huetsabaan; huesti joiya hihnahue jatihibi. Join bahchinnanyamanahue. Huesti shinanya rihbi janahue, jaa huesti yohuanyahpabo. ¹¹Man sinacanananai ta Cloen jonibaan hea yohihipishqui, hea huetsabaan. Jaa copi tah hen mato yohihi. ¹²Hean tah hen Pablo chibana hih huetsa janon ta Hean tah hen Apolo chibana hihquiqui huetsa. Hean tah hen Cefas chibana hihqui huetsa rihbi. Hean tah hen Cristo chibana hihqui huetsa rihbi sca. Jascapahbo tah man qui. ¹³¿Cristo huestima hin? ¿Hea Pablo maton hohcha copi jihuin hueoncannishqui? ¿Hea sca man chibannon mato nashimacannishqui? ¹⁴Jahuerohaquaquin tah hen heanbi mato tsoabi nashimayamaniqui. Crispo huesti, Gayo rihbi, jaa res. ¹⁵Jaabi hen chibannon ta Pablon hea nashimanishqui hih man jamis. ¹⁶Estefana jaabo rihbi tah hen nashimaniqui. Tsoa rihbi hen nashimaniquin hen honanai ta yamahihqui. ¹⁷Hen nashimanon hihxonma bi joi siri hen yohinon hihxon ta Criston hea raannishqui. Hihti yohuanti honannihcamahaxma hen yohiresi canon hihxon hea raanquin, retehahbo noquen hohcha copi Cristo muhuani hean yohihah nincacoinax jihuetahbo.

Criston joi Papan coshi joi

¹⁸Queyoyaxihquiaan jisi ta Cristo muhuani joi nincatima joi qui. Papan noque teehihmahibaan jisi ta jaa join jahuen shinan noque hinanihqui. ¹⁹Papan ta huishamanishqui:

Honanaibaan honan tah hen queyobahintihi. Jaton joi honan hihqui jaabaan shinanai bi tah hen jascapa joi tiromahi jismatihi.

²⁰ ¿Honan jonibo cahran? ¿Moisesnin quirica honanbo cahran? ¿Mai meha joi bichinmisbo cahran, jahuerahnon hin? Jascapahbaan ta quesajaquin honanmahiqui. Papan noque jismahah tah non honanai. ²¹ Noquen Papa ta honan qui. Honan hihxon ta Maton shinaman res hea honannahue noque jayamanishqui. Jaa copi ta jaton shinaman res mai mehabaan noquen Papa honanyamahiqui. Jaton shinaman honanyamahibaan bi ta Criston joi nincacoinaibo Papan teehihmahiqui, Honanma joi tah qui honanquin hahcajahibo jai que bi.

²² Hahan honanti noque jismahue hah ta judiobaan jaiqui. Hashoan honan joi tah non queenai hah ta jaton nahuabaan jaiqui. ²³ Jaschibaan bi tah non jihuin hueonahbo Cristo muhuani joi non yohihi. Judiobaan shinanah, rahninti joi. Jaton nahuabaan shinanah, nincatima joi. ²⁴ Papan quenahibaan shinanah ta jaa joi noque nincamaxon jahuen coshiyaxon Papan noque hahxonihqui. Jan hihti honanai ta noque honanmahiqui. Judio hihxon, jaa hihyamahax jaton nahuabo hihxon tah non nincacoinxon non honanai. ²⁵ Papan joi ta hihti honan joi qui, jahuanma hih mai mehabaan shinanai bi. Mai mehabaan shinan shinanax yohuanah cahen tiroma, honanma. Papan ta coshinma pishca hahxon mai mehabo hihti muhuihqui. ²⁶ ¿Man jenquetsahpabo jaiya Papan mato jahuen joi nincamanishquin, hea huetsabaan? Honannahue. Mai mehabaan jisi tah man honan joni hichayamahi. Patorobo rihbi tah man hichayamahi. Patoro baquebo rihbi tah man nincacoinaibo hichayamahi.

²⁷ Mai meha honanbo rabinmanoxon ta Papan noque caisnishqui, noquen non honanyamahi mai mehabaan shinanah bi. Mai meha coshibo rabinmanoxon ta coshijomabo rihbi noque caisnishqui, coshijomabohi mai mehabaan shinanah bi. ²⁸ Mai meha hanibo jahuamaboscanon hihxon ta noque jahuamabo caisnishqui. Noque jistahihmhibaan bi ta Papan noque caisnishqui, non jahuamabo que bi noque caisquin. ²⁹ Jaa copi ta Papa Dios bebonxon, non coshi hihxon hahpahonibo non tsoanbi yohiti hahtipahyamayaxihqui. ³⁰ Papan yohihah ta Criston mato hihbojanishqui. Hihbojaxon ta noque jatihibi shinan hinannishqui. Noquen hohcha rihbi ta queyoxonnishqui, jahuen baquebo sca non janon. Non jihueyaxihnon ta jaa hinamehnishqui, Jaschahue Papan jaah. ³¹ Jaa copi ta huishani joi jai quescari qui: Yohicatsihxon mianbi shinanxon min hahcaima bi Papan mia hahxonai yohihue hihqui jaa huishani joi.

Noquen hohcha copi muhanai yohiti jai

2 Mato janin nocoxon tah hen Papan joi mato yohicinnihqui. ² Criston joi res yohiti ta jaiqui hihxon tah hen noque copi jan jihuin hueonahbo muhanai mato yohinihqui. Huetsa yohuan tah hen jayamaniqui. ³ Yora yosmahax raquetax tastahihqui cah hen mato tocan nihpahoni. ⁴ Jonibaan shinanax yohuanai jai quescapa joi tah hen mato yohiyamanihqui. Hahan paranti yohiquinma bi tah hen Papan coshi jismaxon mato yohinihqui. Dios Yoshiman hahcai man jisnon hihxon tah hen mato yohinihqui. ⁵ Honanax yohuanai nincaxon man nincacoinnonma bi Papan coshin hahcai man jisxon nincacoinnon hihxon mato yohiquin.

**Dios Yoshiman honanmaha
non noquen Papa honanai**

⁶ Yohixon tah non nincati hahtipahibo non honanmahi, hashoan honan sca jaábo. Non hinanai shinan ta mai mehabaanama qui. Jaton hapobaana-marihbibi. Jaabo ta queyoti cahiqui. ⁷ Tsoan honannihma joi tah non yohihi. Papan jone joi tah qui. Jahuabi jariyamanon jaan yohini joi. Jaa joiya cahen tsoabi yamani. Jahuen shinanya non jihuemon hihxon ta Papan noque yohinishqui. ⁸ Jaa joi ta rahma jihuetai hapobaan honanyamahiqui. Honanxon cahen noquen xaba hihbo rehteyaman-han. ⁹ Huishani joi jai quesca tah qui.

Beron tsoanbi jisyamanibo, pabinquinin nincayamanihbo, jointinin shinanyamanihbo, jascapahbo ta Papan noque hahxonnishqui. Noquen Papahon non queenaibo ta noque jascapahbo hinanyaxihquiqui

hih ta jahuen huishani joi jaiqui. ¹⁰ Jas-capa joibo non honannon hihxon ta Dios Yoshiman noque honanmahi qui, Jas-ca-jahue, Papan jaah. Dios Yoshiman ta jati-hibi honanihqui. Noquen shinaman non honantimahi bi ta jaan honanihqui, no-quen Papan shinanyaxon.

¹¹ Noquen jointinin non shinanai ta huetsa jonin honantimahi qui. Noquen res tah non jaa honanai, noquen jointinin honanquin. Papan shinanai ta jascarihbihiqui, tsoanbi ta jaa honanyamahihqui, Dios Yoshiman res. ¹² Papan ta jahuen Yoshin siri noque hinanihqui. Mai meha yoshinma bi jahuenahbi. Jan noque yohihi non honannon hihxon cahen noque jahuen yoshin hinanquin. ¹³ Jan noque hinanai joibo tah non yohihi. Jaanbi shinanax Jonibo yohuanai quescajaquinma bi Papan yoshinyaxon yohiquin. Jahuen

Yoshinyahpabaan honanon hihxon tah non honanmahi, Papan joi honanahbo.

¹⁴ Jonin shinanyahpaxon res tah non Dios Yoshiman hinanai joibo honantimahi. Dios Yoshinjomaxon shinanah ta jaa joi tiroma qui. Nincatima joi. Dios Yoshinyaxon honantih bi jaya-jomaxon nincacah cahen nincatima.

¹⁵ Dios Yoshiman noque hinanah tah non jahuen shinanyaxon jatihibi honanai, jan noque yohihi jatihibi. Jahuen shinanyahpabo non hihqui copi ta mai mehabaan noquen shinan honanyamahi-hqui. ¹⁶ Tsoanbi ta noquen Hihbo honan-mati hahtipahyamahiqui. Noquen Hih-baan shinanai ta tsoanbi honanyaman-ishqui. Tsoan honannih que ma bi tah non Criston shinanya non jihuescái, jaan hinanah.

Papa hahxonaibo rahi

3 Papan shinanyahpabo haxemaquin quescajaquin hen mato yohipanan tah hen hahtipahyamani qui, hea huetsabaan. Jonin shinanya quescapahbo tah man janiqui. Cristo qui hinamehtipi baquexo quescapahbo cah man jahuen shinan hichayamapariní. ² Piti pimaquin hahcajaquinma bi tah hen chocho jene xehamaquin hahcajaquin mato honanmaniqui. Chahoma pitibo tah man piti hahtipahyamani qui. Rahma caman rihbi tah man hahtipahyamahi. ³ Jonin shinanyahpabo tah man qui. Join bahchinnanaibo tah man qui, sinacananaibo. Jascapahbo man jonin shinanyahpahax res jihueyamahn? ¿Cristo qui hinamehyamahi jonibo jai quescia man jayamahn? ⁴ Hean tah hen Pablo chibanaí hih huetsa janon, Hean tah hen Apolo chibanaí hih man huetsa jai. ¿Jascahax jonibaan shinanai quescia man jayamahn?

⁵ ¿Apolo jahua quin? ¿Hea Pablo jahua quin? Papan joni tah non qui, rabebi.

Jato yohitannahue Papan jaah tah non rabechin mato yohiniqui, man nincacoinnon. Papan noque yohini quescaja tah non jai. ⁶Joi banaquin hahcajaquin tah hen mato yohiniqui. Joconscaibo jenen mehchajaquin hahcajaquin ta Apolonen sca mato yohnishqui. Banabobo hanijaquin hahcajaquin ta Papan mato nincacoinmanishqui. ⁷Jaa copi ta bananica jahuama qui. Mehchajan-icah rihbi jahuama. Papa huestichin ta hahquiqui, hanijaquin. ⁸Bananica betan mehchajanicas ta jascapah rabe qui, hahxonica rabe. Noquen tee jisxon ta Papan noque copijayaxihqui. Sirijaquin hen hahxonaiya, sirijaquin hea hahxonquin, sirijaquin huetsan hahxonaiya, jaa rihbi sirijaquin hahxonquin. ⁹Papan hahxonica rabe tah non qui. Mato cah man jahuen huai quescapahbo, jan xobojahi quescapahbo.

¹⁰Papan hea yohini quescabijaquin tah hen xobojati honanxon xobo jihui nichinquin hahcajaxon mato yohimenonihqui. Huetsan sca ta hahqui xobojakin hahcajaquin haxemahiqui. Hahqui xobojakin hahcajaquin jisnahue, sirjanoxon. ¹¹Jesucristo huesti ta hahqui xobojati quescapah qui. Xobojakin hahcajaquin ta huetsa xobo jihui tsoanbi nichinti hahtipahyamahihqui. ¹²Xobojakin hahcajaquin sca Cristo hahxonquin, ¹³jahuatohon man hahqui xobojahin, mapoyosma xobo hahcatsihxon jahuatohon man hahtihin, oron, yamin, copi macaman, jihuin, pehin, huasin? ¹⁴Noquen Hihbo noque bichi jahuiya sca ta non hahxonnihbo jenquetsahpa hin honanahbo Papan mapojayaxihqui. Chihin ta non hahqui xobojahi jaan tanayaxihqui, jenquetsahpa hin hihxon. ¹⁵Non hahqui xobojahi mapoyamahiya ta Papan noque copijayaxihqui. ¹⁶Noquen tee mapohiya tah non mequen sca hihtihi,

noquen tee yamacahini, Papa bebонbi mequen bi res noque nichi.

¹⁶Mato tah man Papan xobo qui ¹⁷man honanyamahin? Jahuen Yoshin ta maton jointi janin jihuethiqui ¹⁸man honanyamahin? Papan xobo non tiromajahiya ta jaan rihbi noque tiromajatihi. ¹⁹Mato tah man jaa xobo qui. Jahuen xobo janin ta tiroma jatimahiqui.

¹⁸Paramehyamahue. ¹⁹Mai meha shinan min hicha jai shinan min jain? Jayajoma hihresscahue, honancoinscanoxon.

¹⁹Nea mai mehabaan shinan ta honanma qui, Papan jisi. Huishani joi jai quescari: Shinanihcamahibo ta jaton shinamanbi jaan masajahiqui. ²⁰Huetsa huishani ta jaribihiqui: Honan joni-
baan shinan ta jahuama qui. Papan ta jaton jointi honanahqui. ²¹Jaa copi mai mehabaan shinanai yohuan jaya-
manahue: jaa huesti tah hen chibanai hihyamanahue. Papan joi yohinica jati-
hibi tah man nincatih. ²²Hea Pablo, Apolo, Cefas, mai naman jaibo, jihueta,
mahuati, rahma jaibo, jayaxihquibo, jatihibi ta matonah qui. ²³Mato rihbi tah
man Cristonah qui. Cristo rihbi cahan
Papanah.

Criston raantibaan hahxonai

4 ¹Noque quescapahbo haxemanic-ahbo non jahua quin? Criston hahxontibo can. Tsoan nincanihma Papan joi yohixonnicalbo. Jascapahbo tah non qui, honannahue. ²Yohixonnical-
ta yohiresquinma bi jahuen hihbaan yohihi quescabijaquin pontejaquin shi-
nanti jaiqui. ³Jaa copi tah hen masa shinanyamahi. Siri hin, tiroma quin hihxon man hea jisí bi ta jahuama qui. Huetsa joni-
baan hea jascayaquin jisí bi ta hea jahuama rihbi qui. ⁴Hen honanai heen
tiroma ta yama qui. Jaa yamahi bi tah hen jaa copi ta Papan hea siri jisiqui hen
jatimahi. Jaanbi ta siri hin, tiroma quin

hihxon hea jisiqui. ⁵Jaa copi siri hin, tiroma quin hihxonma sca hea jisnahue, noquen Hihbo jonon caman. Joxon ta bahquish chian xabajaquin hahcajaxon rahma jonehibo jaan jismayaxihqui qui. Jaton jointinin jonibaan shinanai shinanbo rihbi ta yohipaqueyaxihqui qui. Jaatian pari ta jatihibi non siribojani-hbo quen jaan yohiyaxihqui qui: Sirija tah min janiqui, hahquin.

⁶Hehqui bi tah hen yohuanai, hea huetsabaan, Apolo qui rihbi, man haxenon. Papan huishani joi jai quescar man jihueta haxenon hihxon tah hen nea huishaxon mato yohihi. Huetsa haxemanicah nincacatsihyamaquin man tiromaboyaquin shinanax Jaa caya ta quiquin haxemanicah qui hih man jamis. ⁷Mato yohihi tah non tsoanbi non Mia caya tah min caibo mentan hashoan honan bi res qui non jayamahi. Papan mia hinanyamahah cah min jahuabi jayamahan. ¿Miabi coshixon shinan bichi quescaax sca min yohuanain, Papan mia hinanresai bi?

⁸Rahma rah tah man jahuabi pishinyamascai. Rahma rah tah man jatihibi jaresscrai. Quiquin hapobo sca rah tah man jai, noque non jano hiyamahiya. Quiquin hapobo mato jacobinhon, mato betan hihxon non noquen rihbi yononon. ⁹Hean shinanah ta noque jan raanaibo Papan chini picohihqui, noque jisxon costanahbo. Quiquin hapobo rehtenani catanxon jaton rehtetibo picoquin hahcajaquin. Jascapahbo noque. Jonibo hahqui manahihtabo picohah quesca ta noque qui. Papan yonotibaan jisnon, jonibaan rihbi jisnon. ¹⁰Noquen Cristo joi non yohihi copi tah non honanmabo qui, maton jisi. Mato cahen honanbo, Criston shinanyahpabo copi. Noque cahen yosmabo, mato cahen coshiyahpabo, maton jisi. Noque jahuamabo, maton shinanah. Mato siribo, maton shinanah.

¹¹Rahma caman tah non pihan hihqui. Xehan hihqui. Chopanma nichi. Rishqui rishquihahbaan bi tah non tenehi. Noque jahuerahn non hoxati yamahi. ¹²Noquen mequeman noque tee teeti. Noque qui tiromahi rainyamahibo bi noquen tenexon jato yocaxonquin. Noque tiromajahibaan bi noquen tenequin. ¹³Noque qui tiromahi yohuanaiboya noquen sirijaquin jato yohuanquihqnquin. Rishtaya quescapahbo ta noque jiscanihqui. Jatihibi jonibo mentan hashoan tiromabo quescapahbo ta noque jiscanihqui.

¹⁴Mato rabinmanoxonma bi tah hen matohon shinanxon mato pontenoxon mato jascajaquin yohihi, heen baquebaan. ¹⁵Criston joi haxemanicahbo man hicha jai que bi tah man papa hicha yamahi. Criston jonibo sca man hihnon hihxon cahen hea huestichin mato joi siri yohinah. ¹⁶Jaa copi tah hen mato hiti yohihi, hen hahcrai quescajanahue.

¹⁷Man jascajanon hihxon tah hen mato qui Timoteo raannihqui. Heen baque tah qui, hahan hen hihti queenai, noquen Hihbaan joi hean yohini copi cahen heen baque. Noquen Hihbaan yohihi quescajaquin ta jaan hahqui qui. Criston joi nincaxon hen hahcrai joi mato yohinon hihxon tah hen raannihqui. Jatihibi janin noquen huetsabo hean yohihi quescajaribiquin jaan rihbi mato yohirihbinon hihxon tah hen raannihqui. ¹⁸Hea jari catimascai shinanax tah man caibo coshi coshihax yohuan yohuanscrai. ¹⁹Noquen Hihbo queenaiya tah hen histon mato qui catihai. Nocoxon tah hen maton yohuan tanaxonma bi maton coshi hean honantihai. ²⁰Jahuen jihuetaahbo non nincamanon ta Yohuanresnahue Papan noque jayamahiqui. Noque ta jahuen coshi rihbi hinanihqui. ²¹Shinannahue. ¿Hean mato jahuejati man queenain? ¿Caxon

mato rishquiti? ¿Caxon matohon shinanxon honaxonbi yohiti? ¿Jahua man queenain?

Tsinihiton casticanti

5 Caibo man joni huetsa betan tsinihi tah hen nincascai hea chanihahbo. Nincayosmabo jascaraima bi ta mato tocan jahuen mama betan huesti joni hihiquipi. ² Jatihibi honanquin hahcajahanx bi tah man honanmabo jihuetai. Benatihi bi tah man benayamahi. Mato tocan jascapa hohchamis hihyamascanon potanahue. ³ Mato janin hihyamaxon bi tah hen mato betan hihxon quescaxon mato yohiscai. ⁴ Hoa jascanica copi: Noquen Hihbo Jesucristohon shinanax tsinquixon, jahuen coshiyahpaxon, hea rihibi jano hihqui hahcajaquin shinanax, hahnahue. ⁵ Satanás res sca jaa joni hinannahue, jahuen yora rehtenor hihxon. Noquen Hihbo Jesus jahuiya jaa jonin yoshin teehihyaxahnón hihxon Satanás hinanscanahue rehtenor.

⁶ Man shinanquin hahcajahax yohuanai ta tiroma qui. Hahan paan soohihmati pishca niahah ta tonco jatihibi sca soohihihiqui. Hohcha ta jascarihbihiqui. ¿Man honanyamahin? ⁷ Hanhan soohihmati tiroma potaquin hahcajaquin janahue, soohihmahahma tonco siri quescapa sca janoxon. Hohchati ji-huetaibo mato tocan jayamanon jascajanahue. Noquen hohcha copi ta Cristo mahuanishqui, non hohchajomabo sca janon. ⁸ Hohchajomabo jihuenahue. Maton shinan tiromabo potanahue, behnabo sca bijnoxon. Hihcointi shinanbo bijnahue, parantima shinanbo.

⁹ Joni huetsa betan hohchataibo yohuanquihnyamanahue hah tah hen mato janiqui, quirica huishaxon. ¹⁰ Jascapahbo man yohuanquihnyamanon hen hihqui bi tah hen noquen Hihbo qui hinamehyamaparihibo yohiyamanihqui, joni huetsa betan jan hohchati hihresai

bi, yohuashihtai bi, yometsohtai bi, santo qui betihihpaquetai bi. Jascapa nincayosmabo yohihi tah hen yohuanquihnyamanahue jayamanihqui. Jaabo yohuanquihnyamanoxon cah man nea mai potabahini cahan. ¹¹ Tiromahibio noquen huetsabo yohuanquihntima tah hen mato yohiniqui. Joni huetsa betan hihqui noquen huetsabo yohuanquihnyamanahue. Yohuashihtaibo, santoyahpabo, rainyamahi jihuetaibo, pahen pahenaibo, yometsohtaibo, jascapa noquen huetsabo yohuanquihnyamanahue. Jascapahbo piquihnyamanahue. ¹² Nincacoinyamahibio casticanti tah hen mato yohiyamahi. Noquen huetsabo caya, jato pontequin casticannahue. ¹³ Nincacoinyamahibio ta Papanbi casticanyaxihiqui. Mato tocan hihquiton maton huetsa nincayosmabo camanahue hah ta Papan noque janishqui.

Noquen huetsabo non demandantimahi

6 Noquen huetsabo betan rainyamahi yohinanxon tah man nincayosmabo janin demandandi cahi. ¿Jenquetsahaquin shinanax man jascajahin? Noquen huetsabaan noque yohinon jato tsinquinonhue hahtihi bi tah man tininti janin demandandi cahi, nincacoinai tininti que ma bi. ² ¿Papan jihuetaiboxon man jatihibi janin jaibo pontequin jihuemayaxihqui man honanyamahin? ¿Jascapahbo man ponteyaxihqui bi man rahma nincacai teemabo man ponteti hahtipahyamahin? ³ ¿Papan yonotibo rihibi man pontejaquin yohiyaxihqui man honanyamahin? ¿Jascapahbo pontequin yohiyaxihquiboxon non rahma nete meha teemabo non pontequin yohiti hahtipahyamahin? ⁴ Noquen huetsabaan noque jistih

bi tah man jascapahbo joi romishin copi sinacananxon nincayosmabo janin demandani cahi.⁵ Hen mato yohihah rabinnahue. ¿Noquen huetsabo maanhiquinannanaiya, jato yohiti shinanya joni mato tocan yamahihquin?⁶ Jascatih bi ta huetsan jahuen huetsabi demandaniqui, nincayosmabo janinxoncabi.

⁷ Demandahanannanax tah man tiro-mascai. ¿Huetsan bichinnon jenquetsah-pahi man demandanxonma sca jascabi sca banenor jeneyamahin? ¿Jenquetsah-pahi man teneyamahin?⁸ Matobi tah man tiromahi. Man tah man yometsohtai, maton huetsanahbi.

⁹ Hohchayahpabo Papan jihuemaya-mayaxihqui ¿man honanyamahin? Paramehyamanahue. Joni huetsa betan hihquibo, santoyahpabo, queeyahpa betan hihquibo, benoyahpa haibo betan hihquibo, hahbe bebo hahmahibo, hahbe bebo hahcaibo,¹⁰ yometsohbo, yohuashihtaibo, pahenmisbo, tiromahi yohuanaibo, raquejaxon bichinaibo. Jascapahbo ta Papan jihuemaya-mayaxihqui. ¹¹ Jascapahbo tah man hihpahonihqui. Jascapahbo ta Papan mato sohuaxonnishqui. Mato ta yohinishqui, Mato tah man heen baquebo sca qui, hahquin. Noquen Hihbo Jesucristonen jahuen jimin maton hohcha copijani quen ta mato yohinishqui: Hohchajomabo sca tah man qui, hahquin. Dios Yoshiman rihbi jascajaquin. Jaa copi tah man huetsabo sca qui.

Non coirameti jai

¹² Hea queenai quescajati tah hen hahtipahi. Hahtipahxon bi tah hen texe hahyamahi, jaa texe hahan noquen shinan tiromati copi. Hen queenai quescajaquin hahtipahax bi tah hen jahuat-hon bi hea hihbojati hea queenyamahi.¹³ Piti ta piti qui. Noquen poco rihbi ta

hahqui piti naneti qui. Rabebi ta Papan queyoyaxihqui. Noquen yora ta joni huetsa betan hahan tsinitima qui. Noquen Hihbaanah sca tah qui, jaan hihbojati. Noquen Hihbo cahen noquen yora hihbo.¹⁴ Noquen Hihbo huenihh-ninixon ta noquen yora rihbi jahuen shi-naman Papan hueniyaxihqui.

¹⁵ Maton yora ta Cristonah qui. ¿Man honanyamahin? ¿Criston yora bihxon hahresti haibo hen hinantihin? Jahuentianbi.¹⁶ Hahresti haibo betan hihqui joni ta hahbetan huesti yora sca qui. ¿Man honanyamahin? Jaabo rabe ta huesti yora sca qui, hih ta huishani joi jaiqui.¹⁷ Noquen Hihbo betan hihqui joni ta hahbetan huesti yoshin sca jaiqui.

¹⁸ Tsiniti qui raquenahue. Huetsa hohchha jatihibi ta noquen yora qui hah-cama qui. Tsini joni ta jahuen yora qui bi hohchatihqui.¹⁹ Mato ta jahuen yoshin Papan hinannishqui. Maton yora chicho ta jahuen yoshin mato man-ahihqui. Maton yora ta jahuen xobo qui ¿man honanyamahin? Matonahma sca ta maton yora qui.²⁰ Copijaxon ta mato bijnishqui. Jaa copi noquen Papa queenai quesca man jihuetai honanahbo hihquish jihuenahue, ponte res.

Noquen hihquihinti betan jihueti

7 Quirica huishaquin man hea yocaho joi sca tah hen mato yohihi. Bebaan haibo bihyamaha ta siri qui.² Jaabi queejomahax man hohchati queenmis copi queeyahpascanahue. Jatihibi haibo rihbi beneyahpascanahue.³ Haiboyahpahax miin haibo qui hinamehhue, huetsan. Mia rihbi miin bene qui hinamehhue, chocan.⁴ Beneyahpahax tah min mihri miin yora hihboyamahi. Miin benen ta miin yora hihbojahiqui. Mia rihbi tah min mihri miin yora hihboyamahi, huetsan. Miin haibo ta miin yora hihbohiqui.⁵ Miin bene haibo queenaiya, Hen ta

queenyamahi, hihyamahue, chocan. Miin haibo bebo queenaiya, Hen ta queenyamahi hihyamahue, huetsan. Papa hihti yocanoxon jatifi nete hihyamaparinonhue hihqui rabexonbi shinanax pari jascanahue, basima. Jaa pecaho rabebi hihresscaribibi. Maton hihquihinti betan hihyamahiton Satanasnen mato hohchamamis hihquish, jascanahue.

⁶ Maton hihquihinti hoxaquihnya-manahue hah ta hen mato jayamahi. Hen mato yohihi quescajati queenaibo res jascanon. ⁷ Hea hihqui quesca man jatihibi japhanion. Jaabi ta Papan hinanihqui, hihquihintiyahpabo janon, jayajomabo jaribinon. Huetsan ta jahuena bichiqui. Huetsan rihbi jahuenah.

⁸ Queejomaboya yononmabo sca tah hen yohihi: hea hihqui quescajati hihquish tah man siripi jihuetahi. ⁹ Jaabi, teneti hahtipahyamaxon maton haibo benanahue heen huetsabaan, maton bene rihbi heen chocabaan. Hisinaxcamahi haibo hihti queenah ta tiromaqi. Jaa tiromahi bi ta matonahbi maton haibo bichí siri qui.

¹⁰ Queeyahpaboya beneyahpabo sca tah hen yohihi, heen joima bi Papan joi yohiquin. Beneyahpaxon miin bene potayamahue, chocan. ¹¹ Miin bene potahax huetsa bebo betan hihyamascahue. Bebo queenax miin bene xeni betan hihribihue. Mian rihbi miin haibo potayamahue, huetsan.

¹² Texe tah hen yohihi. Noquen Hihbaanma bi hean. Nincacoinyamahax bi mihibetan jihuetaiton miin haibo potayamahue, noque huetsan. ¹³ Miin bene rihbi nincacoinyamahax bi mihibetan jihuetaiton potayamahue, chocan. ¹⁴ Min nincacoinai copi ta Papan miin bene shinan hinantihiqui. Min nincacoinai copi rihbi ta miin nincacoinyamahi haibo Papan shinan

hinantihiqui, noque huetsan. Jasca copi ta maton baquebo rihbi shinan siri hinantihiqui. Jascayamahah cahen maton baquebaan Papan shinan siri bihyamahah. ¹⁵ ¿Nincayosma beban jahuen haibo potabahinaiya cahran? Cacatsihquish jan catannon. Jascapahton potahah ta jahuen haibaan chibantima sca jaiqui, queenyamaxon. Jasca rihbi nincayosma haibaan noquen huetsa potahax cacatsihquish, jan catannon, jahuen benen chibantimascai. Non maanhiihquinanaxma jihuenon ta noque Papan yohinishqui. ¹⁶ Mia copi rah ta miin benen nincacointihiqui, chocan. Mia copi rihbi rah ta miin haibaan nincacointihiqui, huetsan.

¹⁷ Noquen Hihbaan mia hinanai betan jihuetahi. Hahbetan jihuexon nincacoinascaax hahbetanbi jihuetahi. Jascaya tah hen jai, jatihibi janin Papan baquebo jihuetahi yohiquin. ¹⁸ ¿Hahan judio honantiyahpa hihxon min nincacoin sca janiquin? Jaa hahan judio honanti potaquin tanayamahue. ¿Jaa honantiyahpajomaxon min nincacoin sca janiquin? Jaa honantiyahpati queenyamahue. ¹⁹ Jaya hihqui ta jahuama qui. Jayajoma hihqui jahuaribibi. Papan joi res tah non nincati jai. ²⁰ ¿Jahua jonixon min nincacoinnihquin? Jaa noquebo rihbi jascabi jahue. ²¹ ¿Patoronen joni hihxon min nincacoin sca janiquin? Jasca rihbi jahue. Jascapa jonihax bi miin cuenta copijati hahtipahax patorojoma sca jihuetahi. ²² Hina hihxon bi noquen Hihbo nincacoinascaax tah min hina hihyama sca jai, noquen Hihbaan pico-hah. Jasca rihbi patorojomaxon bi nincacoinax tah min Criston joni sca qui. ²³ Copijaxon ta mato bijnishqui. Jonibaan mato hihbojayamanon jato qui hinamehyamanahue. ²⁴ Nincacoinax man jani quescajati janahue, heen huetsabaan, Papan yanapanah.

²⁵ Benejomabo sca tah hen yohihi. Noquen Hihbaan yohini joi mato yohiti yamahi bi tah hen noquen Hihbaan yanapanan shinanquin sirijaxon hean mato yohihi. ²⁶ Noque rahma tiromajacatsihquibo copi ta man rahma jai quescari jascabi jaah siri qui. ²⁷ ¿Mia queeyahpa hin? Miin haibo jeneti shinanyamahue. ¿Mia queejoma hin? Haibo benayamahue. ²⁸ Jaabi tah min haibo bichish hohchayamahi. Haibo rihbi jahuen bene betan hihquish hohchayamahi. Hohchataxma bi tah man hohmis hohmistihi. Jaa copi tah hen mato yohihi.

²⁹ Basimahax res sca ta tiroma netebo nocotihiqui hih ta hen jai, hea huetsabaan. Jaa copi haiboyahpahax bi haibojoma quescapahax jihuenahe. ³⁰ Benataibo benayamahax quescapi jihuenahe. Coin coinaibo coin coinyamahax quescapi jihuenahe. Marohibo maton jahuabora yamahihcamahi jihuenahe. ³¹ Teeyahpabo tee yamahi quescapi jihuenahe. Noquen hihti quescayama sca tah non jatihi.

³² Man masa shinanyamanon hihxon tah hen mato yohihi. Queejoma jonin ta noquen Hihbaan joi shinanihqui. Noquen Hihbaan yohihi quescabijati shinanquin. ³³ Queeyahpa jonin ta jahuen teebo rahma hahti shinanihqui,bihxona jahuen haibo jenimanon hihxon. ³⁴ Noquen Hihbo huesti janin ta jahuen shinan camayamahihqui. Xontaconen ta noquen Hihbaan yohihi quescabijati shinanihqui. Benejoma haibaan jascajaribiquin. Jaton yora jaton shinan rihbi mequejaquehcatsihqui. Beneyahpa haibaan ta jahuen teebo hahti shinanihqui, jahuen bene jenimanon hihxon.

³⁵ Maton hihquihintibo man jenenonma bi man honanon hihxon tah hen mato yohihi. Man sirijaquin shinannon hihxon tah hen yohihi,

noquen Hihbo huesti man shinannon hihxon.

³⁶ Min hinanah bi jahuen benejahtinin bihyamatatahbahi miin haibo baque yoxabocatsihscrai jisxon hinancatsihquin hinanhue queenxon. Hinanah ta tiromama qui. ³⁷ Jahua copi hinanti yamahiya, shinanquin sirijaxon hinanyamati queenxon rihbi haibo rihbi huanoti queenyamahiya miin baque xontaco hinanyamahue. Hinanyamahah ta hashoan siri qui. ³⁸ Miin haibo baque hinanah siri. Hinanyamahah hashoan siri rihbi.

³⁹ Jahuuen bene mahuanon caman ta jahuen haibo hahbetan hihti jaiqui. Jahuuen bene muhuateiya huetsa bebo bihtiscai. Nincacoinai bebo res ta bihtihiqui. ⁴⁰ Jaabi ta yonomma banetah hashoan siri qui, hen mato yohihah quescas. Dios Yoshiman hea shinanmaha tah hen yohihi, hih tah hen jai.

Santo rehtexona nami non pitihin

8 ¿Santo rehtexona hina nami cahran? ¹ ¿Non pitihin? Non tah non honanai, hih tah non jai jatihibi. Non tah non honanai hihxon tah non shinan hicha-jaquin bi quesajah. Huetsa jonihon shinanxon hahxonquin tah non noquen shinan hichajacoinai. ² Honan tah hen qui, hihxon tah min honanyamatahbahi, honantihbi. ³ Papahon min shinanaiton ta jaan mia honanscainqui.

⁴ Jaa copi tah hen mato yohihi: ¿Santo rehtexonai nami non pitihin? Santo ta jahubima qui. Papa huesti ta Dios qui. Non tah non honanai. ⁵ Dios hahcaibo ta jaiqui, naihoh, main rihbi. Jascapa diosbo hichahi. Hihbo hahcaibo rihbi ta jascari qui, hichahi. ⁶ Noquenah ta huesti res qui, Dios, noquen Papa. Jaan shinanah cahen jatihibi jai. Jatihibi tah non jahuenahbo qui. Noquen Hihbo rihbi cahen huesti res, Jesucristo. Jaan

yohihah cahen jatihibi janish. Jaan ji-huemaha cahen noque jihueta.

7 Jaa hen mato yohihi ta caibaan honanyamahihqui. Jano santo jaiton haninikhxon ta Santo rehtexonaibo nami tah qui, hihxon bi caibaan pihiqui. Pitimahi shinanax, Hohcha ta hen jai, hihresscái, pihax sca. **8** Pitimabo pihax tah man hohchayahpa qui hah ta Papan noque jayamahiqui. Pitimabo piyamahax tah man siribo qui hah ta Papan noque jayamaribihiqui. Jascapa nami piyamahax bi tah non jascabi jai. Pihax cahen jascarihbibi. **9** Queenxon piquin. Queenyamaxon piyamaquin. Pixon bi coirannahue, noquen huetsa man tiro-mamamis. Man pihí jisxon ta jaan ri-hbi sca pihax jaan shinana pitima que bi pihax hohcha tah hen jai hihquish noquen Hihbo betan siripi nihyamas-catiliqui. Pixon cahen masa shinanscaquin. **10** Santobo ta jahuama qui hi-hxon mian santo xoboho pihí tsahotai bi mia janó meraxon ¿santo rehtexonaibo pitima hean rihbi pipan jan jatimahiquin? **11** Jascahax ta mian pihí jisxon jahuen pitima pihax noquen huetsa masatihiqui, jahuen hohcha copi Cristo mahuani que bi. **12** Jascajati que ma bi tah min jascajaquin miin huetsa jahuen pitima queenmatihi, rishquihah quescajaquin jan masa shinanscanon. Jaan pitima que bi piti shinan hinani tah min hahqui hohchatai. Cristo qui ri-hbi hohchatai. **13** Jaa copi tah hen Hea jisxon ta heen huetsan noquen Hihbo jenebahintihiqui hihxon hean jahuentianbi nami piyamahi. Jascapahbo piti hahtipahxon bi cahen hean piyamaquin, heen huetsa hean hohchamamis hihxon.

Papan raantibaan yocati hahtipahbo

9 Hahtipahxon bi tah hen piyamahi. **Shinannahue:** hea tah hen Criston raanti joni qui. Noquen Hihbo Jesus tah hen heanbi jisniqui. Hean yohi-

hah tah man noquen Hihbo qui hinamehniqui, jahuen baquebo sca. **2** Hea jahuen raanti man honanai bi ta caibaan honanyamahiqui. Mato tah man hahan honanti qui, noquen Hihbaan raanti hea hihqui honanahbo.

3 Jaama tah min qui hihnicahbo tah hen yohihi, nescajaquin: **4** Nincacaibaan mato pimanon, mato xehamanon, ¿heen joi jato yohitannahue noquen Hihbaan hea jayamanishquin? **5** Huetsa jahuen raantibo hihqui quescari, noquen Hihbaan jochicabo hihqui quescarihbibi, Cefas rihbi hihqui quescarihbibi ¿non noquen haibo betan nihti hahtipahyamahin? **6** ¿Hea, Bernabe, noque rabe res non tee teexon pari piti noquen Hihbaan noque yohinishquin? ¿Man jascajaquin shinanain? **7** ¿Copijaha ma bi tsoa sontarohi catihiquin? ¿Jahuen bimi piyanoxonma bi tsoan huaijahiquin? ¿Jaton xoma jene pishca bihyamahue hahca tsoan sca ganado coirantihiquin? **8** Heanbi shinanax yohuanai shinan rah tah man jai. ¿Noquen Moisesnin joi janin jascapa yohuan yamahihquin? **9** Moisesnin ta huishanishqui: Xehmemanoxon bana bero jamamaquin miin toro cotaneyamahue, hahquin. ¿Torohon shinanaxon Papan jascajanishquin? **10** ¿Noquen non honannon hihxon res yohiyamanishquin? Non honannon hihxon ta huishamanishqui. Huai bananica ta yohinishqui, bimi piyanoxon jan huaijanon. Bimi tsinquinica rihbi ta yohinishqui texe piyanoxon jan tsinquinon. **11** Banaquin hahcajaquin non mato Papan joi hinannihxon ¿bimi tsinquinque hahcajaxon sca texe maton tee non bihtimahin? **12** Jascajati ta jaiqui. Texe maton tee bihti caibo jaiya ¿noquen sca non hashoan sca bihtimahin?

Noquen bihti jai bi tah non maton tee bihyamahi. Bihti hahtipahxon bi tah non non bichiya caibaan nincacoinyamamis hihxon non jatihibi teneresai.¹³ Papan xoboho teexonaibaan ta janoha piti pihiqui ¿man honanyamahin? Papa hinanquin hinabo rehtexonquin yana-panaibaan rihbi ta jaa hina nami pihiqui ¿man honanyamahin?¹⁴ Jascajaribiquin ta jahuen joi siri non mato yohihah man jai romishin man noque hinanti noquen Hihbaan yohinishqui, non hahan jihuenon.¹⁵ Papan joi mato yohinixon bi tah hen mato cobranyamahi. Jahuabi cobranyamanoxon rihbi tah hen rahma huishahi. Mahuanoxon caman tah hen jahuabi copi yocayamahi, Papan joi mato yohiquin tah hen mato cobranya-manihqui mato jayanoxon.

¹⁶ Papan joi siri yohinish bi tah hen Papa bebon sca jahua copi yohuan yohuanti yamatihu, hen hahnibo yohi-catsihquin. Papan yonohah tah hen joi siri yohihi. Jaa copi tah hen Papan joi siri yohiyamahax Hahraai hih hen jatihihi.¹⁷ Heabi yohiti queenxon joi siri hen yohihiya ta Papan hea copijatihiqui. Yohiti queenyamaxon bi cahen jaabi yohihan, yonohah copi. Papan yonohah can.¹⁸ ¿Yohihax res sca hen jahua Jain? Yohixon tah hen nea honan jai. Cobranti bi cobranxonma hean yohihi tah hen honanai.

¹⁹ Mato jatihibi cobranti hahtipahxon bi tah hen jatihibi joni hahxonresai. Hashoan hicha jonibo nincamanoxon hahxonresquin.²⁰ Judiobo nincamanoxon tah hen jato tocan judiobo quesca sca jai. Moisesnin huishani joiyahpabo nincamanoxon jato tocan jaa joi hahnica quesca sca jai, hean nincati joi que ma bi.²¹ Moisesnin huishani joi honanyamahibonincamanoxon cahen jato tocan jaa joijoma quesca sca jai, noquen nincati Papan joi hahnica hihquish,

Criston joi hahnica hihquish.²² Coshijomabo nincamanoxon tah hen jato tocan coshijoma quesca sca jai. Jatihibi jonibo nincamanon cahen jaabo hihqui quescaribibi hea rihbi jai. Caibo teehihmanoxon tah hen jascajahi.²³ Criston joi siri nincamanoxon copires tah hen caibo hihqui quesca hea jai, Cristo betan teenica sca janoxon.

²⁴ Tsoa pari non nocotihin hihquish ta bishquihhnicalbo hishtohihqui. Jatihibi hishtocanahax bi huesti res nocomenohi, nocomenonicaton maitibihnoxon. ¿Man honanyamahin? Nocomenonoxon hahcajaquin janahue.²⁵ Jaton coshi tananannicahbo ta yobacahinxon jatihibi teneti haxehihqui. Payonica jahuaborabihnoxon ta teneti haxecaniqui. Noquen cah non payoyosma jahuaborabihnoxon non tenetih. ²⁶ Ponte res hishtocanahihcama tah hen jai. Nihue res rishquiquin hahcajajama tah hen jai.²⁷ Teneti haxenoxon tah hen heabi rishquitai, hean shinanai quescajati hahtipahnoxon. Caibo hean Papan joi siri nincamanish bi potabohanah sca hen jamis hihquish tah hen jascaquin teneti haxehi.

Santo qui non coirameti jai

10 Honannahue, hea huetsabaan. Noquen xenibo ta jatihibi hoa nai cohin naman nihpahonishqui. Hian joshini rihbi ta jatihibi pohquejaquenishqui.² Moises chibanahbo hihxon ta Papan jato nashimaquin hahcajaquin nai cohin naman jascajaquin huinomanishqui. Jascajahabo jaa hiaman jato po-hquenquin.³ Papan hinana piti ta jati-hixonbi picannishqui.⁴ Jaan hinanah cahen jene nomicanquin. Papan bahimahah macaman mehax jabatai jene xehacanquin. Cristo ta jaa macan hih-nishqui.⁵ Jato xehamaxon bi ta Papan

jato tiromabohi jisnishqui. Jaa copi ta jato mahuamabahinnishqui nihi naman.

⁶ Noquen non honanon hihxon ta jascajaxon Papan huishamascanishqui, jaabo tiromajati jenipahihni quescayamahi non tiromajati jenipahiyamanon hihxon. ⁷ Jato yohihi ta nescajaquin huishanishqui: Pihi ta jonibo tsahopaquequivi, xehahi tsahocani. Pihax ta shirohi sca huenicahuancaniqui hahquin. Jaabo jascari santoyahpa japahoni quescayamanahue. ⁸ Joni huetsa betan tsinihi hihnibo quescayamanahue. Joni huetsa betan hihquish ta huesti neten res veintitres mil mahuanishqui. ⁹ Hihcoin cahra jaiquin hihxon noquen Hihbo tanahax ta mahuaribicanishqui, ronon pihah. Noquen Hihbo tananibho quescayamanahue hih ca hen jai sen. ¹⁰ Reren rerenaition ta queyonicaton jato queyonishqui. Reren rerennihbo quescayamanahue.

¹¹ Non jascari hohchayamanon hihxon ta Papan jato jascajaquin casticanishqui. Nete queyoti hochoma noque chini jihuetaibaan honanon hihxon ta jaa joi huishamanishqui. ¹² Jaa copi coiramehue: ponte min nichi shinanax bi min hohcha qui paquemis. ¹³ Jatihibi jonibo jan tanahi quescajaribiquin ta tiroma yoshiman mato hohchamaquin tanahihqui. Jan mato jascajahi bi ta tsoan tenenihma Papan mato huinomatumahiqui. Jaan yohini quescabijaquin ta mato hahxonihqui, mato paxajaquin. Man tenecasquimati ta mato huinomayamahiqui. Tanahah bi man tantiribiti ta mato hinantihiqui, man teneti hahtipahnon hihxon.

¹⁴ Jaa honanax sca santo yocati ni shinanti bocabi queenyama sca janahue, hea huetsabaan. Hihti queenyamanahue. Matohon shinanaxon tah hen yohihi. ¹⁵ Mato tah man shinancoinaibo qui. Hen yohihi

jenquetsahpa quin? shinannahue.

¹⁶ Criston noque haxemani quescajaquin tah non Mia copi tah non xehahi, Hihbon hahxon non xehahi. ¿Noque copi Cristo mahuanih shinanaibo rahsixon non jascajaquin xehayamahn? Non tehcaxon hinanpaquehi paan ta jascapah rihbi qui. Noque copi jan yorayahpahax mahuati joni honancoinaibo rahsixon tah non jascapa pihi. ¹⁷ Huesti tonco tehcapanquexon tah non jatihixonbi pihi. Jascarihbibi ta noque hichahax bi huesti yora qui, huesti piti tonco jai quescarihbibi.

¹⁸ Moisesnin yohihah israelibaan hahcái sca shinannahue: Papa Dios hinanquin ta jaton hina pishca rehtexon picanihqui. Jaton hohcha copi jaton hina mahuatai hihxon cahen picanquin, jaton hina betan huesti yora hihnoxon. ¹⁹ Hen yohihi jahua hihcatsihquiquin honannahue. Santobo ta jahuama qui. Santo rehtexonaibo ta jahuama rihbi qui, nami res. ²⁰ Jascapahbo jahuamabo que bi ta tiroma yoshinbo rehtexonquin hihxon Cristo qui hinamehyamhibaan jaa nami pihiqui. Jascapa piti ta noquen Panahma qui. Tiroma yoshinbaan joniho quescapahbo man hiyamanon hihxon tah hen mato yohihi. ²¹ Papan xehati xehaxon tah man tiroma yoshinbaana rihbi xehatimascai. Papan piti pixon tah man tiroma yoshinbaana rihbi pitima sca jai. ²² ¿Noquen Hihbo non sinamacatsihquin? ¿Noque non jaa mentan hashoan coshi quin? Shinannahue.

Joni huetsahon shinanax coirameti

²³ Queenxon piti hahtipahxon bi tah non caibo piti non piyamahi, jaa pihá siriyamahi quen. Non queenajati hahtipahxon bi cah non joni huetsa tiromajati queentimahi. ²⁴ Mia res siripi jihuinoxonma bi caibo sirinon hihxon jise.

²⁵ Nami maroxon yocacahxonma pireshue, santo rehtexonaibo hin

hihxonma. ²⁶Noquen nete jatihibi ta noquen Hihbaanah qui. Jatihibi main jaibo rihbi jahuenah.

²⁷Nincacoinyamahibaan mato Pihi benahue hahca picatsihquish botannahue, mato hinanai piti jatihibi yocacahxonma piresquin. Santo rehtexonaiboma hin hihxonma. ²⁸Nea ta santo rehtexona nami qui, noque huetsan, jaiboya piyamascaquin. Jaa noquen huetsa copi piyamaquin, jan masa shinanmis hihxon. ²⁹Mianbi min jaa nami pixon masa shinanyamahi bi mian piquihina noquen huetsan masa shinanmis hihxon piyamaquin.

Jascapa nami jaan pitimahi copi tah non piquin jeneyamahi. Non piquihina jascapa pihax jaa hohchatai copi tah non jenetih, piyamascaquin. ³⁰Mia copi tah hen pih Papan hihxon hean res piliya ta jahua copibi huetsa hehqui yohuantimascatihiqui, Papan hea hinanai piti quen. ³¹Jaa copi piquin, xe-haquin, man hahcái jatihibi jaquin, noquen Papa hihti shinanyahpa hi honanahbo janahue, jatihibi. ³²Jahua copi bi mato caheti yamanon janahue, judioaan jisí hahqui yohuantimabó. Jaton nahuabaan jisí jasca rihbi. Papan caisai noquen huetsabaan jisí jasca rihbi. ³³Jatihibijaquin tah hen jatihibi jonibaan sirijaquin shinanahbo hihxon hen hahcái. Hea res siripi jihuenoxonma bi caibo siripi jihuenon hihxon tah hen hahcái, hicha jonibo Papan teehihmanon hihxon.

11 Criston hahcái quescajaquin tah hen jascajahi. Jascajaribiquin hean hahcái quescajanahue.

Tsinquitaibo tocan jenqueti haibobo jai

²Hen mato yohini joi tah man shinanbehnoyamahi. Jaa copi tah hen jenimahi. Hean mato honanmapahoni quescaja tah man jai rahma caman.

³Man jascajahi bi tah hen nea yohiscái, man honannon hihxon: jatihibi bebo yononica ta Cristo qui. Haibaan yononica ta jahuen bene qui. Criston yononica ta noquen Papa qui. ⁴Rabinnoxon pari ta bebaan maiti maihahnan Papa yocatihiqui, jahuen mapo qui hihtimahscái, haibocatsihqui quescari. ⁵Haibaan cahen jahuen mapo mahpoxonma bi Papa yocacax jahuen mapo qui rabiniti jai, bebaan hahcajaquin yocacax. Mahpoxonma Papan joi yohihax cahen haibo hahqui rabinti jaresscái, mamapoxonma yohihax. Maxcorohaquin mancojabahina quescaha tah qui. ⁶Mahpocatsihyamaxon min boo maxcorohabahinmahue, haibon. ¿Haibo mancoyati hihtimahtimahiqui? ¿Haibo maxcoroyati hihtimatimahiqui? Mancoya quescayamanoxon mahpóhue, haibon. ⁷Bebo ta mahpotimahiqui. Bebo ta jaa jisxon Papa Dios jahuen hihbo jai shinanti qui. Jaa jisxon tah non Papan shinan noquen honanai. Haibo ta jaa jisxon jahuen benen jaa hihbojahi non honanti qui. ⁸Haibaan pishi xao ta Papan bebojayamanishqui. Bebaan pishi xao cahen haibojanish. ⁹Haibaan bihnon cahen bebojayamanish. Bebaan bihnon caya haibojaque. ¹⁰Jaa copi ta haibo mahpoti jaiqui, hihboyahpahi honanahbo. Papan yonotibaan rihbi siri jisnon. ¹¹Haibo mahpónica hihquish bi ta bebo hihqui quescari qui, hahbe shinanyahpa. Bebo jascarihbih, haibo hihqui quescari, hahbe shinanyahpa. ¹²Bebaan pishi xao ta haibojanishqui. Jascarihbih cahen haibo quehax sca bebo cainscái. Jatihibi caini, Papan shinanaiya.

¹³Yocacahananscanahue joni huetsa shinanmanoxon hihxon ¿Mahpoxonma haibaan noquen Papa yocacah siri quin? ¹⁴⁻¹⁵Boo chaiya bebo rabintihi bi haibo boo chaiya siri, ¿maton shinamanbi man honanyamahin? Jahuen boo ta jahuen

mahpoti qui, Papan hinanah. ¹⁶ Huetsa shinanyaxon honanhue: huetsa noquen hihti joi tah non yamahi. Huetsa jaton hihti ta noquen huetsabo rihbi yamahihqui.

Piquin bi tiromajahibo

¹⁷ Huetsa joi sca hen mato yohi-
non. Sirija tah man jai hah ta hen
mato jayamahi. Shinan bihnoxonma tah
man tsinquitai. Tiromacananoxon can.
¹⁸ Noquen Hihbohon shinanax man tsin-
quitax caibo huetsa shinanya hihnon
caibo rihbi huetsa shinanya man jai tah
hen nincacai. Jasca coin rah tah man
jai. ¹⁹ Jahuemehabaan sirijaquin shi-
nanihquin honanahbo rah tah man jas-
cari joi bichinnanai. ²⁰ Jaa copi tah man
piquin bi noquen Hihbaan noque yohini
quescajaquinma man pihi, tsinquixon.
²¹ Picatsihxon tah man joni huetsa man-
axonma matonahbi man piresai. Huetsa
pihan hihnon ta huetsa pahenihqui.
²² ¿Jiricatsihxon picatsihxon hahoxon
piti xobo man yamahin? ¿Papan cai-
saibo jistahihmaxon man pitijomabo ra-
binmahin? ¿Jahua hen mato yohitihin?
Sirija tah man jai hah hen jatihin?
Hahyamabiresquin.

Noquen Hihbaan noque yohini piti (Mt 26.26-29; Mr 14.22-25; Lc 22.14-20)

²³ Noquen Hihbaan yohihah ta hean
sca mato yohinihqui, jaabi rihbi. Ju-
dasen jaa paranxon porisia bihmanox-
ihqui yame ta noquen Hihbo Jesusen
jahuen haxenicabo yohinishqui. ²⁴ Posen
pari bihxon Papa yohixon tehcxon,
Nea ta heen yora qui. Man jihuemon
hihxon tah hen hehri jato rehtemahi.
Hea shinanxon pinahue, hah cahen jato
janish. ²⁵ Jaabijahiboya sca tason bi-
hxon jascajarihbiquin. Behna sca tah hen
mato hahxontijaquin yohihi. Jahu-
tianbi hen huetsajatimahi honanahbo
tah hen heen jimi potahi. Heen jimi shi-

nanti ta nea xehati qui, xehanahue. Man
xehahi tian tihibi jascajanahue, hea shi-
nanxon, jato jaquin. ²⁶ Jahuen piti pixon
jahuen xehati rihbi xehaxon tihibi tah
man jismahi, mato copi maton Hihbo
mahuani jisfbo. Jan jonon caman jasca-
jaquin jismanahue.

Jenquetsahaquin non pitihin

²⁷ Jaa copi ta shinanyamaxon man no-
quen Hihbaan piti piresxon jahuen xe-
hati rihbi man xeharesah tiroma qui,
noque huetsan. Noquen Hihbaan yora
jahuen jimi rihbi cah man jahuama
quescajahi. ²⁸ Shinanquin sirijaxon jaa
piti pihue, jaa xehati rihbi xehaquin.
²⁹ Pixon xehaxon bi Criston yora copi
man pihi shinanyamaxon tah man Papan
mato tiromajanon man jai. ³⁰ Jaa copi
tah man hicha yora yosmahi, caibo rihbi
hisini. Caibo rihbi cahen mahuascaibo.
³¹ Noquebi non pontejananaiya cahen
noquen Hihbaan noque casticanyma-
han. ³² Noque pontequin ta noquen Hih-
baan noque casticaniqui, mai mehaboy-
abi noque casticanymayaxahnnoxon.

³³ Jaa copi pihi tsinquitax manahah-
nannahue, heen huetsabaan. ³⁴ Pihan hi-
hxon maton xobohoxon pari pihi yani-
nhue. Tsinquixon sca piquin sirijaquin.
Tiromahiton noquen Hihbaan mato cas-
ticanmis hihxon tah hen mato yohihi,
hea huetsabaan. Texe man hea yocahoh
tah hen mato qui nocoxon sca yohitihi.

Dios Yoshiman noque hinanai shinan

12 Dios Yoshiman noque hinanre-
sai sca tah hen mato yohicatsi-
hqui, heen huetsabaan, man honannon
hihxon.

² Maton tah man noquen Papa
honanyamapahonihqui. Jenquetsaha-
ra jaquin mato paranquin ta maton
caibaan mato haxemacanishqui,
yohuanyosma santobo man yocanon.

³ Jaa copi tah hen mato yohihi:

Jesus Diosen queyopahinon hih ta tsoabi jatimahiqui, Dios Yoshiman shinanmahah. Man honanon hihxon tah hen mato yohihi. Dios Yoshiman shinanmayamahah ta Jesus ta noquen Hihbo qui hih tsoabi rihbi jatimahiqui.

⁴ Jaa huesti Dios Yoshin hihxon ta mesco shinan siribo noque hinanpaquehihqui. ⁵ Mesco tee rihbi non jai bi tah non jatihibi jaa Hihbo huestiya qui. ⁶ Mesco teebo non hahnon ta jaa huestichin noquen Papan noque mesco coshi hinanpaquehihqui, non jatihibijanon. ⁷ Non joni huetsa coshijanon ta jahuen shinan Dios Yoshiman noque hinanpaquehihqui. ⁸ Shinanyah-pahax yohuannon ta caibo rihbi jaa shinan hinanihqui. Honan joi yohinon ta caibo rihbi jaa honan hinanihqui, jaanbi. ⁹ Shinancoinxon Papa Dios yocanon cahen caibo sca shinancoinxon yocati shinanbo rihbi hinanquin. Caibo rihbi sca joni huetsa rohajati hinanquin. ¹⁰ Caibo rihbi sca hinanquin, tsoan jascajani que ma bi Papan coshiyaxon hahti. Caibo rihbi sca hinanquin, Papan yohihi joi chaniti. Caibo rihbi sca honan hinanquin, jan merahi jenquetsahpa yoshin hin honanti. Caibo rihbi sca hinanquin, huetsa join yohuanti. Caibo rihbi sca hinanquin, nincacahbo yohuanxon mahnexonti honanti. ¹¹ Jascapahbo mesco hahxontibo ta jaanbi noque shinanmahiqui, Dios Yoshin huestichin. Jaanbi shinanxon ta noque hinanpaquehihqui.

Jahuenahbo rahsi non hihqui

¹² Noquen yora huestihax bi ta noquen mequenbo, noquen tahebo huestima qui. Jascarihbibi cahen noquen tahebo noquen mequenbo hichahax bi noquenah rahsi hihqui quescarihbibi noque jai, Cristonahbo rahsi. Noque cahen jahuen tahebo, jahuen mequenbo quescia, jahuenahbo.

¹³ Noque jatihibi hichahax bi

huesti yora janon ta Dios Yoshin huestichin noque nashimahiqui, Noquen caibo, noquen nahuabo, patoroyahpabo, patorojomabo, noque nomimapaquequin hahcajaquin ta noque coshi hinanihqui, Dios Yoshiman.

¹⁴ Noquen yoran mehabo mesco hi-hqui bi cahen jascapahbo rahsima. ¹⁵ Hea ta mequenma qui. Jaa copi tah hen yoran mehama qui hih noquen tahe jai que bi cahen jascabi noquen yoran meha jaquehahna. ¹⁶ Hea ta beroma qui. Jaa copi tah hen yoran mehama qui hih noquen pabinqui jai que bi cahen jascabi noquen yoran meha jaquehahna. ¹⁷ ¿Bero rahsi noquen yora hihxon cahran jahuatohon nincatihquin? ¿Pabinqui rahsi noquen yora hihxon cahran jahuatohon xehatihquin? ¹⁸ Shinanquin sirijaxon ta noquen yora Papan niahahnishqui, noquen berobo noquen pabinquibo noque hinanquin. ¹⁹ ¿Poyan rahsihax cahran jahuen noquen yora jatihiquin? ²⁰ Jaa copi ta noquen tahebo, noquen mequenbo hichahax bi jatihibi jaa yora huesti qui.

²¹ Hea tah hen miama qui. Jaa copi tah hen jahuama qui hah cahen noquen beron noquen mequen jatimahi. Hea ta matoma qui. Jaa copi tah hen hea jahua hihtimahi hah cahen noquen mapon noquen tahe jatimaribibi. ²² Jascayamabiresi. Noquen coshimabio cah non hashoan pishinai. ²³ Non siriymahi shinanai noquen yora mehabo tah non siri hihnon chopa sahuehi. Noquen jistimabio rihbi cah non chopan mahpohi. ²⁴ Noquen jistibio ta mahpoti pishinyamahihqui. Papan ta noque niahahnishqui, noquen yoran meha coshiyamahibo siribo jaquin. ²⁵ Jaa copi ta huesti yoran mehabo jaabo rahsibi rehtenantimahiqui. Jatihxionbi jaton hahbe yoran mehabaan shinanquin. ²⁶ Jaa yoran meha huesti yomanahtaiya ta jatihibi

hahbetan yomanahiqui. Jaa yoran meha huetsa qui siripi yohuanaiya cahen jatihibi hahbetan jenimaribih.

²⁷ Criston yora sca tah man qui, mescohax bi jaa yoran meha rahsi. ²⁸ Mesco tee ta Papan yohihiqui, caibo cahen jahuen raantibo janon. Jaatian sca cahen jahuen joi yohixonnicaahbo janon. Caibo cahen honanmanicahbo janon. Caibo cahen tsoan jascajanimah hahnicaahbo. Caibo cahen rohajanicahbo. Caibo cahen yanapannicahbo. Caibo cahen teemanicahbo. Caibo cahen huetsa join yohuannicabo. ²⁹ ¿Jahuen raantibo rahsi non quin? ¿Jahuen joibo yohinica rahsi non quin? ¿Honanmanicahbo rahsi non quin? ¿Tsoan jascajanimah hahnicaahbo rahsibo non quin? ³⁰ ¿Rohajaniceahbo rahsi hihnon Papan noque hinanihquin? ¿Huetsa join yohuannicabo rahsi noque quin? ¿Joi mahnexonicahbo rahsi noque quin? ³¹ Hihyamahi. Jascayamahi bi Hihbo hahxonnoxon jahuen hashoan siri hinantibo queenahue. Hashoan sirijahti rihbi tah hen mato rahma yohiscanoxihqui.

Joni huetsahon shinanti

13 Joni huetsahon shinanaxma bi jonibo jai quescarax yohuanax cah hen cororesan. Joni huetsahon shinanyamahax bi Papan yonotibo jai quescarai yohuanah cah hen corothcamahan. Jihui behman rishquihah peenhahcacamahi. ² Jayaxihquibo yohiti honan jaxon, jatihibi jone joi rihbi honanxon, jatihibi honan rihbi jaxon, mahchibo potahahtanti hahtipahnoxon caman shinanax bi joni huetsahon shinanyamahax cah hen jahuamascan. ³ Hena jatihibi hinanresax, heen yora rihbi mapojahabo hen hinamehxon bi joni huetsahon shinanyamaxon cah hen jahuabi bihyamahan.

⁴ Joni huetsahon shinanax tah non jatsanti tenetih. Joni huetsahon shinanax cah non jato hahxonan. Notsi notsiyamarihbithi. Caibo muuinax jaya joihi nihyamahi. Joni huetsahon shinanax cah non yohiresyamahan; nincaribihan.

⁵ Joni huetsahon shinanax cah non jato sirijaquin yohuanquihntihi. Noquenahbi res benayamarihbiquin. Histon rainyamayamahi. Copiti shinanyamarihbiquin. ⁶ Tiromahiboya jenimayamahi. Sirijahiboya jenimahi.

⁷ Joni huetsahon shinanax cah non hahqui jatsanyamahi. Jaan ta jahuentianbi shinanquin sirijatimahiqui hihyamahi. Sirija ta jatihiqui hihqui. Jascaxon teneresquin, jatihibi noquen huetsabo tenequin.

⁸ Joni huetsahon shinanax hahxonti shinanbo ta queyoyosmabo shinanbo qui. Caibo shinanbo cahen jascayamahi. Jayaxihquibo yohiti ta yamacayaxihqui. Huetsa join yohuanti yamascai. Haxeti honan yamascatihi. ⁹ Rahma tah non honanquin bi pishinmahi. Yohiquin bi tah non pishinmaribih. ¹⁰ Noquen Hihbo janin tah non pishinyamascatihu. Honancoinax jahuabi haxeti pishinyamascrai. Jaa copi ta non rahma hahquin bi pishinmahi shinanbo yamacahinscayaxihqui.

¹¹ Baquehax tah hen baque quescarai yohuannihqui. Baquen hahcai quescaribijaquin tah hen shinapahonihqui. Baquen hahcai quescajaquin rihbi yohiquin. Beboscaxon cahen baquebaan hahcai quescapahbo jenebahinscrai.

¹² Rahma tah non bahquishjaquin jisquin hahcajaquin honanai. Noquen Hihbo janin sca tah non bejisquin honanquin sirijayaxihqui. Rahma texe res honanxon bi tah hen jaatian sirijaquin honanyaxihqui, jaan hea honanquin hahcai quescajaribiquin.

¹³Jaa copi ta quimisha res banetihqui: Noquen Papa non nincacointi, Papan noque hahxonyaxihquiibo honanti, joni huetsahon shinanti. Jaabo quimisha jai bi ta joni huetsahon shinanti hashoan siri qui.

Honantima join yohuanaibo

14 Joni huetsahon shinanxon hahx-
onti hihti queennahue. Papan joi
jato nincamanoxon Dios Yoshiman hi-
nanai shinanbo queenrihbinalhue. ²Ho-
nantima join non noquen yoshiman
yohuanaiya ta tsoanbi noque nincat-
timahqui, Papa Dios huestichin. ³Papan
joi yohiquin tah non jascajayamahi. Jaa
joi yohiquin tah non joni huetsa shinan
hinanai, jan coshi bihnnon, jan teeti ri-
hbi shinannon, jan masa shinanyamari-
hbinon. ⁴Huetsapahi yohuanax tah non
noque res coshihi. Papan joi yohixon tah
non jascajayamahi. Jahuen joi yohixon
tah non Papan caisaibo coshijahi. Jasca-
jaha ta siri qui.

⁵Honantima join yohuanti man
jatihixonbi hahtipahti queenxon
bi tah hen mato yohihi, noquen
huetsabo coshijanoxon Papan joi jato
nincamanahue. Papan joi nincamaha ta
hihti siri qui. Honantima join yohuanah
cahen jahuama tahni. Yohuanxon
mahnexonyamahiya cahen noquen
huetsabaan jahuabi nincayamahan.
Jahuabi shinan bihyamahan. ⁶Man
honanon hihxon tah hen mato yohihi,
hea huetsabaan. Mato qui nocoxon
huetsapahi yohuanxon ⁷jahua shinan
hen mato hinantihin? Dios Yoshiman
hea yohihi mato yohixon pari tah hen
shinan hinantihin. Jaan hea honanmaha
mato yohixon Papan joi mato yohixon,
Papa queenajati mato haxemaxon,
jascajaxon pari tah hen mato shinan
hinantihin.

⁷Jahuaborabo ta jasca rihbi qui,
rehue, tempora, jaabo. Sirijaquin rehue

hahyamahiboya ⁸jenquetsahaxon non
jaton jee honantihin? ⁸Sontarobo
quenaquin non haco jaamajaquin
chinchinaiya ta jaton tahuaya jaton
jashiya tsoabi becantimahqui. ⁹Mato
jascarihbibi. Nincacahbo honantima
join man yohuanaiya ¹⁰man yohuanai
joi tsoan nincatihquin? Jascajaquin tah
man nihue res yohitihi. Honantima join
yohiquin cah man tsoan nincanonma
man yohitihi. ¹⁰Nai naman ta hicha
joi jaiqui. Jatihibi jonibo jaton
joiyahpa. ¹¹¹²Jaabo yohuanai jahua
hihcatsihquiquin? Honanyamahax
tah hen jahuen nahuascai. Jaa rihbi
heen nahua. Jasca copi nincati
joibo yohinahue, hea huetsabaan.
Dios Yoshiman hinanai shinanbo
tah man hihti queenai. Jascahax
noquen huetsabo shinan hinanti
queenbiresnahue.

¹³Jaa copi huetsapahi yohuanyah-
paxon Papa yocahue, mahnexon sca
yohinoxon. ¹⁴Honantima yohuanyah-
paxon tah hen yohuanxon noquen Papa
heen yoshiman yohihi, jahua hihcatsi-
hquiquin hen honanyamaxon bi. ¹⁵Jasc-
ahiya, ¹⁶heen jahuejatihi? Heen yoshiman
Papa yohixon tah hen heen shinaman
rihbi Papa yohitihi. Heen yoshiman
behuahax tah heen shinaman rihbi
behuatihi. ¹⁷Min yoshiman yohuanai
Hahxon tah min hea jai Papan
hih min jaiya ¹⁸jenquetsahax jano rihbi
tsahotaibo Jascajaquin rahan hihti-
hquin, min yohuanai honanyamahax?
Hahxon tah min hea jai hah min sir-
ijaquin jaiya bi ta jano tsahoxon nin-
cacaibaan jahuabi shinan bihtimahqui.
¹⁸Mato tah hen jatihibi mahuinai, huets-
apahi yohuanquin. Jaa copi tah hen
Hahxon tah min hea jai, Papan, hahcái.
¹⁹Hicha nincatima joibo yohiti hahti-
pahxon bi tah hen noquen huetsabo bet-
tan tsinquixon nincati joibo rahsi nin-
camahi. Huestibo res nincati joibo rahsi

jato nincamaha ta siri qui. Nincatima joibo tsamanah bi cahen tiroma, jahuabi shinan hinanyamaquin.

²⁰Baqueun shinanya jayamanahue, hea huetsabaan. Baquexo tiromayamahi quescanahue, hani jonin shinanyarib-inahue. ²¹Isaíasnen huishani joi jai quescia tah qui: Nahuan join tah hen nea jonibo yohiyaxihqui, nahuan janan jato yohiquin. Jascayah bi ta hea nincacatsihyamayaxihcanihqui hih ta noquen Hihbo janishqui hihqui Isaías. ²²Nincayosmabaan nincacahbo hihxon ta rahtequin sca honantima joi Papan jato nincamahiqui. Jaa copi ta Isaías jascari yohuannishqui. Nincacoinascaibo ta rahteti pishinyamahiqui. Nincacoinascaibo quen. Papan joi ta hahan rahtetima qui, hahan shinan bihti. Jascapa ta nincacatsihquibo nincamati qui. ²³Jaa copi honannahue. Papan caisaibo rahsi tsinquitax jatihibi huetsapahi yohuanaiboya bi haxerihyamahi jonibo sca jano mapexon *¿jahua shinantihiquin?* Nincacoinyamahi jonibo jano rihbi mapexon *¿jahua yohitihiquin?* *¿Man* tah man tehquehihqui mato jatimahiquin? ²⁴Papan haxemati yohuan man jatihibi jaiya ta jascayamatihiqui. Haxerihyamahi joni jano rihbi mapetaiton, jaa hihyamahax nincacoinyamahi joni jano rihbi mapetaiton tah man jatihixonbi jaa joni jointinin shinanmatihi, jahuen hohcha copi. Jatihixonbi tah man jaa honantihi. ²⁵Jahuen jointinin jan shinanaibo man yohihah ta Mato tocan ta Papa Dios jaiqui hihxon betihihpaquexon Papa yocascatihiqui.

Huesti yohuannon caibaan nincaquin

²⁶Jaa copi hen mato yohinon nincanahue, heen huetsabaan. Tsinquitax cah man huetsa jahuen behua jai. Huetsa joni rihbi cahen

jahuen honanmati joi jai. Huetsa joni rihbi cahen Papan joi yohiti jai. Huetsa joni rihbi cahen huetsapa yohuan jai. Huetsa rihbi cahen jahuen mahnexon yohiti joi jai. Jaa copi tah hen mato yohihi: Joni huetsa coshi hinannoxtres janahue. ²⁷Huetsapa join yohuancatsihquiboya rabe res yohuanmanahue. Yohuanmaquin quimisha huinomayamaquin. Huesti rahsi yohuannon texe netemanahue. Huetsa rihbi mahnexonmanahue, nincacahbo. ²⁸Mahnexonnica yamahiya tsinquitaito tocan huetsapa joibo yohuanyamahahbo jascapa netemanahue, jatihibi. Jaton jointinin res yohuannon Papa huesti res yohihahbo. ²⁹Dios Yoshiman ta hea shinamahiqui, hen mato yohipan hihnicahbo yohuancatsihquiboya rabe res yohuanmanahue. Quimisha huinomayamaquin. Jan yohuanai nincaxon, Dios Yoshiman shinanmaha yohuanihquin hihxon jaa honannahue. ³⁰⁻³¹Dios Yoshiman shinanmaha tah man huesti huestibo jatihibi yohuantahi. Huesti yohuanmenohi bi huetsa rihbi jano tsahoxon Dios Yoshiman shinanmaha joi merahax yohuancatsihquiya jaa yohuanmenoha netescanon, hoa huetsa sca yohuannon. ³²Dios Yoshiman shinanmaha yohuancatsihqui jonin ta yohuanti teneti hahtipahiqui, jahuen yoshiman yohuancatsihxon bi. ³³Noquen Papa ta nincatimahi yohuani coro corotaibo queenyamahiqui. Jointi siripax hihquibo ta queenihqui.

Jatihibi janinbo noquen huetsabo tsinquitax jai quescanahue. ³⁴Tsinquitaito tocan yohuanaiton haibobo netemanahue. Jato yohuanmayamanahue. Jaabaan ta nincati jaiqui, Papan huishamani joi jai quescajarihbiquin. ³⁵Honancatsihxon xobohoxon sca jaton bene yocanon.

Papan caisaibo tocan haibo yohuanah ta tiroma qui.

³⁶ ¿Mato janinhax bi Papan joi pe-hocohnishqui shinan man jain? ¿Mato qui res Papan joi noconishquin? ³⁷ Nea hen mato huishaquin yohihi joi ta Papan mato yonohi joi qui. Dios Yoshiman shinanmaha yohinicabo man hihqui shinanaxhon honannahue. Dios Yoshiman shinanyahpa jonibo man hihqui shinanaxhon hen huishaxon yohihi joi noquen Hihbaan mato yohihi honannahue. ³⁸ Jas-cama ta qui hihnicah ta honanma qui. Jascapa nincayamanahue.

³⁹ Jaa copi Papan joi yohiti queencoinnahue. Huetsapahi yohuanya jayamabiresnahue hahquin yohiyamarihbinahue. ⁴⁰ Corotaxma yohuannahue, huetsa yohuannon caibaan nincaquin.

Cristo teehihribini

15 Hen mato yohini joi siri sca tah hen shinanmaquin mato yohir-hibi, heen huetsabaan. Man bihnixon rahma caman jeneyamahi joi siri. ² No-quen Hihbaan hea yohini joibi tah hen mato nincamaniqui. Jaa copi ta jaa joi man jeneyamahiya Papan hahan mato teehihmahihqui.

³ Jaan hea yohini joi tah hen mato qui nocoxon mato yohinihqui. Nesca-jaquin tah hen mato yohinihqui: Huis-hani joi jai quescaria ta noquen hohcha copi Cristo mahuanishqui. ⁴ Tsahonip-ibaan bi ta jahuen quimisha neten Papan jaa huenirihbinishqui, huishani joi jai quescajaquin. ⁵ Hahquirihbi teehihquish ta Cefas janin sanareneni cainnishqui. Jaa pecaho ta jahuen doce jonibo janin cainnishqui. ⁶ Jaa pecaho sca quinien-tos noquen huetsabo, hashoan rihbi, janohuesti tsinquitaibo janin caini. Jaabo ta rahma caman hicha jihueti-hiqui. Jihuetai bi ta caibo hihnicahchi-hiqui. ⁷ Jaa pecaho sca ta Santiago janin

cainnishqui. Hahqui cainipish, jatihibi jahuen raantibo qui sca cainrihbibi.

⁸ Chini sca ta hehqui cainrihbini-shqui. Baquexo jahuen hoxne huinom-ahax cainai quescajaquin tah hen hean chini jisniqui. ⁹ Papan nincacoinaibo queyocatsihquin tah hen jato tiromajapahonihqui. Jaa copi tah hen Papan raantihax bi hen rabinti jai, hen japahomi shinanax. Jascapa hen japahoni copi tah hen texe Papan raanti-bo mentan hea hashoan naman qui, hean shinanax. ¹⁰ Papan hehon shinanai copi res tah hen hea jahuen raanti qui. Jahuen raanti jan hea janehah ta yan-cama qui. Texe muhuinbahini tah hen hea hashoan coshin teetai. Hihcax bi heabi teeyamahi. Jahuen shinaman ta Papa teetihqui, heyabi. ¹¹ Jaa copi ta hea teetah, jaabo teetah, jasca rabe qui. Jaa joi huesti tah non jatihixonbi yohihi. Jaa joibi rihbi tah man nincacoinnihqui.

Mahuanihbo teehihribiyaxihquibo

¹² Cristo hihquipi bi ta Papan jaa huenirihbinishqui. Jasca tah non jai, joi siri yohiquin. ¿Jenquetsahax sca man Muhanuhbo ta tsoabi huenitimascaiqui hih man caibo jain? ¹³ Hueniyosmabo rahsi muhanuhbo jaiya cahen Cristo ri-hbi hahquirihbi hueniyamahan. ¹⁴ Cristo hahquirihbi hueniyamaniya cah non joi siri yanca res yohihan. Yanca res cah man nincacoinan. ¹⁵ Hahquirihbi tee-hihcoinyamahiya cah non quescasan, noquen Papa qui quesahe. Cristo ta Papan huenirihbinishqui hihqui quesahe, huenicoinni que ma bi. Tsoabi Papan huenicointimahiya cahen Cristo ri-hbi hueniyamahan. ¹⁶ Muhanuhbo Papan hueniyamahiya cahen Cristo ri-hbi huenirihbiyamahan hih cah hen jai sen. ¹⁷ Cristo huenirihbiyamahiya cah man yanca res nincacoinan. Maton hohchaya rihbi cah man jascabihi banetan. ¹⁸ Cristo nincacoinax bi hoxanihbo

rihbi cahen queyonihboscan. ¹⁹Rahmares main jihuexon res Cristo non nincacoinax cah non jatihibi jonibo mentanhashoan homisbatibo non jaquehahnai.

²⁰Papan ta Cristo huenicoinnishqui. Hashoan hicha sca biminon jihu bimimenohi quescapi ta hoxanihbo janinhax jaa huenimenonishqui. ²¹Huesti joni hohchani copi jatihibi jonibo mahuanicabo sca jai quescarihibi ta huetsa huesti copi noque hueninicabo jaribih. ²²Adaman baquebohax non mahuanicabo rahsi jai quesa rihbi tah non Criston baquebohax huenirihbinicabo rahsi qui. ²³Jatihibi tah non noquen cati tian huenihhnayaxihqui. Jaa pari hihquipish bi teehihribinixon ta Criston noque beboxonnishqui. Jaa joribiscaya ta jahuuenahbo sca huenihhnayaxihqui. ²⁴Jaatian pari ta jatihibi hapobo, jatihibi yono yonohibo, jatihibi hihbohivo, jascapahbo jatihibi queyobahinxon Papa Dios sca jahuen jihuetahbo Criston hinanyaxihqui, nete queyoscanon.

²⁵Jatihibi miin rahuibo namanjaxon queyohue Papan jaah ta Criston jato queyobahinyaxihqui, jato namanjaquin. ²⁶Jan chini queyoyaxihqui jahuen rahui ta hahan jonibo mahuati qui. ²⁷Jatihibi namanjaxon jato queyohue hah ta Papan janishqui, jaa yohiquin. Jatihibi hihbojahue jan hihqui bi ta jaa yohihi jahuen Papa jan hihbojati yohiyamahiqui. Jaa ta honantihbiresiqui. ²⁸Jatihibi hihbo sca jan jaiya ta jaa jatihibi hihbomahi jahuen Papan sca jayabi jatihibi rihbi hihbojayaxihqui, jaa sca jatihibichina hihti bi res hihbo hihnon, jatihibi jahuenahbo rahsi.

²⁹Noquen yamanica ta noquen Hihbo qui hinamehtax bi nashimahama mahuatipishqui, nincacoinnica hih honanahbo hihxon jaa xahbanen hea sca

nashimahue hih ta jacaniqui. ¿Mahuanihbo tsoabi Papan hueniyamabiresaiya jahua copi sca jascacaniquin?

³⁰¿Jahua copi rihbi jatihibi neten noque rehteti jaibo non tenetihin?

³¹Noquen Hihbo Jesucriston noque hahxonah copi tah hen matohon hihti jenimaxon mato yohihi, heen huetsabaan: nete tihibi ta hea retequin bi cahnecaniqui. ³²Jonibaan hahcai quescayanoxon res hen Efeso janisina yohinahbo tenenixon ¿jahua hen bihtihin? Mahuataibo Papan huenicoinyamahiya tah non Pinonhue, xehanonhue, bahquish tah non mahuayaxihqui hih sca non jatihi.

³³Mato paranmayamanahue. Tiromabo manahax tah man tiromaborihbiscatih hih ta huishani joi jaiqui. ³⁴Maton shinan pontehax hohchayamascanahue. Caibaan tah man noquen Papa honanyamabiresai. Hen mato yohihah rabinnahue.

Jenquetsahpa yorayah hueniyaxihcanni

³⁵¿Jenquetsahaxon mahuanihbo hueniyaxihqui? ¿Jenquetsahpa yorayabo hueniyaxihcanihqui? hah

ra tah man caibaan jai yocaquin. ³⁶Honanman. Mian banaha bero ta queyinox joconihqui. ³⁷Xequi hihyamahax huetsa bero rah. Jayaxihqui yora rihbi tah min banayamahi, jahuen bero res. ³⁸Jaanbi caisai yora ta Papan jaa bero hinanihqui, jatihibi bero jahuen yora hinanquin. ³⁹Jatihibi nami ta jascapa rahsima qui. Jonibaana cahen huetsapah, yohinahbaana cahen huetsapah, hihsapana cahen huetsapah, tsatsanah cahen huetsapah. ⁴⁰Naihoh queha yorabo ta jaiqui. Mai meha yorabo jaribih. Naihoh queha yorabaan coshi ta huetsapah qui. Mai mehabaana huetsapah rihbi. ⁴¹Bari huetsapa xaba janon, hoxne huetsapa xabaya,

huishibo rihbi huetsa xabayahpa. Huetsa huishi jahuena janon, huetsa rihbi jahuena jai. ⁴²Mahuanihbo huenihah ta jascarihbi qui. Queyonica yora banaquin hahcajaquin tah non tsahonai, queyoyosma yora sca Papan hueniyaxahnon. ⁴³Yora tiroma non banahi bi ta xabayahpa Papan huenirihbiyaxihqui qui. Coshijoma non banahi bi ta coshiyahpa Papan huenirihbiyaxihqui qui. ⁴⁴Mai meha yora non banahi bi ta naihoh queha yora Papan huenirihbiyaxihqui qui. Nea nete meha yora jaiya cahen naihoh queha yora jaribibi.

⁴⁵Jascapa yohihi ta huishani joi jaiqui: Jan jonijamenoni Adan ta mohitahpa joni Papan janishqui, hihqui. Chini Adan ta jascapahma qui, teehihmanica can. ⁴⁶Non yoramenohi ta naihoh quehama qui, mai meha can. Mai meha yorayahpa jamenohax cah non naihoh queha yorayahpa sca jatihi. ⁴⁷Papan jonijamenoni joni ta mai meha hiphahonishqui, mai jan jonijani. Noque jihuemanicah ta naihoh queha qui. ⁴⁸Mai mehabo ta jan mai jonijani quescapahbo qui. Jascarihbihi ta naihoh quehabo yorabo naihoh queha jai quescapahbo qui. ⁴⁹Mai meha joni quescapahbohax tah non naihoh queha jai joni quescapahbo rihbi jatihi.

⁵⁰Nea tah hen mato yohihi, hea huetsabaan: namiya jimiyahpabo ta janoxon Papan jihuemahi janin nocotimabiresihqui. Queyonica yorayahpaxon tah non queyoyosmabo bihtimahi. ⁵¹Jisnahue. Tsoan honannihma joi tah hen mato yohihi. Non tah non jatihibi hoxayamayaxihqui, caibo res. Jaabi tah non jatihibi yora huetsacahinyaxihqui. ⁵²Histon res, naihoh queha rehue hahan queyoti sca hahcaiya ta non bextihitanci quesa histon res Papan noque yora huetsajarenenyaxihqui qui. Jahuen

rehue corotaiya bi ta mahuayosmaboscanon mahuanihbo Papan hueniyaxihqui qui. Jaabo huenixon noque rihbi sca huetsajarenenquin. ⁵³Nea payonica yora ta payoyosma yorayacahinti jaiqui. Nea mahuanica yora mahuayosmacahinti jai. ⁵⁴Noquen payonica yora payoyosma sca jaiya, mahuayosma rihbi sca jaa noquen mahuanica yora jaiya ta huishani joi jai quescabi jatihi qui. Noquen Hihbaan ta noquen mahua queyoxonihqui, noquen rahui queyoquin, non mahuayamascanon. ⁵⁵Hea tah min jahuejatimascai, Mahuanican. ¿Jahuen hin, miin pahe? hihqui jaa huishani joi. ⁵⁶Jahuen pahe ta hohcha qui. Non nincayosmabo copi ta hohchapan noque retehilihqui. ⁵⁷Hohchapan noque retepanan ta noquen Hihbo Jesucristo raanxon Papan noque mahuayosmabomajahiqui, jahuen jihuetahbco sca. Jaa copi Hahxon tah min noque jai, Papan hahnahue.

⁵⁸Jaa honanxon shinancoinquin jeneyamaxahnnahue, hea huetsabaan. Jahuabi mato shinanbehnomaya-manahue. Man noquen Hihbo teexonai ta yancama qui. Jaa honanxon jascabi jaa hahxonnahue hicha.

Coriquinin noquen huetsabo yanapanti

16 Noquen huetsabo yanapanti coriqui sca tah hen mato yohihi, hea huetsabaan. Galacia mai janin noquen huetsabo hen yohini quescajaribiquin tah hen mato rihbi yohihi, man coriqui tsinquinon. ²Hahan semana pehocoh tai neten man cananipi coriqui texe mequexon bexojanahue. Hicha tahma cananipixon texe bexojaquin, hashoan hicha tahni cananipixon hashoan hicha tahni rihbi bexojaquin. Jascajanahue jatihixonbi, hea jan o nocotaiya moa bexojarasihixon

hinanti hahtipahscanoxon. ³ Jano nocoxon tah hen man caisaiba raantihi, quiricaya jaa coriqui Jerusalen janin bohabo. ⁴ Hea rihbi cati siripaiya ta hea manahi boyaxihcanihqui.

Pablonen cati shinanai

⁵ Jari caquin tah hen Macedonia nabebacahinyaxihqui. Jaa nabebacahinax tah hen mato sca jisi catihi. ⁶ Jaatian rah tah hen mato betan basi tahnihiihi, jene tian huinonon caman rah, janohax hen caribcatsihquiton man hea cati yanapanyaxahnon, hea janoscaatsihquiton hen noconon. ⁷ Huinoquin res mato yohuanquihnbahinti tah hen queenyamahi, hea huetsabaan. Noquen Hihbo queenaiya tah hen mato betan basitihi. ⁸ Efeso jema janin pari tah hen banetihi, pentecostes fiesta caman. ⁹ Jano ta hicha jonibo nincamatrisriscaiqui, heen rahuibo rihbi hicha jai bi hean yohihah nincayaxihquiibo rihbi hichahi.

¹⁰ Timoteo mato qui nocotaiton sirijaquin bihnahue, jahua qui raquetaxma jan mato janin hihnon. Jaan rihbi ta Papa teexonihqui, hen hahcaiquescayaquin. ¹¹ Jaa ta beronan res qui hihyamanahue, tsoabi. Jan siripi hehqui joribinon yanapanyaxahnnahue. Noquen huetsabo betan jaa joti tah hen manatai.

¹² Noquen huetsa Apolo tah hen hiti yohihipiqui, texe noquen huetsabo betan mato pasijahi cati. Yohihah bita rahma cati queenyamabiresipishqui. Hahtipahax tian ta catihqui.

Huishaquin queyohi joibo

¹³ Coiramenahue. Papan joi jeneyamanahue. Yobacahinax

coshin teenahue. Maton jointi rihbi coshijanahue. ¹⁴ Joni huetsahon shinanxon man hahcai jatihibi hahnahue.

¹⁵ Estéfanas, jaabo tah man honanscái, hea huetsabaan. Jaabo ta Acaya mai janin nincacoinmenonihbo qui. Noquen huetsabo yanapanti tee sca ta bihcannishqui. Jaa copi tah hen mato hiti yocacai. ¹⁶ Jato nincanahue. Hahbe teenicabo, hahbe yanapannicahbo jatihibi rihbi nincanahue. ¹⁷ Estéfanas betan Fortunato, Acaico rihbi nocotipi quen tah hen jenimahi, mato xahbanjaxon bijato nincacax jenimahi. ¹⁸ Mato shinan hinanxon ta hea rihbi hinancaniqui. Jascapahbo honannahue.

¹⁹ Asia janinha noquen huetsabaan tamato Man jascabi jayamahin hahquiqui. Aquila betan Priscilanen rihbi ta mato qui hicha joi siri raanihqui, Man jascabi jayamahin noquen huetsabaan hahquin. Jaton xoboho tsinuitaibaan jascajaribiquin. ²⁰ Jatihixonbi ta noquen huetsabaan jascajaquin joi raanihqui. Noquen huetsabo hicocanannahue, noquen huetsa copi.

²¹ Heen mequemanbi tah hen nea huishahi, hea Pablo.

²² Noquen Hihboh queenyamahibojaiya Papan jato queyobahinon. Johue, Hihbon hih tah hen jai.

²³ Noquen Hihbo Jesusen mato shinann hinannon tah hen mato yocaxonai.

²⁴ Noquen Hihbo Jesucristonen noque hahxonah tah hen matohon shinanai.

2 CORINTO

*Corinto janinhahbo qui Pablonen
raanni joi, jahuen rabe sca*

**Noquen huetsabo qui
Pablonen joi raanai**

1 ¿Man Papan shinanya jascabibi ji-hueyamahin, hea huetsabaan? Jesucriston raanti joni jahue, Papan hea jaah tah hen hea Pablo jahuen raanti hihxon nea joi raanai. Noquen huetsa Timoteo betan tah hen huishahi, man Corinto jema janin jihuetaibo qui raannocon, Acaya maibo janin jihuetaibo noquen huetsabo qui rihbi raannocon. **2** Noquen Papa Dios betan noquen Hihbo Jesucriston shinanmaha ¿man jointi siripax jihueyamahin? ¿Jahuen shinanya man jihueyamahin?

Pablonen hisin tenenih

3 Noquen Papa Dios ta noquen Hihbo Jesucriston Papa Dios qui. Noquehon hihti shinanai noquen Papa tah qui. Jaan ta noque jointi hihti sirijahiqui. Jaa copi tah hen Hahxon tah min noque jai Papan hen jai. **4-5** Non tiromabo tenehi tian tihibi ta jaan noque jointi sirijahiqui. Criston teneni quescapahbo tiromabo tah non tenehi, hicha. Non hicha tenexonai quescajaribiquin cahen hicha bi res jaan noque jahuen teneti shinan siri noque hinanah. Yomanajaquehtaibo jatihibi noquen sca non jato jointi sirijanon ta noque jointi sirijahiqui, jaa shinanambi non noquen rihbi jato jointi sirijanon. **6** Jaa copi tah non tenehi, man jointi siripax jihuecoinnon. Non tenehi quescapahbo tiromabo man maton rihbi tenehiton mato jointi sirijabahinno cahen Papan jahuen teneti shinan siri noque hinanquin. **7** ¿Hehbetanbi yomanajaquehtaibohax man hea

hihqui quescari man jointi sirijaquetax jihueyamahin? Hen ta hen honanai. Man tenetihii tah hen honanquin sirijahi.

8 Asia mai janinhax tah non hohmis hohmisnihqui, hea huetsabaan. Man honannon hihxon tah non mato yohihi. Hihti hohmis hohmisajahahbo tah non noquen coshi senenyamascaxon jihuetai shinanyamascaniqui. **9** Mahuati shinan sca tah non janiqui. Noquen coshiyaxonbi teneti non shinanyamanon ta Papan noque jascajamanishqui, yamanicabo huenihhninicaxon Papan noque yanapantihu non honannon. **10** Asia mai janinhahbaan ta noque retequin bi rohajanishqui, Papan noque jato xahbanjamahah. Noque xahbanjamanixon ta hahquirihbi xahbanjamayaxihquiqui, noquen Papan. Noque hahquirihbi xahbanjamaxihqui honanxon tah non shinanquin sirijahi. **11** Maton rihbi Papa yocaxonnahue, noque yanapanquin. Noque copi Papa qui hicha siripi yohuanahbo yocaxonnahue. Hahxon tah min jaa jai Papan, hichaxon yocacah tah min sirijaxonai Papan, jaábo noque yocaxonnahue.

Corinto janin Pablo cayamaho

12 Mai mehabo tocan jihuehahnantahnaan tah non jaabaan honanquin hahcаяyamahi. Papan yanapanah tah non hinamehti jihuetai, jan shinanai quescajaquin shinanax jihuetai. Mato tocan hashoan rihbi jascari jihuetai. Noquen jointinin tah non honanquin sirijahi. Jaa copi tah non jointi siripax yohuanscái. **13** Man jisnixon honanscái joibo res tah non huishaxon mato yohihi, huetsama. Noquen Hihbo qui canoxon caman tah man jaa joibo honanti jai. **14** Man noque honantahniscái quescajaribiquin honanbonahue. Noquen Hihbo Jesus jahuiya non mato copi siripi yohuantihu quescar-

ihbihi tah man noque copi man siripi yohuantihu.

¹⁵Rabejaquin sca mato shinan hinannoxon tah hen sirijaquin shinanax mato janin caribcatsihoqui. ¹⁶Macedonia janin caquin mato jisbahinax joribixon sca mato jisribiti tah hen shinanhohqui, maton yanapanah sca hen Judea main sca cayaxahnon. ¹⁷Jascari cati tah hen hihresyamahohqui. Mai mehabaan shinanquin hahcai quescajayaquin tah hen yohihi. Cayamahi rahan hihresyamahi. Cahi rahan hihresyamarihbibi. ¹⁸Cahi rahan hahxon tah hen chini sca cayamahi rahan jatimahi. Papan ta honanihqui. Jaan ta yohicointihiqui. ¹⁹Silvano, Timoteo, jaabo rabe betan tah hen Jesucristo joi mato yohiniqui, Papan baquen mato manascanon. Criston ta Jeen hahxon Hatimahi rahan yohiyamascatihi qui. Jeen hahresquin.

²⁰Noque hahxontijaxon Papan noque yohini jatihibi non yocacah ta Criston jeen hahtihiqui. Jaa Cristo copi tah non Jascari rahan hahcai, noquen Papa shinan siriya hihqui honanahbo. ²¹Jaa noquen Papan ta Cristo nincacoinquin jeneyamatih shinan noque hinanihqui. Mato ta hinanihqui. Noque rihbi hinanquin. Noque ta caisihqui. ²²Noque honantijaxon ta jahuen coshi rihbi noque hinanihqui. Noque bihinihiyahnoxon ta noquen jointi janin jahuen yoshin hihquimascaiqui.

²³Honannahue, mato tah hen yohihi. Mato casticanyamanoxon tah hen Corinto janin cayamascahohqui. Hen ta hen hihcoinai. Papan ta honanihqui. ²⁴Mato yono yononoxonma bi mato jenimaquiai-hihnoxon tah hen mato yohihi. Man noquen Hihbo qui hinamehcoinni quen tah hen mato yonoti pishinyamahi.

2 Mato jisi caribxon tah hen hahquirihbi mato benámmamis

hihquish hen cayamascahohqui, hea huetsabaan. ²¿Hen mato benámahiya tsoan sca hea jenimamatihiquin? ¿Hean mato benámahoh man hea jenimamatih bi tsoan sca hea jenimamatihiquin? ³Mato qui nocotax matohon hea jenimatih bi benámis hihxon tah hen huishaxon mato yohihohqui. Hahan hea jenimahi man mato rihbi jatihibi hahan jenimatih honanxon tah hen huishahohqui. ⁴Benatax jointi tiromahax bero jene manontamecahinxon tah hen huishaxon mato yohihohqui. Man benánon hihxonma bi matohon hen hihti shinanai man honannon hihxon tah hen huishahohqui.

Hohchaya hihpahoni joni yohuanquihinti

⁵¿Hoa jonin hea benámahoxquin? Hea res ma bi ta mato jatihibi benámatahnihoxqui. Hashoan joi hichajacatsihyamahi ta hen jascaresi yohuanai. ⁶Tsinquixon casticanquin tah man senenjahoqui. ⁷Jaa copi jahuen hohcha shinanyamascanaxue. Jahuen hohcha shinanyamascaxon sirijaquin sca yohuanquihnnahue, hihti masa shinanxon jihueta shinanbahin jan jamis hihxon. ⁸Jaa jonihon man shinanai honanahbo hihxon tah hen mato yohihi. ⁹¿Hen yohihi tihibija man Jain? Honancatsihquin tah hen mato qui huishahi, maton shinan honannoxon hihxon. ¹⁰Huetsana man shinanyamascai jahuen hohcha tah hen hean rihbi shinanyamasca. Hean shinanbehnomaxonai bo tah hen Cristo bebonxon shinanbehnomaxonai, man shinan bihnon. ¹¹Satanasnen noque tiromajayamanon hihxon tah hen shinanbehnomaxonai. Jaan noque jahuejacatsihquin tah non honanai.

Troas janinxon Pablonen masa shinanai

¹² Troas jema janin Criston joi siri yohihi nocoxon tah hen yohiti siribiresi jisoqui, hea huetsabaan, noquen Hihbaan jato nincati siri shinan hinanxonah. ¹³ Yohiti siri que bi tah hen heen huetsa Tito jano merayamaxon shinanquin siri-jayamahoqui. Jaa copi tah hen Ca res sca tah hen jai, hihcahinax Macedonia mai janin sca cahi cahoqui.

Criston hahxonah sirijaquin shinanaibo

¹⁴ Yanca res tah hen mato copi masa shinanhohqui, hea huetsabaan. Jahuen rahuibo queyohax jahuen sontarobo bebohi hahcajahi ta noquen Papan noque beboxoniqui. Jaa copi tah hen Hahxon tah min noque jai Papan hahcai. Jati-hibi janin hininjaquin hahcajaquin ta Papan jato noque honanmamahihqui, Cristo honanahbo hihxon. ¹⁵ Papan tee-hihmahihbo tocan, mahuanicabo tocan rihbi tah non Criston hinin quescapahbo qui, Papan xetenon. ¹⁶ Mahuanicabo tocan tah non hahan muhataibo hininjati qui. Papan teehihmahibto tocan hahan jihuetaibo hininjati. ¿Jaa nincati tsoan hahtipahiquin? ¹⁷ Coriqui bihnoxon Papan joi maromabonahi quescapahbo tah non hahyamahi. Yohitannahue Papan jaah cahen yonicabnoque. Hihcoini yohuannicabo. Papan noque jisi honanxon tah non yohihi, Criston janen.

Papan hahxontijahi joi behnabo

3 Hea ta hen jascapa qui hihcatsihx-onma sca tah hen jascajahi. Hea honanscanish tah man hahan hea honanti quirica pishinyamahi. Maton huishati cahen hea rihbi pishinyamahan. ² Matobi tah man hahan hea honanti qui, hea huetsabaan. Non matohon hihti shinanai tah non noquen jointi qui bi

huishaquin hahcajahi, jatihixonbi jisxon honanahbo. Noquen shinan honanahbo can. ³ Non jenquetsahpabo shinanya quin hihxon ta mato jisxon honanti bi res qui. Criston huishaxon heyabi raanah joibo quescapahbo tah man qui. Tintan huishahahma bi Dios Yoshiman huishahah quescapahbo. Macan champani qui huishahah quescapahboma. Huishaquin hahcajaquin ta noquen jointi janin jahuen shinan janahihqui. Jaa shinan jenquetsahpa quin hihxon jistibo tah man qui, hea huetsabaan.

⁴ Papan jahuen shinan noque jasca-jaquin hinanai tah hen honanai, hea huetsabaan. Noquen Hihbaan noquehon hihti shinanai copi tah hen honanai. ⁵ Noquenbi shinanxon tah non jahue-jati hahtipahyamahi. Papan res ta noque coshi hinanihqui. ⁶ Jaan ta noque hahxontijaxon bi noquen rihbi hahnon hihxon noque joi behna yohihihqui. Jaa joi behna non yohinon hihxon cahen noque caisnish. Huishani joi jisxon non noquen coshiyaxon hahtima joi tah qui. Noquen coshiyaxon hahti joi ta hahan muhuti joi qui. Noquen Hihbaana ta jahuen yoshinyaxon hahti qui, hahan jihuetaibo joi.

⁷ Macan qui huishaxon ta hahan muhuti joi Papan hinannishqui. Xaba shinanyahpaxon Papan jaa joi hinanah ta Moisesnin bemanan xabanishqui. Israelibaan ta jaa bejisti teneyamanishqui, xabatai copi. Queyonica xaba que bi jaa jisti hahtipahyamacanquin, jaan bechaxah. ⁸ ¿Jascapa coshiyahpa joi hinannixon jahuen yoshinyaxon hahti joi sca Papan hinanah, non hashoan sca coshi jatimahin? ⁹ Hohchayahpabo tah man qui hihqui joi xabaya hinannixon cahen jahuen siribo sca hahan jihuetai joi noque hinanxon hashoan rihbi noque hihti xabaya hihmayaxihqui. ¹⁰ Rahma ta xabaya hinanni joi xabaya quescayamas-cai qui, hashoan coshi xabapan sca xaba-

jahah.¹¹ Queyónica joi xabaya jahuiya cahen queyotima joi sca hashoan coshi xabaya joti jai.

¹² Jascapa coshi xabaya joi non jai honanxon tah non jahua qui bi raquexonma yohihi.¹³ Moisesnin hahni quesayama tah non jai. Jaa ta jahuen bemanan beracohnishqui, jahuen xaba queyotai israelibaan jisyamanon hihquish.¹⁴ Jahuabi jonexonma non yohihah bi ta jaton jointibo chahomacannishqui. Rahma caman rihbi ta beracohxon Moisesnin joi jiscanihqui. Moises hahan beracohni beracohxon hahcajaquin cahen jaa quirica jiscanquin. Cristo bihxon res non hahan beracohntai potaxon non jiscoinai ta honanyamacaniqui.¹⁵ Jasca tah qui. Rahma caman ta jaton shinan mahpoxon hahcajaquin Moisesnin huishani joi jiscanihqui.¹⁶ Noquen Hihbo qui hinamehtaiton pari ta jaan jaton bebepohti jato bichiniqui, honancoinahbo.¹⁷ Noquen Hihbo qui hinamehtaibo ta jahuen yoshinyahpabo qui. Jahuuen yoshinyahpabo cahen hinamabo sca.¹⁸ Noque rihbi bebepohxonma sca ta bejishti jisquin hahcajaxon noquen Hihbaan xaba jisish, jan hihqui quescaribbi noque jatihibi jatihi, hashoan xaba shinan hanicanahi. Noquen Hihbaan Yoshin noquen jointi janin teetaiya ta jahuen xaba noque qui mahnecanahihqui.

4 Heen shinan tiroma tenexon ta Papan hea yohinishqui, jahuen joi siri hen yohixonnon. Jaa copi tah hen jointi sirijaquescái.² Hahqui rabintinoxon ta jonexon caibaan jaiqui. Noquen Hihbo qui hinamehxon jascapa jenebahinscanish tah hen paran parani nihtimahi. Papan joi rihbi yohiquin quesajayamaquin. Hihcoini yohuanxon tah hen jato nincamahi, jatihixonbi jaton jointinin hea honanahbo. Noquen Papa bebon nihxon hahcaja tah hen jai.³ ¿Hen

yohihi joi siri nincaxon bi beracohxon honancasquimacaniqui? Jascapahbo ta queyónicabo qui. Queyónicaboxon ta honancasquimacaniqui.⁴ Nea mai meha diosen ta nincayosmabo jato shinan chihtehihqui honanyamahahbo. Noquen Papa jenquetsahpa quin hihxon tah non Criston joi nincaxon non honanscái. Jahuuen joi ta xaba quesca siri qui. Jahuuen xaba jisyamanon hihxon ta tiroma yoshiman jato chihtehihqui.⁵ Hea maton hapo copi hea nincanahue hah tah hen jayamahi, joi siri yohiquin. Noquen Hihbo ta Jesucristo qui, hih ta hen jai. Noque cahen maton jonibo, Jesus teexonai noquebo.⁶ Bahquish chian xaba jahue, hah noquen Papan janíxon ta jaan rihbi noquen jointibo xabajahiqui, xabapan jismahah Cristo bejisquin hahcajaquin non noquen Papa Xaba Hihbo honannon.

Shinancoinax jihueti

⁷ Jahuuen hahxontibo res non hihqui que bi ta jahuen coshi shinan Papan noque hinanihqui. Mai meha yorayahpabo res hihquish bi Papan coshi shinanyahpa. Noquenahma bi Papanah, jaa coshi. Noquen honannon hihxon cahen noquen jointi janin jaa shinan siri janaquin.⁸ Jatihibijaquin hea tiromajahibaan bi tah hen shinan yosmayamahi. Jatsanhah hea jaábaan bi hean tiromajaquin shinanyamahi.⁹ Hea rehtecatsihquin chibanaibaan bi ta Papan hea jenebahinyamahihqui. Main hea potahahbaan bi hea muhuayamahi.¹⁰ Rehtehahbo Jesus muhuani quesari tah hen jascabi jai, nete tihibi heen yora rehtecatsihquiaan bi. Heen yora janin hahan Jesus jihuensi jai jisíbo cahen Papan hea tenemahah.¹¹ Noque jihuetaibo ta Cristo noquen Hihbo copi Papan noque jascabijaquin muhuamaquin bi rohajahiqui, noquen muhuanica yora janin Jesus jai jisíbo.¹² Jasca tah qui,

hea huetsabaan: non noque muhauatai bi tah man mato jihuethi.

¹³ Nincacoinxon tah hen jaa joi rihbi yohihi, hih ta huishani joi jaiqui. Nincacointi shinanyahpaxon ta jascajanishqui. Noquen rihbi tah non jaa shinanbihxon nincacoinxon jascajaquin rihbi yohihi. ¹⁴ Noquen Hihbo Jesus huenihhninixon ta noque rihbi huenihhniyaxihqui, noquen Papan. Noque huenixon ta matoyabi noque hiyoxihqui, jaa jano jaiton. Jaa honanxon tah non mato yohihi. ¹⁵ Man shinanbihxon hihxon ta Papan jatihibijahqui. Hashoan hichaxon sca shinan bichish tah non hashoan hicha rihbi noquen Papa qui siripi yohuanyaxihqui, Nete Hihbo jisibo.

¹⁶ Jaa copi tah non jointi yosmayamahi. Noquen yora pechohi bi ta jatihibi neten noquen shinan behnatihqui. ¹⁷ Non rahma hahan yomanahatái hisin romishin tenexon tah non jahuentianbi queyotima xaba bihyaxihqui, jahuentihopah ra tsoan shinannihma xaba bihquin, noquen. ¹⁸ Non jisi ta queyonicabo qui. Non jisyamahibo ta queyoyamahihqui, jahuentianbi. Jaa copi tah non jisibo non shinanyamahi. Non jisyamahibo caya tah non shinanai noquen.

5 Noquen yora ta nea mai meha tapas quesca qui. Non haho jihue-tahbahi bi basima tahni sca payoti. Jas-capahton non jihuetai bi cahen noquen yora muhauataiya naihoh sca noquen Papan noque hahxonah haho jihuetai jai. Mequeman xobojahama. Jahuentianbi queyotima haho jihuetai. Jaa tah non honanai. ² Neno tah non Hea tsí hinanhue hi sen hihresai, noquen naihoh queha xobo bihcatsihqui. ³ Bichish cah non chopanma quescapahbo jayamas-caan. ⁴ Nea tapasoho jihuehahnantah non mahneti hihti queenxon jointi xec-ahihnihi, noquen yora potacatsihyamahi

bi hahquibi hashoan siri yora sca bihcatsihqui. Jascabi jihuematicon sca queyónica mahpobahinnon jaa bihcatsihquin, sahuequin hahcajaquin. ⁵ Non jascapa bihyaxahnnon noque sirijahi ta noquen Papa qui. Noque jascapa hinanyahnoxon ta noque jahuen Yoshin hinan sca jaiqui.

⁶ Jaa copi tah non jascabi sirijaquin shinanai. Noquen yoraya jihuehahnantah non noquen Hihbo janin jayamahi. ⁷ Jaa jisishma tah non jihuetai, jahuen joi nincacax res jihuetai. ⁸ Jascaxon bi cah non shinanquin sirijascai. Noquen Hihbo jano jaiton jihuexon tah non noquen yora potabahinti queenscái, neno manati queenyamatahnihi. ⁹ Jaa copi tah non yorayahpahax jihuetax, jascayamahax jaa janin jihuetax, jan queenajati res queenyorahi. ¹⁰ Siri hin, tiroma quin hihxon janoxon jan noque jisi janin tah non jatihibi nihyaxihqui. Yorayahpaxon non hahcai quescabijaquin noque yohi-non tah non jano nihti jai. Non siri-jaquin hahnibo cahen noque sirijaquin yohiquin. Non tiromajaquin janfbo ca-hen sinajaquin noque tiromajaquin.

Hihbo qui hinamehtax jahuen baque sca

¹¹ Jaa copi tah non noquen Hihbo qui raqueti honanxon non mato hihti yohihi. ¿Jenquetsahpa shinanya non quin? Papan ta honanihqui. Maton jointinin maton rihbi honanti tah hen queenai. ¹² Noque tah non jasca-pa shinanya qui, noque honannahue hihribixonma tah non mato yohihi. Man noquehon jenimahax jaya yohuanti janon hihxon tah non mato yohihi. Caibo ta bemacanya res jisish jeniman-icah qui. Jenquetsahpa shinanya quin hihyamacani. Man jascapahbo joi bich-inti hahtipahnon cahen mato yohihi. ¹³ ¿Hea tequehihqui joni quin? Noquen Papa queenaiya tah hen jascapa jathi.

¿Hea siri shinanya joni quin? Man Papan shinanya janon tah hen jascapa jatihii. ¹⁴ Cristohon hihti queenxon tah hen jascajahi. Jatihibichina ta noquen hohcha copi jaa huesti mahuanishqui. Jaa mahuayamahiya cahen noque jatihibi mahuatan. Jaa tah non honanquin sirijahi. ¹⁵ Non queenai quescaya-mascaax sca non jihuemon cahen jaa mahuanish. Noque copi mahuatipi bi hahquirihbi hueniha queenai quescari sca cah non jihuetai jai, noque jihuetaibo. ¹⁶ Jaa copi tah hen ¿Jenquetsahpa hin? hihxon jisxon res joni huetsa honanti shi-nanyamascaai. Jenquetsahpa hin hihxon Cristo jisxon res honanti shinannixon bi tah hen jascajatima sca jai. ¹⁷ Cristo qui hinamehtax tah min mia behna noque sca qui. Mia queenpahoni quescayamascaai, jatihobi behna.

¹⁸ Papa queenai jatihibi sca tah min queenti jai. Cristo raanquin ta noquen rahuiti shinan Papan noque sohuaxon-nishqui. Jahuen rahuibo que bi noque raejaquin. Noquen sca non huetsabo jaton rahuiti shinan pontexonnon ta noque yohihihqui. ¹⁹ Noquen hohcha copi noque casticanxonma ta Cristo betan noque hohcha sohuaxonqui, jahuen rahui non hihpahoni que bi jahuen hah-berabetibo sca non janon. Non jaa joi yohihi sca canon ta noque raanihqui. ²⁰ Jaa copi tah non Criston yohixon-nicahbo qui. Non yohihi join Papa yohuanai quescapi. Maton hohcha potahax jahuen rahuibo que bi Papan hah-berabetiboscanahue, hah tah non jai. ²¹ Noque hohchajomabo janon ta Papan jaa noquen hohcha hinannishqui, jan hohcha honanyamanah bi. Hahqui hinamehtax non noquen Papa ponte siri hihqui quescarihbih non ponte siribo janon hihxon ta noquen hohcha jaa hinannishqui.

6 Papa betan teenicaxon sca tah hen mato hihti yohihi. Matohon shi-

nanxon ta jaan mato hihti hahxonihqui. Nincquin bi quesajayamanahue.

² Nincati siripai tian bi tah hen mato nincascai. Mato teehihmati netenbi tah hen mato yanapanai hah cahen jaan janish. Rahma ta nincacah siri qui. Mato teehihmati nete ta nocoscuaiqui.

³ Nincacoinyamacanmis hihquish tah non hihti coirametai. Non siriresi jihuetai honanax jahua copibi noque qui tiroma yohuanti tsoabi yamanon tah non Papan joi yohinicahax ponte res jihuetai. ⁴ Papan yonotiboxon tah non jatihibijaquin jato jismati jai, jahuen teexonicahbo non hihqui honanahbo. Hihti tenexon tah non jato jismahi. Hisinbo tenequin. Yomanahxon bi tenequin. Tiromabo tenequin. Tiroma netebo tenequin. ⁵ Tsehuejahabo bi tenequin. Sipo xoboho tsahonahbo bi tenequin. Rehtenannanaiboya tenequin. Tee teexon tenequin. Hoxa tenequin. Piti tenequin. Papan teexonaibo non hihqui honanahbo jaa rahsi tenequin. ⁶ Jascapa noque honanahbo siriboxon jatihibijaquin. Papan joi rihbi honanxon, caibo teneresquin. Jato yanapanquin. Dios Yoshinyaxon yohiquin. Jatohon shinancoinquin.

⁷ Hihcoinai join res jato yohiquin Papan coshiyaxon hahxonquin. Ponte shinanyahpaxon yohiquin tah non noque cahehihbo pontexon noque join bahchincatsihquibo rihbi sirijaquin yohixon non pontehi. ⁸ Caibaan noque nincacai bi caibaan rihbi noque hosanquin. Caibo noque qui siripi yohuani. Caibo tiromahi yohuani. Hihcoinjaquin non yohihi bi ta Man tah man paranai caibaan jaiqui. ⁹ Caibaan ta noque honanquin sirijaxon bi noque honanyamaquin hahcajahihi. Mahuacatsihquish bi teehihscai quesa tah non jai. Casticanquin ta noque retequin bi rohajacanihqui. ¹⁰ Benatihi

bi tah non jenimahi. Jahuabijomaxon bi tah non hicha noquebo hicha shinan hinanai, hicha shinan jaábo. Jahuabijomahax bi jatihibiyahpa quescapi. Jasca tah non jai, Papan noque hahxonai honanahbo.

¹¹ Noquen jointinin matohon shinanxon tah non mato yohihi, corinto jonibaan. ¹² Hean tah hen mato panteyamahi. Hehon man shinanpanan tah man maton jointininbi man pantetai. ¹³ Copiquin sca hen hahcai quescajaquin maton jointiboyaxon hehon shinannahue. Heen baquebo yohiquin hahcaja tah hen jai.

Non Papan xobo quescapahbo jai

¹⁴ Pontejaquin shinanaibo ta tiromajaquin shinanaibo betan mescotimahihqui. Jano xaba jaiton ta yame jatimahiqui. Jaa copi nincacoinyamahi hihquihinti bihyamanahue. ¹⁵ Tiroma yoshin betan ta Cristo nihtimabiresiqui. Nincacoinaibo betan ta nincayamahibaan jasca rabe shinanyamahihqui. ¹⁶ Tiroma yoshiman hahan parantibo jahuen santobo ta Papan xoboho jatimabiresiqui. Noque tah non jihuatica Papan xobo qui, jan yohini quescari:

Jato chicho tah hen jihuetichi jato tocan nichi. Hea tah hen jaton Papa Dios hihtihi, jaabo rihbi heen jihuetahbo.

¹⁷ Jaa copi jato janinhax piconahue. Matobi res jihuannahue. Jahua bi tiromabo meheyamaquin. Jaatian tah hen mato bihtihi.

¹⁸ Hea tah hen maton Papabi hihtihi, mato rihbi heen bebo baquebo, heen haibo baquebo. Jasca ta jatihibijati hahtipahnica noquen Hihbo jaiqui.

7 Jascajaquin ta noque hahxonai yohinishqui, hahan hen shinanaibaan. Jaa copi hahan yora tiromati, hahan shinan tiromati rihbi potabahinnahue. Noquen Papa Dios

hihti shinanya hihqui honanax, jatihibi mequejaquenahue, jahuenahbo rahsi hihnoxon.

Jaton shinan ponteti jai

² Noque shinannahue. Tsoa qui bi tah non mato qui tiromayamaniqui. Tsoabi tiromajayamaquin. Tsoabi paranyamaquin. ³ Mato tah man tiromabo qui hahquinma tah hen mato yohihi. Mato tah hen jaashinanai hah ca hen mato jai sen. Mato betan jihuetichi, mato betan mahuati, jascabi mato betan hihqui. ⁴ Noquen Papa man nincatihi tah hen honanai. Jaa copi tah hen sirijaquin shinanax jointi siripai, hicha cahen mato qui siripi yohuanti jai. Hicha tenehax bi tah hen hihti jenimahi.

⁵ Tenehax bi cah non jenimahi. Noque tiromajaquin jeneyamahahbo tah non Macedonia janin rihbi nocoxon yora tantiti hahtipahyamahohqui. Jatihibi janin rehtenancatsihquibohi. Noque hihti raqueti jihuetichi. ⁶ Jasca non jaiya bi cahen masa shinanaibo siri shinan hinanica hihxon Papan noque siri shinan hinannish. Tito rihbi janu noocomaxon Papan noque shinan siri hinanquin. ⁷ Man jaa raanah joxon ta noque shinan siri hinanipishqui. Man jaa hinanipi shinan siri ca hea sca jaan rihbi hinanipish, hen jaa copi rihbi sirijaquin shinannon. Man bena benatai, man huinihi, man noquen yohihi quescabijaquin hihti hahcatsihqui jan yohihipi tah hen hashoan sca jenimahi.

⁸ Huishaxon mato benámahoxon bi cah hen masa shinanyamahi. Jaatian masa shinanhoxon bi tah hen jascajayamasca, basima tahni res heen quiricanen mato benámaho honanxon. ⁹ Rahma tah hen jenimasca. Man benataiya hea jenimayamahi bi tah hen man benaxon shinan pontehiya hea jenimahi. Papan benámaha tah man benáhohqui,

hean mato jahuejayamanon. ¹⁰ Papan benámaha cah non shinan pontehi, jaan noque teehihmanon. Jascaxon shinan pontexon cah non masa shinanyamascai. Mai mehabaan benámaha cahen hanhan mahuati. ¹¹ Papan benámaha benatax tah man jahuen joi nincati hihti queenscrai. Man cah man hihti yohicatsihscrai, man ponte sca jai hen honanon non hihxon. Hihti rainyama cah man joni huetsa qui jai. Hihti raque rihbi. Hihti jenipahichi, Papan joi nincaxon hihti jacatsihquin. Hihti castican cah man jai. Hen mato yohiho maton hohcha man yamabirescrai cah man jismahi. ¹² Hoa hohchatai copima tah hen mato yohiho-hqui, quirica raanxon. Hahqui hohchatai copima rihbi. Noquen yohihah quescabijaquin man hihti hahcatsihqui Papan matojismanon hihxon tah hen jaa quirica raanhohqui. ¹³ Jaa copi tah hen shinanquin sirijascai.

Mato jisxon ta Titon rihbi shinanquin sirijahiqui. Jaa jenimahiya tah non hashoan rihbi shinanquin sirijahax jenimahi. ¹⁴ Mato qui siripi yohuanxon hen Tito yohihiya tah man hea hih-timahmayamahohqui. Jatihibi hihcoinjaquin non mato yohini quescajaribiquin tah non hihcoinjaquin Tito yohiho-hqui, Ninca ta jatihcanihqui hahquin. Man nincacoinai ta honansciqui. ¹⁵ Honanxon ta hashoan sca mato shinani-hqui. Man raquetax tastahihxon, Johue man jatihixonbi jaa jaho ta shinanihqui. ¹⁶ Noquen yohihah quescabijaquin man hahcoinai honanxon tah hen shinanquin sirijahi.

Yohuashihxonma non Papa hinanti

8 Papan ta jahuen shinan noquen huetsabo hicha hinanhoxqui, hea huetsabaan. Macedonia mai janinhahbo jahuen shinan jato hinanquin, yanapanquin jaton coriqui hinanahbo. Man honanon hihxon tah hen jaa mato yohis-

cai. ² Hihti tiromajahahbaan bi ta hihti jenimacanihqui. Jahuabijomaxon bi ta hicha hinancanhoxqui, jaabo jai pishca hinanresquin. ³ Heen jisnonbi ta shinan caman hahtanxon hinancanhoxqui, hashoan rihbi. Jaabobi queenxon res hinancanquin. ⁴ Noquen huetsabo hicha pishinaiboya ta Non jato yanapan-non noque rihbi jato hinanmarohahue hahcanhoxqui, noque hihti yocaquin. ⁵ Jaabaan hinanrestihi non shinanah bi ta noquen Hihbo qui hinamehtax noque qui rihbi sca hinamehcannishqui, noquen Papa queenai quescari. ⁶ Jaa copi tah non Tito yohihohqui, jan mato hinanmamenoni quescajaribiquin mato jaa tee siri jan janquenjamanon hihxon. ⁷ Jatihibijaquin tah man hichajahi: hicha shinanquin, hicha yohiquin, hicha honanquin, hicha coshin teequin, noquehon hicha shinanquin. Joni huet-sahon shinanxon hinanquin sca jasca-jaribinahue, hichajaquin.

⁸ Mato yonoquinma bi caibo coshin teetaiboya tah hen mato yohihi, maton rihbi man joni huetsahon shinancoinai jismanahue hahquin. ⁹ Noquen Hihbo Jesucristonen matohon shinanai tah man honanscrai. Jatihibi hihbohax bi ta jahuabijomanishqui, matohon shinanax. Jan jahuabi yamahiya man hicha bijnon hihquish ta jahuabijomanishqui.

¹⁰ Man nescajaha ta siri qui hihxon tah hen mato yohiscrai: huetsa bari tian man hinanti shinanxon texe tsinquinixon janquenjascanahue. ¹¹ Yanapanti man histon jenipahini quescajaribiquin man jaibo hinanquin queyoscanahue. ¹² Hinancatsihquin non hinanah ta siri qui, Papan jisi. Jahuara jaxon hinancatsihxon hinannahue, hah ta Papan noque jaiqui. Yamaxon bi hinannahue hah ta noque jayamahiqui.

¹³ Caibo hicha janon, pishinnoxon caman hinannahue, hih ta jayamaribihiqui. ¹⁴ Jasca rabe jayaxahnnon hi-

hxon man hicha jaibo texe hinan-nahue, pishinaibo, man pishinaibo sca jaabo rihbi hicha jaxon mato hinanyax-ahnnon. Jascapahbo rabe jaábo jasca-janahue.¹⁵ Huishani joi jai quescari: Hicha tsinquihahbaan bi jahuabi tex-eyamahi. Hicha tahma tsinquihahbaan bi jahuabi pishinyamarihbibi.

Tito, jahuen hahberabetibo

¹⁶ Non matohon shinanai quescajaribiquin Titon rihbi matohon shinannon ta jahuen shinan Papan hinanihqui. ¹⁷ Non benahah ta jeen hihquish jaa bi queenax mato janin cahiqui, Papan joi jai quescabi hihti jacatsihqui. Jaa copi tah hen Hahxon tah min jato jai, Papan, hen jai.

¹⁸ Hahbetan canon tah non noquen huetsa rihbi raanai. Jaa noquen huetsa ta Papan baquebaan honancaniqui jati-hixonbi, Papan joi siri jaan jato yohi-hah. ¹⁹ Jaa honanxon ta yohicannishqui, noque betan jan nihnon. Jaa copi cahen noquen huetsabo coriqui boxonquin noque betan nichi, noquen Hihbo Shinan Hihbo jisíbo, non yanapanhananai rihbi jisíbo. ²⁰ Hicha coriqui tsinquixon sca tah non coiranquin sirijascái, tsoabi noque qui tiromahi yohuanyamahahbo. ²¹ Papan noque siri jisnon hihxon tah non hahcai, jonibaan rihbi siri jisnon hihxon.

²² Jato betan tah non huetsa rihbi noquen huetsa raanai. Jaa tah non hicha coti tanaxon jan noquen Papa hihti hahxoncatsihqui non honanscái. Man nincacai honancoinxon sca ta hashoan rihbi hahxoncatsihqui. ²³ Tito rihbi ta heen hahberabetixon hehbetanbi mato hahxonihqui. Noquen huetsabo rabe ta Papan baquebaan raanahbo qui, jato jisxon Criston shinanya hihquibo honanahbo. ²⁴ Jaa copi Papan baquebaan jisnon hihxon noquen huetsabohon man shinanai jismanahue. Man hinancointihu

tah non nea noquen huetsabo yohirah-sihi. Jasca coin sca janon jato jismaxon maton coriqui hinannahue.

Noquen huetsabo yanapannoxxon coriqui tsinquihibo

9 Noquen huetsabo yanapannoxxon coriqui hinannahue hahquin hen mato yohirihbiti tah man pishinyamahi. ² Man hinancatsihscái tah hen honanai. Macedonia janinhahbo tah hen moa yohihohqui: Acaya janinhahbaan ta hinanti jaresscainqui, huetsa barin tsinquinibó, hahquin. Man hinancatsihqui nincacax ta jaabo rihbi queenscainqui, hinanti. ³ Man hinanti jaresscái hen jato yohiho quescayama man jaiya cahen hea rabinan. Jaa copi cahen noquen huetsabo raanscái. Hen yohiho quescabi jacoinnen hihxon cahen jato raanai. ⁴ Man tsinquiscái non shinanah bi caibo macedoniobo hehbetan cahi nocoxon man tsinquiyamahiton mato merahiya tah non hihtimahiti. Non hihtimahmis hihxon tah non mato yohihi. Man hahcointihu non shinanah bi man hahyamahiya cahen mato rihbi man hihtimahpan. ⁵ Jaa copi tah hen noquen huetsabo yohihipiqui, jaabo pari mato janin nocoxon man hinancatsihqui coriqui tsinquimahabo. Tsinquiscaxon tah man hinanti res pishinyaxihqui. Copijanahue hahcama bi queenxon copi man hinanyaxahnon.

⁶ Banaquin hahcajaquin hinannahue. Hicha tahma huai chian banahoxon cah non hicha tahma rihbi bimi tsinquitihu. Hicha banahoxon hicha rihbi tsinquis-caquin. ⁷ Shinanquin sirijaxon hinannahue, man hinancatsihqui tihi hinan-noxon. Hinancatsihyamaxon hinanya-maquin. Queenxon res. Hinanyamahax rabinpaho hihyamahi. Jenimahanan hinanai jonihon ta noquen Papa hihti jen-imahiqui. ⁸ Man pishinaibo jatihibi ta

Papan mato hicha hinanti hahtipahiqui. Jaan hinanah tah man jahuabi pishinya-mascaxon jatihibi siribojaxonquin hahti-pahscatihu.⁹ Huishani joi jai quescari: Jabisaquin ta Papan hinanresiqui, jahuabijomabo hinanresquin. Pontejaquin shinanxon hahcaibo ta Papan jahuentianbi shinanbehnotimahihqui

hihqui jaa joi.¹⁰ Papan ta bero hinanahqui, bananicaton bananon. Piti rihbi ta hinanahqui, pihabo hihxon. Mato rihbi ta hinantihiqui, man jaibo rihbi hichajaquin. Man pontejaquin shinanxon hahcai rihbi ta hichajaxihquiqui, bimi hichajaquin hahcajaquin.¹¹ Jatihibijaquin ta mato hicha hinantihiqui, man hicha rihbi hinanrihbinon. Man hinanah tah non bihxon boxontihi, Hahxon tah min noque jai Papan hihquibo.¹² Jaa coriqui hinanquin tah man noquen huetsabo hihti yanapanai, pishini jihuetax bi siri sca jaábo. Hinanquin tah man jato hicha yohuanmari-hibihi, Hahxon tah min noque jai Papan hihquibo.¹³ Jascajaquin hihti sirijaquin yanapanxon tah man Criston joi siri man nincacoinai man jato jis-matihi, noquen Papa qui siripi yohuanahbo. Yohuashihxonma man jato hinanxon texe jonibo rihbi hinanah ta Hahxon tah min noque jai Papan hiyax-ihcanihqui.¹⁴ Noquen Papa qui siripi yohuanxon ta matohon shinanxon mato yocaxonyaxihcanihqui. Hicha shinan siri tah min jato hinanhohqui Papan, hahxon tah min jai, hih ta jayaxihcanihqui.¹⁵ ¿Papan noque hinanai jahuentihi siri quin? Hihti siri copi tah non mato yohiti hahtipahyamahi.

Papan raantixon Pablonen yohiti hahtipahi

10 Heanbi Pablón tah hen mato hiti yocascai. Mato tocan hihatimahpax bi hocho sca hen coshicahin-

scai hih roqui man jai, hea yohihi. Cristo ta hihti siri qui. Noque ta honaxonbi yohihiqui.² Jaa copi tah hen mato hihti yocacai, mato tocanxon sca hihatimahxonma bi mato raquejaxon yohiyamayanolon. Mai mehabaan shinanai quescajaquin noquen rihbi jai man caibaan shinanah bi tah hen hihatimahxonma mato yohiti shinanai, hen yohiti honanai quescajaquin. Mato tocanxon sca jascajati jayamanoxon tah hen mato rahma yohihi.³ Yorayahpahax bi tah non yoran rehtenanyamahi. Noque tah non huetsarihbih rehtenanai.⁴ Hahan mai mehabo rehtenanai cah non yamahi. Noquen hahan rehtenanti ta huetsapah qui, Papan coshiyahpa. Jayaxon tah non Satanasnen coshi shinanbo potojaquetanai. Jahuen coshiyaxon noque pante-catsihquibo cah non joi bichinai, jahuabi yohuanti shinanyamascaábo.⁵ Noquen Papa Dios honancanmis hihxon pante-hibo cah non jaton coshi jato bichinai. Cristo huestichin mato shinan hih-boxon jahuenah sca mato hinanah man nincacinnon tah non Papan coshiyah-pahax yohuanai.⁶ Maton nincayosmabo man matonbi pontenor tah non man-atahbahi. Man pontequin texejahiya can non jato casticanti jaresscrai.

⁷ Criston raantibo ta honantih bi res qui. Shinannahue. ¿Cristona min quin min honanquin sirija sca Jain? Cristona mia hihqui quescaribih ta non noque jai, honanhue.⁸ Jahuen joi yohinicaxon non mato coshi hinannon ta noquen Hihbaan noque caisnishqui. Mato tiro-majanomma. Hea janexon ta jahuen coshi hea hinanahqui, hicha coti mato yohihax bi tah hen hihatimahahi, honanxon mato yohicoinax.⁹ Quirica huishaquin hen mato rahtecatsihqui shinanyamanahue.¹⁰ Quirica huishaquin ta coshin yohixon noque rahtehihqui. Nocotax sca ta jahuama quescasca qui, jan yohuanai rihbi jahuama, hih roqui man

caibo jai, hea yohihi. ¹¹Jascapahxon honanhue: hochoxon quirica huishaxon non yohihi quescajaribiquin tah non mato tocanaxon rihbi yohiti jai.

¹²Shinanyahpa joni tah qui hihquibo ta caibo yohuanihqui. Hea tah hen hahbetan senenai. Hean tah hen jaa mahuinai, hih ta jacanihqui, hahbe honanma yohuanmis betan merananax. Hea cahen jascayamahi. Tsohbetanbi senenti shinanyamaquin. Jascapa yohuanai mentan tah hen hashoan siri qui, hih tah hen jatimaribibi. ¹³Noque tah non jaa qui hihxon tah non Papan noque yohiti hinanai non huinonyamahi. Mato qui non jahuen joiya canon noque yohini quescabijaquin tah non mato yohihi. ¹⁴Non mato qui nocoyamani hahcajayama tah non jai. Papan hea yohini tah hen huinonyamahi: Noque pari tah non Criston joi siriya mato qui noconihqui. ¹⁵Caibaan Papan joi nincamaha nincacoinaibo jaiya tah non noquen jato nincamaha hahcajayamahi. Hashoan hicha tah hen yohuanyamahi. Man hashoan sca nincacoinaiya tah non mato janin noquen tee caicanahi quescari hashoan hichaxon man nincacointi non queenai. ¹⁶Jaatian tah non mato hoque pacho sca huetsa maibo janin joi siri yohihi catihi. Caibaan yohihi janinxon hean rihbi yohihax bi tah hen Hean yohihah ta nincacoincaniqui hihyamahi.

¹⁷Jaabo tah hen nincamatanai hihcatishquish bi Noquen Hihbaan ta noque hahxonihqui hihnahue. ¹⁸Hea tah hen siri qui, mia tah hen hahxonai Papan, hah non jaiya cahen Papan noque siri jisyamahan. Noque yohihi, jaa ta siri qui, hih noquen Hihbo jaiya cahen Papan noque siri jisiqui.

Papan raantibocamahibo Pablonen yohihi

11 ¹⁻²Bebaan honanahma xontaco jahuen Papan hinanquin hahcajaquin tah hen Cristo mato hinanni hqui, jaa huestichin mato hihbojanon. Noquen Papa Dios queenai quescaquein mato nincamati tah hen jai. Jaa copi tah hen mato yohihi. Shinanyahpa joni hihqui man shinannon hihquish caibo yohuanah bi ta jaton yohuan honamma qui. Jascapa yohuanbo nincanicaboxon hea sca nincanahue, jascapah hen mato nincamanon. ³Ronon jahuen honaman Eva paranni quescajaribiquin mato sca tiroma yoshiman paranxon tiroma shinan hinanmis, hih tah hen jai. Jaan paranah, man mesco shinanyahpahax res sca Cristo huesti queenyamascamis. ⁴Non mato yohinihma bi huetsa Jesus joi mato yohihi jahuibo cah man jato nincacai. Non mato yohinihma bi huetsa Dios Yoshin caibaan mato bihmahah cah man bihresai. Non mato yohini joi sirima bi huetsa joi yohihahbaan cah man nincaribiscuai. ⁵Mato qui noconihbo quiquin raantibo hihqui man shinanah bi ta hea huinonyamacaniqui. Honanxon copi tah hen mato yohihi. ⁶Yohuani sirixonma bi tah hen honanquin sirijahi. Jaa tah non jatihibijaquin mato jaajismanihqui.

⁷Papan joi siri tah hen jahuabi cobranxonma mato yohinihqui. Hea jahuama quescaxon mato jahuabi yocayamaquin, mato siribo quescapa. ¿Hen jascani tiroma quin? ⁸Mato yanapannoxon tah hen noquen huetsabaan coriquinin mato janin noque jihuenehqui. Jaabaan hinanah tah non jaa coriquinin jihuexon non mato yohinihqui. ⁹Mato tocan jihuetax pishinxon cah hen tsoabi jatsanjayamanah. Macedonia janinhax nocotai noquen huetsabaan ta hea

pishinaibo hea hinannishqui. Mato jahuentianbi jatsanjayamanixon tah hen jenquetsahaxonbi mato jatsanjayamaribiyaxihqui. ¹⁰ Hen mato jahuabi yocayamahi ta shinanbehnotimacaniqui, Acaya main jihuetaibaan. Jaa hen hihcoini yohuanai ta Criston honanihqui. ¹¹ ¿Matohon shinanyamaxon hen jascajaniquin? Matohon shinanaxon hen jascajani ta Papan honanihqui.

¹²⁻¹³ Hea Papan raanti hihqui quescaresca mato qui noconihbo jacatsihquiqui. Jaabo ta quesahihqui. Paranxon ta yohicaniqui. Raantihicamahibo can. Papan yohihahma bi ta hehbe raantibo jacatsihquish yohuancaniqui. Jahua yohuanti yamahahbo hihxon tah hen hen hahcai quescajaquin jascabijaquin hen hahtihi, maton coriqui mato bichinyamabiresquin. ¹⁴ Jaabo jascari bi tah hen rahteyamahi. Satanas ta jascarihbi, Papan xabayaha yonotihicamahi. ¹⁵ Satanas hihqui quescaresca jahuen hahxontibo rihbi siri hahxontibocamahiboya tah non rahtetimahi. Jaabo tiroma hihqui quescajarihbiquin ta Papan jato tiromajayaxihquiqui, casticanquin.

Papan yonotixon Pablonen tenenih

¹⁶ Mato tah hen yohirihbihi: hea honanma hihqui shinanyamanahue. Hea honanma hihqui shinanaxon bi tenexon hea nincanahue, hea jahua quin hen mato joi pishca yohinon. ¹⁷ Nea hen mato yohicatsihqui tah hen noquen Hihbaan yonohahma sca mato yohihi. Honanma yohuanihcamahax tah hen yohuanscrai, caibo muhuinax hahqui sca yohuannoxon. ¹⁸ Hicha ta yohuancaniqui, nea nete mehabo muhuinax. Mai mehabohax ta jascacaniqui. Jas caraiboya hea rihbi jascapan. ¹⁹ Honanquin hahcajaxon man jascapa nincacatsihqui copi tah hen hea rihbi jas-

casca, mato nincamanoxon. ²⁰ Jaabaan mato hihbojaha bi cah man jato tenehi. Mato jatihibi bichinah cah man teneresai. Paran paranah cah man tenehi. Shinanyahicamahax yohuanaibo cah man nincacai. Bepasah bi tenexon tah man nincacai. ²¹ Coshijomaxon rah tah non jaabaan hahcrai quescajayaniqui. Hihtimah sca rah tah hen jai.

¿Jahuajahax jaabo yohuanihqui? Jaabo jai yohuan tah hen hea rihbi jaa jai, Honanma joni jaicamahax yohuan sca tah hen jai. ²² ¿Jaabo hebreobo quin? Hea rihbi tah hen jaa qui. ¿Jaabo israelitobo quin? Hea rihbi tah hen jaa qui. ¿Abrahanen baquebo jaabo quin? Hea rihbi tah hen jaa qui. ²³ ¿Jaabo Criston yonotibo quin? Hea hashoani. Tehquehihticamahax quesca tah hen yohuanai. Jato ta hen muhuinai, hashoan coshin teequin. Hashoan hichajaquin ta hea sipojacannishqui. Topontimajaquin ta hea rishqui rishquicannishqui. Hichajaquin hea tsehue tsehuejahabo bi tah hen muhuatihi bi rohánihqui. ²⁴ Rishquitiyaxon ta judioaban hea rishquicannishqui, huestijaquinma. Hichajaquin cuarenta qui nocoti huesti rishquitipishinmaquin. Pichca coti hea jascacanquin. ²⁵ Quimisha coti hea jihuun rihbi rishqui rishquicanquin hichajaquin. Macaman rihbi ta hea tsacacannishqui rehtecatsihquin. Quebijistima hian janin nontin cahi bi ta behchoman tsahcahah noquen nonti hihquinishqui, quimisha coti rihbi. Quebijistima hiaman noquen nonti hihquiya cahen nonabahinahax nonashinarihbinih. ²⁶ Hicha bi res tah hen nihninhqui. Hueaman nichish rihbi jene meran cahi bi rohati. Tiromabaan ta hea heen jahuaborabo bichincatsihxon retequin bi rohajanishqui. Heen caibaan rihbi ta hea retequin bi rohajanishqui. Heen

nahuabaan rihbi sca hea rehtequin bi rohajaquin. Jemabo janinxon caibaan rihbi hea bihquin bi rohajaquin. Nihi naman cahax mahuatih bi rohati. Quebijistima hiaman cahax hihquihi bi rohati. Nincaquin bi quesajahibaan hea bihquin bi rohajaquin.²⁷ Tee teeti hea, yomanahi. Yame teeshinahi. Pihan hihqui. Xehan hihqui. Piti tenequin. Matsu tenequin. Jahuatohonbi rahcoti yamahi.

²⁸ Hashoan hicha rihbi tiromabo tenexon tah hen nete tihibi noquen huetsabohon shinanai, Jenqueta jacaninhqui hihxon.²⁹ Noquen huetsa huesti yosmahiya tah hen hahbe yosmaxon quescaxon jaa yanapancatsihqui. Noquen huetsa hohchamahiboya tah hen hahbetanbi hihti benatai.³⁰ ¿Hea tah hen coshi qui hih non jatihi? Hihyamahi rahan. Heen coshi yamahi jisibo hihquish tah hen yohuantih. ³¹ Noquen Hihbo Jesucriston Papa ta Papa Dios qui. Hahqui tah non jascabi yohuani siritihi. Jahuentianbi yohuanquin queyoyamaquin. Hea quescayamahi ta jaan honanihqui.³² Damasco janin ta quiquin hapon joni Aretasnen hea bihti shinanxon jaa jema jahuen sontarobo coiranmanishqui.³³ Hea bihcatsihquibaan bi ta jaton jema chique xehqui pishcaten noquen huetsabaan hea cainmaxon tasa qui nanexon rontanpaquexon botonah hea cahnenihqui.

Jismaxon Papan yohinlh

12 ¿Hea caya ta honan qui hih cahra non jatihi? Jascari yohuanxon jahuabi bihtimaxon bi tah hen noquen Hihbaan hea jismanihbo, jan hea yohinihbo rihbi mato yohiscrai.² Criston hea jismaha tah hen hea naihoh cahi jisniqui. Catorce baritian sca tah qui, hen jisni, naihoh hea

cahi.³ ¿Yorayahpa hen caniquin? ¿Yorajoma hen caniquin? Hen tah hen honanyamahi. Papan ta honanihqui.⁴ Janoxon sca tah hen tsoan yohitima joi nincaninhqui, joni yohuantima joi.⁵ Papan hea jascajaquin jismani copi tah hen jaya joiti jai. Heanbi hahxon mahuinax hahcаяjaya tah hen jai. Heabi coshijoma jisibo res yohuani.⁶ Hea tah hen honan qui hihquish bi cahen honamma yohuanai quescayamahi yohuani. Hihcoini yohuani. Jascari yohuantih hahtipahax bi tah hen hihyamahi. Hea jisxon, nincaxon res jascapa hea hihqui shinanahbo hihquish tah hen yohuanai. Hea jahua hashoan quin shinanyamahahbo ta hen jascari.

⁷ Hicha jan hea jismaha jisish, Hea tah hen hihti siri qui, hen jamis hihxon ta Papan hea moxan chahchiquin hahcаяjaquin hahan jatsanti hisin hea hinannishqui. Hea tah hen hashoan siri qui hen jayamanon hihxon ta hea jaa hisin hinannishqui, Satanasnen hisin-jaha tenequin hahcаяjaquin hen tenenon.⁸⁻⁹ Jaa hea potamahue Hihbon, hen quimisha coti jaá bi ta hea yohinishqui: Heen shinanyaxon tah min tenetih. Miin coshiyaxon bi tah min tenetimahi. Heen coshiyaxon min tenehi sirijaquin honanti-hcaninhqui, hahquin. Jaa copi tah hen hihti jenimahanan, Henabi tah hen coshi yamahi, hih hen jatihi, Criston shinan bihnoxon.¹⁰ Cristo shinanxon tah hen yosmahihi tenexon, tiromajaquin yohi-hahbo bi tenexon, yomanahi tenexon, hea tiromajacatsihquibo bi tenexon, tiroma netebo tenexon, sirijaquin hean shinanai. Heen coshi yamahax bi tah hen coshihi, jaan coshijahah.

Jatohon Pablonen hihti shinanai

¹¹ Honanma yohuanai quescayamahi tah hen huishahahqui, maton hea yohuanma-

hah. Mia caya tah min Papan raanti qui man hea jatihi bi tah man jayamahi. Hea jahuama man shinanai bi ta maton shinanah maton siri shama raantibaan hea mahuinyamahihqui, ni pishcabi. ¹² Maton jisnonbi tah hen hahan Papan raantibo honanti hahniqui. Tiromabo tenexon tah hen hahan honanti hahxon, hahan rahtetibo jaxon, tsoan jascajani que ma bi Papan coshiyaxon hean hahniqui. ¹³ Texe noquen huetsabo yohiquin quescabijaquin tah hen mato yohini-hqui, jaabijaquin. Maton coriqui res tah hen bihyamaniqui, huetsa janinhah noquen huetsabaan hea hinannon bi. Matonah cah hen yocayamanih. Hen mato cobranyamahah bi rainyamaya-manahue. ¹⁴ Shinanscanahue. Rabe coti canish tah hen hahquirihbi mato qui cacaatsihscai. Mato tah hen jahuabi yocaya-mayaxihqui. Maton jahuaborabo tah hen queenyamahi. Matobi tah hen queenai. Jaton papaya jaton mama jahan ji-hueyaxahn non tsiniquixonti cahen baque-baan jayamahi. Jaton Papabaan cahen jaton baquena tsiniquixonti jai. ¹⁵ Criston shinan man bihnon hihxon tah hen jen-imahanan hena jatihibi queyotihu, heabi queyócahinnoxon caman. Man hehon hashoan hichama sca shinanai que bi tah hen matohon hashoan rihbi shinantihi.

¹⁶ Jahuabi yocayamaxon mato jat-sanjayamaxon bi tah hen honan hi-hxon mato bilihiqui. ¹⁷ Caibo mato qui raanxon rihbi tah hen jahuabi mato bichinyamanihqui. ¹⁸ Tito canon hihxon tah hen jaa yohihohqui. Hah-betan rihbi tah hen noquen huetsa raanhohqui. ¿Jahua Titon mato bich-inhoquin? ¿Jaa shinan huestiya non noque rabebi jayamahin? ¿Jascapa rabe non jayamahin?

¹⁹ ¿Jenquetsahpa shinanyahpabo non quin, man honannon hihxon non hahquirihbi huishahi shinan man jain? Jascama ta qui. Papan noque

nincacai honanax tah non Criston janen yohuanai. Criston shinanya man janon hihxon res tah non yohuanai, noque huetsabon. Matohon shinanxon tah non yohihi. ²⁰ Mato qui nocoxon hea queenai quescapahboma hen mato meramis hih tah hen jai, maton rihbi man queenai quescapahma man hea meramis. Sinacananaiton mato meramis. Notsi notsihiton, sinajahiton, rehtenanaiton, tiromahi yohuanaiton, caibo qui baxexaiton, caibo mentan hashoan siri hihqui shinanaiton, cahchinan nininanaiton hen mato meramis. ²¹ Papan hea jascapahbo meramaxon hea hihtimahmamis hih tah hen jai. Caibo tah man rishtaya qui. Caibo tah man tsinihi, joni huetsa betan hihqui. Caibo haiboya joihi. Jascari hohchahohxon bi man rahma caman maton shinan ponteyamahiton merahax hea huaohihtihi jamis hih tah hen jai.

Quirica queyonoxon hihti yohihi

13 Mato qui rabe coti canish tah hen hahquirihbi mato qui cacaatsihscai. Noquen huetsa hohchataiya hahqui chanicatsihxon jan hohchatai rabexonjisish pari chaninahue. Rabe hi-hyamahax quimisha hihxonjisish chani-non. ² Neateman hohchanihbo tah hen hihti yohinihqui, janu jaibaan jati-hixonbi nincacahbo. Janu hihxonma sca tah hen nocorihyamaxon mato yohiri-hbihi, huetsa coti caribixon hen mato yohini quescajaribiquin. Mato qui nocorihbixon tah hen mato cahnetimascai. ³ Heen janayabi Cristo yohuanai man honancoincatsihqui copi tah hen jascajahi. Jaan ta tanamaxon hahcjaya-maquin mato pontehihqui. Coshin bi res ta mato chicho teetihqui. ⁴ Coshijoma quescajihui qui hueonxon rehtenihbaan bi ta Papan coshiya sca jihuetihqui. Jaa bebon nichish noque coshijoma bi tah

non jahuen coshi Papan hinanah hahbetan jihuetai, mato shinan hinannoxon.

⁵ Cristo man nincacoinain hihxon man jihuetai shinannahue. Matobi shinamehnahue. ¿Mato chicho Jesucristo jihuetai man honanyamahin? Nincayosmabo man hihyamahiya ta jano jihuethqui. ⁶ Non quesayamahi tah man honanyaxihqui. Hen tah hen honanai. ⁷ Man jahuabi tiromayamanon hihxon tah non noquen Papa mato yocaxonai. Honanxon non yohihi man honannon hihxonma bi ta man pontejaquin hahnon hihxon res non yocacai, noque honanma hihqui man shinanai bi. ⁸ Hihcoinai joi cah non panteti hahtipahyamahi. Caijati res tah non yanapanti hahtipahi. ⁹ Noque coshijomabo hihqui bi mato coshi jonibo jaiya tah non jenimahi. Man hashoan coshionon hihxon ta mato yocaxonai. ¹⁰ Hahan hen jato tiromajanona bi ta hahan hen

jonibo coshimanon hihxon noquen Hihbaan hea shinan hinannishqui. Mato qui nocoxon hahan mato tiromajayamanoxon tah hen hochoxon pari nea quirica huishahi.

¹¹ Jahua yohiti tah hen yamascai, hea huetsabaan. Jenimanahue. Criston shinan bahnahue. Joni huetsa yohinahue. Jaa shinan huestiya jihuenahe. Texe noquen huetsabo betan siripi yohuanahue. Jaatian ta matohon shinannica noquen Papan mato yanapantihqui, noquen jointi sirjanica noquen Papan. ¹² Noquen huetsabo hicotanxonnahue, noquen Papa shinanhahn. ¹³ Nenoxon ta noquen huetsabaan jatihixonbi mato qui joi siri raanihqui.

¹⁴ Jahuuen shinan noquen Hihbaan mato hinanon hihxon tah non mato yocaxonai. Noquen Papan matohon shinannon hihxon yocaxonxon tah non Dios Yoshin mato betan jihuemon hihxon rihibi non mato yocaxonai.

GALATABO

Galatabo qui Pablonen raanni joi

Galacia mehabo qui Pablonen joi raanai

1 Hea Pablo tah hen Papan raanti joni qui. Jaabaambi shinanxon ta hea jahuen raanti hihti tsoanbi yohiyamanishqui. Papan jato shinanmaha yohiyamarihbiquin. Noquen Papa Dios betan noquen Hihbo Jesucristonen yohihah tah hen jahuen raanti qui. Hiquipi bi Papan teehihmaribihah ta jaanbi hea yohinishqui. ²Hea manahi noquen huetsabo betan tah hen mato yohihi, Galacia mai meha noquen huetsabon. ³¿Papan shinanya man siripi jihueyamahin? Noquen Hihbo Jesucristonen shinan hinanah man siripi ji hueyamahin? ⁴Nea tiroma nete queha noque bilihniyanoxon ta noquen hohcha copi mahuanishqui, Jascahue noquen Papa Diosen jaah. ⁵Hahxon tah min noque jai Papan hahqui jihuenaheue.

Huetsa hahan hohcha potati joi yamahi, Cristona huesti

⁶Papan ta matohon shinanxon Cristo raanxon Heen baquebo sca hihnahue janishqui. Jan jascajaquin hahxonah bi tah man histon jaa jenehax huetsa joi qui mahnejaquescái. Rahte tah hen jai, man jascaraiya. ⁷Man hahqui mahnetai ta Criston joi ma qui. Caibaan ta mato tiromajahiqui. Criston joi siri ta mato huetsa shinanmacatsihcaniqui. ⁸Non mato yohini joi huetsajacatsihquin huetsa joi sca non mato yohihi jaiya, noque hani chihi perehinhatai qui noque potanon. Papan yonotinin que bi huetsajaquin jan yohihiya, hani chihi perehinhatai qui jaa potanon. ⁹Mato yohixon bi tah hen hahquirihbi yohihi: Non mato

yohini joi huetsajacatsihquin huetsa joi sca mato yohihibo jaiya, hani chihi perehinhatai qui Papan jato potanon.

¹⁰¿Jascajaquin hen mato yohihi tsoa queenaiya hen yohihi? ¿Jonibo queenai hin? ¿Papa queenai nan? ¿Jonibaan costanai quescari hea yohuanai nan? Jonibaan costanai joi yohinicahax cahen Cristo hahxonnica jayamahan.

Criston Pablo jahuen raanti jani

¹¹Hen mato yohinon, nincanahue, hea huetsabaan. Hen mato yohini joi siri ta jaabaambi shinanax jonibo yohuanai ma qui. ¹²Noquen xenibo yohuanai ma ta qui, tsoanbi ta hea jaa joi haxemayamanishqui. Jesucristonbi ta hea yohinishqui, hea jahuen yohinica hihnon.

¹³Judio joi nincanica hihparixon hen hahpahoni tah man chanihah nincanishqui. Jato hihti tiromajanoxon tah hen Papan baquebo chibanhonihqui. Tiro-maja tah hen jato japhoniqui, Papan joi nincacaibo queyocatsihquin. ¹⁴Heen xenibaan joi hihti nincanicacatsihxon tah hen coshin teexon hehbe haxehibo hean mahuinbahinnihqui, jato yohinicascanolon. ¹⁵Jascapahax bi tah hen pontenihqui. Heen maman hea bahnón ta Papa Diosen hea janenishqui, jahuen raanti hen janon. Hani sca hen jaiya ta hehon shinanxon hea yohinishqui, jahuen baque hehqui raanxon. Jaatian sca tah hen pontenihqui. ¹⁶Hehqui cainxon ta hea yohinishqui judiomabo hean jahuen joi siri yohihi canon. Hea yohihah tah hen manataxma caniqui, tsoabi yohuanquhnoxon manayamaquin. ¹⁷Caibo jahuen raantibo rihbi neateman jan yohini tah hen Jerusalen janin jisi cayamaniqui. Arabia main tah hen caniqui. Jano canish tah hen Damasco jema janin joribiniqui.

¹⁸Noquen Hihbaan hea yohini pecaho quimisha bari hihquish tah hen Jerusalen janin sca caniqui, Pedro jisi. Rabe semanan tah hen hahbetan janiqui. ¹⁹Papan raanti huetsa tah hen jisyamaniqui, Jacobo huesti, noquen Hihbaan jochica. ²⁰Huishaxon hen mato yohihi ta hihcoinai siri qui. Hen tah hen quesayamahi. Papan ta honanihqui.

²¹Jaa pecaho tah hen Siria mai janin caniqui, Cilicia mai janin rihbi. ²²Judea mai janinha noquen huetsabaan ta hea jisyamanishqui. ²³Hea jisxonma ta joi res nincacannishqui, Noque tiromajaphonixon bi ta rahma Papan joi yohiscapiro, jaa joi queyocatsihpahonixon. Hea pontéscrai yohihah ta nincanishqui. ²⁴Hea noquen Hihbaan teemascai honanax ta Hihti siri bi res tah min qui Papan, hihcannishqui.

Jahuen hahbe raantibo

2 Catorce bari jano nichish tah hen Jerusalen janin caribiniqui. Bernabé rihbi ta hehbetan canishqui, Tito rihbi. ²Jano cahue noquen Hihbaan jaah tah hen caniqui. Nocoxon tah hen hean yohihi joi siri jato nincamaniqui, judiomabo hean yohipahoni joi siri jenquetsahpa hin hihxon janohahbo yohiquin. ¿Yanca tee tee hen Jain? Jaa majaquin hean coshicahinxon yohipahonihquin hihxon tah hen jaton xenibosca hahme rihbi yohinihqui. ³Hehbetan Tito cahi bi ta jaton nahua hihqui bi judiocahinax noquen honantiyapahue hahyamacannishqui. ⁴Moisesninyohini quescajati ta jaiqui, Papan jihuetahbo janon tah non jato honantiyati jai hih quesabo jai bi tah non jeen hahyamaniqui, ni pishcabi. Jaa quesabo ta noquen huetsabohicamahax hihcoxon noque quexenishqui, hahan honantiyamahiquin hihxon. Non tah non jato yohinihqui: Criston jihuetahbo janoxon tah non Moises nincati pishinyamahi,

Cristo qui hinamehxon jaa huesti sca nincaquin, hahquin. ⁵Criston joi coin huetsajayamahahbo hihxon tah non jato honantijati jeen hahyamaniqui. Criston joi siriya res man banenon, huetsa joi mato yohiyamahahbo.

⁶Jerusalen janinhahaan ta noque muhuinyamahiqui, hapo quescapahboxon bi. Papan jisí ta jatihibi jascapah rahsi qui. Hea nincaxon ta jahua hashoan yohiti pishinyamahiya Jasca tah qui hahxon, hean haxemahi joi qui jahuabi hashoan tsamanyamacannishqui. ⁷Jahua hashoan yohiti yohiyamacanquin. Judiobo yohinica Pedro hihnon quescajaribiquin Judiomabo yohinica hea hihnon Papan noque caisni jisxon, Man haxemahi quescajaquin haxemanahue hahcanquin. ⁸Judiobo nincamaquin sirijanoxon ta Pedroyaxon noquen Hihbaan jato nincamahiqui. Jascajaquin rihbi ta judiomabo nincamanoxon heyaxon judiomabo nincamahiqui.

⁹Hea rihbi Criston raanti joni hihqui jisxon ta Jacobo, Pedro, Juan, jaabo rahsi hapo quescapahboxon, Jascanonbonahue, judiomabo yohitannahue, noquen non judiobo yohinon hahcannishqui. Noque jascajaxon ta noque jomaquin sca hehbetan Bernabé jaton hahbe teenicabo copi noque mehuetannishqui. ¹⁰Jerusalen janinha yomanahtaibo non shinanbehnoyamanon ta noque yohicannishqui, jaa res. Noquen rihbi tah non yanapanti queenxon jascajati yohinihqui.

Pablonen Pedro ponteni

¹¹Jaa pecaho ta Antioquia janin Pedro jonishqui. Jan janoxon jaamajahiya tah hen ponte res yohinihqui caibaan nincanonbi. ¹²Jacobo janinhax huetsa hahbe judiobo nocorihyamahiya

ta judiomabo noquen huetsabo betanbi Pedronen pinishqui. Nocoscaiboya ta judiobo hahqui yohuanmis hihxon jato piquihnyama sca janishqui, huetsa shinan hahcajaquin. ¹³ Texe judiobo rihbi ta hahbetanbi huetsapahcahin-nishqui, jaton nahua betan pitimahi-camahi. Bernabé rihbi jascari, shinan cahcoya sca. ¹⁴ Cahcotax ponteyamas-caibo jisxon tah hen jatihibichin nin-canon Pedro yohinihqui: Mia tah min ju-dio hihquish bi judio quescayamahi ji-huetai. Judio quescapahmaxon *¿jahuá* copi sca min judiomabo judionon jato yohihin?

Jascapah rahi queyoyamanox manatai

¹⁵ Rabebi tah non judio qui. Noquen papabo cahen nincayosma nahuabo hihyamanish. ¹⁶ Moisesnin yohini quescabijaquin hahxon bi cah non jascaquin noquen hohcha potatimahi, Papan noque siri jisnon. Jesus Cristo qui hinamehxon non nincacoinaiya pari ta Papan noque siri jisiqui. Jaa copi tah non non rabebi hinamehniqui, jaan noquen hohcha sohuahiya Papan noque siri jisnon, Moisesnin joi nincacoinax jihuexon tah non hohcha potatimabiresai, tsoanbi. Judioxon bi tah non rabexonbi honanai.

¹⁷ Cristo huestichin ta noque hohcha sohuati hahtipahiqui, Papan noque siri jisnon. Judiomabo hohchayahpa hihqui quescra rihbi tah non hohchayahpabo qui, noque rihbi. *¿Jaa copi non Criston ta noque hohchamahiqui non hihihin?* Hihyamabiresi rahan. ¹⁸ *¿Non jenen ioi non bihtihin?* Joi siri jenenihxon pari, nincati joi copi. ¹⁹ Moisesnin joi ta no-quen nincati joima sca qui. Jaa joi nincacuqui jaxon tah hen hea hohchayahpa hihqui hen honannihqui. Hahqui mahu-atah quescaxon tah hen jaa nincayam-ascai. Noquen Papa Dios qui sca tah

hen jihuetai. ²⁰ Cristo betanbi tah hen mahuanhqui. Hen queenai quescayama sca tah hen jai. Cristo queenai quescas-crai, hahbetanbi jihuetai. Papan baque nincacoini tah hen jihuescrai, jan hehon shinanax hea copi hinamehni honanax tah hen nincacoini jihuescrai. ²¹ Noquen hohcha copi Cristo mahuani ta hani shin-an qui. Papan noque hahxonai jahuama quescapi tah hen jayamahi. Moises-nin yohini quescajaquin hahxon noquen hohcha potati non hahtipahiya cahen Cristo yanca res mahuatan.

Cristo huesti qui hinamehti

3 Honanmabo tah man qui, Galacia mehabon. Jatihixonbi nincacahbo tah non sirijaquin mato yohinihqui. Jesucristo noquen hohcha copi ji-huin hueonah mahuani mato yohiquin. *¿Tsoan paranh man huetsa joi sca bichin?* ² Nea res hea honanmanahue: *¿Jenquetsahaxon man Papan yoshin siri bihniquin?* *¿Moisesnin yohini quescajaxon nan?* *¿Noquen Hihbo qui hinamehxon man bihyamaniquin?* ³ *¿Yotiho honanyama man Jain?* *¿Papan yoshinya pe-hocohxon non mai mehabaan shinanai quescajaquin sca noquen shinan ca-jatihiin?* ⁴ *¿Papan mato yanca res hihti hahxonihquin?* Yanca hahyamapahinon. ⁵ *¿Jahuen yoshin siri mato hinanxon han-han rahtetijaquin Papan mato hahxonai cahran?* *¿Man jahuejahiya mato hahxoniquin?* *¿Man Moisesnin joi chibanaia-ya nan?* *¿Man nincacoinax noquen Hi-hbo qui hinamehtaiya nan?* Hinamehti rahan.

⁶ Papan Abraham yohini quescra tah qui. Abrahanen nincacoinaiya ta Papan siri jisnishqui. ⁷ Nincacoinaibo ta Abrahanen baquebo qui. Jaa cah man honanai. ⁸ Nincacoinaiya jatihibi jonibo Papan siribo jisyaxihqui ta neateman jaan yohinishqui. Abraham yohiquin: Min nincacoinai quescapahiya tah hen

jatihibi nahuabo hahxoncoinyaxihqui hihqui jan huishani joi.⁹ Jaa copi honan-nahue: nincacoinaiya Abraham hahxon-quin ta texe jonibo rihbi Papan hahxon-i qui, nincacoinaiboya.

¹⁰ Papan jato siribo jisnon hihxon Moisesnin joi chibanaibo ta jaan hahxon-aiboma qui; jaabo ta jaan casticanaibo qui. Huishani joi jai quesca tah qui. Nea quirica janin jai joi jatihibi tah man nincatihi, hahnoxon. Nincati pishi-naibo jatihibi tah hen casticantih hi-hqui jahuen huisha.¹¹ Moisesnin yohini quescajahibo tsoabi Papan siri jisyamahi ta huetsa huisha joi janin jaiqui, hahan honanti bi res: Papan siri jisi joni ta nincacoinax hinamehtax jihuetai qui, hi-hqui.¹² Moisesnin ta hinamehti yohiyanishqui. Nea joi nincaquin tah man hahqui jihuethi hih ta janishqui.

¹³ Moisesnin yohini casticanti noque qui paquepanan ta noquen casticanti bi-hxon Criston noque paxajanishqui. Huis-hani joi jai quesca: Jihuun hueonah ta casticana rahsi qui, hihqui.¹⁴ Jesucristonen noque hahxonni copi sca ta jan Abraham yohini quescajaquin judiomabo Papan siribo sca jisiqui. Jaa copi tah non nincacoinax hiname-hxon jahuen yoshin siri bihresscái, jan hinantijani.

Cristoyahpabo res Papan hahxonai

¹⁵ Non hinantijaquin hahcái quesa tah qui, heen huetsabaan. Mahuaquin noque hinantijahax noquen huetsa mahuatipi pecaho tah non tsoanbi jan hinantijaquin yohihipi joi huetsajayamahi, jahuabi tah non jaa joi qui rechiyamarihbibi.¹⁶ Papan ta Abraham jahuen baqueyabi hinantijanishqui. Hinantijaquin jan yohihi ta Miin baqueyabi tah hen jaa rahsi mia hinanyaxihqui, hahnishqui. Miin baqueboyabi hih ta jayamanishqui, hicha yohiyamaquin.

Huesti res, Miin baqueyabi, hihqui, Cristo yohihi.¹⁷ Hinantijanixon ta cuatrocientos treinta bari pecaho Moises sca huishamaxon jaa huisha join jan hinantijani joi Papan huetsajati hahtipahyamanishqui.¹⁸ Moisesnin joi cananquin hahcajaquin jonibaan jahuen jihuetai bichiya cahen jan hinantijani quescayama sca jaquehahna. Jascabi hinanresti cahen jan Abrahan yohinish.

¹⁹ ¿Jascaraiya jahua copi sca Moises huishamanishquin? hih ra tah man jai. Jaa joi ta hahan honanti qui, jenquetsahpa tiromanicahbo non quin non honannon. Jahuen quiquin baque jonon caman res jaa joi nincacahbo ta Moises huishamanishqui, jan hinantijani jahuen baque noconon caman. Jahuen yonotiboyaxon ta Moises ninca-manishqui, yohinicahxon Moisesnin sca jahuen caibo yohinon. Hicha yohihibo jaiya ta yohuanxonnicá hihquitihiqui.²⁰ Huestichin yohihiya cahen yohuanxonnicá pishinyamascan. Hinantijaquin ta Papa huestichin yohinishqui, jaa copi tah non yohuanxonnicá Moises pishinyamascai.

Jato haxemanoxon Moisesnin yohini

²¹ Papan hinantijati joiya Moisesnin joi bahi cahchinanicama jayamahiquin hih sca rah tah man jai. Hiyamahi rahan hih sca tah hen jatihi. Moisesnin huishani joi hahan jihuetai joi hi-hquiya cah non jaa joi nincaquin noquen hohcha potati hahtipahan.²² Jaa join tah non honanai, hohchayahpabo rahsi non hihqui. Jaa copi ta Jesucristo qui hinamehtaibo rahsi qui jan hinantijani Papan hinanyaxihqui, jaa nincacoinaiboya.

²³ Jesucristo qui hinamehti noque yohiyamaraparixon ta Moises pari Papan huishamanishqui, jaa joi jai quescabijahi non jihuemon. Jasca tah non japhoniqui, noquen Hihbo qui hiname-

hti noque yohiscanon. ²⁴Jaa copi ta Moisesnin joi noque hanijaquin hahcajaquin quescanishqui, non Cristo sca bihnnon. Hahqui hinamehtax hohchajomabo sca Papan noque siri jisnon hanijaquin hahcajaquin noque honanmaquin. ²⁵Ma hinamehscaa tah non hanijanicas pishinyamascai.

²⁶Jesucristo qui hinamehtax tah man Papan baquebo rahsi qui. ²⁷Cristo qui nashimaha tah man Criston sahuemaha jahuenahbo rahsi sca qui. ²⁸Judioboya nahuabo tah non hihyamascai. Patoroy-ahpaboya patorojomabo hihyama sca jai. Haiboboya bebobo hihyamascai. Jatihibi scah tah man Criston yoraya qui, jaa huesti. ²⁹Cristonah hihquish tah man Abrahanen baquebo sca qui. Abrahanen baquebo man jaiya cahen mato hinanti-janixon Papan mato hinantihu.

4 Non japahoni ta patoronen jahuen baque hanijati yohihi quesa qui. Baque pishca parihax ta jahuen papan joni quescapah qui, jahuabi hihboyamahi. Jahuen papan jahuaborabo jatihibi hihboyahnoxihqui bi jahuabi hihboyamaparihi. ²Haxemanicahton haxemahah ta haxehiqui. Hanijanicahton yohihah, nincaquin, jahuen papan yohini nete noconon caman. ³Jascapahbo tah non japahoniqui. Cristo qui hinamehyamaparixon tah non baque pishca hahcajaquin noquer nincati joibo nincapahonihqui, haxehax noquer xenibo hihni quescari jihueyahnoxon. ⁴Non jascapahbo jihuetai bi ta jahuen raanti nete nocoscaya jahuen baque Papan raannishqui. Jaan raanah ta haibaan baquexo sca cainnishqui. Moisesnin yohini quesa ta jaxonnishqui. ⁵Noque ta hahxonishqui, Moisesnin joi nincaqui non jihueyamascanon, Papan baquebo sca.

⁶Jahuen yoshin siri ta noquer jointi janin Papan jananishqui, jaan yohuan-maha non Papan hihnon, noquer joinbi. Jaa copi honannahue, Papan baquebo man hihqui. ⁷Hinabo tah man hihyamascai, Papan baquebo sca. Jahuen baquebo jaan mato hihmahah cah man jahuen baqueboxon jan hinantijani man bihtihi.

Shinan rabeyahpabo qui Pablonen masa shinanai

⁸Noquer Papa Dios honanyama-parixon tah man huetsajaquin shinapahonihqui, huetsabo dios hihqui man shinanah bi tah man jaamajapahonihqui. ⁹Papa Dios tah man honanscaniqui. Hashoan ponte yohuani tah hen Papan ta mato honannishqui, hih hen jatihi. Jascapahboscaxon, jenquetsahpahi man japahoni quesa sca hahan hanitima shinanbo man bibrabicatsihquin? ¿Jenquetsahpahi man yanca res yohuanai joi chibanrihbicatsihquin? ¹⁰Netebo, hoxnebo, baritianbo, jenetianbo, jascapahbohiya tsinquinicabo tah man qui Papan noquer siri jisnon hihquish tsinquit. ¹¹Jaa copi tah hen tiromajaquin shinanai. Yanca bi res cahran hen Papan joi mato nincamaniqui hih tah hen jai.

¹²Mato tah hen hihti yohihi, heen huetsabaan. Hea hihqui quescanahue. Mato quescapah tah hen janiqui. Hea janu cahiya tah man nincanihqui. ¹³Hisinax copi tah hen mato qui banenihqui. Hisinax banexon cah hen Papan joi siri mato nincamani. ¹⁴Hea hisinyahpa que bi tah man hea rahninxonma Johue hahniqui. Hea tenexon tah man Papan yonoti yohiquin hahcajaxon hea Johue hahniqui. Jesucristo yohiquin hahcajaxon hea sirisaquin bihquin. ¹⁵Hen yohihah tah man hihti jenimaniqui. Hahtipahxon

tah man maton bero tsecaxon hea hinanquehannihqui. ¿Jahua copi sca man shinan huetsajahin? ¹⁶ ¿Hen mato pontejaquin yohihah man maton rahui sca hea jisin?

¹⁷ Mato tiromajanoxon ta Maton tah man sirijahi hihcaniqui. Bahi xehpoquin hahcajaquin ta mato mayamacat-sihcaniqui, huetsa bahi man chibanon hihxon. ¹⁸ Sirijahiton yohihah ta siri qui, Mian tah min sirijahi hahquin. Jaa ta jatihibi tian yohihah siri qui, heen baquebaan, hea mato janin hi-hquiya, hen janohiyamahiya, jascar-ihbihi. ¹⁹ Man Criston shinan bihnon tah hen hihti queenai, heen baquebaan, hisini quesca tah hen jai. ²⁰ Jen-quetsahpa shinanya man quin hihxon tah hen masa shinanai, heen jananbisci mato yohinoxon hea janohiyamahiya. ²¹ Moisesnin yohini joi chibancatsi-hxon hea yohinahue. ¿Nea jahuen huis-hani joi man honanyamahin? ²² Abrahanen ta rabe baque janishqui, huetsa cahen jahuen xobohoxon teexonnicaah haibo quihah, huetsa cahen jahuen haibo quihah. ²³ Huesti cahen jaanbi jahuen hina haibo qui baquejanish. Huetsa cahen jahuen haibo quihah, jaa jayaxihqui Papan yohinahue. ²⁴ Jaa haibo rabe janí quesca ta rahma jaibo qui. Rabejaquin Papan yohini quesca tah qui. Jan yohimenoni ta Sinaí mahchi janinxon noquen xenibo yohinishqui, hinapan baquebo sca jaábo. Agar ta jaa hiná qui, jahuen Jane. ²⁵ Agar ta jaa Arabia mai janin Sinaí mahchixon yohini joi quesca qui, rahma jai Jerusalen quesca. Jahuen baquebo ta hinabo qui, jaton mama quescapahbo. ²⁶ Huetsa ta quiquin Jerusalen qui, hinama, jaa cahen noquen mama. ²⁷ Huishani joi jai quesca tah qui:

Agarya Sara

²¹ Moisesnin yohini joi chibancatsi-hxon hea yohinahue. ¿Nea jahuen huis-hani joi man honanyamahin? ²² Abrahanen ta rabe baque janishqui, huetsa cahen jahuen xobohoxon teexonnicaah haibo quihah, huetsa cahen jahuen haibo quihah. ²³ Huesti cahen jaanbi jahuen hina haibo qui baquejanish. Huetsa cahen jahuen haibo quihah, jaa jayaxihqui Papan yohinahue. ²⁴ Jaa haibo rabe janí quesca ta rahma jaibo qui. Rabejaquin Papan yohini quesca tah qui. Jan yohimenoni ta Sinaí mahchi janinxon noquen xenibo yohinishqui, hinapan baquebo sca jaábo. Agar ta jaa hiná qui, jahuen Jane. ²⁵ Agar ta jaa Arabia mai janin Sinaí mahchixon yohini joi quesca qui, rahma jai Jerusalen quesca. Jahuen baquebo ta hinabo qui, jaton mama quescapahbo. ²⁶ Huetsa ta quiquin Jerusalen qui, hinama, jaa cahen noquen mama. ²⁷ Huishani joi jai quesca tah qui:

Baqueyosma ta baque bihyamanish bi hihti jenimascaiqui. Jahuentianbi camitaxma bi ta jenima behuahihqui. Baquejoma hihnish bi ta hicha baqueyahpascaiqui, beneyahpa haibo mahuinbahinquin hihqui jaa huisha joi.

²⁸ Mato tah man Papan hinanni baquebo qui, jan hinantijani. Isaac quesca tah man qui, hea huetsabaan. ²⁹ Jaa hina haibaan baquebaan neateman Dios Yoshiman baquebo tiromajapahoni quescajaribiquin ta rahma jacanihqui. ³⁰ ¿Jaabo yohiquin jahuaja hen Papan janishquin? Jaa baqueyabi hina haibo potahue, hinapan baquen ta hinantijani baque betanbi heen hinanti bihtimahiqui, hahquin. ³¹ Jaa copi honannahue, hea huetsabaan. Hinapan baquebo tah non hihyamahi. Quiquin haibaan baquebo tah non qui.

Man queenai quescaji jihuolahue

5 Hinabo non hihyamascanon ta Criston noque piconishqui. Papan noque siribo jisnon tah non Moisesnin yohini quescajatihi hihxon mato hihboyahpabo hihmarihbicanmis. Hiná tejoquin hahcajaquin mato bihcanmis. Jato nincayamanahue.

² Hea Pablonen tah hen mato hihti yohihi: Papan mato siri jisnon hihxon hahan judio honantiyahpajaquin mato yora man honantijahiyta Criston mato jahuabi hahxontimahiqui. ³ Jasca-jaquin hahan honanti bichibo jatihibi tah hen sirijaquin mato yohihi: honantiyahpaxon tah min Moisesnin yohini jatihibi sca min hahtihi, jahuabi pish-inmayamaquin. ⁴ Papan mato siri jisnon hihxon Moisesnin joi chibanax tah man Cristojomabo sca qui, Papan mato hahxonni tah man yamascai. ⁵ Noquen tah non hinamehxon jan noque siri jisi non honanai. Jahuen yoshin siripan noque

manahah tah non tenehi, jan noque hahxontijani hihti jiscatsihquin. ⁶ Jesucristo qui hinamehtaiboxon tah non nincacoinxon joni huetsahon shinanti jai, jato betan yanapanhananani. Judio honantiyahpa jaah ta jahuajoma qui. Jaa honantijoma jaah jahuajoma rihbi.

⁷ Siripi tah man nihpahoniqui. ¿Tsoan pantehah man joi coin nincayamascain?

⁸ Jaa nincacointi shinanyama man jai ta noquen hihbaan mato hinanyamahihqui. Mato quenanixon ta jascapah hinanyamahihqui. ⁹ Hichatahma hahan paan soohihmati niahah tonco moanman soohihqui quesca tah man jai. ¹⁰ Hen mato yohihi quescabijaquin tah man shinanxihqui. Honan tah hen jai. Criston ta mato yanapantihiqui. Mato jatsanjahibo ta Papan casticanyaxihqui. Tsoabo rah ta qui.

¹¹ Judio honantiyahpati ta jai qui hih roqui hea jai. Jascari yohuanpanhonish bi tah hen jascayamasca. Jaa copi ta hea tiromajacaniqui. Honantijati yohixon tah hen Cristo qui hinamehti yohiyamaquehanai. Tsoabi ta hehqui sinayamaquehanihqui. ¹² Mato honantijacatsihquin jatsanjahibo jaabobi xatehihtax jobojomascapahinon hih tah hen jai.

¹³ Moisesnin joi nincaqui jihueta ta Papan mato yohiyamahihqui. Man queenai quesca jihueta ta yohihihqui, heen huetsabaan. Man queenai quescarax jihuetax bi man hihpahoni quescayamanahue, mai mehabaan shinanai quescayamahi. Joni huetsahon hihti shinanxon, joni huetsa yanapanquin hahxoncoinnahue. ¹⁴ Papan huishani hani joi ta nea qui: Miin hahbe jihuetai jonihon shinanhue, min miabi shinamehtai quescajaquin, hihqui. Jaa joi huesti nincaxon hahxoncoinquen tah non Moisesnin yohini jatihibi hahresscrai.

¹⁵ Yohinahnen hahcajaquin man joni huetsa jamis joni huetsa piquin xehahihnihax man queyocahinmis.

Rabe shinan:

Dios Yoshimana,
mai mehabaana

¹⁶ Papan yoshin siripan mato shinanmahi quescanahue. Jaatian tah man mai mehabo queenai quescayamascatihi. ¹⁷ Mai mehabo queenai quescati ta huetsa qui, neaho jahui. Dios Yoshin queenai quescati ta huetsarihbi, jaho cahi. Noque nininanbehcoinai shinanbo tah qui. Huetsa, jonibaana. Huetsa, Dios Yoshimana. Jaa copi tah man man shinanai quescajacatsihqui bi huetsan ninihah man hahyamascai. ¹⁸ Jaa copi ta Dios Yoshiman mato shinamaha man Moisesnin huishani nincati pishinyamascai.

¹⁹ Mai mehabaan shinanbo ta honantih bi res qui: tsiniti, rishtaya yohuanti, huetsa haibo betan hihresti, ²⁰ yoshinbo qui samati, yobeti, sinati, rehtenanti, yohuashihi, sinajati, notsiti, huesti shinanya hihtima, joni huetsa qui rainyamati, ²¹ caibaan jahuaborabo bichinti, joni rehteti, pahenti, pahenax cahtimahti, texe jascapa shinanbo rihbi. Hen mato yohini quescajaquin tah hen mato yohirihbiscai, jascapahbo shinanya ta Papan jihue janin hihcotimabiresihqui.

²² Dios Yoshiman hinanai shinanbo ta nescapahbo qui: joni huetsahon shinanti, jenimahi jihuetai, joni huetsa betan coincoini jihuetai, teneti, sirijaquin yohuanquihnti, caibo hahxonti, nincacointi, ²³ sinaxonma honaxonbi yohiti, yobacahinti. Jascapah ta siri qui. Jascatima joi ca jahuensi yamahi. ²⁴ Criston joniboxon tah non retequin hahcajaquin noquen mai meha shinanbo potanihqui, mai mehabo queenai quescayamascai, mai

mehabaan shinanai quescayamascai.
²⁵ Dios Yoshiman noque jihuemaha, jaa queenai quescari sca jihuenahue.

²⁶ Shinanihcamaxon paranaibo hihiyamascanahue, joni huetsa qui rainyamayamascai, huetsa jonin jahuabora jisish jahuena hean bihpahinon hihiyamascai.

Yanapanhanannahue jato jai

6 Jaamajahax hohchataiton noquen huetsa meraxon, Dios Yoshiman shinanmahiboxon honaxonbi yohixon pontenahue, sirijaquin yohixon. Coiramexon yohinahue, mato rihbi man paquemis. ² Hiacaibo yanapanquin hahcajaquin noquen huetsabo teneti yanapannahue, tenehahbo. Jascajaquin tah man Criston yohihi quescajatihi.

³ Jahuabi hihiyamahax bi hihi shi-nayahpa hihqui shinanax tah non paramehscrai. ⁴ Jenquetsahpa hin hihxon miin jihue jise. Jaatian tah min hicha tahni sca shinan jaax, hen tiromaphoni quescayama sca tah hen jai hih min jatihi. Caibo tah hen muuinai hih tah min jatimahi. ⁵ Jatihibichin pa-pquin hahcajaquin tah non tenetih noquenahbi.

⁶ Papan joi mato yohihi joni yanapannahue, piti siriboya jahuaborabo jatihibi hinanquin.

⁷ Paramehyamanahue. Jan yohini quescabijaquin ta noquen Papan jaiqui: man nincayosmamis, Non bananii quesa tah non jai. ⁸ Non queenai quescajaquin mai meha shinanbo bananixon tah non tiromabo bihtihi. Dios Yoshin queenai quescajaquin jahuen shinan siri bananixon tah non queyoyamanox manati bihtihi. ⁹ Caibo sirijaquin hahxonji jatsanyamanahue. Non yosmayamahiya ta jaa queenai tianbi copiquin sca noquen Papan noque

sirijaquin hahxonrihbiyaxihqui qui. ¹⁰ Jaa copi hahtipahxon tihibi joni huetsa hahxonquin yanapannahue. Noquen huetsabo hashoan hahxonquin yanapanquin.

Queyonoxon jan hihti yohihi

¹¹ Heanbi tah hen nea huishahi. Haniboaquin hen huishahi jisnahue.

¹² Jaton jonibo man janon ta mai mehabaan mato hahan judio honantiyahpati yohicanniqui. Papan noque siribo jisnon ta mahuaquin Criston hahxonnishqui hihtihi bi ta judiobo jato qui sinamis hihxon, honantiyahpati yohicaniqui. ¹³ Jaa honantiyahpabaan ta Moisesnin yohini quescajayamacaniqui. Jaabo tah non honantijatanai hihnoxon res ta mato yora honantijacaniqui. ¹⁴ Mahuaquin ta noquen Hihbo Jesucriston hea hahxonnishqui. Jaa huesti copi ta Papan hea siri jisiqui. Huetsa joi ta yamabiresi qui. Criston hea hahxonah tah hen mai mehabaan shinan queenyamabiresai, muuatuhbo quescari. Hea rihbi jascapa shinan qui muuatuh quesa, hehqui jotimascai. ¹⁵ Papan jisi ta judio honantiyahpabo jahuen siriboma qui. Jaa honantijomabo rihbi jahuen siriboma. Behna shinayahpa jonibo res ta jaan siribo jisiqui. ¹⁶ Behna shinayahpahax jihuetaibohon Papan shinannon, jan jato hohcha sohuanon, hih tah hen jai, jahuen quiquin israelibo yohihi.

¹⁷ Moisesnin huishani joi copi hea yocayamascanahue, hih tah hen jai. Heen yora janinbi tah hen hahan honanti hicha jai. Jesusen joi hen yohihi copi hea rishquiniboa nabaya tah hen qui.

¹⁸ Noquen hihbo Jesucriston shinan maton jointi janin janon tah hen yocaxonai, hea huetsabaan. Jascari rahan.

EFESIOBO

Efesiobo qui Pablonen raanni joi

Efeso janin jihuetaibo qui raanti

1 Noquen Papa Dios queenaiya ta Jesucristonen hea yohinishqui, jahuen raanti hea Pablo janon. Jahuen raantixon sca tah hen mato yohihi, ²Man jascabijaquin Cristo chibanyamahin, Criston baquebon? ²Hashoan sca noquen Papa betanxon noquen Hihbo Jesucristonen mato hahxonrohayamahiquin hih tah hen jai, hea huetsabaan. Jaan mato sirijaquin shinanmayamahiquin hihxon tah hen nea joi pishca raanai.

Criston noque hahxoncoinai

³Noquen Hihbo Jesucristonen Papa ta hihti siri qui hihnahue, heen huetsabaan. Jahuen naihoh queha shinanyahpabo sca non janon hihxon ta noque hihti hahxonnishqui. Noque hahxonquin ta jahuabi cahneyamahihqui, non Criston baquebo quen. ⁴Naiyahpa mai hahriyamaxon bi ta noque caisnishi, non Cristo bihyaxihqui honanxon. Ponte siribo non janon hihxon ta noque caisnishi, jaan jisi jahuabi tiroma non yamanon. ⁵Non jariyamahi bi ta noquehon hihti shinanxon yohinishqui jahuen baquebo sca non jayaxihnon. Hahmebi shinanax queenxon copi ta jascajanishi. Jesucristo bichish jahuen baquebo sca non janoxihnon. ⁶Non Cristoyahpa quen jan noque hihti hahxonai jisish ta Papa Diosen ta hihti coshi shinanyaxon jato hahxonresiqui jayaxihcanihqui. Jascari jaahbo hihxon ta Papan noque caisnishi, hea huetsabaan. ⁷Noque copi ta jahuen jimi potanishi, noquen hohcha sohuanoxon. Non tiromani que

bi ta Cristo nonbihni quen Papan noque siri jisiqui. Criston noque jascajaxonai copi ta noquehon shinanax non tiromani Papan shinanyamascaiqui. ⁸Jatihibi honanyaxon ta jan honanai quescajaquin jascapahbojaquin noquen Papan noque hihti hahxoniqui. ⁹Jascajati queenxon jan noque huesti yoraja sca jayaxihqui ta tsoabi nincamayamanishqui. Tsoabi nincamayamanixon bi ta noque sca jaan nincama sca jaiqui, jan shinannihbo non nincascanon hihxon. ¹⁰Hen jato caisnixon haxemabonanixon sca jaton hohcha sohuaxona sca ta huesti yora sca jaticaniqui. Naihoh quehaboya nai naman mehabo huesti yora sca janon hih ta janishi, Cristo huesti sca jatihibichina janon noquen hihbo.

¹¹Non jarí janonma bi ta Papan shinannishqui, jaanbi jan shinanai quescabijanicaxon noqueyaxon jahuen coshi shinan jismati shinanquin. ¹²Non jascahiya ta Papan yohinishqui, noqueyaxon jahuen coshi shinan jismati. ¹³Maton rihbi sca tah man Cristo betan jihuenoxon nincacoinnihqui. Maton hohcha copi ta Cristo mahuanishqui hihcoinai nincaxon tah man Cristo bihcoinbihqui. Man nincacoinaiton ta jahuen yoshin siri rihbi mato hinanxon mato honantjanishi, Cristonahbo man hihqui man honanscanon. Jan jascajaquin noque qui Dios Yoshin hinantihi ta neateman noque yohinishqui, joi huishamaquin. ¹⁴Jahuen yoshin siri jan noque hinanscái quen tah non noquen Papa betanbi non jihueyaxihqui non honanrihbihi. Tsoanbi noque jahuen yoshin bichintimahi honannahue. Cristo noque bichi joyazahnon caman tah non jaaya hihtihi. Nea hen mato yohihi joibo honanax, noquen Hihbo ta hihti siri qui hihqui jihuenaheue.

**Shinan jato hinanxonhue
Papan, Pablonen jai**

¹⁵ Jan noque hahxonai copi tah hen mato yocaxonai, heen huetsabaan. Man noquen Hihbo Jesus nincacoinxon jahuen jonibo jatihibi man siribojaxonai yohihipi tah hen Hahxon tah min jato jai Papan hih hen jai. ¹⁶ Jascabibi jascaxon tah hen mato jaayocaxonai, hea huetsabaan. ¹⁷ Papan Dios, mia tah min noquen Hihbo Jesucristonen Papa Dios qui. Mia tah min Shinan Hihbo qui. Miin coshi shinan jato hinanxonhue, Papan. Shinancoinya jaahbo jato hinanpaquehue. Hashoan sca mia honanbonahahbo jaton jointi janin miin shinan siri niaxonhue. Mia honanbonahi jihuetauhbo jato hinanxonhue Papan, hih tah hen jai, mato yocaxon. ¹⁸ Papan mato caispaqueni quen jenquetsahpabo sca man jaa janin jayaxihquin man honannon hihxon tah hen mato yocaxonai, hea huetsabaan. ¹⁹ ¿Nai hoque jahuen baquebo janon janon hihxon Papan mato bexojaxonai jahuentiho siri quin, heen huetsabaan? Man honannon hihxon tah hen mato yocaxonai. ²⁰ Jahuen coshin ta Cristo teehihmaribinishqui. Jaa huenihhniribixon ta naihoh sca jaa mecayahoh, janoxon jatihibi hihbojati janin jan tsahonon, jano jaa tsahomaribinishqui. ²¹ Jaa huestichin sca ta jatihibi yohuan hihbo, jatihibi quiquin yoshin, jatihibi hapohhuan, jatihibi yonomis, jatihibi res jaan jato huinonihqui hashoan hihbojaquin. Jatihibi ta mahuiniqui, naihoh quehabo, nai nequebihahbo rihbi. Rahma jaibo, jayaxihquibo rihbi. Jaa mahuinnica ta yamahihqui.

²² Jatihibichin hihbo jahue hah ta Papan jaa janishqui. Noque jahuen baquebo rihbi sca janon ta yohinishqui, Cristo sca noquen hihbo hihnon. ²³ Noque tah non Criston yora sca qui. Jatihibi tian jatihibi janin hihnicahax bi ta yorayahpa rihbi qui, noque cah non jahuen yora.

**Noquehon shinanxon
Papan jihuemahi**

2 Man tah man jirijomabo japahoniqui, hea huetsabaan, maton hohchapan mato retehah mohitahpamabo Papan mato jisquin. ² Texe hihqui quesvari tah man tiromahi janiqui. Quiquin yoshiman jihuetauhbohax tah man jan queenai quesvari man japahoniqui. Tiroma shinanbo hinanpaquenicaxon ta nincayosmabo qui hinanquin mato qui rihbi jascapa hinannishqui, man bihresnon. ³ Noque rihbi tah non jascapabo rahsi japahoniqui nincayosmabohax honanmabohax yohina quescapahbo japahonihqui. Queenax quesvari tah non tiromapahoniqui. Shinanquin bi tiromajaquin shinanrihbiquin. Texe hihqui quesvari tah non jascapahbohax non Papan sinatahbo janíqui, jan casticanyaxihquibo. ⁴ Non jascapahbo hihqui bi ta shinanyahpaxon noquehon hihtí shinanxon hahxonquin Papan noque hahquirihbi teéhihmanishqui. ⁵ Noqueyabi hahquirihbi Cristo teehihmanixon ta noque mohitahpaboo sca janishqui, Cristo betanbi non jihuemon. Jahua copi mato hahxontimahi bi ta queenxon res mato queyóyamanox sca manataibojahiqui, heen huetsabaan, man jirijomabo japahoni que bi. ⁶ Noqueyabi Jesucristo teehihmanixon ta noque yohinishqui: Naihoh sca cahax hahbetanbi tsahopaquehue. Jahuenahbo sca tah man qui hahquin noque yohiquin. ⁷ Jan

noquehon hihti shinanai ta jatihibi jayaxihquibo rahsichin honanahbo hihxon noque jascajaxonihqui. Non Jesucristonahbo copi ta jascajaquin jan noque hahxonihqui. Jatihixonbi honanahbo hihxon rihbi ta jascajaquin noque jihuemanishqui.⁸ Jahua copi hahxontimahi bi ta queenxon res mato queyoyosmabo hahxonihqui. Man nincacoinaiton ta jascajaxonihqui, hea huetsabaan, man siripi janí que ma bi.⁹ Man sirijaquin hahcai copima ta mato queyoyosmajahiqui, heen huetsabaan. Jaa copi tah man Hen sirijaquin hahcai copi ta hea queyoyosmajahiqui hih man tsoabi jatimahi.¹⁰ Papan jonijanibo tah non qui, hea huetsabaan. Joni huetsahon shinanxon yanapanmisbo non janon hihxon ta jascapa shinan noque neateman hinantijanishqui. Jayaxon non joni huetsa hahxon jihuenon sca ta Jesucristonahbo janahue hahquin noque jonijanishqui.

Criston hahxona jahuen jihuetaibbo sca

¹¹ Shinannahue, hea huetsabaan. Noque judiobaan xohta yamanica Israel ta Papa Diosen yohinishqui, jahuen chini baquebo caixon jahuen joi sca chibannicabo sca non janon, jahuen honantiyahpahax noque rabsibi non jihuerihbinon. Jaton mequeman sca noquen papabaan noque honantijahah tah non jaa honantiyahpaboxon mato yohihi nahuabon non mato japahoniqui, maton yora janin jaa honanti yamanah quen. ¹² Cristojomabo tah man japahoniqui. Noquen caibomahax tah man noquen hihquihintima japahonihqui. Jahuen caisai joni jan noque qui raanxonti Papan yohinib bi tah man shinanyamapahonihqui. Ni jenquetsahax bi Papa qui catimabo tah man japahoniqui, Papa Dios honanyamahibo. ¹³ Hocho jihuetaibo

quescapahbonish bi tah man jascayamascai. Mahuaxon Criston mato jihuemaní quen tah man nea pishca sca jai, Papa janin sca.¹⁴ Criston ta noque rabebi raejanishqui. Moisesnin noque yohini quescajayama man jani quen tah non mato jistahihmapahonihqui. Non jascapahbo jani que bi ta Moisesnin yohini quescajaquin Criston sirijaquin hahxonishqui, non hahtipahyamahi bi, hea huetsabaan. Yorayahpahax main jihuexon ta hahxonishqui, non hahyamascanon. Non rabe jonibo japahoni que bi ta noque huesti yoraja sca janishqui. Jema naponbi chique jai fotojaquin hahcajaquin ta non janó huesti jihuenon Moisesnin noque yohini joi noque hahxonquin jaa joi queyoxonnishqui noquen hahtima sca jaa joi janon.¹⁵ Behnabohax huesti yora sca non janon hihxon ta hahxonishqui, rabebi yorabo noque huestijaquin, jahuenah sca. Jaa copi tah non sirijaquin sca shinanai.¹⁶ Noquen shinan noque rabebi pontequin ta jahuen Papa janin noque rabebi hioyahnoxon noque copi mahuanishqui. Mahuaquin ta hahan nincayosmati shinan jaan noque sohuaxonnishqui, hea huetsabaan.

¹⁷ Jascajaxon ta mato hocho hihquibo nincamahiqui man shinanquin sirijabahinnon. Hochoma hihquibo rihbi ta nincamarohahiqui, noquen rihbi non shinanquin sirijabahinnon.¹⁸ Dios Yoshinyaxon ta noque hiohikhqui, rabebi jonibo non Papa janin sca hihnon. ¹⁹ Jaa copi tah man noquen nahuaboma sca qui, hea huetsabaan. Noque rihbi maton nahuaboma. Papan jihuetaibbo sca tah man qui. Mahbe nincacoinaiboxon tah non mato yohihi, noquen caibon hahquin.²⁰ Shinan hihboxon ta xobojaquin hahcajaquin Jesucristonen noque huesti yorajahiqui, hea huetsabaan.

Noque ta bihresyamahihqui. Jahuen joi yohinicaboya jahuen raantibo raanxon ta joi nincamaxon noque tsinquihihqui. Hahqui xobojati hahcajaquin hahqui pehi pohentibo, hahan xehuatibo hahcajaquin noque tsinquihihqui.²¹ Jaya sca sirijaquin xehuahihnbahinquin hahcajaquin ta huesti yorajahiqui. Non hichahi bi huesti yora janin noque jatihibi niaquin, jahuen jihuetahbosca. Jaa rihbi noquen Hihbo hih.²² Mato rihbi ta jano niahihqui, hea huetsabaan. Jahuen yoshin siri jano jihuemon ta mato jano jihuetajhiqui.

Judiomabo yohinica Pablo jai

3 Jaa copi tah hen mato yocax-
onai, hea huetsabaan. Mato heen caibomabo hen Jesucriston joi nincamaní quen ta sipo xoboho hea tsahoncannishqui. Tsahonnihbo ta rahma caman hea Pablo neno tsahotai.² Mato-
hon jan hihti shinanai yohinica hen janon ta Papan hea yohinishqui. Jaa rah tah man honanscái, caibaan yohini.³ Neateman jato janibijaquin yohiyamanikhon bi ta Dios Yoshiman hea honanmascái qui. Jaa tah hen pishca yohi-
sca jaahqui, nea huishaquin.⁴ ¿Papan raanah jahuejahi Cristo jonishquin hen honanyamahi shinan man Jain? Nea hen huishahi jisxon tah man hen honanbiresai man honanbonatihi.⁵ Noque jahuen raantiboya jahuen joi chanini-
cabo ta rahma tahni honanmascan-
ishqui. Jahuen Yoshin siriyanon noque honanmaquin. Neateman ta jascajaya-
manishqui. Neateman ta jihuetahoni-
hbo texe res honanmapahonishqui, hea huetsabaan.⁶ Papan jihuetahboxon ta jahuen jihuetai janin jihuetai judiobaan shinannishqui. Shinanxon bi ta jaton cai-
bomabo rihbi jaton hahbe jihuetahbos-
tatihi shinanyamacanpahonishqui. Jat-
ton Papa Dios maton Papa rihbi jatihi shinanyamacanquin. Papan jato hahxon-

tihi shinanxon bi jan mato hahxontimahi shinancanquin. Jesucriston joi ninca-
coinax man hahqui hinamehtai copi
mato rihbi man Papan baquebo hihtihi
ta shinanyamacanpahonishqui.

⁷ Jahuen joi nincamanica hen janon hihxon ta noquen Hihbaan hea yohinishqui. Jatohon shinanxon Papan jato hihti hahxonai yohinica mia jahue hahquin ta hea tee hinannishqui. Heanbi shinanxon hen jahuejati hahtipahyamahi bi ta jahuen coshi shinanyaxon jaan hea teemahiqui.⁸ Hean shinanah texe nincacoinaibo hashoan siri que bi ta hehon shinanxon jaa tee hea hinannishqui. Jahuen shinan hihti caibohiya tah non shinanhantannoxon caman topónxon bi jahuentihi shinanya hin hihxon non topónquin queyotimahi. Hea jahuama que bi ta heen caibomabo yohiti tee hea hinannishqui, jahua Papan shinanihquin honanahbo.⁹ Nai, mai, neno jaibo rihbi jonijariyamaxon ta jan hahyaxihquibo jatihibi Papan shinannishqui, Cristoyaxon matoya noque huesti jonijati shinanquin. Jascajati shinanihxon ta jato yohipahonishqui. Yohiquin bi ta texejanishqui. Rahma pari ta jaa jone joi noque sirijaquin yohixon honanmascanishqui, hen sirijaquin yohiscanon hihxon.¹⁰ Noque jahuen caisahbo ta naihoh queha yoshin coiman jisiqui, jahuen sontaro hapobo betanxon. Jaabaan jisxon honan sca jaahbo hihxon ta Papan hea joni huetsa yohimahiqui. Jatihibi jahuen joi nincamayamanihxon bi ta rahma Papan noque nincamahiqui. Noquen Papa jahuentihi honanya quin honanahbo tah hen yohiti jai.¹¹ Neateman bi res jascajati shinanihxon quescabijaquin ta noquen Hihbo Jesucristoyaxon noque bihxon jahuen shinan jenquetsahpa quin non honannon hihxon jaan

jismascaiqui.¹² Noquen Hihbaan noque hahxonni copi tah non raquexonma hihtimahxonma rihbi noquen Papa non yocacai. Non yocacah ta Papan nincatihqui. Jesucristo qui hinamehxon tah non Papan noque nincatihi non honanai.¹³ Hen mato yohihi honanxon tenenahue, hea huetsabaan. Hen mato nincamahi copi nahuabaan hea sipo xoboho tsahonyaxihqui que bi ta hean mato nincamati noquen Hihbaan yohinishqui. Jaa honanxon masa shinanxonma tenenahue.

Noquehon Criston hihti shinanai

¹⁴ Mato tah hen yocaxonai, hea huetsabaan. ¹⁵ Noquen Papa Dios ta jatihibichin papa qui, naihoh quehabaana, nai naman mehabaana rihbi. Nescajaquin tah hen yocaxonai: ¹⁶ Miin coshi shinan jato hinanxonhue, Papan. Hani shinan hihboxon jato mehepaquehue. Miin yoshin siripan jaton jointi coshijamahue. ¹⁷ Jaton shinanbo hihbojanoxon hahan nincati shinanbo jato hinanpaquehue, Hihbon. Joni huetsahon shinanhahnani jihuexon jahuentianbi mia jenebahintima shinan hinanxonhue jato. ¹⁸ Miin jointiboyaxonbi min jatohon shinanai honanahbo, miin shinan siri jato hinanhue. Jahuentiho queen min jatohon Jain honanahbo jato jascajaxonhue, Hihbon. Nincacoinaibo rahsibichin honanahbo jato mehexonhue, Hihbon. ¹⁹ Min hicha hahpahoni non jatihibi honantimahi bi jatohon shinanxon min hahxonai jato honanmahue. Jaton jointi, jaton shinan, jato jatihibi hihbojabahinhue, Hihbon. Jatihibi sca mina jaahbo miin shinan siribo jato hinanxonhue hah tah hen jai mato yocaxonquin. ²⁰ Jahuen coshiyaxon ta jaan noque shinan hinanihqui, heen huetsabaan. Yocacatsihqui non shinanai quesca res ma bi ta tsoan shinannihma hashoan

hihtijaquin jaan noque hahxonti hahtipahiqui.²¹ Jaa copi Hahxon tah min noque jai Papan hahnahue, Criston jonibon. Criston noque hahxonai copi jascabijaquin Hahxon tah min noque jai Papan hahnahue, jaayohiquin. Jascari rahan.

Dios Yoshiman noque huestijahi

4 Noquen Hihbaan joi siri yohininica quen neno sipo xoboho tsahonnihbo tah hen nenoxon huishaquin mato yohihi, hea huetsabaan. Noquen Hihbaan jihuetauhboxax sca jaa queenai quescari jihuernahue. ² Caibo mentan mato hashoan honan hihqui shinanyamanahue. Sinayosmabonahue. Shinancoinya janahue. Caibaan jatsanjaha bi sinayamahi. Sirijaquin shinanax joni huetsahon tenehahnannahue. Jascapa shinanyahpaboxon joni huetsahon shinancoinnahue. ³ Jahua copi sinacananaxma bi hahan jenimati shinan hinanhahnannahue. Dios Yoshiman hinanai shinanbo hinanhahnanax tah man huesti shinanya rahsi man jihuethi. ⁴ Mescó jonibo non japahonish bi tah non jaa yora huestiya sca jai, huesti yora sca. Papan hinanai jahuen yoshin ta huesti qui. Papan noque johue hahca tah non jatihibi catihi, noquen Hihbo huesti qui. ⁵ Cristo huesti nincaxon bihcoinaibo res ta queyoyamanox manatiQUI. Criston Jane huestichin ta noque jeneho hihquimatanti jaiQUI. ⁶ Noquen Papa Dios ta jaa huesti qui. Jaan ta noque jatihibi hihbojahiqui. Jatihibiyaxon ta jaan hahquiqui, jan queenai quescajaquin jatihibiya jaa hihqui. ⁷ Jan queenai quescabijaquin ta noque jatihibi mesco tee Criston hinanpaquehiqui. ⁸ Jaa copi ta Davidinin huishani joi janin nea jaiQUI: Jahuen rahuibo bihtanax ta hinahihnat tax bebohi caxon jahuen jonibo jahuen

hinantibo hinanpaquehihqui, hihqui.
⁹ Hinahihnatai jan hihqui bi ta nai
 naman main caman bototax res sca
 hinatai yohihiqui. ¹⁰ Jaa bototai ta jaa
 hinatai joni qui, huetsama. Naihoh
 sca hinatax ta jatihibi hihbo jaan
 hihbojahiqui, jatihibi janin sca jaa jai.
¹¹ Jan hinanai teebo ta nescapa qui:
 caibo jahuen raantibo, caibo sca jahuen
 joi yohinicabo, caibo rihbi sca jahuen joi
 nincacoinmahi nihnicahbo, caibo rihbi
 sca pastorbo, caibo rihbi sca jahuen joi
 haxemanicahbo. ¹² Nincoinaibo jahuen
 teexonnihcabo rahsi janon ta jayaxon
 teexonti shinan noque hinanihqui.
 Jahuen teexonicahbohax res sca non
 yohinani, shinan hinanhahnanax, non
 coshilon. Jahuen jonibo coshi shinanya
 hihnon ta jascapa noque hinanihqui.
¹³ Cristo chibancoinaibo rahsi non janon
 caman tah non shinan hinanhahnanti
 jai, jatihxionbi non Papan baque
 honancoinnon caman. Shinancoinaibo
 rahsi rihbi non janon, Criston coshi
 shinanyahpabo rahsi. ¹⁴ Baquen
 shinanya non jayamascanon. Pehi
 pishca nihuen fotojaquetanxon boresai
 quescapahbo ta baquen shinanyahpabo
 qui. Joi coin yohihicamaxon bi quesa
 join paran paranah sca nihnihi
 bahinma sca nichi, neri jahui, hori cahi,
 behnoti. ¹⁵ Jascapahboma bi hihcoin
 yohuanaibo janahue. Joni huetsahon
 shinanxon yohiquin sirijahahnahn
 Cristo queenai quesa japan hihnahue,
 jatihibi tian jahuen shinanya sca
 nihnoxon. Jaa huesti noquen Hihbo
 quen jascanahue. ¹⁶ Mesco tee noque
 hinanxon ta mesco shinan rihbi noque
 hinanpaquehihqui, siripax res sca non
 joni huetsa yanapanhananon. Non
 jascari siripi jihuetaiya ta jaan noque
 coshi shinan hinanihqui. Jaatian
 tah non joni huetsahon shinanxon
 hahxonquin shinan hichajabonahi.

Shinan behnaya jihuetaibo

¹⁷ Criston shinanyaxon tah
 hen mato yohicoin sca jai, hea
 huetsabaan. Papan joijomabo jihuetai
 quescayamanahue. Tiroma shinanya
 ta jaabo jihuethqui. ¹⁸ Shinan siribo
 camabahinxon ta tiromabo res
 bihcanihqui. Tiromati queenax ta
 honanmabo sca banecaniqui, jahuen
 nahuabohax ta Papan jihueti janin jaabo
 nocotimahiqui. ¹⁹ Rabinyamascaax ta
 jonetax res sca tiromayamascaax janibi
 sca jacanihqui, hochiti quescascae.
 Tiromajaquin joni huetsa hahcatsihxon
 ta hahrescaniqui. Jaton shinan
 tiromabo huinomabahinrihbicanquin.
²⁰ Jascapahbonoxonma tah man
 Jesucristo bihniqui, hea huetsabaan.
²¹ Jahuen joi coin yohihah tah man
 bihniqui. ²² Cristo bihriyamahax man
 tiromapahoni quescayamascanoxon
 tah man Cristo bihniqui, hea
 huetsabaan. Tiromati jenipahichish
 tah man paramehtax hashoan sca
 tiromati shinanya japahoniqui.
 Jascapa shinan jenebahinquin
 behnábo sca bihnahue. ²³ Coton payo
 potabahinquin hahcajaquin shinan
 xenibo potabahinxon shinan behnabo
 sca bihnahue. ²⁴ Dios Yoshiman
 mato shinan behnabo hinannon
 hinamehnahue. Joni behnascaax
 Papan shinanai quesa sca janahue,
 pontebo sca, Papahon shinancoinaibo.
²⁵ Jaa copi joni huetsa betan yohuani
 quescayamascanahue. Hihcoinjaquin
 yohiquin. Jatihibi tah non huesti yora
 qui. Jaa copi paranyamascanahue.
²⁶ Caibaan sinamaha bi hohchaya-
 manahue. Sinatax bi tah man histon
 siricahintihi. Sinaya bepiyamanahue.
²⁷ Ni jenquetsahpa yoshimanbi mato
 hohchamayamanon janahue. Sinataiton
 mato hohchamamis. ²⁸ Yometso hihxon
 min Cristo bihniquin? Min tah min

yometsohtima sca jai. Yometsohtaxma tah min teemis sca jatihi. Noquen huetsabo yomanahaiton jahuarapishca jato bihxonnoxon tah min miin mequeman siripi teetih. ²⁹Yohuani tiromabohi jayamabiresnahue. Siripi yohuannahue. Masa shinanaibo meraxon hahan jenimati shinanbo hinannoxxon sirijaquin yohinahue. ³⁰Criston mato bichi jonon caman tah man honantiyahpabo qui, Dios Yoshiman mato honantijahah. Jaa benámayamanahue. Tiromahi yohuanquin man benámamis. ³¹Jointi mocayahpa jayamanahue. Joni huetsa hichaquin shinan jayamanahue. Joni huetsa qui rainyamatima. Join bahchintima. Huetsa joni qui tiromahi yohuantima. Joni huetsa tiromajatima. Jascapa yohuantibо jenebahinscanahue. ³²Jascapahma bi joni huetsa yanapanti, joni huetsa hahxonti, jascapabo shinanbo caya bihnahue. Min tiromani Papan shinanyamascai quescajaquin rihbi, huetsan mia tiromajahah bi jaa shinanyamascahue.

Shinancoinaibo Papan baquebo jihueti

5 Jahan jan queenai jahuen baqueboxon tah man Papan shinanai quescajaquin man shinantihi. ²Matohon ta Criston hihti shinannishqui, hea huetsabaan. Noquehon jenimaxon Papan birohanon ta noque copi jaa hinamehnishqui, noquehon hihti shinanax. Jascari joni huetsahon shinani jihuetaahue.

³Miin haiboma betan hihtima shinanhue, huetsan. Miin benema betan hihtima shinanhue, chocan. Jahuentianbi jascari jihuetaahue. Rishtaya joibo jatihibi rihbi tah man jatima sca jai. Minamahbo meheti shinanyamahue. Jascapabo shinanbo ta Papan caisaibo

jatimahiqui. ⁴Haiboya yohuanti, honanma yohuanti, hosan yohuanti, jascapa yanca yohuanbo jayamanahue, hea huetsabaan. Jascapahma bi hahxon tah min hea jai Papan janahue. ⁵Jano noquen Papa jaiton ta noquen Hihbo Jesucristonen noque jihuemayaxihqui. Jano ta tiromabo nocotimahiqui. Jano nocotimahibo ta nescapabo qui: jatihibi joni huetsa betan hohchati hihquibo, rishta yohuanya jaibo rihbi, jahuenahmabi bihcatsihqui rihbi. Jascapa ta noquen hihbohonma bi noquen hihbaan hahcai res queenih qui. Jascapahbo noque betan jihuetaahue honanquin sirijanahue. ⁶Jascapahbo ta tiromama qui hihxon quesa joi yohuanquin mato parancanmis hihxon tah hen yohihi, hea huetsabaan. Nincayosmahax tiromahibo copi ta jascapa Papan hihti casticanyaxihqui. ⁷Jaa copi jascapa tiromahibo jayamanahue.

⁸Bahquish chian jihuetaahue quescari tah man honanmabo jihuetaahue jahuenahue. ⁹Xaba chian jihuetaahue tah man qui, noquen Hihbaan mato honanmahah. Xabayahpabo ta siribo qui, pontebo, hihcoinaibo can. Xabayahpabo sca ji-huetaahue. ¹⁰Noquen Hihbaan jisi jahue-jaha siri quin hihxon, maton shinaman jatihibi tanapaquenahue. ¹¹Yamebaquebaan hahcai ta tiroma qui, jahuabi siri yamahi. Jato hihquihinyamanahue. Jato yanapanquinma bi hihtimahabo xabajaquequin quescajaquin jato yohinahue. Tiromahi honanahbo hihxon yohinahue. ¹²Jonexon jaabaan hahcai ta tiroma qui, jaya joitimahi. ¹³Non johuepan xabajaha ta janibi sca jatihibi. Janibiscayia honantibiresi. Yame chianxon non xaba jisi quescarihbihonantibiresi. ¹⁴Jaa copi ta behua jaiqui.

Mohihue hoxahhuan, Criston mia xabajanon jirijomabojaninhax huenihue

hihqui jaa behua.

¹⁵ Man honancoinnon hihxon tah hen mato yohirihbihi, hea huetsabaan: Jano man nichi jisquin sirijanahue, Papan bahinbi nihnoxon. Honanmabo nichi quescayamahax bi honanscaax nihnahue. ¹⁶ Hashoan tiromabocanaxon mato noquen Hihbo teexontimajacanmis hihxon chiquishxonma siribojanahue noquen Hihbo hahxonquin. ¹⁷ Jaabo tiromacanahi bi tah hen mato yohihi, hea huetsabaan. Non jahuejati noquen Hihbo queenihquin shinannahue. ¹⁸ Pahenyamanahue. Pahe xehahax pahenax tah non noquen shinanbo tiromahi. Pahenti qui hinamehtaxma Dios Yoshin qui caya hinamehnahue. ¹⁹ Hinamehti behuanahue, Papan join behuahi, noquen Hihbo qui behuahi, matonbi shinanax joni huetsa yohiquin sirijahi behuahi. Maton jointinin noquen Hihbo qui jenimaribihax behuarihbinahue. ²⁰ Papan hahxonai tihibi yohihi Hahxon tah min noque jai, Papan, hihqui janahue noquen Hihbo Jesucriston janen. Jascabihi jascanahue hea huetsabaan.

Haibo betan bebo siri res jihueta jai

²¹ Criston baquebohax nincakahahnani janahue.

²² Noquen Hihbo queenai quescajaquin maton benebo nincanahue, chocabaan. ²³ Noque jihuemanica Cristo noque hihbohi quescajaribiquin ta jahuen benen jahuen haibo hihbojatihiqui. ²⁴ Criston noque yohihah non nincatih i quescajaribiquin ta jahuen benen yohihah jahuen haibaan jatihibi nincatih i qui.

²⁵ Maton haibohon queennahue, hea huetsabaan, jan caisaibohon queenax noque jihuemanoxon noquen Hihbo hinamehni quescarihbih i janahue. ²⁶⁻²⁷ Shinannahue. Tiromajoma ponte

siribo non janon ta jaa hinamehnishqui. Rishtajomabo non hihnon, jahuabi tiromajomabo non janon. Hihi siribo sca noque bihyanoxon ta noque pontenishqui. Choquaquin hahcajaquin ta jahuen join noquen rishta potanishqui. Potanoxon ta hahmebi hinamehnishqui, noquehon hihi shinanax. ²⁸ Jascarihbih i maton haibohon queennahue, maton yorahon man queenai quescapi. Jahuen haibohon queenai joni ta jahuenahbi jahuen yorahon queenihqui. ²⁹ Tsoabi tah non noquen yorabi non rahnamehyamahi, jahuentianbi. Picatsihxon tah non pih. Hiquinax tah non rahcotai. Jascari tah non noquebi queemehtax coirametai. ³⁰ Jascajaribiquin ta Criston noque coiraniqui, noque jahuen yora quen. ³¹ Moisesnin huishani quescapah tah qui: Jaa copi ta bebaan jahuen papaya jahuen mama jenebahinxon jahuen haibo sca hihquihintihiqui, jaabo rabehax bi huesti yora sca janon hihqui Moisesnin huishani joi. ³² Jaabo rabehax bi huesti yora hihqui quescarihbih i ta noqueya Cristo huesti yora qui. Jaa ta honanyamacanpahonishqui, Papan jato yohiriyamahah. Rahma pari ta noque nincamanishqui. Honanquin sirijanahue. ³³ Mato jatihibi tah hen yohihi: miin haibohon queenhue, huetsan, mihi min queemehtai quescari. Joi bichinxonma miin benen mia yohihah nincahue, chocan.

6 Baquebo sca tah hen yohihi. Maton papan, maton maman mato yohihah nincanahue, baquebon. Noquen Hihbo nincacoinnicaxon jaabo rihbi nincatahi man. Man jato nincakah ta siri qui. ² Papan yohini diez joi quiha ta huesti jaiqui, non nincacaiya jan noque hahxonti yohimenoni: Miin papa miin mama nincacuin sirijahue. ³ Nincacoinax tah min siripi jihuethi, basi rihbi tah min

main jihuetahi, hah ta noque Papan janishqui. Jaa shinannahue, baquebon.

⁴ Maton baquebo rainyamayamanahue, baqueyahpabon. Sinamaxonma bi noquen Hihbaan shinanyaxon sirijaquin yohixon, pontejaxon jato hanijaquin sirijanahue.

⁵ Patoro teexonnicaahbon. Maton patoronen yohihah sirijaquin nincanahue. Paranxonma bi hahcoinquin jato hahxonnahue. Man Cristo nincacoinai quescajariquipin jato hahxoncoinnahue.

⁶ Patoronen jisiya res hahxonquinma bi hahcoinquin. Jascajaquin man Cristo hahxonai honanxon maton jointiboy-axonbi jato teexonnahue. Non jasca-jati ta noquen Papa queenihqui. ⁷ No-quen Hihbo tah man hahxonai, joni-boresma. Jaa copi maton shinanboyaxon bi teexonnahue. ⁸ Patoroyahpaxon, jas-capa hihyamahax patorojomaxon man sirijaquin hahxoncoinnai tihbi ta no-quen Hihbaan honanihqui. Man hah-coinai quen ta noquen Hihbaan mato hinanah jahuabora siribo sca man bihyax-ihqui. Jaa honanscaxon hahcoinnahue.

⁹ Patorobo sca hen yohinon: Maton jonibaan naihoh queha Hihbo ta mat-tonah rihbi qui. Jaan jisi tah man mat-on joniboya man jascapa rabe qui, patorobon. Huetsabo patoro hihqui, huetsabo rihbi jaton jonibo hihqui jaan jisyamaquin. Jaa copi maton jonibo tahtijayamascanahue, patorobon. Tahti-jaxonma bi hen jato rahma yohihah quescajariquipin jato hahxoncoinnahue maton.

Hahqui paxatibo

¹⁰ Huetsa joi sca hen mato yohinon. Jaya hihnoxon sca noquen Hihbaan coshi bihnahue, jahuen hihti coshi shinan bihquin. ¹¹ Tiroma yoshin mato qui nocotaiya, tenenoxon hahqui paxatibo bihnahue, Papan mato hinanah hahqui paxatibo. ¹² Jonibo

betan tah non rehtenanyamahi, hea huetsabaan. Quiquin yoshinbaan ta noque rehteti shinanihqui. Jaabo ta hahbe yoshin tinintiyahpabo qui, nai namanxon yonohi yoshinbo, tiroma shinanyahpa yoshimahhuanbo. ¹³ Jaa copi Papan hinanaibo bihnahue hahqui paxatibo. Yoshinbo mato tiromajahi jahuiton sca hahqui paxatiyaxon tenexon bihnahue. Yoshiman tsacahah bi hihquiyamahi quesca ta jatihiqui. Man tah man yobatihi. ¹⁴ Sontaronen ta rehtenannoxtion jahuen hahqui paxatibo sahuehiqui. Jahuen yami chinexehti pari bihquin, hahqui chipaxti. Jaatian sca jahuen xohpaxti sca sahuequin. Jaatian sca ta jahuen hahqui tapaxtibo sca bihxon sahuehiqui. Jaatian sca ta jahuen hahqui rahpaxti sca bihxon, jahuen boxpaxti rihbi maixon, jahuen machito sca bichiqui. Jatihibiyaxon ta tenescaiqui. Jascajaquin rihbi tenenahue, Papan hinanai shinanbo bihxon. ¹⁵ Quesatima shinanbo bihxon ponte res jihuetahi shinanbo rihbi sca bihxon, Criston noque sirijaquin jihuequihnti joi yohiti shinan rihbi bihquin. ¹⁶ Jaatian sca Cristo nincacointi shinan sca bihquin. Jahan caya tah man tiroma yoshin cahnematihi, jahuen chihiyahpa tahuhan jan mato tehpishaha bi jahuen tahuha nocajahanquin. ¹⁷ Mato xahbanen tiroma yoshin paquenon Papan mato bihboantahi shinan sca bihnahue. Papan joi maton jointi janin bexojati shinan rihbi sca bihnahue, jayaxon Dios Yoshiman mato haxemanon.

¹⁸ Jascapa shinanbo bihxon, jatihibi tian noquen Papa yocanahue hicha. Dios Yoshin qui hinamehxon yocaxonnahue. Tiroma yoshin quexequin hahcajaquin coiranhanan yocaxonti jenebahinyamanahue. Yocaxonnahue, Papan baquebo jatihibi yocaxonquin. ¹⁹ Hea rihbi

yocaxonnahue. Raquexonma Cristo joi siri nincamanoxon hen yohuanti honannon hea yocaxonnahue, heen jananbi noquen Hihbo yohuannon.²⁰ Jaa joi siri hen yohini quen ta hea neno siro xobohoh tsahoncannishqui. Jaabi raquexonma hashoan sca yohiquin sirijanon hea yocaxonnahue, Papa queenai quescarih sca hen yohuannon.

Hahan quirica queyoti

²¹ Hea jenquetsahpi jain jan mato nincamanon hihxon tah hen Tíquico mato qui raanai, hea huetsabaan. Jaan ta mato jatihibi yohitihiqui. Hahan hen

queenai noquen huetsa tah qui, hea huetsabaan.²² Sirijaquin ta noquen Hihbaan joi yohitihiqui. Jaa copi tah hen jaa raanai, noque neno jai joibo jan yohihah honanxon man sirijaquin shinannon hihxon.²³ Janohah noquen huetsabo tah hen yocaxonai, noquen Papa betanxon noquen Hihbo Jesucristonen mato mehenon. Maton jointi siricahinnon hihxon, joni huetsahon shinanhahnan hashoan sca nincacoinnon hihxon rihbi tah hen yocaxonai.²⁴ Noquen Hihbo Jesucristohon shinancoinaibo jatihibi noquen Hihbaan hahxonnon tah hen yocaxonai.

FILIPOS

*Filipos janinhahbo qui
Pablonen raanni joi*

**Filipos janinhahbo
qui Pablonen raanai**

1 Jesucriston joni hihxon tah non nenoxon Timoteo betan Pablonen mato qui joi pishca raanai, noque huetsabaan. Man Jesucristo qui hinamehtax Filipos jema janin jihuetaibo jatihibi qui tah non raanai, maton pastorobo qui, jaton yanapannicabo qui rihbi man jascabi jayamahin hahquin. **2** Papan shinanyahpahax man jahuen xabapan jihuayamahin hah tah hen mato jai. Noquen Hihbo Jesucriston shinanyahpahax man jatihi honanax tah hen jascabi.

Pablonen jato yocaxonai

3 Noquen Papa Dios yocaxonquin tah hen mato shinanxon tihibi Hahxon tah min jato jai Papan hahcái. **4** Maton yocaxonquin tah hen jenimahanan mato yocaxonai. **5** Papan joi hen yohihi canon tah man hea yanapanai. Hea honanmenonixon yanapanxon tah man hea rahma caman rihbi yanapanai. Jaa copi tah hen Hahxon tah min jai Papan hahcái, mato shinanxon. **6** Maton jointi janin jahuen shinan siri Papan nianihxon ta mato shinan hinanbonayaxihqui, hihti siribo sca noquen Hihbaan mato merahi jonon. Jaa tah hen honanquin sirijahi. **7** Hehon tah man shinanai. Sipo xoboho hen tsahotai bi tah man hea yanapanai. Papan joi hen yohihi cahiya tah man hea jascajaribhi. Papan joi siri hean honamahi copi caibaan hea demandanaiya tah man hea yanapanrihbihi. Hehbe teenicabo tah man qui. Jaa copi tah hen honanquin sirijahi: Maton jointi janin ta jahuen shi-

nan siri Papan hicha janaxontihi qui. **8** Hean rihbi ta heen jointiboyaxonbi matohon shinanai, hea huetsabaan. Papan ta honanighqui. Matohon shinanxon copi tah hen mato yocaxonai. **9** Joni huet-sahon man hashoan sca hihti shinanhahnannon tah hen mato yocaxonai. Man shinanhahnanaxon jatihibi honanbonahax hihti shinanyahpahax man janon hihxon tah hen mato yocaxonai. **10** Jaatian tah man jahue mehabo man hah-non noquen Hihbo hashoan queenihquin man honantihi. Hihti bi res shinan siri-boyahpahax sca tah man jatihi, jahuabi tiromabo yamascai. Noquen Hihbo Jesucristo joribixon sca ta jascapahbo man hihqui merabenayaxihqui. **11** Siri shinanbo Jesucristonen mato hinanah, man jaya hihxon sca pontejaquin shinanax jihu man jaiya ta caibaan sca honantihi. Hihcoin ta Papan shinanya jihu-caniqui hih ta jayaxihcanihqui, noquen Hihbo qui siripi yohuani. Man jascanon hihxon tah hen mato yocaxonai.

Cristo hahxoni tah hen jihuetai hihqui

12 Man honannon hihxon tah hen mato yohiscái, hea huetsabaan: Hea sipo xoboho tsahonxon bi ta Papan joi panteti hahtipahyamacaniqui. Hashoan sca ta caícanahiqui. **13** Criston joi siri hean nincamahi copi hea neno tsahonni quen ta hean yohihah quiquin hapon sontarobaan nincacaniqui, jatihixonbi. Texe jonibaan rihbi ta nincascacaniqui. **14** Sipo xoboho noque tsahonahbo jen-quetsi non jatihin hihxon ta hea jisish hihti caibo noquen huetsabo shinan coshicanahihqui. Hashoan sca ta noquen Hihbo qui jaton shinan camacaniqui. Hashoan rihbi sca ta raquemenohax bi raquetaxma sca coshin sca Papan joi siri yohihi jatihibi janin bocanighqui.

15 Caibaan rihbi ta hashoan sca hea tiromajahahbo hihxon Criston

joi nincamahiqui, hehqui sinaxon. Huetsabaan ta shinancoinxon Criston joi nincamahiqui, jahan shinanxon. ¹⁶Jahuen joi siri hen nenoxon bi sirijaquin yohinon Papan hea jomani honanxon ta jaa joi siri nincamacaniqui. ¹⁷Hoa jonibaan ta Cristo joi pantecatsihquiqui. Pantecatsihxon ta nincamacaniqui. Honanyamaxonma bi hea hashoan hohmis hohmismanoxon hihxon tiromajacatsihquin nincamacanquin. ¹⁸¿Jascapahbo noque qui jahuiya cahra jahua hi non jatihin? ¿Non benatihin? Hihyamahi rahan. Jatihibi janin ta Criston joi nincamacaniqui. Caibaan noque tiromajati shinanxon nincamanon, caibaan rihbi pontejaquin shinanxon yohiquin. Nincamanicahbo jaiya tah hen jenimahi. Rahma jenimahax bi tah hen hashoan sca jatihi. ¹⁹Rahma sipo xoboho hen tsahotai bi ta man hea yocaxona Papan hea manatihi qui. Jahuen yoshin siripan rihbi hea coshijaha tah hen tenetih. Hahan jenimati sca tah hen jai. ²⁰Criston hea coirantihi honanquin sirijaxon tah hen jaabo queenai quescajaquin hea jaahbaan bi hen sirijaquin shinanai. Raquexonma tah hen yohipahonihqui. Jascajaribiquin tah hen rahma rihbi coshihihnatai, Cristo heen hihbo hihqui honanahbo. Hea rehtehabho bi tah hen tenetih. Rehteyamahah cahen jihueparixon jascajaribiquin tenetih, Cristo heen hihbo hihqui honanahbo. ²¹Hea rehteyamahiboya cah hen Cristo teexoni jihuetahi. Rehtehah cahen hashoan siri rihbi jatihi. ²²Hea jihueparixon tah hen noquen Hihbo teexoni jatihi. Jenquetsi hen jatihin, jihuetai, muhuati, hen tah hen honanyamahi. ²³Jahue meha hashoan siri quin hihxon tah hen caiscasquimahi. Muhuatax noquen Hihbo Cristo janin pontecahincatsih sca

tah hen jai. Jaa ta hashoan siri qui. ²⁴Jaa siri que bi cahen hea mohitahpa pari baneti man hashoan pishinai. ²⁵Jaa copi tah hen honanscái. Banetahxon tah hen mato jatihibi yanapantíhi man hashoan sca sirijaquin nincanon, man hashoan jenimahanan sca Criston shinan bihbonanon. ²⁶Papan hea picomaha hen mato qui hahquirihbi nocotaiya tah man noquen Jesucristo qui siripi yohuantihi, Noquen Hihbaan ta noque hihti hahxonihqui hih tah man jayaxihqui.

²⁷Criston joi siri nincaqui jihuenahe, hea huetsabaan. Hen janox caxon jisxon, cayamahax rihbi banexon joi nincaxon, man jenquetsahpa shinanyabo sca man jain hen honannon. Man huesti shinanyaxon tenehi, huesti shinanyahax man teetai hen honanyaxahnnon. ²⁸Mato raquejhabaan bi raqueyamanahue. Jahu qui bi raqueyamahi. Mato masa tenemahibo ta hahan honanti qui. Mato jascajaxon tiroma janin jaabo cayaxihquibohi honancanquin. Man tenehi rihbi ta hahan honanti qui, man queyoyamanox manatihi man honannon. Papan ta jascajaquin yohihi qui. ²⁹Matohon shinanxon ta mato yohihi qui: Cristo qui hinamehtax man hahbetan jihuescatihi yohiquin. Cristo qui hinamehnixon bi masa tenexonribitihi. ³⁰Maton jema janinxon hean tenehi jisnixon tah man rahma rihbi hean tenehi joi nincaxon maton rihbi sca masa tenexonai.

Jahuen quiquin jati jenebehnani Cristo jahui

2 Criston jonibohax tah non yohinanti jai, shinan hinanhahnani. Joni huetsahon tah non hihti shinanti jai. Jahuen yoshin noquen jointi janin jai quen tah non nincacahananti jai. Yomanahtaibohon shinanti tah non jai. Jaa copi hen mato yohihi

nincanahue. ²Hen hihti jenimascanon huesti shinanya jihuenahue. Criston matohon shinanni quescajanahue, joni huestahan shinanhahnani. Huesti shinanyahpabo res janahue, huetsajaquin shinanyamaquin. ³Jahuabi sinataxma teenahue. Hihcoinicamayamanahue. Noquen huetsa yohuanquihnnoxon mia mentan hashoan shinanya siri jaa hihqui shinanhue. ⁴Mina res shinanyamahue. Mina res shinanaxonma bi caibaana rihbi hahxonhue. ⁵Noquen Hihbo Jesucristonen hahni quescajanahue. ⁶Papa quescapahax bi ta jeenhihquish jonishqui, jahuen coshi jenebehnani. ⁷Jahuen coshi xaba jenebehnani jonish cahen jonin yorayahpa sca janish. Yorayahpahax bi jonibo hahxonnic res quescascai. Joniscaax, caibo mentan hashoan jahuama quescasca sca jai. ⁸Jaabo jihuemanoxon mahuahue Papan jaah mahuati. Jihui qui hueonahbo bi nincanicaxon mahuanoxon caman tenequin. ⁹Jaa copi ta Papan jaa yohinishqui: Mia tah min jatihibichin hihbo sca qui. Miin jane ta jatihibi jane mentan hashoan hani qui. ¹⁰Jatihibi jonibaan sca raboxonen nihxon jahuen janen yocayaxihnon ta jascajanishqui, naihoh quehabaan, nai naman jihuetaibaan rihbi, mai chicho quehabaan rihbi. Jaabo yohihi ta jascanishqui. ¹¹Mia tah min noquen Hihbo Jesucristo qui hih ta jayaxihcanihqui, jatihibi. Jaatian ta Papa Dios hihti coshi shinanya hihqui honanyaxihcanihqui.

Xabayahpabo non jai

¹²Jaa copi hea nincanahue, hea huetsabaan. Hea jano hihqui tian res ma bi hea jano hihyamahiya hashoan sca nincaquin sirijaxon, Criston shinanyahpaboxon mato janin jahuen shinan hichajanahue. Heen

Hihbo queenai quescayama japaho hihquish jihuenahue. ¹³Maton jointi janin teetai ta Papan coshi qui. Teeti shinan mato hinanxon ta hahan teeti coshi rihbi Papan mato hinanihqui, jan costanai quescasca man teexonnon. ¹⁴Man hahcai jatihibi tah man join hihquinanxonma man hahtihi, tsohquibi yohuanxonma hahquin. ¹⁵Ponte shinanyahpabo sca jihuenahue, jahuabi tiroma shinanaxma. Papan siri baquebo tah man nincayosmabo tocan man jihuetaihi, tiromabo tocan hihquish bi ponte res jihuetaihi. Mai mehabo tocan tah man huishi xabatai quescasca man jatihi, Papan xabayahpabo sca jai. ¹⁶Johuepan xabajauquin hahcajaquin Papan joi honanmanahue. Jaatian ta Cristo jahuiya hen jenimayaxihqui, yanca res hen teeyamani hihquish copi. Mato copi tah hen Cristo bebon mequen nihyamayaxihqui. ¹⁷Hean joi yohihah man noquen Hihbo nincacoinscrai copi hea nenoxon rehtenoxihquiaan bi tah hen jenimaresai. Mato betanbi tah hen jenimahi. ¹⁸Jascarihbibi jenimanahue, hea hihqui quescari jenimanahue.

Timoteo betan Epafroditó

¹⁹Histon tahni tah hen mato qui Timoteo raanti shinanai, Jenquetsi man jihuetaihi honannoxon. Noquen Hihbo queenaiyah tah hen basima tahni raantihi, joiya joribiscayi sca hen jointi siricahinnon. ²⁰Timoteo quescapah tah hen neno huetsa yamahi, matohon shinancoinxon mato sirijaquin coiranica. ²¹Texen ta jatona res coiraniqui, Cristona jixonyamaquin. ²²Timoteo tah man honanscrai. Jahuen papa betanbi teeti quescasca ta hehbetan Papan joi yohihi tee teenishqui, maton jisnonbi. Jenquetsahpa shinanya hin hihxon tah man honanscrai. ²³Jaa copi tah hen jaa raanti shinanai. Jenquetsaja cahra hea heanoxihcanihquin, retequin, reteyaa-

maquin, honanxon sca tah hen jaa raan-scathihi. ²⁴ Jaabi ta heabi mato janin histon tahni catih, Criston hea picohah. Jan hea jascajaxontihi tah hen shinanai.

²⁵ Epafroditu pari raanti ta jaiqui hi-hxon tah hen jaa pari raantihi. Jaa ta heen huetsa qui, hea yanapannicah. Hehbe sontaro can. Man raanah ta joxon hea hihti yanapancachihiqui, sir-ijaquin hahxonquin. ²⁶ Jaa hihti hisinai joi man nincaho honanxon ta masa tene-hax mato jisi hihti cacatsihscaiqui. Jaa copi tah hen raanti shinanai. ²⁷ Mahua hisin ta jahoxqui. Mahuatihu bi ta ro-hatipishqui, Papan rohajahah. Jahan shinanxon, hehon rihbi shinanxon ta Papan jaa rohajahipishqui, tiroma honanya hihquish hashoan bena sca hen jayamanon. ²⁸ Jaa copi tah hen rahmabi jaa raanti shinanai, jaajisish man jen-imascanon. Jano caxon mato yohihah tah man jenimatihi, nenohax ta hea ri-hbi jointi siricahintihi. ²⁹ Jaa copi jen-imaxon bihnahue mato qui nocotaiton. Hahxon tah min noque jai, Papan, jaax jenimanahue. Papan joi yohinicajatihibi Johue hahxon, jaabo pishinaibo jato hin-nannahue, yanapanquin. ³⁰ Cristo teex-onquin ta muhauatihu bi rohatipishqui. Hea yanapanquin tah man jaa neno raanhohqui. Joxon ta Hahrai muhau-paho hihxonma bi tenexon Cristo hahx-onnoxon hea yanapancachihiqui.

Ponte jihuecointi

3 Huetsa joibo sca hen mato yohinon, ³ hea huetsabaan. Noquen Hihbo qui jenimanahue. Mato yohixon bi hahquir-ihbi yohihi tah hen jatsanyamahi. Hen mato yohihah ta hihti siri qui. ² Mato ju-dio honantiyahpa hihmacatsihqui qui coiramenahue. Tiromabo qui coirame-nahue, honantiyahpajacatsiquin noquen nami tiromajahibo qui coiramenahue. ³ Noque cah non Papan honantiyahpab- sca. Jahuen yoshin siriyaxon cah non

jaa hahxonai. Jahuerohahi ta Cristo no-quen jihuemanicah qui hih tah non jai. Jahuerohahi ta Cristo noquen hochha copi mahuanishqui, Papan noque hihti siri jisnon, hih tah non jai. Jonibaan res shinanxon hahcai ta jahuabi siriymahihqui, Papan jisi, non tah nom honanai. ⁴ Jonibaan res shinanxon hahcai Papan jisí siripaiya tah hen yohuanti jaque-hahnai. Caibo mentan hashoan yohuanti jaquehahnai. ⁵ Ocho nete hen jaiya cah hen hea honantijacannish. Hea cahen israeli baquebo, Benjamin cahen heen xohta xeni. Hea tah hihti judio hih-pahoniqui. Moisesnin joi chibannicahax cahen fariseo sca hen janí. ⁶ Hihti nin-catih shinanxon tah hen Cristo joi nincacaibo hean tiromajapahonihiqui. Moises-nin joi chibanquin cahen jahuabi pishin-mayamani. ⁷ Hen japhoniboh shinanh-htixon sca tah hen siri hihqui shinanya-mascaniqui. Jaamajaquin res hen hah-pahoni honanscaquin. Cristo nincatihi bi tah hen jaamajaresniqui. ⁸ Jaamajaquin rahan. Yanca bi res hen tee teeni tah hen honanscaniqui. Heen hihbo Jesu-cristo betan nichí caya hihti siri. Jaa bihnoxon tah hen hen japhoniboh jati-hibi jenenihqui. Hen japhoniboh ta pohi tsamanah quescatia omaha qui. Criston shin-an caya tah hen hashoan honancat-sihqui. ⁹ Jaan hea jihuematih tah hen queenai. Papan hea siri jisnon Moises-nin yohini quescatia tah hen shinanya-mascai. Cristo qui hinamehxon nincacoin sca tah hen jai, Cristo copi Papan hea siri hihqui jisnon. ¹⁰ Criston shinan tah hen honanbonacatsihqui. Hahan jan huenirihbini coshi rihbi tah hen honancat-sihqui. Hahbetanbi rihbi nihni nih-nixon tah hen tiromabo tenecatsihqui, muhau-tax jan janí quescatia jayanoxon. ¹¹ Cristo huenini hihqui quescarihb sca jayanoxon tah hen jascajahi, hahti-pahyamaquin bi hahtipahxon.

Coshin hahxoncointi

¹²Pishinyama ta jai hih tah hen jayamahi. Pishin ta jai, haxeti. Hashoan sca Criston hea haxemabonati tah hen queenai. Jaa copi tah hen coshin hahcai, Criston pari hea bihni quen. ¹³Honan sca tah hen jai, honanbonayamascapan hih tah hen jayamahi, hea huetsabaan. Nescaja tah hen jai: Hen hahxonihbo shinanaxonma tah hen noquen Hihbo hen coshin hahxonnoxihquibo hen shinanai. ¹⁴Jan yohini quesca tah hen jacatsi-hqui, jan hea bochiquixon bilihinhon caman. ¹⁵Baquebun shinanya hiyamaxon tah man hen mato yohihah quescajatihi. Hen mato yohihi quescayama man shinanaxiya ta Papan mato jaa rihbi honanmayaxihquiqui. ¹⁶Non mato hinanni shinanbo jenebahinyamanahue.

¹⁷Hen hahcai quescajanahue, hea huetsabaan. Hen mato tocan jihuepar-honi quescapi jihuetaibo honannahue, jascari jihuexon. ¹⁸Mato tocan jas-cacanmis hihxon hen hicha coti mato yohini quesca sca ta jaiqui. Criston baquebo tocan ta jahuen rahuibo jaress-caiqui, hicha. Heen jointi janin huao-hihanan tah hen mato yohihi. ¹⁹Jas-capahbo ta Papan queyoyaxihquiqui. Jaton pocobo ta jaton dios qui pa-henaibo. Jaton shinan ta hahqui hihtimi qui, hihti siri hihqui jaabaan shinannah bi. Jaton shinan ta mai meha res qui. ²⁰Noquen jihue ta nenohah quescapahma qui, noquenah ta nai-hoh queha qui. Janohax noque jihue-manica noquen Hihbo Jesucristo jonon caman tah non manatiji. ²¹Noquen mahuanica yorabo ta jaan huetsajaxonyaxihquiqui, jahuenahbi quescia hih-non, hihti siri. Hahan jatihibi hihbo-jati coshiyahpaxon ta jaa coshiyaxon noquen yora behnajaxonyaxihquiqui.

Noquen Hihbo qui jenimati

4 Jaa copi tenenahue, huetsabaan. Noquen Hihbo betanbi tenenahue. Mato tah man jahan hen hihti queenai heen huetsabo qui, heen jointiboyaxonbi hen matohon shinanai. Matohon tah hen hihti jenimahi. Mato copi tah hen shin-anquin sirijahi. ²Mato betan jai haibo rabe sca tah hen hihti yohihi: Evod-aya Síntique. Noquen Hihbohon shinan-behcoinax huesti shinanya sca janahue. ³Jascari rahan. Mia rihbi tah hen jascajaquin yocacai, huetsan, mia cah min hehbetanbi teecoinni. Jato rabebi yanapanhue, jaa huesti shinanya jaahbo. Rabebi ta hehbetanbi tee teenishqui. Clemente, texe noque betan teenihbo ri-hbi betan ta tee teecannishqui. Jaabo rahsichina ta Papan quirica janin jaton jane jaresscaiqui, Papa betanbi jihueyaxihquibo huisha sca.

⁴Jascabihi noquen Hihbo qui jenimahi jihuenaahue. Jascari jenimahi ji-huenaahue hih tah hen jai. ⁵Jatihibi joni-baan mato siri hihqui honannahbo tene-hahnannahue. Noquen Hihbo ta nea pishca qui, hochoma. ⁶Jahua copibi masa shinanyamanahue. Man hahan tiromajaquin shinanai jai jatihibi Papa yohinahue. Noquen Papa yocaxon, jan mato hahxonai rihbi Hahxon tah min noque jai Papan, hahxon man hahan masa shinanaibo yocanahue. ⁷Jaatian ta mato coiranhanan jahuen jenimati shin-an Papan mato hinantihiqui. Jonibaan honanti hahtipahyamahi shinan siribo ta mato hinantihiqui, man jointi siricahin-non, noquen Hihbo Jesucristo betan hi-hxon man sirijaquin sca shinannon.

Non bihcointi shinanbo

⁸Nescapa joibo tah man nincaxon bihtihi, hea huetsabaan: hihcoinai joibo, shinanyahpaxon honanti siri joibo, ponte siri joibo, rishtajoma siri

joibo, costanti siri joibo, nincati siri joibo, jatihibichin shinanah hihti siribo joibo, hahqui siripi yohuantu joibo. Jascapa siribo rahsi bihnahue.⁹ Hen mato honanmani quescabijanahue, hen mato haxemani quescabijaquin. Hean hahcái nincanihxon, hean hahcái jisnixon, jascajaribinahue. Jaatian ta sirijaquin shinanmanicaton mato manatihiqui, noquen Papan.

Coriquinin yanapanaibo

¹⁰Rahma man hehon shinanxon hahquirihbi hehqui coriqui raan sca jaiya tah hen noquen Hihbaan shinanyahax hihti jenimahi. Hehon shinancachihixon bi tah man raanti hahtipahyamahohqui.¹¹Pishincachihixon bi tah hen jaa copima mato yohihi. Jatihibi tian jenimati haxe tah hen janiqui.¹²Pishinxon bi cahen sirijaquin shinanti honanai. Hicha jaxon bi cahen sirijaquin shinanti honanribihi. Jatihibi janin, jatihibijaquin tah hen yanixon sirijaquin shinanti haxenihqui, pihan hihxon bi sirijaquin shinanrihbiquin. Hicha jaxon bi jascajaribiquin, pishinxon bi jascajaribiquin.¹³Coshi hinannicaton coshijaha tah hen sirijaquin shinanti hahtipahi.¹⁴Jaabi tah man hea yanapanquin hahxonbiresai.¹⁵Mato nincamamenohax Macedonia mai janinhax hen caribihya tah man hea yanapanribiniqui. Caibaan ta hea yanapanyanamanishqui, mato huestichin

tah man raanxonniqui, man honanai quesca, Filipobaan.¹⁶Tesalonica janin hen hihquiton cah man hehqui raaniih. Jaa pecaho cah man hahribihoxon raanrihbinih, hean bihnón.¹⁷Maton coriqui jenipahixonma bi tah hen man hea hinanah copi Papan mato hashoan hicha sca hinanrihbinon hihxon hen bijniqui.¹⁸Man Epafroditó betan raanipi bichish tah hen hicha sca jai. Hen tah hen pishinyama sca jai. Man raanah ta Papan jisi hihti siri qui. Man hahqui raanah quesca tah qui, jaa copi ta matohon jenimahi qui.¹⁹Jaan ta man pishinaibo jatihibi mato hinanyaxihqui. Nete hihbo hihxon ta tsama bi res mato hinanti jaxon Jesucriston mato hinanrestihi qui.²⁰Noquen Papa Dios ta queyoyosma xabayahpa qui, jascabihi hahqui siripi yohuannahue hah tah hen jai. Jascari rahan.

Hahan quirica queyoti joi

²¹Min jascabi jayamahin hahxon, jatihibi noquen huetsabo hea yohixon-nahue, noquen Hihbo Jesucriston janen. Neno jai noquen huetsabaan rihbi ta mato jascajaribicaniqui.²²Texe noquen huetsabo jatihibichin rihbi ta mato jascabajiqui. Quiquin hapon xoboho teetai noquen huetsabaan rihbi ta jaabaanbi shinanxon mato jascajaquin raanihqui.²³Noquen Hihbo Jesucriston xabapan jihuenaahue.

COLOSAS

*Colosas janin jihuetaibo qui
Pablonen raanni joi*

**Noquen huetsabo qui
Pablonen raanai**

1 Noquen Papa Dios queenaiya ta Jesucristonen hea yohinishqui jahuen raanti hea Pablo janon. Noquen huetsa Timoteo betan tah hen nea quirica huishahi. ²Man Cristo jeneyamahibo qui raannoxxon tah non huishahi, heen huetsabaan. Man Colosas jema janin jihuetaibo qui tah non nea joi raanai. ¿Papan shinanya man jayamahin? ¿Papa Diosen sirijaha man jointi siripax jihueyamahin?

**Noquen huetsabo
Pablonen yocaxonai**

³Noquen Hihbaan Papa tah non jascabijaquin yohihi, Hahxon tah min jato jai Papan Dios, hahquin. Non mato yocaxonai tihibi tah non jascajahi. ⁴Man noquen Hihbo Jesucristo nincacoinxon jatihibi noquen huetsabohon man shinanai yohihah tah non jascajaquin noquen Papa yohihi. ⁵Noquen naihoh queha Papan mato jihuemayaxihqui honanxon tah man noquen huetsabohon shinanxon jato hahxonai. Papan joi coin nincanihxon tah man jan mato jihuemayaxihqui joibo man honanscrai. ⁶Jaa joi coin ta Criston joi siri qui, mato qui noconih. Jatihibi janin nocoxon jano jihuetaibo shinan hinanax ta jaa joi caicanahihqui. Mato tocan ta jascaribihihqui. Papan matohon shinanai tah man yohihah nincamenonihxon honanrihbibi. Jaan mato hahxoncoinai tah man nincanihxon honanrihbibi. ⁷Jaa joi siri ta Epafrasnen mato nincamanishqui. Jaa ta hahan non queenai noque betan

teenica qui. Criston teexonnicah, hehbe teexonnicah. Sirijaquin ta Criston joi mato yohixonnishqui jano caxon. ⁸Neno nocoxon sca ta Dios Yoshiman shinanmaha man noquehon shinanai jaan noque yohihipishqui.

⁹Jaa copi tah non nincamenohipixon mato yocaxonquin jeneyamahi noquen rihbi. ¿Man jenquetsahpabo jihuetai Papa queenihquin? Man honancoinnon hihxon tah non mato yocaxonai. Dios Yoshiman mato jatihibi shinan hinanquin mato honanmanon hihxon rihbi tah non yocaxonai. ¹⁰Papa queenai quesca sca man jihuenon. Man hahcai jatihibi jaquin hahan jan jenimahibo man janon hihxon tah non mato yocaxonai. Jascapahboxon tah man Papan shinanai quescajaquin jatihibi sirijatihi. Jaatian tah man hashoan sirijaquin sca noquen Papa honanbonayaxihqui. ¹¹Jatihibi shinan hinanquin Papan mato coshijanon hihxon tah non yocarihbibi, jahuen hihti siri shinan bichish man coshinon hihxon. Jaa shinanyaxon tah man jatihibi tenetih, yosmayamahi, sinayamaribibi. Jenimaresi. ¹²Noquen Papan ta mato yohihihqui, Heen baquebo jano jihuenon hihxon hen hahxonai xabapan sca tah man jihuetaihi, hahquin. Jaa copi tah man Hahxon tah min noque jai Papan, hah man jatihi. ¹³Tiroma yoshiman noque hihbojani bi ta Papan noque bichinxon noque mahnebohanihqui jahuen baquen jihuetaiboo sca non janon hahan jan queenai jahuen baquen sca noque jihuemanon. ¹⁴Jaa jahuen baquen ta noquen hohcha sohuanihxon non hohchanihbo shinanyamascaiqui.

**Cristo mahuani quen
noque jahuen jihuetaiboo**

¹⁵Noquen Papa jisyamaxon bi tah non jaa jahuen baque honanxon noquen Papa jenquetsahpabo quin hihxon honan-

scai. Jaa Papan baque ta jatihibi hahnicahax jatihibi hihbo rihbi qui.¹⁶ Jaan ta jatihibi janishqui, naihoh quehabo, main jaibo rihbi. Nonjisibo, non jisyamahibohihbi jaan jaquin. Meyayahpa yoshinbo, hapo yoshinbo, yonohi yoshinbo, sontaroyahpa yoshinbo rihbi, jatihibiba ta jaan jato janishqui jahuena jaábo.¹⁷ Jahuabi jariyamahi bi ta jaa janishqui. Jaan rihbi ta jatihibi jaxon jatihibi manamahiqui. Jaan manamayamaha cahen jatihibi queyoquehanai.¹⁸ Noquen Hihbo ta jaa qui, noque jihuemanicah. Hihquipish bi huenimenonish jihué hihboscajatihibi hihbohi. Noque jan caisai tah non huesti yora qui, jahue nah.¹⁹ Queenxon copi ta jaa huesti Papan hihbomanishqui, jaa huesti jatihibichin quiquin hihbo janon.²⁰ Jaa mahuamaquin ta jatihibi noquen rahuit shinan potamanishqui noque jahuen jihuetahboscanon. Naihoh quehabo, nai naman mehabo, noque jatihibi hahbetan siripi yohuannon ta jihuin hueonmaxon jahuen Papanbi noquen hohcha copi Cristo jimi potamanishqui mahuamaquin.

²¹ Mato rihbi tah man Papan nahuabo hihpahoniqui. Jahuensahuibohax tah man tiromajaquin shinanax tiromahi jahponiqui.²² Jahuensinatahbo que bi ta mato sirijaquin bichiqui jahuen baquebo sca man janon. Noquen yora quescapahax noque copi mahuanhxon bi ta mato sirijaquin Criston bichiqui. Jahuensahbo rahsi Papa bebonbi sca mato nihmanoxon mato sirijaquin bihquin. Hohchajoma siribo sca tah man jatihi. Papa mato hinanyahnoxon cahen mato sirijaquin bihquin.²³ Criston joi jascabijaquin nincacoinaibo tah man janon nihyaxihqui jaa joi jeneyamahiboh, jaa mato yohimenoni yohuan huetsajayamahiboh, huetsa joi qui mahnejaqueyamahiboh janon nichi. Jaa joi huesti tah hen jatihibi noquebo yohihi, Jaa

yohinica sca mia jahue Pablon, Papan hea janí.

Papan joi nincamanicah, Pablo

²⁴ Papan shinan manbihnon hihxon jahuen joi siri hen mato yohini copi ta hea rahma tiromajacaniqui. Tiroma hea jaábo bi tah hen tenehax jenimahi. Noquen Cristo ta tiromajacannishqui. Jaa tiromajaquin pishinmanixon ta hea sca tiromajacaniqui. Heen yora jaabaan tiromajahah bi tah hen Cristo tenexonai. Jahuenscaisaibo ta jahuen yora qui. Jaabaan jahuen shinanbihnon hihxon tah hen tenehi.²⁵ Matohon shinanaxontamatojahuencaisaiboyohinica hea janon hihxon Papan hea yohinishqui, jahuen joi hen nincamaquin sirijanon.²⁶ Neatemanjapahonibohonanmayamapahonixonbi ta rahma jaa jone joi jahuencaisaibohonanmatijaan yohihiqui.²⁷ Mato tocan Cristo jihuetahi ta honanyamacanpahonishqui Papan jato honanmayamahah. Maton man honanscanon tamatojudiomabohonanmatinoqueyohinishqui. Mato chichocristojihuetaiyaman jahuentihosiri shinanyahpa jaa jaiquin man honan non hihxon tamatohonanmahiqui. Jaa Cristo huestita noque jihuemanicah qui.

²⁸ Hahqui hinamehhue hahquin tah non jatihibi joni sirijaquin yohihi. Jatihibi joni sirijaquin honanmaquin honanahbo. Jatihibi joni shinanyahpa siri sca Cristo bebon nihmanoxon hihxon tah hen yohihi.²⁹ Jascapahbojanon hihquish tah hen shinancaman hahtanax tee teetai. Jan hea hinanai coshin tah hen coshin bi res tee teetai jato yocaxonai.

2 Hicha bi res hen mato yocaxonai man honanon hihxon tah hen mato yohihi. Laodiceajaninhabo rihbi, jatihibi hea jisyamanibohihbi tah hen jaayocaxonai.² Joni huetsahon shinanaxon honanmahananax maton jointisirinon hihxon tah hen mato yocaxonai. Jaa-

tian tah man Papan honanya jacoинти. Jahuen jone joi tah man honanquin sirijascatihi, Cristo honancoинquin.³ Cristo ta jatihibi honan siri jaiqui, jatihibi siri shinan rihbi. ⁴ Siripi yohuanihcama jaibaan mato paranyamanon hixon tah hen mato yohihi. ⁵ Hocho jaax bi tah hen mato betanbi hihquish quesca hea jai. Jaa shinan huestiya man jihuetai siripai nincacax tah hen jenimahi. Cristo qui hinamehxon man jeneyamabiresai yohihah tah hen hihti jenimahi.

⁶ Noquen Hihbo Jesucristo bihnish res sca jaa shinanya sca jihuenahue. ⁷ Noquen Hihbo honanquin sirijanahue. Jahuen shinanya rihbi haninahue hen mato haxemani quescajaquin hashoan sca jahuen joi bihbonaquin. Hahxon tah min noque jai Papan, hahquin hicha bihbonanahue.

Criston shinanyahpa non behna jihuetai

⁸ Mato hihbojanoxon honanihcama jaxon quesca joibo mato nincamacanmis coiramenahue. Honancoинxonma bi jonibaan shinanai joi res ta mato honanmacatsihcanihqui. Cristonahma bi huetsa joi mato haxemacanmis yoshiman joi.

⁹ Cristo ta Papan shinanya qui, Papan coshiyahpa. ¹⁰ Jaa ta hihbo qui, jatihibi quiquin yoshimana, jatihibi hapo yoshimana rihbi. Jatihibichin hihboxon ta mato shinan hinancoинihqui. ¹¹ Mato ta honantijanishqui Papan jihuetahbo man hihqui honanahbo. Jonin mequeman honantijahahma bi Criston honantijahahbo tah man qui jahuen honantiyahpabo. Mai mehabo queenai quescajaquinma bi Cristo queenai quescaja non jai ta jaa honanti qui. ¹² Jeneho hihquimaha tah man Cristoyabi tsahonni quesca janiqui. Jene chicho queha huenihihnihah sca tah man Cristoyabi huenihihnhini quesca jai. ¹³ Hohcha hohchayahpabohax tah

man mahuascaibo japahonihqui. Maton yora janin jahuen honanti yamani jahuenahmabo quen. Man jascapahbo que bi ta Cristoyabi Papan mato jihuemanishqui maton hohcha jatihibi mato sohuaxon, noquenah rihbi. ¹⁴ Non tiroma-japahoni copi ta noque casticanti joi janishqui. Noquen hohcha copi hihqui bi ta Cristo jato rehemaquin noquen casticanti Papan queyonishqui, yamas-canon. ¹⁵ Jascajaquin ta hihti tiroma yoshinbo Papan jaton yohuanbo bichinishqui netetahbo. Jaton tiroma son-taro yoshinbo rihbi jascajaquin jaton yohuanbo bichinquin. Janibi ta jato hitimahmanishqui. Cristo muhuamaquin ta jato netemanishqui.

Naihoh quehabo shinannahue hihqui

¹⁶ Jaa copi nescapa joibo nincayamanahue. Noquen pitibo, pitimabo, xehatibo, xehatimabo, non nescajaquin fiesta netebo huinomatibo, jascajaquin huinomatimahibo, hoxne xoo hihquiya non jascajaxonma nescajati jaibo, tantiti neten non jascajaxonma nescajati jaibo. Jascapahbo joibo mato yohihahbo bi nincayamanahue. ¹⁷ Pitibo, xehatibo, fiestabo, hoxne xoo netebo, tantiti netebo, jaa joibo ta janishqui. Jahua jan noque hahxonyaxihquiquin honanahbo hihxon res ta jaa joibo Papan yohinishqui. Cristoyahpaxon tah non jaa joi xenibo jenescai. ¹⁸ Caibo ta namaquen jahua ra jisish, shinancoинhcama sca jaiqui. Jahua copi jascatimahi bi jascari. Papan shinanjomahax res sca yanca bi res yohuani. Jascapahboxon ta mato haxemacanihqui man piti tenenon hihxon mato haxemaquin. Papan naihoh queha yoshinbo qui sca man horanon hihxon mato haxemaquin. Jato nincayamanahue. Papan shinan mato bichincanmis. ¹⁹ Jascapahbaan ta noquen Hihbo bihcoinyamahiqui. Noquen Hihbo hues-tichin ta noque coshi hinanihqui huesti

yora sca jaax non haninon. Criston shinanahpa rahsi jaax tah non yanapanhanani jihuetax coshi hinanhahnanax hashoan sca Papan shinan bihbonahi.

²⁰ Cristo betan mahuanibho tah man qui, mai meha shinan potanibho. ¿Jahua copi sca man mai mehabaan hahcαι quescajaquin man mai mehabo nincacain jaabaan mato haxemanon? ²¹ Xecoyamahue, piyamahue, meheyamahue, hah ta jacanihqui. ²² Jaaban yohihibo ta non piquin queyobahinaibo rahsi qui. Jaton yohuan ta jonibaan shinanax yohuanresai qui, Papan jascahue hahcama. ²³ Honan quescajaquin bi honancoinaima joi tah qui. Noquen Hihbo queenai quescajaquinma bi ta hahmebi shinanxon noquen Hihbo hahxonti jacanihqui. Noquen Hibaan yohinoh quescajayaquin. Piti jaxon bi piti tenequin. Jascaxon tah non mai mehabo shinanbo non potatimahi jahuentianbi.

3 Cristo betanbi ta mato hahquiri-
hbi huenihihninishqui. Jaa copi jaan hinanaibo shinan benanahue. Noquen naihoh queha Papa patax tsahoxon ta noque hinanihqui. Jahuen shinan benabonanahue. ² Jaa janin res maton shinan hahnahue. Mai mehabo janin hahyamaquin. ³ Man tah man mahuascaniqui. Cristo betanbi sca tah man ji-huetai, Papanahbo sca. Mahuati qui riquetimascai. ⁴ Noque jihuemanica Cristo sanareneni jahuiya tah man mato ri-hbi hahbetanbi janibi sca nihyaxihqui xabayahpabo sca.

Tiromapahonish bi behna shinanyahpa

⁵ Jaa copi maton shinan tiromabo jenebahinnahue, Cristojomaxon man bihnibo shinanbo. Joni huetsa betan hihqui hohchati. Haiboya yohuanti. Tsiniti. Tiromahihti queenti. Caibaan jahuabora jato bichinti

shinanai. Jascaxon bichinah ta santo chibahna jasca rabe qui. ⁶ Jascapahbo copi ta nincayosmabo Papan casticanpaqueyaxihqui. ⁷ Mato rihbi tah man jascapahbo hihpahoniqui, jascapa shinanya jaax. ⁸ Jascapahbo hihníxon bi jenebahinscanahue nea jatihibi: rainyamati, sinati, tiromajati, huetsa joni qui yohuanti, rishtaya yohuanti. Jascapa yohuanbo jenebahinscanahue. ⁹ Man shinanpahoni jenebahinax res sca joni huetsa betan yohuani quesayamanahue. ¹⁰ Shinan behna sca tah man bichi. Papan rihbi ta mato honanmabonaquin shinan behnajaxonihqui. Mato jonijancahton shinanai quescajaquin sca man shinannon maton shinan behnajabonaquin. ¹¹ Noque behnabo tah non judiobaan nahuaboma sca jai. Judioboma rihbi sca jai. Judioboma honantiyahpaboma sca jai. Jaa honantijomaboma sca jai. Nahuabomo hihyamascai. Nahua bi res nahuabomo hihyamascai. Hinabo hihyamascai. Hinaboma hihyamascai. Jascapahboma sca jaax bi Cristoyahpabo rahsi. Criston jonibo rahsi.

¹² Papan ta mato caisihqui, jahuenahbi jahuen baquebo man janon mato yohiquin. Matohon shinanquin. Behna shinanyahpaboxon sca, Papan caisai-boxon rihbi sca joni huetsa yanapanti shinan bihnahue. Joni huetsahon shinanxon hahxonti shinanbo bihquin. Huetsan yohihah nincati shinanbo, honaxonbi yohiti shinanbo. Jatsanjaha bi copitima shinanbo. Jascapa shinanbo bihnahue. ¹³ Tiromahibo tene-nannahue. Heen huetsa ta hehqui tiromahiqui hih min jacatsihxon bi jan mi-hqui tiromahibo shinanyamahue. Maton Hihbaan maton hohcha shinanyamascai quescajanahue. ¹⁴ Jaa shinanbo jatihibi bihxon bi noquen huetsabon shinanti shinanbo hashoan bihbo-

nanahue. Noquen huetsabohon shinanquin tah man texe maton shinan siri-jabahinai shinanyahpa siri sca janoxon.¹⁵ Criston maton jointibo sirijanon hihxon rihbi janahue caibo betan siripi sca jihuenuxon. Man jascari jihuenuon hihxon ta mato huesti yorajanishqui. Hahxon tah min noque jai Papan, hahribinahue.

¹⁶ Criston joi rihbi maton jointi janin bexojanahue hicha. Shinanquin sirijahax honanmahanannahue pontejaquin yohi-nani. Behuarihbinahue. Papan huishani behuahi. Matonbi shinanax behuarihbinahue noquen Hihbo qui behuahi. Maton jointinin shinanax Hahxon tah min noque jai Papan hihqui behuahi.¹⁷ Man hahcai jatihibi noquen Hihbo Jesusen janen hahnahue. Maton janan yohuan-quin, maton mequeman teequin rihbi jahuen janen hahquin. Jahuen janen rihbi yohiquin, Hahxon tah min noque jai Papan, hahnahue.

Papa nincaxon jonibo yanapanti

¹⁸ Maton benebaan yohihah nincanahue, haibobon. Man jato nincati ta noquen queenihqui.¹⁹ Maton haibohon queennahue, bebobon. Jato rainyamahaxma jihuenuahue.²⁰ Maton papan, maton maman mato yohiha jatihibi nincanahue, baquebon. Man nincati ta noquen Hihbo hihti queenihqui.²¹ Baqueyahpbabon, maton baquebo yohiquin sirijaxon jato sinamayamanahue. Tiromajaquin shinancamnis.²² Maton patoronen mato yohiha jatihibi nincanahue, patoroyahpbabon. Sirijaquin jato hahxonnahue jaabaan jisnon hihxon res ma bi hahcoinquin noquen Hihbo shinanhahnan. Patorobaan jisnon hihquish hihquibo quescayamanahue.²³ Jonima bi noquen Hihbo man teexonai honanxon man hahcai jatihibi coshicahinxon hahcoinnahue.

²⁴ Noquen Hihbo Cristo tah man teexonai. Jaan ta mato copijaquin sca jan mato bexojaxonai mato hinanyaxihqui. ²⁵ Tiromajanicabo rihbi ta copiyaxihqui qui jan tiromajahi copi. Casticanquin ta tsoabi cahnetimahqui.

4 Sirijaquin maton jonibo copi-janahue, joniyahpabon. Sirijaquin honanxon jato copijacoinquin. Naihoh maton Hihbo rihbi jai honanxon sirijaquin jato copijaquin.

² Papa yocaquin jeneyamanahue. Jaa yocacahnan coiramenahue huetsa janin maton shinan camayamaquin. Hahxon tah min noque jai Papan hahti shin-anbehnoyamaribinahue.³ Criston joi siri hen nenoxonbi yohiti hahtipahn non hea yocaxonnahue. Papan nincamaya-manixon bi rahma nincamascai joi siri tah qui hen jato yohihi. Jaa copi tah hen nea sipo xoboho tsahotai hea tsahonhohbo.⁴ Hen sirijaquin jato jaa joi nincamanon hihxon Papa hea yocaxon-nahue, hean yohiti jai quescajaquin hen yohinon.

⁵ Shinanquin sirijaxon Cristojomabo yohuanquihnnahue. Yohiti siripai tihibi jato nincamanahue.⁶ Nincati queenahbo hihxon shinanya yohuantiyaxon jato yohuanquihnnquin. Jahua min shinanain hahca tah man jascapa yohuantiyaxon jatihibi joni yohiti honanscatihi.

Hahan quirica queyoti

⁷ Tíquiconen ta jatihibi hen huinotaibo mato yohiyaxihqui qui. Hahan hen shinanai noquen huetsa tah qui. Sirijaquin ta hea yanapaniqui, hehbe Criston yonotixon.⁸ Non jenquetsahpi jihuetai hihxon tah hen mato qui jaa raanai man honannon hihxon. Jaan mato yohihah man sirijaquin sca shinannon hihxon tah hen jaa raanai.⁹ Onésimo rihbi ta hahbetan cahiqui. Jaa rihbi ta hahan non shinanai

noquen huetsa qui, Papan joi nincanica. Maton caibo rihbi tah qui. Nenoha joibo jatihibi ta mato yohiyaxihiçanihqui rabexon.

¹⁰Bernaben chahi Marcos mato qui cahiya sirijaquin bihnahue. Nocotaiya jaa yanapanyaxahnahue, hah tah hen mato janiqui. Aristarco ta heyabi sipo xoboho tsahoncanhoxqui. Aristarco, Marcos, Jesus Justo hahcaibo, jaabo rahsichin ta mato qui joi raanihqui man jascabi jayamahin, hahquin. ¹¹Jaabo quimisha res ta heen caibo qui, hea yanapannicahbo. Papan jihuetahbó hichanon hihxon ta yanapanquin hea sirijaquin shinanmacanihqui. ¹²Maton caibo Epafras rihbi ta Criston yonotixon nenoxon mato qui joi siri raanihqui. Noquen Papa yocaxonquin ta mato jascabijaquin shinanxon mato yocaxoniqui. Papan coshiyahpahax sca man hohchati queenyamabiresnon. Man jahuejati Papa queenihquin man honanquin sirijaribinon ta mato hihti yocaxoniqui. ¹³Mato hihti

yocaxonxon ta Laodicea janinhahbo rihbi hahxonxon Hierápolis janinhahbo rihbi jato hahxonihqui. Man honannon hihxon tah hen mato yohihi. ¹⁴Noquen rahonnica Lucasen ta mato qui joi raanihqui. Demasen rihbi ta mato qui joi raanihqui, man jascabi jayamahin, hahquin.

¹⁵Laodicea jema janinha noquen huetsabo yohixonnahue, man jascabi jayamahin, hahquin. Ninfas, jahuen xoboho tsinquitai noquen huetsabo rihbi jascajaquin yohixonquin. ¹⁶Nea quirica jisxon, Laodicea jema janinha noquen huetsabo sca jismanahue. Hen jato qui raanho quirica rihbi jisnahue, maton. ¹⁷Arquipo yohinahue, noquen Hihbaan tee hen hinanni hahxonquin sirjanoxon jan jisnon.

¹⁸Heanbi huishaxon tah hen mato man jascabi jayamahin, hahcai. Hea sipo xoboho tsahotai shinanbehnoyamanahue. Noquen Hihbaan mato shinan hinannon hihxon tah hen mato yocaxonai.

1 TESALONICABO

Tesalonicabo qui Pablonen raanni joi

Raannoxon Pablo betan huishahibo

1 Pablo, Silvano, Timoteo, noque rahnisi hihxon tah non mato qui joi raanai, noque huetsabon. Man Papa Dios betan hihquibo, man noque Hihbo Jesucristo betan hihquibo qui tah non nea joi raanai Tesalónica jema janin. ¿Jahuen shinanya man jihueyamahin? ¿Man shinanquin sirijahax sca jihueyamahin?

Ponte res jihuexon nincacoinaibo

² Noquen Papa Dios yocaxon tihibi tah non Hahxon tah min jai Papan, hahcai, matohon jatihibi shinanxon. Jascajaquin tah non cahnexonma mato yocaxonai. ³ Nincacoinxon man noque Hihbo hahxonai, joni huetsahon shinanxon man teessonai, noque Hihbo joyaxihqui honanxon man tenehi, man jascajahi honanxon tah non mato yocaxonai. ⁴ Matohon ta noque Papa queenihqui. Papan caisaibo tah non mato honanai, noque huetsabaan. ⁵ Yohuanquin res tah non joi siri mato yohiyamanihqui. Papan coshi jisxon, Dios Yoshiman coshin hahcai rihbi jisxon, Papan joiya non hihqui honancoinxon tah man nincacoinnihqui. ¿Mato qui nocoxon, matohon shinanxon, non tenexon mato hahxonyamanihquin? Man tah man honanai.

⁶ Caibaan mato tiromajanon bi Dios Yoshiman mato hihti jenimamanon tah man Papan joi bihcoinniqui, noque hahcai quescajanicalbo sca janoxon, noque Hihbaan hahni quescajanicalbo rihbi sca janoxon. ⁷ Man tenexonai honanxon ta Macedonia mai janin ji-huetai nincacoinaibaan jatihibonbi sca jascajaribicannishqui, Acaya mai janin-

hahaan rihbi jascajanon. ⁸ Mato janinhax ta noquen Hihbaan joi yohuanchanicanacaniqui. Macedonia janin res ma, Acaya janin res ma. Jatihibonbi ta jahuen joi nocotihqui. Man Papan joi nincacoinai ta jatihibincoxon ninca-caniqui, jahua yohiti non pishinyamas-canon. ⁹ Man noque Johue hahxon maton santobo potaxon jihuenica Papa Dios coin man hihbojamahi ta yohicaniqui jatihibi janinxon. ¹⁰ Jahuen baque nai-hoh quehax jonon tah man manascai. Jaa jahuen baque ta Jesus qui, hihquipi bi Papan hahquirihbi huenini. Jayaxihqui casticanti ta jaan noque xahbanjamatihihi.

Janoxon Pablonen hahní

2 Yanca res ma tah non mato qui noconihqui, heen huetsabaan. Matonbi tah man honanai. ² Filipos jema janinxon noque hihti tiromajahipibaan bi tah non tenexon, noque Papa shinanxon, raque potaxon, Papan joi siri mato yohinihqui, hihti pantehibaan bi. ³ Yohuan rishtaya tah non jayamahi. Sirijaquin honanxon tah non yohihi, paranxonma. ⁴ Noque honanxon non yohiti siriscai jisxon Joi siri yohiscatannahue Papan noque jaah tah non jaa joibi yohihi. Jonibo queenai quescajaquinma bi noque Papa queenai quescajaquin tah non yohihi. Jaan ta noque shinan honanihqui. ⁵ Siripi yohuanihcama tah non jayamahi. Hahan paranti joi tah non jahuentianbi yohiyamanihqui. Man tah man honanai. Jahuabi paranxonma jahua maton coriqui bichinnoxonma tah non joi siri mato yohinihqui. Papan ta honanihqui. ⁶ Jonibo noque qui siripi yohuannon hihxonma tah non yohihi ni matobi ni huetsabo noque qui siripi yohuannon hihxonma. ⁷ Criston raantixon tah non pishinxon mato yocati hahtipahi. Coshin yocati hahtipahxon bi tah non honaxonbi res mato yohini-

hqui. Jahuen maman jahuen baquebo coiranquin hahcai quescajaquin honax-onbi mato yohiquin.⁸ Jascajaquin mato-hon shinanxon tah non jenimahanan Papan joi siri mato hinanax noquebi rihbi mato qui hinamehniqui, matohon hihti shinanxon.⁹ Yobacahini non tee teeni tah man honanai, noque huetsabaan. Mato jatsanjayamanoxon tah non mato jahuabi yocayamanihqui. Papan joi siri mato yohihahnan jahuabi pitibo mato yocayamanoxon tah non teebahinahax tee teeshinapahonihi.

¹⁰ Mato nincacoinaibo tocan tah non noquen Papa qui mequejaquetax ji-huenihqui ponte res. Noque qui tiromahi yohuanti ta yamanishqui. Man tah man honancoinai. Papan rihbi ta honancoiniqui.¹¹ Noquen baquebo sirijaquin yohiquin hahcajaquin tah non mato huesti huestibo sirijaquin yohipaqueñi-hqui.¹² Janoxon jan jihuemahi janin man canon hihxon ta Papan mato quenahihqui, jano jahuen xaba jaiton man canon. Jaa queenai quescari man ji-huenon hihxon tah non mato yohini-hqui. Hihti yohi tah non mato janiqui, hea huetsabaan, jascari jihuetti man honannon hihxon. Man tah man honanai.

¹³ Non mato yohihi joi nincaxon tah man Jonin joimah ta qui, Papan joi ta noque yohicoinihqui hihxon man bihcoinniqui. Papan joi coin tah qui. Man nincacoinaibaan jointi janin ta jahuen joi teetihqui. Man sirijaquin bihni copi tah non jascabijaquin noquen Papa yohihi, Hahxon tah min jai Papan, hahquin.¹⁴ Judea mainxon Papan joi nincacoinax Jesucristo qui hinamehtaibaan hahni quescajanica-hbo tah man qui, noque huetsabon. Jaton caibaan jato tiromajani quescajaribiquin ta maton caibaan mato tiromajarihbishqui.¹⁵ Papan joi yohinicabo rehtexon ta noquen Hihbo Jesus rihbi sca rehtexon noque

sca jaa judiobaan rehtecatsihcاني، Papan joi nincayosmabaan.¹⁶ Jaton nahuabo sca Papan teehihmanon non yohicatsihqui bi ta nincayosmaboxon jaabaan noque pantehihqui, jatihibi jonibaan rahuixon. Jascajaquin ta jaton hohcha senenjacanihqui. Pantehibaan bi ta sinaxon Papan jato jascabijaquin sca casticanyaxihqui.

Tesalonicabo Pablonen jiscatsihqui

¹⁷ Basima tahni sca tah non mato betan hihyamascaxon mato jisyamascaxon bi matohon hihti shinanax mato hihti jiscatsihquish mato qui cati non queen-biresai, heen huetsabaan.¹⁸ Mato jisi hea Pablo cacatsihquish cahi bi ta hea cahi tihibi Satanasnhe hea pantehihqui.¹⁹ Noquen Hihbo Jesus jahuiya tah non jaa bebonxon mato hihti jiscatsihyaxi-hqui. Jaa bebon tah non matohon hihti jenimatihi. Jaa jahuiya tah non hihti jenimatihi, nincacinnish man jan o rihbi hihquiya.²⁰ Man nincacoinaiya tah non jenimahi, hihti jenimahi.

3 Basi mato jisyamascaxon tah hen joi hihti nincacatsihxon Atenas janin hea banenoxon hihxon noquen huetsa Timoteo mato qui raanhohqui.² Jaan ta Criston joi siri yohiquin noque yanapaniqui, Papa hahxonquin. Jaan yohihah man coshixon hashoan nincacoin-non hihxon tah non raanhohqui.³ Mato tiromajacatsihquiaan bi man nincacoinquin jeneyamanon hihxon mato coshi hinanon jaa raanquin. Tiromabo non tenenon ta noquen Hihbaan noque yohihihqui. Man tah man honanscái.⁴ Mato betan hihparixon tah non jayax-ihquiibo mato yohinihqui, Noque ta jascajayaxihcanihqui, hahquin. Hen yohini quescia sca ta jaiqui. Man tah man honanai.⁵ Jaa copi tah hen honancatsihquin teneyamascaxon, man nincacoin-parihin hihxon honanno-xon mato qui jaa raanhohqui. Jenquetsahaxon ra tiroma

yoshiman mato tanahah noquen tee yamacahinmis hihxon tah hen raanhohqui honancatsihquin.

⁶ Mato jistani joxon sca ta noque yohihipishqui. Man nincacoinai, joni huetsahon man shinanai, jascabijaquin man noque shinanai, mato jiscatsihqui non hihqui quescaribhi man mato jai, noque ta sirijaquin yohihiqui. ⁷ Man shinancoinai yohihah tah non jenimarenenipiqui, heen huetsabaan. Nenoxon noque tiromajaxon hohmis hohmisjahibaan bi tah non jenimascai. ⁸ Man noquen Hihbo nincacoinquin jeneyamahi joi nincacax tah non sirijaquin sca shinanai. ⁹⁻¹⁰ Mato qui nocoxon man honanti pishinaibo mato yohinoxon tah non yame yocaxon bariyahpan rihbi noquen Papa hihti yocacai. Jascajaquin yocaxon bi tah non mato shinanxon Hahxon tah min noque jai Papan hah non jai, matohon shinanax hihti jenimahanan.

¹¹ Noquen Papa Dios betan noquen Hihbo Jesusen noque bahi jismanon tah non yocacai mato qui canoxon. ¹² Non matohon shinanxon hahxonai quescajaribiquin man hashoan sca joni huetsahon shinanxon hahxonnon tah non mato yocaxonai. Papan mato jahuen shinan hinanon, jatihibi jonibohon shinanxon man jato yanapannon mato yocaxonai. ¹³ Jatihibi noquen huetsaboya noquen Hihbo Jesus jahuiya noquen Papa Dios bebon man rishtajoma jatihibi mequexona nihyaxahnon, jan mato shinan coshijanon, tah non mato yocaxonai.

Noquen Papa queenai quescajati

4 Nea quirica janquenjanxon sca tah hen mato hihti yohihi, hea huetsabon. Mato tah hen hihti yocacai. Non mato haxemani quesca jihuenahue. Noquen Papa queenai quescajati jihuetai haxenish jascabibi jihuenahue. Man

rahma jihuetai quescahax bi hashoan ri-hbi sca jihuenahue.

² Noquen Hihbo Jesusen janen non mato yohini joi honanax jascabibi jihuenahue. ³ Papan baquebo man jihuecointi ta Papa queenihqui, man tsinihadma jihuenon. ⁴ Shinancoinax man maton haibo betan man jihuetai sirinon. ⁵ Papa Dios honanyamahibaan haiboyati res shinanai quescajayaquin. ⁶ Jascajaquinma tiromahaxma maton huetsa qui hohchayamanon. Noquen Hihbaan ta jascapa jatihibi copinica qui. Non tah non mato sirijaquin yohi sca janiqui. ⁷ Non rishtanonma bi jahuen baque siribo non janon ta Papan noque que-nanishqui. ⁸ Jaa copi honannahue: nea hen mato yohihi joi nincayosmabaan ta joni yohuanaima bi Papa Dios yohuanai joi nincayamahihqui. Jahuen yoshin siri mato hinannica ta noquen Papa Dios qui. Jaa ta yohuanihqui.

⁹ Papanbi honanmaha tah man maton huetsabohon shinanai. Noquen huetsabohon shinannahue hen mato yohi yohihahma bi tah man Papan shinanyaxon jatohon shinanscrai. ¹⁰ Macedonia mai janin jihuetai noquen huetsabohon shinanxon tah man jato jatihibi yanapanscrai. Man jato hahxonscrai bi tah non mato yohihi, noquen huetsabaan, hashoan rihbi man hahxonbonanon. ¹¹ Siripi jihuetai shinan queennahue. Tsoabi jatsanjayamanahue. Maton mequeman teenahue, non mato yohini quescabibi. ¹² Man jascapahbohi jisxon ta yohitimabaan mato honantihiqui. Jascajahax tah man jahuabi pishintimahi.

Noquen Hihbo joribiyaxihqui

¹³ Jenquetsahax hoxanihbo jihuera-biyaxihquiquin. Hen tah hen mato yohiscrai, heen huetsabaan, nincayosmabaan hahcrai quescajaquinma man masa shi-

nanyamanon hihxon.¹⁴ Jesus hihquish bi hahquirihbi huenini tah non honanai. Jascarihbibi huenitahbo ta hoxanhbo Papan hahbeyaxihqui qui, Jesus betan.

¹⁵ Noquen Hihbaan yohihah tah non nea joi mato yohihi. Noquen Hihbo jonon caman jihuetai banexon tah non hoxanihbo beboxontimahi. ¹⁶ Noquen Hihbobi ta coshin quenatax botopaque-yaxihqui qui. Jahuen quiquin yonotinin rihbi ta coshin quenayaxihqui qui. Huetsan rihbi ta jahuen corneta rehue hahyaxihqui qui. Jaatian ta noquen Hihbobi botopaquequihranyaxihqui qui. Joxon ta noquen huetsabo mahuanhbo pari hueniyaxihqui qui. ¹⁷ Jaatian ta noque jihuetai banetaibo jaaboyabi jaan bilihniyaxihqui qui, jato betan nai cohin tocan noquen Hihbo non behchinon naihohxon sca. Jaa pecaho tah non jascabihi sca noquen Hihbo betan hihtihi. ¹⁸ Jaa copi nea joi yohiquin joni huetsa sirijaquin shinanmahanannahue.

5 Jenquetsahpabo netebo jayaxihqui qui. Jenquetsahpabo bari tian jayaxihqui qui. Man tah man honanscrai. Jaa copi tah non jahuabi mato huishati pishinyamahi. ² Yame yometso sanareneni jahuicamahi ta noquen Hihbo joti nete nocorenentihqui. Man tah man honanquin sirijasrai. ³ Tsoabi ta rehtenanyamascrai qui, jahua qui raquetima ta jaiqui jaibaan bi ta histon bi res Papan jato queyoyaxihqui qui. Haibo tohoya baque bihcatsihquish hisinrenenihcamahi histon jahui. Tsoabi ta cahnetimahi qui. ⁴ Mato tah man jaabo quesgayamahi bahquish chian jihueyamahi, noquen huetsabaan, yometso quesgayamahi ta jaa nete mato qui nocoyaxihqui qui. ⁵ Xaba baquebo rahsi tah man qui, nete baquebo. Noque tah non yame baqueboma qui, bahquish

baqueboma. ⁶ Jaa copi caibo hihqui quesgayamahi hoxan hihyamanahue. Mohinahue, pahenihcamayamahi. ⁷ Hoxanicabo cahen yame hoxahi. Pahenicabo cahen yame pahencani. ⁸ Nete mehabo hihquish coiramenahue. Hahan xohpaxti sahuexon hahcajaxon nincacoinnahue, joni huetsahon shinanxon. Boxpaxti maixon hahcajaxon man teehiribitihi honannahue. ⁹ Noque rainyamanoxonma bi ta noquen Hihbo Jesucristonen noque teehirmanon Papan yohinishqui. ¹⁰ Noquen Hihbo ta noque copi mahuanishqui, mohiyamahax mahuatax non hahbetan hihnon. ¹¹ Jaa copi coshijahanannahue, sirijaquin shinanahbo. Yohiquin joni huetsa shinan hinanhahnannahue, man hahcai quescajaquin.

Noquen huetsabo jihuetai Pablonen yohihi

¹² Maton pastorobaan ta mato beboxoniqui. Beboxonquin mato sirijaquin yohihah nincanahue, noque huetsabon. Jaa tah non mato hihti yohihi. ¹³ Jaton tee copi man jatohon hihti shinannon tah non mato yohihi. Maton huetsabo betan rihbi siripi jihuena hue.

¹⁴ Chiquishaibo teetahbo jato sirijaquin yohinahue, noquen huetsabaan. Man jascajati tah non hihti queenai. Yobacahinyamahibo coshiahahbo jato shinan hinannahue. Yosmahibo yanapannahue. Noquen huetsabo jatihibi tenexon honaxonbi yohinahue.

¹⁵ Caibaan mato tiromajahah bi copiyamanahue. Copixonma maton huetsabo hahxonannahue, jatihibi jonibo rihbi hahxonquin.

¹⁶ Jenimahi jihuena hue. ¹⁷ Noquen Papa jaayocanahue. ¹⁸ Hahxon tah min noque jai Papan hahnahue, jatihibi copi. Man Jesucriston jonibo jascati ta noquen Papa queenihqui.

¹⁹ Dios Yoshiman mato shinanmahiya jointi chahomayamanahue. ²⁰ Papan joi yohihiboya nincanahue. ²¹ Hihresya manahue: jatihibi honannahue, siriti caisnoxon. ²² Jahuabi tiromahi quescapajati shinanyamabiresnahue.

²³ Mato tah hen yocaxonai, sirijaquin shinanmanica hihxon Papambi mato jatihobi mequexonnon noquen Hihbo Jesucristo jonon caman. Maton yoshin, maton shinan, maton yora, jatihobi mato hohchajoma bexojanon, mato qui jahua tiroma yohuanti yamanon. ²⁴ Mato quenaniciton ta jan yohini quescabijaquin

mato hahxonyaxihqui qui. Jaan ta pishinmatimahi qui.

Quirica janquenjahi

²⁵ Noque rihbi yocaxonnahue, noque huetsabon.

²⁶ Jatihibi noquen huetsabo noque yohixonnahue, Man jascabi jayamahin, hahquin.

²⁷ Noquen Hihbaan yonohah tah hen mato hihti yohihi, nea quirica man jatihibi noquen huetsabo nincamanon.

²⁸ Noquen Hihbo Jesucristonen jahuen shinan siri mato hinana jihuena hue hah tah hen jai.

2 TESALONICABO

*Tesalonicabo qui Pablonen
raanni joi, jahuen rabe sca*

Raannoxon Pablo betan huishahibo

1 Pablo, Silvano, Timoteo noque rah-sibi hihxon tah non mato qui joi raanai, noque huetsabon. Man noquen Papa Dios betan hihquibo, man noquen Hihbo Jesucristo betan hihquibo qui tah non joi raanai, Tesalónica jema janin. ²¿Noquen Hihbo Jesucristo betan Papa Diosen jahuen shinan mato hinanyamahihqui? ¿Jahuen shinan bichish man sirijaquin shinanax sca jihueyamahin?

Tiromabo Papan casticanyaxihqui

³Papan joi nincacoinquin tah man shinan hihti caibojahi, noque huetsabon. Jatihixonbi tah man joni huetsahon shinanax hahxonnananai yanapanhanani. Jaa copi tah hen jascabijaquin Hahxon tah min jai Papan hahcai, mato yocaxonxon. Hahxoncoinquin ta mato coshi hinanihqui. ⁴Tiromabaan mato hohmis hohmisjaxon tiromajahibaan bi man tenexon jenexonma shinancoinai tah non noquen huetsabo tocanxon noquenbi jato yohihi. ⁵Mato tiromajahiboya honannahue. Papan ta ponte shinanihqui. Janoxon jan jihuemahai janin man hihyaxahnon ta mato sirijahiqui. Jaa copi tah man yomanahaquehtai.

⁶Mato tiromajahibo copixonquin ta Papan jato hihti tiromajayaxihqui, jascajaha ta ponte qui hihxon. ⁷Hihti perehinhnatai chihiyahpa ta naihoh quehax noquen Hihbo Jesus sanarenenyaxihqui, jahuen coshi yonotibo betan. Joxon ta matoyabi noque tantimayaxihqui, man rahma tenehibo. ⁸Noque tantimaxon bi ta copixonquin noquen

Papa Dios honancatsihyamahibo, noquen Hihbo Jesucristo joi siri nincayos-mabo jaan casticanyaxihqui. ⁹Jaan casticana ta jascabi sca queyonihbo hihyaxihcаниhqui. Noquen Hihbo janin ta jaabo jahuentianbi jatimahiqui. Jahuen xabapan xabataima qui ta jato potayaxihqui. ¹⁰Jaa noquen Hihbo jahuiya tah non noque huetsabo rahsixon jaa hiti coshi non jisyaxihqui, nete hihbo. Hititi coshihiya tah non rahte rahteyaxihqui, jahuen joi nincacoinnihbo. Mato rihbi tah man janobi hihtihi, non yohi-hah nincacoinnish.

¹¹Jaa copi tah non mato jascabijaquin yocaxonai: Min jato yohini betanbi sene-nahbo jato sirijahue Papan, pishinyama-hahbo. Sirijaquin shinanax hahcatsi-hquibo jatihibi hahcábo miin coshin jato jascajamahue, shinancoinax teetai tihibi rihbi hahcábo jato coshi hinanhue Pa-pan, hah tah non jai mato yocaxonquin. ¹²Jascapahboxon tah man jato noquen Hihbo Jesucristo hihti shinanyahi man jismatihi, mato rihbi jahuen shinanya-hpabo jisfbo. Noquen Papan ta mato jas-cajaxonihqui, noquen Hihbo Jesucristo-nen rihbi.

Jayaxihqui yohitima joni

2 Noquen Hihbo Jesucristo jahuiton behchinoxon non tsinquipaqueyaxihqui joi sca ta hen mato yohihi, noquen huetsabaan. ²Noquen Hihbo ta johuanhoxqui jaibaan bi jato nincaya-manahue. Yoshiman jascajaquin yohi-hah bi nincayamanahue. Jonin rihbi jascajaquin yohihah bi nincayamaquin. Noquen huishahahcamaha joi rihbi mato qui nocotaiya bi nincayamaquin. Jasca jaibaan bi rahteyamanahue. ³Ni jen-quetsahpabi mato paranmayamanahue. Papa Dios potacatsihquibo pari ta joti-hiqui. Hoa yohitima yoshin pari rihbi ta caintihiqui, hihti tiroma yoshin. ⁴Jati-hibi Dios hahcaibo potacatsihquin ta

hahqui jonibo betihihpaquetai jatihibi rihbi potaquin tanayaxihqui qui, jaabi sca dioscatsihqui. Janoxon Papa yohiti xoboho tsahotax ta Hea ta hen dios qui, hihihiqui parani.

⁵ ¿Mato betan hihxon pari hen jaa joi mato yohini man shinanyamahin? ⁶ ¿Jahuen nete nocotaiya pari jaa yoshin cainyaxahnon jahuatohon rahma jaa pantehihquin? Man tah man honanai. ⁷ Jaa yoshin jotihi tsoan honannih que ma bi ta teescaiqui. Hashoan teepanan ta pantenication jaa pantehihqui, jahuen pantetima nete noconon caman. ⁸ Jaan panteyamascaiyta yohitima yoshin cainscatihqui. Jaa ta noquen Hihbo Jesusen yohuanxon res rehteyaxihqui qui. Sanareneni joquin jaa queyobahinquin. ⁹ Noquen Hihbaan jaa queyoyaxihqui ta cainxon yohitimaton jatihibi hahti hahtipahahcamayaxihqui qui, Satanasnen yanapanah. Hahan honanti quescapahbo hahxon ta hahan rahteti quescapahbo hahtihqui, hahcoinquinma bi paranquin. ¹⁰ Papan jato teehihmapanan ta hihcoinai joi nincacatsihyamahibo hihi tiromajaquin jaa yohitima yoshiman paranyaxihqui qui, queyonicabo. ¹¹ Nincacatsihyamahibo copi ta paramehti shinan Papan jato hinanyaxihqui qui, yoshin quesahi bi hihcoinai shinanax. ¹² Hihcoinai joi nincacatsihyamaxon bi tiromajati jenipahichaibo jatihibi hihi casticannoxon ta jascapa shinan Papan jato hinanyaxihqui qui.

Papan caisai jahuen jihuetauhbo

¹³ Jato jascajayaxihqui bi ta mato-hon noquen Hihbo queenihqui. Maijamenoxon ta Papan mato caisnishqui, mato teehihmayahnoxon, Dios Yoshi-man mato sirijaha hihcoinai joi man shinancoinaiton mato teehihmanoxon. Jaa copi tah non noquen Papa Dios jas-

cabi yohiti jai: Mia copi ta teehihcani-hqui Papan, hahquin. ¹⁴ Mato teehihmanoxon ta Papan mato quenanishqui, noquen Hihbo Jesucristonen xaba man bihyaxahnon hihxon. Non mato yohini joi siripan ta mato quenanishqui. ¹⁵ Jaa honanxon shinancoinquin jeneyamaxahnahue, noquen huetsabaan. Non mato honanmahi joi bihquin sirijanahue, noquen janan non mato yohini joi bihxon, huishaxon rihbi non mato yohini bihquin. ¹⁶ Noquehon shinanxon ta Papa Diosen noque jahuentianbi queyotimahi hahan sirijaquin shinanti noque hinani-hqui. Hahan jointi sirijahti noque hinanquin. ¹⁷ Noquen Papa Dios betan noquen Hihbo Jesucristonen mato jointi sirijanon tah hen mato yocaxonai. Jahuen shinan siri maton jointi janin nianon, man siribo janon, sirijaquin shinanax yohuanaibo man janon.

Noque yocaxonnahue hih Pablo jai

3 Nea quirica janquenjanoxon sca ¹ tah non mato yohihi, noquen huetsabaan. Noque yocaxonnahue, mato tocan noquen Hihbaan joi janí quescajarihbibi neno rihbi sca caicananon hichaxon nincacahbo. ² Nincayosmabo ta jaiqui tiroma janibo. Jaabaan noque bihyamanon noque yocaxonnahue. Nincacoinnica rahsimata jacanihqui hihxon tah non mato yohihi. ³ Noquen Hihbaan ta mato jenebahintimahihqui. Mato ta coshi hinanthihqui. Tiroma yoshiman mato jahuejayamanon ta mato jistihqui. ⁴ Non mato yohihi quescabijaquin tah man hahtih. Hahxon bi tah man hahribiyaxihqui, noquen Hihbo shinanxon tah non honanai. ⁵ Noquen Hihbaan mato honanmati tah hen mato yocaxonai, matohon noquen Papa hihi queenai man honannon, Criston mato tenexonni quescajaquin man teneti hahtipahnon.

Teeti ta jaiqui

⁶Noquen Hihbo Jesucriston janen tah non huetsa joi rihbi sca mato yohihi, noquen huetsabaan. Non mato yohini quescayamahax bi chiquishax noquen huetsabo jihuetaiya hahbetan hihyamabiresnahue. ⁷Mato tocan tah non chiquishax jihueyamapahonihqui. Man tah man honanai. Non coshin teepahoni quescarihbinahue, non teeni man honanai quescarihbibi. ⁸Copijaxonma tah non tsoanahbi piti pihanyamanihqui. Bariyahpan teebahinahax tah non yame rihbi niscan niscanax tee teexon hahpahonihqui, pishinxon mato yocaxon jatsanjamis hihxon. ⁹Mato yocaxon res piti hahtipahxon bi tah non noquen coriquinin maronihqui, non hahcai quescajaquin maton rihbi janon hihxon. ¹⁰Mato betan hihxon cah non mato yohinih, teecatsihyamahibo man pimayamanon. ¹¹Caibo man chiquishax teeyamahi yanca res yohuan yohuanaibohi cah non nincacai.

¹²Jascapa jonibo tah non hihti yohihi, noquen Hihbo Jesucristonen janen yonoquin. Siripi teenahue, matonahbi maton piti pinoxon.

¹³Caibo yanapanquin hahxonquin jeneyamanahue, noque huetsabon.

¹⁴Nea huishaquin non mato yohihi joi nincacatsihyamahibo honannahue. Hihtimahpax jan pontenon hihxon jascapa manayamascanahue. ¹⁵Jascapa tah man maton rahui quescama bi maton huetsa quescra pontequin yohitihii.

Janquenjanoxon yohihi

¹⁶Jahuen shinan siri hinanquin noquen Hihbaan mato jointi sirijanon tah hen mato yocaxonai, jatihibi tenehax man jointi hihti sirinon hihxon. Mato betanbi jaa jihuemon tah non yocaxonai.

¹⁷Heen mequemanbi huishaxon tah hen hahan queyoti joi huishascai. Jasca ta hen jai, hean raanai joi jatihibi ta heen huishaya qui. ¹⁸Noquen Hihbo Jesucristonen jahuen shinan siri mato hinanah jaya jihuenuahue.

1 TIMOTEO

Timoteo qui Pablonen raanni joi

Timoteo qui Pablonen raanai

1 Jesucriston raanti joni jahue hah ta Papan hea janishqui, noque teehihmanicaxon. Jesucriston rihbi ta hea jascajaquin yohinishqui. Jahuen raanti joni sca tah hen qui. Jaan noquen hohcha sohuaxona hahbetan sca non queyoyamanox manayaxihqui tah non honancoinai. ² Hea Pablon tah hen mihqui nea joi raanai, heen baque Timoteon. Heen baque coin tah min qui, hean yohihah min Papa Dios qui hinamehni. ¿Papan shinanya min jihueyamahin? ¿Mihon shinanxon noquen Hihbo Jesucristo betan Papan sirijaha min jointi siripax jihueyamahin?

Hihcoinicamajaquin haxemahibo qui coirametahbo

³ Macedonia main cacatsihxon hen mia yohini quescabihu Efeso jema janin banehue jaamajaquin honanmahibо pontenoxon. ⁴ Judiobaan shinanax yohuanai joibo nincayamascahabo jato yohihue. Tsoabo noquen xenibо quin hihxon ta jaton xohtabo caibaan toponpaquehihqui, tantixonma. Jascapa joibo ta yanca qui, hahan jahua bihtima. Jascapa join tah non noquen Hihbo nincacointi haxeyamahi. Jascapa joibo nincayamahahbo jato yohihue.

⁵ Jaabaan jascapa joi haxemahи bi tah non joni huetsahon shinannahbo hihxon non jato haxemahи noquen. Noquen Papa nincacoinxon ponte jihuetai honanax jascari jihuexon hohchataxma jihuexon joni huetsahon shinanscanon hihxon tah non jahuen joi siri yohihi. ⁶ Papan joi jenebahinax ta caibo yanca res yohuan yohuansciqui. ⁷ Honan-

onma bi ta Moisesnin huishani joi honanmacatsihcanihqui. Yohuanax ta Jasca tah qui hihcanihqui, yanca res. Jaabaan haxemahи joi honanxonma bi ta honanmacatsihcanihqui.

⁸ Pontejaquin haxemahи ta Moisesnin huishani joi siri qui. Non tah non honanai. ⁹ Ponte jihuetaibo pontenoxonma bi ta siripi jihueyamahibо pontenoxon Papan Moises huishamanishqui. Jaa honanxon tah non jaamajaquin hahyamahi. Pontema jihuetaibo; yohitimabо; Papahon shinanyosmabо; hohchataibo; tiromabо; Papan shinanjomabо; jaton papa, jaton mama rishquihibо; joni rehtemisbo; ¹⁰ tsinhibо; hahbe bebo betan hihcatsihquibо; joni yometsohbo; quesamisbo; paranmisbo; ponte joi nincayamahibо. Jascapahbo copi ta Papan Moises huishamanishqui. ¹¹ Criston joi siri ta ponte joi qui, hahan Papan shinan honanti. Jaa hihti siri noquen Papan ta hea yohinishqui, jaa joi siri hen honanmahи sca jihuemon.

Hahxon tah min jai hahti

¹²⁻¹³ Mian hea coshijaha tah hen miin joi siri jato honanmahи, Hihbon, hih tah hen jai. Hea tah hen tiromahi noquen Hihbo qui yohuanpahonihqui. Jaa tiromajacatsihquin tah hen noquen huetsabо hean tiromajapahonihqui. Jaa hichaqui tah hen jihuepahonihqui. Hea jascapa jihuetai bi ta hea caisnishqui, hen sirijayaxihqui honanxon. Criston noque hahxoncoinai honanyamahax tah hen jascapa jihuepahonihqui. Jaa copi ta hehon hihti shinanxon hea caisnishqui. Hahxon tah min jai Hihbon hih sca tah hen jai. ¹⁴ Jahuen shinan yohuashihxonma ta hea hinanresnishqui, jahan hen shinannon hihxon, jahuen joi hen shinancoinnon hihxon rihbi.

¹⁵ Hohchataibo teehihmahи ta Jesucristo main jonishqui. Jaa ta bih-

cointi joi qui, jatihixonbi bihti. Jatihibi jonibo hohchayahpabo hihqui bi tah hen hea hashoan hihti hohchaya hihpahoniqui.¹⁶ Hea jascapa hihqui bi ta hehon hihti shinanxon hea tenexon jaan heen hohcha sohuaxonnishqui. Jahuen-tiho tiromabo jaan tenehi honanahbo ta hea tenenishqui. Nincacoinax queyoyamanox jihueyaxihquiaan honannon hihxon ta hea tenehihqui.¹⁷ Noquen Papa ta jatihibichina noquen quiquin hapo qui, japhahonibaana, jayaxihquiaan ri-hbi. Mahuayosma, noquen Papa. Noquen jistimahi. Jaa huesti ta noquen Papa qui. Jaa yohinahue: Mia tah min Quiquin Hihbo qui Papan. Shinancoinya siri tah min qui, hahquin jascabijaquin yohinahue.

¹⁸ Mia tah hen hihti yohihi, heen baque Timoteon, Papan shinanyaxon mia yohiniboo quescajahu. Jaabaan yohini joi shinanhahnan hihti shinancoinxon Papan joi nincamahue.

¹⁹ Shinancoinquen jenexonma ponte jihueta shinan jenexonma rihbi jato nincamahue. Ponte jihueta shinan jenexon ta caibaan shinancoinyamascaiqui. Tiromabo sca jai.²⁰ Jascapahbo ta Himeneo betan Alejandro qui. Jaabo rabe tah hen Satanas hinanscái, Papa qui tiromahi yohuantima honanahbo hihxon.

Noquen Papa yocaxonti

2 Jaa copi tah hen nea pari mato yohihi. Papa yocanahue. Pishinaibo yocaxonnahue, Papan jato hahxonti pishinaibo rihbi yocaxonquin. Jan hahxonai copi Hahxon tah min jato jai Papan hihnahue, jatihibichina.² Quiquin hapobo yocaxonxon texe hapobo rihbi yocaxonnahue, non raquetaxma sca jihuenon hihxon, rehtenanaibo jayamanon hihxon rihbi, shinan siriyabo non jihuenon hihxon rihbi. Papahon shinanhahnan non siripi jihuenon hihxon ri-

hbi yocaxonquin.³ Non jascajaquin Papa yocaxona ta siri qui. Non jascajati cahen noque jihuemanica noquen Papa queenih.⁴ Jaan ta jatihibi jonibo teehimacatsihquiaqui, hahan jihuematí joi jato nincacoinmaquin.⁵ Jaa huesti ta nai-hoh queha Papa qui. Noquen Papa janinxon noque yocaxonai ta huesti rihbi qui, jonihax bi Jesucristo. Jaan ta noque noquen Papan joi yohihi.⁶ Jatihibi noquebo queyoyamanox manatahbo hihquish ta hinamehnishqui noquen hohcha copi mahuanoxon. Jonibo nincamati siriscaya ta jaa joi Papan nincamascanishqui.⁷ Hen jascajanon hihxon ta hea caisnashqui, jahuen joi yohicoin-non hihxon, jahuen raanti joni rihbi hea janon hihxon. Hihcoin tah hen jai. Quesayamahi. Judiomabo honanmanica hea janon hihxon ta hea caisnashqui, Papan joi coin yohixon hean jato nincacoinmanon.

⁸ Jatihibi janinxon bebobaan noquen Papa yocati jato honanmahue. Sinaxonma, join bahchinnanxonma, hohchajomaxon, jatihixonbi noquen Papa yocacahbo tah hen yohihi.⁹⁻¹⁰ Haibobo rihbi yohihue. Chopasiribo sahueresnahue, haibobon. Chopasirihax bi hahan tsinitima. Hahan tsiniti bohuexetijoma janahue. Oro morobo, copi joxo morobo, copi chopabo shinanyamanahue. Jascapahbo shinancoinquen bi jato yanapannoxon caibo hahxonti shinannahue. Papahon shinanai haibobaan ta jascajanicah qui hahquin jato yohihue.¹¹ Tsinquitaitabo tocan haibobo netexon nincacahbo jato haxemahue.¹² Haibobaan ta bebobo honanmatimahiqui. Bebo yonoyamaribiquin. Netexon nincacoinahbo jato yohihue.¹³ Adan pari ta Papan jonijanishqui. Jaa pecaho cahen Eva.¹⁴ Adan ta Satanás paranyamanishqui. Jahuen haibo caya ta parannishqui. Paranh-

hohchayahpascai.¹⁵ Jaabi ta haibobo Papan teehihmayaxihqui qui, baquebo bihxon hanijahanan shinancoinquin jeneyamahiboya, joni huetsahon shinanquin jeneyamahiboya, tsinixonma Papahon shinanquin jeneyamahiboya.

Pastoroyaxihquibo honantijati

3 Nincacointi ta nea joi qui. Pastorocatsihquibo ta siri tee queenihqui.² Pastorobo janon nescapahbo jonibo caishue. Jahua hahqui yohuanti yama. Huesti haiboyahpa. Tiromati qui hinamehyamahi. Hahri coirametai honan. Sirijaquin shinanax yohuannica. Jahuen xoboho nocotaibo jato sirijaquin bhnica. Papan joi nincamati shinanya.³ Pahenyamahi. Joi coshin yohuanaima. Sinayamahi. Join bahchinanti shinanyamahi. Coriqui bihmisma.⁴ Jahuen xoboho jihuetaibo sirijaquin jihuemanicah. Jaan yohihah jahuen baquebaan joi bichinxonma nincacai.⁵ Jahuen baquebo jihuematihonanyamaxon ta jenquetsahaxonbi jaan Papan caisaibo nincamatimahiqui.⁶ Rahma Papa qui hinamehtipibo ta pastorotimahiqui. Hea ta hen hashoan shinanya qui hih jan jamis, paramehtax. Jascani copi ta Papan tiroma yoshin casticanyaxihqui qui. Jascapa tiroma shinan bihmis bihxon behnabo pastoromayamahue.⁷ Nincacoinyamahibо siripi hahqui yohuanai nincaxon pari pastoromahue. Tiromahi hahqui yohuanaboya Satanasnen jaa tiroma shinan hinanmis.

Pastor yanapanyaxihquibo honantijati

⁸ Pastorobaan yanapannicahbo rihbi ta shinanya jonibo hihihi qui. Yohuanresaima. Pahenyosma. Coriqui bihmisma.⁹ Papan yohinihxonma bi rahma nincamahi joi ta Criston joi qui. Jaa joi ta

jaton jointinin yanapannicahbaan bihtihi qui, ponte jihueti honanax jascabih sca jihueti.¹⁰ Jato tanatahhue. Sirobohi honanscaxon jato caishue, yanapannicahbo hihnon hihxon.¹¹ Jaton haibobo rihbi ta shinanya hihihi qui. Tsoa qui bi yohuanyamahi. Pahenyosma. Shinanquin sirijaxon hahca.¹² Yanapannica cahen huesti haiboyahpa. Jaton baquebo, jaton xobon jihuetaibo sirijaquin jato jihuemaquin.¹³ Sirijaquin yanapanaboya ta jato qui siripi yohuancantihiqui. Sirijaquin yanapanax sca ta Jesucriston joi yohiti qui hihtimah-timahi qui.

Yohinihxonma bi Papan nincamascai

¹⁴ Mihqui histon cacatsihxon bi tah hen huishaxon mia yohihi.¹⁵ Hea basi sca jaiya tah min honantih, Papan baquebo jenquetsahpi jihuethi qui hihxon. Papan baquebo rahsi ta jan caisaibo qui, jihueticaxon jan caisai. Jaabo ta Criston joi coin bihnicahbo qui, Cristo qui hihcoini yohuanaibo.¹⁶ Papan yohinihxonma bi rahma noque nincamahi joi ta hahan rahteti qui, tsoan nincanihma joi. Jasca coin tah qui.

Yorayahpahax ta Cristo cainnishqui.

Ponte shinanya jan hihqui ta Dios Yoshiman sca noque jismanishqui. Jan main nichi ta Papan yonotibaan jismishqui. Judiomabo sca ta jahuen joi yohicaniqui jahuen jihuetaabaan. Nai namanxon ta nincacoincaniqui. Naihohxon sca ta Papan bihnihnishqui.

Papan joi jenebahinyaxihquibo

4 ¹ Dios Yoshiman sirijaquin yohihi joi sca tah hen mato yohihi. Noquen Hihbo joti hochoma sca jaiya ta caibaan Cristo jenebahinyaxihqui qui. Tiroma yoshiman joi nincaxon Cristo jenebahinquin, parannica yoshin nincaxon.² Jenebahinahbo hihxon ta Criston

joi yohicoinihcamaxon yoshiman joi honanmayaxihcanihqui parannicabaan. Ponte jihueta honanpahoni que bi jaton shinan masascai, ponte jihueta shinanyosmabo sca. ³Queeyahpatima joi ta yohicaniqui. Bebo rihbi haibaan bihtima sca ta jacanikhqui. Samati ta jato jayaxihcanihqui. Jascaya ta jacanikhqui, jahuen haibo betan bebo jihuemon Papan janí que bi. Piti rihbi ta Papan hinannishqui, nincacoinnicabaan bihnon. Bihxon Criston joi honancoinxon, Hahxon tah min noque jai Papan, hahcabo noque hinanquin. ⁴Papan hahní jatihibi ta siri qui. Mia copi tah non jaresscái Papan hih non jaiya ta non bihtimabó yamahihqui. ⁵Non jascahiya ta noquen piti Papan hinanah pitibo sca jatihiqui, jahuen joi yohixon non Papa yocacai copi.

Jesucriston joni siri

⁶Hen mia yohihi joibo rahsi noquen huetsabo honanmahax tah min Jesucriston teexonnica siri sca jatihi. Jas-capahax Criston joi nincacoinax hen mia nincamani joi siri rihbi honanquin sirijahax tah min miin shinan coshi sca jatihi. ⁷Honanma yohuanbo nincayamayaxahnhue. Quesahi yohuanbo nincayamabireshue. Papahon shinanti caya shinan shinanhue. ⁸Tee teequin tah non noquen yora coshijahi, hicha tahma. Jascayaquin hicha tahma coshi bihxon bi tah non Papahon shinanquin jatihibi shinan sca non bichi. Rahma jas-capa shinaman jihuetax tah non jahan rihbi noquen Hihbo betan sca non jihuetaxihqui. ⁹Jasca coin tah qui. Jatihibichin jaa honancoinpahinon. ¹⁰Honanahbo hihquish tah non tee teetai, coshi coshihi. Noquen Papa ta jihuetaxihqui. Jatihibi jonibaan jihuemanicahxon bi ta nincacoinax hahqui hinamehtaibo rahsi jaan jihuematihqui. Jaan noque ji-

huemayaxihqui honanxon tah non siri-jaquin sca shinanai.

¹¹Hen mia yohihi joibo honanmaquin jato yohihue jascalahbo. ¹²Beronanxon bi hihtimahxonma jatihibi jonibo nincamahue. Mia ponte res yohuanai quescari noquen huetsabo rihbi yohuanahbo hihquish yohuanhue. Mia ponte res jihuetai quescari jihuetahbo hihquish jihuehue. Mian joni huetsahon shinanai quescajaquin hahcabo hihxon jahue. Noquen Papa mian nincacai quescajaquin nincacahbo jahue. Mian pontejaquin shinanai quescajaquin shinanahbo hihxon jahue. ¹³Hea noconon caman tsinquitaitabo Papan huishani joi jato nincamahue. Jaa nincamaxon siripi jihuetahbo jato yohirihbihue honanmaquin. ¹⁴Noquen Papa yocaxon ta jahuen pastorobaan Papa hahxonti tee mia hinannishqui. Papan shinanyaxon ta mia yohicannishqui, Papan joi nincamanica mia janon. Jaa joiya teeti shinanbehnoyamayaxahtahi min.

¹⁵Hen mia yohihi quescabajahi jihuehue. Jaa res shinani jihuetai. Min hashoan shinan hichacanahi jisibo hihquish jascalahue. ¹⁶Coiramehue. Honanmaquin rihbi coiranquin. Hen mia yohihi joibo bihcoinhue. Jascayaquin tah min Papan jihuematibahin nihxon mia nincacaibo rihbi min nihquihinyaxihqui.

Noquen huetsabo yohiti haxemahi

5Yosibobo pontequin coshin yohiyamahue. Minin papa yohiquin hahcajaquin tah min jato sirijaquin yohitihi. Yosibomabo rihbi miin huetsabo hahcajaquin yohuanquihnhue. ²Yoxabobo rihbi miin mama hahcajaquin yohuanquihnhue. Yoxabomabo rihbi miin chocabo hahcajaquin yohuanquihnhue, sirijaquin shinanxon.

³Yononmacoinai haibobo yanapanhue jaabo pishinaibo hinanquin.
⁴Baqueyahpa yononma jaiya, jahuen baque yamahi bi jahuen bababo jaiya, jaabo pari yohihue yanapanabao, jaton maman jato hanijani copiquin sca yanapanabao. Nincacinnicaxon ta jaabaan pari jaton papa jaton mamabo yanapantihiqui. Jascajati haxehahbo hihxon jato honanmahue. Papan jisi ta jascajaha siri qui. ⁵Yononmacoinai haibaan ta jaa huesti sca jihuexon Papa res shinanihqui. Jascapahton ta Papa yocabahinaxon yocashinaxon joni huetsa yoca yocaxoniqui. ⁶Jahuen bohuexehtibo jahuen rajotibo jahuen chopasiriboshinani nichi yononma ta jascajayamahiqui. Jascapa ta mohitahpahax bi shinan yamahi qui, mahuatax quescapi. ⁷Nea hen mia yohiha joibo jato sirijaquin yohihue, jato qui yohuanti yamanon. ⁸Nincacinnicaton ta jahuen baquebo, jahuen haibo, jahuen huetsabo, jahuen papa, jahuen mama, jaabo pari bihxontihiqui, piti, jahuaborabo rihbi. Jaatian sca jahuen jenabo rihbi bihxonquin. Jato bihxonyamahibaan ta Criston joi potascapiro. Nincayosma mentan hashoan tiromascai.

⁹Noquen huetsabo tsinquixon noquen choa yononmabaan jane huishapaquehue. Nescapahbo rahsi huishahue: sesenta bari huinoscaibo. Huesti bebo betan hihnbó. ¹⁰Jan yanapanquin siribojaxonpahoni hichaxon honanaibo haibo. Jahuen baquebo sirijaquin hanijapahoni. Jahuen xobohoxon nincacoinaibo pimapahoni. Jahuen baque hahcayaquin nincacinnicabo yanapanpahoni. Nincacoinaibo yomanahtaiton yanapanpahoni. Jatihibijaquin sirijaxonti shinanya jihuelpahoni.

¹¹Yoxabohaxma bi yononmabaan jane huishayamahue. Jascapahbaan

ta Cristo shinanyamascaxon bebo bihribicatsihcanihqui. ¹²Jascapahbo ta Papan jato siri jisyamahiqui, noquen huetsabo yocaxonnica japhahonixon bi jenescaiton. ¹³Chiquishaibo sca ta jatihiqui. Xobo tihibi betseti. Chiquishax yohuan yohuanresi. Jahuen caibo qui yohuanrihbihi. Honanihma yohuanresi. ¹⁴Jaa copi tah hen mato yohihi. Yoxabohaxma bi yononmaxon ta bebo bihtihiqui. Jahuen baquebo hanijaquin sirijaquin. Jahuen xobon jihuetaibo coiranquin. Jascajahiya ta maton rahui mato qui yohuantomahiqui. ¹⁵Caibaan ta Satanas sca chibanihqui, bahinma sca bocani.

¹⁶Jenaboyahpa yononma jaiya ta jahuen nincacoinai jenabaan jaa yanapantihiqui, noque huetsabaan jaa yanapanyamanon. Noque huetsabaan tajenajoma yononmabo yanapantihiqui.

¹⁷Sirijaquin nincamahi pastorobo rabejaquin copijati shinannahue hinanxon tian tihibi. Papan joi yohixon honanmahi nincamanicahbo hashoan sca hinanhiquin. ¹⁸Huishani joi ta nescapah qui: Trigo bero xehmequin jamacai vaca tah min conextimahi, hihqui. Teenicaton ta jan cananai bihtihiqui hihqui huetsa huishani joi rihbi.

¹⁹Pastorobo qui tiromahi yohuanai nincayamahue. Rabe hihyamahax quimisha chanicoinnica jaiya pari nincaquin. ²⁰Hohchaquin jenecatsihyamahibo jato pontejaquin yohihue tiromati qui raquetahbo. Jatihixonbi nincanon bi jato hihti yohihue. ²¹Papan noque jisnon bi Jesucriston rihbi noque jisnon bi jan caisai jahuen naihoh queha yonotibaan rihbi noque jisnon bi tah hen mia yohihi. Hen mia yohihi joibo bihcoinhue caibo mentan huetsahon hashoan shinanxonma bi jascapahbo rahsi hahquin hahan shinanxon.

²²Pastorobo janon hihxon jato honanquin sirijaxon pari jato caishue. Huetsa joni hohchaya hihquiya hahbe hohchaya jayamahue. Hohchajoma siri jihuehue.

²³Jene paxa rahsima bi hompa pishca rihbi xehascahue, miin poco hisinrahshi rohanoxon.

²⁴Noquen jisnon bi ta caibo hohchatihqui, Papan jato casticanyaxihqui non honannon. Huetsabo cahen hohcharibih, chini sca non honanyaxahnnon. ²⁵Yanapanquin hahxonaibo ta honantib bi res qui. Non rahma honanyamahi bi ta Papan copiquin jato hahxonaiya non honanyaxihqui.

6 Jatihibi patoroyahpabo yohihue, ja-ton patorobaan yonohah hahcabo. Jato nincati ta jaiqui hahxon, noquen Papa qui jaton patorobo tiromahi yohuanyamahahbo jaton jonibo jascjahue. Papan joi qui rihbi tiromahi yohuanyamahahbo. ²Nincacoinnica patoroyahpabo rihbi yohihue. Jaton huetsascaxon yonohah bi nincayamascati shinanyamahahbo jato honanmahue. Hashoan sca nincati ta jaiqui, jaabaan teexonai joni nincacoinnica sca copi. Jahan shinanxon copi hashoan rihbi teexonquin. Jascjahabo jato yohi yohihue honanmaquin.

Nincacoinnax siri jihueta

³Jaamajaquin yohihibo honanhue. Jaabo ta noquen Hihbo Jesucriston ponte joi bihyamahib qui. Hahan Papa honanti joibo rihbi bihyamahib, honanmabo. ⁴Jascapahbaan ta honan hihqui shinanxon bi jahuabi honanyamahihqui. Join bahchinanti res shinanquin. Yohuanai nincaxon joi bichinti res shinanquin. Jascapa shinanyabaan ta jonibo notsi notsimaresihqui. Sinacanannati shinanmaresquin. Noquen huetsa qui yohuanti shinanmaresquin.

Huetsahon tiromajaquin shinanmaquin.

⁵Jascapa joi bichish ta tiroma shinanyabo join rehtenanscaiqui Papan jojomabohax. Noquen Hihbo bihxon ta jayaxon coriqui bihti shinancaniqui honanyamaxon. ⁶Noquen Hihbo bihxon tah non jayaxon coriqui bihti shinantimahi. Huetsa caya tah non hicha bihcoinai, coriqui tsamancatsihxonma bi shinanquin sirijaxon. ⁷Jahuajomabi tah non nea nete qui cainnihqui. Jahuabi rihbi tah non caquin sca boti hahtipahyamahi.

⁸Piti jaxon chopra rihbi jaxon tah non jayaxon shinanquin sirijascatihia jahua hashoan queenyamahi. ⁹Coriquiyahpacatsihquibo ta tiroma yoshiman paranihqui. Jato bihnoxon cahen jato shinan hinanquin. Jonibo tiromajanoxon ta jato mai meha shinanbo queenmahiqui jato queyobahinnoxon. Hicha tiroma queenti shinan cahen jato hinanquin. Masataibo sca janon cahen jato jascapahbo shinanbo hinanquin. ¹⁰Coriqui queenyoraxon ta jatihibi tiroma shinan bihresscacanihqui. Coriqui queenxon rihbi ta Criston joi jenebahinscacanihqui caibaan. Criston joi jenebahinxon sca masa shinanscacanquin hicha.

Hihcoinjaquin Cristo jenetima

¹¹Jascapahbo queenyamabireshue, Papan baquen. Ponte hihti shinanhue, Papa shinanquin. Jan noque hahxonai honanrihbiquin. Joni huetsahon shinanrihbiquin. Noquen Hihbo jenexonma tenequin Honaxonbi rihbi caibo yohiquin. ¹²Shinan camahahtanxon Cristo hahxonhue jaa chibanquin. Hichaxon jisibo tah min Cristo bihniqui. Jaatianbi ta mia queyoyamanox mananica sca Criston mia yohnishqui. Min queyoyamanox manascai honanquin

sirijahue.¹³ Noquen Papan ta jatihibi mohitahpabo jonijanishqui. Jahuen nincanon bi tah hen mia yohihi. Jesucriston nincanon bi rihbi. Jaan ta Poncio Pilato yohinishqui: Hea tah jihuemanicah qui, hahquin.¹⁴ Noquen Hihbo Jesucristo jonon caman jahuen joi jascabijaquin nincahue rishtaxonma. Mihqui jahuabi yohuan jayamanon siriresi jihuahue.¹⁵ Noquen Hihbo joti tianbi ta Papan jaa raanyaxihqui qui, jaa huesti noquen quiquin hapo siri hihxon. Jaa ta jatihibi quiquin hapobaan quiquin hapo qui. Jatihibi hihbobaan hihbo rihbi.¹⁶ Jaa huesti ta mahuayosma qui. Jonibaan teneyosma xabapan ta jaa jihuethqui. Tsoanbi ta jaa jisyamanishqui. Tsoanbi rihbi tah non jaa jisti hahtipahyamahi. Mia tah min Xaba Hihbo qui Papan, Noque jascabijaquin hihbojahue hahnahue, jascajaquin rahan hih hen janon.

¹⁷ Coriquiyahpabo sca sirijaquin yohihue, coriquiyahpahax tah

hen hea hashoan shinanyahpa qui hihyamahue hahquin yohiquin. Jaton coriqui ta yamacahintihqui. Jaton coriqui shinanyamahahbo jato yohihue. Coriquima bi noquen Papa Dios shinanahbo jato honanmaquin. Noquen Papan ta noque jatihibi hinanihqui non jenimanon.¹⁸ Jaa coriquiyahpabo yohihue caibo rihbi yanapannon. Siribojaxonnon jato yohiquin. Pishinaibo jato hinanon yohuashihxonma.¹⁹ Jascajaquin ta jaya jihuecointi tsinquicaniqui jihucoinyahnoxon.

Quirica queyonoxon yohihi

²⁰ Papan mia hinanni tee jisquin sirijahue, Timoteon. Rishtaya yohuan yohuanaibo nincayamayaxahnhue. Honanihcamaxon mia joi bichinaibo rihbi nincayamaquin.²¹ Honanihcamaxon ta Papan joi bihquin bi cahnecaniqui caibaan.

Papan shinanya jihuolahue, mato.

2 TIMOTEO

*Timoteo qui Pablonen raanni
joi, jahuen rabe sca*

Timoteo qui Pablonen raanai

1 Hea Pablo tah hen Jesucriston raanti joni qui, jascajahue Papan hea janí. Non jihuemon Papan yohini quescabijaquin ta Jesucriston noque teehihmahi-hqui. Jaa joi yohinica tah hen qui. ²Mihon shinanxon tah hen nea quirica huishaxon mihqui raanai, heen baque Timoteon. ¿Papan shinanya min ji-hueyamahin? ¿Mihon shinanxon noquen Hihbo Jesucristo betan Papan sirijaha min jointi siripax jihueyamahin?

Cristo qui hinamehxon caibo sca yohiti

³Ponte jihueta honanax jascarihibi jihuehahnhan tah hen heen xohtabaan hahpahoni quescajaquin noquen Papahon shinancoinai. Hahxon tah min jaa jai Papan, hih tah hen jai, mia yocaxonbahinaxon mia yocaxonshinaquin. ⁴Hea jahuiya min benani shinanrihbixon tah hen mia hihti jiscatsihqui, hihti jenimanoxon. ⁵Papan joi min nincacoinai tah hen shinanrihbibi. Miin chichi Loidanen pari nincacoinni quescabijaquin tah min nincacoinai. Miin mama Eunicinin rihbi nincacoinni quescabijaquin tah min mian rihbi nincacoinscrai. Honancoin tah hen jai.

⁶Jaa copi tah hen mia yohirihbihi, min shinanbehnayamanon hihxon. Noquen Papa hen yocacaiya ta Papan mia tee hinannishqui jahuen joi yohiti shinan min bijnon. Jaa shinan behnajahue. ⁷Raqueti shinan ta Papan noque hinanyamahihqui. Coshiti shinan caya ta noque hinannihqui, joni huetsahon shi-

nanti shinanbo rihbi, teneti shinan rihbi. Jascapahbo shinanbo ta noque hinannihqui. ⁸Noquen Hihbaan joi yohiti qui hihtimahyamahue. Noquen Hihbo copi hen sipo xoboho tsahoxonai bi hea shinanax hihtimahyamahue. Noquen Hihbaan joi copi mia tiromajahibaan bi tenehue, Papan mia coshijahah. ⁹Papan ta noque teehihmanishqui. Non jihuecoinscanon ta noque quenanishqui. Non sirijaquin hahcai copima bi jaabi queenxon noque teehihmaquin. Jahuen shinanya non jihueyaxahnon hihxon Criston noque teehihmanon ta Papan yohinishqui, neateman bi res. ¹⁰Jan jascajahi non honanscanon hihxon ta noque teehihmanica Jesucristo main jomanishqui. Non muhuayamascanon bi queyoyamanox mananon hihxon ta jahuen joi siri noque honanmanishqui.

¹¹Jaa joi siri yohinica hea janon hihxon ta hea caisnishqui. Jahuen raanti joni rihbi hea janon. Jahuen joi siri nincamanicah rihbi hea janon. ¹²Jaa copi tah hen nescari hohmis hohmissai. Hohmis hohmisax bi tah hen hihtimahyamahi. Jaa hen shinancoinai tsoa quin tah hen honanai. Jahuen joi siri hen yohinon ta hea raannishqui. Castican sca jonoxon caman jan yohini quescabijati jan hahtipahi tah hen honanai.

¹³Jesucriston mia joni huetsahon shi-nanti shinan hinanah bijnixon jan yohini rihbi nincacoinax jihuehue. Mia tah hen joi coinbo yohiniqui. Jaa joibo shinani jihuehue. ¹⁴Dios Yoshin ta noque betan hihquiqui. Jaan ta mia yohinishqui, noquen Hihbaan joi min yohinon hihxon. Jaa joi huetsajaxonma jeneyamanoxihhue.

¹⁵Hea yanapancatsihyamaxon ta Asia janinhahbaan jatihibichin hea jenebahinnoxqui. Min tah min honanscrai. Figelonen bocabi hea potabahinquin. Hermogenesen bocabi hea potabahinquin. ¹⁶Onesíforo, jaabo

tah hen Papa yocaxonai, jatohon jan hihti shinannon. Hicha coti ta Onesiforonen hea yanapanpahonishqui, hen sirijaquin sca shinannon. Hea sipo xoboho tsahotai bi ta hea jisi joti qui hihtimahyamanishqui.
¹⁷ Hihtimahxonma bi Roma jema janin nocoxon, hea bena benaquin, hea meranoxon caman. ¹⁸ Efeso jema janinxon rihbi ta hea hihti yanapannishqui. Jaa tah min sirijaquin honanai. Noque bichi joxon tian noquen Hihbaan hahan hihti shinanxon hahxonti tah hen yocaxonai.

Jesucriston sontaro siri

2 Mia rihbi Jesucriston shinanya ² jihuehahnhan coshiscahue, heen baquen. ² Hichaxon nincanon bi hen mia haxemani joibo shinanyahpa jonibo haxemaribhue, jaabaan sca caibo rihbi haxemanon hihxon.

³ Jesucriston siri sontaroxon yobaxon sca tenehue. ⁴ Sontarohax tah non noque sontarohihmahiton yohihi quescabijaquin hahnoxon tsoabi non huetsa tee janin cayamascai. ⁵ Jaton coshi tanacatsihquiaan rihbi ta bishquihihi hihbaan yohihi quescabibi bishquihihyamaxon jahuabi bihtimahiqui. ⁶ Teemis huaijanicaften pari ta jahuen huai bimihi bihtihiqui. ⁷ Hen mia yohihi joibo sirijaquin shinanhue. Noquen Hihbaan ta mia jatihibi sirijaquin honanmatihiqui.

⁸ Jesucristo shinanbehnoyamahue. Jahuen joi siri yohiquin hen chanicoinai quescabibi ta jaa mahuatipish bi huenirihbinishqui. David ta jahuen papa xeni japahonishqui. ⁹ Jaa joi siri hen yohicoinni copi tah hen sipo xoboho tsahotai, tiroma joni sipo xoboho tsahona quesa. Hea jascjahibaan bi ta Papan joi pantehahma caichihqui. ¹⁰ Jaa copi tah hen jatihibi tenehi, Papan caisaibo nincamanoxon hihxon.

Jaabaan rihbi Jesucristobihcoinax queyoyamanox mananon hihxon tah hen tenehi, jahuen queyoyosma xabapan jihuetahbo hihxon.

¹¹ Hihcointi ta nea yohuanbo qui. Hahbetanbi mahuatax tah non hahbetanbi rihbi sca jihueyaxihqui.

¹² Tiromajahahbaan bi tenexon tah non hahbetan rihbi jonibo jihuemayaxihqui. Jaa ta heen jahuama qui hih non jaiya ta jaa rihbi noque qui jascarihbiyaxihqui, jaabo ta heen jahuamabo qui, hihqui.

¹³ Jan yohihi quescabija non jayamahi bi ta jaan hahquiqui, jan yohihi quescabijaquin. Jahuen joi yohihi ta Henama ta qui, jaa jatimahiqui.

Hahcoinai teexonnica

¹⁴ Jascapa joibo jato yohihue, shinanbehnoyamahahbo. Noquen Hihbaan jisnon bi tah hen mato yohihi hihxon jato yohihue, yohuanabo joi bichinnannanyamahahbo. Join bahchinannanxon tah non nincacaibo shinan hinanyamahi. Jato tiromajaresquin.

¹⁵ Siri teexonnica mia Papan jisnon hihxon min hahtipahi thi hahhue, jahua copi hihtimahti yamanon. Jato pontequin jahuen joi jato honanmacoinhue. ¹⁶ Papan rahninai yohuanbo nincajayanhue. Jascapa yohuanbo nincajaya ta hashoan sca Papan shinanjomabo jaticaniqui. ¹⁷ Shomon hanihihcamahi ta jaton yohuan caitihiqui. Jascapa yohuanya rabe ta Himeneo betan Fileto qui. ¹⁸ Papan joi coin jenebahinax ta yohuancaniqui: mahuataibo ta Papan hueniscahoxqui, hihqui. Jascapahbo yohuanquin ta caibo nincacointi jenemacaniqui. ¹⁹ Jascjahibaan bi ta Papan joi coin jascabi sca banetihqui, huet-sajahama. Papan ta honantijaquin nescajaquin huishamanishqui: Jahuenahbo ta Hihbaan honanihqui hihqui. Noquen Hi-

hbo hihbomahibaan ta hohchati jeneti jaiqui hihqui huetsa jahuen huisha rihbi.

²⁰ Hapon xoboho ta horo quentiboya copi yami quentibo jatihiqui. Jascapa rahsima bi jihui xaxobo rihbi, mai quentibo rihbi jatihi. Caibo quenti ta hahqui pitibo naneti qui. Caibo rihbi ta hahqui huecaxbo naneti qui. ²¹ Jahuen rishta choquitai joni ta siriscaiqui, rishtajoma quenti quescapah, hahqui piti naneti quescapah can, siri. Xobo hihbo jaya teeti sca. Jayaxon siri teebo hahti sca jai.

²² Jascapahue: mai meha beronanbo hihqui quescari rishta shinanyahpabo jaiya jato tecayacahinhue. Pontehihi shinanhue. Noquen Hihbaan noque hahxonai honanrihbiquin. Joni huetsahon shinanrihbiquin. Jointi siripax jihuehue. Rishtajomaxon noquen Hihbo hihbomahibo betan tah min jascari jihueta jai. ²³ Honanmabo hihresi yohuan yohuanax join bahchinanaibo betan hihyamahue. Jascapa yohuaman ta jonibo sinamahiqui. Min tah min honanai. ²⁴ Rainyamaxonma bi tah min jatohon shinanxon Papan jonixon jatihibi jonibo yohitihi. Sirijaquin jato honanmaquin. Jato tenequin. ²⁵ Mia nincacatsihyamahibo honahax bi yohuanxon pontejaquin yohihue. Huetsa shinan rah ta Papan jato hinantihiqui, jahuen joi nincoinahbo hihxon. ²⁶ Tiroma yoshin queenai quescabijaquin jaabaan hahnon hihxon ta tiroma yoshiman jato hihbojanishqui. Jan jato bihni que bi ta Papan joi honanxon yoshin tenetihiqui.

Nete queyoti hochoma jayaxihquibo

3 Nea honanhue: nete queyoti nea pishcascaia ta hohmis hohmisyaxihcanihqui. ² Nescapahbo ta jayaxihqui qui. Hahmebi jahuen yora queemehtaibo. Coriqui hihti queenaibo. Hea tah hen siri bi res qui, hihquibo. Hea tah hen joni huetsa mentan hashoan

shinanya qui hihquibo. Rishtaya yohuanmisbo. Jaton mama, jaton papa nincayosmabo. Hahxonah bi Hahxon tah min hea jai hihcatsihyamahibo. Noquen Papahon shinanyosmabo. ³ Jonibohon shinanti shinanjomabo. Rainyamati jeneyosmabo. Joni qui tiromahi yohuanmisbo. Jaton yora coirameti honanyosmabo. Sinabo. Siriti queenyosmabo. ⁴ Paranmisbo. Shinanjomaxon hahresaibo. Jaton jointi soohihquicamax Hea tah hen shinanya qui hihqui paramehtaibo. Papahon shinanihema bi mai mehabo jai quescajati jenipahichaibo. ⁵ Papahon shinanihcama jaax bi Papan coshijoma jihuetaibo.

Jascapahbo tecayacahinhue. Jato nincayamahue. ⁶⁻⁷ Jascapa jonibo ta xobo hihbo paranax xoboho hihcohuhqui. Hihcoxon ta honanma haibobo nincamaxon huetsa joi jato yohihihqui. Yohihah ta jascapa honanma haibobaan jaabo hohchani shinanax rabe shinanyahax haxe hexagon bi jahuentianbi Papan joi coin honantimahi qui. ⁸ Janes betan Jambresnen Moises joi bichinni quescajaquin ta jaa jonibo jaton shinan masascaxon Papan joi nincacoinihcama jaxon sca Papan joi coin huetsajacatsihqui qui. ⁹ Basima ta jaabaan jonibo nincamayaxihqui qui. Moises joi bichinni hbo quescapahbo jaabo honanmabo hihqui ta jisyaxihcanihqui, jatihixonbi.

Jan Timoteo yohicoinali

10-11 Heen honanmati joi tah min sirijaquin honanscrai. Jenquetsahpi hen jihuetai tah min honanrihbibi. Jahu copi hen honanmahin tah min honanrihbibi. Noquen Hihbaan hahtihi hen shinancoinali. Noquen Hihbo hen jeneyamahi. Joni huetsahon hen shinanai. Hea tiromajahibaan bi hen tenehi. Hea hisinjahibaan bi hen tenehi. Jaa rahsi tah min

honanscái. Antioquía janinxon hea tiromajanihbó tah min honanrihbíhi. Iconio janinxon hea tiromajanihbó rihbí. Listra janinxon rihbí. Janoxon hea hihtijaquin tiromajahibaan bi ta hea jato noquen Hihbaan xahbanjamanishqui. ¹² Jesucriston joi nincacoinax Papahon shinanhahnán siripi jihuecatsihquibo jatihibi ta caibaan tiromajayaxihqui. ¹³ Jasca ta tiroma jonibo hashoan tiromabahin sca jatihibi. Siripihcamahibó rihbí hashoan tiromacanascái. Caibo paranquin. Caibaan rihbí jato paranquin.

¹⁴ Jaabaan jascajahi bi jascajayamahue, mian. Hean mia honanmapahoni quescajaquin jeneyamahue. Hen mia sirijaquin haxemani quescabijaquin. ¹⁵ Baque pishcahax tah min Papan huishamani joi haxepahonihqui. Jaa shinanhue. Jaa joi honanxon tah min Jesucristo nincacoinascaax queyoyamanox manati min honanrihbíhi. ¹⁶ Papan huishamani joi jatihibi ta Papan shinamaxón huishamanishqui. Jaa huisha jisxon ta honanmati siri qui. Hohchataibo yohiti siri. Hahan ponteti siri. Hahan jihucointi. ¹⁷ Jaa joi honanax ta Papan joi honanmanica jahuabi pishinyamascatihqui. Jatihibi hahti siriscái.

4 Papan noque jisnon bi tah hen mia yohihi. Siri hin, tiroma quin hihxon ta jihuetaibo jisxon mahuataibo rihbí Jesucriston jisyaxihqui. Jahuen jisnonbi rihbí tah hen mia yohihi. Jan hahquirihbi joyaxihqui honanxon jan jihuemayaxihqui rihbí honanxon tah hen mia yohihi. ² Jahuen joi yohihue. Tantixonma yohi yohihue, yohiti siripaiya yohixon siripaima bi rihbí yohirihbiquin. Jaabo hohchatai jato nincamahue. Jato yohihue, hohchayama sca jaábo. Siripi jihuetaibo

sirijaquin jato yohihue. Tenexon jato honanmaquin jeneyamahue. ³ Ponte joibo nincacatsihyama bi res ta jaticaniqui. Huetsa joibo nincacatsihxon ta jaa queenai joibo res nincanoxon sca honanmanicahbo hichajayaxihcanihqui. ⁴ Papan joi coin nincati jenebahinxon ta hihcoinaima joibo sca nincaticaniqui. ⁵ Jascaraibaan bi mihi miin yora coirameti jihuehue. Hohmis hohmisquin bi tenehue. Papan joi siri yohinakahax teehue. Noquen Hihbo queenai quescabijaquin noquen Hihbo hahxonhue.

⁶ Noquen Papan joi hean yohihi copi hea rehteti ta nea pishcascaiqui. Hea huetsa main cati ta nocoscáiqui. ⁷ Shinan camahahtanax tah hen teenihqui. Hen tah hen queyo sca jai. Cristo chibánquin tah hen jeneyamanihqui. ⁸ Mia tah min heen siri baque qui hihxon jan hea hinanyaxihqui jahuen hinanti ta Papan hea bexoja sca jaxonihqui. Pontejaquin siri hin tiroma quin hihnicaxon ta jaa hinanti hea hinanyaxihqui, jahuen baquebo bichi joxon. Hea huestima bi jaa joti jenipahichaibo jatihibi ta jascapa hinanyaxihqui.

Hea hahxonhue hahquin jan yohihi

⁹ Hehqui joriyaxahnhue, histon. ¹⁰ Hea yanapancatsihyamascaax bi mai mehabohon queenax ta Demas hea potabahini cahoxqui, Tesalónica janin sca canoxon. Galacia janin ta Crescente cahoxqui. Tito ta Dalmacia janin cahoxqui. ¹¹ Lucas huesti ta hehbetanbi hihqui. Marcos benaxahnhue, hihueyahnoxon. Jaan ta hea sirijaquin yanapaniqui. ¹² Efeso janin tah hen Tíquico raanhohqui. ¹³ Joquin heen tari hea bexonyaxahnhue. Troas janin tah hen Carpon xoboho jaa potabehnanhohqui. Heen quiricabo rihbí hea bexonhue. Heen documentobo rihbí tah hen hashoan queenai. ¹⁴ Yami

charajanica Alejandronen ta hea hihtijaquin tiromajahoxqui. Jan jascaho quen ta Papan jaa copiyaxihqui qui.¹⁵ Hahqui coiramexahtahi min. Coshin bi res ta jaan hea pantenishqui, hen yohicatsihqui bi.

¹⁶ Hea demandamenohi tian ta yohuanxonquin tsoanbi hea yanapanyamahoxqui. Jatihibichin hea jenebahinqui. Jaabaan hea jascahi bi Papan jato casticanyamapahinnon.¹⁷ Hea jenehiboya bi ta Papan hea yanapanhoxqui. Jatihibi judiomabaan jahuen joi nincanon ta hea coshi hinanhoxqui, jahuen joi hen sirijaquin yohi yohinon. Tiroma hapon hea rehtepanan ta Papan hea hihti yanapanhoxqui.¹⁸ Jatihibi tiromabo quiha ta noquen Hihbaan hea xahbanjamatihiqui, jan ojanaihoxhon jihuemayaxihqui janin

hea jihuemanoxon. Jascabijaquin sca tah non Hahxon tah min noque jai Hihbon, hah non jatihi, jahuentianbi tantixonma. Jascari rahan.

Raannoxon quirica queyoscai

¹⁹ Priscaya Aquila hea yohixonhue man jascabi jayamahin hahquin. Onesíforo jaabo jascajaribiquin.²⁰ Corinto janin ta Erasto banehoxqui. Mileto janin tah hen Trófimo hisinai potabehnan-hohqui.²¹ Janin matsu tian noconon joriyaxahnhue, histon. Eubulonen ta mi-hqui salud raanihqui. Pudente, Lino, Claudia, noque huetsabo jatihibichin ta jascajaribiquin mihqui joi raanihqui.

²² Noquen Hihbaan mia sirijaquin mananon yocaxonxon tah hen jan mato shinan rihbi hinannon hen mato yocaxonai.

TITO

Tito qui Pablonen raanni joi

Tito qui Pablonen huishahi

1 Hea Pablo ta hen Papan yonoti qui, Jesucriston raanti. Hea ta raannishqui, Papan caisaibo hen hashoan sca nincacoinmanon. Papan shinanai quesca jaahbo ta hihcoinai joi hen jato yohihi jonon hea raannishqui. **2** Papa Dios ta jahuentianbi quesayamahihqui. Naiyahpa mai jariyamahi bi ta neateman noque hahxontijanishqui, non queyoyamanoxihnon. Jaa honanxon tah hen hahqui heen shinan camahi. **3** Neateman hahxontijanixon ta jonibo honanmati siripai tian sca Papan honanmascaiqui. Noque teehihmanicaxon ta Jesucriston joi jato yohitanhue hea jaxon jahuen joi honanmahiqui. Jascalah tah hen jato queyoyamanoxihqui joi hean yohihi. **4** Mia tah min heen baque coin qui, Titon, hean yohihah min noquen Hihbo qui hinamehni copi. Mihqui tah hen nea joi raanai. **5** Noquen Papa Dios betan noquen Hihbo Jesucristonen mia jointi sirijaha min jahuen shinanya jihueyamahin?

Creta main teeti Pablonen yohihi

5 Hen mia yohipi quescajaquin jema tihibi janin jaton pastorobo caisxahnhue hahxon tah hen jaabo pishinaibo mian pontenon hihxon Creta mai janin mia potabehnanhohqui. **6** Nescapahbo pastorobo caishue: hahqui jahua yohuanti yamahi, huesti haiboyahpa, jaton baque nincacoinnica, yohitima jaton baque yamahi, jaton nincayosma baque yamahi. **7** Pastoro ta Papa hahxonnica qui. Papan baquebo jisxonnicca copi ta hahqui yohuanti yamatihiqui, jaabi queenai quesca-

janicahma bi noquen Hihbo queenai quescajanicah, histon sinayamahi, pahenyosma, rainyamayosma, coriqui bihcatsihquin tiromajatimahi. **8** Jahuen xobohoxon noquen huetsabo pimaxon hoxamanicah. Sirijati costannica. Shinanyahpa. Pontejaquin shinannica. Noquen Hihbo qui hinamehti jihueta, hahri coirameti. **9** Papan joi siri haxemaha bihxon jeneyamanica. Jaa joiyaxon caibo rihbi sca pontejaquin yohixon jascajaquin rahan jascajahue yohiquin janicah, joi bichinaibo rihbi netemanicah. Jascapahbo caishue pastornon.

10 Nincayosmabo ta hicha qui, yanca res yohuanresaibo, paranmisbo. Judiobo ta hashoan rihbi jascapahbo qui. **11** Jato netemati ta jaiqui. Tiromajaquin coriqui bihnoxon ta jascajatima joi honanmaxon caibo masajacanihqui, jaton jenaboyabi jato masajaquin.

12 Cretanobo ta jascabi quesabo qui, yohina tiromabo, pihanhuan chiquishbo hah ta janishqui jaton joi huishanication. **13** Jan yohini ta hihcoinihqui. Jaa copi jato sirijaquin pontehue, ponte joi rahsi nincacoinahbo. **14** Judiobaan hihresai yohuan xeni nincayamahahbo jato pontehue. Ponte joi potabahinti caibaan jato yohihah bi jeneyamahabo jato honanmahue.

15 Hohchajomabaan yohuan ta jatihibi siripihqui. Nincacoinyamahi rishtayah-pabaan jai ta jahuabi siri yamahihqui. Jaton shinan, jaton jointi rihbi rishta bi res. **16** Papa Dios tah hen honanai hih jan jai bi tah non jan hahcai jisxon jan Papa Dios honanyamahi non honanai. Rahnitibo tah qui, yohitimabo, Papan jisí jaabaan jahuabi siribojaxontimahi.

Nincati joi siribo

2 Mia tah min jascapahma qui. Ponte joi rahsi nincacax jihueta, jato yohihue, mian.

² Yosibobo yohihue, pahenyamahahbo, pontejaquin shinanax jihuetahbo, shinanyahpaxon tenehi jihuetahbo, ponte joi rahsi bihcoinabo, sirijaquin noque huetsabohon shinanahbo, yobaxon tenehahbo. ³ Yoxabobo rihbi jascajaquin yohihue, noquen Hihbo qui hinamehtax jihuetahbo, caibo qui yohuanyamahahbo, pahenyosma jaahbo, siri joibo honanmahabo. ⁴ Siri joibo honanmaxon ta yoxabobaan texe haibobo jaton benehon queenti haxemarihbitihiqui, jaton baquehon rihbi queenti haxemaquin. ⁵ Shinanyahpa haibobo jihuenon ta yoxabobaan jato haxematihiqui, tsiniyamahahbo, jaton xobo coiranabo, siri haibobo janon, jaton benen yohihah nincanicabo. Nincacoinyamahibo Papan joi qui tiromahi yohuanyamanon jato jascajaquin yohihue.

⁶ Bebobo rihbi jascajaquin yohiquin sirijahue, shinanyahpahax jihuetahbo. ⁷ Mia jihuetai jisish jascarihibi jihuetahbo jatihibi sirijaquin shinanax jihuahue. Ponte joi res honanmahue. Noquen Hihbo qui min hinamehtai jato jismahue. ⁸ Jahua tiroma yohuanamaxma siri join res yohuanhue, noque qui jahua yohuanti yamajahax noquen rahuibo rabinnon.

⁹ Patoroyahpabo yohihue, jaton patoronen yonohah nincacahbo, patoronen yohihi quescabijaquin jaahbo, jaton patoronen yohihi joi bichinyamahahbo. ¹⁰ Jahuabi yometsohyamahabo. Jatihibijaquin ponte bi res sirijahabo jato yohihue. Noque teehihmanica Papan noque yohihi joi hihti siri jisfbo hihquish jihuetai jato haxemahue.

¹¹ Noquehon shinanaxon ta hahan jan jatihibi jonibo teehihmahi joi Papan noque hinanihqui. ¹² Noquen Hihbo shinanaxma jihuetai tah hen shinanyamascái, mai mehabaan jenipahichai tah hen jenipahihyamascaí hih non janon

jahuen joi siri noque hinanquin. Non shinanyahpahax jihuenon, ponte res Papan shinanax quescari non main jihuenon jahuen joi siri noque hinanquin. ¹³ Hihiti coshi noquen Papa ta noque teehihmanica Jesucristo betan xabaya joyaxi-hiqui. Jaa honanax manati jihuetai ta noque yohihihqui. ¹⁴ Hohchapan noque hihbojaquehahna ta noquen Hihbo hinamehnishqui, noquen rishta noque sohuanxon, jahuenahbo sca non hihnon. Caibo sirijaxonti jenipahichaibo sca noque janon jaabi hinamehti.

¹⁵ Hen mia yohihi jato yohiquin sirijahue. Sirijaquin jato hihti yohihue, min jascajanon Papan mia yonohi honanxon. Jato nincayosmabomayamahue, tsoabi.

Nincaquin sirijahax jihuetai

3 Jato shinanmahue, jaton gobernadorbaan yohihah nincacahbo, tinintinin rihbi yohihah nincacahbo, jatihibi siribojahti queenahbo. ² Tsohquibi tiromahi yohuanyamahahbo, sinacananyamahahbo, sinataxma siripi jihuetahbo. Jatihibi joni sirijaquin yohuanquihnabo jato shinanmaquin.

³ Noque rihbi tah non honanma hihpanoniqui, yohitima, paramehtah, Haitara hihquish jaa shinani nihresai. Tiromajaquin shinanax jihuetai. Notsi notsihi jihuetai. Huetsabaan noque jistahihma-jaquin. Noque rihbi jistahihmahanani.

⁴ Non jascapahbo jihuepahoni que bi ta noque jihuemanica noquen Papan noque hahxonishqui, noquehon shinanax noquen Papa hihti siri. ⁵ Non pontejaquin hahcai copima bi ta noquehon hihti shinanaxon res noque teehihmahihqui. Hahquirihbi noque joni-janoxon noque chocaxon jahuen Yoshin siripan noque behnajaxon noque teehihmaquin. ⁶ Noque teehihmanica Jesucriston jihuetahbo non hihqui copi ta noque jahuen Yoshin siri hinanihqui. Jahuabi yohuashihxonma noque hinan-

resquin. ⁷ Jan noque jascajoxonah tah non jahuen ponte siribo qui, jahuen ji-huetahbo, jan yohini quesca non queyoyamanoxihnon non jihuemon.

⁸ Jasca coin tah qui. Jascajaquin yohiquin jeneyamahue, mian. Papan joi nincacoinaibaan siribojaxonti hax-exon shinanbehnoyamahahbo. Hen mia yohihi joi ta siri qui. Haxehax jascari jihuetah, siri. ⁹ Hihresai yohuanyah-pabo betan join bahchinnanyamahue. Tsoabo miin xenibo quin hahxon Pa-pan baquebo honanti shinanaibaan bi jato joi bichinyamaquin. Sinacanancat-sihquibo bi jato sinamayamaquin. Moi-sesnin huishani joi copi join bahchincat-sihquiaan bi jato betan join bahchin-nanyamahi. Yohuani ta hihres hihres-caniqui, jahua honantimahi.

¹⁰ Huesti shinanyahpabo noquen huetsabo japanan huetsa jonin huetsa joibo sca jato nincamacatsihqui jaibo huestijaquin hihti yohihue. Huestijaquin hahyamaxon rabejaquin yohiquin sirijaxon jascapa joni potabahinscahue. ¹¹ Jascapa joni jahuen shinan tiromahi cahcoyahax hohchatai

honanscaxon jenehue. Jaanbi ta jahuen jananbi jahuen hohcha yohihihqui, Papan casticanyaxahnon.

Pishinaibo hahxonti

¹² Artemas hen mihqui raanaiya, jaa raanyamaxon hen Tíquico mihqui raanaiya, Nicópolis jema janin hea behchihi joyaxahnhue histon. Janoxon tah hen jene tian huinomacatsihqui.

¹³ Yohuanxonnica Zenas betan Apolos mihqui nocotaiya shinanquin sirijaxon jaabo pishinaibo hinanhue, jahuabi pishinaxma caribihabo.

¹⁴ Pishincoinaibo yanapanabو jatihibi hahxonti noquen jonibo honanmahue, hicha bimiyahpa quesca hicha shinan jaahbo.

Jahan quirica queyoti

¹⁵ Hea manahibaan ta Min jascabi jayamahin huetsan hahquin mihqui joi raanihqui jatihixonbi. Noquehon shinanaibo yohixonhue, noquen Hihbaan shinanya man jayamahin hahquin, Pa-pan shinanya janahue jatihibi.

FILEMON

Filemon qui Pablonen raanni joi

Filemon qui Pablonen joi raanai

1 ¿Noquen Hihbaan shinanya man siripi jihueyamahin, noque huetsabaan? Sipo xoboho hea tsahonihbaan tah hen sipo janinxon noquen huetsa Timoteo betan nea quirica huishahi, mato qui raannoxxon. Noquen Hihbo Jesucristo copi ta hea tsahoncannishqui. **2** Mia Filemon hehbe teenica, noquen chocha Afia, noquen Hihbaan hehbe sontaro Arquipo, miin xoboho tsinquitai noquen huetsabo rihbi, mato jatihibi qui tah hen nea raanai. **3** ¿Noquen Papa betan noquen Hihbo Jesucristonen mato xabajahah man jenimahi siripi jihueyamahin?

Filemonen noquen Hihbo nincacoinai

4 Papa Dios yocaxon tihibi tah hen mia rihbi yocaxonai, noque huetsan. **5** Noquen Hihbo jenexonma min jaa hahxonai, noquen huetsabohon rihbi shinanaxon min jato hahxonai joi nincaxon tah hen Hahxon tah min jato jai, Papan, hahcái. **6** Noquen Hihbohon shinancoinxon min joni huetsabo hahxona jaabaan sca nincacoinnon tah hen mia yocaxonai. Criston noque hinanai jahuentiho siri quin jonibaan honanxon mia jai quescapa shinan bichíbo hihxon tah hen mia yocaxonai. **7** Pishinaibo min jato hinanah ta noquen huetsabo jointi sircalahinihqui, noquen huetsan. Min jato hahxonai joi nincaxon tah hen shinanquin sirijahi hihti jenimahi.

Onésimo bihrohahue Pablonen jai

8 Jaa copi tah hen mia yocascái, noquen huetsan. Criston raanti hihxon mia yonotihí bi tah hen mia yonoyamahi.

Mia tah hen yocaresai, min hea hahxonnon. **9** Yonohahma bi joni huetsahon shinanax miabi queenxon copi min hahxonnon hihxon tah hen mia yocaresai. Jesucriston raanti hihxon bi tah hen jahuen sipojahacamaxon mia yocaresai. **10** Heen baque Onésimo copi tah hen mia yocacai. Sipo janin jihuexon hean Cristo joi nincamaxon bihmaho ta heen baque coin qui. **11** Neate-man miin joni nincayosma hihpahonish bi ta rahma siriscaiqui, mia hahxonica, hea hahxonica rihbi. **12** Mi-hqui caribinon tah hen jaa raanscái. Jahan hen shinanai heen baque tah qui. **13** Mian yohihah quesa jan hea yanapannon hen jaa banepanan tah hen baneyamahi. Sipo xoboho tsahoxon Papan joi hen yohinon hea manatihi bi tah hen baneyamahi. **14** Jaa banehue min hea jayamaha copi tah hen jaa banecatsihyamahi. Min queenxonma hahti tah hen queenyamahi. Queen-bochibi min hahxonnon tah hen raanscái. **15** Miin Jonima bi miin huetsascaax mihqui caribiyaxahnon rah tah min jaa xahbanjaniqui. Poyan tihixonpajaquin min jaa yamajani que bi jascabi sca mia mananon. **16** Rahma ta miin joni mentan hashoan hihti siri qui, miin huetsabi sca. Jahan min hihti queenai. Hean jisí ta jascapah qui. Mian jisí rah ta jascapahax bi hashoan siri rihbi qui. Miin Jonihax bi ta noquen Hihbo copi miin huetsa coin sca qui. **17** Hean raannah sca sirijaxon sca bihue. Heen huetsa hihxon min hehon shinanaxon hea Johue hahcái quescajaxon, jaa rihbi jascjahue.

18 Mia tiromajahi jan janí tian, hea sca copi yocahue. Ribin jan mia janí tian hea sca copi yocahue. **19** Mia tah hen copijatihi. Hea Pablonen tah hen heen mequemanbi huishaquin mia yohihi. Miin jointinin min hea ribinai que bi tah hen mia jascabi. **20** Hihcoini. Ribin tah min hea jai. Noquen Hihbaan noque

rabebi jihuemahi honanxon hea pishca hahxonscahue. Cristo queenai quescajaquin hea jenimamahue.

Jan quirica queyohi

²¹ Hen yohihah min hahxoncointihi honanxon tah hen mihqui jascajaquin huishahi. Hen yocacai quescajaquinma bi hashoan rihbi min hea hahxontihi tah hen honanai. ²² Hea jaho hoxati chique hea mequexonhue. Man hea yocaxona

copi Papan hea picohah tah hen mato qui catihi. Hean shinanah ta hea picoti pishcascrai. ²³ Min jascabi jihueyamahin hahxon Epafras yohixonnahue noquen Hihbaan janen. Noquen Hihbaan joi yohihi copi ta sipo xoboho tsahotihqui, hea hihqui quescari. ²⁴ Hehbe teenicabo rihbi jascajaquin yohixonnahue, Marcos, Aristarco, Demas, Lucas.

²⁵ Noquen Hihbo Jesucriston xabapan jihuenahue.

HEBREOBO

Hebreobo qui raanni joi

Jahuen baqueyabixon Papan yohihi

1 Noquen xenibo nincamanoxon ta hicha coti jahuen joi Papan jato nincamanishqui, mesco yonotiyahpaxon. Jahuen joi yohinicaboyaxon jato yohiquin. **2** Noquen xohtabo nincamanixon ta nete queyoyahnon jahuen baqueyabixon sca noque nincamanishqui. Jaa jahuen baqueyaxon jatihibi hahmenonixon ta jatihibi rihbi jaan hihbojanon Papan yohinishqui. **3** Jahuen xaba jenquetsahpa quin hihxon xaba jisxon non honanai quescajaribiquin ta Papan shinan jenquetsahpa quin hihxon jahuen baque yohuanai nincaxon non honanscrai. Noquen Papa jenquetsahpa quin hihxon tah non jahuen baque jisxon non honan sca jai. Jascapahxon ta jahuen coshi shinaman yohixon jahuen baquen jatihibi hihmahiqui. Jaan hihmayamahah cahen queyotan. Noquen hohcha sohuahax ta quiquin hihbo sca Papa patax tsahoscaiqui, jatihibichin hihbo sca.

Papan baque hihti shinanyahpa

4 Jascapahax ta Papan yonotibo mentan hashoan coshi qui. Papan yonotibo ta Papa betan hahbe shinanyahpa ma qui, yonoti cahron. Papan baque ca hahbe shinanyahpa. Jaa copi ta Baquen hahquiqui. **5** Papan huishani joi ta jascarihbiqui: Mia tah min heen baque qui. Baquen hah sca tah hen mia jai hihqui jaa huisha. Jahuen yonotibo ta quenaquin jascajayamanishqui, jahuen baque huesti. Huetsa jahuen huisha ta nesca qui:

Hea tah hen jahuen Papa hihtihi, jaa ri-hbi heen baque hihnon hihqui jaa huisha. **6** Huetsa janin rihbi ta jahuen baque beboquiha yohihi nea huisha jaiqui:

Jaa bebon ta Papan yonotibo jatihibi raboxonen tisquihpaqueyaxihqui qui hihqui. **7** Jahuen yonotibo yohihi ta nescari yohuannishqui:

Jahuen yonotibo ta Mia nihuetanhue yohihi qui. Jahuen hahxontibo cahen chihi perehmatanhue hahcan.

8 Jahuen baque yohihi cahen nescari:

Jascabi sca tah min jatihi, Diosen quiquin hihbo. Miin hihboti ta jahuentianbi queyotimahiqui. Hanhan ponteti shinaman tah min miin jihuetahbo jihuemahi.

9 Sirijahibo tah min siri jisi. Tiromajahibo tah min casticanai. Jaa copi ta Papa Dios miin Papa hihxon, mia hihti jenimamahiqui, caibo jenimarinibon bi mia rihbi sca hihti jenimahi

hihqui jaa huisha. **10** Huetsa huishani joi rihbi:

Mian tsahonah ta mai jamenonishqui, Hihbon. Miin mequemanbi tah min naijaniqui.

11 Coton payocanahi hihqui quescaribibi ta jatihibi payotihiqui. Jaabo queyocahinyaxihqui bi mia queyoyamanox manatai.

12 Rahcoti hahcajaquin tah min jato sebibahinyaxihqui, coton cahtoquin hahcajaquin. Jascajaha ta huetsapahcahinyaxihcanihqui. Jaabo huetsapahi bi ta mia jascabiyaxihqui huetsapahyamahi. Mia tah min queyoyosma qui hihqui jaa huisha joi. **13** Huetsa jascapa huisha rihbi ta jaiqui, jahuen yonotibo jan yohiyamahi bi jahuen baque jan yohihi nescari:

Hea mecayaho tsahotihue, nenoanax jati-hibi hihbonoxon. Miin rahuibo tah hen mia bihxontihi, namanjaquin miin hinabo sca jaahbo
hihqui jaa huisha joi, jahuen baque yohihi.¹⁴ Jahuen yonotibo ta huetsabo qui. Jaabo jatihibi ta jahuen hahxonni-cabo qui. Jahuen jihuetahb Yanapan-non hihxon ta jato raanihqui.

Non hinamehcoinxon nincati

2 Jahuen baquen noque nincamani copi tah non hihti nincati jai, nincaquin sirijaquin. Nincayamahax huaca noqueya tejabahcahini quescapi jano jahuen jihuetahb Yamahiton non camis.² Noquen xenibo nincamamenonoxon ta jahuen yonotibo raanxon jayaxon Papan jato jahuen joi yohinishqui. Jaa joi nincamanixon ta jan yohini quescabijaquin noquen xenibo casticannishqui. Jascajahue hahca bi nincayamahibico copi casticanquin. Jascajayahue hahca bi nincayamahiboya jato casticanquin.³ Hihti sirijaquin jahuen jihuetahb jihuetaxonon ta jahuen baqueyaxon sca noque jahuen joi siri nincamanishqui. Jahuen joi siri nincamamenouquin ta jaanbi yohinishqui noquen Hihbaan. Jaa nincanibaan sca ta noque sirijaquin yohirihbinishqui. Nincacatsihyamaxon tah non jenquetsahaxon bi jahuen casticanti noque xahbanen paquematimahi.⁴ Yohicoinnicabohi non honannon hihxon ta Papan Yanapanquin ta hahan honantibo jismaxon, hahan rahtetibo jismaxon jahuen coshi jismaxon, non jahuen yoshin siriyaxon hahxonti teebo noque hinanpaquenishqui. Jaabi queenxon ta jascajanishqui, nincacahbo hihxon.

Noque quescapa yoraya Cristo jahui

⁵ Papan noque jihuetajaxonai tah hen mato yohihi. Jahuen yonotibo ta jihuetajaxonyamahiqui; noquenah ta qui.⁶ Huetsa huisha joi ta jascari qui:

¿Jahua copi min noquehon shinanain, Hihbon? ¿Jahua copi min jonibo sirijaxonain?

⁷ Miin yonotibo mentan hashoan naman hihtatahnontah min joni janani-hqui. Hihti hapo sca tah min huenihhninhqui.

⁸ Jatihibi sca jaan hihbojanon tah min hueninhqui hihqui jaa joi. Jatihibi jan hihbojanon jan hihqui ta jahuabi hihbojaha-ma yamahi qui. Jan jascari yohuanai bi tah non jan jatihibi hihbojahi non jisyamaparihi.⁹ Jatihibi hihbojahi jisyamaparixon bi tah non Jesus jisniqui, basima tahni Papan yonotibo mentan hashoan naman hihquish bi noquen hohcha copi mahuanish rahma quiquin hihboscai, hihti shinanya hihti coshi hihboscai. Jascahue Papan jaah ta jatihibi noquen hohcha copi mahuanishqui, noquehon shinanxon Papan yohihah.

¹⁰ Jascapabojapan hihxon ta queenxon copi Papan jatihibijanishqui. Jatihibi hihboxon ta queenxon copi rihbi hicha baquebo jahuen jihue janin hihuehan-nan jato beboxonnica hihti jihuemanica hihnon tiromabo tenemanishqui. Jaa copi ta yonotibo mentan hashoan na-man Papan jaa hihmanishqui, basima tahni.¹¹ Papan baquebo rahsi non janon ta noque beboxonnicahton noque hio-hiqui. Jahuen Papa ta noquena qui, jaa papayahpabo rahsi. Jaa copi ta noque yohihi, Heen huetsabo tah man qui hihti jaa hihtimahyamahiqui.¹² Papan huis-hani joi ta jascarihihiqui:

Mia tah min jascanicqua qui. Honanahbo hihxon tah hen heen huetsabo yohi-

tihi. Tsinquitaibo tocan rihbi tah hen mihqui behuatihi hihqui jaa joi.¹³ Huetsa huishani joi ri-hbi ta nescari qui:
Jan yohihi quescabijaquin hea hahxon-tihi tah hen shinancoinai.
Huetsa huishani joi jascarihbibi:
Neno tah hen qui. Papan hea hinanai baquebo betan tah hen qui hihqui jaa joi.

¹⁴Noque huetsa copi ta jonibo yorayahpabo hihqui quescarihbibi jaa janishqui, yorayahpa sca. Tiroma yoshiman ta mahuati jonibo hihbojanishqui. Noquen Hihbo sca ta mahuaquin tiroma yoshin jahuen coshi bichinnoxon yorayahpanishqui. ¹⁵Non mahuamis hihquish raqueya jihuetaibo Satanasnen hinabo hihquibo bi ta Satanas yosmajaxon noquen Hihbaan noque picohiqui, non Satanasnen hinabo hihyamascanon. ¹⁶Jahuen yonotibo jascajaxonnoxonma bi ta Abrahanen chini baquebo jascajaxon-noxon yorayahpanishqui. ¹⁷Jaa copi ta jahuen huetsabo hihqui quescaribiti janishqui, noque quescapahxon ca jaamajaquin jaibohon jaan shinanai. Papa bebonxon sca noque sirijaquin yohuanxonai. Jascapahxon noquen hohcha sohuaxonquin. ¹⁸Tiroma yoshiman hohchamacatsihquin tanahah bi tenenixon ta rahma tenehibo rihbi jaan yanapanti hahtipahiqui.

Jesusen Moises mahuinquin

3 Jaa copi noquen Jesus shinanquin sirijanahue, hea huetsabaan. Hehbe Papan baquebo hihxon, Papan noque jatihibi quenahi honanxon rihbi noquen Jesus shinannahue. Papan ta jaa raannishqui. Noquen yohuanxonica hih-non rihbi ta jaa janenishqui. Jaa tah non jatihixonbi honanai. ²Papan jihuetahbo jisxonquin Moisesnin jatihibi siri-jaquin hahxonni quescajaribiquin ta no-

quen Hihbaan jaiqui. ³Xobojanicahton sirijaquin xobojahiya tah non jahuen xobo siri jisi. Jascarax bi cah non xobo hihbo qui hashoan rihbi siripi yohuanai, xobojati honanai copi. Jas-carihbibi tah non Moises siri jisxon, noquen Hihbo hashoan sca siri jisi. ⁴Xobojanicahton xobojaha copi noquen xobobo jai quesa rihbi ta noquen Papan Jahue hahca jatihibi sca jaiqui. ⁵Papan noque nincamayaxihqui joi non nincacoinnon ta Moisesnin sirijaquin teexon-nishqui, Papan xobohoxon teexonai joni hihxon. ⁶Jahuen teexonai jonica bi Papan baque hihxon ta Criston sca Papan baquebo jisxonihqui. Papan baquebo hen hihqui bi tah hen noquebi yohihi. Jointinin honanax, jonibo qui hihtimah-paxma non noquen Hihbo jenehaxma, jaya non johibo tah non jahuen siri baquebo qui.

Haho tantiti Papan hahxonai

⁷Jaa copi Dios Yoshin Siripan yohini joi nincacoinnahue:

Rahma jahuen joi nincacax nincayosmayamanahue.

⁸Papan jato teneresnon hihxon nihi naman cahuan cahuanai nincayos-mabo janí quescayamanahue.

⁹Jahuentiho tene Papan jaiquin hihxon ta maton papabaan hea janoxon tana tanacannishqui. Coshixon hen jato hahxon hahxonai jisxon bi ta cuarenta bari hea tanarescannishqui.

¹⁰Jaa copi tah hen jato qui sinaxon yohiniqui: Huetsajaquin shinanax ta jascabihi paramehcaniqui. Heen bahibo honanaiboma ta qui.

¹¹Sina sinaxon tah hen hihti yohiniqui: Heen jihue janin ta jaabo jahuentianbi hihquiyamayaxihcaniqui.

¹²Coiramenahue, hea huetsabaan. Nincatima tiromabo shinanbo maton jointi janin jamis, tiromahi. Jascapa

shinanbaan ta mato noquen jihuemanica Papa Dios nincamatimajahiqui.
¹³Tsoabi hohchapan paramehtax nincayosmayamanon hihquish jatihibi neten joni huetsa betan yohinannahue. Rahmabi nincacoinhue Dios Yoshiman yohihah histon nincacoinahbo yohinannahue. ¹⁴Nincacoinmenoxon non mahuanoxon caman jascabijaquin sirijsaquin nincacaibo tah non Criston hahbe jihuertibо qui.

¹⁵Rahma sca jahuen joi nincacax nincayosmayamanahue. Papan jato teneresnon hihxon nihi naman cahuan cahuanai nincayosmabo janí quescayamanahue.

hih ta janishqui. ¹⁶Papan jato nincamaha bi ta noquen papabo nincacatsi-hyamanishqui. Egipto mai janinhax Moses betan jonibо jatihibi ta jascapahbo janishqui. ¹⁷Papan ta cuarenta bari jato qui sina tenenishqui. Hohchanish copi ta nihi naman mehax muhuatah sca racaren-nencannishqui. ¹⁸Nincayosmabo copi ta jaabo yohihi, Heen jihue janin ta jahuentianbi hihquiyamayaxihcanihqui, Papan janishqui. ¹⁹Jan yohini quescabi ta janishqui: nincayosmabo copi janо hihquit hahtipahyamahibo.

4 Jaa copi coiramenahue. Jahuen jihue janin hihquit mato yohiparihi bi janо hihquitima quescapahbo man jamis. ²Jahuen joi siri jan jato nincamani quescajaribiquin ta noque rhibi nincamahiqui. Nincaquin bi nincaresaibo copi ta yanca bi res jato nincamanishqui.

³Nete jamenonon ta jahuen jihue noque hahxonnishqui. Jaa jahuen jihue yohihi ta Sina sinaxon tah hen yohinahqui, Heen tantiti janin ta jaabo jahuentianbi hihcoyamayaxihcanihqui

Papan janishqui, caibo sca janо hihcoyaxahnon. Non nincacoinax hiname-htaibo tah non janо hihconica qui.

⁴Jahuen tantiti yohihi ta huishani joi nescapa jaiqui:

Jan hahrasihи jahuen teebo jatihibi queyohax sca ta jahuen siete neten Papa tantiscanishqui.

⁵Jahuen jihue yohihi ta hen yohiscai huisha jaiqui:

Heen tantiti janin ta jaabo jahuentianbi hihcoyamayaxihcanihqui

hihqui. ⁶Jan nincamamenonibo ta nincayosmabohax janо hihcoyamanishqui, caibo sca janо hihcoxihnon. ⁷Huetsa huisha janin rihbi ta David yohuanni joi jaiqui, Papa tantini pecaho basihax sca jahuen nete yohihi jan nescari yohuanni: Rahma sca jahuen joi nincacax nincayosmayamanahue

hihqui. ⁸Papan tantiti ta nai naman meha ma qui. Papan tantiti janin Josuepan jato hihcomaha janо hihress-caibaan cahen Papan tantiti janin hihconahue jato jayamahan. ⁹Jaa copi ta Papan tantiti janin jahuen janibо hihcoti japarihi non honanai. ¹⁰Jahuen teebo queyohax Papa Dios teeyamascai quescaribhi ta Papan jihue janin hihquihibo jihue jihuertihqui, tee teeyamascai. ¹¹Nincayosmabo hihquihaxma quescayamanoxon sca Papan jihue janin hihquinoxon histon hinamehxon hihti nincacinnahue.

¹²Papa Dios yohuanaiya tah non nincati jai. Jahuen joi ta jahuen yoshinyahpa qui. Noquen jointi janin ta jaa join teetihqui. Hoquenbehcoinbi quehsho machitonon non histon nacoti hahtipahi quescahax bi ta hashoan rihbihи jahuen joi noquen jointi janin hihquihiqui. Noquen yoshin, noquen shinan, noquen xao rechi, noquen xao napo caxquexon jisxon hahcayaquin ta noquen jointi janin non yohuanaibo, non shinanaibo jaan honanahqui. ¹³Jaan jisi ta jonetai jahuabi yamahihqui. Mahpohahbo ta mahpohahma qui, janibi racatai quescapahbo, jaan jisi.

Noque jascajaquin jisi yohuanai tah non nincati jai.

Jesus noquen quiquin yohuanxonnicah

¹⁴ Naihoh huinocahini cahax ta Papa bebon noquen quiquin yohuanxonnicah jaiqui, Jesus, Papa Diosen baque. Jaa copi jascabi jahan shinannahue. ¹⁵ Paquemacatsihquin tiroma yoshiman noque tanahi quescajaribiquin ta noquen yohuanxonnicah rihbi tananishqui. Tanahah bi ta hohchayamanishqui. Jascapahbo tenenixon ta noquehon shinanihqui. Non hohchataiya ta noque yohuanxoniqui. ¹⁶ Jaa copi jenimahanan Papa yocanahue. Noquehon shinanxon jan noque yanapantihi honanxon, yocaresnahue. Non pishinai tian ta noque hahxontihiqui.

5 Mainxon Papa bebonxon yohuanxonnicahbo ta Papan caisah joni rahsi janishqui. Yohuanxonnicah meraxon ta jato janepahonishqui, jaa bebonxon sca caibo yohuanxonnon. Hohcha copijaxonquin hahcajxon ta hohchataibo jaiya jaton hinanti hinanxonquin jato yohuanxoniqui. ² Hahbe joni hihxon ta honanyamahax tiromahiboya jato teneti hahtipahiqui. Papan babin catihi bi bahinma cahiboya ta jaton hahbe joni hihxon jato teneti hahtipahiqui. ³ Hahbe coshijoma hihxon ta jonibaan hohcha copi hiná rehtexon Papa hinannoxon jahuenahbi jahuen hohcha copi jascajaribiti jaiqui.

⁴ Noquenbi shinanax tah non yohuanxonnicahtimahi, tsoabi. Papan janehah pari tah non jascatihi, jan Aaron janeni quescapi. ⁵ Cristo ta jascarihbibi qui. Jaabi hapocatsihqui ma bi ta Papan yohihah pari noquen yohuanxonnicah jaa jai qui. Jaa yohiha nea huisha joi jaiqui:

Mia tah min heen baque qui. Baquen hah sca tah hen mia jai.

⁶ Huetsa rihbi ta jaa yohihi jaiqui: Jascabi yohuanxonnicah ta mia qui, Melquisedec japahoni quescua.

⁷ Main pari hihxon ta Papa hihti yocanishqui, hicha. Coshin quenaxon huao-hihxon ta Papa yocanishqui, mahuatimajati Papan hahtipahi copi. Jaabi Papa queenai quescua janon hihxon jan yocacah ta nincaxon Papan hahxon-nishqui. ⁸ Papan baque hihxon bi ta Papa queenai quescua jati haxenoxon tiromabon tenenishqui. ⁹ Jatihibi huinosca jaax ta jihuemanicah sca jaa qui. Jaa nincacoinaibo jatihibi queyoyamanox mananon ta jato hihbohiqui. ¹⁰ Melquisedec japahoni quescapa quiquin yohuanxon-nica hihnon ta noque jihuemanica janon Papan jaa janenishqui.

Nincacoinyamamis, nincanahue

¹¹ Jaa yohihi non hicha yohiti jai bi tah man pabe sca jai. Jaa joibo mato nincamatii ta tee qui. ¹² Neateman nincanixon man haxemanicahboscatihi bi tah man honanyamahi. Haxemanicahbo sca man hihtih bi ta Papan joi haxemenotibo mato yohirihbiti man pishinai. Xoma hahmatibo tah man qui; chahomabo piti hahtipahyamaparihibo. ¹³ Xoma hahcaibo ta baquexobo hihxon, pontejaquin shinanax jihueta honanyamaparihibi. ¹⁴ Chahomabo ta hanibaan piti qui. Hanibaan ta jahua Papan costanilquen, jahua jan costanyamahiquin hihxon haxexon honanscawai, Papa queenai quescascajanoxon.

6 Mato hanijanoxon sca tah hen han pehocohi joi yohirihbixonma hahan haniti Criston joi sca mato nincamacatsihqui. Non nincamenoti joi man honanscawai quen tah hen jaa joi mato hahquirihbi yohiti queenyamahi. Jaa joi tah man honanscawai: Papa noquehon jen-

imanon hihquish non quesahi hihres-pahoni tah non jenebahinscatihi, Papa nincacoinxon. ²Nashimati joibo, man-majxon tee hinanti joibo, jenquetsa-hax mahuanihbo hueniyaxihqui joibo, Papan jascabijaquin casticanyaxihqui joibo. Jaa joibo man honanscrai quen han-hanitj joibo sca hen mato yohinon.

³Papa queenaiya tah hen jascatihi.

⁴Hinamehnixon bi noquen Hihbo jenebahinscaibo tah non jenquetsahaxon bi jato hahquirihbi henamehmatimahi. Jaa copi tah hen mato hahquirihbi henamehti yohicatsihyamahi. ⁵Non jenimanon ta siri joibo Papan yohihiqui. Jayaxihqui coshi ta noque hinanihqui jaya non jihuemon. ⁶Jascajaquin noque hahxonah bi tah non jenebahini bahimahhuan cahax jenquetsahax bi hahquirihbi henamehtimascai. Papan jisi ta jascapahbaan jahuen baque hosanxon hahquirihbi jihuin hueonaibo qui. ⁷Noquen jointi ta huai quescapha qui. Bexon hoin mechchajaha ta bana siribo joconihqui, huai hihbaan piti siribihnon. Jascapa huai ta Papan hicha bimijahiqui. ⁸Moxaya mohue boncohi huai ta tiroma qui, casticantires pishini. Jascapa tah non mapojahi, jan jabiyahpa queyonon.

Hahan teneti shinan

⁹Jascari yohuanxon bi tah hen jascapahboma mato honanai, hea huetsabaan. Papan mato jihuemayaxi-hqui tah hen mato honanai. ¹⁰Jatohon shinanxon tah man Papan joiya cahibo yanapannioui. Nincacoinaibo tah man sirijaquin hahxonpahonixon rahma caman jato hahxonai. Jaa ta Papan shinanbehnotimahioui. ¹¹Jascjaxonti hihti queennahue. Jatihibi man jascanon tah hen queenai. Mahuanoxon caman jato hahxonti

hihti queenxon hahxoncoinquin man Papa qui hinamehtai jismanahue. ¹²Jascjati shinan jaax tah man pabebo hihtimascai. Jan yohini quescajaquin ta Papan noque hahxoncointihqui hihxon jaa honan jeneyamahibo ta Papan jihuetahb sca qui. Jan yohini quescabijaquin ta jato hahxonihqui.

¹³Abraham hahxonti yohiquin ta tsoa quenati yamahiya jahuen yorayabi Papa yohuannishqui. ¹⁴Hihcoini. Mia tah hen hihti hahxontihi. Mia tah hen hihti caijatihi, hahquin. ¹⁵Jaa honanyaxon tene sca Abrahanen jaiya ta Papan jaa hahxoncoinnishqui. ¹⁶Non hihcoin yohuanain honanahbo hihxon tah non hashoan coshi joni quenanica qui, non hihcoinyamahiya noque mahuamanon. Joni huetsa betan join bahchinanxon tah non jascapa quenaxon coshi joi tantimahi. Sinacananyamascanon. ¹⁷Jascajaquin rihbi ta Papan yohinishqui. Jahuen jihuetahb jahuen jihue janin jihuetai catihi ta yohicoinnishqui. Jahuentianbi jan shinan huetsajatimahi non hihti honannon hihxon ta jahuen yorayabixon jato yohinishqui.

¹⁸Yohuani ta Papa jahuentianbi quesatimahioui. Quesayosmaxon ta rabejaquin yohicoinnishqui. Jahuentianbi huetsatima joi rabe nincaxon, hahqui henamehtax jahuen baqueboscaxon non sirijaquin shinanxon jahuen joi bhnih hihxon ta jascajanishqui. ¹⁹Jaa joi copi tah non hihti honanax jaa honanya jihuetai, jahuatohonbi noque boti hahtipahyamascaquin. Jano Papa Dios jai janin tah non hihcoti hahtipahscrai, Papa yocanoxon. ²⁰Jano cahi ta Jesus bebonishqui, Melquisedec janí quescapa yohuanxonnicah tah qui, jascabi sca noquen yohuanxonnicah.

**Melquisedec quesca
yohuanxonnicah Jesus**

7 Melquisedec ta Salem jema janin jaton quiquin hapo hihpahonishqui. Quiquin hapohax bi noquen naihoh queha Papa bebonxon yohuanxonnicah. Nahua hapoboya jaton sontarobo rehtetani jahuiton ta Abraham behchihi caxon Melquisedecnen noquen Papa jaa yocaxonnishqui. ²Abrahanen rihbi ta jan bihtanai jatihibi tsamanxon chonga tsama jaxon Melquisedec huesti tsama hinannishqui, Papa bebonxon yohuanxonnicah quen. Melquisedec ta ponte hapo hihcatsihqui qui. Jaa ta jahuen quiquin jane qui. Huetsa jahuen Jane cahen Salem hapo. Jaa Jane ta siri hapo hihcatsihqui qui, shinanyahpa joni. ³Jaa Melquisedec ta papajoma, mama-joma janishqui. Jahuen xohtabo rihbi ta tsoanbi honanyamahiqui. Jahuentian cainnishquin jahuentian mahuanishquin ta tsoanbi honanyamarihbihiqui. Jasca copi ta Papa Diosen baque quesca janishqui, jascabihi yohuanxonnicah.

⁴Noquen quiquin xohta Abrahanen ta hihti siribo rahsi caixson jahuaborabo jaa hinannishqui, Papan yohuanxonnicah copi. Jaa shinannahue. Abraham mentan Melquisedec hashoan hapo hihqui honannahue. ⁵Levi baquebo ta texe Abrahanen xohtabo quescapahbo qui, jahuen jenabo. Jaabi ta jaabo yohuanxonnicahbo jati Papan yohinishqui. Yohuanxonnicahbo copi ta Papa Dios hinanquin jaton caibaan jato texe bihmati jaiqui, jascajanahue Papan jaah. ⁶Melquisedec ta levitobaan caibo hihyamanishqui. Jaton caibo que ma bi ta jahuen metoti tihibichina tsamanpaquexon jahuen jahuaborabo Papa Dios hinanquin Melquisedec Abrahanen bihmanishqui. Mia tah hen hahxonyaxihqui Papan Abraham yohini quen tah non Abraham shinanya

hihpahoni non honanai. Jaabi ta Papan jato hahxonti yohuanyahpaxon Melquisedecnen jayaxon Abraham yohinishqui Papan jaa hahxonnon. ⁷Hashoan coshi yohuanyahpaxon ta jascajaquin huetsa joni yohinica qui. Jaa tah non jatihixonbi honanai. ⁸Rahma jaibaan ta mahuanicaboxon bi noquen hinanti bihcaniqui, Papa hinanquin non jato bihmahi. Melquisedec ta huetsapah qui: jaa jihuetai ta yohihihqui Papan huishani janin. ⁹⁻¹⁰Abraham behchihi Melquisedec cahiya ta Papa Dios hinanquin Abrahanen Melquisedec jahuen jahuaborabo bimanishqui. Jaa bihmahi tian ta levitobo yamaparinishqui, Abraham xohtabo yamaparinon. Chini sca ta jaa xohtahi levitobo janishqui. Jaa xohtanicaxon ta hahbe bihmanicabo qui, Papa hinanquin Melquisedec bihmanica.

¹¹Moises yohixon ta jahuen joi Papan noque hinannishqui, jaa joiya teenicabohax sca levitobo noque yohuanxonnicahbo janon. Jaa levitobaan noque yohuanxona non Papa bebon jahuabi pishinyamahiya cahen Melquisedec quesca yohuanxonnicah sca Papan janeyamahan. Aaron baquebo cahen janehan. ¹²Noquen yohuanxonnicah huetsajaxon ta jaa yohuanxonnicahton joi rihbi Papan huetsajati jaiqui. ¹³Levitobo rahsi noque yohuanxonnicahbo hihpahoni bi ta huetsa sca jatihibi, Jaa huetsa jan yohihi ta levitomabo qui, judabo sca, levitobaan tee hahyamapahonibo. ¹⁴Noquen Hihbo ta judabo qui. Jaa jonibo yohuanxonnicah jati ta Moisesnin yohiyamanishqui, jahuentianbi. ¹⁵Huetsa joiyahpa huetsa joni sca jan yohuanxonnicah hihmati ta sirijaquin yohihiqui, Melquisedec quescapah sca yohuanxonnicah jati. ¹⁶Yohuanxonnicahbo mahuataiaya huetsa levitobo sca jato xohtati ta

Moisesnin yohinishqui. Nea huetsa ta jascayamahiqui; nea ta coshiyahpa qui, mahuayosma.¹⁷ Jaa yohihi ta nea huisha joi jai qui:

Mia tah min jascabi yohuanxonnicah jatihi, Melquisedec japohni quescapah.

¹⁸ Moisesnin yohini joi res nincacax bi tah non hohchayahpabo banenica qui, jaa join noque sirijati hahtipahyamahiya. Jaa joi coshima copi ta Papan noque jaa potamascaiqui, hahan jahuejatimahiya.¹⁹ Huetsa sca ta noque yohihihqui, jaa nincacax noquen Papa Dios qui cati.

²⁰ Non honancoinnon hihxon ta jahuen yorayabi Papa yohuannishqui. Levito jonibo yohuanxonnicahbo hihnon ta jascari yohuanxonma Papan jato janenishqui. ²¹ Noquen quiquin yohuanxonnicah sca janon ta jahuen yoraya yohuanxon janenishqui. Jahuen huisha joi janin ta jaa yohihiqui:

Mia tah min jascabi sca yohuanxonnicah qui. Papan ta yohixon jahuen joi jahuentianbi huetsajatimahiqui. Honanahbo hihquish ta jahuen yorayabi yohuannishqui hihqui jaa huisha joi. ²² Jascaxon jan yohini honanxon sca hashoan siri joi jan noque hinanai honanrihbinahue. Jesus jaa yohuanxonica hihqui quen hashoan sirijaquin Papan noque hahxoncointihi honancoinnahue, hihti honanquin. ²³ Mai meha yohuanxonnicahbo jascabihi yohuanxonica japanan ta mahuatax queyocanacaniqui. Jaa copi ta hicha jaiqui, huetsa mahuataiya jaa xahbanen huetsa hihquinon. ²⁴ Noque quiquin yohuanxonnicah ta queyoyamanox jihuethqui. Jaa copi ta jascabijaquin noquen yohuanxonnicah qui. ²⁵ Queyóyosmaxon ta jahuen joi nincoinax Papa qui jahuibo jaan jascabi jaquin yohuanxonni hahtipahiqui. Jaa

copi ta jascabijaquin jato jihuematica hahtipahiqui.

²⁶ Queyoyosma yohuanxonnicah tah non hihti pishinpahonihqui. Jaa ta joni siri qui, hohchajoma, jahuabi jahuen tiroma yamahi, tiromabo manayamahi, naihoh hihti hapo sca jaa jai. ²⁷ Levito yohuanxonnicahbo jati jai quescayama ta jaa jaiqui. Levitobaan ta jatihibi neten jaton hohcha copi hinabo rehteti jaiqui, jatonahbi jaton hohcha copi rehtexon, jaton caibaana sca huetsa rehteribiquin. Jascajaquinma bi ta noquen quiquin yohuanxonnicanton huestijaquin noquen hohcha queyonishqui, jaabi hinamehtax mahuaquin noquen hohcha copijaxoni. ²⁸ Moisesnin ta hohchayahpabo janeti yohinishqui, yohuanxonnicahbo janon. Jan jaa yohini pecaho ta Papan jahuen baque sca noque yohuanxonica janenishqui, jascabi hohcha yosma.

Behna hahxontijaxon Jesusen noque yohuanxonai

8 Hashoan nincati joi sca tah hen mato yohihi: Hen mato yohiha quescapa quiquin yohuanxonnicah tah non jaresscai. Papa Dios janin caníxon ta Papa Dios betanbi quiquin hapoxon jatihibi hihbojahiqui. ² Papan quiquin jati janin tah qui. Jaa jahuen jati ta joni-baan xobojahi quescapahma qui. Panbi hahni tah qui. Janoxon ta noquen Hihbaan noque yohuanxoniqui. ³ Jatihibi quiquin yohuanxonnicah ta joni-baan hohcha copi jahuabora hinanxonnicah qui. Jascapahbo hinanxonni ta jahuen tee qui, Jascajahue Papan janí. Jaa copi ta noquen quiquin yohuanxonnicah rihbi jahuara hinanxonnicah qui, noquen hohcha copi. ⁴ Moisesnin yohihihah ta levitobaan hiná rehtexon hinanxoniqui, hinanxonnicahboxon. Jaa copi cahen rahma caman noquen Hihbo

main jihueparihax yohuanxonica jaa hihyamahan.⁵ Levitobaan ta hahcoinyamacaniqui. Papan xobo hahxoncatsi-hquiton ta Papan Moises yohinishqui: Jatihibi hen mia mahchi janin jismahipi quescabijaquin hahhue, hahquin. Naiho jascapa jahoxon hinanti jai non honanon hihxon ta jascajaquin Moises xobojamanishqui. Jahoxon levitobaan hinábo rehtexon hinanxonai ta jascapahax bi jaamah qui.⁶ Hashoan sca noque sirijaxontijaxon ta hashoan siri joibo sca Papan yohihiqui, jahuen jihuetaahbo coin sca non janon. Jaa siri joibo nincamanicah ta noquen Hihbo qui. Jahuen noque nincamati joibo hihti siribo hihqui quescaribibi ta hihti sirijaquin sca noque hahxontihi qui.

⁷ Jahuen jihuetaahbo jati ta noquen xenibo Papan yohinishqui. Jaa huesti jaton Papa Dios hihnon, jaabo rihbi siripi jihuetaiya jato hahxonnoxon jato yohiquin. Jaabo jihuetai siripaiya cahen huetsa joi sca jato yohiyamahan.⁸ Tiromahi jihuetaiboya ta huetsajaquin sca jato yohinishqui:

Huetsajaquin sca tah hen heen israelibo yohiyaxihqui: Heen Judea main jihuetaibo tah hen huetsajascaquin behna joi sca yohiyaxihqui. Heen jihuetaahbo jati tah hen jato yohiyaxihqui hih ta Papa Dios jaiqui.

⁹ Jaton xenibo hen yohini quescajayamaquin tah hen behna sca jato yohiyaxihqui. Mehuetanxon tah hen jato Egipto mai janinhah hihuenehqui. Heen jihuetaahboxon bi ta heen joi jenebahincannishqui. Jaa copi tah hen jato nincayamascaniqui hih ta Papa Dios jaiqui.

¹⁰ Heen jihuetaahbo jaabo janon ta israeli baquebo hean yohiyaxihqui hih ta Papa Dios jaiqui. Hea queenai quescati shinan tah hen jaton jointi janin niatihi. Jointinin honanahbo tah hen jascajatihi. Hea ta jaton

Papa Dios hihtihi, jaabo rihbi heen jonibo.

¹¹ Jaatian ta jaton caibo betan yohinani, jaton huetsabo betan yohinani, Noquen Papa Dios honannahue hihquinanyamascatihiqui. Jatihixonbi ta hea honanscatihiqui. Baquebaan, xenibaan, jatihixonbi.

¹² Jaton shinan tiromabo tah hen sohuaxonyaxihqui. Jaton hohcha tah hen shinanyamascatih, hahquin.

¹³ Behna joi jan yohihi ta jan yohimenoni joi xeniscaiqui hihcatsihqui qui. Xeni jahuabora cahen payotax queyocahinnicah, jahua yohitimasci.

Papan jihue jenquetsahpa quin honanahbo hihxon mainxon xobojanibo

9 Jahuen jihuetaahboti jato yohimenoxon ta xobojati yohixon, hea yocacatsihquin jahoxon nescajanahue jato janishqui.² Jaa copi ta xobojacannishqui. Jaho sca ta misa tsahonxon, johuebo pejanxon paan janacannishqui. Jaa xobo yohihi ta Papan xobo hihcaniqui.³ Chicho sca ta xohpesahca qui rontamehtai chopas janishqui, hahan chiqueti. Hahan chichoxon chiquecái yohihi ta Papan jati hihcanihqui.⁴ Hahan hininjatibo jano quetejanoxon cahen oro quencha jano janish. Oron rahco bohnanti jano jai, oro rahsi. Jaa cahen Papan jihuetaahboti joi bohnanti. Jaa chicho cahen oro quencha maná pitiya. Aaroman jihui taxo rihbi, joconnica taxo. Papan jihuetaahboti joi macan champani qui huishá, jaa rihbi jaa bohnanti chicho bexojahah.⁵ Bohnanti cahchian sca cahen Papa jisxonai yoshin quescapahbo rabe hahxon bohnanti cahnimahah. Joni huetsa behchinanbecoinai rabe, jaa rihbi oro bires. Hohcha sohuamati jimi potohahtani

janin jisi cahen cahnichi. Jaabo yohiti hicha jaibi tah hen rahmabi yohitimahi.

⁶ Jascajaquin xobojahax ta neri xobo xehqui janin jano teetaibo jatihibi neten hihconicabo qui, jaton tee hahqui hihcohi. ⁷ Hihcax bi hoa chicho queha chiqueho boyamacani. Jano cahen yohuanxonnic a huesti, hihcoti. Jimiya caxon cahen jahuen hohcha copi, texe jonibaan hohcha copi rihbi, jimi hinani hihcohi, jatihibi bari huesti coti res, jaa huesti jano hihconicah. ⁸ Jato jascajati yohixon ta Dios Yoshiman noque honanmahiqui, jaa xobo yamascaiya pari non Papan jati janin hihconica. ⁹ Noquen hohcha copi hinabo rehtexon jaa xoboho Papa Dios hinanxon bi tah non jascajaquin jahuentianbi noquen hohcha potatimahi. Potacointi non haxenon hihxon res ta jascajati Dios Yoshiman yohinishqui. ¹⁰ Pitimabo piyamaxon, xehatimabo xehayamaxon, jahuaborabo nashimaxon jai joibo ta basima tahni janishqui: joi coin nocoscaya ta jamenohi joi yamascatihi qui.

¹¹ Nea ta jaa joi coin qui: Cristo ta quiquin yohuanxonnicah qui. Hihti siri-jaquin noque hahxonnoxon ta jonishqui. Hashoan siri xobo janin sca ta canishqui. Xobo non hihqui bi tah non mequeman xobojahi yohiyamahi, nea neten mehama. ¹² Chibon jimi ta Criston boyamanishqui. Toro baque jimi rihbi boyamaquin. Jahuenehbi jahuen jimi ta bonishqui. Jascabi queyohah noquen hohcha janon ta huesti coti res hihcoxon jahuen jiminbi noquen hohcha copijanishqui. ¹³ Caibo betan tsinquit hahtipahyamahibo qui ta jimi potojaha tsinquit hahtipahscainqui. Jato qui chibo jimi potojaxon toro jimi potojaxon, vaca mapojaxon jahuen chihi mapo jato qui potojaha ta tsinquinicabo japhonishqui. ¹⁴ Jascajaha hihconica jaa jaiya ta Criston jimin nashimaha hashoan sca

noque Papa janin tsinquinicabo qui. Dios Yoshin ta queyoyosma qui. Jaan yana-pana ta jihuetai Papa qui Cristo hi-namehnishqui. Jahuabi tiroma yamaxon copi ta jahuen jimin noquen hohcha copijati hahtipahxon noquen hohcha queyobahinnishqui. Jaa copi tah non noquen Papa yocati non hahtipahscai.

¹⁵ Moisesnin yohini quescabijahax bi jascabili noquen hohchaya non banetai quen ta mahuaquin noquen Hihbaan jahuen jimin copijaxonnishqui. Jaa copi ta behna joi noque yohinica qui. Papan jihue janin non jascabi sca hahbetan jihuemon ta Papan noque jano huinomati yohinishqui. Noque jano huinomanicahxon ta Criston noque behna joi yohinica qui. ¹⁶⁻¹⁷ Jihueparixon noquen papabaan jaton jahuaborabo noque hinanrihyamacatsihquin bi hihxon sca noque hihbomayanoxon ta noque hinantijacaniqui, jaa hinantijati joi copi sca non bihyaxihqui. Jaa mahuascaiya pari tah non bihtihi. Jihueparihiya cahen bihyamahan. ¹⁸ Jaa copi ta hinantijaquequin noquen xenibo nincamamenoquin Papan jato hina retemanishqui, mahua janon. ¹⁹ Jascajati jai copi ta noquen xenibo tsinquixon, Papan huisha joi jatihibi jato nincamaxon, chibo jimi bihxon, jaa hihiyamahiya toro baque jimi bihxon, jeneya hichajaxon, carnero rani joshinjaxon toncojaxon, tahuia qui queonxon, jimi qui maosahxon, jaa quirica qui huishco-hahtanxon, jatihibi jonibo qui rihbi huishcohahtannishqui. ²⁰ Jato mehchajaxon ta jato yohinishqui: Mato hinantijaxon ta jaa queenai quescari man jihuemon Papan mato nincamahiqui. Nea jimi ta hahan mato jahuen jihuetahbojati qui. ²¹ Jato qui huishcohahtanxon sca ta jaa Papan xobo qui rihbi jascajaxon, jano jai jahuaborabo qui rihbi jascajapauenishqui. ²² Jahuen jati janin jahuabi tiroma non huinomayamanon ta

jimin sirijati Papan yohinishqui, Moises huishamaquin. Jaan yohihah ta hina rehtexon pari hohcha sohuamatiqui.

Hinamehquin Criston noquen hohcha copijaxoni

²³Papan quiquin jati janin cati jenquetsahpa hin non honannon hihxon ta noquen xenibo xobojamanishqui. Yohina jimin jano jaibo jaabaan sirijati jaiya cahen Papan naihoh jati sirijanoxon hashoan siri rehtexon pari sirijatihi. ²⁴Mainxon xobojaniboa ta hahan haxeti res qui, naihoh noquen Papan quiquin jihue janin cati non haxenon. Cristo ta mequeman xobojanibaan hihcoyamahiqui. Naihohbi hihcoxon ta Papa janinxon sca noque yohuanxoniqui. ²⁵Mai meha yohuanxonica jonibo ta jaa chicho queha chiqueho yohina jimi boxoni jatihibi bari hihcohihqui. Cristo ta jascayamahiqui. Jascanicahx cahen hinamehti cari carichin. ²⁶Huesti coti res noque copi mahuayamahax cahen netejamenoni pecaho hicha coti mahuati jaquehan. Hicha coti ta hihyamanishqui. Nete queyoti hochoma ta huesti coti res jahuex hinamehxon huestijaquin noquen hohchabo queyobahinnishqui. ²⁷Noque jonibo rihbi ta huesti coti res mahuanicabo qui. Jaa pecaho cahen hohchayabo Papan casticanyaxihqui. ²⁸Jascarihbihita huesti coti hicha jonibaan hohcha copi hinamehtax, noquen hohcha queyoxonnish joribiyaxihqui, jaa joti manataibo jihuemanoxon.

10 Noquen bari yoshin res jisxon noquen bemanan jenquetsahpa quin non honanyamahi quescarihbihita ta Moisesnin huishani joi qui. Jaa jisxon tah non Papan noque hahxonyaxihqui non shoco res honanai, honanhihtiyamaquin. Moisesnin yohini quescabijaquin jatihibi bari jaton hinanti hi-

nani cari carixon bi ta jascapa hinanxon jahuentianbi jaton hohcha queyobahintimahiqui. ²Jascapa hinanxon jaton hohcha queyobahinxon cahen hinanyamascan. Huestijaquin jaton hohcha queyobahinti hahtipahxon cahen jaton hohcha shinanyamascan. ³Jatihibi bari hinani caxon ta hinanxon, jahanbi jaton hohcha shinanrihbicaniqui. ⁴Toro jimi, jaa hihyamahiya chibo jimi, jascapahaan tah non jahuentianbi noquen hohcha potatimahi.

⁵Jaa copi ta noquen neten jahuex jan nescari yohuanni joi jaiqui: Hinantibo tah min queenyamanihqui.

Jaa queenxonma bi tah min hea yorajaxonai.

⁶Jaton hohcha copi yohina rehtexon mapojati tah min costanyamahi.

⁷Neno tah hen qui, Papan Dios. Min huishani joi hea yohihi jai quesa, Min queenai quescajati tah hen jahui

hihqui jaa huisha. ⁸Hohcha potanoxon Moisesnin yohini quescabijaquin jaibaan bi ta jascapa hinanti Papa queenyamahiqui, non yohihi quesa: Hinantibo tah min queenyamanihqui. Hohcha copi yohina rehtexon mapojati tah min costanyamahi, hihqui.

⁹Jascaxon cahen nea rihbi yohinish: Neno tah hen qui, Papan Dios, hea yohihi miin huisha joi jai quesa Min queenai quescajati tah hen jahui, hihqui. Jan yohimenohah yamascanon ta chini joi janishqui. ¹⁰Papa Dios queenai quescajaquin ta jahuen yora hinamehxon huestijaquin Jesucristonen noque sirijahiqui, non Papa qui cati hahtipahscanon.

¹¹Jonibaan hohcha copi hina rehtexon jimi hinanxonquin ta jatihibi hinanxonnicanton jaahinanihqui. Jatihibi neten nihxon ta jascapa rahsi hinanxoncaniqui. Hinanxon bi ta jascajaquin jahuentianbi hohcha potati

hahtipahyamahiqui. ¹²Criston caya, jaabi hinamehxon ta huestijaquin noquen hohcha queyobahinnishqui. Queyobahinax ta Papan mecayaho quiquin hapo sca tsahonishqui. ¹³Papan jahuen rahuibo namanjanon caman ta jano manatihqui. ¹⁴Jascabi sca siribo jahuen caisahbo janon ta huestijaquin hinamehxon noquen hohcha queyobahinnishqui. Jaa copi ta manati res jaa jaiqui. ¹⁵Dios Yoshiman rihbi ta Papan joi huishamaquin jaa yohinishqui.

¹⁶Hinantijaquin tah hen huetsa tian nea joibo jato nincamayaxihqui hih ta Hihbo jaiqui. Hea queenai quescati tah hen jaton jointi janin niatihi. Jointinin honanahbo tah hen huishaquin hahcajaquin heen shinanbo jaton jointi janin hihquimatihi.

¹⁷Jato jascahax nesca sca janish: Jaatian tah hen jaton hohchabo, jaton tiromabo hean shinanyamascatihi hihqui. ¹⁸Noque jascajaquin sohuaxon hohcha shinanyamascai copi tah non hina rehtexon jimi hinanti yamascai.

Papa pataxti

¹⁹⁻²¹Papan jati janinbi non hihconon ta chique janin xehqui behna quehpenxonquin hahcajaquin jahuen yora hinamehnishqui. Xehqui quiri non pontecahini cahi quescaribibi tah non noquen jihuetai hihbo qui cahi, Papa qui bi nocoti cahi. Papan jihue janin jahuen jihuetahbaan quiquin yohuanxonica jaresscai quen raque potahax hihconon bonahue, hea huetsabaan. ²²Papan noque Benahue jaiquin honancoinax hihconon bonahue. Shinanihcamaxhaxma bi shinancoinax hihconahue. Non hihconon ta noquen jointibo huishcohahtaniqui, non tiromapahoni non shinanyamascanon. Noquen yora ta jene nexnanin

nashimaquin hahcajahiqui. ²³Noque hinantijanicahton noque hinancoinyaxihqui honanquin sirijaxon caibo nincamaquin jeneyamanahue. ²⁴Hashoan sca joni huetsahon shinanxon yanapanhananahbo hihxon noquen huetsabo yohuanquihnnahue. Caibo hahxonti jato shinanmanahue. ²⁵Tsinquitaibo betan behuahi tsinquinahue. Caibo tsinquiyamahi quescua man jamis. Papan casticanti nete nocoti jahuijisish hashoan sca joni huetsa yohinannahue, jaton shinan coshijanoxon.

²⁶Noquen hohcha copi Cristo mahuanishquin honanquin sirijahax bi jaabi queenax copi non tiromahi jihuetaiya tah non huetsa hahan hohcha potati yamascai. ²⁷Hahqui raquetijaquin Papan casticanyaxihqui honanax, jaa shinanya jihuenahue. Johuehihnatai chihin nincayosmabo Papan queyoyaxihqui honanax, jaa shinanya jihuetai. ²⁸Jascatimahi Moisesnin yohinib bi nincacatsihyamaxon hahresai joni tiromahi jisish chanihahbo ta jaa rehtecanpahonishqui. Rabexon jisxon, rabe hihyamaxon quimisha jonixon jisxon yohihah ta jaa tiromahi rehtecanpahonishqui, homisbaxonma rehterescanquin. ²⁹¿Jahuentiho castican cahra Cristo jama jamacaibo jatihiquin? Jato jihuemanoxon jahuen jimi Criston potanib bi ¿Criston jimi jahuama hihqui quescajahibo copi Papan jato tiromajatimahquin? ¿Jahan shinanxon Dios Yoshiman jato hihi hahxonah bi hosanaibo copi Papan jato casticancointimahquin? ³⁰Nea noque yohini tah non honanai: Heanbi tah hen jato copitihi. Hean tah hen jato casticanyaxihqui, hihqui. Huetsa rihbi jaa yohuanai ta nesca qui: Papan ta jahuen jonibo casticanyaxihqui qui, hihqui. ³¹Hihcoini Papan queyoyosma mequen ta hahqui raqueti qui.

³²Criston joi nincacoinxon man tenepahoni shinannahue. Hihti tiromaja mato jaahbo bi tah man tenenihqui. ³³Caibaan ta mato hicha hichanishqui. Caibaan rihbi ta janibijaquin mato hosanhahnhan tiromajanishqui, costanahbo. Jascapa tenehibo rihbi tah man yanapanniqui, hahbe tenehibo sca janoxon. ³⁴Sipo xoboho tsahonah tenehibo rihbi tah man yanapanniqui. Tiromajaquin maton jahuaborabo mato bichinahbaan bi tah man jenimahanan tenenihqui. Naihoh man hashoan siribo queyotimabo jai honanxon tah man jenimahanan tenenihqui. ³⁵Jascapahonihboxon jaa teneti shinan potayamanahue. Man tenehiya ta Papan mato hihti hahxonyaxihqui qui. ³⁶Jaa queenai quescaja man jai quen mato hahxontijani jai bihyanoxon, tenenahue.

³⁷Basima sca ta hihihqui. Jonicah ta joyaxihqui qui, basiyamahi.

³⁸Heen siri joni ta nincacoinax jihueticqui. Bahinbi jahuex bi banejaquetax jarihax jan jahui qui caribihiya tah hen jahan jenigmatimahi hih ta Papa jaiqui. ³⁹Jahan jan jenimayahia yohihi ta noquenahma qui, hea huetsabaan. Bahin banetax queyotaiboma tah non qui, jointinin nincacoini queyoyamanox manataibo tah non qui.

Nincacoinpahonihbo

11 Papa yohuanai nincacoinnicaxon tah non nincaxon jan noque hahxonyaxihqui non honanquin sirijahi. Jan noque hahxonai jisxonma bi tah non honancoinai. ²Jascapa honanya japhonibo copi ta noquen xohtabo qui Papa Dios siripi yohuannishqui siri yohiquin.

³Jistimahiboya ta jistibo sca janon yohuanxon res Papan nea netejanishqui. Papa hihcoini yohuanai honanyaxon tah non jan netejani non honanai.

⁴Jascapa nincacoinnicaxon ta Papa Dios hinanquin Cain mentan hashoan sirijaquin Abelni jahuen hinanti hinannishqui. Nincacoinnicaxon hinanai copi ta siri joni Papan jaa jisnishqui. Siri joni jisxon, jahuen hinanti bihqui. Abel neateman muhaniah bi tah non jaa shinanaxon, jascapa nincacoinnica non hihiuya noquehon Papa Dios jenimahi non honanrihbibi.

⁵Jascapa nincacoinnica hihqui copi ta Enoc Papa Diosen bilihnhnishqui. Jaa copi ta yamacahinnishqui. Bihinahnihnyahnoxon ta jaa yohihi jahuen hanhan jenimati joni jaa hihqui Papan yohinishqui. Mohitahpa bilihnhnini copi ta muhawayamanishqui. ⁶Jascapa nincacoinnica non hihyamahiya ta jahuentianbi noque siri jisyamahiqui. Papa qui canicahton ta Papa Dios jai shinantihi. Non Papa Dios benabonaha jaan noque meramatihai tah non shinantihi.

⁷Tsoan jisnima paqueyaxihqui Papan yohihah ta nincacoinxon Noeman non tianishqui. Nincacoinax ta jahuen hahoya jahuen baqueoya nanetax jihuensis. Caibo ta jascapa honanya hihyamahax jene meran cahax queyocahincannishqui. Jascapa honanyahpabohahsi res siribohi jisxon ta Noen rihbi Papan siri joni jisnishqui.

⁸Hen mia jismayaxihqui mai janin catanhue mina sca jaa mai hihnon Papan jaah ta nincacoinax Abraham canishqui, jahuen hen nocoti cahin hihcanahaxma bi honanaxma jabiyahpa caresscrai. ⁹Papan hinanyaxihqui main nocotax sca ta janohahbibaan nahuahax bi jano jihuensis. Jahuen baque Isaaque, jahuen xohta Jacobo rihbi ta hahbetan jaa xoboho jihuensis, jaa mai hahbetan hihboyaxihqui. ¹⁰Papan jato jemajaxonxihqui ta manaquin tapasax res jano jihuecannishqui. Xoboyahpa queyoyosma jema manacani.

¹¹ Abrahamen haibo cahen Sara. Baque bihyosmaxon bi ta nincacoin sca jaax baqueti coshi bihresscaxon, yoxabohax bi toho sca hihxon, baquebihnishqui. Hihcoini yohuanxon Papan hahxoncoin-tihi honanxon copi ta jahuen baqueti queyoscanixon bi jaa baquebihnishqui. ¹²Jaa copi ta mahuascai quescapi huesti joni janish bi caicanacannishqui, huishi hicha jai quescarihibi caichi, huean quexa mashi bero jai quescarihibi, topontimahi.

¹³Nea hen yohiha jonibo ta nincacoinax bi jatihibi mahuacannishqui. Papan jato hinantijani bichishma mahuacani. Hocho jisi quescarax ta jenimacannishqui. Noque tah non mai mehabaan nahuabo qui, nai naman tah non pasi-jaresai hih ta jacannishqui. ¹⁴Jaton-ahbi hihnon jaton mai manáparihibo ta jascanicabo qui. Jaa copi jasca-cani. ¹⁵Janohax piconihbo mai ta shi-nanyamascacannishqui. Shinanparihax cahen janoboribicanan, queenax tian. ¹⁶Hashoan siri mai queenax ta boribiyanishqui, naihoh queha mai queenax. Jaa copi ta Papa Dios jaton Papa hiti hihtimahyamahiqui, huetsa jema jato bexojaxonnish.

¹⁷Miin baque hea hinanquin reh-tehue Papan jaah ta nincacoinxon Abrahamen hinannishqui, jaa huesti jahuen baque que bi. Papan hinantijani mai jahuen baquen bihtihi bi jahuen baque Papa Dios hinanquin. ¹⁸Miin baque Isaaque tah hen caijayaxihqui, hicha sca miin chini baquebo janon hah ca Papan janish. ¹⁹Isaaque mahuascai bi ta Papan hahquirihbi teehihmati hahti-pahiqui hihxon ta Abrahamen hinannishqui. Jaa copi ta reh-teyamahue Papan hahca rehtexonma bihribixon sca hahquirihbi teehihqui quescia jahuen baque jisnishqui.

²⁰Nincacoinnicaxon rihbi ta Isaaquen sca jahuen yohuanyaxon jahuen baque

rabe yohinishqui, Papan jato hahxonyaxihnon yohiquin, jahuen baque Jacoboya Esaú. ²¹Papa yohuanai ninca-coinicaxon rihbi ta mahuacatsihscaxon Jacobon sca Josepan baque rabe yohinishqui, Papan jato hahxonyaxihnon jato yohiquin. Jato yohixon, jahuen mepitinin betihihxon Hahxon tah min jai, Papan, hahquin. ²²Nincacoinnicahax rihbi ta José sca mahuacatsihxon, Egipio mai janinhax jahuen caibo picoyaxihqui hihxon huetsa mai janin jahuen xao mi-hinti jato yohinishqui.

²³Nincacoinnicabonxon ta Moisesn papabaan rihbi sca Moises siri pishca jisxon, quimisha hoxne jaton baquexo pishca jonenishqui quiquin hapon reh-teyamanon. Nincacoinnicabohax ta hapo qui raqueyamacannishqui.

²⁴Nincacoinnicahax ta haniscaax Moises sca quiquin hapon haibo baquen baque hihyamascanoxon jahuen caibo betan sca canishqui. ²⁵Neno pari hohchaquin costantahpan hihxonma bi ta Papan jonibo betan tiroma tenetanpan hihxon jato tenequihnnishqui. ²⁶Egiptobaan quiquin hapon xoboho jahubi pishinyamahi, siri siripi jihuete hatipahxon bi ta Criston tenehi quescajaquin tenehah ta hashoan siri qui hihxon tiromabo Moisesn tenenishqui. Papan hinanyaxihqui bihyanoxon hihxon ta tenenishqui.

²⁷Jistimabo jisxon quescajaquin ta Egipio mai potabahinnishqui, noquen Papa nincacoinxon. Nincacoinnicahax ta sinatai quiquin hapo qui raqueyamaribinrishqui.

²⁸Nincacoinnicaxon rihbi ta pascua piti pitijamanishqui, rehtenica yoshiman jaton beboquiha baquebo meheyamanon hihxon rihbi ta nincacoinnicaxon jaton xobo xehqui janin jimin sicanishqui. ²⁹Non mai potoni nabebacahini cahi quescarihibi ta nincacoinax

joshin hian nabebacahini pohquejaque-cannishqui Moises betan. Jato chibani sca ta Egiptobo rihbi nincayosmabohax pohquejaquecatsihquish bi jenen jato mahponishqui, hahsascanon.

³⁰Nincacoinax rihbi ta Jericó jema mayaconatani siete neten nihcannishqui, jaa jema chiquebo poxoscanon. ³¹Nincacoinscaxon copi ta hahresti haibo Rahabanen jahuen jema jisi jahuibo sirijaquin mapemanishqui, jahuen jema janin jihuetai nincayosmabo betan muhayamanoxon.

³²Hicha jascapa nincacoinnicabo yohiti jai bi tah hen yohihi hashoan basitihu, Gedeon, Barac, Sanson, Jefté, David, Samuel, Papan joi yohinicabo.

³³Jaabaan ta nincacoinnicaboxon jaton quiquin rahuibo jaton sontaroboyabi camaxon, pontejaquin jaton jonibo jihuemaxon, Papan jato hahxontijanixon hahxonah bihxon, hinon jana xehponishqui. ³⁴Johuehihnatai chihi nocajahax ta noque reramis sontarobo quihax jabatax, yosmahax bi coshicahini, coshi sontaroscaxon jaton rahui sontarobo camacannishqui. ³⁵Jaton haibobaan ta jaton baquebo muhuatek bi hahquirihbi teehihqui hicotancannishqui.

Caibaan rihbi ta Papan joi jato jenemacatsihquin tiromabaan hisinjahah bi tenenishqui, retehah bi Papan joi jeneyamabiresquin, hashoan siri jihue jayanoxon teneresquin. ³⁶Caibaan rihbi ta hosan hosanah bi tenenishqui, jihuin rishqui rishquihah bi tenequin, cadenanen nexahahbo bi tenequin, sipo xoboho tsahonahbo bi tenequin. ³⁷Rehtecatsihquin macaman tsacahahbo bi mahuanoxon caman tenequin. Caibaan cahen siran naxtehahbaan bi Papan joi jeneyamaquin. Machitonen retehahbo bi jeneyamaquin. Chop-

pishinxon carnero bichi chopajaxon sahuehax cahuan cahuani. Chibo bichi chopajaxon sahuequin. Pihan hihcani. Yomanahcani. Tiromajahah bi teneresquin. ³⁸Texe jonibaan jisi jaabo tiromabohi, hashoan siribo que bi. Jano tsoa jaitonma ta metisihcanahi cahuan cahuanishqui, mahchi janinbo jonecani, mai xanqueman jonecani. ³⁹Jaabo jatihibichin ta nincacoinnicaboxon bi Papan jato hahxontijani bihyamacannishqui. ⁴⁰Jaabo res siribo hihnonma bi ta jato betan noque rihbi sirijayanoxon Papan neateman yohinishqui, hihti siri noque hahxontijaquin.

Jesusen teneni quescajati

12 Jaa hen yohihah nincacoinaibo ta hicha qui, nai cohin tsamati quescapi. Jaabaan teneni quescajati ta jaiqui. Coshin bishquihihcananoxon jatihibi hihuebo potabahinquin hahcajaquin noque rahhuehihtaibo hohchabo potabahinahue. Jato potabahini coshin bi res canon bonahue, noquen Hihbaan noque hinanah bahin canoxon yobacahinnahue. ²Noquen Hihbo Jesus qui noquen shinan camahahnhan coshin caquin hahcajaquin tenenahue. Teneti shinan hihbo hihxon ta jaan noque hinanxon non hihti shinanyahpa hihnon caman noque hinanbonahiqui. Jaan noque hahxoni shinannahue: jihuin hueonxon retehah bi ta noquehon jenimaxon jaan tenenishqui. Tiromajaquin rabinmahahbaan bi ta noquehon jenimaxon jaa rabinmahi hen jahuama quescaxon jaan tenenishqui. Rahma ta Papa Dios patax hihbohi tsahoscaiqui, Quiquin Hihbo sca.

³Jaan jascapa tiromabo teneni shinannahue. Teneyosmayamanahue Man yobacahinyamamis. ⁴Hohchapan mato bihti tenequin bi tah man maton jimi potanoxon caman teneyamaparihi.

⁵ Mato jahuen baquebo jan yohicoinai huisha tah man shinanbehnohi. Jaa huishani joi ta nea qui:

Miin Hihbaan mia pontehah nincayos-mayamahue, baquen. Jaan mia cas-ticana bi yosmayamahue.

⁶ Hahan queenxon copi ta miin Hih-baan jahuen baquebo pontehihqui. Nincayamahiton ta jahuen baquebo jatihibi jaan rishquihi qui hihqui jan huishani joi.

⁷ Jaan mato haxemanon tenenahue. Jahuen baquebo copi ta Papan mato pontehiqui, mato hanijaquin. ¿Jatihibi

baquebo jaton papabaan hanijaquin ponteyamahihquin? ⁸ Caibo pontexon bi mato jaan ponteyama hah tah man jahuen baquema qui. Jahuenahma sca.

⁹ Noquen papabaan noque hanijaquin pontehah tah non jato nincanihqui. ¿Hashoan sca non noquen naihoh queha Papa non nincatimahin jihuexon?

¹⁰ Jaabaan bi shinanai quescajaquin res ta noquen papabaan noque pon-tenishqui. Noquen naihoh queha Papan ta non hashoan siri hihnon noque pon-tehiqui, jaa naihoh hihqui quescaj non noque rihibi jihuemon, ponte. ¹¹ Noque pontehah tah non bitsayamahi. Pontehah tenequin. Tenehax haxescaax, pon-teboscai, jenimascai.

Noquen Hihbo man nincayamamis hihqui

¹² Jaa copi coshinahue. Meyosma-hax bi mecoschinahue. Maton raboxobo yosmascái bi tacoshcahnahue. ¹³ Ni-hnoxon báhi pontebo hahnahue cojo-canahibo cahax xao rechibo tseqec-ahinyamanon. Tarabehquetaxma man rohacananon.

¹⁴ Jatihibi jonibo sirijaquin yohuanquihnahue. Hohchaya jatima queenyoranahue. Hohchatima queenyamahibaan ta noquen Hihbo jisyamayaxihqui qui. ¹⁵ Noquen Papan

matohon shinanxon mato jihuemahi bi caibo nincayamahax camis hihxon joni huetsa coirannahue. Mato tocan tiroma shinanyahpa jonin mato jahuen shinan hinanah man jaa chibanmis.

¹⁶ Tsiniyamabiresnahue. Esaunen hahni quesa man jamis. Jaan ta huesti coti pinoxon Papan hinantijani jenenishqui, beboquiha baque hihxon jaan bihtih bi. ¹⁷ Jaa pecaho jan jeneni bihribicatsihquin cahen huaohihxon yocaxon bi bihyamascanish. Huetsa hihbomascaxon hahquirihbi bichinti hahtipahyamascaquin.

¹⁸ Mequeman meheti mahchi qui cahen noquen xenibo noconish, janu chihi perehilihqui, cohiman mahpohah yamecahini, hihi bahquisihipi, raqueticahini. Jascapah qui tah man nocoyamahi.

¹⁹ Jaabaan ta corneta rehue corotai nincaxon, Papa yohuanai nincaxon, nincati teneyamascaxon Noque yohipahiyamahue hahcannishqui.

²⁰ Huesti yohina bocabi joxon nea manan mehehiton tah man macaman jaa rehtetih Papan jato jaah cahen raque teneti hahtipahyamacannish. ²¹ Hahqui raqueti jisish ta Hea tah hen hihi raquetai, raquepahhuani tah hen jai hih Moises janishqui.

²² Jascapa mahchi qui tah man nocoyamahi. Man hahqui nocotai ta Papan manan qui, jahuen jati, janu jaan jihuemahi jahuen naihoh queha Jerusalen, janu jahuen yonotibo tsama jai, topontimahi janu jenimahi tsinquiqaquetaibo hichahi. ²³ Naiho jaton janebo huishapaquenixon jaan tsinquiham, janu Papan beboquiha baquebo tsinquitai, janoxon jatihibi jisxon Papan caibo hahxonxon caibo casticanai, janu yamanicabo siribo jai, hahqui tah man nocotai. ²⁴ Noque hahxontijanixon jayaxon Papan noque hahxonscái joni janu jai, Jesus; hahan

sirijati jimi janu jai, Abelnin potani jimi quescayamahi jaa jimi copi Papan noque sirijaquin hahxonai. Jascapah qui tah man nocotai.

²⁵ Jaan mato yohihah, nincaya-mayamanahue: man nincayosmamis. Jaan jato hihti yohihah bi nincacatsi-hyamahibo copi ta cahnexonma Papan noquen xenibo muhuamanishqui. Jaton casticanti jaabaan xahbanjamati hahtipahyamahiya tah non jan naihohxon noque hihti yohihi hashoan sca noquen casticanti non xahbanjamati hahtipahyamahi. ²⁶ Jan jato yohihah ta mai mihuannishqui, xayati. Rahma ta jan yohini quesa sca jatihiqui: Huestijaquin sca tah hen mai res ma bi nai rihbi xayanyaxihqui, hihqui jan yohini joi. ²⁷ Huestijaquin jan hihqui bi ta non rahmajisibo naiyahpa mai queyobahinti yohihiqui, xayayosmabo sca janon. ²⁸ Xayayosma jihuematit noque hinantijanishqui. Jaa copi Hahxon tah min noque jai Papan hahxon, jaan siri jisi quescajaxon, raquetax bi jahan queenxon, jaa yocanahue. ²⁹ Noquen Papa Dios ta queyomanica chihiyahpa qui.

Papa queenai quescajati

13 Maton huetsabohon shinannahue. ² Huetsa janinhax nocotaibo sirijaquin johue hahnahue. Jascajati pishinyamanahue. Jascajanicahxon ta jato qui Papan yonotibo nocotaiya jascapahbohi honanxonma bi caibaan jato sirijaquin bijnicah qui.

³ Hahbe sipojahabo quescaxon sipo xoboho tsahotaibo yanapanti shinan-behnayamanahue. Tiromajahah tenehi joni yanapannahue, hahbe yorayah-paxon copi jato shinanbehnayamaquin.

⁴ Jatihibijaquin maton haibo maton bene sirijaquin jihuequihnahue, jaa huesti betan hihqui, huetsa betan

hihyamabiresi. Tsinihi haibo, tsinihi bebo, jascapa haibobo, jascapa bebobo ta Papan casticanayaxihqui qui.

⁵ Coriqui queenaxma jihuuenahue. Man jai pishca senenscái hihquish jihuuenahue, Papan yohini honanax. Jan yohini ta nesca qui: Mia tah hen jenetimahi. Jahuentianbi tah hen mia potabahintimahi, hihqui. ⁶ Noque yohihi jan jascari yohuanni copi tah non jointi siriscái:

Hea yanapannicah ta heen Hihbo qui. Jaa copi tah hen raqueyamahi. ¿Jahueja hea jatihiquin jonibaan, heen hihbaan hea yanapanaiya?

hih tah non jai.

⁷ Mato Papan joi nincamani shinannahue. Nincacoinnicabohax jenquetsahpabo jaabo jacannishquin hihxon jaabaan hahni quescajaquin hahnahue nincacoinquin. ⁸ Jesus Cristo ta jascabi qui, jan hihni jascabihi, jan rahma hihqui jascabihi, jan hihyaxihqui, jascabihi. ⁹ Mesco joibo yohiquin caibaan mato nincamamis hihxon huetsa joibo bihyamanahue noquen Hihbaana res. Noquen Hihbaan hahxonah tah non noquen shinan coshihi. Nea pihue, jaa piyamahue jaibaan bi tah non jascapa joibaan noquen shinan coshiyamahi. Yanca bi res ta jascapa joibo yohicaniqui.

¹⁰ Noquen hohcha copijaxonnicá tah non noque jai. Jaan hahan copijaxonnicá ta Moisesnin yohini quescajacatsihquiaan pití hahtipahyamahi qui.

¹¹ Jaabaan ta hohcha copijacatsihxon, yohina rehtexon Papan xobo janin jahuen jati chiqueho jaton yohuanxonnicá jaa jimiya caxon, hoque jemama qui sca jaa yohinahbo potaxon mapojacaniqui. ¹² Jascajaquin rihbi ta Jesusen jahuen jiminbi noquen hohcha copijaxonnoxon Jerusalen jemama qui cahax mahuanishqui. ¹³ Jaa copi jano Jesus hihqui janin res canon benahue,

judiobaan jemama qui. Noquen Jesusen teneni quescabijaquin jaa tenexonnahue, caibaan noque tiromajahah bi tenequin.¹⁴ Neno tah non queyoyosma jano jihueta yamahi. Noquena ta jayaxihqui. Jaa caya tah non manatai.¹⁵ Hinamehxon noquen Hihbaan noque jascajaxon hihti hahxonni copi sca jascabijaquin noquen Papa Dios yohnahue, Hahxon tah min noque jai Papan, hahquin. Jascajaquin noquen Hihbaan janen yohinonhue.¹⁶ Maton huetsabo hahxonquin jeneyamanahue. Pishinax yomanhtaibo jaiya jato hinanresnahue. Jascajaquin tah man noquen Papa Dios hahxonai. Jascahiya ta jenimahiqui.

¹⁷ Maton pastorobaan mato Papan joi nincamaha, jato nincquin sirijaxon jan yohihi quescajanahue. Jaabo ta maton coirannicahbo qui, noquen Hihbo hahxonquin. Man jato nincamaquin sirijayamaniquin hah ta Papan jato jayaxihqui. Jaa copi jato nincanahue, jenimahanan mato nincamanon. Man nincayamahiya ta benáxon mato nincamatihqui. Benáxon mato nincamahiboya cahen Papan mato siri jisyamahan.

¹⁸ Hen honanai hen hohcha ta yama bi res qui. Jatihibijaquin tah hen ponte jachtsihquin hean jai. Hea yocaxonnahue, hen hahnon.¹⁹ Hashoan histon sca hen mato janin hihnon, hea yocaxonnahue. Jaa tah hen hihti queenai.

Jato yocaxonquin jahuen quirica queyohi

²⁰ Noquen Papa Dios ta noque siri-jaquin shinanmanicah qui. Jaan ta no-

quen quiquin coirannica teehihmaribinishqui, noquen Hihbo Jesus, hihquipi que bi. Papan ta jahuentianbi queyotimajaquin noque hahxontijanishqui, noquen Hihbaan jimi copi noque hahxontijaquin. Jahuen jimi copi ta jaa noquen quiquin coirannicah qui.²¹ Jatihibi hahxonti coshi Papan mato hinanon tah hen mato yocaxonai, jaa queenai quescajaquin man hahnon. Jahan jaa jenimahibo sca man janon jan maton jointi janin Jesucristo betan teexon mato sirijaxonnon tah hen yocaxonai. Mia tah min Shinan Hihbo qui Hihbon, hihqui non jascabi yohuannon. Jascari rahan.

²² Huishaquin hen mato yohiha nincanahue, hea huetsabaan. Hashoan yohiti hahtipahxon bi tah hen joi tsamanxonma mato yohihahqui.²³ Noquen huetsa Timoteo ta sipo xobohoh queha cainmahipicanaxqui. Man honannon hihxon tah hen mato yohihi. Histon jaa jahuiya tah hen hahbetanbi caxon mato jisi cayaxihqui.

²⁴ Maton pastorobo jatihibi hea yohixonnahue, man jascabi jayamahin hahquin, noquen huetsabo jatihibi rihibi. Neno Italia mai janin jaibaan ta mato qui salud raanihqui nea huishayaxon.

²⁵ Papan shinanya jihuenaheue. Jascari rahan.

SANTIAGO

Santiagonen huishani joi

Jabisnibo qui Santiagon huishahi

1 Hea Santiago tah hen Papan joni hihxon, noquen Hihbo Jesucriston joni hihxon, hen mato jatihibi jabisni judiobo yohihi, man jascabi jayamahin, hahquin.

Papan hinanai shinan

² Mesco tiromabo tenehahnan hihti jenimati shinannahue, hea huetsabon. ³ Mato yosmajacatsihquin maton shinan tanahah bi tenexon man hahan teneti coshi bihtihi honanax jenimanahue. ⁴ Coshinoxon jatihibi shinanya siri janoxon tenequin jeneyamaxahnahue, jahuabi pishinyamascanaxon.

⁵ Shinan pishinxon noquen naihoh queha Papa yocahue. Mia ta hinantihiqui. Yohuashihxonma ta jatihibi joni jaan hinanresiqui, jahua copi min yocacain hihxonma. ⁶ Bihti shinancoinhue. Hinanyama rah ta jatihibi hihxonma yocahue. Hinan ra jaquin, hinanyama ra jaquin hihnicah ta hian behchonihcamahi qui, nihuen xotonquin potajaquehacamahi. ⁷ Jascapa joni hihxon noquen Hihbaan mia hinantihi shinanyamahue. ⁸ Jascapa rabe shinanyahpaton ta shinan mitisahaquiqui, jan hahcatsihqui jatihibi.

⁹ Jahuaborabojomahax siribo Papan mia hinanyaxihqui honanax jenimahue. ¹⁰ Coriquiyahpahax jahuabi min yamacoinal Papan mia jismaha jenimahue, barin hahca huasi joa histon xanahihcamahi miin coriqui queyóyaxihqui honanax jenimahue. ¹¹ Bari queyascaax xana sca jaiya ta huasi xanahihqui. Jahuuen joa reocohti. Siriyamascai. Jascariahbihi ta coriquiyahpa queyotihiqui jahuuen teeboyabi.

Noque tiromajahahbaan bi teneti

¹² Tenehax tah min hahan jenimati jai. Tanahah bi tenehax tah min jihuecointihi, Papan jihuemahah. Hahan shinanaibo cahen Papan jascajaquin hahxontijanish.

¹³ Hohchamaquin tanahah, Papan ta hea hohchamacatsihquin tanahihqui, hihyamahue. Tsoanbi ta Papa Dios hohchamati hahtipahyamahiqui. Jaan rihbi ta tsoabi hohchamajaquin tanayamahihqui. ¹⁴ Miabi queenax tah min hohchacatsihqui, miin queemanbi mia ninihah. Mihmebi paramehtax queenscrai. ¹⁵ Queen sca jaax jascati shinanax hohcha sca jai. Hohchapan sca ta queyoquin noque muhuamahiqui.

¹⁶ Paramehyamanahue, hea huetsabaan. ¹⁷ Non bichi siribo jatihibi ta Papan noque hinanihqui, jaan noque hinanah siribo jatihibi. Xaba Hihbo hihxon ta noque hinanresiqui. Jaan ta huetsa huetsajayamahiqui. Mayáxon bahquisjayamaquin. ¹⁸ Jaabi queenxon ta jahuen hihcoinai join noque jonijahiqui, jahuen beboquiha baquebo quesca noque janon.

Nincacoinaibaan shinancoinai

¹⁹ Haxecoinnahue, hea huetsabaan: histon nincati, honaxonbi yohiti, histon rainyamacahintima haxenahue jatihibi. ²⁰ Sinaxon tah non Papan ponte shinanax quescajahti hahtipahyamahi. ²¹ Jaa copi jatihibi rishtaya yohuan potaxon, bonco huenenjaquin hahcajaquin jatihibi tiromahibon potaxon, shinan man pishinai honanxon, mato qui niahia joi bihnahue, hahan mato tee-hihmahai jahuen joi.

²² Paramehxon nincaresquinma bi jaa joi nincacoinxon hahnahue. ²³ Jaa joi nincaxon bi hahyamaxon tah non espenjen bejisichticamaxon jai quescajahi. ²⁴ Noquen bemanan jisish tah non ca-

resscaxon jenquetsahpa hin hihxon bi shinanbehno sca jai histon res.²⁵ Papan joi coin siri jisish tah non hinabo hihiyamascatihu. Jaa joi jisquin jeneyamaxon nincaxon shinanbehnoxonma bi jan yohihi quescabijaxon jaax tah non hicha hahan jenimati jai, jan yohihi quescabijaquin jaax jenimahi.

²⁶ Papa Dios queenai quescaja tah hen jai hihquish bi noquen janan tiromahi yohuanparihax tah non yanca bi res jaa shinan jai. ²⁷ Papa Dios queenai quescajaquin hahcaibaan ta yononmabo yomanahaiton yanapanxon, papajomabo mamajomabo baquebo yomanahaiton yanapanax, mai mehabaan rishta shinan bichishma jihuetaihqui. Jascapahbo ta Papa Diosen jisí noquen Hihbo queenai quescajahibo qui, hihti siri, tiromayamahi.

Coriquiyahpabo hashoan siri hihqui non shinantimahi

2 Noquen Hihbo Jesucristo ta Nete Hihbo qui. Jaa nincacoinxon coriquiyahpabo hashoan siri hihqui shinanyamanahue, hea huetsabaan.² Man tsinquiaquetai xoboho rah ta oro mehesehtiyahpa siri chopaya joni hihcotihqui. Chopa payoyahpa jahuabijoma joni rihbi rah ta janohihcorihbitihqui.³ Jaa siri chopayahpa jisxon, Neno tsahohihnarohahue, hahxon bi jahuaborajoma joni sca, Janobi niihue hahyamaxon, Taponbi mitsahohhue hah ra tah man jai.⁴ ¿Jascajaxon man mato tocanbi caibo hashoan siri hihqui man jayamahin? ¿Jascajaxon man maton tiroma shinanyahpaxon man joni honanti shinanyamahin?

⁵ Hea nincanahue, hea huetsabaan. ¿Hicha shinanyahpa jaahbo mai meha jahuaborajomabo Papan caisyamanishquin? Papahon shinanaibo jahuen quiquin jihuetahbo janon

ta jaan yohnishqui. ¿Janoxon jan jihuemahi hihbobo hihnon jaan jato caisyamanishquin?⁶ Jahuaborajomabo jahuen jihue hihbobo janon jaan jato cainsi bi tah man jato shinanjomabo quescua jai. ¿Tsoabaan mato maton coriqui bichiniquin? ¿Coriquiyahpaboma hin? ¿Tsoabaan mato demandaniquin? ¿Coriquiyahpaboma hin?⁷ Noquen Hihbo siripan ta mato quenahihqui. ¿Hahqui tsoabo tiromahi yohuanhiquin? ¿Coriquiyahpaboma hin?

⁸ Noquen Hihbaan huishani joi jai quescajahax man jaiya cahen siri. Míabi min shinamehtai jai quescajaquin mihibe jihuetaibohon shinanhue hah cahen janish.⁹ Jascajacatsihquin bi caibo joni hashoan siri hihqui quescajaquin jaax cah man hohchayahpa sca jai, Papan huishamani joi jai quescajayamahax copi.¹⁰ Huesti res noquen Hihbaan joi nincayamahax hohchayahpa sca jai, jatihibi jan yohini nincayamahax quescua sca noquen Hihbo qui hohchayahpa sca jai.¹¹ Tsiniyamanahue hah noque jaxon ta Joni huetsa rehteyamanahue noque jaribinishqui, noquen Hihbaan. Jaa huestichin rabebi joi yohiquin. Mian cah min tsinixonma bi joni huetsa rehtehan. Hohchayahpa sca tah min jatihi, noquen Hihbo qui hohchati. Jatihibi jan yohini quescabijaxon bi huesti jan yohini nincayamahax tah min hahqui hohchayahpa sca jai, nincayamahax.¹² Hahan jan noque hinaboma sca hihmahí jahuen joi nincacax non jihuetai ta Papan jisiqui. Siri hin tiroma quin hihxon ta noque yohiyaxihqui. Jaa copi yohuani coiramenahue. Jihuetai coiramenahue jan yohihi quescabinoxon.¹³ Huetsa yomanahai bi non hanhan shinanxon hahxonyamahiya ta jascajaxon rihbi Papan noque casticanyaxihqui, siri hin tiroma quin hihxon.

Huetsahon shinanxon hahxonquin tah non noquen casticanti xahbanjamahi.

Nincacoinaibaan hahxonti jai

¹⁴ ¿Hen tah hen hihcoinai shinanai hihxon bi jahuabi hahyamaxon jahua non bihtihin? ¿Jan hihcoinai non shinanai copi res Papan noque hahquiri-hbi teehihmatihquin? ¹⁵ Chopanma ji-huetax piti rihbi yamahax mato janin noque huetsa jaiya, jaa hihiyamahiya noquen choca jascari jaiya cah man yanapanyamahan. ¹⁶ Piti hinanxonma, sahueti hinanxonma, pishinaibo hinanxonma bi man Yora xanahax yanihue, siripax cahue hah man jaah ¿sirithiquin? ¹⁷ Jascarihbibi tah man hihcoinai shinanxon bi yanapanquin hahxonyamahax man jahuabi shinanjoma quescasca jai. Mahuatax quescasca tah man jai.

¹⁸ ¿Mian min noquen Hihbo hihcoinai shinanain? hah ta caibaan jatihibqui. Hean tah hen jato hahxonai. Jahuabi hahxonxonma min hihcoinai shinanai hea jismahue. Jahuabi hahxonxonma min hea jismacatsihqui bi tah hen yanapanquin hahxonquin hean hen hihcoinai shinanai hean mia jismatih min honanon. ¹⁹ Papa Dios ta huesti qui hah rah tah min jai. Huesti coin tah qui, min tah min hihcoinjaquin shinanai. Tiroma yoshinbaan rihbi ta jaa honanihqui. Jaa honanya jaax ta tastahihcanhqui. ²⁰ Noquen Hihbo ta hihcoiniqui hihxon bi joni huetsa hahxonyamahah ta tiroma bi res qui. ¿Hicon nan hihxon min hen mia jismati min queenain, honanman? ²¹ Jishue. Noquen Papa Dios hinanquin ta jahuen baque Isaac janoxon mapojati janin Abrahamen racannishqui, hinanquin mapojanoxon. Papan yohihi quescabija jan jaiya ta Mia tah min siri qui Papan janishqui. ²² Hihcoinai shinanxon jan hahní tah min jisi. Shinanxon jan shinanai quescabijaquin jaan jaiya tah non jahuen shinan honanai.

²³ Jan jascajahiya ta Papan huishani joi quescabi jaresscanishqui, hihcoinai Abrahamen shinanaiton ta siri joni hi-hqui Papan jisnishqui hihqui jaa joi. Mia tah min heen hahberabeti sca qui hah can Papan janish Abraham yohiquin.

²⁴ Jaa copi honannahue: non hihcoinai shinanai copi res ma bi jan yohihi quescabijahi non jaiya ta Mia tah min siri qui hah Papan noque jaiqui. Jaa honannahue. ²⁵ Hahresti haibo Rahabo rihbi ta jascapa shinan siri jaiton Papan siri jisnishqui. Jaton mai jisi jahuibo hihcomaxon ta paxajaxonquin huetsanco jato camanishqui. Jan jato jascajaxonaiya ta siri haibo tah qui hih Papa janishqui. ²⁶ Yoshinjoma yora ta mahuascaiqui. Jascarihbibi ta non shinanai quescabija non jayamahiya noquen shinan mahuatai quescasca qui.

Non tiroma yohuantima

3 Honanmanicahbo hichayamanahue, ¹ hea huetsabon. Honanmanicahbo ta hashoan sirijaquin Papan jisyaxihqui qui non hahnibo siri hin tiroma quin hihxon. ² Jatihixonbi tah non jaamajahi hicha. Hihti shinanyahpaxon pari tah non yohuanquin jaamajayamahi. Jascapahxon pari tah non jatihibijaquin sirijatihi, jaamajayamaquin. ³ Non queenai janin noquen cabacho camanoxon tah non jaton jana janin hahan mayati jare-huinai, jaton mapo mayaxon cabacho yora jatihobi rebibohanno. ⁴ Hani nonti cahen jascarihbibi. Hani nonti que bi cah non nonti chibicai. Coshin nihuen xotonai bi tah non hanitahma chibitin chibicai, non janoo cacatsihquiton. ⁵ Noquen jana jascarihbibi. Hexti pishcahax bi hanibo qui yohuani. ¿Hexti pishca chihi requeman non jahuentihopa chihi perehinnan requenjatihi, hani taxabo maponon? ⁶ Noquen jana ta chihi qui. Nai tana tiromaboya. Noquen yora meha que bi tah non jahan noquen

jointi jatihobi tiromajahi. Hihti tiroma chihin quetejaha quesca ta noque tiromajahihqui, non hahcai jatihobi mapojaquin hahcajaquin noque tiromajaquin.⁷ Jatihibi yohinahbo, hihsabo, nintoniba, hiaman cahibo, jato jatihibi ta jonibaan raejati hahtipahtihqui. Jato raeja sca ta jacanishqui. ⁸ Jonin jana ta jascayamahihqui. Noquen jana tah non tsoanbi raejati hahtipahyamahi. Noquen jana ta tiromahi tantiyamahihqui. Hahan mahuati pahe bochohi. ⁹ Hahan tah non noquen Hihbo sirijaquin yohihi, hahan tah non noquen Papa rihbi sirijaquin yohihi. Hahan rihbi tah non jonibo rihbi tiromajaquin yohihi, Papa Dios quescapahbo jan jato joni-jani que bi. ¹⁰ Jaa jana huesti janinhax ta yohuan siriya yohuan tiromabo cainihqui. Jascajatima ta jaiqui, hea huetsabaan. ¹¹ ¿Huesti mai quini chicho quehax jene siriya jene cachani bahi-hihquin? ¹² ¿Xebon nohue bohro pama sca bimitihiquin? ¿Huaran nishin xebon nohue sca bimitihiquin? Hihyamahi. Jene jahuini janinhax rihbi ta jene siri bahitimahihqui.

Shinanquin sirijahibo

¹³ ¿Mato tocan tsoabo shinanyahpabo jaiquin? ¿Tsoabo honanbo jaiquin? Jascapahboxon siripi jihuexon sinayos-maxon pishinaibo min hahxoncoinai jismahue. ¹⁴ Caibo qui yohuanax notsi not-sihax sina sinatax, Shinanya ta hen qui, hihyamahue. Quesayamahue. Shinancoin tah min yamahi. ¹⁵ Jascapa shinan ta Papan hinanahma qui. Jascapa ta mai meha qui, Dios Yoshimanama bi tiroma yoshimanah. ¹⁶ Notsi notsiti shinanboya queemehtax jaa huesti hihbocatsihqui shinan jano jaiton ta rehtenanti jatihiqui. Jatihibi tiromabo rihbi ta jano jatihiqui. ¹⁷ Naihoh quehax jahui shinanbihxon tah non hohchatima shinanscrai. Rainyamatima rihbi, honax-

onbi yohiti, caibaan yohihah nincati, hihti yanapanti, caibo hahxoncointi, caibo res hahxonpan jatima, hihcoinicamatima. Jascapahbo ta naihoh queha shinan jaiqui. ¹⁸ Rainyamatima rihbi, jato tantimanicahten ta sina tantimahiqui, bimi banaquin hahcabonaquin siri-jaquin yohibonaquin.

Mai meha shinanya non jatimahi

4 ¿Jahua copi man caibo rehtenanain? ¿Jahua copi man join bahchinnanain? Man jahuaborabo bichincatsihqui copi, man tsinicatsihqui copi, jahuabora man hihbocatsihqui copi, jascapahbohax tah man rehtenanai. ² Costancatsihquin tah man hihti queenax bi man yamahi. Yamaxon tah man rehtehi. Caibaana jenipahixon bi tah man bihcasquimahi. Bihcasquimahax tah man rehtenanscrai, bahchinnanscrai. Papa Dios yocayamahax copi tah man yamahi. ³ Yocaxon bi tah man bihyamahi, jaamajaquin yocaxon copi. Matonbi noitahnoxon res tah man yocacai. Nohuejacatsihxon, hihbocatsihxon rihbi tah man yocacai. ⁴ ¡Tsinibon! ¿Mai mehabaan shinanai quescati ta Papan rahuiti qui, man honanyamahin? Mai mehabo quescia japan hihquish tah man Papan rahuibo sca qui. ⁵ Nea huishani joi ta jaiqui. Noque chicho jan jihuemahi jahuen yoshinphon ta hihti jenipahichihqui hihqui. ⁶ Yanca res jaa joi jai shinan man Jain? ⁶ Yanca res ma, rahan. Noque ta yanapaniqui hicha. Jaa copi ta nea huishani joi jaiqui: Jaton shinan pishinyamahi shinanaibo pantexon bi ta jaton shinan pishinai honanaibo Papan yanapaniqui. ⁷ Jaa copi noquen naihoh queha Papan yohihi quescanahue. Tiroma yoshin tenenahue. Man tenehiya ta mato janinhax jabascatihqui. ⁸ Papa Dios pataxnahue.

Jaatian ta jaan rihbi mato pataxtihiqui. Maton mequen rishta potanahue, hohchayahpabon. Maton jointi rishta potanahue, rabe shinanyahpabon.⁹ Huiniscanahue. Huaohihscanahue. Jiihihscanahue. Bitsapahonish bi benascanahue. Coincoinpahonixon bi masa shinanscanahue.¹⁰ Papa bebon man shinan hihti pishinai honannahue, jaan mato hicha shinanya hueniyaxahn.

Noquen huetsa qui tiromahi yohuantima

¹¹ Joni huetsa qui tiromahi yohuanyamanahue, hea huetsabaan. Noquen huetsa qui tiromahi yohuanai tah min noquen Hihbaan joi qui tiromahi yohuanai. Noquen huetsa jisquin Jaa ta tiroma qui hihnicahax tah min noquen Hihbaan joi yohihi Jaa ta joi tiroma qui hihnicah qui. Jascajaquin tah min noquen Hihbaan yohihi quescajayosma qui, jahuen joi qui tiromahi yohuanai.¹² Noquen nincati joi hinannica ta huesti res qui. Noque jisxon Tiromayamahax siri quin hahxon jisnicah ta jaa huesti rihbi qui. Jaan ta noque teehihmati hahtipahiqui. Noque queyoti rihbi ta hahtipahiqui. ¿Jahuaxon sca min miin huetsa jisxon tiromayamahax siri quin hah min jatihin?

Non janoxihquibo non honanyamahi

¹³ Caibo tah man nescari yohuanai: Rahma cayamahax tah non bahquish hoa jeman catihi, huesti bari janoxon maroxon maromaxon tah non coriqui tsamantihu hih tah man jai. Hen mato yohinon hea nincanahue, hea huetsabaan.¹⁴ ¿Jahua bahquish jatihquin? ¿Jahua mato huinotihquin? Man tah man honanyamahi. Nete coro quescapahbo tah man qui, basima tahni hihquish yamacahinscrai,

jihueyamascai.¹⁵ Man yohuanai quescahaxma jihuenahue: Noquen Hihbo queenaiya tah non jihuethi, hihnahue. Jaa queenaiya tah non nescajatihi, hihnahue. Jaa queenaiya tah non jascajatihi, hihnahue.¹⁶ Jascajayamaquin tah man honanquin hahcajahi yohuanai.¹⁷ Hohmis hohmisaibo yanapanti honanxon bi hahyamahax tah man hohchascái, hahxonyamahax.

Coriquiyahpabo yohiti

5 Mato sca, coriquiyahpabon. Huaohihnahue. Tiromabo mato qui nocoti jahui honanax saisaihiahue.² Maton jahuequibo ta payoscaiqui, maton chopabo ta mahsaman piha tiromascaiqui.³ Maton coriqui ta hanitahmaboya hanibо pohiscaciqui. Jaton pohi ta mato qui chanicoinali joi quescapah qui. Hahan ta chihin queyohahcamahi maton yora queyotihiqui.⁴ Netebo queyotaiya pishinmis hihxon tah man coriqui tsinqui tsinquihi. Maton huai horoxonnicahbo man copijaquin pishinmani ta joi quescia qui, saisaihiqui. Maton horoxonnicahbaan noquen Papa yoca yocacah ta nincaquihqui.⁵ Main jihuetax tah man noitahpahoniqui, jatihibiyahpahax. Caibo rehte-hibaan bi tah man pihи yani yaniti jihuepahonihqui.⁶ Ponte joni maton hohcha hihbomaxon tah man jaa bahchnai, jan mato cahnemacatsihnonma bi.

Tenexon Papa yocati

⁷ Hen mato yohihi quescia noquen Hihbo jonon caman mananahue, heen huetsabaan. Bero banahax bimi siri janon caman huai hihbo mana manatai shinannahue. Hoi jomenonon manatipish ta chini rihbi hoi benon manatihqui.⁸ Jascajaribiquin mananahue. Yobacahinnahue. Noquen Hihbo joti ta hochoma qui.⁹ Joni huetsa qui rerer

rerenyamanahue, heen huetsabaan, mato jisxon *¿tiromayamahax siri qui?* hihxon noquen Hihbaan mato casticanyamanon. Jahuen xehqui janin ta nihresscaiqui, jocatsihqui.¹⁰ Papan joi yohinicabaan teneni quescajanahue, hea huetsabaan. Hohmis hohmisxon bi jaabaan teneni quescajanahue.¹¹ Tenequin jeneyamanihbo ta hahan jenimati jaiqui hih tah non jai. Shinannahue. Jooban teneni tah man nincanihqui. Jaa pecaho ta hahxonnicaxon hahan shinannicaxon noquen Hihbaan jaa hihti hahxonnishqui. Jaa tah man honanscrai.

¹² Nea hen mato yohihi ta hihti nincati qui, hea huetsabon. Man hihcoini yohuanai honanahbo jahuabi quenayamanahue. Naihoh queha quenaxonma mai mehabo quenaxonma rihbi honanahbo jahuabi quenayamaquin. Jeenhihcatsihquish jeenhihresnahue. Hihyamahi rahan hihcatsihquish hihyamahi rahan hihresnahue, jahua copi mato casticanti yamanon.

¹³ *¿Min hohmis hohmisain? Papa yocahue. ¿Min jenimahin?* Noquen Hihbo

qui behuahue.¹⁴ *¿Min hisinain?* Pastoro yanapannicahbo quenamahue. Jaabaan sca noquen Hihbaan janen mia xenin besquixon mia yocaxonnon.¹⁵ Shinancoinxon mia yocaxonah tah min hisinax bi rohatihi. Noquen Hihbaan ta mia huenitihiqui. Miin hohcha jaiya ta mia sohuaxonrihbitihiqui.¹⁶ Jaa copi maton hohcha yohinannahue. Man rohascanon yocaxonnannahue. Hohchajomaxon yocaxon tah non hicha hahcai.¹⁷ Elías ta noque quescapa joni hihpanishqui, noquen shinanya. Hoi beyamanon jaan yocacah ta quimisha bari seis hoxne main hoi paqueyamanishqui.¹⁸ Hahquirihbi jan yocacah cahen naihoh quehax hoi quexto paquenish, bimibo jaribiyaxahnnon.

¹⁹ Heen huetsabaan, mato meha huesti bahinma sca cahi quescajaquin Papan joi jenehi bi bahin sca huetsan nihmarihbibiya jaa pontenica siri honannahue.²⁰ Hohchatai joni pontexon bahin sca nihmahi jonin ta jahuen huetsa tee-hihmahihqui, jan mahuaquehana. Hicha hohcha rihbi ta mahpohiqui.

PEDRO

Pedronen raanni joi

Jabisnibo qui Pedronen joi raanai

1 Hea Pedro tah hen Jesucriston raanti joni qui. Jahuen raantixon tah hen huishahi, man jabisnibo qui raannoxxon. Ponto mai janin, Galacia main, Cappadocia main, Asia main, Bitinia main. Man janobo jabisnish Papan baquescaax bi janobo jihuetahbahibo qui tah hen nea raanai. ²Papan ta mato caisnishqui. Mato caisxon ta yohinishqui, Heen baque Jesucristo nincacoinaibo janoxihnahue. Jahuen jimin jan mato chocanon heen baquebo janoxihnahue, hahquin. Jascapahbo man janon ta jahuen yoshin siripan rihbi sca mato jahuen shinan siri hinanihqui.

Jenimahi jihuetai

³Hahxon tah min noque jai Papan hahnahue, noquen Hihbo Jesucriston Papa Dios yohiquin. Noquen hon hihti shinanxon ta behnajaquin noque joniohiqui. Jesucristo hihquipi bi hahquirihbi teehihmaxon ta noque honanmahiqui, noque jihuemanica jihuerehbiscayi non joni behnaxon sca honannon. ⁴Behnaboxon sca tah non queyóyosma siribo sca bihyaxihqui, payoyosmabo. Jascapa tiromayosma siribo ta Papan mato naihoxon bexojaxonihqui. ⁵Man nincacoinaiya ta jahuen coshiyaxon mato coiraniqui. Nete queyó sca jaiya ta jahuen jihue mato jismayaxihquiqui, man janohax queyoyamanox mananon. Rahma jismati siri sca jai bi ta jaatian pari mato jismayaxihquiqui.

⁶Jaa copi jenimanahue. Rahma basima tahni mesco tenetibo jaax bi jenimanahue. ⁷Maton teneti shinan ta oro mentan hashoan hihti copi qui.

Oro hashoan mapojaha queyótihi bi ta chihin jaa tanacaniqui, siri hin hihxon. Jascajaribiquin ta maton shinan tanacaniqui. Tana tanahah bi man nincacoinaiya ta noquen Hihbo jahuiya sca hahqui sirijaquetax yohuanyaxihcanihqui, jaa siri quen, Nete Hihbo quen, Shinan Hihbo quen.

⁸Jaa jisnixonma bi tah man hahan shinanai. Rahma jaa jisxonma bi tah man nincacoinai. Nincacoinax res sca tah man hihti jenimahi. Hihti coin coin sca jai. ⁹Nincacoinax tah man queyoya manox manati sca jai.

¹⁰Papan matohon jascajaquin shinayaxihqui ta jahuen joi yohinicabaan yohinishqui. Jaa huishaxon sca ta jenquetsahaxon Papan noque teehihmatihiquin hihxon shinan shinancanpahonishqui. Jaton quirica jis jisxon bi jisribicanquin. ¹¹Criston yoshinyaxon ta huishaxon yohicannishqui, Cristo tiromajatibo, jaa pecaho hihti shinan hihbo sca jaa hihtihiqui yohicanquin. Dios Yoshiman yohihah bi ta Tsoa jaa quin, jahuentian Papan jascajatihiquin jacanishqui honanyamahax. ¹²Jaatian ta Papan jato honanmanishqui. Jaabo jihuetai tian ma bi man cain sca jaiya pari jan mato hahxonquin jihuematih jato honanmaquin. Chini sca ta naihoxon jahuen Yoshin raannishqui, jayaxon sca jahuen joi siri yohihahbo. Papan mato hahxonai ta jahuen Yoshinyaxon sca mato yohicaniqui. Jan noque hahxonai hihti jiscatsihquish ta jenquetsahpa jatihiquin hihcainhqui Papan yonotibo.

Non ponte res jihuetai jai

¹³Jaa copi shinan coshijanahue. Shinancoinnahue, Jesucristo jahuiya noquen Papan matohon shinanxon mato hahxontihi honanquin sirijahax jihuenaahue manati. ¹⁴Jahuen siribaquebonahue. Man honanyamahax tiromabopahoni quescayamascanahue.

¹⁵ Man japhahoni quescayamascanahue, jatihibi ponte res sca. Jaa mato hihbohi quescaribinahue, ponte res. ¹⁶ Hea ponte hihqui quescari tah man mato rihbi pontebo hihihi hih ta Papan huishani joi jaiqui. Jaa copi jascanahue.

¹⁷ Noquen Papan ta jahua copi jahuen shinan huetsajatimaxon jatihibi joni jisiqui, non hahcai siri hin tiroma quin hihxon. Jaa Papan hahxon, hea casticanpaho hihxon shinanquin sirijahax jihuenahue, hahqui noconoxon caman. ¹⁸ Maton xenibo yanca bi res japhahoni quescabih tah man janiqui, jato chibani. Man jascapahbo que bi ta Criston mato bijnishqui. Jaan ta oron mato bihyamanishqui, ni coriquinin bi bihyamaquin. Jaan ta queyonicabo hinanquin mato bihyamanishqui. ¹⁹ Jahuen jimin caya ta mato bijnishqui. Jaton hohcha copi mahuanon ta noquen xenibaan hihti siri carnero caispahonishqui, jahuen yora janin jahuabi cahcoya yamahi, jahuenbi jahuabi tiroma yamahi. Siresi. Jascaribibi ta Cristo janishqui, hihti shinanya, jahuabi hohcha yamahi. Jascapahxon ta mato jahuen jiminbi bijnishqui. ²⁰ Naiyahpa mai hahriyamaxon ta Papan jaa muhuayaxihnon yohinishqui. Yohinixon bi ta rahma noquen nete queyoti hochoma sca Papan jaa raannishqui, matohon hihti shinanxon. ²¹ Jaa Cristo nincacoinxon tah man noquen Papa rihbi nincacoinai. Jaa ta Papan hahquiribibi hueninishqui, hihquipi que bi. Jaa huenihhnixon yohiquin, nete hihboscanon. Jaa copi tah man Papa Dios nincaxon jan mato hahxontihi honanrihbibi.

²² Papan joi nincacoinquin tah man maton jointi rishta potasca jai. Noquen huetsabohon shinancoinpan hihnicabo sca janahue. Jascajaxon maton jointi boyaxonbi joni huetsahon shinannahue.

²³ Papan ta mato hahquirihbi jonicascaiqui, mahuanicama bi muhuayosma Papayahpabo sca. Jahuen join mato joniaribiquin. Jaa jahuen joi ta hahan jihueta qui, queyoyamanoxihqui jihueta.

²⁴ Papan huishamani joi jai quesa tah qui:

Jatihibi yorayahpabo ta huasi quescapi qui jaton rajotibo huasi joa quescapi. Huasi ta pehuahihqui, jahuen joa rihbi paqueti.

²⁵ Papan joi ta jascapahma qui: jaa jahuen joi ta queyoyamanox manatihqui

hihqui Papan huishamani joi. Jaa joi ta non mato yohini joi qui.

2 Jaa joi nincacax tiromayamas-canahue. Paranyamascanahue, ni pishcabi. Hahxonquin quesajayamas-canahue, notsi notsihax joni huetsa qui yohuanyamascai. ² Rahma cainipish baquexo xoma jene queenihcamahi hahan haniti joi queennahue, Criston jihuetahb sca hanicananoxon. ³ Matohon jaan hihti shinanai tah man honanquin sirijaribiscrai.

Cristo noquen hahqui xobojati

⁴ Hahqui xobojati jihuibo caisxon tiromabo potaquin hahcajaquin Cristo potanihbo que bi ta siri bi res Papan jaa caisihqui, mohitahpa jihui. Hahquibi sca nocóhahnanahue. ⁵ Mohitahpa hahan jan xobojahi quescapahbo janahue, jahuen xobo sca. Jahuen xobohoxon shinamanicabo jai quescaribibi jahuen joi yohinicabo janahue. Hahan Papa Dios jenimatibo hinanquin hahcajaquin Papa queenai quescajaquin hahxonnahue Jesucristo betan. ⁶ Papan huishamani joi janin ta nea jaiqui:

Jise, heen jonibo tocan tah hen hean caisai jihui nichinhihni sca jai, siri bi res hahqui xobojati siri.

Jaa nincacoinaibo ta tsoanbi
hihtimahmatimahihqui
hihqui jaa joi.⁷ Jaa copi ta jaa hihti
siri qui, man nincacoinaibaan jisi. Nin-
cayosmabo yohihi ta huetsa huishani joi
jaribihiqui:
Xobojahibaan queenyamaxon potani ji-
hui ta hahqui xobojati sca jaiqui
hihqui.⁸ Huetsa rihbi:
Jonibo hahqui joxcorohti jihui tah qui,
hahqui jonibo joxcorohti tobiti jihui
hihqui. Papan joi nincacatsiyamahax
joxcorohtax paquetihcamajaquin jaama-
jaquin. Jaabaan jascajayaxihqui ta Pa-
pan yohnishqui.

Papan baquebo

⁹ Jaabo jascapahbo que bi ta Papan
caisaibo mato qui. Quiquin hapo be-
bonxon yohuanxonnicahbo sca tah man
qui, Papa Dios qui jonibo nocomanoxon.
Papan jonibo sca tah man qui, jahuen
baquecoinbo sca. Bahquish chian man ji-
huetai bi ta mato quenanishqui, jahuen
siri xabapan man jihuemon. Noque ta
sirijaquin hahxonihqui, hih man janon
yohihi.¹⁰ Jahuama hihpahonish bi tah
man Papan baqueboscai. Mato bihya-
manixon bi ta rahma Papan mato siri-
jaquin sca bichiqui.

Papan shinanya non jihueti jai

¹¹ Matohon shinanxon tah hen
mato yohihi: Maton main tah man
jihueyamahi. Mai mehabaan nahuabo
sca tah man qui. Jascapahbohax
tah man mai meha shinanbo man
queentimascai. Jascapa shinaman ta
tiroma yoshiman mato bichiqui, mato
hahbetan hiocatsihquin.¹² Nahua tocan
jihuetaibohax sirijaquin shinanax
jihuenuhue. Jaatian ta mato qui jaabo
tiromahi yohuanax bi noquen Hihbo
jores sca jaiya sca man joni huetsa
yanapanai jisnish, Papa Diosen ta

jato jahuen shinan hinannishqui,
hihyaxihcanihqui.

¹³ Noquen Hihbaan joniboxon jatihibi
hapobo nincanahue.¹⁴ Quiquin hapo ri-
hbi nincaquin. Jaan raanai tinintibo ri-
hbi nincarihbiquin. Tiromajahibo cas-
ticannon ta jaabo raanihqui. Siribo ri-
hbi yohihi, Jaa ta siribo qui jaahbo
hihxon jato raanquin.¹⁵ Honanyama-
hax yohuanresaiboxon bi ta honanma
jonibaan mato shinancoinyabohi jisish
netetihiqui. Jascati ta Papa queenihqui.

¹⁶ Hiná quescapahboma sca janahue.
Hinabo hiyamascaxon bi tah man tiro-
majatimahi. Papan hahxontibo sca ji-
huenuhue.¹⁷ Jatihibi jonibo yohuanqui-
hnxon nincanahue. Noquen huetsaboh-
hon shinannahue, Papa qui tiromati qui
raquexon. Noquen quiquin hapo rihbi
shinannahue.

Criston teneni quescajaquin non netetih

¹⁸ Patoroyahpaxon maton patoronen
yohihah nincanahue, jato shinanquin.
Maton patoro siri jaiya jaa shinanquin
sirijaquin. Tiroma patoro jaiya
shinanrihbiquin.¹⁹ Man siripi jihuetai
bi tiromajaquin shinanaxon caibaan
mato casticana bi noquen Papahon
shinanxon man teneresaiya ta Papan
mato siri jisiqui.²⁰ Man tiromahiboya
mato rishqui rishquihahbo ta man
tenehi que bi noquen Papan mato siri
jistimahiqui. Man ponte res jihuetai copi
caibaan sca mato tiromajahah bi man
shinanquin sirijaxon teneresaiya pari
ta Papan mato siri jisiqui.²¹ Matohon
shinanxon ta tiromabo Criston
tenenishqui. Jaan teneni quescajribiti
ta Papan mato yohihihqui.²² Cristo
ta hohchayamanishqui. Jaan ta
jahuentyanbi paranyamanishqui.²³ Tiromajaquin joinjahabo bi joi
bichinyamaquin. Tiromajahahbaan
bi jato tahtijayamaquin. Sirijaquin

shinanxon casticannica noquen Papa jai honanxon jaan teneresquin, Papan jato jisnon. ²⁴Jihuun hueonahbo hueoxon ta jaanbi noquen hohcha bijnishqui, jahuen yora janin. Mahuascaibo hohchayosma hihqui quescapahbo non hohchayamascanon ta jaa mahuanishqui, sirijahibo sca non jihuemon. Jahuen tsehueyaxon ta mato sohuaxon jihuemahiqui. ²⁵Carnerobo quescapahbo tah man janiqui, behnoti. Behnonish bi rahma maton coirannicah qui nocorihbiscai, maton jihuemanicah qui nocoscrai.

Haibo betan bebo jihuetai

3 Jascarjabinahue, haibobon. Maton benen yohihah quescajaquin hahnahue. Jaatian ta caibaan Criston joi nincacatsihyamaxon bi jaton haibo jascaha shinanyahpa sca jisxon nincascatihiqui, jaton haibaan yohihahma bi. ²Man tsiniyamabiresi jihuetai jisxon, man jato nincacai jisxon rihbi ta nincascatihiqui. ³Caibo haibo ta bemacanya res siripihqui, raotiyahpa, hahan tsiniti bohuexetiya, bebobaan jisnon res oro paronohtiya, bebobo queenmati chopyayahpa. Jascapahboyamanahue. ⁴Shinan siri ta maton hahan siriti qui, haibobon. Man sinaxonma bi sirijaquin shinanai, man sirijaquin teneresai, jascaha ta Papan jisi hihti siri qui. Jascaha ta queyoyosma hahan siriti qui. ⁵Jascapah ta Papahon shinanai haibobo japhonishqui, Papa hihcoinai shinanai haibobo. Jaton benen yohihah nincacanquin. ⁶Saran ta jahuen bene Abraham nincanishqui, jaa quenaquin Hihbon hahquin. Caibaan mato raquejacatsihqui bi tah man raqueyamanahax jihuecoinax Saran baquebo sca qui.

⁷Jascarjabinahue, queeyahpabon. Maton haibohon shinani jihuemonahue. Haibo betan bebo man jihuemon ta Papan mato rabebi jihuemahiqui.

Haibo hashoan coshijoma copi hahan hihti shinannahue. Man Papa yocacaiya jahuatohonbi maton yocati panteyamanon jascajanahue.

Sirijahibaan teneti jai

⁸Mato jatihibi sca tah hen yohihi: huesti shinanya janahue. Hahxonnani. Noquen huetsabohon shinanhahnani. Yanapanhanani. Caibo mentan mia hashoan shinanya hihqui shinanyamaquin. ⁹Caibaan mato tiromajahah bi copiyamanahue, mato tiromajaquin yohihahbaan bi jato copiyamarihbiquin. Copixonma Papa jato yocaxonnahue. Man jato yocaxonti ta Papan yohihiqui, mato shinan siri hinannocon. ¹⁰Papan huishamani joi jai quescari:

Basi jihuecatsihquish siririhbih i jihuecatsihquish tiromahi yohuanyamabiresnahue, tsoabi paranyamanahue.

¹¹Man tiromapahoni jenebahinax ponte sca janahue. Rehtenantima shinan bichish hahan jihuemonahue.

¹²Papan ta pontebo jisiqui. Jaabaan yocacah ta nincaquihqui. Tiromajahibo jaan jascjayamaquin; jato casticanquin hihqui jaa huishani joi.

¹³¿Man sirijati hihti jenipahichaiya tsoan mato casticanhiquin? ¹⁴Man jihuecoinaiya caibaan mato tiromajahi que bi ta Papan mato jaa copi shinan hinanthihiqui. Jato qui raqueyamanahue. Masa shinanyamaquin. ¹⁵Cristo noquen Hihbo jai sirijaquin honannahue, maton jointi janin. Jahua copi min Cristo joi nincacain hahquin yocacaibo jatihibi yohinoxon shinannahue, man jaa copi nincacoinai yohiquin. ¹⁶Shinanquin sirijaxon tah man jato honaxonbi yohitihi. Jihuecoinxon jato yohiquin. Jaatian ta man siripi jihuetai bi tiromahi jihuetai quesa yohuanax mato

qui quesahibo hihtimahscatihiqui.¹⁷ Noquen Papa queenaiya ta non jihuecoinxon tenehah siri qui. Tiromahax hohmis hohmisah ta sirima qui.

¹⁸Cristo rihbi ta hohchayabo copi huesti coti mahuanishqui. Jaa ponte hihquish bi noque pontemabo copi mahuati, noquen Papa qui noque hionoxon. Jahuen yora rehthepibaan bi ta Dios Yoshiman teehihmaha jihuerihbiscaiqui. ¹⁹Dios Yoshiman teehihmaha sca ta mahuanihbo yoshinbo jaan yohitannishqui, Papan xehponihbo. Jato ta joi siri yohinishqui. ²⁰Jaabaan ta Noen jihuelpahoni tian nincayamapahonishqui. Papan jato teneparinon ta Noeman nontjanishqui, hahan sca hicha tahma joni jihuetai piconon. Jenen jato casticanaiya ocho joni res jaa nontin nanetax jihuenci. ²¹Jascarihibihi tah man jenehoh hihquimatanah sca jaa jene copi man jihuerihbihi. Maton yora rishta chocahah copima bi ta Jesucristo noque jihuerihbixona man hohcha yamascai copi jihuerihbihi. Jesucristo copi res sca jihuetai. ²²Jascahue Papan jaah ta Papan yonotibo hihbohax jato yonoxonaibo rihbi hihbohax, coshiyahpabo rihbi hihbohax, naihoh cahax res sca Papa jato jisxoni sca tsahoscainqui.

Papan shinanyaxon non hahxonti jai

4 Yorayahpaxon ta tiromajahahbo Criston tenenishqui. Jan teneni quescajaribiquin shinan coshinahue, tenenoxon. Noquen yora tiromajahah bi tenexon tah non hohchati shinanyamascai. ²Hohchayabo queenai quescajayamahi bi Papa queenai quescajahi jihuetai shinanscaquin. ³Neateman tah man nahuabaan costanai quescajaquin hicha hahpahoniqui. Joni huetsa betan hohchati res tah man jihuelpahonihqui.

Tsiniti shinani res jihuetai. Pahen paheni. Cahtimahti. Coro coroti. Papan joi jenebahini tiromabiresi. Jascatima sca ta jaiqui. ⁴Jato betan man jascabi honanma hihyamascai jisish ta rahtecaniqui. Rahtetax ta mato qui tiromahi yohuancaniqui. ⁵Jato casticanoxon ta noquen Hihbaan jato yocayaxihquiqui: Jahua copi man jascanihquin hahquin. Jihuetaiboya mahuataibo casticannicahxon ta siri hin tiroma quin hihxon jatojisresscainqui, noquen Hihbaan. ⁶Jaa copi ta mahuanihbo rihbi joi siriboa jaan yohinishqui. Jonibo hihqui quescaya yorayahpahax jihuetaiton casticanah hihquibo bi ta Papa hihqui quescaya sca jaton yoshin jihuetai janon hihxon joi siri jato yohinishqui.

⁷Jatihibi queyoti ta nea pishcascaiqui. Jaa copi Papa yocanoxon shinanquin sirijahax jihuenahue. Hahan hihti shinani jihuenahue. ⁸Nea joi ta hashoan hihti nincati qui: Maton huetsabohon shinanquin hahxonquin jeneyamanahue. Joni huetsahon shinanquin hahxonaboya tah non jaton hohcha hicha jai bi jaa shinanyamascai. ⁹Yohuani rerer rerenaxma yanapanhanannahue, hocho quehax jahuibo piti hinanxon, xobo rihbi hinanquin. ¹⁰Papan ta mato shinan hinanpaquehahqui. Papan hinanah mesco shinanyabohax jaa shinaman sca yana panhanannahue. ¹¹Yohiti shinanyahpaxon Papan joi man yohixonai honanxon yohinahue. Yanapanquin hahxonti shinanyahpaxon Papan mato hinanai coshin hahxonannahue. Man hahcái jatihibi tah man Criston joniboxon hahtihi, noquen Papa shinan hihbohi honanahbo. Jaa ta shinan hihbo coin qui, jatihibi joiya. Jaa ta jascabi qui, jahuen shinan queyoyamahi, jahuentianbi jahuen yohuan queyotima.

Papan baqueboxon non teneti jai

¹² Chihin mapojaquin hahcajahabo bi rahteyamanahue, heen huetsabaan. Jas-cap-a tiromabo ta hahan maton shinan tanati qui. Rahteyamanahue. ¹³ Jas-capahbo tah man Cristo tenexonai. Man Cristo tenexonai honanax jenimanahue. Jaatian tah man janibi shinanya jaa jahuiya man hihti jenimatih, coin coinscái. ¹⁴ Man Criston baquebo copi mato sinajahabo bi shinanquin sirijanahue. Papan yoshiman manahah sirijaquin shinanquin, Papan yoshiman mato man-ahiya sirijaquin shinanquin. ¹⁵ Joni rehteti shinan tah man jatimahi, tsoanbi. Tsoanbi tah man yometsohti shinantimahi. Tiromajati shinantimahi. Coro coromamis jatimahi. Jascapaboxonma tenenahue. ¹⁶ Man Criston joni copi mato tiromajahahbaan bi hichtimahya-manahue. Hihtimahpaxma Criston joni-hax siripi jihuenahue, noquen Papa maton hihbo jai honanahbo.

¹⁷ Noque pontecatsihquin ta siri hin tiroma quin hihxon rahma Papan jahuen baquebojisresscäiqui. ¿Noque pari jas-cajaxon, jahuen joi nincayosmabo sca jan jahuentiho tiromajatihiquin? ¹⁸ ¿Siri jonibo queyoquin bi rohajaxon shinanyosma hohchataibo jahuentihoja Papan jatihiquin? ¹⁹ Jaa copi honannahue. Man teneti Papa queenaiya siri res jihuenahue. Noque joniganicahton ta jan yohini quescabijaquin mato hahxonyax-ihquiqui. Jan mato hahbetan jihuemayaxihqui sca honannahue.

Noque huetsabo yohiti joi non jai

5 Jaa copi tah hen mato janin jai pastorobo hen hihti yohihi, hahbe pastoroxon. Tiromajahahbaan bi Criston tenehi jisnixon, jan Papan jihuemayaxihqui janin hea rihbi hihtihihxon rihbi, mato hihti yohiquin. ² Papan mato coiranmahi jahuen

baquebo coirannahue. Yonohahma bi queenxon res coiranquin, Papa queenai quescajaquin. Coriquibihnoxonma bi hihti hahxoncatsihquin jato coiranquin. ³ Jato yononicaxonma bi man jihuetai quescajapi jaahbo hihxon Papan baquebo coirannahue. ⁴ Noquen quiquin coirannica joxon sca ta mato queyoyosma xababo hinanyaxihquiqui.

⁵ Chini baquebo sca tah hen yohihi: Maton pastorobo nincannahue. Caibo hi-hqui quescajapi man mato rihbi shinan pishinai honanax shinanhahnannahue jatihibi sca. Shinanya tah hen qui hi-hqui bo pantexon bi ta jaton shinan pishinai honanaibo Papan jahuen shinan hinanahue. ⁶ Jaa copi jan mato coshin mehemis hihxon man pishincoinai honannahue, hihti shinancoinya sca jan mato hueniyaxahn. ⁷ Man hahan masa shinanai jatihibi jaa yocanahue. Mato-hon ta shinanahue.

⁸ Pahenaxma coirameti jihuenahue. Maton sinatah yoshin ta hino notsihihcamahi nichiqui, tsoa sca pipan hihqui. ⁹ Jaan mato tiromamacatsihquiya jahuen shinan bilyamanahue, Cristo jeneyamaquin. Man tenehi quescajaribiqui ta maton huetsabaan rihbi tenehahue. ¹⁰ Man basima tahni jascapa tenehiya ta Papan mato coshijatihiqui. Jaa ta jatihibi shinan hihbo qui. Man Criston jihuetaibohax hahbetan sca jahuen shinanya man jascabi sca jihueyaxihqui hihxon mato quenanixon ta Papanbi mato coshijatihiqui, coshi shinan hinanquin. ¹¹ Jaa ta jascabi Hihbo qui. Jahuentianbi queyotima jahuen yohuan. Jascari rahan.

Hahan quirica queyoti

¹² Silvano ta noquen huetsa siri qui, hean shinanah. Hahbetan tah hen nea quirica pishca mato qui raanai. Papan

shinanai joi coin mato sirijaquin yohi-noxon tah hen huishahi. Papan shinanai quescabijanahue.

¹³Babilonia jema janinhah noquen huetsabaan ta Papan caisaiboribixon mato qui joi raanihqui, Man jascabi jayamahin hahquin. Heen baque

Marcosnen rihbi ta mato qui jascajaquin joi raanihqui. ¹⁴Noquen huetsabo behchinani hicocananannahue, jatohon shinani.

Mato Cristonahbo jatihibi man jointi sirinon hihxon tah hen Papa yocacai.

2 PEDRO

Pedronen raanni joi, jahuen rabe coti

Noquen huetsabo qui

Pedronen raanai

1 Hea Simon Pedro tah hen Jesucriston raanti jonixon jahuen yonoti rihbi hihxon mato qui nea joi raanai. Mato man hehbe shinancoinaibo qui tah hen raanai. Noque teehihmanica Jesucriston ta ponte hihxon noque jahuen shinanyahpabo sca noque jisiqui. Papan rihbi ta noque jascajaxonihqui.² Noquen Papa honanbonaxon noquen Hihbo Jesus rihbi honanbonaxon jahuen shinan bihbonahue. Hahan jointi sirijaqueti shinan bihbonaquin.

Papan hinanai shinanbo

³ Jahuen coshi shinanyaxon ta noquen Hihbaan noque hahan jihueto jatihibi hinansciqui. Jahuen hihti siri shinanyahpaxon cahen noque yohiquin, jahuen baquebo non janon jahuen hihti coshi shinanyaxon noque yohiquin. Jaa noquen Hihbo non honanaiton ta noque jatihibi hahan jihueto hinanbonahiqui. Noquen Papahon shinanti noque hinanquin.⁴ Jahuen coshi shinaman ta hihti siri joibo noque yohinishqui, jan noque hahxontiboo honanxon tah man jayaxon coshixon tenetihi, neno main jai rishta shinanbo mato qui mahnejaqueyamanon. Jaton shinanbo ta tiromabo qui, tiromati queenaibo quen. Jascapa bihxonma tah man Papan shinan bhtihi, jan noque yohihi nincaxon.⁵ Jascapa rishtajomabonoxon sca nincacoinnixon ponte hihti shinanbo sca bihnahue. Ponte jihueto shinanxon honanbo sca janoxon honanti shinan bi-

hbonanahue.⁶ Honanti shinanbo bihbonaxon jatihibi qui coirameti shinan sca bihnahue. Jascapa shinanbo bihxon shinanquin sirijahanan teneti shinan sca bihnahue. Jascapa bihxon sca Papan shinanai quescajatibo sca bihnahue.⁷ Jascapa bihxon sca noquen huetsabo yanapanti shinanbo bihnahue. Jascapa bihxon sca joni huetsahon shinanti shinanbo sca bihnahue.

⁸ Jascapa shinanbo hicha jaax tah man noquen Hihbo betan nichish yosmabotimahi, jahuabi hahyamahiboma.⁹ Jascapa shinanjomabo ta benchebo qui. Hocco jisyamaquin hahcajaquin ta jaabo hohchanibo Papan jato sohuaxonai shinanbehnoscacaniqui.¹⁰ Jahuenahbo sca man janon Papan mato yohini honanquin sirjanoxon sca hihti nincanahue, hea huetsabaan. Jascajahax tah man jahuentianbi tiromatimahi.¹¹ Jaatian sca tah man siri bi res noquen Hihbo Jesucristo qui catihi. Noque jihuemanicahaton mato jano jascabi sca jihuemayaxihqui janin tah man siri bi res hahqui nocotithi.

¹² Jaa copi tah hen jascabijaquin mato jascapa jati shinamacatsihqui. Man jascapa jati honanscái bi tah hen shinanmahi, man Papan joi texe honanscái bi.¹³ Jihuetahxon tah hen shinanmaquin mato siriti queenmatihi. Jascajati ta jaiqui, hean jisí.¹⁴ Noquen Hihbo Jesucristonen hea yohini quescabihia hea muhati nea pishca jaonahi tah hen honanai. Jaa honanxon tah hen mato shinanmahi.¹⁵ Shinan siribo bihti man shinanbehnoyamanon hihxon tah hen huishaxon mato yohihi, hea muhausca jaiya man jaa joi shinanyaxahnon.

Criston coshi jisnibo

¹⁶ Noquen Hihbo Jesucriston coshi mato jismaxon tah non jaa joribiyaxihqui mato yohiniqui. Jasca coin ta jaiqui hihxon tah non honanquin sir-

ijahi. Jahuen xaba jisnixon tah non mato yohiniqui. Paranyamabiresquin. ¹⁷ Jaa hihti shinanya jai noque jismahahnan ta xaba coin janinhax Papa hahqui yohuanishqui: Nea ta heen hahan hen queenai heen baque qui. Hahan tah hen hihti jenimahi, hihqui. ¹⁸ Jaa tah non naihoh quehax yohuanai nincaniqui, noquen Hihbo betan Papan manan manixon nincaquin.

¹⁹ Jaa copi tah non Papan joi yohinacabaan huishani joibo hashoan siri jaquin sca honanai. Yame chian hahan xabajati quesca tah qui. Jaa joi jisquin sirijanhue, maton jointi janin xaba paquenon caman. Jointinin honan-coinnoxon caman jisquin sirijanhue. ²⁰ Papan huishani joi jisquin bi nea pari honannahue: Papan huishani joi jisquin tah min mia huestichin shinanxon jan yohihi mian honanquin sirijatimahi. Papan yoshinyaxon pari. ²¹ Hahmebi shinanxon ta jonibaan jaa joi huishayamanishqui. Dios Yoshiman shinanmaha ta Papan joi huishacannishqui.

Quesa honanmahibo

(Jud 4:13)

2 Papan joi yohihilcamahibo ta jonibocan janishqui, mato tocan honanmahicamahibo jaresscatihi quescari. Jonexon ta jaamajaquin yohiyaxihsaniqui, hahan shinan tiromati joibo. Noquen Hihbaan jato hohcha copijaxonni que bi ta jaa yohihi Heen jahuama tah qui jaticaniqui. Jascabibo ta histon bi res Papan tiromajabahintihqui. ² Tiromahi hihresaiboya ta jaabo hihqui quescari caibo rihbi hicha jatihiqui. Jas caraiboya ta Papan joi qui caibo rihbi tiromahi yohuanyaxihsaniqui. ³ Maton coriqui bichincatsihqui ta quesa quescayaxihsaniqui. Mato paran parancuin. Jascaraibo ta Papan jato casticanyanoxon jato jisquin sirijascaiqui. Hahan jato queyoti ta jaresscaiqui.

⁴ Jahuen yonotibo tiromahiton ta Papan jato cahneyamanishqui. Hihti yame chian ta jato potanishqui, quinihuán neminiho jato xehpoquin, jato casticanti nete noconon caman. ⁵ Neate-man jihuepahonihbo rihbi ta Papan cahneyamanishqui. Ponte res jihueta yohinica Noen huesti, siete joniboya jaan xahbanjamaquin. Jene mai mah-pomaxon ta texe nincayosmabo rehtenishqui. ⁶ Sodoma betan Gomorra jema rabe rihbi queyocahinscanon ta jato mapojanishqui. Nincayosmabaan honannon hihxon jato queyoquin. ⁷ Jano siri jihuepahoni Loto huesti ta Papan xahbanjamanishqui. Nincayosma tiromabó hihti tiromahi jisish ta Loto rahte rahtenishqui. ⁸ Jaa sirihax bi jato tocan jihuexon, jaabaan hahcai jisxon nincaxon nete tihibi jahuen jointinin tiromajaquin shinanscaquin, hihti tiromahiboya. ⁹ Jascapa tiromabó casticanquin bi ta siribo xahbanjamati Papan honaniqui. Tiromabó casticanti nete noconon caman hahan jato casticanti Papan bexojaxonai honannahue.

¹⁰ Jaton tiroma shinaman tiromahi hohchati hihresaibo ta hashoan sca jaan casticanyaxihsaniqui. Jaabaan ta jaton hapobo jistahihmahihqui. Shinanquin sirijahaxma ta hihrescaniqui. Papan coshi yonotibo japhaboni ta hichá hichacaniqui. ¹¹ Hihti coshiyahpaxon, hihti shinanyaxon que bi ta Papan yonotibaan bocabi tiroma joi yohiquin jato caheyamahiqui, Papa bebonxon jato yohiquin.

¹² Hoa hihresaibo ta jascayamahihqui. Honanma yohinahbo quescapahbo tah qui, bihxon rehteti yohina quescapahbo. Jaabaan honanyamahi joiboya tiromahi yohuancani. Jaaboyabi ta texe Papan queyobahinyaxihsaniqui. ¹³ Tiromabojani quen ta Papan jato tiromajarihbixihsaniqui. Bariyahpan bocabi ta hihtimahpaxma

tiromacanihqui. Jascapah ta rishta jaromabo qui. Tiromajati jenipahixon ta mato betanbi picanihqui.

¹⁴ Haibo betan hihrescatsihxon ta habobo jiscaniqui. Hashoan res tiromacat-sihquibo. Shinanjomabo paranmisbo. Coriqui bichinquin tsamancatsihquish jaa shinanya nichibo. Tiroma yoshiman baquebo. ¹⁵ Ponte bahi potabahinax ta bahimma sca bocanihqui. Beornen baque Balaam sca ta chibancaniqui, jan tiro-majaquin coriqui canancatsihqui hihni quescari. ¹⁶ Balaam tiromahiya ta Papan pontequin yohinishqui. Yohinoxon ta yohuanyosma caballo yohuanman-ishqui, jonin join yohuanxon jaa tehque-hihqui yohinica pontenon.

¹⁷ Hoa hihresaibo ta texpa tarax-ihcama jaibo qui. Nihuen hueranai nete coro quescapah. Bahquishihpah-huan yame chian jato potayahnoxon ta jascapa yamepahhuan Papan bexo-jascanishqui. ¹⁸ Honanihcamaanax ta honanma joibo coshin yohuancaniqui. Jaamajahi bi rohataibo sca ta jaton yohuan-man paranxon haiboya hihresti jato shinanmacaniqui. ¹⁹ Tiroma yoshiman hinábohax bi ta Hináboma sca tah man jatihi, hihcanihqui quesahi. Hihbo-jani joni ta hiná qui, hihbojaha copi. ²⁰ Noque teehihmanica noquen Hihbo honanxon ta mai mehabaan rishtabo bi-hquin bi caibaan rohjacanihqui. Jaatian sca ta jaa rishtabo bihribiha, hahan hihbojaribiha, jaabo hihmenohi mentan hashoan tiroma sca jaticaniqui. ²¹ Papan joi siri honanyamahah siri que ma bi ta honanxon bi jenebahinah hihti tiro-mascatihqui. ²² Hihcoini yohuani janí quesa ta jaabo jaiqui. Jananxon ta jaabi rihbi hochitinin pihqui. Cochi nashimaha bi ta huaho chian caribi-hiqui, hihqui jaa joi.

Noquen Hihbo joti nete

3 Neayanish ta rabe sca hen mato qui raanai quirica qui, heen huetsabaan. Rabebichin tah hen mato shinanmahi, man shinanquin sirijanom. ² Papan joi yohinicabaan huishaquin jayaxihqui yohini joi shinannahue. Noque teehihmanica noquen Hihbaan raantiboxon non mato yohini joi rihbi shinanquin sirijanahue.

³ Nea pari honannahue: nete queyoti nea pishca sca jaiya ta hosanmisbo jotihi qui. Tiromati jenipahixon ta mato hosan hosanyaxihcanihqui. ⁴ ¿Jan joribiyaxihqui jan yohini cahran? Noquen xenibo mahuani tian ta rahma caman jatihibi jascabi jaiqui, Diosen jato jonijani quescapahbo, hih ta jayaxihcanihqui. ⁵ Nea hen mato yohixihqui ta honancatsihyamacaniqui. Jahuen join ta Papan naijanishqui, neateman bi res. Jahuen join rihbi maijaquin, jene chicho quehax cainnon, jene naponbi sca mai janon maijaquin. ⁶ Jahuen join rihbi ta jene mai mahpomanishqui, jaatian jihuetaibo mahuanon. ⁷ Jaa join rihbi ta rahma caman jai naiyahpa mai manamahiqui jato mapojayanoxon. Casticanquin jan nincayos-mabo queyobahinyaxihqui neten caman ta naiyahpa mai manamahiqui.

⁸ Nea shinanbehnoyamanahue, heen huetsabaan. Huesti nete ta huesti mil bari quesa rihbi qui, Papan jisí. Huesti mil bari rihbi huesti nete quesa. ⁹ Jan yohini quescabijaquin ta noquen Hihbaan chiquishbochi bi hahcái caibaan shinanai bi. Matohon shinanih bi ta joriyamahihqui. Tsoabi queyotima bi ta non jatihxionbi noquen shinan ponteti jaa queenihqui.

¹⁰ Yometso sanareneni jahuicamarenen-i ta histon res jaa joti nete nocoyaxihqui. Jaatian ta nai coshin

corotax queyocahinyaxihqui qui. Nai na-man mehabo rihbi mapohi queyocahini. Jonibaan teeboyabi mai mapohi queyocahini.

¹¹ ¿Jaabo jatihibi queyotihi honanxon man siri jihuetai shinanyamahin? ¿Papa shinani jihuetai siribo man jatimahin? ¹² Papan tiromajati nete nocotaiya ta naibo mapojaha queyocahinyaxihqui qui. Maiboya jenebo rihbi mapohi cohincahini. Jaa nete noconon mananahue. Jaa joti manati jihuena hue. ¹³ Jan yohini quescabijaquin tah non nai behna sca bihyaxihqui, mai behna rihbi sca bihquin, jan o tsoabi tiroma yamascai. Jaa tah non manatai.

¹⁴ Jaa manahahnan sca rishtajoma siripi jihuetaibo jan mato merahi jonon, jascari jihuetai hihti shinannahue, hea huetsabaan. ¹⁵ Jahuerohahi ta noquen Hihbo joriyamahiqui, hea hihbohue

hah non janon, hihnahue. Hahan non queenai noquen huetsa Pablonen rihbi ta jascajaquin mato qui joi raannishqui, Papan shinan hinanah. ¹⁶ Raannoxxon huishaxon tihibi ta jascajaquin jaan yohihiqui. Jan yohihiqui ta caibo joi histon honantima qui. Shinanjomabaan ta jaa huisha jisxon bi honanyamaxon jaamajaquin yohihiqui. Texe Papan huishamani joibo jascajaribiquin. Jaa copi ta Papan jato queyoyaxihqui qui.

¹⁷ Hen yohihah tah man honanscrai, heen huetsabaan. Coiramescanahue, jaamajaquin tiromabaan mato paranah man Cristo joi bihquin bi jenebahin jenebahinmis. ¹⁸ Jascapahxonma

bi noquen Hihbaan shinanya hichajabonanahue. Jaa noque teehihmanica Jesucristo hashoan sca honanbonaquin. Jaa ta Nete Hihbo qui hihnahue, rahma, jascabihi sca jascari. Jascari rahan.

1 JUAN

Juaman raanni joi

Hahan jihueti joi

1 Jihuemanican joi mato yohinoxon tah non nea joi huishahi. Jihuemanicah ta janishqui, naiyahpa mai sca ja menonon. Jan jahuem yohuanai sca tah non nincanihqui. Noquen beron rihbi jaa jisquin. Jan hahcaibo noquenbi jisquin. Noquen mequeman rihbi jaa mehequin. ² Jaa jihuemanicah tah non jisniqui. Jisnixon tah non mato yohicoinal. Noquen jihuemanicah ta noquen Papa betan hiquish bi noque janin sca yorayahpa picoti jonishqui. Jaa tah non jisniqui, queyoyamanox jihuemanicah. Mato tah hen yohicoinscrai. ³ Jaan hahnibо jisníxon mato yohicoinxon tah non jaan yohihah non nincani joibo rihbi mato yohicoinal. Man noque betan yohuani jihuenon hihxon tah non yohihi. Noquen Papa betan yohuani tah non jihuecoinai, jahuen baque Jesucristo betan rihbi. ⁴ Shinanquin sirijahax hihti jenimanoxon tah non huishaquin mato yohihi.

Noquen Papa Xaba Hihbo

⁵ Criston ta noque yohinishqui, noquen sca jaa joi rihbi yohinon hihxon. Jaa tah non mato yohihi. Noquen Papa ta Xaba Hihbo qui. Jaa janin ta yame yamahihqui. ⁶ Hahbetan tah non yohuani jihuetai hihanhan bahquish chian jihuetahbax tah non quesa sca jai. Hihcoinyamahi jihuescrai. ⁷ Noquen Papa hihqui quescari xaba chian nichish tah non hahbetan yohuani nihresscrai. Jaatian ta jahuen jimi noque copi potanixon jahuen baque Jesusen noquen hohcha jatihibi sohuaxoniqui.

⁸ Heen hohcha ta yamahihqui hiquish tah non paramehscrai. Noquen jointi janin jahuen joi yamahi. ⁹ Hohcha tah hen jai Papan hih non jaiya ta jaan noquen hohcha noque sohuaxoniqui. Ponte hihxon jan yohihi quescabijaquin noque sohuaxonquin. Noquen rishta jatihibi sohuaxonquin. ¹⁰ Papa ta quesa qui hihnicahax pari tah non Hen tah hen hohchayamanihqui hihtihi, noquen jointi janin jahuen joi yamahiya.

Cristo noquen yohuanxonnicah

2 Man hohchayamanon hihxon tah hen nea huishaquin mato yohihi, heen baquebaan. Non hohchataiya bi ta noquen Papa janin noque yohuanxonnicah jaiqui. Jesucristo ta jaa qui, hohchajoma joni. ² Jaabi hinamehquin ta noquen hohcha copijanishqui. Noquena huestima jatihibichina jaan copijaquin.

³ Jan noque yohihi quescabijanicahax tah non noquen Hihbo tah hen honanai hih non jatihi. ⁴ Jaa tah hen honanai hihxon bi noquen Hihbaan yohihi quescabajamanicah ta quesa qui. Jahuen jointi janin ta Papan joi yamahihqui. ⁵ Noquen Hihbaan noque yohihi quescabijaquin hahcaibo ta noquen Papahon shinancoinnica qui. Jasca coin tah qui. Jascajaquin tah non non hahbetan hihqui non honanai. ⁶ Hahbetan tah hen hihqui hiquish tah non jaa jihuetai hihni quescaribiti jai.

Joi behna

⁷ Nea hen mato yohihi tah hen mato yohimenoyamahi, heen huetsabaan. Mato yohini joi tah hen mato yohirihbihi, mato nincamamenquoquin non mato yohini joibi. Man nincapahoni joi tah qui, man hahnon hihxon non rahma huishahi. ⁸ Jaabi ta behna qui, huishaquin hen mato yohihi. Criston raanai joi behna tah qui, maton rihbi man nincacoinscrai joi.

Bahquishihyama sca ta jatihiqui. Xaba coin ta paquescaiqui.

⁹ Xabapan tah hen jihuetai hihxon bi jaton huetsa jistahihmahibo ta bahquish chian jihuethiqui. ¹⁰ Jaton huetsahon shinanaibo ta xabapan jihuethiqui. Jaa xabapan nichibo ta jahuabi hohcha yamahihqui. ¹¹ Jaton huetsa jistahihmahibo ta bahquish chian jihuethiqui. Yame chian nichi. Jano jaabo cahi honanyamahibo, yamepan jaton bero jistimajabahinah.

¹² Huishaxon tah hen mato yohihi, baquebon, noquen Hihbaan maton hohcha sohuascaibo. ¹³ Huishaxon tah hen mato yohihi, papabon, noquen Hihbo man honanai quen. Jahuabi jariyamanon ta jaa janishqui. Huishaxon tah hen mato yohihi, beronanbon, tiroma yoshin man camahi quen.

Huishaxon tah hen mato yohihahqui, baquebon, noquen Papa man honanscrai quen. ¹⁴ Huishaxon tah hen mato yohihahqui, papabon, jahuabi jariyamanon bi janí noquen Hihbo man honanai quen. Huishaxon tah hen mato yohihahqui, beronanbon, man coshiscrai copi. Papan joi rihbi maton jointi janin jai quen. Tiroma yoshin rihbi man camahi.

¹⁵ Nea mai queenyamanahue. Nea mai mehabo rihbi queenyamanahue. Nea mai queenaibo ta noquen Papa hon queenyamahihqui. ¹⁶ Nea mai meha shinanbo ta Papanahma rahsi qui. Mai mehabaan costanai quescajati, jahuabora jisxon bihti sca, jahuabora hichahax shinanya hihqui shinanti, jascapa shinanbo ta Papanahma bi nea mai mehabo qui. ¹⁷ Nea mai ta queyocahinyaxihqui, jahuen queenboyabi. Jascapa yamacahinyaxihqui bi ta noquen Papa queenai quescajahibo queyoyamanox manatihiqui.

Paramehtaibo betan hihcoinaiibo

¹⁸ Noquen Hihbo joti nete ta jaonahiqui, baquebon. Criston sinatah ta jahuiqui yohihibo tah man nincanihqui. Moa ta jahuen sinatahbo hicha nocohihnascaiqui. Jaa copi ta nete queyoti nea pishcascaiqui non honanai. ¹⁹ Noque janinhax ta bocannishqui noquen huetsabomahax. Noquen huetsabohax ta banequehancannishqui. Noquen huetsaboma rahsihax ta bocannishqui, jascapahbo non honannon.

²⁰ Jaabo jascapahbo bi ta noquen Hihbaan mato caismishqui. Jahuen yoshin siri rihbi mato hinanquin. Jatihibichin tah man honanai. ²¹ Papan joi man honanyamahi copima bi man honanscraiya tah hen huishaxon mato yohihi. Quesa joi ta Papanahma qui. Jaa tah man honanrihbihi.

²² Jesus ta Papan caisai jonima qui hihnicia ta quesa bi res qui. Jascapah ta Criston sinatah qui. Jaa ta noquen Papanama qui, jaa ta jahuen baquema qui, hih ta jahuen rahui jaiqui. ²³ Jesus ta Papan baquema qui hihnicabo ta Papanahma rahsi qui. Jesus ta Papan baque qui hihnicia ta Papan baque rihbi qui.

²⁴ Man nincamenoni joi jascabijaquin bahnahue. Jaa joi maton jointi janin jascabihii jaiya tah man jascabihii Papan baque betan jihuethihi, Papa betan rihbi jascabihii jihuethi. ²⁵ Jaan ta noque yohinishqui, non queyoyamanox jihueyaxihnon.

²⁶ Mato parancatsihquiboya ta hen jascajaquin huishahi. ²⁷ Hen mato yohihibo tah man honanscaax tsoambi mato honanmati pishinyamahi. Jahuen Yoshin siri maton jointi janin hihquinish janobi jaiya tah man honanscrai. Jahuen siri yoshiman sca ta mato jatihibi honanmahiqui. Jaa ta hihcoiniqui, queyayamahi. Jaan mato honanmani quescascajati noquen Hihbo betan janahue.

²⁸Jascabibi sca hahbetan janahue, baquebon. Jaatian ta jan cainquihran-scaiya non shinanquin sirijascathi. Jaa joresscaya tah non jaa bebon nichish hitimahpax jahómaho rabejaquetimahi. ²⁹Ponte jan hihqui honanxon ponte-jaquin hahcaibo jatihibi jahuen baquebo hihqui honanrihbinahue.

Papan baquebo

3 Noquehon hihti queenxon ta Papan noque Heen baquebaan hahquiqui. Jaa coin tah non qui. Noquen Papa honanyamaxon copi ta noque rihbi honanyamacaniqui, Papanahmabaan. ²Rahma tah non Papan baquebo qui, heen huetsabaan. ¿Jenquetsahpabo non jayaxihquin? Noque ta yohiyamaparihiqui. Jaa honanyamaxon bi tah non nea honanai: noque qui jaa cainquihranaiya tah non jaa hihqui quescaribibi noque jatihi. Jan rahma hihqui quescapahbi tah non jaa jisyaxihqui. Jaa copi tah non honanai. ³Jaa jopahinon hih non jaibo jatihibi tah non hinamehtax coirametai, Papanah rahsi, jaa hihqui quescari.

⁴Hohcharesaibo jatihibi ta noquen nincati joi nincayosmabo qui. Hohchati ta nincayamatii qui, jasca rabe. ⁵Noquen hohcha queyohi ta Cristo joni-ihqui. Jaa tah non honanai. Jahuen hohcha ta yama bi res qui. ⁶Hahbetan jihuetaibo ta hohchatii jihueyamahi-hqui. Jatihibi hohchataibaan ta jaa jisyma-nishqui. Jaa honanyamaribiquin. ⁷Mato tsoabi paranmayamanahue, heen baquebaan. Pontejaquin hahcái joni ta ponte joni qui, noquen Hihbo ponte hihqui quescaribibi. ⁸Hohchati jihuetaibo jatihibi ta tiroma yoshimaná qui. Jaa tiroma yoshin ta hohchamenonish, jascabibi hohchatihqui. Tiroma yoshiman hahcái jatihibi queyohi ta Papan baque joni-shqui.

⁹Papan jonijahibo jatihibi ta hohchati jihueyamahihqui, hahan jihuetai Papan hinanah. Behnajaquin Papan jonijahibó tah non tiromati shinani jihueyamascaí. ¹⁰Pontema jihuetaibo ta Papan baqueboma qui. Noquen huetsahon shinanyamahibo jahuen baqueboma ri-hbi. Jaa joi honanxon tah non Papan baquebo honanscái. Tiroma yoshiman baquebo honanrihbiquin.

Joni huetsahon shinanti

¹¹Noquen huetsabohon tah non shinantih. Joi siri nincamenoquin tah man jaa joi rihbi nincanihqui. ¹²Caiman hahni quescajatima tah non noque jai. Tiroma yoshiman baquexon ta jaan jahuen huetsa rehtenishqui. Jahuen huetsa siri hihqui bi ta jaabi tiromaxon jahuen huetsabi rehtenishqui.

¹³Nincayosmabaan mato jistahihmahah bi rahteyamanahue, heen huetsabaan. ¹⁴Noquen

huetsabohon shinanaiboxon tah non noque mahuayaxihquibo hihnish bi jihueyaxihquibo sca non jai non honanai. Noquen huetsahon shinanyamahibo ta mahuayaxihquibo jaiqui. ¹⁵Jaton huetsa jistahihmahibó ta joni rehtemisbo qui. Rehtemisbo ta queyonox manatihqui. Jaa tah man honanscái. ¹⁶Noque jihuena-hixón ta noquen Hihbaan hahrí jato rehtemanishqui, noque paxajahi. Jaan noque jascajaxomi honanxon tah non joni huetsahon shinanti honanrihbiscái. Jihuetaibo hihxon tah non noquen rihbi noquen huetsabo paxajati sca jai, nincayosmabaan noque retehi que bi. ¹⁷¿Jahuaborayahpaxon bi noquen huetsa pishinai jisxon bi non yanapanyamahiya cahran? Jascapahbaan ta noquen Papahon shinanyamahiqui. ¹⁸Join res tah non noquen huetsahon shinantimahi, janan res hahxonti yohiquin. Hahcoinquin

jato hahxonnahue, heen baquebaan, shinancoinxon.

Papa bebon mehax hihtimahtima

¹⁹ Noquen huetsabo hahxoncoinnicaxon tah non Papan baque coin non jai non honantihi. Noquen hohcha jai noquen jointinin honanxon bi tah non noquen Papa yocacatsihxon non masa shinantimahi. ²⁰ Jahuen baque coin non jai honanxon tah non sirijaquin sca shinantihi. Noquen jointinin non hicha tahma res honanai bi ta Papan jatihibi honanihqui. ²¹ Jaan sohuaxona noquen hohcha yamascai noquen jointinin honanax tah non noquen Papa yocati qui hihtimahyama sca jai, heen huetsabaan. ²² Jahua copi hihtimahtima sca jaxon, jan noque yohihi quescabijaquin hahxon, jaa queenai quescajaquin hahxon non yocakah ta non yocacaibo jaan noque hinanscainqui. ²³ Noque ta nincacointi yohihiqui, jahuen baque Jesucristo non nincacoinnon, jan noque yohini quescajaquin non noquen huetsahon shinannon. ²⁴ Jan noque yohini quescajaquin hahcaibo jatihibi ta hahbetan hihquiqui, jaa rihbi jato betan hihqui. Jan noque hinanni jahuen yoshin noque betan hihqui copi tah non noquen Hihbo rihbi noque betan hihqui non honanai.

Dios Yoshin siri betan Papan rahui yoshin

4 Dios Yoshiman ta hea shinanmehaxqui hihquish yohuanaibo bi hihcoinaibo rahsihi shinanyamanahue, heen huetsabaan. Dios Yoshiman jato shinanmahaxquin hihxon jato honanquin sirijanahue. Tiroma Yoshiman shinanmaha yohuanaibo ta hicha jaiqui, jaan raanah. ² Jesus ta Papan raanni joni qui, yorayahpahax ta joresscanishqui hihnic ta Dios

Yoshiman shinanmaha yohuanhqui. Jaa yohuan ta hahan yoshin honantihi qui. ³ Jesus ta jaama qui hihnic ta Dios Yoshiman shinanmahama bi huetsa yoshiman shinanmaha yohuanhqui. Jascapa yoshin ta Criston sinatah qui. Criston sinatah ta jahuiqui chanihibo tah man ninca sca janiqui. Nocotax ta nihniscainqui.

⁴ Mato tah man Papanah qui, heen baquebaan. Tiroma yoshiman shinanmaha yohuanaibo tah man honanai, mato paranpanan. Nincayosmabo betan hihqui yoshin coshihi bi ta mato betan hihqui Dios Yoshin hashoan hiti coshi qui. ⁵ Jaabo ta tiroma yoshiman qui. Jaa copi ta tiroma yoshiman shinanmaha yohuancaniqui. Jaabo yohuanaiya ta tiroma yoshiman jonixon jato nincaribbihqui. ⁶ Noque tah non Papan baquebo qui. Noquen Papa honanaibaan ta noque nincaquihqui non yohuanai. Papanahmabaan ta noque nincayamahihqui. Tsoa nincaquihquin hihxon tah non jato honanscrai, caibo cahen Dios Yoshinyahpabo, caibo cahen tiroma yoshinyahpabo.

Noquen Papa noquehon hihti queeni

⁷ Noquen huetsabohon shinannahue, heen huetsabaan. Jascapa shinan ta Papan hinana shinan qui. Noquen huetsabohon shinanaibo ta Papan baquebo qui. Jascapahbo ta noquen Papa honanaibo qui. ⁸ Noquen huetsabohon shinanyamahibaan ta noquen Papa honanyamabiresihqui. Noquen Papa ta jonihon shinanti hihbo qui. ⁹ Non jaa copi jihuenon hihxon ta jahuen baque jaa huesti Papan raannishqui, yorayahpahax jonon. Jaa raanquin ta jan noquehon shinanai noque honanmanishqui. ¹⁰ Noquen Papahon tah non hihti shinanyamahi. Jaan caya ta noquehon hihti shinanihqui. Noquehon hihti

shinanxon ta jahuen baque raannishqui, noquen hohcha copi mahuati jonon. Jan jascajaquin shinanni ta shinan coin qui.

¹¹ Jascajaquin jan noquehon shinanni quen tah non noquen rihbi shinanhah-nantihi, heen huetsabaan. ¹² Tsoanbi ta noquen Papa jisyamanishqui. Non shinanhananaiya ta noque betanbi noquen Papa hihquiqui. Non sirijaquin noquen huetsahon shinannon ta noque hicha bi res hinanihqui. ¹³ Hahbetan tah non hihqui, jaa rihbi noque betan hihqui. Jahuen Yoshin jan noque hinanni quen tah non jan noque betan hihqui non honanai. ¹⁴ Nai naman jihuetaibo teehihmanica hihnon hihxon ta jahuen baque Papan raannishqui. Jaa jisnixon tah non yohicoincrai. ¹⁵ Jesus ta Papan baque qui hihnicah ta hahbetan noquen Papa hihquiqui, jaa rihbi noquen Papa betan hihqui.

¹⁶ Noquen Papan noquehon shinanai tah non honanai, shinancoinquin. Noquen Papa ta huetsahon shinanti shinan hihbo qui. Jaton huetsahon shinani jihuetaibo ta Papa betan hihquiqui, Papa rihbi jato betan hihqui. ¹⁷ Noquen huetsahon shinanti shinan hicha hinanah tah non jointi siriyaxihqui, hohchayahpabo castican noquen Hihbo jahuiya. Jaa hihqui quescarax tah non jaa bebon mehax sca jointi siriyaxihqui. ¹⁸ Noquen huetsabohon shinanax tah non raquetimascai. Noquen huetsabohon shinancoinquin sirijaquin tah non raque potahi. Noque casticanxihqui shinanax tah non raquetihi. Jascari raque-taibo ta joni huetsahon shinanxon hahxonti pishinihqui.

¹⁹ Noquen Papan noquehon shinanni quen tah non noquen sca jahan shinancoinnishqui. ²⁰ Heen Papahon tah hen shinanai hihxon bi noquen huetsa jistahihmahihquish tah non quesa sca jai. Non jisi noquen huetsahon shinanamanicaxon tah non non jisyamahi

noquen Papahon non shinantimarihibibi. ²¹ Noque ta yohinishqui, Papahon shinanaibaan non noquen huetsahon shinannon.

Mai mehabaan noque hihbojati hahtipahyamahi

5 Jesus ta Papan raanni joni qui. ¹ Jaa jai nincacoinaibo jatihibi ta Papan baquebo qui. Jahuen Papahon shinanaibaan ta jahuen baquehon shinancoinhibiqui. ² Papahon shinanxon jan noque yohini quescajaquin hahxon tah non jahuen baquebon non shinanai non honanrihbihi. ³ Papahon shinancoinquin tah non jan yohihi quescabijaquin hahtihi. Jan noque yohihi ta teema qui. ⁴ Papan baquebo jatihibi ta tiroma yoshin hihbocatsihqui bi hahtipahyamahiqui. Noquen Papa non nincacoinaibo ta noque hihbojacasquimahihqui. Noque hihbojacasquimahiton tah non jahuen yohuan bichinai. ⁵ Jesus noquen Papan baque jai non honancoinai copi ta noque hihboti tiroma yoshiman hahtipahyamahiqui.

Hahan Papan baque honanti

⁶ Jesucristo ta jeneya jimin jonishqui. Jenen res ma. Jenen, jimin rihbi. Jaa copi tah non tsoa Jesus quin hihxon honanai. Dios Yoshiman rihbi ta noque yohihihqui, hihcoinnicaxon. ⁷ Hahan Jesus honanti ta quimisha qui. ⁸ Jahuen Yoshin, jahuen jene, jahuen jimi. Jaa quimisha jatihibichin ta hahan jaa honanti qui. ⁹ Jonibaan yohihah nincaxon tah non noquen Papan noque yohihah hashoan rihbi non nincatihi. Jahuen baque non honannon hihxon ta noque yohicoinnishqui, jaa ta heen baque qui hahquin. ¹⁰ Papan baque nincacoinxon tah non noquen jointinin honancoincrai, Dios Yoshiman honanmaha. Noquen Papa nincayamahi joni ta Quesa ta jaiqui hihquiqui, noquen Papa

yohihi. Jahuen baque non honannon Papan yohihah bi nincayamaxon paranai shinanquin.¹¹ Papan ta yohicoinihqui, jan noque queyoyamanox jihuemahi non honannon hihxon. Jahuen baquen noque jihuemahi non honannon hihxon noque yohicoinquin.¹² Jahuen baque bichish tah non queyoyamascanox manatai. Jahuen baque bihyamahax tah non queyonox manatai.

Quirica queyonoxon jan yohihi

¹³ Maton tah man jahuen baque nincacoinscai. Man queyoyama sca janox manascai man honannon hihxon tah hen mato yohihi.

¹⁴ Noquen Papa nonanscaaix tah non jaa yocati qui hightimahyamahi. Jaa queenai quescapahbo non yocacah ta noque nincaquihqui. Non tah non honanai.¹⁵ Non yocacai tihibi jaan nincacai honanxon tah non non yocacaibo non bihtihi non honanrihbibi.

¹⁶ Hahan mahuatima que bi noquen huetsa hohchatai meraxon tah non Papa

yocaxonquin jaa joni jihuematih. Hahan mahuatima hohchataibo yocaxonquin jato jihuemaquin. Hahan mahuatih hohcha ta jaribihqui. Man jascapa yocaxonti tah hen yohiyamahi.¹⁷ Jatihibi tiroma ta hohcha qui. Hihcax bi hanhan mahuatima hohcha jai.

¹⁸ Papan behnajaquin jonijahibo ta hohcha hohchayamahihqui, Papan baquen jato coiranah. Tiroma yoshiman ta jato mehetimascaiqui. Non tah non honanai.¹⁹ Papan baquebo noque jai tah non honanscái. Nai namán mehabo ta tiroma yoshiman hihbojahiqui.

²⁰ Noquen Papa coin non honannon ta jahuen baque jonishqui, shinan noque hinani. Jaa noquen quiquin Papa betan tah non hihqui. Jahuen baque Jesucristo betan rihbi tah non hihqui. Non tah non honanai. Noquen Papa ta Dios coin qui. Jaan jihuemaha tah non queyoyamanox manascai.²¹ Santobo qui coiramenahue, heen baquebaan.

2 JUAN

Juaman raanni joi, jahuen rabe sca

Noquen huetsahon shinanaibo

1 Pastoro hihxon tah hen mato qui nea quirica raanai, Papan caisai baquebon. Maton baquebo rihbi qui tah hen nea hahxonai. Matohon tah hen shinancoinai. Hea huestichinma bi Papan joi honanaibo rahsichin ta matohon shinancoiniqui. ² Papan joi coin ta noque betan hihquish jascabih sca noque betan hihyaxihqui qui. Jaa copi tah non matohon hihti shinanai. ³ Papan ta noque jahuen shinan hinantihi qui. Noquen jointi rihbi ta sirijabahintihiqui, noquehon shinanxon. Jahuen joi jan yohini quescabijaquin ta noquehon shinanihqui. Jahuen baque Jesucristo betan ta Papan noque jascajaxontihiqui.

⁴ Papan noque yohihi quescabih caibo maton baquebo jihuetaiton merahax tah hen hihti jenimahi. Papan noque yohini quescabija ta jacanihqui. ⁵ Mato tah hen yohiscai, hea huetsabon. Joi behna mato yohiquin hahcajaxonma bi tah hen non nincamenoni joibi hen mato yohihi: Noquen huetsahon shinannahue. ⁶ Noquen Hihbaan noque yohini quescabijaquin hahnicahboxon tah non joni huetsahon shinanscrai. Man nincamenoni

quescabih ta jan noque yohini joi qui, non joni huetsahon shinani jihuenon.

Parannicabo

⁷ Hicha paranmisbo ta nihresscainqui. Jaabo ta Jesucristo ta yorayahpahax jonishqui hihyamahiqui. Jascapahbo ta paranmis qui, Criston sinatahabo. ⁸ Coiramenahue. Maton tee man yohyomis. Jaa yohyoxonma bi noquen Hihbaan mato hinanyaxihqui jatihibi bihyanaxon coiramenahue.

⁹ Criston noque honanmani joiya banexonma bi jaa potabahini caresaibo ta noquen Papajomabo qui. Criston honanmani joiya banetaibo ta noquen Papayahpabo qui, jahuen baqueyahpabo rihbi ta jaabo qui. ¹⁰ Mato qui nocoxon bi jaa joi yohiyamahibo maton xoboho mapemayamanahue. Jascapahbo metsonyamarilbiquin. ¹¹ Jascapahbo metsonxon tah non tiromajati yanapanai.

Jahuen quirica queyonoxon jan yohihi

¹² Hicha hen mato huishaxon yohiti jai bi tah hen quirica raanxon yohiti queenyamahi. Mato qui nocoti caxon mato yohuanquihnxon yohiti tah hen queenai. Jaatian tah hen jenimacointihi.

¹³ Papan caisai maton huetsabaan ta nenoxon mato man jascabi jayamahin, noque huetsabaan, hahquiqui.

3 JUAN

Juaman raanni joi, jahuen quimisha sca

Gayo qui jan siripi yohuanai

1 Pastoro hihxon tah hen mihqui nea joi raanai, heen huetsa Gayon. Mihon tah hen shinancoinai.

² Min siripi jihuemon tah hen mihqui yocaxonai, heen huetsan. Min hisinya manon tah hen yocaribhi, miin shinan coshiscai quescaribhi miin yora jascarihbinon. ³ Neno nocoxon ta noquen huetsabaan hea yohirahsihqui. Min jihuecoinxon sirijaquin shinanxon hahcái hea yohiquin. Papan joi min nincacoinai hea yohicanquin. Jaa nincacax tah hen hihti jenimahipiqui. ⁴ Papan joi heen baquebaan nincacoinai honanax tah hen hihti jenimahi, heen jointiboyabi hihti jenimahi.

⁵ Noquen huetsabo mihqui nocotaiya min jato yanapana ta hihti siri qui, heen huetsan. Min jisnima noquen huetsabo rihbi mihqui nocotaiya yanapana ta siri qui. Jascajacoin tah min jai. ⁶ Min jatohon shinanai ta neno joxon noquen huetsabo rihbi yohihipcanaxqui. Jascapahbo mihqui nocoribhiya jaya cati sca jato hinanrohayaxahnhue, noquen Papa hahxonaibo copi. ⁷ Criston joi yohihi ta bocanihqui. Nincayosmabaan hinanah bi jahuabi bichintima ta shinancaniqui. ⁸ Jaa copi tah non jato hinanti jai, hahbe yohinicabonoxon.

Diótrefes tiromahi jihuetai

⁹ Papahon shinani janos tsinquitaboi qui tah hen quirica raanhohqui.

Hen raanhoh bi ta Diótrefes jato tocan yohuan hihbocatsihxon jato nincamayamahiqui. ¹⁰ Jaa copi tah hen janoxon jan tiromahi hean shinanyaxihqui. Jan hehqui tiroma bi res yohuan yohuanai tah hen jaa shinamayaxihqui. Tiromahi yohuanax bi ta yohuanti res queenyamahihqui. Noquen huetsabo janoxon nocotaibo bi ta jato mapemayamahiqui, janohahbo jaanbi Mapemayamanahue hahxon. Tsinquihinhataiboma qui ta jato camahihqui.

¹¹ Tiromabo jai quescayamahue, heen huetsan. Sirijaquin shinanax jihuehue. Sirijaquin shinanxon hahcaibo ta Papan baquebo qui. Tiromajaquin shinanxon hahcaibaan ta noquen Papa jisyamanishqui.

Demetrio siripi jihuetai

¹² Demetrio qui ta jatihibi siripi yohuanihqui. Jan Papan joiya hihqui ta honantihbiresi qui. Hea rihbi tah hen hahqui siripi yohuanai. Hen yohuani hihcoinai tah min honanrihbihi.

Hahan quirica queyoti

¹³ Hicha mia yohiti shinanax bi tah hen quirica huishaxon yohiti queenyamahi. ¹⁴ Mia jisi tah hen histon cacatsihqui. Jaatian tah hen mihbetan yohuantahi.

¹⁵ Min jointi siripax jihuemon tah hen Papa yocacai. Nenoha noquen huetsabaan ta mihqui joi raanihqui, min jascabibi jayamahin noquen huetsan hahquin. Janoha noquen huetsabo jascajacuin rihbi yohixonhue jatihibi.

JUDAS

Judasen huishani joi

Papan caisaibo qui Judasen joi raanai

1 Jesucriston joni hihxon tah hen hea
1 Judasen nea joi huishaxon mato qui
 raanai, noque huetsabaan. Santiagonen
 huetsa hihxon tah hen mato qui raanai.
 Noquen Papa matohon hihti queenaibo
 tah man qui, Jesucristonen quenaxon
 bexojahabo tah man qui, jahuenah sca.
² Matohon shinanxon Papan mato yana-
 pannon, jahuen shinan siri jan mato
 hicha hinannon, jan matohon hihti siri-
 bojaxonnon, hih tah hen jai.

Quesajaquin yohihibo

(2 P 2.1-17)

³ Noquen Hihbaan noque jihuemahi
 jenquetsahpaquin hihxon mato
 qui huishati shinanrahsihixon bi
 tah hen huetsa joi man hashoan
 pishinaiya jaa huetsa joi huishati hen
 shinanscái, heen huetsabaan. Jaa copi
 tah hen mato hihti yohihi, hahan
 jihueta joi Papan noque huestijaquin
 yohihah bihxon tenexon tsoabi mato
 paranmayamanahue, heen huetsabaan.
⁴ Caibo ta nincayosmahax bi noquen
 huetsahihcamahax mato tocan
 hihquiqui. Jan jato tiromajayaxihqui
 ta neateman Papan huishanishqui.
 Noquen hohcha sohuaxon ta Papan
 noque casticanyamascatihqui, hohchatí
 hihresnonhue hih ta jacanihqui, Papan
 shinanjomahax. Jascajaquin ta Papan
 joi huetsajacanihqui. Jascajaquin rihbi
 ta noquen Hihbo Jesucristo potacaniqui,
 jaa huesti noquen Hihbo que bi.

⁵ Hen mato yohihi jatihibi
 man sirijaquin honanpahonih bi
 tah hen behnajaquin sca mato
 shinamacatsihqui. Egipto mai janin

hohmis hohmisaiton ta noquen
 Hihbaan jahuen jonibo picomanishqui,
 huetsa main jato jihuemanoxon.
 Hiohah bi nincayosmahiton sca ta jato
 mahuamanishqui. ⁶ Papan yonotibaan
 rihbi ta jaton hihboti jenebahini caquin
 jaton jati jenebahinnishqui. Jaabo
 ta Papan xehponishqui, pequetima
 nexá cahen bahquish chian jato
 potapaquenish, jahuen quiquin
 casticanti nete noconon caman jato
 jano bexojaquin. ⁷ Sodoma, Gomorra,
 jano jai jemabo rihbi ta jascanishqui.
 Tsinihax cahen cahco shinanya jaax
 hahbe bebo hihti queenpahonish. Jaton
 tsiste res banetai ta hahan honanti qui,
 nocayosma chihi jato manascai non
 shinanbehnoyamanon.

⁸ Hen yohihah mato janin jaibo ta jas-
 capahbo qui. Namaquen hohchataibo ji-
 shish ta jascacatsi sca jaax jaton yora
 qui bi sca hohchacaniqui. Tsoabi nin-
 cacatsihyamahax ta xabayahpabo qui
 tiromahi yohuanrihbicaniqui. ⁹ Papan
 quiquin yonoti Miguel ta coshiahax bi jas-
 cayamanishqui. Moisesnin yora Satanás-
 nen bichincatsihquiya ta hahbetan join
 hihquinannanxon Satanás hichayaman-
 ishqui. Heen Hihbaan mia netemanon
 hahresquin. ¹⁰ Mato tocan jaibo ta jas-
 cayama qui. Jaabaan honanyamahibo
 ta hichacaniqui. Shinanjoma yohinah-
 boxon hahcajaquin jaibo copi ta Papan
 jato hihti tiromajayaxihqui.

¹¹ Caiman hahní quescapahboja ta
 jacanihqui, Papan hihti cascantibó
 sca, Balaaman hahní quescajaquin
 rihbi ta coriqui queenyoraxon Papan
 jonibo hohchamacaniqui. Coré
 hahní quesca ta nincayosmabohax
 queyocahinyaxihcanihqui. ¹² Man
 pinoxon tsinquitaiya ta rabinxonma
 mato betanbi picanihqui, hahan masati
 sca mato tocan janon. Jaton yora res
 ta jiscanihqui, caibo hahxonquinma.
 Hoiroma nai cohin quescapahbo ta

jaabo qui, nihuen hueranah caresi. Bimiti tian bimiyosma jihuibo quescapahbo tah qui. Jihui xanascai, mexabahinah quescapahbo, jabiyahpa mahuanicabo. ¹³Jaabo ta nihuen potajaquehah hian behchonax bacox potohahtanai quescapahbo qui, jaton hahqui rabinti shinanbo potohi. Huishi paquetai quescapahbo tah qui. Jascabi sca bahquish chian baneti cahi.

¹⁴Adaman chini xohtabo topovah, jahuen siete ta Enoc qui. Jaan ta jascapa tiromabo jayaxihqui yohinishqui, nescajaquin: Jise. Non topontimahi jahuen yonotiboya ta noquen Hihbo jahuiqui. ¹⁵Jatihibi casticani joxon ta nincayosmabo jatihibi jaan yohihiqui, nincayamaxon jaabaan tiromajapahoni jatihibi jato cahepaquequin. Hahqui tiromahi yohuanpahonihbo joi jatihibi ta jato cahepaquehiqui, hihqui. ¹⁶Reren rereni yohuanaiibo tah qui, jahua pishca costanyamahax sinati tiromahi yohuanaiibo, mai mehabaan costanai quescajacatsihquibo coshi pari pahichax yohuani, paranxon coriqui bichinnoxon pari noque sirijaquin yohuanquihnnquin.

Nincacaibo jan hihti yohihi

¹⁷Noquen Hihbo Jesucriston raantibaan yohini joibo shinan-behnoyamanahue, heen huetsabaan. ¹⁸Nete queyoti hochoma ta hosanaibo jayaxihquiqui. Papan costanyamahi shinanbo qui ta hinamehyaxihcanihqui, tiromati queenyorascai. ¹⁹Huetra joibo yohixon ta mato shinan mitisahmacaniqui. Mai meha

shinanyahpabo tah qui, Papan yoshin siri jaton jointi janin yamahi.

²⁰Mato tah man jascatimahi, noque huetsabo coshijanahue, hashoan sca noquen Hihbo nincacoinahbo. Dios Yoshinyaxon noque huetsabo yocaxonnahue. ²¹Papa Dios queenai quesa jihuenaue, matohon queenai quescajaquin jan mato hahxonnon. Noquen Hihbo Jesucristonen matohon shinanxon mato queyoyamanox manamahi jonon caman mananahue.

²²Rabe shinanyabo yanapannahue, shinancoinahbo. ²³Caibo rihbi chihi quiha bihquin hahcajaquin hihti yohinahue, hohchapan jato queyomis hihxon. Caibo rihbi maposcaiton raquexon chihima qui bihbohannahue. Rah-ninti rishta chopra potamaquin hahcajaquin jaton mai meha shinanbo potamanahue, mato qui mahnemis.

Noquen Hihbo jan yocascai

²⁴Papan ta mato tenemati hahtipahiqui, man paqueyamanon. Rishtajoma jaa bebonbi man jahuen xabapan jenimahanan nihnon ta mato bexojati hahtipahiqui. ²⁵Jaa huesti ta Papa Dios qui, noque jihuemanica. Noquen Hihbo Jesucristo betan ta noque jihuemahiqui. Jaa copi tah non Mia tah min xaba hihbo qui, Papan, non jai. Quiquin shinan hihbo tah min qui. Min hihbohi ta jatihibi qui. Min hihboyamahi yamahi. Mia huesti tah min noque yohinica qui. Nete jariyamahi bi tah min jascapa janíqui, rahma jascarihbibi. Jascarihbibi tah min queyoyamanox manatai hih tah non mia yohihi jai, Papan. Jascari rahan.

JAYAXIHQUIBO

Jayaxihquibo Juaman huishani

Jayaxihquibo Jesusen yohihi

1 Jahua janoxihquiquin noquen
jonibo yohihue noquen Papa Diosen
jaah ta Jesucristonen hea yohihipishqui.
Jahuen yonoti hehqui raanxon ta hea
yohihipishqui, hea Juan, jahuen joni.
2 Papan joi jan hea yohihah tah hen
huishaxon mato yohihi. Jismaxon jaan
hea honamahah tah hen Jesucriston
joi mato yohiscai.

3 Janoxihquibo ta neno pishca sca
jaonahiqui. Jaa copi ta nea Papan quir-
ica jisxon caibo sca nincamahax man
hahan jenimati shinan jaresscrai. Nea
hen huishahi joibo nincaquin sirijahax
ta mato nincacaibo rihbi jahan jenimati
jaresscαιqui.

Siete jemabo qui Juaman joi raanai

4 Asia mai janin jihuetai noquen
huetsabo pari tah hen yohihi, jano
siete jemabo jai janin jihuetaibo. Papa
Dios ta rahma jihuetaihqui, neateman
rihbi japahonish bi jascabihi jihuetai.
Hahquirihbi ta jahuiqui. **5** Jahuen
shinan siriya man jihueyamahin?
Jaan hahxonah man sirijaquin
shinanyamahin? Jano jan tsahoxon
yonohi bebonbi ta siete yoshinbo
jaiqui, jahuen hahxonnicabo. Jaabaan
rihbi ta nea quiricayaxon man jascabi
jayamahin mato jaiqui. **6** Jesucriston ta
ponte yohinica qui, Papan joi noque
nincamaxon ponte yohiquin. Jaa pari
ta yamanicahax teehirribinishqui.
Main jai quiquin hapobo jatihibi sca
ta hihbojahiqui. Jaan ta noquehon
shinanxon jahuen jimin noquen hohcha
sohuaxoniqui. Hihboxon ta nea quirica
huishamaxon mato yohihi qui, Man

Papan shinanya jihueyamahin hahquin,

Man siripi jihueyamahin hihxon.

6 Noquen hohcha sohuaxon ta noque
jahuen jihuetaibo hihmahihqui, jahuen
Papa Dios yocanicabo sca non janon.
Hahxon tah min noque jai, Hihbon.
Mia tah min Xaba Hihbo qui hahquin
jascabijahi jihuenaheue. Jascari rahan.

7 Jistahi man. Nai cohiman
ta jahuiqui. Jatihixonbi ta jaa
jisaxyihcanihqui. Jaa naconihbaan rihbi
ta jisaxyihqui qui. Jatihibi mai mehabo
ta hihti benatax huaohihyaxihqui qui.
Jasca ta jayaxihqui qui. Jascari rahan.

8 Hea tah hen jatihibi Hihbo qui, jati-
hibi janon tah hen hean hihmahi, quey-
otahbo tah hen hean queyohi, hih ta no-
quen Hihbo Dios jaiqui. Jascabihi ta jaa
jaiqui, rahma jai, neateman japahoni,
joyaxihqui, jatihibi hihbo.

Cristo Xaba Hihbo Juaman jisi

9 Hea Juan tah hen maton huetsa
nihxon, mato betan tenenica hihxon,
mahbe jihuetai hihxon, mahbe Cristo
tenexonnica hihquish, Patmos janeya
mai tonco pishca janin tsahotai. Pa-
pan joi yohixon raquexonma Jesusen
joi yohiquin sirijahiton ta nea main
hea tsahoncannishqui. Tsoabi hen nin-
camayamascanon hihxon ta hea neno
sipo xoboho tsahoncannishqui. **10** Papa-
hon shinani non tsinquitai neten ta
Dios Yoshin siripan hea hihbojaha na-
maquen hahcajaquin hean nincaquip-
iqui, hehchon coshin yohuanai hean nin-
caquin, corneta rehue coshin corotai
quesca coshin yohuanai.

11 —Min jisibo huishahue, siete jema
janinhahbo qui jaa quirica raannoxxon,
Efeso, Esmirna, Pérgamo, Tiatira, Sardis,
Filadelfia, Laodicea, jaa jemabo janin-
hahbo noquen huetsabo qui raannoxxon
huishahue —hahquin hea.

12 Hea yohihi nincacax, tsoa
yohuanahquin hihquish rabejaquexon

jisí bi siete johue jai, oro johuebo, jaton oro tsahontibo janin tsahotai.¹³ Jaa johue quetehi tocan cahen noquebaque quescapah nichi, tari chaiya, oro cinturon pextiman pishnexehtax jano nichi.¹⁴ Jahuen mapo ta joxo bi res hihquishqui, carnero rani joxojaha hihqui quesca cahen jahuen boo joxo bi res joxo. Chihi perehiihquicamahi jahuen bero.¹⁵ Jahuen tahe cahen bronce quesca, pehneni. Chihin pehnejaha quesca. Jahuen joi cahen coshin yohuani, hani huaca coshin paquetihcamahi.¹⁶ Jahuen mecayaho mequeman xecohah cahen siete huishi jai. Jan yohuanaiya cahen jahuen jana janinhax hoquen behcoin bi quenoya machito bahritan bahritani. Jahuen bemanan cahen xabati, bari coshin xabatihcama.

¹⁷ Jascapa jisish tah hen jaa taracahrenipiqui, muhuatax quesapi. Jahuen mecayaho mequeman hea mehexon sca, hea yohiquin:

—Raqueyamahue. Jatihibi janon tah hen hean jananihqui. Queyonicabo queyonon tah hen heanbi jato queyohi.¹⁸ Jihuena cahen tah hen qui. Hihquipish bi hahquirihbi teehihquish tah hen queyoyamanox manascai, jascabi sca jihueta. Hea ta hen jatihibichin jato queyonica qui. Muhuataibo tah hen jano jascapahbo potaxon hean xehpohi.¹⁹ Min jisibo huishascahue. Rahma jaiboya jayaxihquibo hen mia jismahah huishahue.²⁰ Nea min jisi heen mecayaho mequeman hen siete huishi xecohi tah hen mia yohiparihi. Nea siete oro johuebo rihbi jahua quin tah hen mia yohiscai. Nea siete huishi ta siete yoshin qui, heen yonotibo, hoa siete jema janin jai noquen huetsabo coirannicah, jema tihibichina huesti. Nea siete johuebo ta tsinquitaitaibo qui, tsinquitaitaibo tihibichina huesti.

Efeso jema janin Juaman raanai joi

2 Efeso jema janinha nincacoinaibo coirannicah qui raannoxxon pari nescajaquin huishahue. Jahuen siete oro johue tocan nihnicahxon jahuen mecayaho mequeman siete huishi xecohiton ta mato yohihqui.² Jenquetsahpabo man jihuetain tah hen honanai. Jenques man tee teetain honanxon tah hen jenquetsahaxon man tenehin honanrihbibi. Tiroma jonibo man hihquihinyamarihbibi tah hen honanai. Hea tah hen Papan raanti qui hihquish bi quesahibo tah man tanaxon jato honanscrai.³ Mato tiromajahahbo bi tah man heen joniboxon hea tenexonai. Yobacahinax tah man paxquinyamahi.⁴ Man jascajaxonai bi tah hen nea mato yohihi: man hehon queenmenoni quesbayama sca tah man jai.⁵ Paquerihyamahax man siripi jihuepahoni shinannahue, jascarihbinoxon. Pontejaquin sca shinanxon man hahmenoni quescajanahue. Man hahyamahiya tah hen histon mato qui nocoxon maton johue bichintihi, jahuen tsahonti janin yamascanon. Man pontejaquin shinanyamahiya tah hen mato jascajatihi.⁶ Jaabi tah man nicolaitobaan hahcai rahninai. Hean rihbi tah hen jascapahbo rahninai.⁷ Nincacoinaibaan nea honannon hihquish ta Dios Yoshin yohuanhqui. Hahan nincati pabinquiyahpaxon nincacoinnahue. Mai meha shinanyahpabo tenehax chitihiyamanahue. Man tenehiya tah hen Papan huai janin jai bimi mato pimatih. Hahan jihueta jihui quiha queyoyamanox mananon piti tah hen mato pimatih.

Esmirna jema janin jan raanai

⁸ Esmirna jema janinha nincacoinnicabo coirannicah qui raannoxxon

sca nescajaquin huishahue. Jahuabi jaríyamahi bi janish jatihibi queyotaiya janicah tah hen qui, hihquipish bi hahquirihbi teehihnicahxon tah hen mato yohihi. ⁹Mato tiromajahibo tah hen honanai. Man jahuabi yamahi tah hen honanrihbihi. Jahuaborajomabohax bi tah man hichayahpa qui. Hea tah hen judio qui hihquish bi quesahibo ta mato janin jaiqui, hehqui tiromahi yohuanaibo. Satanasnen tsiniquitaibo ta jaabo qui, henamahbo. ¹⁰Mato tiromajayaxihquibo qui raqueyamanahue. Caibo ta tiroma yoshiman mato sipo xoboho tsahonyaxihquiqui, maton shinan jenquetshpa hin honancatsihquin. Chonca neten tah man tiromabo teneyaxihqui. Mato retehibaan bi tenenahue. Man hea tenexonaiya tah hen mato hahan jihuetai sca hinanyaxihqui, man queyoyamanox mananon. ¹¹Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Mainxon man Cristo tenexonaiya ta mato hahquirihbi mahuamatimahiqui. Quiquin mahuapan sca tiromabo hahquirihbi mahuamaquin bi ta mato hahquirihbi mahuamatimahiqui.

Pérgamo jema janin jan raanai

¹²Pérgamo jema janinha nincacoinaibo coirannicah qui raannoxxon sca nescajaquin huishaxon yohihue: Hoquen behcoin bi quenoya machitoyahpaton ta mato yohihiqui. ¹³Jano man jihuetai tah hen honanai. Janoxon ta Satanasnen jahuenahbo yonohihqui. Jascapa janoo jai bi tah man tenexon hea jenebahinyamahi. Jano Satanas jihuetai bi heen joni Antipasnen jato heen joi sirijaquin yohihiton jaa retehibaan bi tah man heen joi jeneyamahi. ¹⁴Man jascajaquin sirijahi bi tah hen nea costanyamahi:

Balaaman haxemani quescajaquin haxemahibo ta mato tocan jaiqui. Balaaman ta Balac yohinishqui, israeli baquebo jan hohchamanon, yoshin rehtexona piti pihábo, tsinibo rihbi jaábo. ¹⁵Nicolaitobaan ta jascajati yohihihqui. Jascapahbo que bi tah man jato hihquihinai. ¹⁶Maton shinan pontenahue hih ca hen jai sen. Man ponteyamahiya tah hen mato qui histon nocoxon heen jana janin jai machitonen mato hahtihi. ¹⁷Nincacoinaibaan nea honannon hihquish ta Dios Yoshin yohuanihqui. Hahan nincati pabinquiyahpaxon nincacoinnahue. Jaabo mato chitíhíhmayamanahue. Man tenehax chitíhíhymahiya tah hen tsoan honannihma maná piti mato hinanyaxihqui. Macan bero joxoni pishca rihbi tah hen hinanyaxihqui, maton jane behnaya macanbo, tsoanbi jaa jane honanahma, jaa macan bichi huestichin honannon.

Tiatira jema janin jan raanai

¹⁸Tiatira janinha nincacoinaibo coirannicah qui raannoxxon sca nescajaquin huishahue. Papan baquen ta mato yohihihqui. Chihi perehihqui beroyahpaxon, bronce pehneni taheyahpaxon ta jaan mato yohihihqui. ¹⁹Jenquetsahpabo man jihuetain tah hen honanai. Joni huetsahon tah man shinanai. Papan joi tah man nincacoinai. Nincacoinxon tah man hahxonai. Man tah man tenexonai. Man chini hahxonai ta man hahmenoni mentan hashoan hicha qui. ²⁰Man jascajaquin sirijaxonah bi tah hen man mato janin jai haibo tiroma man potayamahi copi hen maton jati costanyamahi. Jaa Jezabel haibo ta Papan joi chanihihcamahi yohuanihqui. Paranxon ta heen jonibo tiromajaquin haxemahiqui. Tsinihahbo hihxon haxemaxon ta

yoshin rehtexona nami piti rihbi jato haxemahiqui.²¹ Miin shinan pontehue hahcax hen manatah bi ta jahuen shinan pontecatsihyamahihqui. Jahuen tsinita ta jenecatsihyamahihqui.²² Hani hisiman ta hen jahuen bachiho jaa potayaxihqui. Hahbetan tsinixon bi shinan ponteyamahiboya tah hen jahuen hahbe tsinihibo rihbi jayabi potayaxihqui.²³ Jahuen baquebo rihbi tah hen mahuamaquin queyobahinyaxihqui. Jaatian ta jatihibi janin tsinquitai nincacoinaibaan honanyaxihquiqui. Noquen Hihbaan ta noquen shinanboya noquen jointibo honanihqui hih ta jayaxihcanihqui. Jasca tah min janiqui hihxon tah hen siribo hahxoncoinquin bi caibo rihbi sca rishquipaqueyaxihqui.²⁴ Man Tiatira janin jaa haibo betan hihyamahiboa sca tah hen yohihi. Jaan haxemahi quescajayahamiboxon, nincanahue. Jaabaan jisi jahuen yohuan hihti honan joi hihqui bi ta Satanasnena qui. Jascapa joi tiroma bihyosmaboxon hean yohihi nincacoinnahue. Mato tah hen jahuabi hashoan joi tsamanyamahi.²⁵ Nea res tah hen mato yohihi: man jai quescabinahue, hen mato qui canon caman. ²⁶Tenexon man queyóxonon caman chitfihxonma man hean yohihi quescabinaqueyaxihqui, maton nahuabo man yonoscanon. ²⁷Chantiyaxon nincamaquin hahcajaquin tah man jato nincamatih. Quentijanicahton quentijaquin jahuen mai quenti tiromahi jisxon hahribinoxon moshabahinai quescajaquin tah man jato hahtih. ²⁸Papan ta hea jascajati yohinishqui. Yamequiri xabanica huishi rihbi tah hen mato hinanpaqueyaxihqui. ²⁹Nincacoinaibaan nea nincanon ta Dios Yoshin yohuanahqui. Hahan nincati pabinquiyahpaxon nincacoinnahue.

Sardis jema janin jan raanai

3 Sardis janinha nincacoinaibo coirannicah qui raannoxxon sca nescajaquin huishahue: Papan siete yonotiyahpa ta yohuanahqui. Jahuen siete huishi xecoxon ta mato yohihihqui. Jenquetsahpabo man jihuetain, hen tah hen honanai. Mohi mohinihcamaahax bi tah man jirijomabo qui, muhauatahbo.² Mohinahue. Mohixon, maton shinan queyocahincatsihqui bi coshicahinnahue, mohitahpabo sca jihuexon. Jihuetai man shinancoinaxma hihresai tah hen mato jisi. Heen Papa Dios bebonxon jisxon tah hen hihresaibo mato jisi. ³Papan mato hahxonni shinanbehnoyamanahue. Jahuen joi jan mato nincamani shinannahue. Shinanbehnoxonma bihquin sirijaxon maton shinan pontenahue. Man mohiyamahiya tah hen yometsoh nocorenenehcamahi mato qui nocorenentihi. ⁴Jahuentian hen mato qui nocotihin? Man tah man honantimabirestihi. ⁴Man Sardis janin jascapahbo hicha hihqui bi ta mato tocan huestibo res jaiqui, jaton tari rishtajayamahiboa. Jaabo caya ta siri chopas joxoni hean sahuemaha sca hehbetan nihyaxihquiqui, siribo copi. ⁵Jascajaquin tenehibo tah hen joxo chopas sahuemayaxihqui. Jihuexonihquibo copi tah hen jaton Jane huishaxon jahuentianbi heen quirica janinha jaton Jane tsecatimahi. Heen Papan nincanon, jahuen yonotibaan rihbi nincanon tah hen Jaa ta hena qui hahxon jaton Jane yohipaqueyaxihqui.⁶ Nincacoinaibaan nea honannon hihquish ta Dios Yoshin yohuanahqui. Hahan nincati pabinquiyahpaxon nincacoinnahue.

Filadelfia jema janin jan raanai

⁷ Filadelfia jema janinha ninca-coinabo coirannicah qui raannoxon sca nescajaquin huishahue. Hihcoinxon ta maton Papan mato yohihiqui. Davidinin jihuetahbbo queyotimajati ta Papan yohnishqui, jato jihuemanicah hinantijaxon. Jaa jihuemanicahxon tah hen johue hahcai. Hean johue hahcaya ta tsoanbi pantetimahihqui. Hean johue hahyamahiya ta tsoanbi hihcomati hahtipahyamaribihiqui.

⁸ Jenquetsahpabo man jihuetain hen tah hen honanai. Mato tah hen bahixonai. Hean bahixona ta tsoanbi xehponti hahtipahyamahiqui. Man hicha tahma res coshi jai honanxon tah hen mato yohihi. Heen joi tah man bihxon jeneyamahi. Hea maton hihbo hihtima tah man jahuentianbi yohiyamanihqui.

⁹ Maton jema janin ta Hea tah hen judio qui Papan baque coin tah hen qui hihquibo jaiqui, quesahibo. Jaabo ta Satanasnen baquebo qui. Jaabo tah hen huetsa shinan hinanyaxihqui, mato qui caxon mato tah man noque mentan hashoan shinanya qui mato jaahbo. Matohon hean shinanai ta jaabaan honanyaxihcanihqui. Man honanon hihxon tah hen mato yohihi.

¹⁰ Tenexonnahue hen mato jaah tah man tenexonniqui. Hean rihbi tah hen mato paxajaxyaxihqui. Jatihibi mai janin jihuetaibo qui tah hen tiromabo paquexayaxihqui. Jato qui tiromabo paquexon bi tah hen mato jaa tiromabo qui paxajaxyaxihqui. ¹¹ Histon tah hen mato qui canoxihqui. Man hahcαι quesajaquin jeneyamaxahnahue, hen mato hinanyaxihquibo tsoanbi mato bichinyamanon. ¹² Hen mato bihnon caman tenexonaibo tah hen heen Papan xoboho jihuemayaxihqui. Siri bi res tah man jano hihyaxihqui. Tsoanbi ta potatimahihqui. Xobo janinhax jahuen

xobo jihui picoyamahi quescari tah man janobi siri bi res Papa Dios betan hihyaxihqui. Mato behuishquin tah hen heen Papa Diosen jane huishayaxihqui, Papa Diosen jeman jane rihbi tah hen mato qui huishayaxihqui, naihohxon Papan mato botomaxonai jahuen Jerusalen jema behna. Heen jane behna rihbi tah hen mato behuishyaxihqui. ¹³ Nincacoinabaan nincanon hihquish ta Dios Yoshin yohuanihqui. Jahan nincati pabinquiyahpaxon jan mato yohihi nincanahue.

Laodicea jema janin jan raanai

¹⁴ Laodicea jema janinha ninca-coinabo coirannicah qui raannoxon sca nescajaquin sca huishahue. Hihcoinxon tah hen mato yohihi. Hen yohihi quescabi ta jatihiqui. Papan hahní jatihibi hihboxon ta hen yohihi.

¹⁵ Jenquetsahpabo man jihuetain hen tah hen mato honanai. Jene yoho quescabai tah man qui. Matsihaxma bi tah man xanayamarihbibi. Matsi hihyamahax man xanapahinon. ¹⁶ Yoho pishca res tah man qui, matsima, xanayamarihbibi. Jaa copi tah hen toshbanhahxon quemo potaquin hahcayaquin mato potatihi. ¹⁷ Noque tah non coriqui hichahi hih tah man jai. Tsama bi res tah non jai, jahuabi tah non pishinyamahi, hih tah man jai. Huaohtihi bi tah man jascarai. Homisbati tah man jai, hihti jahuajomabo, benchebo. Chopanma hihquibo tah man qui.

¹⁸ Chihin tana oro marohi benahue, coriquiyahpanoxon. Chopá joxoni marohi benahue, sahuenoxon, hahqui rabintibo chopanma nichibo hihyamascanoxon. Bero rahon besquínahue, jisti hahtipahnoxon. ¹⁹ Hean costanaibo tah hen hean pontehi. Baque hanijaquin hahcayaquin tah hen jato pontehi. Jaa copi maton

shinan ponteti queenbiresnahue, pontenoxon. ²⁰Maton xehqui janin nihxon tah hen quenahi. Hen quenahi nincaxon man quehpenxonaiya tah hen hihcoxon mato betan pinoxihqui, maton rihbi man hehbetan pinon. ²¹Hen mato bihnon caman man tenehiya tah hen quiquin hapobo sca mato hihmayaxihqui, hehbe quiquin hapobo man hihnon. Tenenixon heen Papa betan hen hihbojahi quescajariquipu tah man tenenixon hehbetan hihbojayaxihqui. ²²Nincacoinaibo honannon hihquish ta Dios Yoshin yohuanahqui. Hahan nincati pabinquiyahpaxon nea jan yohihi nincanahue.

Naihoh quehax betihihpaquetaibo

4 Jaatian sca hen jisí bi nai janin xehqui xecabohanah quehpemehti. Hen nincamenoha joi sca tah hen nincar-ihbihipiqui, corneta rehue coshin hahcái quesa.

—Hinahihnaquihranhue. Janoxi-hquibo sca tah hen mia jismanoxihqui —hea jaquin.

²Jan yohihiya sca cahen heen yoshin hinahihnat. Hinahihnxon jisí bi naihoh sca janoxon yonoti jai, quiquin jati. Hen jisí bi Papa Dios janoxon tsahoti, jahuen janoxon yonoti janin. ³Jahuen jati cahen pehneni, jasper macan pashini hihqui quescari, cornalina macan joshini hihqui quescari. Jano jan hihquiton cahen xabahahtancahuanaí jai, yoshin bahi quescapa, esmeralda macan joshini pehneni hihqui quescapi. ⁴Jahuen quiquin jati mayahahtancahuanaí cahen huetsa tsahotibo jaribihi, veinticuatro tsahoti. Hahan tsahotaibo cahen joxo chopá sahuehax tsahohahtancahuanaí jai, jahuen yonoxonnicahbo. Oro maitiyahpabo rahsi. ⁵Jahuen jati coin janinhax cahen cana bacatan

bacatanihcamahi. Terenihqui, coshin bi res toshiti. Jaa bebon cahen siete johue xabati. Jaa siete johue ta Papan siete yonoti yoshinbo qui. ⁶Hoque jahuen jati bebon rihbi cahen hian quescapa jai, nexnani siri.

Jahuen jati tocan cahen chosco noyanica yoshin quescapahbo jai, jahuen quiquin jati mayahahtancahuanaibo yoshinbo. Bero sahuetaibohi, caibo bero cahen bebo quiri, caibo cahen hahchon quiri, hahan jisti berobo bochohi rahsi. ⁷Bebo quiha yoshin cahen hino quescapah. Jaa hahchon sca cahen toro quescapah. Jaa chini sca cahen jonin bemananyahpa quescapa. Jaton chini sca cahen chiqui noyahí quescapah. ⁸Seis pehiyahpabo rahsi ta jaa noyanica yoshinbo qui. Bemacanya bero sahuenon cahen chicho rihbi bero hichahi. Tantihaxma yohuanbahinahax yohuanшинини:

Hihti shinanya xaba hihbo,
hihti shinanya xaba hihbo,
hihti shinanya xaba hihbo,
nihbo bi res tah min qui
noquen Papa Dios.

Jatihibi hihbo,
rahma jacobinai,
neateman japahoni,
joyaxihqui tah min qui
nihcanni.

⁹Papa Dios qui jascari siripi yohuan-cani, jaa hihti xabayahpa copi, hihti shinanya hpa, hihti siri. Papa Dios queyoyamanox mananica copi jahuen chosco yoshin hahqui siripi yohuanaiya cahen jahuen veinticuatro yonoxon-nicahbo hahqui betihihpaqueti. ¹⁰Jascari yohuanaboya quiquin Hihbo qui betihihpaquecani. Raboxonen tisquihah-paquehax jaa bebon betihihpaquexon jaton oro maitibo mabiquihnxon jaa taracancanquin. Jaton maitibo janaxon:

¹¹Hihcoini,

Mia tah min xaba hihbo qui, noquen
Hihbon.

Hihti shinanyahpa tah min qui,
Hihti coshi noquen Papa Dios.

Jatihibi tah min mian hahniqui.

Shinanxon res tah min Jahue hahniqui,
jatihibi sca janon
hahcanquin jaton maitibo taracanxon.

Carnero huestichin quehpenti hahtipahi quirica

5 Henjisribiha bi Papa Dios
quiricayahpa qui, jahuen mecayaho
mequeman jan xecohah. Jahuen quirica
cahen chicho huisha janon ramih
huisha jaribibi. Huishaxon xehpoxon
boipan besmicha quirica, siete boi
toncon taxnahah. ²Henjisí bi hihti
coshi jahuen yonoti coshin bi res
yohuani:

—¿Tsoan jaa quirica quehpenti hahtipahquin? ¿Tsoan jahuen boi pasqueti
hahtipahquin? —hahqui.

³ Jan quenahah bi tsoanbi jaa quirica
quehpenti hahtipahyamaquin. Nai-
hoh jaibaanbi, main jaibaanbi, mai chi-
cho jaibaanbi, tsoabi jaa quirica jis-
nica yamahi. ⁴Tsoanbi jaa quirica queh-
pentimahiya tah hen huaohihquipiqui,
tsoanbi jaa jisti yamahiya, huaohihscai,
hicha.

⁵—Huaohihyamahue. Judá baquebo
hihxon ta Davidin xohtan noquen
rahuibo namanjapaquexon jaa boi
pasquexon jahuen quirica quehpenti
hahtipahqui —huesti yononicaton hea
jaquin.

⁶ Jaatian henjisí bi jaton tsahoti to-
can huesti carnero nichi, nacoxon rehte-
hah quescapa. Jaa mayahahtancahu-
nai cahen jaa yonoxonnicahoya hoa
chosco noyanica yoshinbo. Jaa carnero
cahen siete machanyahpahi, siete beroy-
ahparihibibi. Jahuen siete bero ta Pa-
pan siete yoshinbo qui, jatihibi mai
janin raanti jahuen yoshinbo. ⁷Papa

qui caxon sca jan xecohi quirica jaa
carneronen bihquin. ⁸Jahuen quirica
jan bichiya cahen hoa chosco noy-
anica yoshinbo raboxonen nichish jaa
carnero qui betihihpaqueti. Hoa veinti-
cuatro yonoxonnicahbo rihbi jascarih.
Hahan chimati arpayahpabo rahsi hi-
hxon chimacanquin. Jaton oro tasonbo
rihbi xecohax, raboxonen nihcani, ha-
han hininti jaton tason bochohi. Jaa ha-
han hininti cohini ta nincacoinaibaan
joibo qui, Papa Dios yocacaibo. ⁹Behua
behna sca behuacani.

Mian tah min jaa quirica bihti hahtipahi.
Bihxon tah min quehpentihu.

Papa Dios bihxonquin tah min miin
jimin jatihibi janinhahbo jonibo
bihniqui.

Jatihibi joiyahpabo, jatihibi huaca
quiha, jatihibi mai quiha tah min
jonibo bihniqui,
miin jimin copijaquin.

¹⁰ Min tah min jato janenihqui, Papan ji-
huetahbajo jaabo janon, jaa bebonxon
yohuanxonnicahbo jaahbo.

Mainxon ta jano jaibo yonoxonyaxih-
canihqui, Papa Dios hahxonquin
nihcani, behuahi.

¹¹ Henjisribiha bi tsama bi res Papan
yonotibo sca jahuen quiquin jati maya-
hahtancahuani. Jaabo hichabiresax be-
huahi sca hean nincaquin. Papa betan
jahuen noyanica yoshinbo naponbi hih-
non, jahuen yonoxonnicahbo rihbi jano
hihnon, jaya mayahahtancahuanax Pa-
pan yonotibo behuahi. Topontimabiresi
jaabo tsama bi res tsama.

¹² Naconihbo ta Papan carnero qui.
Hihti siri hihbo,
coshi hihbo,
jatihibi jahuabora hihbo,
honan hihbo,
yonotibo hihbo,
shinan hihbo,
xaba hihbo,
hahqui behuati hihbo siri

hihcáni, coshin bi res.

¹³ Naihoh jai jatihibichin jato nincanon, main jai jatihibichin nincarihbínon, mai chicho jai jatihibichin nincaríhbinon, quebíjistima hiaman cahibaan nincarihbínon, jeneho cahibaan rihbi jatihixonbi nincacanquin. Nincacax: Jahuen jati janinxon noque jihuemahi ta hihti siri qui,

jahuen carnero ta hihti siri qui.

Jaabo rabe ta shinan hihbo qui, xaba hihbo,

jatihibi yonoti hihbo.

Jascabi sca quiquin hihbo tah qui hihcáni, behuahibo nincacax.

¹⁴ Jaabo jascaraiya, hoa chosco noyanica yoshin sca:

—Jascari rahan —hihqui. Jaabo jascanon sca jahuen yonoxonnicahbo raboxonen nichish quiquin Hihbo qui betihihpaquecani.

Jahuen siete boi toncobo

6 Jaatian hen jisí bi carneronen huesti boi tonco pasquescaquin, siete tonco pishca jai bi huesti pasquequin. Jaatian, terenhhiqui coshin corotai quesca sca jahuen noyanica yoshin huestichin queñahi hean nincaquin.

—Johue —hahquin.

² Jan quenahí quiri hen jisí bi cabacho joxoni jahui. Jaa cahtsahotai joni rihbi jai, piyahahpa. Hapon maiti maimaha sca cahi caresscai, main jaibo namanaquin hihbojanxon.

³ Huetsa rihbi sca jahuen rabe sca boi tonco pishca jan pasquehiya cahen yonoti chinin jahuen noyanica quenahí sca hean nincaquin:

—Johue —hahquin.

⁴ Jan quenahah huetsa cabacho sca picti, cabacho joshini sca. Main jihuetabio rainyamahi rehtenani jihuescanon cahen joni huetsa betan rehtenanti shinan jato hinannon jaa cabacho caht-

sahotai sca hahan joni rehteti machito hinanquin.

⁵ Jahuen quimisha jahuen boi tonco pishca sca jan pasquehiya cahen chinitai huetsa noyanica yoshiman quenahí hean nincarihbiquin.

—Johue —hahquin.

Hen jisí bi cabacho huisoni sca jahui. Jaa cahtsahotaiton hahan hihue toponti xecobenaquin. ⁶ Jaa noyanica yoshinbo tocan yohuanai quesca sca jai:

—Trigo ta huesti neten teexon jaa neten piti res jonin canantihiqui. Huesti neten teebahinaxon ta quimisha neten cebada piti cananti qui. Xehatibo tah min tiromajatimahi, hahan pitijati xeni rihbi tiromajayamahue —hihqui.

⁷ Jahuen chosco jahuen boi tonco sca jan pasquehiya, chinitai huetsa noyanica yoshin yohuanscái:

—Johue —hahquin.

⁸ Hen jisí bi pehi quescapa yanconi cabacho sca jahui. Jaa cahtsahotai cahen muhuá janeya. Muhuataibo coirannicahbo rihbi hahbetan becani. Sontarobaan jonibo rehtenon, pihan hihquish caibo muhanon, nahuan pahen hihquish caibo muhanon, mai meha yohinahbaan piha caibo muhanon, main sca jato raanquin, hicha muhuatahbo. Quimisha joni cahnexion huesti muhuamaquin, quimisha cahnexion huesti muhuamaquin, jascjabonaxon jato muhuamaquin. Jatihibi jonibo toponpaquenon jaa pehi quescapa yancon cabacho cahtsahotai carneronen raanquin.

⁹ Jahuen pichca jahuen boi tonco jan pasquehiya sca cahen jisí bi jano Papa Dios janaxonti naman yamanicabo hichahi, Papan joi jeneyamahiton rehterahsihibo. Cristo joi yohihiton rehterasihibo yamanicabo sca jai.

¹⁰ Coshin yohuanai sca hean nincaquin:

—¿Jahuentiho basi pari min copiquin sca noque rehtehohbo copiyaxihquin, Quiquin Hihbon? Mian tah min sirijaquin shinanai, pontejaquin tah min hahcoinai. ¿Jahuentian min noque rehtehohbo casticanyaxihquin? —hahcanquin yocaquin.

¹¹ Jato tari joxoni hinanpaquexon sca:

—Manátahnahue, mahbe teexonnicaahbo pari rehtehahbo, maton huetsabo rihbi rehtehahbo, mato rehterahsi quescajaquin senenjahabo manátahnahue —jato jaquin.

¹² Hen jisí bi jahuen seis sca jahuen boi tonco pishca jan pasquehi. Jan quehpennaiya cahen mai coshin bi res mihuani, bari rihbi huisojaquecahinscái, chopá huisón beracoha quescapi. Hoxne rihbi joshinjaquecahinscái, jimi quescacahini joshini. ¹³ Naihoh quehax cahen huishi rihbi reocohpaquetax main paqueti, jihuí bimibo nihuen xayanah reocohticamahi. ¹⁴ Nai rihbi sebibahinah yamascái, non papira sebibahinahcamahi. Main rihbi cahen jatihibi mahchi xequecahuani, quebíjistima hiaman jai mai toncobo rihbi hihcahuani, janó jan tsahopahoni tsahoyamascaí. ¹⁵ Mai mehabo quiquin hapobo betan jaton sontaro hapobo jonetí. Patorobo, coshi jonibo, patoro teexonaibo, patorojomabo, jaabo jatihibi jonecani. Mai quiniho hihcocahincani, macan mahchi janin quexba janin hihquicahinax jonecani.

¹⁶ —Noque qui paquéhue, mahchin. Noque mahpohue, macaman. Noque qui paquéhue. Noque mahpohue. Quiquin Hihboxon Diosen noque jisyamascanon noque mahpohue. Jahuen carneronen noque sinajayamascanon noque mahponahue, mananbon. ¹⁷ Sinaxon ta noque casticansciqui. ¿Tsoan jascapa tenetihiquin? —hihcáni.

Israeli baquebo honantijahibo

7 Jaa pecaho sca hen jisí bi chosco yonoti jai, Papan yonotibo. Cahchinnancahini cahibo. Huetsa cahen reboqui cahi, huetsa cahen chiponqui, huetsa cahen cahchiho, huetsa cahen ramiho. Jano nihxon sca jahuenbihax nihue joyamascanon nihue pantecanquin. Hian janin xoó hihyamascanon, main xoó hihyamascanon, nihi rihbi xoopen xayanyamascanon nihue pantecanquin. ² Maiboya quebíjistima hianbo tiromajati carneronen jato yohihah cahen maiya hianbo tiromajati jaabaan hahti-pahquin. Jaatian hen jisí bi bari cainai quirihax huetsa yonoti sca sanarenenex jaonahi. Jayaxon huishaxon honantijati xecobenahax, jahuen hahbe chosco yonotibaan nincanon coshin bi res nincati yohuani:

³ —Jaton bemanan qui non noquen Papa Diosen jonibo honantijanon caman mai tiromajayamanahue; hianbo, nihi rihbi tiromajayamaripquin —hahquin.

⁴ Jaatian hen nincacah bi jahuentihi non honantijahin hihxon topónah ca ciento cuarenta y cuatro mil honantiyahpabo jai, Israeli baque tihibichina doce mil jonibo. ⁵ Judábo cahen doce mil honantiyahpabo. Rubenbo cahen doce mil, Gadabo cahen doce mil, ⁶ Aserbo cahen doce mil, Neftalibo cahen doce mil, Manasésbo cahen doce mil, ⁷ Simeonbo cahen doce mil, Levibo cahen doce mil, Isacarabo cahen doce mil, ⁸ Zabulonbo cahen doce mil, Josébo cahen doce mil, Benjaminbo cahen doce mil.

Joxo chopayahpabo

⁹ Toponaibo nincaxon hen jisí bi tsamá jonibo sca jai, hihti caibo, tsoan toponquin queyonihma. Jatihibi mai mehabo, jatihibi jonibaanahbo, jatihibi huean mehabo, jatihibi joiyahpabo. Noquen Papa Dios bebon nichibo sca, jahuen

carnero bebon nichibo. Joxo chopasahuehibo rahsi. Jepe pehi xecohiborahsi.¹⁰ Coshin bi res quenacani:
Jatihibi hihbohi ta noque jihuemanicahqui,

jahuen carnero rihbi ta noque jihuemanicahqui

hihcani.¹¹ Papan yonotibo sca jahuex, Papa Dios, jahuen yonoxonnicahbo, jahuen noyanica yoshinbo, hahqui mayahahtancahuanxon raboxonen nichish jahuen yonotibo jatihibi Papa Dios qui betihihpaquecani.¹² Betihihpaquetax:

Hihcoini. Jascabihi hihti shinanyahpa tah min qui, Papan.

Xaba Hihbo tah min qui, Shinan Hihbo. Noque quiquin hahxonnica. Siri shinanyahpa.

Coshi shinanyahpa.

Jatihibi Hihbo tah min qui, jascabihi, queyotimahi.

Jascari rahan
hihcani.

¹³ Jascaraiboya huesti yonoxonnicahton sca hea yocaquin:

—¿Nea joxo chopayahpabo tsoabo hin? ¿Jahuerahnahhahbo hin?

¹⁴—Mian caya tah min honanai, hapon —hahquin hean.

—Nea ta hihti tiromabobo netebo huinoquhrani jahuibo qui. Jaton chopasahuerahnahhahhahbo sca hea yocaquin. Jato jahibotu qui.¹⁵ Jaa copi ta Papa Dios bebon nihti hahtipahcanihqui. Jahuen xobohoxon ta jaabaan jaa yocati hahtipahiqui, bariyahpan, yame rihbi. Papa Diosen ta jato jihuequihnyaxihqui qui.

¹⁶ Jahuabi ta pitin pahiyamascanoxihcanihqui. Xehatinin pahiyamasca. Bari teneyamascaquin. Jahuabi xana teneyamascaquin.¹⁷ Janoxon Papan yonohi janinxon ta jahuen carneronen jato coirannoixihqui qui. Hahan jihueta noabo janin xehahahbo ta hionox manati-

hqui. Papan jato hahxonah ta jahuabi benayamascanoxihcanihqui.

Jahuen siete tonco pasquehiya hinintiyahpa jahui

8 Jahuen siete jahuen boi tonco pishca carneronen pasquehiya cahen naihoh jatihibi netecahinscái. Poyan tihixonpa jahua nescapi.² Hen jisí bi Papa bebon nichijahuen siete yonotibo corneta rehue Papan hinanpaquequin, huesti huestibo jato hinanpaquequin, yonoti tihibichina huesti rehue.³ Papa Dios bebonbi jano racanxonti jai, oro bi res. Hininjati hahqui nanenoxon oro quenti pishca xecobenahi huetsa jahuen yonoti sca jahuex, jano racanxonti patax nihreneni. Jahuen baquebo rahsichin Papa yocati joiboya jahuen hininti cohinya mesconon cahen hicha hininti jaa yonoti Papan hinanquin. Quetejaxon jano racanah cahen jaton joibo jahuen hininti cohinya mescoti.⁴ Papa bebonxon jahuen quenti qui nanexon jan mapojaha cahen jaton joiya cohinhahnati.⁵ Jahuen quenti pishca bihxon sca jano racanxonti quiha chihi bihxon quenti qui bochojaxon, naihohxon Papan yonotinin mai qui chicopaquequin. Jan potahiya cahen terenhhiqui, coshin coroti, cana bacahi, mai mihuani.

Jaton rehue hahcaibo

⁶ Jahuen siete rehueyahpa yonotibaan sca jaton rehue hahnoxon sanahihnxon toconcanquin.

⁷ Bebohilton pari jahuen rehue hahresscaquin. Jan hahcaya cahen naihoh quehax matsi toncobaan mai rahtsaquin. Jimiya chihi rihbi mescohah reocohti, main paqueti. Jahan cahen hicha mai mapohi, quimisha mai tihibichina rabe mai banenon huesti mai mapohi tsistecahini. Nihi jascarihbibi, texe banenon texe cohoti. Jatihibi huasi paxahax cohocabini.

⁸ Huetsan jahuen rehue hahress-caquin. Jan hahcaiya cahen mahchi tihopa chihi tonco quebjistima hian qui paqueti. Quebjistima hian qui paquetaiya cahen jene jimicahinscrai. Rabebo hian siri banenon huestibo jimiyahpa hiancanascai. ⁹ Jascahiya cahen jaa jeneho cahi yapabo muhuati. Jano cahi nontibo rihbi jene meran cahax queyocahini. Rabe banenon huetsa hihquihi, jascacanahi hicha queyoti. Yapa jascarihbibi.

¹⁰ Huetsan sca jahuen rehue hahquin. Jan hahcaiya cahen naihoh quehax hitihosi huishi cohocanahi huacabo qui paqueti. Huetsa janin rabe texpa banenon huetsa qui paqueti, huetsa janin rabe banenon huetsa qui paqueti, huetsa janin jascarihbibi, huetsa janin jascarihbibi, jatihibi janin. Texpabo jascarihbibi. ¹¹ Jaa huishin jane cahen mocani. Hahqui huishi paquetai cahen jene mocanihbo rahsihi. Jaton jene mocascaiaya cahen janoo jihuetaibo hicha muhuati. Jaa jene xehahax muhuati.

¹² Huetsan sca jahuen rehue hahquin, jahuen chosco sca. Jan hahcaiya cahen berishquiha ramihoh bari nocascai. Ramihoh rabe xabanon ramihohque huesti nocahi. Hoxne rihbi ramihoh rabe siriparion ramihohque huesti berishquiha nocahi. Huishibo jascarihbibi, caibo xabanon caibo rishquihih nocahi. Non topoponpaquexon quimisha huishi toponei tihibichina huesti nocahi. Texe neten bari xabanon texe xabayamahi. Yame jascarihbibi, texe yame hoxneya huishi janon, texe yame jayajoma.

¹³ Jaatian sca hen jisí bi noque huinobohani huesti chiquihuan noyah. Coshin bi res queocanahi noyah:

—Hahrai. Hahrai. Hahrai.
Quimishachin pari ta jaton rehue

hahnoxihquihi. Main jihuetaibo ta hihti tiromabo sca huinonoxihquihi —hihcanahi cahi, chanahi.

9 Huetsa yonotinin sca jahuen rehue hahquin, jahuen pichca sca. Jahuen rehue jan hahcaiya cahen naihoh quehax huesti huishi paquetai quescapah hean jisquin. Nemini mai quinihhuan jai bi xehpotiyahpa. Jaa huishi cahen hahan quehpenti hinanah, jaa xehpoti quehpenscaquin. ² Jaan quehpenah cahen quinihoh quehax cohin potohi, boyom-ahhuan janinhax cohin cainihcamahi. Cohiman mahpohah bari huisojaquecahinscrai. Huee rihbi huisojaquecahinscrai. ³ Cohin mehax picotax sca champaobo michabahcanascai. Nibo pahenihbo hihqui quesvari paheyahpa champaobo, Papan jato jaa pahe hinanah.

⁴ —Huasibo tiromajayamanahue, champion. Pehiyahpabo tiromajayamanahue, jahuabi nihi tiromajayamaquin. Papan honanti-jahahmabo rahsi tah man hahtihi, jaton bemanan janin jahuen honanti yamahibo rahsi hahnahue. ⁵ Jato rehteti tah hen mato hinanyamahi. Pichca hoxne jaa hisin tenehabo tah hen mato jatihhi hoxne hisinjati mato hinanai. Jato hahttannahue —hahcá, jonibo hahqui becani. Hahca, nibon hahca quescape hisincani. ⁶ Jaa champion hahca ta Hahrai, teneyama ta jai, hea muhuamahue hihyaxihcanihqui. Muhuati queenxon bi ta hahtipahyamayaxihcanihqui. Hisin tenecasquimahax ta hihti muhuacatsihquish bi muhuayamayaxihcanihqui.

⁷ Rehtenani canoxon sontarobaan jaton cabacho bepaxti sahuemaxon xohpaxti sahuemaha quescapahbo ta jaa champaobo qui. Oro maitiyahpabo quescapahbo. Jonin bemananya quescapahbo. ⁸ Haibaan booyabo, boo chaiyabo. Hino xetaya quescapahbo.

⁹ Yami xohpaxti quescapa sahuehibo. Noyahiboya cahen cabachonen niniyah tsama bi res sontarobo coshin bi res jaton taramehtinin bocanihcamahi coshin bi res corocanahi, jaton pehin payanah. Sontarobo rehtenani cahicamacanahi coro coroti. ¹⁰ Jaton jina cahen nibon jina quescapahbo, chahchitiyahpabo. Hahan chahchihah cahen pichca hoxne hisintiyahpa. ¹¹ Jaton quiquin hapo cahen jaa quinihuán chicho quehax picotai yoshin. Abadon cahen jahuen Jane, hebreobaan join tiromajanica hihcatsihqui. Griegobaan join cahen Apolión, jahuen Jane.

¹² Jano ta chiqui quenatah hahrai huesti queyóscaiqui, huetsa hahrai jahuen rabe sca jaresscanon.

¹³ Huetsa yonotinin sca jahuen rehue hahcaya cahen Papan racanxonti patax jahuen yonoti quenatai hean nincaquin:

¹⁴—Jaton Eufrates janeya paro janin nexá jai yoshinbo pecascanahue jati-hibi canon, chosco —jahuen siete jahuen hahbe rehueyahpa jaquin.

¹⁵ Jaa baritian, jaa hoxnepan, jaa neten, jaa horabi cayaxahnón mequeni jahuen chosco yoshin sca bocani, pecahahbo. Boxon jatihibi jonibo toponxon quimisha toponxon tihibi huesti rehtexon rabe texejacanquin. Rabe ji-huenon huesti mahuati, rabe jihuenon huesti mahuati, jascacanahi. ¹⁶ Cabachonen cahi sontarobo toponxon yohihah cahen doscientos millones jai hean nincaquin. Toponaibo nincacah jatíhi.

¹⁷ Hen jisí bi cabacho cahtahotaibo. Cabacho tihibi jaton hihbo hihqui quescari, chihiyahpa xohpaxtiyahpabo rahsi, yanconibo xohpaxtiyahpabo, polvora coshin mapohi quescapahbo xohpaxtibo. Cabachobo cahen hino mapoyabo. Jaton jana janinhax chihi Cainihcama jaibo. Cohin pototani pototani. Toohahti toohihquicamahibo.

¹⁸ Jaton pahe ta quimisha qui. Huetsa cahen chihi, huetsa cahen cohin, huetsa cahen pishiti, jaton jana janinhax chihitan chihitanai pahebo. Jaa quimisha pahen tsama jonibo rehtecanquin, huesti rehtexon tihibi rabe texejabonahibo. ¹⁹ Jaa cabachon pahe ta jaton jana janin qui, jaton jina janin rihbi. Jaton jina cahen rono quescapahbo, ronom mapoya jinayatibo hahan piha joni mahuanon.

²⁰ Jaton pahen rehtequin bi texejahibaan bi jascabi nincayosmabo jonibo jai. Jaton mequemanbi jaton diosbo hahcanquin, caibo oro, caibo plata, caibo bronze, caibo macan, caibo jihui. Jisti hahtipahyamahibo, nincati hahtipahyamahibo, nihti hahtipahyamahibo. Jascapahbo diosbo hahxon raboxonen tisquihahpaquexon jato yocacanquin. Jascapahbojaxon jaton shinan ponteyamacanquin. ²¹ Jonibo rehtexon bi jaton shinan ponteyamacanquin. Yobe jaxon, tsini jaxon, yometso jaxon, jascapahboxon bi jaton shinan ponteyamacanquin.

Quirica pishea xecohi joni

10 Hen jisí bi huetsa sca Papan yonoti naihoh quehax botopaqeti, hihti coshi jahuen yonoti. Nai cohiman rahcotax bototi. Jahuen mapo machibi yoshin bahi joyotihcamahi. Jahuen bemanan cahen bari quescapai. Jahuen tahe cahen chihi perehihnatai quescapi. ² Jan xecohi cahen quirica pishea, quehpenah sca. Bototax jahuen mecyaho tahlen quebijistima hian benichi, memiho tahlen main nichí. ³ Nichish res sca coshin bi res quenati, hinobo sinatax coshin queoti quescari. Jan quenataiya, terenhihscai siete coti terenhihqui. ⁴ Terenhihqui tantiscaya hen huishacatsihqui bi:

—Jaa siete coti terenhihqui yohuanai huishayamahue. Tsoabi jaa yohiyamahue —naihoh quehax yohuanaiton hea jaquin.

⁵ Jeneya mai benichi yonotinin sca jahuen mecayaho mequen bochiquiri sanahihnixon:

⁶ —Jahuentianbi queyoyamanox mananicaxon ta naibo jatihibi naijanicahxon, maiyabi jano jai jatihibi jonijanicahxon, hianbo jatihibi jano jaibo jonijanicahxon Papan yohicoinihqui. Hashoan ta basitima sca jaiqui. ⁷ Jahuen siete jahuen yonotinin ta jahuen rehue hahresscanoxihqui. Jahuen rehue jan hahmenohiya ta Papan joi yohinicabaan yohini quescasca jaresscatihqui, Papan jato yohini jayaxihquibo jaresscanon —hahquin jeneya mai benichiton.

⁸ Hean nincacah naihoh quehax yohuanrihbibi:

—Hoa jeneya mai benichi yonotinin xecohi bihtanhue, quehpenah quirica pishca —hea jaquin.

⁹ Caxon sca:

—Miin quirica pishca hea hinanhue —hean jaa yonoti jaquin.

—Bihhue. Bihxon piquin queyobahinhue. Miin poco janin cachapi hihnon bi ta min piha hihti batatihqui, bona-jene tiho batapi —hahxon jahuen quirica pishca hea hinanquin.

¹⁰ Hinanah, bihxon pihá bi hihcoini bonajene tiho batapi. Piquin queyobahinhue sca cahen heen poco janin cachascai.

¹¹ —Hicha jonibo, huetsa mai mehabo, huetsa joiyahpabo, jaton quiquin hapoboyabi tah min hicha jonibo pari jato yohiti jai —hea jaquin.

Papan joi yohinica rabe

11 Hahan hen toponnon hahan toponti jihui taxo quescapa hea hinanxon sca:

—Jahuentihopa hin hihxon Papan xobo topontanhue. Jahuen jano racanxontiyabi topontanhue, Papahon shinanax jaho tsinquitaboyabi. ² Jaabo toponton bi jahuen xobo jemanhihti toponyamatanhue. Jaa ta cuarenta y dos hoxne pari nahuabaan jama jamayaxihqui, Papan jato hinanah. Jerusalen jemarihbi ta jama jamayaxihcanihqui, jato hinanah. ³ Jaatian tah hen heen joi yohinica rabe raanyaxihqui. Hean raanah ta hahan benáti chopasahuexon mil doscientos sesenta neten heen joi jato nincayaxihqui, rabebichin.

⁴ Jaabo rabe ta mai Hihbo bebon nichi olivo jihui rabe qui, Hihbo bebon tsahona johue rabe ta jaabo qui. ⁵ Tiromabaan jato tiromajacatsihquiton ta jaton jana janinhax chihitan chihitanxon jaton rahuibo queyobahinyaxihqui. Jato tiromajati shinanaibo jatihibi ta jascajaquin queyoyaxihqui, chihin.

⁶ Hoi paquetimajati coshi ta Papan jato hinanyaxihqui, jaabaan yocacah hoi paqueyamascanon, Papan joi yohiquin queyonon caman. Texpaboya hianbo rihibi jimicahinscanon ta jascajati coshi jato hinanyaxihqui. Queenxon tian res mesco pahen mai rishquinon mesco coshi jato hinanquin. ⁷ Rabebichin Papan joi yohiquin queyoscaiya sca ta quiniihuan janinhax picotai yohina jato betan rehtenanyaxihqui. Jato betan rehtenanxon ta jato rehteyaxihqui, rabebi. Jato namanjaxon rehtequin. ⁸ Noquen hani jema janinxon jato rehtexon ta bahinbi jaton yora janibi minchinon tsahonmayamayaxihqui. Jaa jema ta janoxon noquen Hihbo rehteni jema qui, Sodoma hahcaibo jema, caibaan cahen Egipto hahquin, tiromaboyahpa copi jascajaquin. ⁹ Jatihibi mai mehabaan ta jaton yora racatai jisyaxihcanihqui, jatihibi nahuabaan, jatihibi joiyahpabaan,

jatihibi texpa janin jihuetaibaan jato jisquin, reteha racatai rabe. Quimisha nete racabahinahax racashinahax jahuen chosco sca barin manan tsacanon caman jano racanon ta tsoabi jato tsahonmayamayaxihqui qui.¹⁰ Jaton yora racatai jisish ta mai mehabo coincoinyaxihqui qui, jenimahi. Jaa copi ta bexnanboya piti joni huetsa hinanyaxihcanihqui. Jaa joi yohinica rabechin jato tiromajapahonish bi mahuascai copi ta jascajaquin joni huetsa piquihinyaxihcanihqui, jenimaxon.¹¹ Hen jisí bi cahen jaton chosco neten barin manan tsacascaiy sca jaton yoshin Papan hahquirihbi hinanxon Huenínahue jato jaah huenicahuani, rabebi. Nihresscaiton merahax hihti raquepahnhananax tastahihcani, jaa jisibo jatihibi.¹² Bochiquihax yohuanai sca nincacanquin, coshin bi res yohuanai joi:

—Neno hinahihnaquihrannahue — jato jaah naihoh rabebi cahi. Nai cohiman cahiton jaton rahuibaan namanxon jisnon bi naihoh bocani.¹³ Jaabo rabe cahiya cahen coshin bi res mai mi-huani. Mai miuhanah cahen jaa jema janin xayanah hicha xobo paqueti. Jaton xobonbi jato bishtaxah cahen siete mil jonibo muhati. Texe jatihibi hihi raqueti. Naihoh queha Diosen ta noque casticaniqui, hihcani raquetax.

¹⁴ Janobi ta jahuen rabe sca jahuen hahrai queyóscaiqui. Huesti sca pishini. Jaa sca ta jahuiqui.

Jahuen siete jahuen rehue

¹⁵ Huetsa yonotinin sca jahuen rehue hahquin, jahuen siete sca. Jan hahcaya, coshin bi res naihoh quehax yohuanai jai.

Noquen Hihbaan jihuematí nete ta nocoscáiqui,

jahuen baque Cristo betan jahuen jihuetahbo jan jihuemas canon.

Queoyamanox manatahbo ta jascabijaquin jato jihuemascatihqui hihqui yohuani.¹⁶ Jascari coshin yohuana joi jaiya cahen Papa Dios bebon tsahoxon yonoxonai jahuen veinticuatro yonoxonnicahbo raboxonen nichish betihihpaquecani, Papa Dios quiri jisish jaa Nete Hihbo copi jaa naman betihihpaquecani.

¹⁷ Papan, noquen Hihbon, Mia tah min jatihibi hihbohi, Neateman japahonish bi tah min jascabibi jai.

Hahxon tah min noque jai, Hihbon.

Miin hani coshiyaxon tah min jatihibi hihbojahi.

¹⁸ Noquen nahuabo sina sinatai bi tah min jato sinajaxon mahuanihbo casticanscái.

Mia hahxonnicabo tah min mianbo sca copiquin hahxoncoinscái.

Miin joi yohinicabo, miin jonibo, mia nincacoinnicabo, haniboya hanitahmabo tah min jato hahxoncoinscái. Mai tiromajanicabo rihbi tah min tiromajascai hahcanquin.

¹⁹ Hen jisí bi noquen Papan naihoh jati quehpemehscái, janibi sca jahuen bohnanti jano racanon, jahuen jihuetahbo hahxontijaxon huishani joi jaa bohnanti chicho jan bexojani. Jaatian cana bacatan bacatanah terenhihqui. Coshin bi res toshi toshiti. Hani matsi toncobaan rihbi mai tsacaquin.

Haibaan baque xehancatsihqui capepahnhan

12 Hen jisí bi naihoh quehax sca haibo sanareneni, jaa jisxon honanti, non jahueja Papan jaiquin hihxon non honannon. Bari xabapan

rahcotax hoxne jamacax nichi. Doce huishiyaha maiti maihax.² Tohoyahax baque bihcatsihquish huaohihscai, camicasquimahax hisini.³ Hoque sca hen jisi bi naihoh huetsa hahan honanti jaribiscay, capepahhuan sca. Chihiyahpa quesca capepahhuan joshini. Si-ete mapoyahpa, chonca machanyahpa. Quiquin hapon maiti maihi, mapo tihibi jai jahuen maiti.⁴ Jahuen jina huinquin huinquin hahxon nai behuasxon hicha huishi potaquin main paquenon. Rabe janin huishi janon huetsanco huishi yamascai, jan nai behuasah. Haibaan jahuen baque bihcatsihqui bi jaa bebonbi capepahhuan nichi manati, cainscaiton jahuen baque pihammadon.⁵ Baquexo cainah bi bebo baque, jatihibi nahuabaan quiquin hapo hihxon jato cahnexonma yono yonoyaxihqui bebo baque pishca. Cainaiton bi bochiquixon Papan bihinibniquin, Papa janin hihnon, janoxon jan yonohi janinbi.⁶ Jahuen baquexo cain sca jaax, haibo jabati, jano tsoa yamahiton cahi nihi naman joneti. Jano jati ta Papan jaa bexojaxonishqui, mil doscientos sesenta neten jano pimaxon coiranabo.

⁷ Naihoh henjisribiha bi rehtenannascani. Papan quiquin yonoti Miguel jahuen hahbe yonotiboya jahuex jaa capepahhuan betan rehtenani. Jahuen hahbe yoshinboyahpahax capepahhuan coshin rehtenani, Miguelnabin betan.⁸ Miguelnabin coshi betan capepahhuan senenyamahi. Miguelnabin jabamaha bi naihoh jahuenbi catimahi.⁹ Miguelnabin potahah main sca jahuen hahbe yoshinbo betan jaa capepahhuan paqueti. Jahuen Jane huetsa cahen rono xeni, huetsa jahuen Jane cahen diablo, huetsa jahuen Jane cahen Satanas, main jihuetabio rahsi parannica.

¹⁰ Naihoh sca coshin yohuanai hean nincaquin:

—Papan ta noque hihti hahxon-scaiqui. Jahuen coshi jismaxon ta jahuen jihuetahbó jihuemascanoxi-hquiqui. Jahuen baque Cristo betan ta jahuen jihuetahbó jihuemascanoxi-hquiqui. Noquen huetsabo cahenica ta potascaiqui, Papa bebonxon noquen huetsabo cahebahinaxon caheshinahi yoshin.¹¹ Noquen carneronen jimin ta jahuen jonibaan jaa yoshin namanjahiqui, Papan joi yohixon rihbi jaa namanjaquin. Mahuanoxon caman ta Papan joi jeneyamacannishqui.¹² Jaa copi jenimanahue naibon. Jenimanahue naihoh quehabon. Huaohihnahue maibon, hianbon. Mato qui ta tiroma yoshin paquetihqui. Sina sina ta jaiqui. Jaa casticanti nea pishca jaonahiqui honanax ta sinathiqui —hihqui.

¹³ Main potahah bochiqui jenquetsahax catima sca jaax, jaa baquexon mama sca benahi cahi, jaa sca rehtecatsihquin.

¹⁴ Jaan rehteyamanon hihxon chiquihhuan pehi rabe hinanscacanquin. Pehiyahpa sca jaax noyacahini cahax Papan jaa bexojaxonai janin cahi. Tiroma yoshiman merayamascanon jano sca coirancanquin. Quimisha bari huinotax huetsa bari pochinicon sca noconon caman piti hinancanquin.¹⁵ Jaa haibo rehtecatsihquin cahen jaa yoshin janan janani, jahuen jana janinhax jene bahi-hax huacacahinax haibo quiri bahihi. Haiboya jene tejabathi canon hihquish jascari.¹⁶ Janan jananxon tiroma yoshiman potahi jene haibo quiri coshin bahihi bi nocoyamahi. Nocoti pishinai bi mai sca quehpemehtanxon jaa huaca xehaquin. Main jascajaquin yanapanah cahen haibo muhuayamahi.¹⁷ Haibo qui tiroma yoshin hashoan sina sinatax haibaan baque texebo betan sca rehtenani cahi. Papan joi nincacoinaibo betan rehtenani, Jesus joi bihcoinaibo betan rehtenani cahi, jato queyocatsihqui.

¹⁸Cahax, quebíjistima hian quexa sca nihreneni.

Yoshin yohina rabe

13 Hen jisí bi quebíjistima hian mehax yohina huesti mapeti, siete mapoyahpa, chonca machanyahpa. Jahuen machan janin chonca quiquin hapon maiti jai, machan tihibi maiti jai. Jahuen mapo qui huishá cahen janebo jai, Papa Diosen jistahihmahi janebo.² Jahuen yora cahen hahua hino quescapah. Jahuen tahe cahen xahe tahe quescapah. Jahuen jana cahen hinon jana quescapah.

—Heen coshi tah hen mia hinanai, heen yonotibo rihbi mia hinanxon tah hen mia yohihi, min queenai quesa sca jahue jonibo hihbojaquin —capepahuanen hino jaquin.³ Jaatian hinon mapo huesti sca tsehueyahpa sca jai, hahan muhuati tsehueyahpa. Hahan muhuatihi bi rohahi. Rohahi jisish cahen jatihibi mai mehabo rahtexon hahqui sca jaton shinan camacanquin.⁴ Jahuen coshi jan hino hinanai copi sca raboxonen nichish capepahuan qui jonibo betíhihpaequeti, jaa sca jaton dios quen. Hino qui jascarihbicami. Tsoa jaa hino quescapah quin, tsoan jaa teneti hahtipahiquin hihquish hahqui betíhihpaequani.

⁵Tiroma yoshiman yohuanmaha sca hihti tiromabo hino yohuanscái. Hanibo yohuanbo. Cuarenta y dos hoxne jan jas-canon cahen tiroma yoshiman jahuen coshi hinanquin.⁶Papa Dios qui tirom-ahi yohuani, Papan xobo qui tirom-ahi yohuanrihbibi, naihoh jihuetaibo qui tiromahi yohuanrihbibi.⁷Tiroma yoshi-man coshi hinanah sca Papan baquebo betan rehtenanxon jato rehtescaquin. Jascajahax jatihibi mai mehabo, jati-hibi texpa janinhahbo, jatihibi joiyah-pabo, jatihibi jonibo, jatihibi main ji-huetaibaan quiquin hapo sca hihqui,

jaa hino.⁸Hahqui betíhihpaequonoxon cahen jatihibi main jihuetaibo rabox-onen nihpaqueyaxihqui, Papan baquen quirica janin jaton jane huishayamahi-hbo rahsi. Jahuen baquen quirica janin jaton jane huishá jaibo ta jihuenci-cabo qui. Papan jihuetaibo ta jaa hino qui betíhihpaequayamayaxihqui qui, capepahuan qui betíhihpaequayamari-hbihi. Naiyahpa mai jariyamahi bi ta carnero rehtequin hahcajaquin rehte-hahbo jahuen baque muhauayaxihqui Papan honannishqui, noquen hohcha copi hihqui bi.

⁹Hahan nincati pabinquiyahpaxon nincanahue.¹⁰Sipo xoboho tsahotibo ta sipo xoboho Papan tsahonyaxihqui qui. Nacoxon rehtetibo ta nacoxon Papan rehteyaxihqui qui. Jaa honanxon ta Papan baquebaan teneti hahtipahiqui, nincacoinquin jeneyamaquini.

¹¹Hen jisí bi mai chicho quehax sca huetsa yohina caini. Rabe machanyahpa yohinah, chaxo machan quescapah. Jan yohuanaiya cahen capepahuan yohuanai quescapi.¹²Hiaman meha hinon jascahue hahcá, jaan rihbi sca jahuen coshin hahquin, hiaman meha hino hahxonquin. Hiaman meha hino qui betíhihpaequenahue hahquin cahen jatihibi mai janin jihuetaibo raboxonen nihti jaan yohiquin. Mahua tsehueyahpahax bi rohahi hino qui betíhihpaequenahue jato jaquin.¹³Jato nincamanoxon jahuen coshin jaan hahquin, jato rahtequin. Jaton jisnon bi cahen naihoh quehax chihi paquenon jaan paquequin.¹⁴Jahuen hahbe yohinahnen jascajahue hahcá, jahan rahtetibojaxon main jihuetaibo jaan paranquin. Jato paranxon:

—Hiaman meha hino quescapahbo santojanahue, rerahah bi jihuetai yohinahbojaquin —jato jaquin.

¹⁵Jascapah yohina santo yohuanscanon cahen jaan jato yoshin hinanquin, Jascajahue tiroma yoshiman jaah.

Yohuanxon cahen joni rehteti jaton santobaan jato yohiquin.

—Raboxonen nichish hino santo qui betihihpaqueyamahibo jatihibi rehtenahue —jato janon santobo yohuanmaquin, mai meha yohinahnen.¹⁶ Jascajaxon jonibo honantijati jato yohiquin. Jatihibi jonibo honantijanahue, hanitahmaboya hanibo, coriquiyahpaboya jahuab-orabojomabo, patorojomaboya patoroyahpabo, jatihibi jonibo mequen qui honantijayamaxon bemanan qui honantijanahue hahquin.¹⁷ Jaa honantijomaxon cahen maroti hahtipahyamascacanquin. Jayajomaxon maromati hahtipahyamascaribicanquin. Honantijaquin cahen jaa hinon jane huishacanquin, jaayahpabonon. Jahuen Jane huishayamaxon cahen jahuen numero sca huishacanquin, caibo mequen qui, caibo cahen bemanan qui.¹⁸ Honanquin sirijanahue. Shinanxon jaa hinon numero toponnahue. Jonin numero tah qui, seiscientos sesenta y seis.

144,000 behuahibo

14 Hen hahquirihbi jisí bi Papan mahchi janin jahuen baque nichí. Hahbetan ciento cuarenta y cuatro mil jonibo jano nichí, jaton bemanan qui carneronen Jane huisha jaibo rahsi, jahuen Papan Jane rihbi jaton bemanan qui huishá.² Naihoh quehax yohuanai sca hean nincaquin, coshin bi res hani join yohuani. Hicha jene tejabahti paquetihcamahi hean nincaquin. Coshin terenihqui quescapi. Hichaxon jaton chimati chimahibo quescapi, siri bi res.³ Behua behna behuahibo hean nincaquin, Papa Dios bebon nichish behuahibo, jahuen chosco noyanica yoshin bebon nichish, jahuen yonox-onnicahbo bebon nichish behuahibo. Jaabo behuahi ta tsoabi haxeti hahti-

pahyamahiqui, jano jai ciento cuarenta y cuatro mil jonibo res jaa behua hax-enicabo. Jaabo ta maroquin hahcajaquin Papan bichiqui, jahuen baque copi jato bihquin, main jihuetaibo.⁴ Jaabo ta haiboya rishtayamahibo qui, haibo honanyamahibo rahsi. Jano carneronen jato hiohi janin canicahbo rahsi. Mai mehabo tocan jihuetaibo ta jahuen jimin copijaquin Papan baquen jato bihnishqui, Papanahbo sca jaábo, carneron-ahbo jaábo.⁵ Quesayosmabo ta qui, rishtajomabo.

Quimisha yonotibo yohuanai

6 Bejisihnixon hen jisí bi huetsa yonoti noyahi huinobohani cahi. Main jihuetaibo yohihi cahi, jatihibi mai mehabo, jatihibi texpa quehabo, jatihibi joiyah-pabo, jatihibi nahuabo yohihi cahi, jatihibi tian yohiti joi siri jato yohihi cahi.

7 Cahi coshin bi res chanicanahi:

—Papa Dios qui raquenahue. Hohchayahpabo ta casticanscainqui. Jaa copi Mian tah min pontejaquin hahcai Papan, hahnahue. Jaan ta naibo hahnishqui. Maibo, hianbo, texpabo, jaan ta jatihibi janishqui. Jatihibi hah-nica huesti qui raboxonen nichish betihihpaquenahue —hihqui yohuancanahi cahi.⁸ Huetsa yonoti sca hahchon cahi, yohuancanahi cahi:

—Babilonia jema ta paquescainqui. Paque ta Babilonia jaiqui. Hani jema ta poxotihqui. Haibo tsinixon jatihibi mai mehabo hahmaxon ta jahuen hohcha Babilonianen jato hinanpahonishqui —hihqui yohuancanahi.⁹ Huetsa yonoti sca jaabo rabe chibani cahi coshin yohuancanahi:

—Jaa yohina yocacaibo, jahuen santo yocacaibo, jahuen honanti jaton bemanan qui jaibo, jano hihyamahibo jaton mequen qui jaa jaibo.¹⁰ Jascapah-baan ta Papan mocani xehati xehanoxi-hquiqui, sina sinaxon huehaxon jahuen

hahan casticanti tason qui bochojaxon ta jaan jato xehamaquin texejamaya-manoxihqui qui. Carneronen jisnon bi, Papan yonotibaan jisnonbi rihbi ta pere-hihnatai chihi qui jato potahah hisin tenenoxihcanihqui.¹¹ Jaabaan tenehi ta jascabi sca cohin potohihnayaxi-hqui qui, queyóyamahi. Tenebahinaxon teneshinahi tantiyamacani. Jaa hino yocanihbaan, jahuen santo yocanihbaan, jahuen honantiyahpabaan, jahuen janeyahpabaan jaabo jatihibichin ta jasca-pa coshi hisin teneti jaiqui.¹² Papan jato jascajatihi honanxon ta tiroma-jonibo Papan nincacoinaibaan teneti hahtipahiqui. Jahuen joi bihcoinxon jahuen baque bijnixon jeneyamahibaan ta tenetihiqui.

¹³ Naihoh quehax yohuanai sca hean nincarihbiquin:

—Huishahue. Jaton Hihbo qui hi-namehtax muhauataibo ta hahan jeni-mati jaresscainqui. Jahuabi teneti ta ya-mascatihi qui, jahuabi tee teeti yamas-cai. Papa Dios jaabaan hahxonni quen ta jaton teebo jato betanbi cayaxihqui qui. Jascari rahan hih ta Dios Yoshin siri jaiqui —hihqui bochiquihax yohuanai.

Tsinquiquin hahcajaxon casticanaibo

¹⁴ Jaatian hen jisí bi nai cohin jox-oni. Jaa nai cohin cahtsa hotai cahen no-quebaque quescapah. Oro maitiyahpa, quiquin hapon maiti. Jan xecohi ca-hen tsinquinon hahan arroz xateti quescapah, hihti queno.¹⁵ Papan jati janinhax sca huetsa yonoti picoquihrani jahui coshin yohuanjonahi:

—Miin xateti niascahue hoh. Tsin-quiscahue hoh. Tsinquit sca ta jaiqui, main jaibo. Noquen tsinquit ta choshis-cai qui hoh —yonotinin nai cohin cahtsa-hotai jaquin.

¹⁶ Yohihah cahen jahuen xateti main potaquin. Jan main potahah cahen mai mehabo tsinqui sca jai.

¹⁷ Papan naihoh queha jati janinhax huetsa rihbi sca jahuen yonoti picoti, jaa rihbi tsinquinon hahan xateti quenoy-ahpa.¹⁸ Huetsa rihbi sca Papa racanx-onti janinhax picoquihrani jahui, chihi hihbomaha joxon, coshin yohuanai:

—Miin xateti queno niascahue hoh. Xatexon mai meha bimibo tsinquiscahue hoh. Johue sca ta jaiqui hoh.

¹⁹ Jascajaha, jahuen xateti main ni-ascaquin. Mai meha bimibo tsinquinon Papan bishtaxmati janin jato potaquin, sinaxon casticanquin Papan bishtax-manon.²⁰ Jemama qui caxon bishtaxma-tinin bishtaxquin jamá jamaca jahuen bishtaxmati janinhax jimi bahiscái, nemin. Joni masohi tiho nemin bahihi, tres-cientos kilómetros caman bahihi.

Papan siete pahe xecohibo

15 Hen jisí bi naihoh sca huetsa hahan honantí jai, hani, hahqui raqueti. Siete yonoti, paheyahpa rahsi, maibo Papan casticanquin queyono-xon hahan casticanti paheyahpa rahsi. Jaa pahen casticanquin jaabijaxon Papan casticanquinas canon.

² Jascapahbo jisnoxon cahen hori pari jisí bi hian quescapah sca jai, nexnanihax bi bahrini, chihi quescapi. Jaa hian quexa nichibo hicha jonibo jai, hiaman meha hino tenenihbo, jahuen santo yocaxonma tenenihbo, jahuen Jane número bihyamanibo, jaabo jaa hian nexnani quenichi, Papan jato hinanah hahan chimati arpayahpabo rahsi.³ Jaa hian quenichi Moises behuaya behuacani, Papa Dios joi yohinicaxon Moisesnin huishani behuaya. Carnero qui behuacani nescari: Mian hahcai ta hanibo qui, Hihbon. Hahqui raquetiboa tah min hahcai. Mia tah min noquen Hihbo Dios qui, jati-hibi hihbo.

Miin bahibo ta pontebo bahi coinbo qui.

Jatihibi jonibaan quiquin hihbo tah min qui.

⁴ *ꝑTsoa mihqui raqueyamahihquin, Hihbon?*

Mihqui ta jatihibi jonibo ponte bi res siripi yohuanti jaiqui.

Mia huesti tah min jascapa hihti siri qui.

Ponte bi res min hahcai copi ta jahuex jatihibi nahuabo raboxonen nichish mihqui betihihpaquexihqui qui

hihcani behuahibo.

⁵ Jaa pecaho sca hen jisí bi Papan nai-hoh queha xobo janin jahuen jati quehpemehti. Moises huishamaxon jan hahxontijani joyahpa bohnanti janoojan bex-

ojani chique quehpemehti. ⁶ Jaa chique quehpemehtaiya jahuen siete yonotibo picoti, jahuen siete paheyahpa hihnoxi-hquibo. Pehneni siri joxo chopasahue-

hax oro cinturonen pishnexehtax pic-

ocani. ⁷ Jahuen noyanica yoshin hues-tichin sca jato oro tason hinanpaque-

quin. Papan hahan casticanti bochohi-rahsi. Jayaxon noquen queyoyosma Pa-

pan nincayosmabo casticanti bochohi. ⁸ Papan xaba hihti coshi copi jahuen jati janin cohin quextoti, jahuen coshin jan jato casticannoixihqui copi. Jaa copi ca-

hen jahuen yonotibaan jaton siete pahe-

chicoquin queyonon caman Papan jati

janin tsoabi hihquiti hahtipahamanish.

Jaton tason chicohibo

16 Papan jati chicho quehax yohua-nai sca hean nincaquin:

—Botannahue. Maton tason mai qui chicotannahue. Papan jato hahan cas-ticanti jahuen siete pahebo mai qui chicotannahue —hahquin.

² Bebo quiha yonoti caxon sca ca-hen jahuen tason mai quiri chico-quin. Hahqui chicohah cahen main jihuetaibo nobescai. Hihtihosi tiroma nobebo. Capepahhuanen honantiyah-pabo, jahuen santo yocacaibo, jaabo rahsi nobeti.

³ Huetsa sca caxon quebíjistima hian qui jahuen tason chicoquin. Hahqui chicohah cahen hian jimicahinscái, mahuatipi jimi pisíhi. Jaa copi cahen jeneho cahibo jatihibi mahuati.

⁴ Huetsa rihbi sca cahi jahuen quimisha sca. Caxon huacabo qui jahuen tason chicoquin. Texpabo qui. Jaabo rihbi sca jimicahinscái. ⁵ Jene coirannica Papan yonoti yohuanai sca hean nincaquin:

—Sirijaquin tah min jato casticanai, Papan. Min tah min rahma jai, neateman rihbi tah min japahonihqui. ⁶ Miin jihuetahbo ta jimi potamacanpahonishqui. Miin joi yohinicabo rihbi ta jimi potamacanpahonishqui. Jimi sca tah min jato xehamahi. Sirijaquin tah min jato casticanai, ponte bi res —hihqui Papan yonoti.

⁷ Papa racanxonti janinhax huetsa sca yohuanai hean nincaribiquin:

—Jascari rahan, Papan. Mia tah min jatihibi hihbo qui. Hahcoinquin tah min jato casticanai, ponte bi res —hihqui.

⁸ Huetsa sca cahi, jahuen chosco sca. Caxon bari qui jahuen tason chicoquin. Jan hahqui chicohah sca bari xanascaí jonibo mapojati tiho xanapi. ⁹ Barin hahca cahen mapohax jonibo hihti hisini. Barin hahca Papa Dios qui hihti tiromahi yohuancani, jahuen pahe jan jato qui chicohah copi. Casticana bi jaton shinan ponteyamacanquin. Papan ta noque casticanhqui, pontejaquin shi-nanscapan, hihyamacani.

¹⁰ Huetsa sca cahi, jahuen pichca sca. Caxon, janoxon capepahhuanen yonohi janinbi jahuen tason chicoquin. Hahqui chicohah tiroma yoshiman shinanyah-pabo jaton shinan xehpocahinscái. Hihti hisincani, hisin tenecasquimascaax hahri jaton jana rebo pihatax hashoan sca hisincani. ¹¹ Jaton hisin copi noquen naihoh queha Papa Dios hichacanquin. Jaton nobebo copi jaa roacanquin. Cas-

ticana bi jascabibi tiromacani, jaton shinan ponteyamacanquin.

¹² Huetsa rihbi sca cahi, jahuen seis sca. Caxon Eufrates janeya jaton paro qui jahuen tason chicoquin. Jascajaha taraxcahincai. Taraxcahinaiya cahen bari cainai quirihax jahui hapobo jaton sontaroyabi histon pohqueti sca jai.

¹³ Hen jisí bi capepahuanen jana janinhax jirí quescapah yoshin tiroma caini, hihti jaroma. Jaa hinon jana janinhax sca huetsa rihbi caini, jascapahribi. Hoa huetsa yohinahnen jana janinhax huetsa rihbi jascapa caini. Quimisha yoshin tiromabo caini, jirí quescapahbo. ¹⁴ Yoshin hihxon, hahan rahtetibo hahxon jonibo rahtexon jato jahuen shinan hinanquin. Jatihibi mai janin caxon, jano jai meyayahpabo rehtenanti shinan hinanquin, Papa Dios betan rehtenannocon sca jaton hahbe son tarobo betan tsinquitahbo jato shinan hinanquin. Jatihibi hihbo hihxon Papan jato casticancan Papa betan rehtenanti bocani.

¹⁵ —Rahma tah hen yometso sanareneni cahi quescapi hen mato qui sanareneni canoxihqui, jisnahue. Hoxa tenexon maton chopas coiranax tah man han hanjenimati jatihi. Chopanma nihyamanoxon coirannahue, chopanma nichiton mato merayamahahbo coirannahue —Papan jaiya bi rehtenani bocatsihcane.

¹⁶ Jaatian yoshiman hiohah tsinquitibocani. Armagedon janeya main tsinquitibocani, hebreobaan join janelahah cahen Armagedon mai.

¹⁷ Huetsa yonoti sca cahi, jahuen siete sca. Caxon hueé qui jahuen tason chicoquin. Jan chicohiya, Papan jati janinhax coshin yohuani jai:

—Hen tah hen hahresscái —hihqui.

¹⁸ Cana bacatan bacatanscái. Coshin rihbi terenihqui, toshiti. Mai hihti mi huani. Jahuentianbi jatího coshin mi huanyamani, tsoan jisníma mi huani.

¹⁹ Mai miuhanaiya jaton hani jema caxque caxqueti, quimisha teque sca banenon. Nahuabaan jemabo cahen poxocahincani. Jaton Babilonia jema casticanti cahen Papan shinanbehnoyamaquin. Jahuen hahan casticanti mocani jato xehamaquin, sina sinaxon jahan jato casticanti. ²⁰ Mai coshin mi huaniya cahen hiaman racatai mai toncobo yamacahinscái, queyocahini jene meran cahi. Mahchibo rihbi xayanah yamacahinscái, mispankahini. ²¹ Matsi toncobo rihbi hanibo paqueti. Naihoh quehax paquexon jonibo tsahcaquin, tsoan jisnímabo, hanibo tonco chahomabo. Papan tsacahah teneti hahtipahyamaxon bi Papa Dios hichárescanquin.

Hahresti haibo casticanti

17 Jaa siete paheyahpa yonoti quiha huesti sca joxon:

—Hehbetan cahi johue. Jan tsinihi copi hani hahresti haibo Papan casticancan cahi hen mia jismahi canon johue. Hicha texpa janin nichi haibo tah qui.

² Mai meha hapobaan hahcá tah qui. Mai mehabo ta hahbetan hihquish pahen pahennishqui —hea jaquin jaa yonotiniin.

³ Hea jascajaxon cahen jemama qui hocho sca heen yoshin boquin. Hahbetan caxon hen jisí bi haibo, yohina joshini cahtsahotai haibo. Jaa yohina cahen jahuen yora janin Jane tiromabo huishá hicha jai. Papan jistahihmah Janebo. Siete mapoyahpa, chonca machanyahpa yohinah. ⁴ Haibo cahen joshiniya yanconi chopayahpa. Oro tejotiyahpa, hihti copi macan bero romishin morojahax tejotiyahpa, moro copibo joxonihbo jaribishi. Jan xecohi cahen oro tason. Jahuen tason cahen rahnintibo bochohi, jahuen tsini hohchabo nanehah jahuen tason qui bochohi. ⁵ Jahuen bemanan qui huishá cahen jahuen Jane jai, tsoan honanyamapahoni Jane. Hani Babilonia

jema, jaa cahen jahuen jane, tsinibaan mama, mai meha rahnintibaan mama.⁶ Hen jisí bi Papan jihuetaabaan jimi xehahax jaa haibo paheni, Jesusen joi jeneyamahibaan jimi xehahax jaa haibo pahen paheni. Jascapa haibo jisish cahen hea rahte rahtetah.

⁷—¿Jahua copi min rahtetain? Jaa haibo jahua quin tah hen mia yohixi-hqui. Jan cahtahotai siete mapoyahpa, chonca machanyahpa yohina jahua quin hen mia yohinon nincahue. ⁸Hoa min jisi yohina ta japhonish bi yamas-caiqui. Mai quinihuan janinhax ta hahquirihbi picoyaxihqui qui. Jaa pecaho ta Papan jaa rehteyaxihqui qui. Main jihuetaibo ta rahte rahteyaxihqui qui. Naiyahpa mai jananaxon ta jahuen quirica janin jahuen jihuetaabaan janebo Papan huishanishqui jatihibi. Jaa quirica janin jan jaton Jane huishayamanibho rahsi ta nea yohina jisish rahteyaxi-hqui qui. Jaa yohina japhonish bi queyonish, queyonish bi hahquirihbi jaresscái quen rahte rahtecani.⁹ Honannoxon nincahue hen mia yohinon. Jahuen siete mapo ta siete mai qui. Jano jaa haibo jihuetai maibo siete quiquin hapo jai. ¹⁰Jaa hapobo ta pichca mahuascanishqui, huetsa ta rahma jaiqui. Huetsa rihbi ta joriyamahiqui. Jahuextian rihbi ta basimatahni baneyaxihqui qui. ¹¹Jaa japhonish bi yamascaí yohina ta huetsa quiquin hapo rihbi qui, jayanish ocho sca. Jaa ta texe jahuen hahbe hapobo xotayaxihqui qui. Jaa pecaho cahen Papan jaa rehteyaxihqui.

¹²Hoa min jisi chonca machan ta chonca quiquin hapo qui, jayaxihquibro rahsi. Jaa yohina joribiscaya ta basimatahni res huesti hora res hapoyaxihcanihqui, yohinahnen jato hapomahah. ¹³Jaa chonca hapobo ta huesti shinanyaxon jaa yohina huesti sca jaton quiquin hapo hihnon hapomayaxihqui qui, jatihixonbi jaa yanapanquin.

¹⁴Carnero betan ta rehtenanyaxihcanihqui. Carnero betan rehtenanax bi ta hahbetan senenyamayaxihcanihqui. Jaan ta jato rehteyaxihqui qui. Quiquin hapobaan hapo hihxon jatihibi hihbo hihxon jato namanjaquin. Jaa carnero manahibo ta jahuen quenahahbo qui, jahuen caisahbo, jahuen joi ninca-coinaibo —hea jaa yonotinin jaquin.

¹⁵Jaatian sca hea yohiribiqui:

—Hoa min jisí texpabo ta jonibo qui, jano jaa haibo tsini nichi. Jahuen jonibo can, mesco mai meha jonibo, mesco texpa quehabo, mesco nahuabo, mesco joiyahpabo. ¹⁶Jaa yohina, jahuen chonca machanbo min jisi, jaabaan ta jaa hahresti haibo jistahihmayaxihcanihqui. Jistahihmaxon ta potayaxihcanihqui, benejoma sca hihnon, chopanma sca nihnon. Jahuen yora nami ta piyaxihcanihqui. Piquin texejaxon ta chihin sca mapojayaxihcanihqui. ¹⁷Jascajati shinan jaton jointi janin Papan janahah ta jascajayaxihcanihqui. Jaan shinanmaha ta huesti shinanyaxon jaa yohina jaton quiquin hapo sca hihnon jascajati yohiyaxihcanihqui. Jasca ta jayaxihqui qui hihxon Papan yohini quescabi janon ta jascayaxihcanihqui. ¹⁸Jaa hahresti haibo min jisi ta jaton hani jema qui. Janoxon ta jahuen hapobaan huetsa mai mehabo yono yonoyaxihqui qui —hea jaquin.

Babilonia fotojaquetanaibo

18 Jaatian hen jisí bi naihoh quehax botopaqueti huetsa yonoti jahui, Papan coshi hinanah hihti coshi. Coshiyahpahax jahui nihrenenxon cahen mai xabajarenenquin. ²Hihti coshin jaa yohuani, coshin bi res:

—Babilonia janeya quiquin jema ta paquescainqui. Poxocahin sca ta jaiqui. Tiroma yoshinbo jano jihuetai sca tah qui, Satanasnen yoshinbaan jati sca tah qui. Jano rishta hihsabo paichi, rahnintibo

jano paiti tah qui. ³Hea nohuejahue, Hea nohuejahue, hahxon ta jatihibi mai mehabo hahmanishqui, jahuen hahmatibo sca jaabo hihnon, hahbe tiromabo. Mai meha quiquin hapobo ta hahbetan tsininishqui. Hicha patorobaan ta jaa tsini haibo rajisti shama copi hicha jonibo hahan queenmaxon tsama coriqui bihcannishqui—hihqui jaa coshi yonoti.

⁴Hen nincacah bi naihoh quehxayohuanai jaribih:

—Jaa janinhax piconahue, heen joni-baan. Hahbe hohchayahpayamanoxon janohax piconahue. Jaa casticanquin hen matoyabi casticanyamanon piconahue. ⁵Jahuen hohcha ta nai queya tiha tsamatihqui. Jan tiromani copi ta Papan casticancatsihscaiqui. ⁶Jaa jema mehabaan tiromajapahoni quescabijaquin jato hahnahue, copiquin. Jaabaan hahni quescabijaquin hahxon bi rabejaquin sca hahribinahue. Jaa jema mehabaan huetsa jonibo tiromajapahoni quescabijaxon bi rabejaquin sca jaa jema tiromajanahue. ⁷Hea ta rajisti siri qui, jahuabi tah hen pahiyamahi hih ta japhonishqui. Jan hicha janí quescarihbii sca tsama hisin tenemanahue. Hihti benamanahue. Hea ta quiquin hapo haibo qui, yononma tah hen hihyamahi, jahuentianbi tah hen benatimahi hih ta japhonishqui. ⁸Jaa copi ta jaa huesti netenbi non rishquihah mahuanoxihcanihqui, benanoxihcanihqui, pihan hihquish mahuanoxihcanihqui, cohahah ta queyocahinyaxihcanihqui. Jascapahbo casticannicah ta Hihbo Dios qui, hihti coshi —hihqui.

⁹⁻¹⁰Hahbetan hihresax hohchapahoni hapobo ta jaya huaohihnoxihqui qui, jaya jiihihqui. Mapohax hani cohin xóhtóhinhnatai hochoxon jisish ta huaohi-hquish jahuen casticanti qui raquetax hocho res nihrenennoxihcanihqui.

—Hahrai, noquen hani jema, noquen coshi Babilonia jema. Jaatian huesti ta jatihibi pahen mia merahihqui, Diosen raanah —hih ta janoxihcanihqui, hapobo.

¹¹Jaton nontin napocohtaibo tsoanbi jato maronyamascaiya ta patorobo rihbi benatax jaya huaohihnoxihcanihqui. ¹²Maromacatsihquin jaabaan bohi oro bero romishin, yami pehneniyahpa mai, poquinxon nanehah macan copibo, hahan paronohtjati quescapahbo, morobo, joxo chopabo, chopaboyanconihbo, seda chopabo, joshin chopabo, hinini jihuibo, yohina xeta jahuaborabo, quenchabo quescapahbo siribo jihuibo, bronce, yami, macan pehnenibo, ¹³hahan pitijati canela, yochi, hahan hininjati, yora payotima raho, rasquitax hinintibo, xehatibo, xeni, hatsapoto quescapahbo, trigobo, ganado haniboya hanitahmabo, cabachobo, carrobo, hina jonibo rihbi. Jascapahbo tsoanbi jato maronyamascaah:

¹⁴—Min hihti picatsihpahoni bimibo ta mia janin yamascaiqui. Xoapahonish bi tah min jascayamascai, xaba shama hihpahonish bi tah min jascayamascai, jascapa hihpahonish bi tah min jahuentianbi jascayamascatihi —hihcani.

¹⁵Jaa jema janinxon hicha coriqui cananpahonibo ta jan mapohi copi raquetax hocho manahihtax, benatax huaohihhyaxihqui qui.

¹⁶—Hahrai, noquen hani jema, joxo chopaboyahpa quescapahax, siri macan beroya joxoni moroyahpa hihpahonish bi tah min jascayamascai. ¹⁷Hihti siripahonish bi tah min huestijaquin rishquihah tiromacahinscrai —hihquish huaohihscacani.

Nonti hihbobo jatihibi, nontin cahibo jatihibi, nontin teetaibo, hiaman tee-taibo jatihibi,¹⁸ jaabo jatihibichin cahen hocho nihxon jahuen cohin naihoh xohtóhinhnatai jisish:

—Jascapa jema hani ta jahuenbi yamanishqui —hihcanci huaohihhanan.

¹⁹ Bena benatax mai poto hahrí mapocohtax huaohihcanci:

—Hahrai, janó tah non quebíjistima hiaman cahi nontiyahpabo jatihibichin hicha coriqui bihniqui, janó hicha coriqui janish bi ta histon res tiro-macahinaxqui —hihcanci huaohihqui.

²⁰ Jaa jemahhuan tiromacahinaiya jenimanahue, naihoh quehabon. Jenimanahue, Papan jihuetauhbon. Jenimanahue, Papan raantibon, jahuen joi yohinicabon. Mato copixonquin ta Papan jaa casticanaxqui.

²¹ Jaatian hihti coshi yonotinin hani macan bihxon hian janin potahi hean jisquin. Hani renti tihopa macan. Hiaman potaxon:

—Nescajaquin potahah quesca tah min queyocahinnoxihqui, Babilonia jemahhuan, jahuentianbi jistima sca mia janon. ²² Chimataibo, rehue hahcaibo, behuahibo, musica hahcaibo jatihibi ta mia janin yamascatihiqui. Ni jenquetsahpabo mequeman teetaibo ta mia janin yamascatihiqui. Mia janinxon rentin renehibo ta tsoanbi nincayamascatihiqui. ²³ Tsoanbi ta mia janinxon johue quetejayamascatihiqui. Haibo bichish huanohi ta mia janin tsoanbi nincayamascatihiqui, benohi yohuanai haibobo rihbi ta mia janin jahuentianbi yamascatihiqui. Mia janin jihuepahoni patorobo ta hanibo patorobo janishqui, caibo mahuinquin. Miin yobebaan ta jatihibi mai mehabo paranpahonishqui.

²⁴ Jaa jema janinxon ta retequin Papan joi yohinicabon jimi potamacannishqui. Janoxon ta Papan jihuetauhbo ri-

hbi jimi potamacannishqui. Main jaibo jatihibi retehah ta jaa jema janin jaa hohcha banetihqui —hihqui jaa coshi yonoti.

19 Jaa pecaho sca hen nincakah bi naihoh tsama joni tsinquitax behuahui quescape, coshin behuahibo.

¡Aleluya! Noquen Papa Dios ta noque ji-huemanicah qui.

Jahuen shinan ta hihti siri qui.

Jahuen coshin ta hahcoiniqui.

² Casticanquin ta ponte hahquiqui.

Casticanquin ta sirijacoinihqui.

Jaa tsinipahhuan haibahhuan ta casticancoinaxqui, tsinixon jan mai mehabo tiromajani copi casticancoinquin.

Papan jonibo jaa haibaan reteni ta copiquin sca jaa sca tiromajahaxqui hihcanci behuahi.

³ Jascari behuahax, hihribicani:

—¡Aleluya! Cohoti ta jascabi sca jahuen cohin xohtóhinhnayaxihqui qui.

⁴ Jaatian sca jaa veinticuatro yonox-onnicahbo betan jahuen noyanica yoshinbo raboxonen nichish Papa Dios qui betihihpaquetax:

—Jascari rahán. ¡Aleluya! —hihcanci.

⁵ Jaatian janoxon Papan jisi janinhax yohuanai hean nincaquin:

Noquen Papa Dios qui behuanahue, Papan jonibon, jaa nincacoinaibon, hanibo betan hanitahmabo hahqui behuanahue.

Carnero huanomahibo

⁶ Jascaraibo nincaxon, tsamatay behuahibo sca hean nincaribiquin. Coshin bi res behuahibo, hani huaca mahchi janinhax tejabahiticamahi coroti, coshin bi res terenhihqui quesca behuahibo:

¡Aleluya! Jatihibi hihbo hihxon ta noquen Papan hihboja sca jaiqui.

⁷ Jenimanon benahue, coin coinnon benahue,

hahqui behuanon benahue.

Carnero ta huanoscanoxihqui qui.

Jahuen haibo ta jaya huanoti chopasahuehax nihresscαιqui.

⁸ Pehneni joxo chopasiri hinanah ta jaayahpahax manatihqui

hihcāni. Jaa pehneni joxo chopasapaPan jihuetahbān sirijaquin shinanxonjoni huetsa yanapanpahoniboui.

⁹ Jaatian:

—Huishahue —hea jaxon— Carnero huanohiya piti pihi benahue hihquiboya ta hahan hihti jenimati jaiqui —hea jaquin. Jaa hea huishamaxon:

—Jaa joibo ta Papan joi coin qui —hahquin hea.

¹⁰ Hea jascajaha cahen raboxonen nichish jaa yohuanai qui betihihpaquecatsihqui bi:

—Jascayamahue. Mihbe Papan joni tah hen hea qui, miin huetsabaan hahbe joni rihbi tah hen hea qui, Jesusen joi yohihibaan huetsa. Papa huesti qui betihihpaquehue. Papan joi yohihibo jatihibi ta Jesusen joi yohinicabo qui —hea jaquin.

Cabacho joxoni cahtsahotax jahui joni

¹¹ Jaatian nai quehpemehtaiya hen jisí bi cabacho joxoni. Cabacho joxoni cahtsahotax jahui cahen Papa queenai quescabijanica hahcoinnicah. Ponte hahxon jonibo yononica, ponte hahxon tiromabo namanjanoxon jato betan rehtenannicah. ¹² Jahuen bero cahen chihi quescapi. Jahuen mapo cahen quiquin hapon maitiyahpa. Jahuen maiti janin cahen jahuen Jane jai, huishá. Tsoan honanaima Jane, jaa hues-tichin honanah. ¹³ Jahuen chopasahen jimi bi res, jimi qui maosahca. Jahuen Jane cahen Papan Joi. ¹⁴ Hah-chon sca Papan sontarobo cabacho joxonihbo cahtsahotax becani. Joxo cho-payahpabō rahsi, rishtajoma joxoni siri

jaton chopas. ¹⁵ Jahuen jana janinhax cahen hahan rehtenanti machito quenoya picotan picotani, hahan nahuabo rerati. Coshin bi res ta jato hihbojaxihqui qui. Jato qui sinaxon jatihibi hihbo hihxon jato hihti casticannoxon noquen Papa Diosen raanah cahen jato retehi cahi. ¹⁶ Jahuen chopas qui huishá cahen Jane jai, jahuen quishi qui jascarihbibi. Jaa Jane cahen hapobaan quiquin hapo, hihbobaan quiquin hihbo.

¹⁷ Jaatian hen jisí bi bari namanbi huesti yonoti nihxon coshin quenaquin. Jatihibi hishminbo quenaquin:

—Pihi benahue, Papan mato hichaxon pitijaxonah pihi benahue. ¹⁸ Man pinon ta rehtexoniqui, quiquin hapobo, sontaro hapobo, coshi jonibo, cabachobo, jato cahtsahotaibō, patorojomabo jatihibi, patroyahpabō jatihibi, hanitahmaboya hanibō, nami hichahi pihi benahue —jato jaquin.

¹⁹ Hen jisí bi jaa hen jismenoha hino, mai meha quiquin hapobo, jaton son-taroboya hichahi, jaabo jatihibi tsinquiti. Naihoh quehax jahuibo betan rehtenannoxon tsinquicanī. Cabacho caht-sahotax jahui rehtenoxon tsinquicanī. Jahuen sontarobo rihbi rehtecatsihquish tsinquicanī. ²⁰ Rehtenoxon tsinquitaiton bi jaan pari jaton hino yoshin bihquin. Hinon quesa joi yohixonnica rihbi bi-hquin rabebi. Jaa quesa joi yohixon-nicahton cahen jahuen coshin hahxon, rahtexon, hinon janeyahpabō paranpahonish, jahuen santo yocacaibo jaan paranpahoni. Mohitahpa jato rabebi bi-hxon, chihi hianencanya sca jato rabebi potaquin. ²¹ Texebo cahen jahuen Jane janinhax picotan picotanaiton reraxon jato rehtepaquequin. Jato pihi sca jatihibi hishminbo yani yanicasihini cahi.

Mil bari yonohibo

20 Jaatian hen jisí bi naihoh quehax Papan yonoti huesti

botopaqeti. Hihihosí cadenaya jahuí, hahan xehpoti llave rihbi xecohax. ²Joxon cahen jaa capepahhuan yahtanquin. Jaa capepan Jane huetsa cahen rono xeni, huetsa jahuen Jane cahen Tiroma Yoshin, huetsa jahuen Jane cahen Satanás. Mil bari jaa tiroma yoshin nexáscanon cahen jahuen cadenanen jaa nexaquin. ³Nexaxon nemimahhuan qui potaquin. Potaxon jahuen xehpotinin xehpoxon boyaque, jahuen mil bari senennon caman. Jaa pecaho ta basima tahni nihnon hahquirihbi quehpentihiqui.

⁴Jaatian hen jisí bi hahan tsahoxon jonibo yonoti tsahotibo hichahi. Jano cahen tsahotaibo jai, jonibo yononoxon haponahue Papan jato jaah janosahcana. Jesusen joi jeneyamahibo copi tex-tenihbo yamanicabo janosahcana, Papan joi jeneyamahibo copi tex-tenihbo, hino qui betfihiyamanib, jahuen santo qui betfihiyamanib, jaton bemanan qui tiroma yoshiman Jane huishamaya-manib, jaton mequen qui jahuen Jane huishamayamanib, jaabo rihbi janosahcana, textexon rehtenihbo yamanicabo. Hahquirihbi jihuexon cahen Cristo betan mil bari yonocanquin. ⁵Texe yamanicabo jascayamah: jaabo cahen mil bari senennon caman jihuayamah. Hen yohihi Cristo betan yonohibo ta jahuen huenimenonicabo qui. ⁶Criston huenimenonicabo ta jahuenahbo qui, jaan hahxonah hihti jenimahibo. Jaabo cahen mahuayosmabo sca, jenquetsahax hahquirihbi mahuatinab, Papa Dios betan yohuanyaxihquibo, Cristo betan yohuanyaxihquibo. Mil bari ta Cristo betan yonoyaxihcanihqui.

⁷Jahuen mil bari queyoscaiya sca ta quehpexon cainmaha jahuen sipo quinihoh quehax Satanás picoyaxihquiqui. ⁸Picoxon ta jatihibi mai janin jihuetaibo jaan paranyaxihquiqui, jatihibi texpa janin

jihuetaibo paranquin. Gog janeya mai mehaboya Magog janeya mai mehabo. Paranxon ta jato hioyaxihquiqui, Papa Dios betan rehtenani bohábo. Jaan paranxon tsinquihah cahen hichahi topontimahi, texpa quexa mashi bero jai tihi. ⁹Hen jisí bi mai mehabo tsinqui tsinquixon Papan jihuetaibo rehtecatsihquin jano jaabo jai jato bahi xehpohahtanbohancanquin. Papan jihuetaibo rehtecatsihscibaan bi naihoh quehax chihi paqueti. Satanás chibanaibo qui paquexon jato queyobahinquin. ¹⁰Jato parannica yoshin bihxon sca chihi hianencanya Papan potaquin. Jano jan yoshin hinoya jahuen quesa yoshin potani janin Satanás sca potarihbiquin. Jano potahah cahen jascabi mapohi. Chihi tenebahinaxon teneshinaxon jascabijaquin teneti jai, chihi nocayosma.

Yamanicabo tsinquixon noquen Hihbaan jato casticanai

¹¹Jaatian hen jisí bi haaani tsahoti, hihihosí tsahoti joxoni. Hahan tsahoxon jonibo casticanai. Noquen Hihbo hahan tsahoscai bi hean jisquin. Jaan yohi-hah cahen naiyahpa mai yamacahinscrai, jahuenbi yamasrai. ¹²Yamanicabo sca hicha hean jisquin, patoroboya jaton jonibo hihpahonib, Papa Dios bebon nichinah manataibo rahsi. Jato casticanoxon cahen hicha huishayahpa quiricaboo caxquexon huetsa rihbi noquen Hihbaan caxquehah. Jaa quirica huesti cahen jihueticabaana. Jano nichi yamanicabo tiromaboo quen jaabo tiromahi ji-huepahoni huishapaquenihxon jaa joi jato nincamapaquexon sca jato castican-scaquin. ¹³Noquen Hihbo bebon nichinah cahen caibo jene meran canish bi jaa be-

bon sca nichibo, caibo cahen mahuanish bi jaa bebon sca nichibo jaan jato quenahah. Jaabo tiromapahonibo tihojquin jato casticanquin: hihti tiromanibo hihti casticanxon, hashoan hicha tahma tiromanibo hashoan hicha tahmabojquin casticanquin.¹⁴ Casticanquin ta jato jatihibi chihi qui potahihqui. Jaa hian quescapah chihi janin potahihni-hahbo ta hahquirihbi muhuataibo qui, rabejaquin muhuamaha jano sca bane-taibo.¹⁵ Jihuencabaan quirica janin jaton Jane yamahi quen chihi janin canicahbo rahsi, Papan jato jano potahah.

Naiyabi mai behna

21 Jaatian hen jisí bi nai behna jarescái, mai behna rihbi jaresscái. Jamenoni naiyahpa mai cahen yamas-cái, queyoni. Quebijistima hian rihbi ya-mascái.² Bochiqui sca hen jisí bi Papan jema naihoh quehax botopaqueti jahui. Jahuen Jerusalen behna, jaan raanah botopaqueti jahui. Hihti siri, huanom-aha jahuen benen bijnon haibaan hihti siri rajotibo sahuehi quescari hahan hihti siritiboya Papan jema botopaqueti.³ Hen nincacah bi Papan janoxon yonoti janinhaxcoshin yohuani:

—Jisnáhue. Jonibo tocan ta Papan jati qui. Jato betanbi ta jihuencoxi-hquiqui. Jaabo rihbi ta jahuen jihuetadbo hihnoxihquiqui. Papa Diosen ta jato jihuequihnnoxihihquiqui.⁴ Jaan ji-huemaha ta tsoabi benayamascatihiqui, tsoabi muhuayamascaí, tsoabi huao-hyamascaí, huiniyamascaí, hisinyamascaí. Jascápahonish bi jascayamascaí — hihqui.

⁵ Noquen Hihbo sca yohuani:

—Jisnáhue. Behna sca tah hen jatihibi hahquirihbi janahi —hihqui. Jascaxon hea sca yohiquin:

—Huishahue. Nea hen mia yohihi ta hihcoinai joibo qui. Hen yohihi quescabi ta jatihibi. Huishahue.

⁶ Hen huishascanon sca yohuanrihbihi:

—Hen tah hen queyoscai. Hea tah hen jatihibi hihbo qui. Jatihibi jananixon tah hen hean queyohi. Jiricatsihquibo tah hen hahan jihueti jene hean xehamatih, hinanresquin.⁷ Jascapa tah hen hea tenexonnibo hean hinanai. Hea ta jaton Papa Dios qui, jaabo rihbi heen baquebo.⁸ Caibo cahen jascapahmabo: teneti qui raquetaibo, nincacatsihyamahibo, rahn-inti rishtayahpabo, joni rehtehibo, tsinhibo, yobebo, santo yocacaibo, jatihibi quescabo, jascapahbo tah hen chihi janin potahi, rabejaquin hean muhuamahi rahsi ta chihi janin canicahbo qui —hea jaquin.

Papan Jerusalen jema behna

9 Jaatian, hen jisí bi jaton siete tasonya canicahbo huesti hehqui jahuí, Papan jayaxon mai casticanai pahe boxonnica. Joxon sea:

—Johue. Carneronen bihnoxihqui jahuen haibo mia jismanon johue.

¹⁰ Hea jascajaxon, hani mahchi queya janin heen yoshin boxon, noquen Hihbaan Jerusalen jema hea jismaquin. Papan raanah jaa jema naihoh quehax botopaquetai hea jismaquin.

¹¹ Xabayahpa jema, Papan xabapan xabati. Copi macanbo pehnetihcamahi, jaspe macan non jisquin hoque pecabahinquin jai quescari.¹² Hani chiqueyahpa, queyani. Jahuen chique cahen doce xehquiyahpa. Xehqui tihibi janin cahen Papan yonoti huesti quenichi, jatihibiyanish doce yonotibo quenichi. Jahuen xehquibo cahen janeyahpa rahsi, xehqui janinbi huisha rahsi. Jaton Jane ta Israeli doce baquebaan Jane qui.¹³ Bari cainai quiri quimisha xehqui janon, chiponquiri quimisha rihbi, reboquiri quimisha rihbi, jari bari cahi quiri quimisha rihbi.

¹⁴ Chiquequin macan tsamanhihninoxon

cahen hahqui tsamantibo macanbo jaribibi, doce queco hahqui tsamantibo. Hahqui tsamantibo macan quecobo cahen janeyahpabo rahsi, carneronen raantibaan janeyahpa.

¹⁵ Hehbetan yohuanai yonotinin sca hahan toponti oro taxo xecoxon jaa jema toponscai hean jisquin. Jahuen-tihopa hin hihxon jema toponxon, jahuen xehquibo toponrihbixon jahuen chiquebo toponpaquequin. ¹⁶ Jaan toponah cahen jahuen nenque jatíhi janon, jahuen queya jatíhi rihbi janon, jahuen naxba jatíhi rihbi. Jahuen nenque hihqui quescarihbibi ta jahuen naxba qui, jahuen topontinin jaan toponah dos mil doscientos kilómetros. Jahuen nenque, jahuen naxba, jahuen queya, jatíhixonpa rahsi. ¹⁷ Jahuen chique toponah cahen jahuen queya sesenticuatro metro, jonibaan toponai quescajaquin jaan toponah.

¹⁸ Jaspe macaman chiquecah cahen yancon shama. Jema cahen oro bi res, oro pionihax bi non jene nexnani jisquin hoque pecabahinai quescapi. ¹⁹ Hahan chique tsahontibo cahen hihti siribo macan berobo copibo hueonah, hihti siri hihnon. Naman meha queco cahen jaspe. Jaa cahchian tsahotai cahen zafiro. Jaa cahchian tsahotai sca cahen ágata. Jaa cahchian tsahotai sca cahen esmeralda. ²⁰ Jaa cahchian tsahotai sca cahen ónica. Jaa cahchian tsahotai sca cahen cor-nalina. Jaa cahchian tsahotai sca cahen crisólito. Jaa cahchian tsahotai sca cahen berilo. Jaa cahchian tsahotai sca cahen topacio. Jaa cahchian tsahotai sca cahen crisopasa. Jaa cahchian tsahotai sca cahen jacinto. Jaa cahchian sca cahen amatista. ²¹ Jahuen xehquibo ta moro qui, xehqui tihibi huesti moropah-huanen xehquijaha, jatihibiyanhish doce xehqui. Jema chicho cahen oro bi res, oro que bi jisquin hoque pecabahinquin, hihti siri.

²² Hen jisí bi jema janin jano tsinquixon Papahon shinanti xobo yamahi. Carnero betan Papa Dios janobi hihqui copi jascapa xobo pishinyamahi. Jatihibi hihbohax bi noquen Papa Dios janobi hihqui. ²³ Bari rihbi jano pishinyamahi, hoxne rihbi pishinyamahi. Papan xaba jano xabatai copi bari xabati pishinyamascai. Carnero ta jahuen xaba qui. ²⁴ Jahuen xabapan ta jatihibi jonibo nihyaxihqui. Mai meha quiquin hapobo ta shinanquin sirijahax Papa qui siripi yohuani hihcoyaxihqui. ²⁵ Jano yame yamascai copi ta jahuen xehquibo jahuentianbi xehpoyamayaxihcanihqui. ²⁶ Noquen quiquin Hihbo qui hihti siripi yohuancatsihquish ta mesco jonibo, hicha mai mehabo jano hihcoyaxihqui. ²⁷ Papan jihuetahmabo ta jano hihcotimahiqui. Papan jihuetahmabo, rishtayahpabo, quescabo, jascapahbo ta jahuentianbi hihcotimahiqui. Carneronen jahuen quirica janin jahuen jihuetahbaan jane huishá cahen jaabo rahsi jano hihconicabo.

22 Papan yonotinin hea jismahah cahen janoxon Carnero betan Papa Diosen jihuemahi janinhax huaca tejabahтай hean jisquin. Jahuen jene cahen nexnani siri, jaa jene xehahax non jihuescatihi. ² Jema naponbi bahi naxba janon, jaa bahi naponbi sca jaa huaca tejabahti. Huaca quexa nih-beccoinai cahen hahan jihuetai jihuibo. Doce bimiboyahpa jihui, hoxne tihibi huetsa bimiyahpa. Jahuen pehi rihbi cahen hahan rahomehti, nahuabo han-han rahomehti. ³ Jahuabi tiromabo ta yamascatihqui. Jaa jema janinbi ta Papa Dios betan Carneronen jato jihuemayaxihqui. Jahuen jihuetahbaan ta hahbetanbi hihxon hahqui jaton shinan camayaxihqui. ⁴ Jaton bemanan qui huishá ta Carneronen jayaxi-

hquiqui. Carnero bejisaiibo ta jayaxihcanihqui jahuen jihuetahbó.⁵ Jano ta yame rihbi yamascatihqui. Johue quetejati pishinyamascai. Bari xabati rihbi pishinyamascai. Noquen Hihbo Diosenbi jato xabajaha huetsa xaba pishinyamascai. Jahuen jihuetahboxon ta queyoyamanox manaquein jascabijaquin sca yonoxonyaxihcanihqui.

Jesucristo nea pishca sca jaonahi

⁶—Hihcoin tah hen jai. Hen mia yohihi quescabi ta jayaxihquiqui. Papan ta jahuen yoshin jato hinanxon jahuen joi chaninicabo yohanmanishqui, jahuen joi yohihahbo. Hea sca ta raanaxqui, jahuen yonotixon hen jahuen jonibo yohinon, janoxihquibo hen jato yohinon.

⁷ Histon tah hen mato qui catihi hihta jaiqui. Nea hen mia huishamahi joibo bihcoinax ta nincacoinaibo hahan jenimati jaresscαιqui —hea jaquin Papan yonotinin.

⁸ Jaan jismahah tah hen nincaxon jisiqui, hea Juaman. Nincaxon jisish tah hen hea yohihi yonoti naman raboxonen nichiqui, hahqui betihihpaquenoxon.

⁹—Jascayamahue. Mihbe hahxonica tah hen qui. Papan joi yohinicabo, jahuen hahxonnicabo hihqui quescaribinica tah hen qui, hen mia huishamahi joi nincacoinaibo Papan hahxonnicabo hihqui quescaribinica. Papa huesti qui betihihpaquehue —hea jaquin, raboxonen nichiton.

¹⁰Jascajaxon:

—Hen mia huishamaha jatihibi jato yohipaquehue. Hen mia yohihi quescati ta nea pishca sca jaonahiqui.¹¹ Tiromparihibo jascabi tiroma janon. Rish-tayabo jascabi rishtayabo janon, sirijaquin hahcaibaan jascabijaquin siri-jahi jan janon, Papanahbo jascabi Panahbo janon —nihqui.

¹²—Coiramenahue. Histon tah hen mato qui catihi. Hea teexonaibo copijahi tah hen catihi. Hea hahxonpahonibo quescabijaquin tah hen jato hahxontihi, jan hahxonni betan senenjaquin.¹³ Hea tah hen jatihibi hihbo qui. Jatihibi jananixon tah hen hean queyohi. Hean hihmahah ta jatihibi jaiqui. Heanbi tah hen queyorihbihi.

¹⁴ Jaton chopá pahtsacaibo ta hahan jenimati jaiqui. Jaabaan ta hahan jihuetai jihui quiha piti hahtipahiqui. Jaabo ta jema xehquibo janin hihconicabo qui.¹⁵ Hihcoyosmabo cahen hocchiti quescapa jonibo, yobebó, joni rehtheibo, santo yocacaibo, quesahibo, quesaquaquin paranaibo, jascapahbo ta hihcoyosmabo qui.

¹⁶—Hea Jesusen tah hen heen yonoti mato qui raanai, hen mato yohihi joibo man Papan baquebo nincamanon tah hen raanai. Hea tah hen Davidi xo-ha qui, hean hihmahah ta jaa janishqui, jahuen chini rihbi sca tah hen joni qui. Quiquin xabaya tah hen qui, Xaba Hihbo.

¹⁷ Johue hih ta Dios Yoshin jaiqui. Johue hah ta Criston bihtibaan jaiqui. Nincaxon Johue hahnahue maton rihbi. Jiricatsihquish benahue. Queenxon hahan jihuetai jene bihresnahue, hinanresa tah qui —hah sca noquen Hihbaan hea jaquin.

¹⁸ Nea hen huishahi joi nincaxon huet-sajayamanahue. Man honannon hihxon ta hen mato yohihi. Hean huishahi qui huetsa joi sca rechihibo ta Papan rishquiyaxihquiqui, nea quirica janin jai quescabijaquin.¹⁹ Nea joi man texe potahiya ta Papan rihbi mato jahuen hahan jihuetai jihui bichinyaxihquiqui. Huishaxon hen mato yohiha jema janin rihbi ta jascapahbo hihcomatimahiqui.

²⁰ Nea joibo huishamanicah ta yohuanihqui. Mato qui tah hen histon catihi hihqui yohuani. Jaa copi tah hen

Jascari rahān. Johue Hihbo Jesusen, ²¹ Noquen Hihbaan shinanya sca
hen jai. jihuenuahue.